







Delamonce invenit

F. A. Aveline Sculp.

HISTORIA MORBORUM

QUI ANNIS

MDCXCIX. MDCC. MDCCI. MDCCII.

VRATISLAVIÆ

GRASSATI SUNT,

A COLLEG. ACAD. LEOPOLD. NAT. CUR.

VRATISLAVIENS. IN LUCEM EDITA.

Opus variis Casibus & Cautelis Practicis, Judiciis item de Remediis,
& vera Curandi ratione instructum.

ACCEDIT APPENDICIS LOCO

I. TRACTATUS DE EXPERIENTIA,

In quo natura Experientiæ describitur, & quam caute comparanda
ea sit, explicatur.

II. OBSERVATIONES PRACTICÆ DE HYDROPE PECTORIS,


A CCLL. Acad. Leopold. Nat. Cur. Vratisl. editæ.

PRÆFATUS EST

ALBERTUS HALLER,

M. Phil. D. M. Anat. Bot. P. P. O. Archiater & Conf. Aul. Reg. M. Brit.

Soc. Reg. Londin. & Upsal. Sod. & Reipubl. Bernensis Ducentumvir.



LAUSANNÆ & GENEVÆ,

~~S.~~ptibus MARCI-MICHAELIS BOUSQUET & Sociorum.

MDCCXLVI



LECTORI &c.

ALBERTUS HALLER.



UANDO Morborum Vratislavien-
sium historiam edendam sibi sum-
sit *Bousquetus*, me in primis, qua
est humanitate, selegit, cujus Præ-
fationem novæ editioni utilis libri
præfigeret. Neque ego detrectare
laborem potui, qui Bernensis civis
essem ejusque Reipublicæ adscrip-
tus Senatui, quæ *Bousqueti* indus-
triam Academiæ suæ Laufannensi

decori & emolumento fore olim speravit, eamque spem lu-
culentis testimoniis demonstravit, & respondentem suæ opi-
nioni, atque a decem fere retro annis non sine publico com-
modo in optimis Scriptoribus edendis occupatum experta est.
Sed breves meæ horæ sunt, debitumque aliis operibus otium
ita arctum est, ut in hanc Præfationem tempus multum im-
pendere, aut aliquam partem artis nostræ minutius tradere
minime mihi liceat.

Sufficere adeo credidi, si aliqua adferrem, ex quibus constaret, utilem & egregium librum esse, quem *Bousquetus* ederet.

Auctores habuit Naturæ Curiosos omnes, MAXIMILIANUM PREUSSIUM, MICHAELEM PAULI, GODFREDUM KLAUNIG, SAMUELEM GRASSIUM, CAROLUM OEHMB, sed in primis CHRISTIANUM de HELWICH, cujus etiam calamo societas usa est (a). Clinici omnes, magnam sibi in elegantissima & opulenta, & satis populosa urbe auctoritatem conciliarunt merendo. VRATISLAVIÆ enim fasti emortuales eundem fere numerum mortuorum habent, quem Edimburgenses (b).

STAHLIANA quidem principia (c) tenuerunt omnes, & plurimum animæ in motubus vitalibus dirigendis tribuerunt. Verum, etsi nondum hoc mentis imperium adgnoscerem, ob rationes alibi fuse exhibitas (d), minime tamen dissimulo, nihil aliqua theoretica præjudicia impedire, quin in practicis experimentis utilis, & eximia STAHLIANORUM industria esse possit. Imo vero animus horum virorum alienior ab elegantis sermonis, Litterarum, Botanices, Anatomes (e), contractis ad angustiores limites ingenii viribus, eadem ratione acutius potest in practicis vidisse, qua vulgo solent, qui in unico objecto sibi placent, in eo excellere. Deinde Stahliani, ab ipso suo PRÆCEPTORE fere ita instituti sunt, ut in morbis non plurimum medico agendum esse persuasi, naturæ pleraque relinquunt (f).
Sed

(a) Præf. ad Morb. ann. 1702.

(b) Vratislavienses an. 1700. mortuos sepelierunt 1394. Edimburgenses vero an. 1734. habent funera 1149. Vol. IV. pag. 29.

(c) Hinc hæmorrhagiarum per ætates mutatus locus, 1699. pag. 28. corticis condemnatio, 1699. p. 31. sq. podagra a plethora deducta, 1699. p. 121. &c.

(d) Comm. ad Instit. BOERH. II. DCIX.

(e) Nego, quod ex corporis structura

& textura, partium corporis organicarum, non solum specificè, quatenus mechanicæ sunt, sed etiam generice, quatenus textæ sunt atque structæ, quidquam subsit, quod vere ad medicum pertineat, seu medico quatenus tali ulla necessitate cognitum esse debeat, seu ad scopum medendi, restituendi, reparandi &c. utilitatem eximiam adferat &c. STAHL. ad theor. med. proleg. p. 69.

(f) Vide variolarum curationem 1700. p. 146. &c.

Sed eam HIPPOCRATIS in curando rationem fuisse fere suadent Epidemicorum libri, qui observati morbi accuratissimam historiam, medicamenta vero paucissima continent. Qui venæ sectionibus, creberrime repetitis, & mochlicis vomitum moventibus medicamentis acutos morbos curant, ii certe medici symptomatum robur, seriem, naturam passim mutant, & alia pericula evitando inducunt forte aliqua. SYDENHAMUS ipse, qui observandi auctor fuit recentioribus medicis, solebat in morbo novo (g) aliquot ægros fere expectatione curare, ut morbi ingenium disceret nihil turbando. Hujusmodi fere est Vratislaviensium nostrorum medendi ratio, quæ juvare, & leniter monere naturam possit, a tramite retrahere nequeat.

Sed utile etiam institutum mihi videtur, quo epidemias morborum scribendas sibi sumserunt. Iidem Viri, quos modo laudavi, HIPPOCRATES & SYDENHAMUS, non aliis magis inclaruerunt laboribus, quam epidemiarum historiis. Morbi equidem in universum videntur generis sui tenaces esse, & fere eadem constantia characteres intimos conservare, qua plantæ specierum notas per tot sæcula retinent. Ruta, Alliumque eadem nobis sunt, quæ THEOPHRASTO fuerunt: sed etiam Pleuritis procul dubio, & tertiana nobis eadem est, quæ HIPPOCRATI. Verum in hac communi morborum perpetuitate, multum tamen diversitatis esse facile intelligitur, si sanorum hominum in diversis mundi aut regionibus aut ætatibus diversas temperies consideraverimus: & ipsæ denique regiones genium suum non parum inflexerunt. Rhenus olim frequentissimo gelu coibat, ut Galli limitaneum flumen etiam hostiis exorarent, ne patiens dorsum præberet transitoris in mitiores terras ferocibus Germaniæ populis. Omnis aberat a Germania vitium lætitia, & Alces denique, ultimi nunc fere Septentrionis incolæ, saltus tunc incolebant Rheno finitimos. Excisis inde vastissimis sylvis promotus est nivium

deflu-

defluxus, diminuta vaporum ex terra halantium copia, & ipsum cœlum ita ficcatum, atque mitigatum, ut non copiosæ solum vites, sed generosæ sint apud Germanos, omniumque frugum se ea regio patientem præbeat. Quidni vero morbi genium deflectant, si ipse denique aer, & cœlum, & anni tempestates mutantur?

Non obscurum est, quo sermo meus spectet. Si morborum minutior historia mutabilis est, si venerea lues nobis alia est, quam CARPI temporibus, si nova Ægypto incumbit pestilentia, si scorbutus nuper malis accessit mortaliū, si denique, quod ubique inculcat SYDENHAMUS, eadem febres subinde aliam & aliam medendi postulant methodum, tunc certe non aliud utilius consilium est, quam epidemias, morborum nempe vitas quasi scribere, & initia & adolescentiam, & declinationem, & variam in variis annis indolem, aliamque, & ad medicationes aut obsequium aut pertinaciam, & cum cœli statu conjunctionem & sympathiam fideli, & naturæ imitatrice manu notare.

Unum, quod addam habeo. Epidemiarum scriptores, id fere clinicis præstant medicis, quod illi botanicis tribuunt, qui *floras*, ut LINNÆUS loqui amat, urbium & regionum scribunt. Sunt certæ & plantæ, & morbi, patriæ suæ tenaces. Ab omni tempore cœcitas Ægypto, ab ævo Galeni semitertiana Romanis gravis & molesta fuit. Quando adeo periti medici, ex multorum ægrorum frequentatione, statum morborum urbis suæ scripserunt, multa ipsis posteris debent, qui morbos patrios in scriptis eorum fere æque facile discunt & adgnoscent, uti ex RUPPII flora, senensis soli plantas distinguimus.

Hæc fere, ut vocant, generalia sunt. Sed peculiariora merita scriptorum nostrorum liceat demonstrare. In compendia medica morbi, & ab iis in primis ætatis scriptoribus, pauci recipiuntur, iique fere simplices. Qui prioris ævi systematicos praxeos auctores legerunt, non possunt non sensisse, quam paucæ febres, quamque simplices, ibi recensentur. Quotus auctor est, coætaneus VRATISLAVIENSI-

BUS nostris, qui petechialis febris (*a*), febris purpuratæ, rubræ illius (*b*) mitioris, & albæ, & hæmorrhoidum (*c*), & hæcticæ (*d*) ex internis viscerum malis multiplis, hæmorrhoidum vesicæ (*e*) & oris, & febrium intermittentium mali moris (*f*) & in primis hydropis pectoris (*g*) fidas, & minutas historias, per sua signa, suos eventus, suasque curationes descripserunt?

Sed non vulgares morborum aliorum varietates in hoc opere reperio, ut botanice loquar, & eventus (*h*), aut ex recuperata valetudine manifestos, aut ex cadaverum dissectionum (*i*) mala conditione excusabiles, & symptomatum pericula.

Effectus deinde felices simplicium medicamentorum, experimento firmatos (*k*), aut vicissim nimias laudes, ab ipsa re confutatas (*l*), passim fidi recensuerunt URATISLAVIENSES.

Morbi denique rariores & observationes (*m*), ut vulgo vocant, magno numero intercurrent.

Differ-

(*a*) 1699. init.

(*b*) 1700. p. 163. seq.

(*c*) 1700. p. 170.

(*d*) 1700. p. 188. seqq.

(*e*) 1701. p. 240. AURELIANO quidem tactas.

(*f*) 1702. p. 342. seq.

(*g*) In propria ad finem dissertatione.

(*h*) Venæ sectio in petechiis funesta, 1699. init. Hæmorrhagiæ funestæ in petechiis 1699. p. 6. &c. Castrationis funestus eventus in herniosis, 1702. p. 327. In fluore albo, ab adhibito balneo aluminoso ulcus uteri, 1700. p. 169. &c.

(*i*) In atrophico hepar friabile siccumque, 1700. p. 189. In alio apposito, abscessus peramplus ventriculi, p. 191. Scirrhus ovarii cum tuba, à frigore partium admissio, 1701. p. 222. Post diuturnum puris mictum & atrophiam ren sinister consumtus, ut sola tunica superesset cum vesicæ calculo, 1702. p. 364.

(*k*) Spiritus vitrioli utilis in vermibus, 1699. p. 31. Cantharides in Ophthalmia ad aurem admotæ noxiæ, in pede vero salutares, 1699. p. 61. & 62. Vires radices Oreoselinii apii folio majoris T. ad podagram, 1702. p. 307. (hæc quidem ex alio). Parietariæ efficacia in ischuria, quando in cataplasma tusa adplicatur, 1702. p. 352.

(*l*) Radix asari in quartana noxiæ effectu adhibita, 1699. p. 94. Nephriticorum aut lithontripticorum immerito laudatorum inertia, 1699. p. 119. & 137. Alcis vis antepileptica vana, 1701. p. 235. Ex auro fulminante morbus coeliacus, 1702. p. 331.

(*m*) Hæmorrhagia penis ab hæmoptysi percussa, & à vesicatorio capiti imposito, 1699. p. 58. Prolapsus enormis intestini recti, cujus interior membrana sphacelata decessit, sanatus, 1699. p. 104. Aneurisma per quinquaginta annos impune gestatum, 1700. p. 165. Diabetes verus lacteus,

† †

1700.

sed inter praxeos tedia nobis nata, eo minimum nomine placebunt, quod nullius Medici nomen famamque lacerent, sed intra debitos modestia cancellos sese contineant. Dùm autem nostra Observatorum nomina legis, cave, nos ambitiosam in his schedulis scientia tabulam suspendere voluisse credas, sed eo id fine factum esse interpreteris, ne historiae laboraret & periclitaretur fides. Si lucubratiuncula hæ non sordent, pensum cœptum pertexemus. Tu autem, quisquis es, Lector, cum nobis benè precaberis Inclyto Senatui Populoque Vratislaviensi, DEUM obtestatus, ut ars, quæ Salutis hominum curam agit, † Civium Sanitatem, suavissimum illud ac pretiosissimum vitæ condimentum, quo nil Divitiæ possunt regales addere majus, præsentem caste servet, dubiam ac periclitantem muniat, amissamque solerter restituat.


† Conf. Castigat. Græbn. p. 7. 8.



I. N. J.



I. N. F.



NONI nonagesimi noni Januarius (a) præterlapsi proximè seculi horridum Vratislaviensibus reddidere Nebulæ & Venti variis vicissitudinibus, potissimum incurrente pluviâ, subinde tamen & frigore, quamvis remissiori, graves. Initium quoque imò majorem ferè partem Februarii sub eadem cœli inconstantia transegimus, nisi quòd alterna frigoris vis majori impetu corpora nostra concuteret, & aer circa plenilunium serenus languentes animos excitaret. Eandem cœli inclementiam ineunte mense Martio experti sumus; non

Constitu-
tio aëris
per tres
menses.

rarò tamen effundebantur ad plenilunium usque, quæ illicò tabescebant nives, & terra pruinis horrebat. Mollior aer vergente ad finem Mense, ac sudum, tellurem fovebat. (b) Primus ergò hic anni quadrans, ut apparet, toto ferè decursu excessit in humidâ constitutione, uti ex accuratissimis tam Barometricis, quam Thermometricis observationibus annotavimus. Morbi, Grassaban- qui in hanc tempestatem inciderunt, varii erant, cùm primis sub Januarii tur morbi principium dolores spasmodici sanguineo-cholericos & melancholico-phlegma- spasmodicos affligebant; Frequens erat arthritidis, prædominabatur tamen pleuritis notha. Hujus initium ut plurimum erat horror levis, ut ambigeres, podagra- imprimis ne in assuetis, an alius morbus successurus esset. Occupabat deinde dolor pleuritis vel scapulas, vel quandam pectoris regionem, sæpè & claviculas, qui ex notha.

A

compres-

(a) Conf. Castigat nostra Græbner. p. 8. 9. (b) Ibid. p. 9. 10. 11. 12. 13. 14.

Dolor lum-
borum.

compressione externâ ingravescibat ; Cum molestia ægri in partem sanam decumbebant ; Pulsus mollis , qualis suevit esse inflammatis partibus carnosis , nec , ut in pleuritide verâ sit , arteriam duram , & quodammodo tensam indicabat ; Urina ruffa sedimentum Tartareum ruffum objiciebat oculis. Sensus punctorii doloris in hoc affectu , ut persæpè notavit D. Helwich , non cum pulsu , sed cum respiratione coincidit. Æstus in illo morbi genere multò mitior , quàm in verâ lateris inflammatione. Corripiebantur malo illo potissimum homines iracundiæ obnoxii , & diætæ aromaticæ & vinosæ dediti , intempestivo frigidi & humidi aëris occurso admissio. In hoc D. D. Pauli & Helwichii observationes conveniunt , exiguum fuisse , quod usu diaphoreticorum in hoc dolore obtineri potuerit , & hic quidem , cum D. Grassio lætior rem subinde & jucundior eventum ex adhibitis temperatioribus diureticis consecutum fuisse meminit. Multos etiam eo tempore scimus questos de dolore lumbos infestante , quem & Medici non satis exercitati , & vulgus sine accuratiore examine , cum ureteres per illa loca ferantur , promiscuè nephriticum esse autumant. Quoniam verò in regione lumborum , quæ quinque vertebrae in longitudine complectitur , post integumenta communia reperiuntur muscoli , vertebrae cum suâ medullâ , nervi ab eâ exorti , præterea etiam pars mesenterii , vena cava & sociæ arteria , intestina item , quâ parte lumbos attingunt , vasa spermatica , renes , ureteres , ac in foemineo sexu uterus &c. in propatulo est , quàm facile medentibus & ægris , nisi ad omnia attendant , error obrepere possit. Torquebatur eodem tempore quisquam dolore colico , ad istum vocatus D. Helwich , cum jam per horas aliquot cum eo malo esset conflictatus , ægerrimè eidem persuadere potuit , non esse nephriticum , in quâ opinione æger erat , sed colicum , qui intra breve tempus etiam facile convenientibus remediis sublatus fuit. Et sanè rerum usus nobis aperuit , parum esse in dignoscendâ nephritide fidendum signis diagnosticis , vulgò notis , qualia sunt , stupor coxæ ejusdem lateris , dolor fixus in parte , & sæpè etiam ad testiculum excurrentes , difficilis urinæ excretio &c. cum hæc symptomata non rarò etiam cum aliis morbis jungantur. Nec minus incerta sunt , quæ ab urinarum inspectione mutuamur , cujuscunque generis illa sit , sive tenuis , sive crassa , sive rubra , sive adsint arenulae , sive desint , nisi simul sanguis excernatur. Nos , etiam si memorata signa non insuper habeamus , nihilominus & ad vomitus , & ad vires ipsas respiciendum esse , multoties experti sumus. Nam licet & vomitus & prostratio virium dolori colico & nephritico communes sint , docet tamen experientia affatim , vomitum quidem in colico dolore , non nisi pleno stomacho , & in principio morbi adesse , in dolore vero calculi & in initio & procedente affectu , quoties dolor repetit urgere , vires item longè magis atteri per tormina colica , quæ miseros lecto affigunt , quàm per cruciatus nephriticos , in quibus non rarò obambulant , imò sæpè violentè nimis corpus commovent. Motus quoque sanguinis hæmorrhoidales circa lumbos dolore tensivo se exerentes , non paucis imponunt , & cum nephriticis insultibus confunduntur. Nonnulli tum quoque diarrhæâ afflictæ auxilium

D. Graf-

D. Grassii implorarunt, & ab eo, methodo continuis demulcentibus debitâ, sine ope adstringentium propriè sic dictorum curati fuerunt.

Arthriticorum numerus cum ingressu hujus anni insigniter auctus fuit (c). Arthritis. Non pauci enim Vini Hungarici (cùm Hungariæ solum totum ferè calce vivâ substratum sit, illa verò calx viva non tantùm corrumpit aquas, ut puteales fermè omnes sint insalubres; sed & hoc incommodi affert, ut vina etiam calculum generent, & Podagricis infesta sint, ac arthriticos dolores arcessant, quâ de re legendus Jac. Tollius *epistol. Itiner. 5. p. 144.*) amatores habitûs corporis turgidioris sanguinei, qui ineunte ætate variis hæmorrhagiis obnoxii, aut artificialibus sanguinis depletionibus assueti fuerant, cessantibus spontaneis illis, aut omissis chirurgicis evacuationibus laticis hujus, arthritici facti sunt, ac didicerunt, tensivos illos inter scapulas circa nucham ac dorsi spinam, lumbos, os sacrum, coxas, de quibus non rarò ejusmodi homines conquerentes audire licet, dolores arthriticis prælusisse. Duæ foeminae, quarum utraque 40 annum superaverat, in arthritidem eâ tempestate incidebant, postquam menses, qui per multos annos creberrimè negotium iis fecerant, plenè substitissent, & erysipelas, quod ordinariò eas hæctenus infestaverat, emanisset. In curâ quorundam arthriticorum post adhibitum externe spiritum formicar. lumbr. *c. &c. dolorem osteocopum notavit D. Helwich, qui tamen anceps adhuc hæret, an in usum horum volatiliû causa istius doloris rejicienda sit.

Sub finem mensis in scenam prodibat febris petechialis, quæ non æquè Febris Petechialis. in infantes, pueros, & senes, sed in foeminas & frequentius in mares sanguineos & sanguineo-phlegmaticos sæviit, ac præprimis iis gravis ac infesta incubuit, qui vino, spiritu vini se obruerant, ac corpus cacochymicum pravâ victûs ratione contraxerant. Typus & mos febris istius sequens fuit: Incipiebat cum quâdam gravedine, tussi, imò & faucium inflammatione & tumore, observante D. Grassio, horrore leviori corpus concutiebatur, hoc cessante reliquo febris decursu toto rarò alius se obtulit, quamvis ex admissione auræ frigidæ ac commotione corporis aut lecti, statim de sensu frigoris conquererentur. Aderat præceps & subita virium prostratio, artubus quasi lassitudine fractis aut contusis. Pulsus arteriarum exilior & imbecillior, frequens tamen & inæqualis erat. Calor, qui horrorem sequebatur, in sanguineis intensior, in sanguineo-phlegmaticis mitior cernebatur. Occupabat iste totum corpus, maximè verò caput, unde in floridioris habitûs corporibus, cephalalgia acutior, rubor faciei, oculi scintillantes, (D. Preussius puerperam, quæ foetum mortuum ediderat, & in hanc febrim lochiis non ritè fluentibus inciderat, curavit, huic tempore exacerbationis lux vagabunda oculis observari videbatur,) vigiliæ, deliria furiosa, jactatio corporis, sitis, &c. reperiuntur; quamvis etiam in iisdem præter anxietatem præcordialem graviolem, spiritum difficiliorem & quasi suspiriosum, ac vehementiorem dorsi dolorem, subinde animadversæ inflammationes faucium, œsophagi, imò & ventriculi.

A 2

Neque

(c) Conf. *Castigation. nostræ Grabnerian. p. 14.*

Neque abesse inflammationem meningum cerebri, confirmat affinitas symptomatum, quæ in hac febre & morbo Hungarico, quem in principio ex genere paraphrenitidum & invalescente malo in phrenitidem mutari extra controversiam est. In sanguineo-phlegmaticis, quorum sanguis sero viscido abundat, calor multò mitior apparebat, qui & olim, ut ex Foresto, Fracastorio, Spindlero constat, hodieque adhuc non paucis imponit ægris & Medicis, à quo fallaci calore forte febris illa maligna vocari meruit, sumptâ metaphorâ ab hominibus malignis, qui aliud fronte promittunt, aliud in intimiori cordis recessu premunt, quibus utique similes sunt hæ febres, quæ calore hoc parum periculi minantur, deinde & ægrum in maximum discrimen, & non rarò in mortem ipsam præcipitant. Calori respondebat sitis satis tolerabilis, & quies corporis sine manifestâ jectigatione, sed debilitas gravis, ac continua in somnum propensio, ac non consueta antea taciturnitas vim morbi evidenter prodebant, anguemque in herbâ latere indicabant. Et his quoque cardialgia, quam sub nomine doloris cordis vulgus describit, ejusque sedem ægri se digito ostendere credunt, dum scrobiculum cordis tanquam locum affectum monstrant, molesta ut plurimum fuit. Lingua modò lento, ac glutinoso succo obducta squallebat, modò fissuris asperis & scabris dehiscebant, aut retorrido calore cum vicinis faucibus arebat. Conf. Willis. *de febr. c. 10. p. 121. 122.* & Ephem. nostr. *Decur. 3. Anni 4^{ti}. append. p. 73. § 74.* Aphthæ quoque interiora oris non rarò obsidebant. In hominibus Melancholici temperamenti, quorum tamen non nimis multi hæc infirmitate detenti sunt, statim ab assumpto alimento vel medicamento flatus & hypochondriorum murmura notavimus. D. Preussius curæ suæ commissas habuit mulieres, quæ tempore exacerbationis summâ correptæ melancholiâ, amarissimis lachrymis de anxietate præcordiorum questæ. Inter illas aliqua debilitate capitis artuumque modò dextri modò sinistri lateris apoplectico-paralytica detinebatur aliàs autem paralyfin linguæ tempore paroxysmi patiebatur. Cholericis hoc peculiare habebant, quòd & loquacitate suâ aliorum aures obtunderent, & calore acriori tangentis manum urerent. Omnes cujuscunque complexionis, graviter nausea cibi & appetitus dejectio infestabant. Sensim deinde æstus invalescebat, ut luculentus calor in partibus externis deprehenderetur. Exerebant se etiam dolores varii, modo pungentes, modò mordicantes. Circa quartum, septimum, imò etiam undecimum diem, in pectore, dorso, brachiis, lumbis & cruribus, maculæ rubentes puncturis pulicum similes erumpebant, aliquando etiam majores, lenticularum magnitudinem æquantes, ut videas non malè quondam à vulgo lenticulas teste Fracastor. *lib. 2. cap. 6. de contagios. morb. vocatas esse.*

Nullum verò levamen ægri ex ista eruptione senserunt, adeoque certum, exanthemata hæc symptomaticè in cute efflorescere. In numero meliorum maculæ rubræ, unde Febris hæc Gallis *purpurata* dicitur, deteriores verò citrinæ, lividæ, violacæ, imprimis si hæmorrhagia gingivarum circa dentes incisivos superioris maxillæ enormior ex observatione D. Grassii (& D. Preussii, qui

qui simile exemplum funestum Hæmorrhagiæ effusissimæ Gingivarum circa eosdem dentes observavit apud mulierem quandam Ictericam in febre petechiali cum maculis nigris & violaceis Ictero superveniente) juncta fuerit; sed pessimæ omnium nigræ erant, præprimis aliquanto majores. Meminimus etiam vidisse unam magnam & latam maculam, similem ferè illi, quam descripsit Platerus *tom. 2. p. 19.* Urina non uno modo comparata erat. Nonnullis tenuis & aquosa, carens sedimento, ab aliis intensè rubra in principio reddebatur; sedimentum ab initio morbi rarò lætum prænunciabat exitum, circa diem verò nonum, decimum quartum & vigesimum fausta omnia sperare jubebat. Nec vanus fuit Fracastorius, dùm scribit, primùm mingi urinas albidas, nam & nos tales hîc vidimus. Suspectæ quidem nobis urinæ statim post emissionem turbidæ & foetidæ, erant tamen, quibus nullum malum portenderent, licet etiam de nescio quâ capitis inflatione ægri simul quererentur. (d) Iis, qui se in petechialibus, urinas sanorum similes observasse scribunt, fidem quidem minimè detrahendam arbitramur, in nostrâ verò epidemicâ hâc febre, nobis ejus generis, non oblatae fuerunt ab ægris, nisi quòd D. Pauli occurrerit dissimile exemplum in aliquo, cui invito faeces elaborerentur, & tandem sudores cum emphoriâ sequerentur. Alvus aliquibus astricta erat & hi ut plurimùm intensiore calore exæstuabant, & præcordialibus anxietatibus obnoxii, dolore capitis immani infestabantur, nonnullis verò contra in fluxum concitata erat, ac excrementa copiosa ac foetida varii coloris rejiciebantur, & in his symptomata mitiora erant per totum morbi cursum. (e) Salutaris admodum fluxus ille post diem septimum observatus & accedente sudore solutionem morbi promittebat. Et testari utique possumus, quòd siccitatem alvi nostra hæc febris pessimè tulerit. Vermes in hâc febre per alvum cum sedibus aliquoties rejecti. Pejus cum iis agebatur, quos Vomitus partim humorum variorum, partim quorumvis assumptorum, aut etiam inanes cum nausæâ & cardialgiâ affligebant. Pessimum omen præbebant & funestum exitum portendebant, præprimis si & singultus iis se comitem adjungeret; fuere tamen, qui & ex his fluctibus, citra naufragium, sub nostrâ directione, & divinâ benedictione ad portum perducti, sed utique rariores, & quantum recordamur, nemo illorum qui ex terrore inciderat in febrim. Hi enim, qui post terrorem hâc epidemicâ correpti, singultiebant, naturæ debitum, quicquid etiam conaremur, persolverunt. Passio iliaca huic febre in quâdam muliere superveniens vitæ filum, teste D. Preussio, eidem abruptit. (f) Sudores effusi primis statim morbi temporibus, non tantùm sine levamine fluebant, sed ab iis etiam ægri pejus se habebant; ii, qui post quartum morbi diem circa septimum, undecimum &c. erumpebant, felicioris eventus indices erant; Udor verò, quo per totum morbum, nonnullorum corpora mdebant, optatissimus futuræ sanitatis prænuncius. De sudore cadaveroso, quem

(d) Conf. *Castigat. nostræ Grabner. p. 15.* (e) *Ibid. p. 18.* (f) *Ibid. p. 21.*

Helmontius notavit, si eo nomine intelligat similem illi odori, qui à partibus gangrenâ affectis exhalans, nares ferit, omninò testari possumus, eum aliquando nos percepisse, & certam inde ægri mortem circumstantibus prædixisse. Facile hinc credimus, quod tempore Petri Salii ex tali odore etiam ii, quibus Sacra Medicinæ nunquam patuerunt, & febres malignas cognoverunt, ac in faustum morbi exitum augurati fuerunt. (g) Mirati sæpius sumus cum Celeberr. Rivino, quando sudorem frigidum, unguisque lividos reperimus in iis, quos æstus internus penè exurebat, sed pessimum semper deprehendimus hanc leipyriam, imprimis, ubi rigor totum corpus pervadebat. Hæmorrhagias quod attinet, eas non semel observavimus, ut & in sequiori sexu, fluxum mensium, qui tamen non semper augurium mortis præbuit, sicut id suo factum esse tempore narrat Hœchstetterus. (h) Hæ excretiones sanguinis gravitatem morbi, imò & periculum mortis minatæ sunt, evasere nihilominus, ut scimus, non pauci. (i) In conjugē Clarissimi quondam Collegæ Nostri Dn. D. Schultzi à DD. Janisch & Oehmb Physicis & Collegis nostris, superiori anno in epidemicâ hac febre copiosissima sanguinis per intestinum rectum rejectio notata fuit, malis ægræ rebus, quippe quæ nullis remediis è faucibus mortis eripi potuit. Præ reliquis autem levi ex causa proni erant ad hæmorrhagias, qui scorbuticâ sanguinis discrasia laborabant, in quibus etiam mira symptomatum ἀταξία plus simplici vice observata fuit. Hæmorrhagias verò in principio febris nostræ paucas, excipiebat debilitas major, alienatio mentis &c. sed in statu, easque copiosas, alvi ficcitas sequebatur.

Prognostica signa.

Fallax quidem & periculosum fuit de febris hujus eventu multorum judicium, plerumque tamen funestum prædicere licuit, quando in ægris signa fuere deprehensa sequentia :

1. Dejectio animi irrationalis & continuus mortis metus, ac lipothymiaæ frequentes à primo morbi insultu.

2. Pulsus parvus ac inordinatus. A nonnullis etiam intermittens formidatur. Verùm præclare notavit Celeberrimus Wedelius, quòd non adeò malus semper sit, si crebriori ictu natura se semper superiorem præstet, id quod nostrâ experientia confirmare possumus.

3. Respiratio citra plethoram laboriosa cum cordis anxietatibus, frequens ac exilis.

4. Vehementissima Virium omnium prostratio. Certè nobis sæpè norma fuit Canon ille Sennerti Nostri : Quo vires fortiores & symptomata mitiora sunt, eò melior morbi eventus sperandus ; contra quò vires debiliores, & symptomata graviora, eò morbus est periculosior.

5. Fastidium & nausea cibi omnis & sitis deficiens, sive statim ab initio, sive post intensiorem soluta, ut notavit ipse Hippocrates *Coacar. prænotion. text. 87.*

6. Motus convulsivi & tendidum contractiones in manuum carpis deprehensæ, præprimis circa declinationem.

7. Deliria

(g) Conf. *Castig. nostræ Græb.* p. 21. (h) *Ibid.* p. 22. (i) *Ibid.* p. 24.

7. Deliria etiam in censum hunc in similibus epidemicis referuntur. Verum cum in nostrâ hac epidemicâ, statim ab initio ferè omnes in delirium inciderint, & tamen vix octavus quisque ex iis mortuus sit, nos non æque terrebant, nisi oblivio, indecens decubitus, ac inverecunda corporis denu-datio iis jungerentur.

8. Dolor bulbi oculorum sine omni ophthalmiæ indicio, sicuti contrâ optimum præbebat prælagium Βαρυκοία circa declinationem, id quod ante nos notarunt tum alii, tum Clariss. Simon Pauli *digression. de febre malignâ*, qui hujus obauditionis causam esse existimat materiam peccantem, quæ ductum cartilagineum, in palatum ex aure meantem, obstruit, ac deinde pyralismo ex corpore exturbatur.

9. Singultus ut plurimum funestus, si vel ab initio morbi vel circa statum intret, in declinatione salutaris; ut observavit D. Samuel Grassius & Maximilian. Preussius. Conf. Sydenh. *in op.* p. 656.

10. Retrocessio macularum & exanthemata citò disparentia.

11. Largius lotii profluvium, cujus memorabile exemplum D. Carolo Oehmb & Preussio oblatum fuit. Ut non absque ratione Scretæ *de febr. Castrens. malign.* p. 174. hanc periculosiorem reliquis criseos speciebus censeat, quia non tantum sanguis limpidiori sero spoliatur, atque pinguiore humo-rum particulæ magis colliquescent; sed quia inde haud inani conjecturâ augurari possumus, sanguinis ac lymphæ cursum in aliquibus partibus remoram pati, unde non solum vasa valdè intumescunt, sed & lotium copiosius per renes elutriatur.

12. Angina, prunella, aphthæ, rarissimè bonæ spei sunt, ut optimè Cl. Stahlius, & nos frequenter notavimus.

13. Coma cum frigore extremorum & stertore, hianti ore, lethale.

14. Tumores capitis & artuum in his febribus, notante D. Preussio, pessimi.

15. Urina atra in principiò febris mala, licet in declinatione mutetur in meliorem, ut notavit D. Preussius & D. Christian Helwich. Item, Urina cruda seu ex claro quasi confusa seu tartareo-citrina obscura nonnihil cum eneoremate disperso flocculoso quasi seu farinaceo aut cum sedimento gravi, viscidò, obscurò, arenosò & agitatione vix dissilienti, ut plurimum funesta.

16. Maculæ in principiò apparentes infastæ, ejusdem commatis sunt violacæ, lividæ, quocunque tempore in conspectum veniant, item atræ. Ratione quantitatis nec nimium multæ, ut optimè Fracastorius, nec nimium paucæ, ut non malè Petrus à Castro, salutem spondent. Inter rariores numerari debet observatio Borelli *Cent. 2. observ. 35.*

17. Lingua, quæ in principio inhorruit, hoc est, interprete Jacotio, frigida, mala est, ut jam in Coacis notavit Hippocrates.

18. Labra liventia aut nigricantia mortem indicant.

19. Nihil verius illò Petri à Castro: Inter pessima hujus morbi auguria & illud ponite, *remedia à principio fuisse neglecta.*

20. Mul-

20. Multiplici experiētiā edocti scimus, unum ex multis signis pravum, multis bonis anteponendum esse, & in necandō ægro plus virium habere, quam plura simul bona in eō liberandō.

Cæterum morbus hic noster nequaquam, ut vulgò à dogmaticis traditur, intra 14 dies finiebatur, sed ad 21 imò & ultra extendebatur. Certe ad 40 usque diem cum malo hoc conflictati sumus. Solvebatur autem rarissimè per hæmorrhagiam, aliquando per abscessum, (cujus duo exempla admodum memorabilia in Ephemeridibus suis notavit D. Helwich) frequenter per sudores, sæpissimè autem tum per hos, tum per diarrhæam. Vidimus etiam febrim hanc solutam & per tumores in variis corporis partibus & cumprimis in ano, & exanthemata miliaria, pedum scabiem, & ipsum icterum. Mutata quoque in phthisin hæc maligna. Alii & per sudores & urinam ac parotides simul ab eâ liberati. Aurifaber laborans febre hac malignâ bubone inguinis dextri infestatur, qui tamen brevi disparet, succedente carbunculo in infimâ parte suræ istius lateris ac in ulcus diuturnum degenerante, decoctis tamen lignorum, mundificantibusque externis, tandem ex voto sanatus, uti D. Preuss observavit.

Curatio.

Cum verò salus ægrorum suprema Medico lex esse debeat, inficiari minimè possumus, nos in omnes versos formas, ut inveniremus methodum tutam debellandi morbum hunc ferocem, donec sufficienti experiētiā fulciremur, eamque deprehenderimus rationem, in quâ jam plurimi nostrum acquiescunt. (k) Quantum ad V. S. quidam Practici in pléthoricis in vigore ætatis constitutis, ab initio metuentes febrem magnam, omninò eam celebrarunt, suasu Mercati, Capivaccii, Fonsæ, Sennerti, Petri à Castro, Rolincii, Horstii, Minadoi, Sorbait aliorumque; scilicet considerârunt hi, quod sanguis, vasis infarctus sudoriferis, quæ apud nos plebs calidissima à Medicis omni modo extorquere satagit, turgectus, modò pulmones ac præcordia oppleat, & anxietates maximas creet, modò noxias hæmorrhagias concitet, modò eruptionem macularum impediât, atque hæc mala imminētia missione sanguinis declinare voluerunt. Sanguis ex venâ eductus, in superiori parte crustâ albâ spissâ tenacissimâ obductus, in inferiori verò, modò floridus & fluidus sine ullâ coagulatione deprehensus, modò concretus & coagulatus, ex observatione D. Preussii. Alii contrâ cum Fracastorio, Thonero, Minderero, Agricola, Rulando, Lotichio, Heurnio, Hœchstettero aliisque censuerunt, V. S. esse omittendam, tum quia vires, quarum maxima habenda est ratio, ita debilitentur, tum quòd hoc modo *μίσμα* non expellatur, nec V. S. prædicta mala evitari queant. (l) In horum numero sunt D. Grassius, Pauli & Helwich, & hic quidem ultra ducentos petechiali febre detentos sine V. S. tractavit, ac ex his vix octo fatis occubuerunt, in illis verò qui proprio consilio, ut non rarò fit, venam sibi pertundi fecerant, circa dies criticos congestiones

(k) Conf. Castig. nostræ Grabner. p. 26. 27. (l) Ibid. p. 38.

gestiones ad caput, deliria phrenetica, anginam, aphthas, aphoniam, alvi siccitatem ac convulsiones observavit. Plurimi quidem sine ope purgantium, teste D. Grassio, Pauli & aliis cum sanitate in gratiam redierunt, nihilominus lenientia eximium habuisse usum, certum est. Tametsi verò statim ab initio satis sciremus, ab usu evacuantium mitiorum, in similibus febribus non ahorruisse Sennertum, Moræum, Donckerum, Riverium, Grülingium, Langium, aliosque, hæsitabamus tamen non parum, donec videremus eos, quibus re pensitatus deliberatâ evacuans datum, facilius superare morbum. Confirmabamur etiam hinc, quod toto die cerneremus, diarrhæas, si non utiliter, absque damno tamen petechizantibus concitari; unde facile concludere licebat, nos tutò quoque sic naturam imitari, & cathartico fordes in intestinis hærentes eliminari posse, id quod fluxibus hisce concitatis natura molitur. Juvabamur hæc in re diligentia nostrorum Prædecessorum, qui monuere nos, in ejusmodi febribus cum bonis ægrorum rebus, aluum fuisse laxiorem, ut constat ex Gerhardi Columbæ Messanensis *tractatu de febr. pestilent.* Variolâ in *observ. Med. lib. 6. de febrib.* imò ipso Galeno *libr. 5. Meth. medend. c. 12.* & Hippocrate in *lib. epidemic.* quo referenda etiam sunt, quæ in *Operibus posthumis* Malpighii leguntur. Ducebat eo nos etiam ipsa ratio, quandoquidem sole clarius in hæc febre nostrâ adesse impuritatem sanguinis & corruptionem, quam Veteres fortassis non ineptè putredinosam dixerunt. Notum præterea putridam materiam hanc, citra cujus excretionem sanitatem sperare minimè licet, non esse ejusdem naturæ, sed aliam esse tenuiorem, ac quasi halituosam, aliam esse serosam ac salinam, aliam crassiorem submucidam, ac per diversa excretiora ex corpore ejici posse, hinc verò prompta illatio erat, partes illas mucidas ac salino-oleosas, nomine biliosarum vulgò descriptas, in quas motu intestino putredinosus sanguis fatiscit, commodissimè per intestinorum volumina ex corpore exturbari, prout halituosæ illæ per cutis poros, & salino-serosæ per urinarias vias commodissimè ex corpore exeunt. In usu hîc cum aliis D. Michael Pauli potio evacuans Sydenhamiana in dosi aliquantum minori. D. Helwich familiaris est pulvis ex antimon. & nitro depurat. tartar. vitriolat. ac grano uno vel duobus scammon. sulphurat. quibus apud ditiores etiam grana pauca Auri fulminantis, certis ex causis, addit. Quibusdam placet, more Wedeliano, lenientibus addere, quæ simul ad malignitatem habent respectum. Ita meminimus, quosdam radicem scorzon. scordium c. fol. Senn. & Rhabarb. Alexandr. &c. decoqui jussisse & ægris suis haustum præbuisse. Vomitoria in febris epidemicæ principiò hominibus phlegmaticis aut melancholicis robustis & nauseantibus, præsentē conatu vomendi, interdum cum successu data. Cæterum ferè tota cura bezoardicis absoluta à nobis fuit. Imò à medicamentis alexipharmacis fortioribus, volatilibus salibus, bezoardicis calidis a. spirituosiss abstinuimus, ac abesse volumus theriacam, mithridatium, electuarium de ovo, spirit. tartar. C. C., viperar.,

rar., elix. pestilent. Croll. olea bezoardica &c. decantatissima aliàs remedia, quia vidimus ea, hâc in febre epidemica obfuisse magis, quàm utilitatem attulisse. Et hinc iterum iterumque cautelam Raymundi Mindereri *de pestil.* p. 214. & Augustini Thoneri *Observ.* p. 64. 65. commendamus. Nec vanum Celeberr. Schelhammeri de tincturâ bezoard. D. M., cui nos etiam spiritum theriacalem, imò & alia ejus generis jungimus monitum. Omnino nobis expertis credi postulamus, ea febriim & symptomata non sine periculo intendisse. Quidam tamen nostrum calidiora cum analeptics remixta præscripserunt, quando suspicabantur, quandam quasi coagulationem sanguinis fieri, in debilitatibus etiam majoribus cum pulsu languido, in retrocessione macularum, nec non post terrorem, admissum frigus, &c. Alii verò ex nostris, unicè bezoardicis & sudoriferis temperatis morbum debellare constanter fategerunt, ut plurimum feliciori exitu coronati. Scilicet justo tempore à nobis exhibebantur ægris, pulveres bezoard. D. Senert. Rhumbaum., pulv. polychr. Döring., Panonic. rub., aut ex tempore componebantur alii ex C. C. philos. ppt. unicorn. ver., matr. perlar. ppt., lap. 69. coralliis ppt. succin. ppt., antimon. d., bezoardicis mineralibus & chymicis variis &c. Lap. bez. occid. & orient. terrâ sigillatâ nostrati, Cinnabari nativâ, & quod utramque semper paginam implebat, nitro. In formâ guttarum propinabatur à nobis M. S. essentiâ scordii saturatior, essent. myrrhæ, diascordium quoque Fracastoris (licet compositio non adeò concinna sit, & ex sudoriferis & adstringentibus constet) in aquâ bezoardicâ dissolutum, admixto syrupo convenienti, præprimis verò illo, quem acetositatis citri officinæ vocant, expectationi nostræ satisfecit, & magno cum successu tot ægris à nobis præscriptum fuit. Et hæc respectu ad causam morbi habito ordinavimus, conati venenum, quod vulgò in his febribus accusatur, expellere per placidum sudorem, seu potius madorem, in quo natura nobis præire videbatur, dum ipsa sæpè & in principio & decursu sudores movet, & ad superficiem corporis maculas promovet. Motus verò sudoris & macularum ad cutem egregiè, tum fortu lectorum, tum frictionibus adjuvari potest. Nunquam verò ausi sumus dorso applicare unguentum Aëtii, nec morem Indorum à Taverniero descriptum, in rem nostram vertere licuit. His enim externis perspirabilitas cutis egregiè promovetur. Ab alexipharmacis calidioribus, quæ malignitati opponi debere vulgaris persuasio est, nobis temperavimus, quia nec venenorum, multò minùs venenatorum *μιασμάτων* natura cognita est, adeoque in Democriti puteo adhuc vera fermentorum malignorum alexipharmaca profundissimis tenebris immersa latent. Nec exciderant ex memoria illa Sydenhamii in *Schedul. Monitor.* p. 681: malignitatis inventionem generi humano longè ipsâ pulveris pyrii inventionem lethaliorem. Verum non satis erat, energiæ causæ occurrere, ad ægros ipsos oculi etiam erant convertendi. Ex parte itaque subjecti, indicatio urgebat cordialia & roborantia efficaciora, præprimis, quia frequentissimè vires inopinatò concidebant.

cidebant. Et sic vinum aquâ dilutum petentibus D. D. Helwich & Graffius, freti experienciâ & autoritate Bartholini *Cent. 6. Hist. 7.* aliorumque, moti etiam exemplo D. Acoluthi, Collegæ quondam, nunc desideratissimi, quamvis diætâ exactam aliàs rigidè exigant, tandem concesserunt, cum sub febris ingressum præfractè negâssent, ægrosque eximiè haustu hoc recreatos esse experti sunt.

Fuere, qui quosdam ex nobis, præprimis D. Helwich, propter crebrum cinnabaris nativæ usum clanculum apud ægros fugillarent. At illi insignis hujus medicamenti divinas propemodum virtutes protervè ignorant, quas ex Cratone ipso, Joh. Quercetano *in tetrad. capit. affect. c. 33.* Daniel. Ludovici, Wedelio aliisque, si ignavia & livor permetteret, discere possent; sed fatuum foret, prolixè vim nervinam, cephalicam, diaphoreticam, præcipitantem, anodynâ &c. cinnabaris demonstrare, cum rudes etiam seplasiariorum famuli ex crebro Medicorum omnium usu eam dudum calleant. Mirabitur autem quisquam à nobis in recensu medicamentorum præteritam esse camphoram, cum hætenus inter tot bezoardica composita, in quâcunque formâ unanimi quasi consensu fuerit adoptata. Enimverò scire licet tantoperè laudatam camphoræ virtutem alexiteriam (externum ejus usum in multis affectibus incomparabilem esse, agnoscimus lubenter) niti nuda traditione & opinione hominum, ac in re ipsâ in febribus hisce malignis camphoram internè plus detrimenti, quàm auxilii adferre. Deferimus causæ hujus cognitionem ad circumspectæ experientiæ tribunal, ac sententiam nobis gratam pollicemur, postquam vanitas prætensæ eximiæ hujus virtutis (resistere enim putredini ac venenis eam volunt, ob sal volatil. balsamic. & resinofum, quo acidis contrariatur, & sic etiam putredini, quæ subinde acidum habet concomitans, ut loquitur Hoffmann.) omnibus ferè innotuit. Nec symptomata à nobis neglecta fuerunt. Inter ea vulgò refertur diarrhæa, quo jure id fiat, vel ex antecedentibus patet. Eam certè, nisi esset colliquativa, & plenariam sanguinis putredinosam dissolutionem argueret, aut inflammationi intestinorum superveniret, nequaquam suppressere studuimus. Quin imò non rarò laxans ordinavimus, ac internè per totum morbi cursum, nitrosa cum sufficienti potius quantitate eâ intentione ægris imperavimus, ut ventriculus & intestinorum volumina ritè abstergerentur, & materia biliosa acis ac urens è corpore proscriberetur. Quoties tamen suspicabamur, alvi profluvia excedere modum, ac dejicere vires, quas sub tali fluxu ritè conservare nobis cordi erat, nitrum in exiguâ & refractiori dosi præbebamus, interpolabantur terrei pulveres aut diascordio Fracastor. ei frænum injiciebamus, ac id tantò magis, si tormina majorem facerent molestiam. Ab astringentium usu, in compescendo alvi fluxu, gravissimos angores, miras corporis jectigationes, deliriorum & cephalalgiae incrementa, majorem linguæ scabritiem, squalloremque, inflammationem & aphthas plerique nostrum non semel notarunt. In iis, qui, loco diarrhææ, singultuosâ car-

diagiâ corripiebantur, & perpetuo vomendi conatu laboriosissimè fatigabantur, præter nitrum vix ullum aliud laude & commemoratione dignum præstitit effectum. Isti ægri, qui diætæ vinosæ alias adsueti, ad hæc pathemata dispositi erant, usu etiam pulpæ citri sublevati sunt. In æstu, & ejus pedissequâ fere indivulsâ siti omnibus prælaudatum antea nitrum cum subacidis, succo citri, bacc. rub. idæi, spiritu vitriol. philosoph., vitriol. dulc. vino. granator., berber. ppt. &c. factum fecit. Et proinde hîc malè rem gessisse putandi sunt illi Medici, qui nihil lamentationibus æstu exultorum ægrorum moti, fumosis suis sudoriferis & turgescientibus bezoardicis miseros tantum non enecârunt.

Dolores capitis in progeßu morbi aliquantulum sublevati ab usu unguenti alabastrini, inter initia tamen tacito missavit medicina dolore. Graves pectoris oppressiones & anxietates, nullis epithematibus cordialibus, nullis linimentis pectoralibus cedebant, sed usu camphoratorum externo mitescere videbantur. Vigiliæ etiam per multas noctes continuatæ non multum ægrotantibus obfuerunt. Ab usu anodynorum nullum hîc auxilium, quin è contrario post eorum usum pulsus, & consequenter etiam motus sanguinis deprehensus est languidior, sensuum *ἐνέργεια* debilior, exclusio recrementorum per quascunque vias impeditior. Unde non meminimus, à quoquam nostrum opiata in usum fuisse in curâ hujus febris vocata, nisi quod in principio, post emeticum aut catharticum, D. Preussius, Sydenhamium imitatus, aliquando opiata in refractâ dosi dederit optimo cum successu. Deliria exoriebantur vel ab æstu & sanguinis stasi, vel ab impatientiâ, aut mortis timore; Quæ posterioris generis erant, blanda vitæ meliorisque valetudinis spe ac argumentis moralibus sedabantur, prioris generis autem eandem cum febris curam poscebant. Nec segnia hic vesicatoria, falsumque comperimus Fouscæ assertum, vesicantia scilicet augere calorem, vigilias & deliria intendere, sed experientia nostra pulchrè sententiam Riverii, Horstii, Bartholini, Sennerti aliorumque eadem commentantium, in re ipsâ fundatam reperit.

Convulsiones ab initio quidem exanthemata prænunciabant, & bezoardicis tollebantur, sub finem hæmorrhagias indicabant nonnunquam in vegetioribus, in debilioribus verò ipsam mortem.

Hæmorrhagiæ, præsentē p'ethorâ, symptomaticæ, astringentibus efferrantur potius; externa illa, e. g. applicatio smaragdi, hæmatitis, emissio sanguinis super calidos lateres, colcothar vitrioli &c. non satis efficacia, nitrosa verò internè data, omninò eximii usûs.

In ordinanda diætâ, ferè Sydenhamium secuti, cibos tenues, juscula avenacea, hordeacea, pruna cocta, poma Borsdorffiana commendavimus; fercula falsa, saccharata, aromatibus condita, procul esse jussimus. (m) Potum sufficiente quantitate non negavimus, etsi à frigido studiosè dehortaremur.

taremur. Nam à frequentiori hoc potu alvus redditur fluida, quem etiam rectè celebrat Crato Noster *l. i. epist. 11.* Nonnullis in usu erat cerevisia tenuis, aliis aqua hordei, quibusdam decoctum C. C. citratum, item scorzonæ c. rad. acetosæ, cerasis acidis, passulis minoribus &c. Aërem moderatè calidum esse voluimus, crebrò inculcantes, citra perniciem corpus frigidæ auræ non exponi, ac ab ægris quietem corporis sine jectigationibus exegimus, nec passi sumus, ut corpus liberius erigerent, vel sedentes, vel stantes, vel ambulantes, ne fortè, quod faciliè fieri solet, animi deliquium incurrerent, aut maculæ retrogrederentur.

Animi pathemata, tristitiam, mœrores, metum mortis, quantum in nobis fuit, excussimus. (n) Dierum criticorum adeò scrupulosi observatores non fuimus, gnari, quòd crises varient pro variâ medendi methodo variis anni temporibus, regionibus, vitæ genere, temperamentò ægrorum, viribus &c. quâ de re legi merentur Jonston. *Syntag. Pr. p. 164. 172.* Ettmüller. *Plemp. fundam. Medic. Sanctor. in Hippocr. Aphorism. Panarol. Pent. 3. observ. 39.* Bruno in *propylæo Medic. p. 133.* Waldschm. in *fundam. Med. p. 116.* Georg. Bagliv. *de praxi Med. ad prisc. observandi rationem revocanda p. 256. & seqq.* & hoc tantò magis, quia nondum terminus, à quò initium computationis fieri debet, exactè constitutus, dùm Sydenham, Blancardus & alii, à primo insultu, alii à tempore decubitus in lecto exordium capiunt cum Vidò *Vidiò oper. Med. T. 3. c. 6. lib. 9.* Sennert. & Donckert. in *Ideâ febr. petech. p. 435. 458. &c.*

Ex his verò amicus Lector faciliè videt, quod emergenti hoc morbo nostros Antecessores consuluerimus, & studiosè contulerimus cum iis, quos ipsi descripserunt similes, & non pauca in nostram & ægrorum utilitatem converterimus.

Ejus moris geniique passim febres grassabantur usque ad initium Junii. Frequenter etiam hoc mense odontalgia seu hemicrania laborabant istæ potissimum mulieres, quibus negotium mensium magis impeditum. (o) Egre-
giè proderant decocta emollientia & paregorica, ex flor. sambuc. chamomill. R., papav. &c. ac laudatissimum medicamentum in permolesto hoc affectu est tinctura odontalgica Mynsicht. & Wedelii, quâ cum nec spiritus vitrioli rectificatus Blancardi, nec pilulæ Mural. ex extr. opii, semapii, hyoscyami; nec spiritus sulphur. c. spirit. terebinth. maritatus, cujus encomiastes Blegny est, nec oleum origani, aut alia vulgò nota conferri merentur. Tuebantur etiam dignitatem suam emplastra Sylvii & Ettmülleri.

Nec nulli erant, qui ophthalmiâ vexarentur. Non tantum oculos urgebat inflammatio, cum dolore, tensione acriore & rubedine, quæ ex turgescentiâ vasculorum teneriorum in oculo dependent, sed & dolor capitis gravativus molestus erat, iis potissimum, in quibus oculus circa nervum

B. 3

vum

(n) conf. *Castigat. Nostra Grabnerian. p. 33. Ibid. p. 37.*

vum opticum patiebatur. Quotquot opem D. Helwichii implorârunt, interrogati, an hæmorrhagiam narium in præterlapsis annis crebro experti fuissent, fere omnes se quondam ei assuetos fuisse affirmârunt. De remediis, quæ ad inflammatorium oculorum dolorem tollendum vulgò adhibebantur, rerum usus edocuit nos, aquam chelidonii iis quos æstus sensibilior adurit, propter acredinem minus convenire. D. Helwich non facile aquam hyssopi & fœniculi adhibet, quia propter oleosas ac acres partes iis junctas ei suspectæ sunt. Lithargyrium cum aceto destillato solutum, ac aquis debitâ proportionem mixtum, spem ejus non est frustratum. Sed supra laudem est aqua alia ophthalmica & in creberrimo usu, de cujus efficacia etiam D. Pauli testimonium perhibet. Pinguedine viperarum recenti pruriens acrimonia, quæ haud rarò hunc affectum comitatur, tollitur, ut D. Grassius & alii experti persæpè sunt. Propter vim subastringentem decoctum cort. granator., quò redeuntem singulis ferè annis in orbem molestiam hanc in proprio corpore sublevavit, in amore est D. Oehmb. Quæsitum meminimus, an ophthalmica externa actu frigida, an subtepida veniant applicanda? Posterius nos maluimus & experientiæ suffragium spondemus.

Icterus.

Occurrebant etiam, quos icterus fœdabat. (p) Croceus color in toto corpore, præprimis in oculorum albo, & circum tempora cernebatur, & quæ D. Helwichii & Grassii animadversio est, etiam in venis sub linguâ. Insigni ariditate & scabritie cutis corporis squallebat. Acies oculorum nonnullis obtusa, omnibus verò gravior erat lassitudo ulcerosa, cum somniis turbulentis, dolore capitis & gravativo præcipuè sterni, observante D. Grassio, siti, inappetentiâ, sed, quod mireris, oris amaritudo ferè paucis gustum corrumpebat, quod confirmat Clarissim. D. Hartmanni sententiam, bilem non esse adeò amaram, præprimis, si, quod & hîc fit, cum lymphâ quasi gelatinosâ misceatur. Vexabat quoque pruritus. Alvus nonnullis satis fluida, quasi lienterîâ aut coeliacâ laborarent, aliis, quibus fortè ductus cholodochus omni ex parte obstructus, adstrictior. Homerda argillacea & albida, urina crassior & crocea, serum in extravasato sanguine, ut D. Oehmb & Helwich vidit, eodem inbutum colore, pulsus frequens & parvus, respiratio difficilis, ubi corpus aliquanto vehementius movetur, ac manus ferè semper calidæ. Pingebat verò icterus eò tempore, quod etiam aliàs fit, homines assuetos alimentis viscidis, glutinosis copiosè ingestis, ut & cerevisiis musteis ac fæculentis, unde nonnisi chylus viscidus, & crassior sanguis & lymphâ, obstructionibus gignendis, quas vel in glanduloso hepatis corpore, vel in deferentibus & afferentibus biliaryis ductibus quærere in ictero par est, excitandis aptissimus generatur. Cùm verò hac ratione effluxus bilis ad intestina impediatur, utique necesse est, ut fel intimè sero sanguinis commisceatur, ac, quicquid etiam Hel-

(p) Conf. *Castigation. Nostra Græbnerian. p. 38.*

Helmontius, ac ejus affectu tracentur, cum sanguine ad vasa capillaria delatum citrino cutem inficiat colore. In usum vocata fuere inter aperientia & attenuantia hepatica, marrubium album à Foresto eximie laudatum, cuscuta quoque. Invenerunt etiam locum, & forsan utramque paginam absolverunt martialia liquida præcipue, cum salinis, v. g. tartar. vitriolat., arcan. duplicat., sale absinth., cent. min. &c. Tartarus verò Tartarifatus ad gtt. 80. sæpius adhibitus, interveniente laxativo, & post datâ Tincturâ Mart. cydoniat., D. Grassii suorumque Collegarum spem non fefellit. Nec immeritò Majores nostri specificam quasi vim scripserunt rad. curcum., chelidon. maj., abrotano, croco &c. In idiopathico solum Lindenii decoctum ex rad. cichor., chelidon. maj., herb. endiv., marrub., fragar., fol. Senn. tartaro, toties nos læto exhilaravit eventu. Tulpius quondam ictericos curavit infuso rhabarbari, cui theriacam miscuit, quem imitatus D. Helwich, eventum, quem speravit, consequi non potuit. A purgantibus fortioribus & sudoriferis sollicitè cavimus, ne per hæc serum sanguini subduceremus. V. S. in gravidâ aliquando fuit celebrata bono effectu, neque tamen propterea cum Aëtio præcipuum remedium dixeris, aut cum Theophrasto ordinariè auriginem per V. S. curaveris. Eodem tempore febribus continuis, præproperè nimis die quintâ superveniens quosdam è medio sustulit, quanquam, præter Medicum, nemo ex adstantibus fatalem horam metueret. Et sanè in obscuro adhuc latet, unde icterus tam funesti exitus oriatur. D. Helwich spasmodicam hepatis constrictionem hic accidere conjicit, tum ex anxietatibus & angustiis præcordialibus, tum quòd passiones ægri suas ita describant, quasi persentiscerent, manum præcordia coarctantem, tum ex retractione umbilici in oculos incurrente. Vocabatur is aliquando ad ægrum in vigore ætatis constitutum, tantâ respirationis difficultate laborantem, ut extrema imminere, & ægrotum brevi suffocatum iri, ipsemet crederet. In anticipi illo casu cum non satis se expedire posset, quamnam læsa respiratio causam agnosceret; (neque enim vitium ullum vel in aëre, vel in organis ad respirationem necessariis, vel in quadam lienis affectione &c. apparerat,) postera dies cum satis convicit originem mali, in hepatis, quod cum diaphragmate, per membranaceum ligamentum latum cohæret, (quod susensorium Anatomicorum Scholæ nominant) spasmodicâ contractione quærendam fuisse, nam icterus insperatò superveniebat. Admodum autem rebelle hoc malum fuit, & cura fastidii & tædii plenissima, domitus tamen tandem morbus ille medicamentis anticachecticis, & antispasmodicis providè junctis. Præprimis ceratum quoddam exterius applicatum vim præsentem in relaxandâ strictione exercere deprehensum est. Cum D. Preussio febris quartana pertinax admodum eo tempore offerretur curanda nec usitatis medicamentis subjugari posset, emeticum laxativum mercuriale propinavit, ex cujus usu salivatio per tres septimanas & ultra cum perfectâ febris eradicatione secuta est.

Mense

Variolæ
& mor-
billi ali-
aque
exanthe-
mata.

Menſe Februarii, præter petechias, variolas & morbillos, vidimus alias maculas corpora infantum occupantes. Similes eæ omninò erant iis, quas Celeberr. Fehr. in *Anchorâ Sacrà ſive Scorzonera* p. 79. & ſeq. deſcribit. Nam quædam latæ rubæque morbillis non admodum diſſimiles, in facie conſpiciebantur, minutiffimæ verò & puniceæ, quas incauti cum petechialibus confundere ſolent, in dorſo, lumbis & pectore cernebantur; Nonnullæ elevatiores proximè ad naturam variolarum accedebant, ac pruritu & fervore moleſtiſſimæ erant, tandemque per abſceſſionem epidermidis in ſquamulas reſolvebantur; verùm aberant ſymptomata graviora, delirium, convulſiones, alvi profluvia bilioſa & dyſenterica, palpebrarum paralyſis & conniventia, carentia viſûs &c. ſed comitabatur tamen hæc exanthemata febris, ſub noctem ingraveſcens, tuſſis, quam ferinam vocant, corpora concutiebat, & poſtquam tertio vel quarto die morbi erupiffent, ante 14. evaneſcebant, relictâ nihilominus aliquâ incedendi impotentiâ & ſcalpendi neceſſitate. Graſſabantur etiam eò tempore aliæ variolæ, quas à forma, nam acuminatæ ſunt, vulgò *die Spitz-blattern*, alii autem *das Ungeheur* vocant; ſed quia æſtus mitior conjunctus, nec ulla mali moris ſymptomata adſunt, præterea etiam pueri & puellæ lætè diſcurrunt, his exanthematibus deformati, modò unguis exercendi voluptas iis relictâ ſit, ferè ſit, ut Medici conſilium non requiratur. Id quod etiam dicendum de cryſtallis ſeu puſtulis latioribus, minusque acuminatis, à lupini albi magnitudine *Schaafs-Blattern* dictis. Nam poſtquam aliquamdiu ichorem plorârunt, citò ſatis evaneſcunt. Magis terrentur noſtri rubeolis, quas vulgus vocat *Rutteln*, quæ non ſine graviore æſtu primùm ſparſim erumpunt, & deinde coeuntes poſtea dorſum aut regionem pectoris, vel manus & pedes occupant, & latiffimam maculam efformant, tandem verò ferè ſine ſenſu in ſquamulas abeunt & diſparent. In curâ ferè eadem methodus obſervatur, diaphoretica fixa totam abſolvunt paginam. In frequenti apud nos uſu in hujusmodi morbis potiunculæ ad morem Sylvianarum paratæ, ex aquis fl. ſambuc. til. card. ben. ſcorzoner. cort. citrat. &c. & ppat. lap. 69, & in adultioribus paulò etiam, corall. rubr. ppt. matr. perlar. antimon. diaph. ſuccin. ppt. &c. quibus gratiam ſaporis conciliamus vel julepo roſar. ſambucino, aut ſyrupis gratioribus. Regimen in omnibus iis morbiis, cum quibus febris complicata eſt, temperatum amamus, & anxie calidum damnamus.

Præter aſthma, quod, ut ſuperius monitum, icterum præcurrebat, etiam alius generis, idque periodicum graviffimum obſervavimus. (q) Vir quiſpiam perilluſtris dignitatis, ſexagenario proximus, ſanguineo-cholericus, cum ter, ſuaſu nonnullorum Medicorum, ærumnabilis ſalivationis labores, ad abigendum circa regionem hepatis fervorem aliasque moleſtias, quas effluxu ſeminis in pollutione nocturnâ, incautè admodum ante quadrien-

(q) conf. *Caſtig. noſtra Grabn.* p. 38.

driennium cohibito, incurrit, excutiendas, quas inter etiam tumor testiculi alterutrius, fortiter sustinuisse, de difficultate respirationis circa noctem ingravescente, sub anni 1698. finem conqueri coepit. Auctum malum ita fuit, ut tandem hoc mense, nocturno tempore, quo maxime affligitur, circa duodecimam horam, ex lecto exiliret, & prae suffocationis metu, eum in respirando corporis situm eligeret, in quo maxime liberi sunt pulmones, nec à thorace premuntur. Adventantis paroxysmi prodromus erat dejectio alvi, post spiritus sensim densior ac tardior trahebatur. Procedente affectu audiebatur sonitus ferventi aquae similis: *Es kochte und rasselte auff der Brust*; id quod infallibile signum, cellulas pulmonum membranaceas ac asperae arteriae ramificationes à materiâ quadam ita infarctas esse, ut vix aërem inspirandum admittant. Thorax cum quodam costarum quasi fragore videbatur elevari, comitante hanc ejus elationem sonitu & sibilo, id quod alias in asthma convulsivo fieri suevit. Confer. Ephemerid. anno 17. observ. 133. 256. Vultus turgebat, & oculi prominebant. Comitabantur incredibiles praecordiorum anxietates & pectoris angustiae, sudores quasi syncoptici, ac alia dira symptomata, quae ex *αυτοψία* D. Helwich & Pauli referuntur. Cæterum tametsi iterum iterumque considerarent, an tremulus aliquis motus, ex infimo ventre versus pulmones & cor assurgeret, quod in asthma hypochondriaco & hysterico fieri consuevit, eum minime advertere potuerunt. Post bihorium ferè ejectâ, materiae viscidæ, non minimâ quantitate, inducias malum afflicto concessit, sed perbreves: Nam circa horas matutinas recrudescebat & denuò somnum excutiebat, insultus tamen minor & brevior erat. Pulsus in paroxysmo concitatus, extra illum secundum naturam se habebat. Urina cruditatis indicia præ se ferebat, albo foeta sedimento; alvi excrementa liquida. Alias appetitus integer vigeat, sitis verò aliquanto intensior. Qui in paroxysmo, in limine mortis erat noctu, is interdum omnia negotia commode perficiebat. Hoc periodicum asthma ex humido, de quo lectu dignissima occurrunt ap. Carol. Pisonem, de praetervisis hactenus morbis & affectibus à ferosâ colluvie &c. ortis, *sect. 3. cap. 4. à p. 259.* & convulsivo, cujus causam, non tam in spasmis fibrarum pulmonalium, quàm musculorum pectoralium, quærendam esse putamus, mixtum, ut, iudice Willisio, omne inveteratum esse solet, nullis remediis domari potuit. Nihil hîc V. S. etiam reiterata, nihil fonticuli, nihil frictiones, nihil lenientia, incidentia, expectorantia, antispasmodica, anodyna, &c. conferebant. Adeò verum est effatum Clariss. Raygeri Collegæ nostri in *Schol. ad observ. 31. Spindleri p. 54.* quando scribit: *Asthma mirabile phantasma est contra quod tam rarum invenitur cataplasma approbatum, mirabiliter quoque & agrotantes & medicantes affligit atque excitat, nonnunquam utrosque peritos reddit.* Solus cochleariae spiritus Anglicanus, ineunte mense Martio, miseriam patientis sublevare videbatur. Per æ-

statem integram respiratio ritè habebat, sed autumnò inclinante vetustum malum repullulabat, ac quotidie augebatur. Sed propitia magis ægri fortuna illo anno fuit, nam pertinax malum magis obsecundare visum est pharmacis, quæ quatuor Medici (inter quos duo ex nostris, sc. D.D. Pauli & Helwich) miscebant, ac post celebratam V. S. halcyonia plena, licet insperata, medio Februarii obtingebant. Rediit antiquum malum etiam hoc, quo hæc scribuntur, anno, sed non adeò ferocit, nec tamen vel V. S. vel remediis antea adhibitis amplius auscultat, nec iussulis, quæ per accessiones accipere suevit, mitigatur, ad instar illius, quod describit Cl. G. H. Welschius *Decad. X. Cons. I. Curat. ppr. & Consil. Medic.* Aliis verò decidendum relinquimus, an hoc exemplum manifestam faciat communionem Hippocraticam *συνέων, μαῶν, γονῆς, Φονῆς*, id est pectoris, mammarum, seminis, vocis, 2. *epidem. sect. I.* Certè Edmundus de Meara *in historiis aliquot rarioribus Medicis p. 133.* recitans historiam de cive Bristolienſe, qui post gravem hyemalem catarrhum sponte evanescentem, scroti tumorem incurrit, & hoc iterum disparente de orthopnoeâ conqueri cœpit, ex illâ frequentem & facilem spirabilem cum genitalibus consensum deducit, ratus, in hoc ægro observabilem esse feri à pectore ad testes descensum, ejusdemque à testibus ad pectus recursum. Quod roborat etiam observatio D. Grassii, cui obvenit tractanda asthmatica, quæ liberum trahebat spiritum, cum pudenda & pedes tuebant, difficultate verò magna premebatur quando tumor disparebat. In aliis asthmatis generibus Aug. Thonerum *l. 3. Observ. Medicinal. p. 199. & seqq.* imitati sumus, & purgante, ad removenda obstacula respirationem intercipientia, usi sumus. Non abs re comperimus gloriari Joëlem *l. 3. pract. p. 272.* quod zedoar., g. ammoniaco fl. sulph., croco in hydromelle coctis sæpè facilitatem respirationis restituerit, nam & nos in egenis ex nauseabundâ & rudi potione hac multoties eundem vidimus effectum. Cæteroquin fuere apud nos eo tempore etiam alii, qui difficulter admodum respirarent. Illi de nullâ circa thoracem molestiâ conquesti, solum de gravamine quodam ventriculi conquerebantur, & locum affectum sub diaphragmate ad ventriculi regionem monstrabant. Et hujus generis asthmatici ut plurimum graphicè admodum angustias præcordiales depingunt, & ut ex vero Severin. Evgalen *de Scorbuto p. 11.* ægrotantes à sensu mali sui magnitudinem metientes, de tollendâ angustia magis, quàm respirationis mitigatione apud Medicum instant, ac paratam in antiscorbuticis medelam inveniunt. Monitos tamen cupimus eos, qui primum clinicæ animum applicant, ut in scorbuticis iis, quos maculæ fervidioris intemperiei indices deformant, à cochleariæ usu caveant, & exhibitione acetosæ acetosellæ &c. contenti vivant, nisi exaggeratorum symptomatum ignominiam fœstri loco affectent. His, si asthma urgentius sit jungere licebit radicem ari, helenii, petasitidis, & in formâ decocti offerre. A paucis enim guttis, mix-

turis

turis, essentiis, aut ardentibus spiritibus magnam sibi polliceri in scorbuticis affectibus opem, non nisi inexpertorum est. Pistor quidam ex oppido paucis miliaribus Vratislaviâ distante, vasto corpore, scarificationibus singulis ferè mensibus assuetus antea, iis omissis, post aliquam vehementiorem corporis commotionem, asthma corripitur, quod parùm à convulsivo aberat. Is perterritus Vratislaviam migrat, ac D. Helwich adit, qui re omni intellectâ scarificationem repetendam esse, auctor est, & pilul. de cynogloss. hodiè quasi antiquatas, de quarum efficacità modestius ex Lindenio sentire primò didicit, præscribit dosi non magnâ, sed maximâ cum utilitate patientis, nec enim ex ullo medicamento præsentio rem vidisse se effectum recordatur, quippe repressus protinùs est mali impetus, ac sanus & hilaris domum discessit, qui anhelosus & quævis mala metuens hûc venerat.

Infantes illo tempore tussis convulsiva fatigabat satis frequenter. (r) Certum est affluente materiâ inter tussendum diaphragma sursum contrahi, ac in systole longiori aut crebrius repetita detineri, pulmones valdè coarctari, in motu suo inhiberi, & respirationem valdè impediri, ut à suffocationis periculo parùm absint. Sed de eo, an materia morbifica nervis pneumonicis illapsa, hinc in ipsis hæreat, & fomitem contumaci malo præbeat ut credit Willisius, nondum plenè constat, imò, qui hîc spasmodicos musculorum pectoralium motûs, vel sensui in vehementiori malo obvios, perpendit, in illam facîle concedet sententiam, à convulsivo hoc musculorum motu arcessendam tussis convulsivæ causam. Cui rei documento est & hoc, quod externa ex selectioribus, antispasmodicis debite adhibita, hoc equuleo tortos efficaciter consolentur. Tanta apud nostros indulgentia est in liberos, ut vesicatoria, quæ in tussi hâc Sydenham celebrat, tanquam præcipuum auxilium, cane, ut plurimum & angue pejus fugiant. Nec delicatesiores usum liquor. C. C. succin. vel spir. *c. anisat. ut homines naris minùs obesæ, nisi cum molestiâ, ferunt. Tincturæ fl. pap. rh. certo modo præparatæ virtus aliquoties non levis deprehensa fuit, quæ tamen minimè comparari potest cum simplicissimis pulveribus antispasmodicis cum debitâ cautelâ exhibitis. Pulvis antepilepticus Ludovicianus, cum iudicio immutatus, id remedium est quod sumptuosius & exoticis præferri tutò potest. Sed, quid de V. S. dicendum? Eam efficax sanè in tussi hâc auxilium esse vix dubitamus. Et Riverius locuples testis est, Parisienses Medicos in teneriori ætate & lac sugentibus pueris à V. S. non abstinere. Gualterus Harris Medicus Londinensis, de morbis pueror. part. 3. in gravibus inflammationibus venam pueris secari posse concedit. Et sanè, si Galli, aliique in V. S. in puerulis peccant, quod facile crediderimus: Nos sanè, ut in totâ Germaniâ, ita in Silesiâ quoque omni ex parte ean-

Tussis convulsiva infantum.

(r) Conf. Castig. Græbner. nostræ p. 41.

dem omittentes, excusari non possemus, nisi, contra vulgi & muliercularum opinionem aliquid facere, esset contra torrentem navigare. Nota nobis sunt exempla puerorum, qui fortuitâ narium hæmorrhagiâ ab hac tussi evasere liberi. Vulgus nostrum, in quavis tussi, pinguedinem lucci piscis & taxi cum multâ fiduciâ plantis pedum affricat.

Atrophia.

Ab hoc puerili affectu ipsa mali omni hyeme frequentia ducit nos ad alium, quem vulgò atrophiam dicimus. Corripiuntur eo malo lactantes & ablactati, potissimum tamen posterioris generis. Primò omnium caro fit flaccida, deinde habitus externi corporis in iis sensim consumitur, atque tabescit caro citra ἀνορεξίαν, aut alium affectum manifestum, etiam in iis, qui avidissimè cibis inhiant. Pulsus circa vesperam celerior evadit, inquietudo nocturna cum siti adest non sine suspitione febriculæ. Abdomen aliis sine extuberantiâ durum tantum est, aliis verò tensum existit & tumet. Crescit malum tempore, & tandem veram sceleti effigiem tabidi illi oculis ingerunt, ut cunctâ deperditâ carne, vix ossibus hæreant, multò minus pedibus inniti possint. Ferè autem omnes, qui ex eo malo periclitantur, admodum sunt voraces, & præterea naturâ torpidiores. Non immeritò etiam fundum calamitatis hujus dixeris nocturnas potulentorum frigidorum ingurgitationes. Quotquot certè pueri cum prætumido abdomine, & contabescentiâ corporis nobis oblatis, quorum numerus certè non minimus, illos omnes noctu potum frigidum sumere consuevisse comperimus. Ex vividioribus & agilioribus non multi hoc involvuntur malo, nisi vel alvus sit segnior, vel diarrhææ & lienterix, pravo consilio, adstringentibus subito tollantur. Plebeji & alii sacris medicinæ non satis initiati, causam contabescentiæ hujus in vermiculos capillares, quos Henricus Varenius alique crinones vocant, conjiciunt, quasi illi alimentum infantium, quos infestant, absumant, adeoque maciem inducant. Conf. Schenckius *l. 5. observ. 188*. Nonnulli aliud quoddam vermium genus in hac atrophîâ cachecticâ, accusant, quos inter est Brenggerus *in epist. ad Hæchstetter. Plater. l. 3. prax. c. 13*. Olevianus *ap. Reusn. obs. 97*. Sultzberger *ap. Sennert.*, confer etiam Camerar. *Cent. memorab. Med. XII*. Sed in nostris illis (s) manifesta satis contabescentiæ causa est obstructio ductuum lacteorum & glandularum, viscerumque glandulosorum lenta ac viscida, hinc autem necessariò reliquum corpus debito sibi alimento defraudatur, ac ad tantam redigitur maciem. Huic theoriæ innixâ praxis, nisi malum prorsus inveteratum sit, læto exhilaratur eventu. Consuevimus ferè hîc in usum vocare tinct. mart. aperitiv. vitriolatam, arcanum duplicatum, inducti exemplo Cl. Daniel. Ludovici *in Ephem. Germ. Dec. I. ann. 3. p. 389*. Dedimus etiam aliquando crocum mart. aperitivum, c. tartar. vitriolat., nitro fixato, eodem consilio ad removendas obstructions, & eodem etiam eventu.

(s) conf. Castig. Græbner. p. 41.

eventu. Molimina plebis nostræ ac chirurgorum heic recensere non vacat, cum satis nota sint, & antiqua, & ab aliis luculenter descripta. Loco omnium evolvi potest Celeberr. Polyhistoris, Collegæ quondam nostri, Welschii eruditissima exercitatio *de vermib. capillarib. infantum* §. 12. Hoc unicum tantum addimus, apud nos extra dubitationem positum esse, quod subinde infantes à vermiculis sub cute in artubus & præcipuè dorso infestentur atque ab his interdum vigilæ, pruritus & corporis extenuatio oriantur, id quod luculentè docet observatio Medica Celeb. Lipsiens. Medici Ettmulleri in *Act. Erud. Lips. ann. 1. p. 316.* Verùm hoc malum non adeò frequenter apud nos observatur.

Opem quoque nostram quidam hæmoptoici præcipitante mense hoc implorant, & notavimus, quàm facilè vulgari errore rejectio quævis sanguinis per os, hæmoptysis credatur. Lommius *lib. 2. Medicin. Observ. rectè* quidem ait, sanguinem spumantem ac floridum, ex intervallo per tussim sine dolore eductum, è pulmone ferri, &, ut errores evitentur, providè notat, eum, qui faucibus & gurgulione fluit, screatu; qui ex ipso ore, sputatione; qui ex ventriculo, vomitu; qui ex gutture, tussiculâ pelli; Enim verò nondum sufficere hæc, ex praxi ipsa edocti sumus. Illo, de quo modò loquimur, tempore non rarò cum materiâ catarrhali ad fauces stillabat sanguis, cujus rejectio screatum & sputationem ac ipsam tussim conjunctam habebat. Hunc enim affectum ut ab hæmoptysi discerneremus, sollicitè attendimus ad signa illius, quæ Thiermairius *lib. 2. Consil. Med. c. 6. in Schol. p. 84.* recitat, ita scribens: *Signa hujus affectûs (sanguinis excreti à capite manantis) sunt dolor & gravitas capitis, faciei rubedo, sanguinis, qui per nares excerni solebat, interceptio, respirationis facilitas, catarrhi à capite repleto frequentia, subinde acrimonia, tussis non magna, screatio tussi frequentior, sanguis excretus non adeo copiosus, non floridus; quorum pleraque ita se habere, loquitur experientia. Paucos reverà vidimus sine noxâ evasisse hæmoptoicos. Vir in florida ætate constitutus, cum impetu copiosum effundebat sanguinem, & purpuream tandem evomebat animam; Aliqui in lentam tabem & phthisin prolapsi sunt. Adeò verum est Ovidianum illud:*

*Cernis, ut è molli sanguis pulmone remissus
Ad stygias certo limite ducit aquas.*

Quod pulcherrimè Magnif. Præses noster in *Schol. ad Observ. 66. D. Helwichii p. 220.* huc trahit. Eò in curâ collimarunt nostra consilia, ut quantocyùs fluxum illum compesceremus, nisi fortè pleuritis eum comitaretur, in quâ periculosæ res aleæ est fluxûs illius inhibitio. Hinc adstringentia & opiata non pauci suadent. Nos, quantum fieri potuit, adstringentia & repellentia, ut & opiata cruda vitavimus. Si durum il-

C 3

lud

lud telum necessitas aliquando ad adstringentia propinanda nos compulit, ex usitatoribus illis, Usneâ cran. hum. Spertiola Crollii, tinct. terr. catech., corall. stypticâ, antiphtis. Mich., croc. ♂., pro variâ subjectorum dispositione, modò hæc modò alia adhibuimus. Respondit votis nostris & ægrorum etiam lapis, hæmatites in tenuissimum pollinem contritus, &c. ▽. plantag. l. burs. pastor. sæpè transfusus & colatus, immixto convenienti syrupo, quâ in re præeuntem secuti fuimus Forestum *lib. 16. obs. 17.* Species quoque confect. de hyacinth. aliquoties profuisse vidimus. Semen hyosciami albi in dosi exiguâ interdum reliquis interpolatum non est rejiculum, si autem vel in dosi excedas, vel continuò adhibeas, ægrum tuum stupidum reddes. Junximus hisce resolventia eo fine, ut extravasatum sanguinem discuteremus, ne fortè pulmonibus impactus, exulcerationis eorundem causa evaderet. Uterque & adstrictionis & discussionis scopus videtur propositus fuisse Sylvio in concinândâ formulâ, cujus descriptionem communicavit *l. 1. prax. c. 9. p. 173.* Addunt his tertio etiam consolidantia & vulneraria, quibus tamen raro ob adstrictoriam eorundem virtutem utimur, nisi fortè æmula sint ejus, quod extollit Jacob de Maphæis, decocti ex veronicâ, hederâ terrestr., quod cum unc. duabus succi plantaginis in jure gallinæ commiscet. Laudem eo nomine merentur etiam fol. alchimill. c. aristol. rotund. Centinodum maximè æstimare Cl. Wedelium novimus. In istum censum porò referri possunt tussilago, consolida, pyrola, & ex experienciâ Cratonis nostri etiam chamædrys. Scordium contra putredinem egregiè militare, vel in vulgus innotuit. V. S. c. D. Grassio celebrat D. Preussius, eique soli malum hoc cessisse cognitum habent. D. Helwich recordatur, se illo tempore in consilium adhibitum ab aliquo fabro murario (qui in hæmoptysin incidens, nescio ad quem medicastum confugerat, & per biduum jam spiritu vitrioli non edulcorato usus fuerat) cùm tertiâ die sanguinem floridum spumosum cum tussi, quam præcesserat difficilis respiratio, rejiceret, ad illum accurrit, sermone ad tempus, propter effluxum sanguinis durantem initio impeditus, tandem balbutiens quid actum exponit. Responsum fuit venam aperiendam esse; obtemperabat hæmoptoicus, sed ex venâ ritè pertusâ parùm sanguinis effluxit, unde ad alia discedendum fuit. Et tùm quidem primâ vice virtutem nitri in compescendâ hæmoptysi experiri voluit, deditque majorem consuetâ dosin, ac præsens & efficax ex usu ejus auxilium admiratus est. Animus hinc ei additus tentandi etiam in aliis virtutem nitri, in sistendâ hac excretionem sanguinis, ac illam ubique maximam, etiam in conjugē, ex eo malo per intervalla jam ab octo annis laboranti, deprehendit. Occasio verò cognoscendi hanc nitri vim, ei se obtulit in sacerdote Soc. Jesu, nimio hæmorrhoidum fluxu, æstu vago aliisque symptomatibus fatigato. Huic cùm varia adhibita essent medicamenta, tandem ad ebullitionem sanguinis domandam pulvis nitrosus præscriptus est, ex
 usu

usu hujus fluxus imminutus, & cum pulvis iteraretur, prorsus etiam cohibitus est. Posthac in immodico mensium fluore, cæteris non proficientibus, imò & nimia lochiorum evacuatione expectationem vicit. Tandem etiam Cupido incessit explorandi, quid nitrum in sedanda hæmoptysi possit; ac etiam in hac domanda luculente admodum cæteris non omisiss, virtutem exeruit. In sinu itaque gavisus est, cum Celeberr. Stahlium Prof. Hallens. in *Obs. Chymic. Physic. Medic. Curios.* p. 464. consentientem sibi inveniret. Viri istius Verba hæc sunt: *Salvâ sc. veritate asseverare possum, quod numerosis hæmoptyicis, drachmâ dimidiâ, scrupul. duob. ad drachmam integram nitri, per vices opportunas exhibiti, ita efficaciter subvenerim, ut coërcito, quicumque suberat, sanguinis orgasmo, non modo citissimè, sed etiam constantissimè cessaverit eruptio, atque fluxus.*

Non paucos quoque malum hypochondriacum torquebat, solitis stipatum symptomatibus, (u) Quibusdam distenta erant hypochondria ac tumebant, non sine dolore pulsatorio, subinde etiam gravativo, impeditæ circulationis indice, qui non rarò ad ipsum dorsum vagabatur. Vidimus etiam videlicet in corporibus exsuccis & strigosis, in hypochondriis maculas scorbuticas varii generis. Ventriculi concoctio perlanguida satis erat, cruditatique ejus soboles, ructus, crebrò infestabant. In ore tædium pariebat sapor aliquando salsus, nonnunquam nitrosus, sæpe acidus, rarò dulcis; sputatio crebra notabatur. Nullus tamen nostrum quenquam curavit, qui, ut ille apud Sennert. *lib. 2. Institution. p. 3. s. 1. c. 4.* mille ructus unâ die emiserit. Fuere verò hi ructus ut plurimum acidi, cujus modi hypochondriacis familiares esse consueverunt; teste etiam Foresto *l. 10. obs. 13. in Schol.* Vomitus quibusdam statò tempore revertebantur, hodieque superest, qui ad exemplum monialis illius apud Guilielm. Fabric. *Hildan. Cent. 4. obs. 32.* continuis obstructionibus obnoxius ferè quotidie ingesta revomit, nullis proficientibus remediis. Nec aberant inflationes *Βορβορίγμοι* ac ejus generis rugitus, quos Comes ille apud Montan. *consil. 229.* perpeffus dicitur, ac novit D. H. adhuc hodie foeminam in sterili conjugio viventem, quæ ob perpetua illa intestinorum murmura pertinaciter inhæret iis cogitationibus, quibus quondam indulfit ancilla in nosocomio Torgensi, de quâ Brunner. *Cons. 7.* testatur, eam credidisse, in ventre ranas se habere. Alvus omnibus segnis, medicamentis sui officii admonenda erat. Scybala viscida, & in uno alterovè caprarum excrementis haud dissimilia, non tamen meminimus nobis obvenisse, qui Lipfianis illis analogâ rejicerent. Pollicem iis premere neutiquam possumus, qui lienem vel indurari, vel in tumores in hoc malo attolli, præfractè negant; nam ferè omnes in quibusdam hypochondriacis duritiem in regione hac, circa lienem, in aliis elevatiorem tumorem, qui proximè acedit ad eum, quem descripsit Fernelius *Consil. 43.* & Trincavell. *lib. 3. Cons. 44.* deprehendit.

Malum
hypo-
chondria-
cum.

(u) conf. *Castig. nostræ Grabner. p. 44.*

deprehendimus. Anxietates præcordiales, cordis palpitationes, vertigines, pavores in somno, terrificis insomniis interturbato, aurium tinnitus, dolores varii, ea sunt mala, quæ pressò pede morbum hunc confirmatum sequuntur, & multoties nobis occurrerunt. Urinæ sabulo tartareo refertæ sunt. Glutinosa quoque ac partibus viscidis & crassis scaquentem vidimus, ut & in plerisque similem illi, quam describit Highmorus *tract. de affect. hypoch. c. 1.* Pulsus in plerisque languidus & intercisus, ac à non nemine nostrum in corporis sui partibus illis observatus, in quibus alias ordinariò percipi non solet, cujus generis exempla etiam alii auctores, Cæsar. Claudin. *Consult. 35. 46. 47.* Hieronym. Mercurial. *tom. 2. consil. 11.* Salmuth. *cent. 1. obs. 46.* aliique recitant. Æstus vagi indivulsi quoque mali hujus comites. Præclare etiam Luchtenius & Lælius à Fonte observarunt in nonnullis corporis membris motum quandam veluti viventis & hinc inde discurrentis, id enim in consummatis hypochondriacis plus vice simplici à nobis animadversum fuit. Molimina hæmorrhagias comitantia hæmorrhoidumque labores attenti Practici observationes effugere non possunt. Vivit adhuc ex ordine Augustinianorum Strelæ sacerdos, hypochondriaco malo obnoxius, cujus, quod fidem ferè excedit, singulis diebus, per plures annos hæmorrhoides adeò copiosè fluunt, ut frequentibus lipothymiis etiamnum infestetur, macieque, cum medicamenta aversetur, contabescat. Olitor quoque aliquis, cujus hæmorrhoides confertim sanguinem ejaculabantur, ad D. Grassium confugit, & in nitrosis & martialibus medelam invenit. Asthma verò hypochondriacum magis adstantes quàm Medicos terret, his quippe ignotum esse nequit, quod motus thoracis & diaphragmatis respiratorius sanguinem in venis portæ, quem jure optimo hypochondriacum dixeris, commoveat, atque non sine evidenti utilitate ægrorum intendatur, hanc enim ratione sanguis in motu suo impeditus, ut ferè apud hypochondriacos est, iterum in circulum propellitur. Argumentum hujus sententiæ non contemnendum est, quod exantlato paroxysmi asthmatici labore, solito sint lætiores etiam ii, qui meticulositate insolitâ, quæ extra paroxysmum etiam alias ordinariò adest, risum aliorum provocant, insignem, nisi per paroxysmum onere aliquo liberati essent, necessariò percepturi, ex motu hoc terroris pleno, languorem. Cujus rei duo vidit D. Helwich exempla in sectatoribus instituti religiosi, qui cum nocturno tempore, ex metu suffocationis ad captandum liberiores aërem, ex lecto exiliissent, post aliquot horas, anxii illis evoluti laboribus rarâ lætitiâ apud ignaros suspicionem simulati morbi vitare non potuerunt. Tàm numerosa symptomatum cohors debellata à nobis variis modis fuit. In eam verò maxime curam incubuimus, ut spissos attenuaremus humores, obstructionum authores, non unâ etiam hinc ingressi viâ. Quidam laudant nodulos ex rad. ari, caryoph. helen. pinpinell. helleb. nigr. ex fol. & herb. absinth. agrimon. ceterach. chamædr. chamæpyt. chelidon. min. marrub. alb., capil. ♀., fl. &

& summit. bellid. bugloss. , genist. , cent. min. , sem. dauc. coriandr. nigell. & aromatibus temperatioribus. A nonnullis martialium virtus laudatur. Sunt etiam inter nostros, qui multum tribuunt pilulis, quas ab Autore Becherianas vocant. Palmam verò dubiam faciunt omnibus, cautè adhibita salina urinosa volatilia. Myrrha quoque & crocus eximiè profuerunt. Nec mixt. S., quam Clarissimus quondam Döringius noster aliqui mixturam Grasbeci vocat, planè indigna est elogio, quod meminimus ei à Tenzelio in Exegesi Chymiatricâ tributum, in perfrequenti certè nobis usu fuit. Non horruimus quidem etiam ægris nostris propinare elix. splen. Michaël. antihypochondr. Moeb. aliorumque, neque tamen habemus, quod prolixè in laudem eorum scribere possimus. Quicquid verò egeris, curam vix ac ne vix citra usum subadstringentium feliciter absolves. Et hic quidem non est, cur Practicus alia, præ tinctur. vitriol. mart. tartarif. D. Ludov., nobis certè expertissimâ, sollicitè desideret. Ultra omnem fanè ista laudem posita est, nec, quantum scimus, ullum aliud par sibi habet medicamentum.

Illucescente Martio turmatim Scabiosi nobis occurrebant curandi. Scabies. Varia quidem Scabiei genera isto tempore vidimus, ac in bibliopego quodam, qui olim in Sueciâ vixerat, frustrâ deformitatem mali mortui, quod crustam nunquam antè sibi visam, in tibiis adjunctam habet, tollere sategit D. Helwich. Sed differentias istas prosequi, nostri non est instituti. Humidiorem ferè in sanguineis & phlegmaticis, ac in illis ad suppurationem tendentem, in his verò ad œdematosos circa extrema tumores proniorem, è contrario sicciorem in Cholericis & Melancholicis etiam observavimus. In senibus difficulter tollebatur, & vivunt adhuc quidam ab eo usque tempore his stigmatibus deformes. Hinc non sollicitanda fides Foresti, qui *lib. 5. Observ. Chirurg. XI.* recitat de Scabie per 9. annos durante exemplum; at verò Takii illud prognosticon, si senes teneantur insolitâ scabie, proximè secuturam mortem, fallit. Fallaci ratiocinio nititur communis traditio, quòd pueros à variolis & morbillis præservet scabies, non verâ experientiâ, quæ nobis multa in contrarium suppeditavit exempla puerorum, scabie infectorum, qui, turpi hâc larvâ vix depositâ, personam alteram illam induerunt, ac in castris variolosorum militarunt. In medendo ipsam naturam, ut par erat, ducem secuti, quæ ab interioribus visceribus ad exteriora impuritates has detrudit, blandis diaphoreticis institimus. Miscuimus verò Rob. sambuc. c. $\frac{1}{2}$. d., bezoard. miner., martial. & syrup. card. ben., aut fumar., interdum etiam tinct. bez. dedimus. Quibus res angusta domi, iis euporiston ex decocto feri lactis c. fumar. satisfecit. Vulgus barbitonorum & balneatorum decocta lignorum sine discrimine ægris obtrudit, cum cholericis scabie pruriente & siccâ afflictis malum exasperent. Vesperi pulverem absorbentem ordinavimus, ut hâc viâ salinam acridinem domaremus. In expellenda scabie sulphur commune c. succino mistum specificam obtinere vim, non immeritò creditur. Scimus purgantia à

à multis tanquam necessaria suaderi, imò eorundem iteratam præscriptionem à Joele & Barbette urgeri, quia tamen hoc pacto à peripheriâ ad centrum inquinamenta revocari satis constat, iis fere abstinuimus, nisi primæ viæ ex diætæ erroribus essent impuriore, in quo tamen casu lenioribus ferè usi sumus, iisque merc. d. junximus. Ex metu eorundem malorum parcè diuretica præscripsimus, præter nitrosa, quæ & refrigerant & acrimoniam demulcent. Nec V. S. celebravimus, nec cucurbitulas scarificatas, quas à Thonero laudari scimus, frequenter apponi jussimus, tametsi alias sententiam Rhodii in *Analectis ad Septal.* non per omnia probemus. Deinde corpore ritè disposito ad inunctiones descendimus, ubi ferè semper mercuriales nobis in usu sunt. In robustioribus Adipem porcina c. mercurio f. q. terebinth. ext. ad præscriptum Wedelii in *Amœnit. Med.* ordinavimus, in aliis mitioribus usi sumus. Nostri pharmacopæi plebi utplurimum vendunt sequens unguentum:

℞. Terebinth, lot. ℥ ij.
Butyr. Majal. ℥. iiij.
Sulphur. citr.
Rad. Pimpinell.
Aristoloch. rotund.
Bacc. laur. aa. unc. j. semis.
Alumin.
Ceruss. aa. unc. ss.
Cer. citrin. ℥. j. M. F. l. a. unguent.

Hoc, aut potius mercuriali unguento manè & vesperi carpos manuum, tarsosque pedum inungi moderatâ quantitate jussimus, & scabiem aliis sæpè incurabilem intra mensis spatium abegimus. Ad remanentem subinde cutis asperitatem olei tart. per deliquium efficaciam cognitam habemus. In delicatioribus unguentorum mercurialium spurcitiem & nidorem ferè recusantibus D. Helwich tinctur. antiphthific. D. M., à cujus interno usu abhorret, optimo cum successu non semel adhibuit. A scabie intempestivè, ut subinde consilio muliebri & Medicastrorum fit, repulsâ & mortem ipsam consecutam cum Amato Lusitano l. 2. *Curat.* 33. &, quæ hanc minantur, gravissima symptomata, palpitationem cordis, epilepsiam, cardialgiam, confer hic Schenckium l. 1. *Observ.* 99. & febres vidimus, ut de vomitu, diarrhæis &c. nihil dicamus. Duplici autem modo hic peccari in curâ solet. Nam à non paucis intentio ad subigenda symptomata, horum causâ ferè neglectâ, dirigitur, malo utplurimum eventu. Aliis contra, cum sciant totius negotii cardinem in eo verti, ut inquinamenta iterum ad superficiem corporis ejiciantur, solenne est, impetuosiora sudorifera in usum vocare. Regiâ illi, nostrâ multiplici experienciâ, incedunt viâ, qui, quantum ejus fieri possit, interiora viscera ab ulcerosâ corruptione præstant immunia, symptomatibus cautè pessulum objiciunt, & mitioribus diaphoreticis ferè sine regimine exhibitis recrementa retropulsa blande revocant.

Frustra

Frustra ferè hîc speratur auxilium, nisi mercurio supplicetur. Et hic quidem D. Helwich. *mercur. d. scrupul. i.* in robustioribus c. lap. 69. exhibet, & post dies aliquot eandem repetit dosin, interponendo diebus intercalaribus usum mixturæ alicujus diapnoicæ sæpè etiam solius essentiæ scordii saturatoris; In infantibus, quorum genus nervosum, cui vulgò mercurius creditur esse inimicus, debilius est, monitis Ludovicianis sese conformat, & numero annorum grana mercurii attemperat, sed iterùm sine stimulo purgante, ubi verò iterum scabies denuò porupit, facilè est, eam tactâ ante methodo, si non citò, tutò tamen perfanare.

Circa idem tempus non paucos molestissimus tantùm non exanimabat pruritus, præprimis senibus & cœlibibus gravissimus fuit, ac inter hos hominibus siccioris constitutionis. In hac nostrâ civitate non deprehendimus vera nota illa mercurialis: Repetita purgatio & sanguinis missio sola curavit pruritus, ut ego sæpissimè sum expertus. Præmissimus tamen & nos epiceraistica. Cucurbitulis scarificatis, quæ dorso, scapulis, humeris, femoribus applicantur, multi confidunt, & in succulentioribus aut huic remedio assuetis, omninò earum usus eximius à nobis spectatus, sed in strigosis illis corporibus nullum effectum commendabilem cernere licuit. Ex usu diaphoreticorum & decocti lignorum, pruritus ad lipothymiam ferè auctum vidit D. H. hinc suspicatus, quod ichorosi halitus hydroticorum usu ad ambitum corporis in majori copiâ propellantur, & acredine suâ plures molestias scalpulentibus digitis faciant. Præpollent hîc aliis medicamentis nitrosa & diuretica saponaria, quæ falsas & acres atomos ad vias urinarias deducunt. Laxior lactis cura nonnullis etiam levamen attulit, ac magis ipsum lactis serum virtutibus alterantium quarundam herbarum imprægnatum. Balnea aquæ dulcis afflictos egregiè solabantur. Nostra methodus hæc fuit: Dedimus manè pulverem nitrosū, aliis debilioribus etiam spiritum nitri dulcem in larga quantitate in infuso quodam propinavimus, circa noctem verò emulsionem dedimus.

Primus Aprilis dies nobis serenus illuxit & calore suo Veris delicias sperare jussit. Non diuturna tamen hæc nobis felicitas fuit, nam nebulæ & pluviae à meridie primis diebus nobis gratum Solis aspectum ad breve tempus ademerunt. Qui secuti dies vernali tepore ad plenilunium omnia brumali aurâ quasi rigentia blandè vegetabant. Deinde Cœlum varium erat, interdum serenum, interdum nebulis obductum, nimbos ac pluviam in nos effundebat. Majus, quo alias omnia rident, & est formosissimus annus, nebulis, pluviis & ventis, si paucos amœniores dies excipias, rigidus erat. Est verò Silesia, ut benè Doctissimus Schwenckfeld in *Geographicâ Silesiæ delineatione, catalogo stirpium & fossilium præmissâ*, notavit, ventis præcipuè aquilonaribus & occidentalibus exposita. Cum verò hi corpora nostra graviora reddant, eos non immeritò cum Horatio dixeris plumbeos, & reapse experti sumus, quantum vigorem nostrum tùm temporis depresso-
rint. Junio iterum amœnior ac serenior aër, cujus jucunditatem etiam

vergente ad finem Majo degustaveramus, comparuit, neque tamen ad finem processit sine imbribus, quorum iram proximi Vratislaviæ accolæ per ruptis aggeribus gravem, cum damno sanitatis & facultatum, experti sunt. Grassabantur apud nos eodem tempore morbi plerique ab Hippocrate enumerati, ubi de morbis vernalibus ei sermo, furores, inquam, melancholiæ, epilepsiæ, fluxiones sanguinis, anginæ, gravedines, raucedines, exanthemata varia, & articulorum dolores, ac, quas reliquis morbis meritò addimus, febres intermittentes, quæ tum in scenam prodibant. Non fert nostrum institutum, ut fusè edisseramus, quomodo Ver morbos hos pariat. Scimus non esse ad genium & palatum seculi nostri, illa Hippoc. lib. de natur. human. verba: *Cæterum vere pituita adhuc fortis in corpore manet, sed sanguis augefcit; nam & frigora remittunt, & imbres superveniunt. Sanguis autem juxta hæc augefcit ab imbribus videlicet, & calidorum dierum tempore. Hæc enim anni pars maximè juxta naturam ipsi competit, ut quæ calida & humida existat*; scimus, inquam, hæc à receptis nostri seculi dogmatibus discrepare, neque tamen, quia æquum pretium & laudabilibus neotericorum inventis & solidæ veterum experientiæ ex ipsâ praxi statuere didicimus, Hippocratica illa, si cordata accedat interpretatio, nigro notanda lapillo arbitramur. Nam nimis manifestum est, sanguinem in hominibus attenuari & corpora fieri plethorica tempore vernali, & hæmorrhagiæ, quæ tam frequenter Practicis circa illud tempus negotium facessunt, vel invitis hoc persuadent. Hyeme verò & sub ingressum veris, sanguinem esse viscidiorē, ac pituitâ redundare, non uno constitit hætenus experimento, ac cum primis memorandum illud doctissimi Glissonii, varia animalium jecinora secantis, ut omnibus numeris absolutam orbi literato daret Anatomiam Hepatis, quâ deprehendit obstructions & tumores in boum jecinoribus tempore brumali non aliunde sanè nisi à lentore & visciditate sanguinis ortum ducentes. Utroque itaque oculo ad illam humorum constitutionem intenti, ægris Medicinam fecimus, ac in præservandis aliis, non tritâ empiricorum semitâ, qui sine discrimine omnes purgantibus & V. S. tractant, incessimus.

Verum ex re erit, frequentiores ejus temporis morbos, cum præcipuis symptomatibus recensere, & rationem modumque curandi, à nobis observatum, breviter subnectere.

Hæmorrhagiæ.

Converterunt verò eo tempore oculos nostros ad se hæmorrhagiæ, adducit nos attenta consideratio, quòd verâ & solidâ experientiâ nitantur, quæ solertissimus Hallensium Practicus ac Professor D. Stahlius passim monuit. (x) Nam omninò ætate puerili, & adolescentiæ sanguinis excretiones è naribus, & his non succedentibus, dolores capitis tensorios vidimus. Hæmoptyses verò præsentē plethorâ, aut varia circa pectus incommoda, cessantibus præprimis antea consuetis narium hæmorrhagiis, juvenibus

(x) conf. Castigation. Nostræ Grabnerian. p. 54.

nibus magis familiariter evenere, quemadmodum vomitus cruenti, aut non unius generis pathemata circa venam portæ viris & foeminis, vitæ sedentariæ deditis, acciderunt. Paulò annosioribus hæmorrhoidales depletiones solemniore fuere. Et sanè motus varii circa splenem, colici dolores, flatulentia, tenesmi, &c. &c. mala tota die in praxi occurrentia, in isthac ætate eruptionem hanc partim moliantur, partim comitantur, quod toties totiesque observavimus, ut de doloribus ischiadicis, podagricis, varicibus, nephriticis stasibus & inflammationibus, ulcerationibus, quæ impeditiorem motum sequuntur, jam non loquamur. Mictus cruenti exempla, & in muliere circa quadragesimum annum, & in Illustris dignitatis Viro circa 65. habuit D. Pauli. Cæteroquin affectus ille apud nos rarior. Circa loca illa corporis, quibus sanguis erumpit, ab eodem ingeniosissimo Stahlio moniti, spasmodicas pressiones, sanguinis congestionem, vasorum & pororum tensionem atque turgescientiam, cum sensu ardoris, lancinationis & pulsationis, facile fuit dignoscere. Et, ferè ad ejus mentem, curam felici cum successu instituimus. Violentioribus vero sanguinis depauperationibus, efficacissimis, quantum in nobis fuit, remediis occurrimus. Et sanè nisi id fiat, presso pede, præter languorem, partium porosarum subsidentiam ac duritiem, humorum dyscrasiam, in gracilioribus contabescencia, in laxioribus corporibus tumores oedematosi, & illud Medicorum scandalum hydrops consequuntur. Omnibus verò præfatis malis repentinum ab usu validiorum adstringentium augmentum accedit. Insolita uteri hæmorrhagia eodem vere Septuagenariis proximas, quæ nullo remediorum genere cohiberi potuit, in mortem præcipitavit. Præcedebant hanc sanguinis effusionem, observ. D. Helw., tormina, qualia dysentericis dejectionibus præludere sueverunt. Fabula hæc in duabus per tres septimanas spectabatur, ejusque Epilogus, prostratis viribus omnibus, ultima viventium meta mors.

Sed his missis, genium intermittentium febrium illius tempestatis describenus. Præcurrebant illam pandiculationes & oscitationes, torpor & corporis gravitas, extremarum partium frigus, cutis aspera, & cum nescio à quo Authore mentionem corrugationis scroti & mammillarum palloris injectam in historiâ febb. intermitt. nonnemo nostrum recordaretur, & sciscitaretur ex ægris, an res ita se haberet, affirmatum illud fuisse testatur; Pulsus debiliior, sed aliquanto frequentior. Tempore exhorrescentiæ hæc cernebantur symptomata; crescebat cum pallore frigus, ac illi, qui valido horrore concutiebantur, sub finem frigoris ferè vomebant, in quibus verò rigor major erat, iis alvus liberior fluebat. Non adeò diu frigus durabat. Infestabat plerosque respirandi difficultas, pectoris constrictio, anxietas præcordialis, & pulsus ferè exiliior erat. Sub declinationem frigus & calor alternabant. Nonnullis etiam lachrymæ injussæ manabant. In æstu aderat corporis calor & jactatio, capitis dolor, æstus & pulsatio, vigiliæ, subinde deliria, totus habitus corporis calidus. Vultus rubore

Febres
Intermit-
tentes.

suffusus, lingua scabra, intensa sitis, urina saturatio. Quibusdam etiam purpura, seu excretionem miliari pingebatur cutis. His molestus erat pruritus in toto corpore. Elevabantur & extuberabant pori cutis cum rubore, instar cutis anserinae & sensim longius longiusque serpebat malum, donec totius fere corporis cutis exhiberet vesiculas, quales ab inustione urticae sentiri sueverunt. Corripiebantur verò maximè ex parte mulieres, quarum serum ad effervescentiam pronum. Typus harum febr. non unius generis erat. Nonnullis paroxysmi omni die, aliis tertio quovis molesti erant. Curati quoque à nobis, quibus quovis die duo paroxysmi erant superandi. Nec infrequentes tertianae duplices, in quibus paroxysmo primo non respondet secundus, sed tertius, secundo quartus, tertio quintus, quarto sextus, atque sic consequenter, ita tamen, ut non tantum tertio die, sed & intercalari febricitent. Semitertiana paulò quidem rarior, at non prorsus defuere, qui omni die quidem febre corriperebantur, sed tertio quovis die duorum paroxysmorum impetum sustinerent. Vigebant quoque febres erraticae, quae incertis recurrebant diebus & horis. Ambigui haeremus, an in censum febr. intermittientium referri debeant etiam illae, quae contra communem intermittientium indolem tragoediam à calore satis intenso auspicabantur, cujus generis febrim, nisi fallimur, etiam Cl. Will. lib. de febr. 3. describit. Et certè continuitatis ejusmodi febres nobis suspectae fuere, nam ut ut *ἀπυρεξία*, quae initio adesse videtur, genium intermittientis redoleat, languor tamen satis magnus, pulsus aliqua agitatio & cætera symptomata continuitatis opinionem confirmant. Eadem ferè nobis mens est de illis, quibus malignitas conjuncta est, & tamen remissione quadam non carent, quas etiam Vratislaviae vidimus. Scimus à Præclariss. Medicis Petro Salio Diverfo, P. Neucranzio de Purpurâ, Sennerio nostro, Simon. Pauli digressionem de febr. malignis, Rhodio ac aliis hujusmodi febres in classe intermittientium poni. Nos utut Summorum Virorum experientiae minimè detractum imus, nec nostri Seculi mores hâc in re imitamur, ingenuè tamen confitemur, nobis verisimilius videri, id genus febris referri ad continuas oportere. Et sanè doloso intermissionis cineri primarum dierum suppositum fuisse ignem continuarum, elucet ex eo, quod sequentibus exacerbationem quidem caloris & symptomatum, non item veram remissionem observare liceat. Placide tractavimus febres. V. S. non usi sumus, imò testimonium perhibere iis possumus, qui tertianam simplicem, adhibitâ V. S. in tertianam duplicem degenerasse scribunt, quod & nos illud, quamvis non frequenter, observaverimus. Vomitoriorum, tempore intermissionis, frequentior usus, ac in tertianis cum vomitu tempore inhorrescentiae conjunctis singularem emetici, die intermissionis eâ ferè horâ, quâ præcedenti in paroxysmo vomitus secutus fuerat, virtutem, materiâ existente mobili, multis nominibus D. H. celebrat, ratus hâc methodo facilius febres intermittentes debellari. Nec Purgantia fuere neglecta, sed præparatâ materiâ, vel in principio statim, vel præ-

fenti-

sentibus in urinâ signis coctionis, cum levamine ægris imperata fuere. Quoniam verò hæ febres focum habent in primis viis, ventriculo, intestinis, vasis mesaraicis, ac ipsa natura incidientia postulet, his institimus & exhibuimus infusa ex rad. ari, fumarie, absinth., centaur. min. Chamæp. card. ben. scord. &c. Plebs etiam in piperis laudes non vanè excurrit. Oleum piperis nigri commendat Andernacus, Penotus & alii. Et hoc cum Oleo caryophyllor. & tantillo camphoræ remixtum constituit oleum antifebrile D. Wedelii. Palmam autem omnibus præripiunt salia digestiva, tartar. vitriolat. arcan. duplic. sal. lixiv. absinth. centaur. min., card. bened., aperitivum &c. Hæc enim cum in universum acria sint, incidunt, dissolvunt pituitam & reluctantur acido. Non multum verò in feligendis illis scrupulosi fuimus, gnari, quòd, ubi ignis injurias diu toleraverint, ad idem penè redigantur ingenium, nam non tantum juxta observationem Clar. Redi, post plures & violentas unctiones & purgationes, omnia abeant in cubos, sed &, si crebrò ustulentur, crebrò dissolvantur, abeant in terram albam insipidam, retusis omnibus salinis aculeis. Certè horum Salium tanta est efficacia, ut Doctiss. Conringius, qui alias Paracelsica minimè omnium sectatus est, se ad discutiendas febres felici successu jam à 40 annis laudasse, & virtutem eorum mille experimentis sibi innotuisse testetur. Addidimus iis præprimis post aliquot febrilium paroxysmorum decursum subinde ex præcipitantibus, talemque pulverem aliquot ante Paroxysmum horis exhibuimus, & ab usu ejus non rarò vomitus minimè violentos, in præcedentibus paroxysmis non visos provocari novimus. Ejusmodi antifebrilibus in exanthematicâ intermittenti febre sociavimus antiscorbutica. (y) In contumacioribus febribus, reliquis debite præmissis, tandem ad usum corticis Peruviani descendimus. Exhibuimus illum ferè in substantiâ, ac invaluit apud nostros mos, ut in formâ Electuarii præscribatur. Essentia ejus segnior est. Non ignoramus, quondam vino albo fuisse infusum, ac ægris propinatum, & novimus, id alibi hodiè adhuc fieri. Antimus Conygius seu vero nomine Honoratus Fabri, ut apparet ex tract. 10. Physic. p. 482. in fine in Pulvere Peruviano vindicato, p. 40. docet, generoso vino, eoque albo diluendum esse, & macerandum, ut vis illa vini altè penetrans corpuscula in corpore latentia educat, ac in meatus arteriarum & venarum, factâ quasi viâ secum vehat; Sed, ut nihil dissimulemus, rarissimè in hac formâ spem expectationemque implevit. Dedimus hoc specificum antifebrile tempore intermissionis, non immediatè ante paroxysmum, ac regimen calidum, vinorum & cardiacorum generosiorum usum severè prohibuimus; Paroxysmo à corticis usu, ut ferè fit, imminuto, ægris continuationem ejus suavisimus, quamvis eum primâ vice exhibitum vehementior paroxysmus ut plurimum excipiat. In nonnullis diaphoresin excitat, in aliis largiorem limpidæ urinæ fluxum pro-

(y) conf. Castig. Grabner. nostra p. 56.

promovet. Secutæ aliquando etiam sedes sunt, optimo ut plurimum cum successu. In febribus cum inflammatione quâdam conjunctis, nunquam non noxium deprehendit D. H. In febribus etiam aliis calidioribus obscure remittentibus funestus fuit. Cum verò etiam aliqui Medici in Silesiâ adhuc hodie in ejusmodi febribus corticem patientibus offerant, secuti Clar. Apinum & alios, non possumus non charitate proximi inducti & infelici experienciâ edocti, ab ejus exhibitione in febribus, quæ modò grassantur, dehortari, ne & conscientiam & famam maculent, quod sanè contigit Celeberrimo alias Lowero, Short aliisque, de quibus ille Medicus Mastix in tripudioso illo libro, qui inscribitur, *Ars curandi morbos per expectationem* p. 242. ita scribit: *Lower, Short aliique ejusdem farinae Medici expeditissimam Chin-China virtutem febrium interpolatarum paroxysmos suppressimendi animadvertentes, & hujus exhibitionem in febres continuas itemque eas, quæ malignæ dicuntur, transferendam esse rati fuerunt. Et centenis aliquot patientum eum ignoranter & audacter administrarunt, de quibus febris verè continuâ torsis vix ullus evasit sospes, sed denati sunt omnes, præter eos paucissimos, qui aut validis constabant viribus, aut ebullitioni leviori, vel fermentationi diutius protractæ febris continuæ vel quasi continuæ, licet verè interpolatæ, ortum imputabant, cujusmodi audaciæ, temeritatis, & cum corio humano lusus eorum uterque pœnas luit, sumendo Chin-Chinam in febris continuâ ab belluatione & temulentiâ perenni ortâ, quæ nono l. undecimo die aut circiter utrumque è medio sustulit.* Cæteroquin in Paroxysmis vix præter sitim sedantia adhibemus, nisi, quòd in hysteris aliquando fit, lipothymia infestet, quo casu ad antihysterica confugimus. Potum non negamus, modò non petant vel nimis calidum l. frigidum, &c. Hæc Methodo intra breve tempus febriles proxyfmos compescuimus. Illas verò intermittentes, seu veriùs occultas continuas, quibus malignitas complicata est, frustrà quidem aliâ, quàm quæ malignis convenit, ratione aggressus fueris. Et ex nostrâ sententiâ eximie prudentiæ Medicæ est, etiam verè intermittentes, epidemicè grassanti aliquâ malignâ febre, illis, quæ ante memoravimus, alexipharmacis & bezoardicis oppugnare, nam id nisi feceris, oleum & operam perdes, ac vix ac ne vix impedies, quin æger tuus in prædominantem epidemicam prolabatur. Nobis quoque, ut obiter id moneamus, exploratum est, quod, quò magis increbescunt intermittentes, eò evidentius malignæ decrescant, & minorem edant stragem. Sed nos è diverticulo redeamus in viam. Intermittentes hæ, si empiricè suppressantur, facile degenerant in pituitosis, in Hecticam, Icterus, omnium verò frequentissimè tumores œdematosos pedum pedissequos habent, qui signa sunt incipientis cachexiæ & hydropis. Egregii usus hoc in censu sunt aperientia, incidentia, ac præ cæteris omnibus absinthiaca. Suadent alii diaphoretica, diuretica, & imprimis quoque purgantia. Doctissimus Crato noster extollit orbiculos ex rhabarbari extracto *Consf. 257.* in quibus tamen tantas deprehendere vires non potuimus. Melius se gessit fomentum

ex vino, in quo solum absinthium ebullit, quod quartanario idem commendat. Domesticum constituunt remedium radix althææ & chelidon. minor. quas plebs omnibus tumoribus pedum promiscuè applicat. Aliquoties levamen attulerunt decocta herbarum partim emollientium, ut chamæmeli, meliloti, partim exsiccantium & discutientium, ut bryoniæ, urticæ, calaminthæ, &c. partim adstringentium, ut plantaginis, balauſtiorum; Provide scil., prout circumstantiæ exigebant, pro ratione tumoris, miscuimus hæc vegetabilia, & vel in vino, vel aceto decoqui curavimus. Hæc siquidem viâ duri tumores emolliri, humidi discuti & sicari, ac per adstringentia tonus pedum laxior commodissimè restitui ac mali humores excludi possunt. Præproperi tumorum retrocessus absque sensibili evacuatione lugubrem minantur exitum, rejecto nimirum morbifico humore vel in laticem sanguinis, vel nobiliores partes. Cæteroquin, quoniam post febrim etiam ritè curatam virium jactura superest, studiosè incubuimus in hoc, ut digestionem validam & sanam redderemus, appetitum acueremus, & languidum ventriculum solaremur vinô vel cerevisiâ virtute amarorum vegetabilium imprægnatis, perquam generosis hoc in casu remediis. Cibos præterea eupeptos & euchymos ac vini generosioris haustulum commendavimus. Rarius induci possunt nostri, ut, superatis febrilibus paroxysmis, evacuans, quod tantopere Sydenham, magis tamen post autumnales febres laudat, sibi à Medicis præscribi patiantur, rati, sibi esse humores corporis motibus febrilibus depuratos. Prohibuimus tamen, ne oleribus & fructibus horariis ad viscositatem augendam aptissimis, corpus distenderent, quippè gnari, quod in vegetioribus facillimè hoc fomite ignes febriles denuò accendantur.

Vehementius eodem anni tempore dentientes laborabant, neque in nostris his oris veritati consona sunt deprehensa illa Ronsei de hum. vit. princip. ubi dentitionem hyeme admodum dolorosam, mitiorem æstate, subitanæ autem & sine omni ferè dolore, vere pronunciat, cui adstipulatur, etiam Primerosius de morb. puerorum, quamvis alias in vulgus ferè notum sit, quòd quolibet anni tempore, alii magis, alii verò minùs excrucientur. Causa verò dentitionis istius magis dolorificæ, tempore vernali in turgescantibus nutricum & ipsorum infantum humoribus, quærenda videtur. Nam dùm turgent humores, major affluxus sanguinis ad protrudendos dentes excitatur, hinc pruritus major, dolor intensior, ac inflammatio febrisque vehementior oriuntur. Sæviebant quoque pathemata spasmodica, ac Epilepsia passim pusillorum corpora hoc mense torquebat, multosque jugulabat. Nihil non egimus, ut sævum hostem à cervicibus infantum abigeremus; Et multoties experti sumus, quantum in remediis inane! Eum tamen, quo divina nos bonitas beavit, subinde in curâ successum, ferè magnâ ex parte adscribimus accuratiori discussioni, an Epilepsia idiopathica, an sympathica esset? Et in hæc quidem in pituitâ viscidâ & acidâ ex Clariss. Ettmülleri opinione, fomitem habente, resolventia, incidentia.

Dentitio.

Epilepsia
infantum.

incidentia & modestè evacuantia omne ferunt punctum; opiata verò ut plurimum Parentum & Medici spem inflant, ac mox destituunt. Si quæ autem Epilepsia fontico alicui supervenit morbo, sicut cum omni morborum infantilium genere facile complicatur, illa tolli vix poterit, nisi per prudentem primigenii morbi therapeiam. In Idiopathicâ autem, quò te veritas, vix apparet. Richardus Medicus testatur Deum (quò jure, quâve injuriâ, ipse viderit) quod nunquam cognitionem sufficientem habere potuerit morborum epidemicorum, conceptionis mulierum, & febris quartanæ. His, nisi fallimur, jure optimo maxime addi potuisset epilepsiæ idiopathicæ notitia, quâ hodièque, nisi nobis blandimur, aut ab aliis glaucoma nobis obtrudi patimur, solidâ certè & accuratâ destituimur. Idiopathicam autem credimus & illam, quæ vel à terrore nutricum, vel irâ earundem, aut aliâ insigniori animi commotione pendet. Hic, qui arcanâ sua jactant, qui plenis buccis in specificorum suorum laudem declamant, ostendant præstentque se viros! Quantâ potuit industriâ & circumspeditione Collegium nostrum adhibuit nobiliora remedia, nec tamen parentum lacrymas, sæpè Parcas, ut unicis suis parcant, placare cupientes, adeò frequenter abstergere potuit. Ut plurimum etiam observavimus, quòd, cum nutricibus menstruæ purgationes, quibus ab initio lactationis ad tempus caruerunt, revertuntur, ferè ordinariò fugentes in Epilepsiam prolabantur, difficulter admodum curabilem. D. Helwich in Epilepsiâ cum paralyfi alterutrius lateris conjunctâ, quam aliquoties tractavit, lumbricos turbas dare suspicatur; certè ab aquâ quadam Mercuriali cum syrup. fl. persicor. mixtâ debilioribusque exhibitâ, symptomata hæc conquievissè meminit. Confirmatus in hac opinione etiam alio exemplo. Puer 7. circiter annorum subito corripitur aphonîâ ac paralyfi sinistri lateris; Medicaster quispiam è tonstrinâ primò die sudoriferum exhibet, altero purgans, tertio vomitorium, hoc accepto puer in horribiles convulsiones incidit, rogatus ergò, ut puero ad extremum vitæ redactò succurreret, imperat frictiones, spirit. *c. urinos. naribus admoveere jubet, enema injici curat, præscribit potiunculam ex aqu. fl. til. cerâs. nigr., pœon., epilept. L. spiritu epileptico in collectaneis Leidenrib. descripto, Liquor. C. C. succinat. & syrup. flor. tunic.; hæc cum aliquoties in largiori quantitate ori ejus infusa esset, Puer per vomitum lumbricum duos digitos longum rejicit, & redit ad se, sed ita ut die sequenti vitam cum morte commutaret. Feliciorem eventum Generos. quidam Liber Baro in Filia 6. annorum, à lumbricis aphonâ factâ, curæque D. Grassii concredita, ab ∇. memorata Lumbrici. giali cum syrup. fl. persicorum expertus est. Occasione verò hujus exempli paucis edisseremus, qua ratione lumbricos, nullo non tempore nostris infestos, fugare & necare simus conati. Aliquantò facilius intestinales, quando primaria morbi causa sunt, cognoscuntur ex morfu, lincinationibus ac inflationibus ventris, recurrentibus nauseis, lipothymîis, copioso salivæ per os effluxu, appetitu modò nimis aucto, jam verò prorsus dejecto,

jecto, alvo nunc astrictiori, nunc nimis fluidâ, oris foetore, rubore genarum, siti circa auroram. Apud mulierculas certissimum est vermium signum, subito excitari à somno cum trepidatione; Enimverò in exanthematum eruptione idem hoc contingit, sed pavor ille certius adhuc præbet indicium, cum simul adest stridor dentium. Quando autem morbis jam existentibus superveniunt, diagnosi longè est difficilior. In Febribus de Lumbricis cogitavimus, quoties hæc, quoad alia signa satis quidem mites videbantur, nihilominus tamen extremitates apparebant frigidæ, diarrhæa, non nimia, sed intempestiva excitabatur, sanguis è naribus stillabat, ephidrosi corpus madebat, & signa quasi pugnancia occurrebant. Oppugnavi-
mus illos variis Medicamentis. Amara & Balsamica elegimus in Phlegmaticis & Pituitosis, e. g. rad. Carlin. gentian., zedoar., dyptamn. herb. scord., absinth. cent. min., & quam aliis præferimus Tanaceti, aloën, myrrham, ac ex his præparatas essentias, &c. Hæc in classe locamus etiam oleum absinthii, zedoariæ, &c. Novimus etiam, quòd in extracto tabaci & chamædryos extra corpus pereant lumbrici, unde istorum usus tentabitur a nobis, datâ occasione. At in magnis infantum torminibus, cave, diutiùs amaris his insistas, nam, exhibitis iis, dolores crudeliores excitantur. Pulverem corticis Peruviani inter eximia anthelmintica meritò numeramus. In sanguineis, majori efficaciâ sese commendant acida, atque inter hæc præprimis, tanquàm multis scopis satisfacientem deprædicamus mixturam ex tinctur. violar. & spiritu vitrioli, quâ cum optimo successu usi sumus, tum potissimum, quando simul, quod minimè rarò fit, hæmorrhagiâ narium nimia vermibus obnoxii infestantur. (2) Duxit eò nos potissimum Fr. Redi experimentum, quo monstravit, lumbricos, in succo citri, aurantiorum, aliisque subacidis brevi perire. Neque unquam ea incommoda, quæ alii ex acidorum usu metuunt, nos expertos recordamur. Parciores ferè sumus in exhibendis acribus & sulphureis, nisi quòd egenis infusionem ceparum crudarum & minutim concisarum cum aqua aliquando Nostrum Quidam cum Hieronymo Trago suaserint. Balsamum sulphur. succinat. &c. tenellis corporibus non posse conducere, certi sumus, quicquid alii dicant. Quando pavores sub somno adsunt, pulveres ex unicorn. fossil., corall., bol. armen., terr. sigillat. &c. exhibemus, quæ & officium faciunt, quando sedibus vires atteruntur. Nec deterremur contrario Celeberr. Rhedi experimento, quo fidem facit, in aquâ, cui terra sigillata & lap. bezoard. fuerant commixta, ad aliquot dies superfuisse lumbricos. Nam tamen hæc, aquæ simplici infusa, extra corpus, non polleant virtute necandi lumbricos, non tamen inde consequitur, quòd cum lymphâ, aliisque succis in corpore, vivo calore turgenti, nihil laude dignum præstent. Adultis, qui nec à nauseabundis abhorrent, cum utilitate, ordinantur pulveres ex Salibus alkalicis, & saccharo, cui una alterave guttula
E 2 olei

(2) conf. Castig. nostra Grabn. p. 56.

olei alicujus admiscetur. Conf. Welschium in *Curat. propr. Dec. 7. Cur. 1. p. 371.* Et rarò admodum invenies lumbricis obsessos, qui falsamentis delectantur.

Primo autem meritò, inter anthelmintica, loco stant mercurialia. Jucundum spectaculum est, quomodo lumbrici in vase semipleno merc. hujus contactum fugiant. Innocentissimum paratur (ut paulò ante monitum fuit) Medicamentum, si φ ius vivus c. ∇ . gramin., hyperic. scord. coquatur, & haustulus c. syrupo convenienti, e. g. flor. persicor., acetos., citr. propinetur. Conf. Wedel. in *Amœnit. Mater. Medic. l. 2. sect. 2. c. 8.* Morosiores decipi possunt, exhibitâ cerevisiâ, cum qua mercur., ex consilio Boylii, conquassatus fuerit. Tutò, quod toties fecimus, etiam mercur. d. exhibetur. Et rotulæ ex φ . d. c. saccharo in ∇ . gramin. soluto, dulcedine suâ facile salivam teneris movent, citra subsequenter ptyalismum, si provide agas. Ejus generis Rotulas etiam describit Zwelferus in *Pharmacop. Reg.* Cinnabarina ex eodem capite profunt, quæ rectè pulveribus illis terreis admiscuntur, præprimis in metu convulsionum, quæ imminere videntur, quando in somno vociferantur & terrentur, nares prurientes continuò fricant, morsus ac laniationes stomachi ac intestinorum percipiunt, assiduè manum regioni ventriculi applicant, abdomen inflatur, singultus, tussis sicca, anxietas &c. premit. Quo in casu etiam cætera Antiepileptica ac cardiaca anthelminticis combinantur, ut rectè monet Joh. Schyronius *lib. 3. method. medendi cap. 20.* Et non planè frustra hîc Riverius hypericum, alii autem pœoniam laudant. In febribus, cum animatâ putredine conjunctis, ii non formidabunt usum mercurii d., qui eum in febb. malignis, pulveribus bezoardicis ad incidendam tunc simul semper peccantem salivæ totiusque lymphæ visciditatem, admiscunt, id quod novimus fecisse Camerarium, & hodiè adhuc ejusdem vestigiis insistere Lentilium. Sed ante hos in creberrimo usu in febribus, in quibus ægrotantes vermibus scatebant, mercur. d. fuit expertissimo Practico Nicol. Chesneau, ut apparet ex *libr. 3. observ. c. 8. observ. 2. p. 322. observ. 4. p. 325. observ. 5. & 9. p. 329. p. 315.* merc. d. se mirabilia præstitisse in pluribus ægrotis, & ab ejus nomine pulverem CHESNEAU fuisse vocatum narrat. Nos in febribus, ubi vermium suspicio, fere Cinnabari nativa contenti vivimus.

Epilepsia. Tàm frequenter etiam oculis nostris observantur Epileptici, ut historiam Epilepsiæ contexere non adeò sit arduum. (a) Faciemus verò illud breviter. Utprimùm morbus Comitialis invadit, homo subito & improvise concidit, ac id utplurimùm fit. Inter rariora numerandum, quod Mimus, toto corpore convulsus, non concideret, sed erectus staret apud Marcell. Donat. *lib. 2. histor. mirab. cap. 14.* quod quidam Ludi Magistri Filius, quoties, ac quocunque in loco, epilepsia eum invaderet, recta pror-

(a) conf. *Castigat. Grabner. Nostræ p. 56.*

prorsum procurreret, finem non ante faciens, quàm obstaculum aliquod offenderet, ob quod longior procursus non pateret, in quod impingens, denuò corrueret, apud Arnold. *Bootium in observ. Med. de affect. omiss. c. 6.* Collapsus porro Epilepticus, toto corpore concutitur. Interdum verò prorsus sunt admirabiles illæ convulsiones, quo merito referas exemplum, quod recitat Robbertus Sibbaldus *in Scotiâ illustratâ p. 1. l. 2. c. 6. p. m. 56.* de Puellâ: Hujus facies versus colli posteriorem partem re-torquebatur, manus pedesque retrò vertebantur, & tunc cœpit motibus convulsivis violentissimis agitari, cum maximis subsultibus, adeò, ut quamvis Pater, vir robustus, illam omnibus viribus deprimeret, se tamen ad trium pedum altitudinem à solo unâ cum Patre elevaret, imò interdum altius eveheretur. Præterea oculi invertuntur Epilepticis, ac illis spuma ex pulmone prodit, ut cum Hippocrate ex libr. de morbo sacro, loquamur. Non solum difficulter respirant, sed & stertunt, linguam extra os exerunt, dentes collidunt. Non paucis semen aut urina præter voluntatem in ipsa accessione elabitur. Fæcum alvi dejectio in infantibus, quos prima vice torquet epilepsia, non est adeo sinistri ominis, ut multiplici experientia didicimus. Præcipuum autem indicium Epilepsiæ est, detentio sensuum & principum facultatum vel functionum, & hoc ipso ex mente Welschii à spasmo & convulsione differt. *Decad. 7. Curat. 1. p. 372.* nisi fortè placeat, etiam inter spasmus ac convulsionem, adhuc statuere hoc discrimen, quod spasmi sint motus convulsivi, lenti & firmi absque jectigatione; convulsiones verò ut plurimum symptomaticæ cum subsultibus & agitationibus partium conjungantur, nam ut plurimum convulsus, verbo Lucretii, in jactando membra fatigat. Signa futuram Epilepsiam indicantia, diligenter enumerat Aurelianus, ac ex eo, recentiores alii. Potiora sunt dolor capitis, subindè recurrens, seu, verbo Aureliani, gravitas, sensuum omnium tarditas, ubi in specie Aurelianus obtusum visum, & sonitum ac tinnitum aurium notat; insolens obli-vio rerum ferè omnium, crebræ vertigines, iterata invasio incubi, linguæ quædam difficultas, cum saltu musculorum, dolor à tergo inter scapulas, continua in somnum propensio, aut huic oppositæ nonnunquam vigiliæ nimix, lassitudo ingens & torpor membrorum, mœror animi, somnia turbulenta, crebri terrores, sputationes, jugis præcordiorum inflatio, cum oscitatione, nausæa, stomachi dolore, &c. tandem & urinæ tenues, crudæ & lividæ, sudor ros-cidus &c. Et pleræque ex his, præprimis autem priora signa, epilepsiam idiopathicam indicant; posteriora autem, e. g. inflatio ventriculi, apepsia, si tremor seu contractio labiorum, ac palpitatio cordis conjungatur, à Ventriculo malum oriri indicant. Epilepsiam autem hysteri-cam detegunt motus uteri & partium abdominis convulsivus, murmur & sonitus, tensioque Ventris inferioris, dolor hypochondriorum, inordinatus linguæ motus, ita, ut vix distinctè verba proferre queant, deglutitio difficilis, pectoris constrictio,

tumor lumborum, prægressa sanguinis menstrui suppressio, secundinarum detentio, matricis ac genitalium exulceratio, &c.

Nondum perfectum adepta gradum hæc Epilepsia est; quamdiu somno similis, aut in somno obrepit, ac effusione seminis, quam incredibilis lassitudo sequitur, cujus exemplum D. Pauli & Helwich in viduo obvenit, sese manifestat. Notum autem est, quod ad hunc morbum sint proni, quorum progenitores extiterent epileptici, pueri ac infantes, ex adultis, melancholici teste Hippocrate 6. *Epidem.*, 1. nec minus plethorici otiosi, ac spissiore sanguine torpentes, quando timidam ac trepidabundam nacti sunt naturam, ac fortuito terrore percelluntur, nec non juvenes cœlibes, otiosi, venereis cogitationibus indulgentes, &c.

Therapeia hujus affectus maximè ardua, ac qui vel parum hic promittere audent, vix ac ne vix fidem adimplent. Felices, qui methodo præservatoriâ à fontico hoc malo, industriâ periti Medici præmuniuntur, ablati epilepsiæ causis. Jam præsentē epilepsiâ, omnis causarum varietas iterum iterumque diu anxie sub examen vocanda est, ac ne verâ quidem inventâ causâ, præcipitanter medela in malo inveterato promitteuda est, nam non cessat, (etiam remotâ causâ) malum, nisi motuum convulsivorum tollatur assuetudo, quod fortè omnium est difficillimum. Quid hætenus à Medicis, tum pro Paroxysmi præsentis amolitione, & novi, seu futuri, representatione ac inhibitione actum sit, qui volet, cognoscere poterit ex Matthiæ Unzeri *hieronosoph. lib. 2.* Nemo ex nobis cum Menecrate, de quo Athenæus *l. 7. Dipnosoph.*, multis stipatus epilepticis habitu Deorum vestitis, in publicum prodire poterit. Hoc certum, quod in chronicis epilepticis affectibus volatilia urinosa aliquid præstent, sicuti Cinnabarina in symptomaticis, præsertim acutis supervenientibus.

Alii morbi hujus temporis, methodo ordinariæ medendi faciliè cedebant, ut præprimis D. Grass. observavit. Diarrhæas D. Preus sustulit pulveribus ex bol. Tocaviens. & clysmatibus lacteis. Idem luctatus cum pertinacissimâ ophthalmiâ ex crapulâ, post ulcusculum fistulosum diuturnum in palato circa gingivas, pro cariei jam manifestæ progressu ulteriore impediendo, sanatum, ortâ.

Post 14. Aprilis diem febres malignæ conticescebant ac halcyonia nobis promittebant, sed infida, nam iterum ferocire incipiebant Mense Majo. Jungebatur illis catarrhus suffocativus, præprimis in ætate teneriori. Hic D. Preus cum successu usus pulveribus bezoardico-pectoralibus fixis & laxativis alternis unâ cum cataplasmate emollienti & resolutivo è pulpâ Pomor. Borsdorffianor. cocta, oleoque amygdal. dulc. pectori sæpius applicato. In Febri verò tussiculosâ sanguinei pueri initio obstructione alvi, deinde autem cholera correpti, post unguentum de Arthanitâ ab alio illitum, egregium usum vidit D. P. ex cataplasmate in lacte bubulo cocto è specieb. emoll. farinâ lini, orobi, foenu græci, &c. non neglectis internis, pulvere, inquam, bezoardico, mixturâ è spirit. nitr. d., menthæ, & carminat. sy'v.

Multis

Multis verò etiam negotium facessere visa est Cardialgia, quâ de non Cardial-
 unus omnium tum audiebatur sermo. Alii morsus, punctiones & lanci- giæ.
 nationes, alii rosiones sese percipere aiebant; nonnulli de tensivo &
 compressivo tantum dolore, ad utrumque latus pertingente, & cinguli
 alicujus instar constringente conquerebantur, plurimi verò gemitibus & al-
 tè ductis suspiriis, anxietatis interpretibus, adstantium aures obtundebant.
 Inanes vomitus ut plurimum cardiogmi erant comites, quos imperiti eme-
 tica indicare credebant, sæpè etiam in foeminis passionibus hysterice obno-
 xiiis deliquia superveniebant. In singultu cardialgiæ juncto non defuit of-
 ficio suo Electuarium ex conserv. scord., conf. de hyacinth. theriaca, be-
 zoard. min. & syrup. scorzoner.

Nonnulli etiam Bubonibus infestabantur; Hos inter Lanio quidam curæ Bubones.
 D. Preussii commissus. Laborabat is febri hac epidemicâ, corpusque ejus
 petechiis lividoatris foedatum erat. Decimo morbi die bubone admodum
 dolenti in inguine dextro tentari cœpit, remittentibus sævis symptomati-
 bus ac delirio, ut facile credere posses, eum fuisse criticum. Remissio
 enim graviorum symptomatum criticam solutionem notat, modò adsit som-
 nus. Ex re & vero Prosper Martianus in annotation. ad libr. de humorib.
 Hippocr. p. no. edit. Venet. scribit. *Nihil est, quod tutius perfectæ Crisis ar-
 gumentum præstet, quàm si somnus subsequatur*, quod Hippocrates etiam mo-
 nuit lib. 6. Epidem. Sect. 1. v. 20. Ager autem infcio Medico Bubonem
 hunc spiritu quodam vinoso apoplectico à fratre sibi communicato illinit,
 & præterea ad tollendam alvi obstructionem decocto prunorum sennato
 improvidè utitur. His ita factis, tumor disparere, ac æstus febrilis cum
 gravioribus symptomatibus non sine maximo periculo redire cœpit. Ex
 præsentissimo discrimine, Venæ sectione in pede celebratâ, ac bezoardicis
 nitrosis & anodynis ereptus quidem est & integræ sanitati restitutus, sed
 post breve tempus dimidio scil. exinde anno exacto ab iræ incendio, no-
 vâ iterum correptus febre malignâ, naturæ debitum persolvit. Oblati quo-
 que fuere nobis ejusmodi ægri, eos verò felici cum successu tractavimus eâ
 methodo, quam in Consilio Medico Pestilentiali nostri quondam Physici
 suasere. Eorum verba etiam aliis lucem accensura hîc describimus: * *Dan-
 nenhero ist am sichersten, diese Art der Beulen durch aufgesetzte Ventosen he-
 rauszuziehen, fest zu machen, und zur suppuration und Eyterung zu bringen.
 Die harten und schmerzhaften sind mit erweichenden, linden und sanft-kühl-
 enden Olitäten und Pflastern zu tractiren; schlägt aber Hitze und Entzün-
 dung zu, so sind solche Unctiosa zu meiden, und mehr die Mucilagines und*
 Cata-

* Id potissimum probamus consilium, quo, adhibitis cucurbitulis hoc genus tumorum
 ad prurptionem, maturationem & suppurationem provocantur: hac quidem ratione, ut
 duri & dolentes emollientibus & lenientibus oleis unguentive tractentur; accedente vero
 æstu ac inflammatione, unctuosus hisce procul esse jussis, mucilagines & cataplasmata è si-
 milagine, pane molliori, semine lini, fl. sambuc., vitello ovi, croco &c. in lacte decoctis, in
 subsidium vocentur; ingravescente autem æstu, & duritie, & lancinatione, emollientibus
 admisceantur attractoria & maturantia, semperque addatur quid quod malignitati resistat.

Paroti-
des. Cataplasmata von Weizenmehl, oder Semmel-Brocken, Lein-Saamen, Holunder-blütthe, Eyerdottern, Saffran und dergleichen in Milch gekocht, zu appliciren. Will Harte, Stechen und Hitze noch mehr überhand nehmen, so müssen unter die erweichenden, auch zuziehende und zeitigende Mittel genommen, und dann allezeit etwas Von den Gifftbestreitenden beygesetzt werden, &c.

Aliis eodem tempore tumores alibi in corpore præprimis circa aures, i.e. Parotides apparebant, iisque, quorum vires violentia morbi fractæ erant, mortem denunciabant. Pro virili motum naturæ adjuvimus, & in eo fuimus toti, ut quamprimum ad augmentum properarent, & aliqua materiæ pars discuteretur, ne suffocationis periculum ægri incurrerent. Profuere emollientia, maturantia, discutientia, & non rarò in eorum usu perstitimus, donec ex toto evanescerent. His verò non satisfaciuntibus suppurantia subsidio fuerunt, & in nimium lentè prorumpentibus etiam attractoria. Vidimus casus, in quibus periculum suadebat, ut candente levi ferro aperirentur, sed ab ægrorum mollitie, maximè verò à timidis circumstantibus ad mentionem nudam hujus Chirurgicæ operationis trepidantibus, id impetrari minimè potuit, ut in innocens ac tutum auxilium consentirent. V. S. non celebravimus, quod alibi fieri novimus, etiamsi aliàs nobis non sint incognita illa Celeberr. Practici, Petri à Castro de febb. malign. p. 247. qui inquit: *Si vires permittant, quamprimum apparentibus parotidibus, erit mittendus sanguis ex Cephalicâ in quantitate mediocri: Sin minus, cucurbitulas scarificatas brachio ejusdem partis aut scapulis affigere oportet, & mox adhibere, quæ citra maximam attractionem discutiendi vires obtinent.*

Quoad Vesicatoria, ad quæ applicanda, hoc Mense Majo, nos iterum adegit necessitas, itidem aliqua observare contigit. Inter illa maximè memorabile hoc est, quod in corporibus succi plenis plethoricis & nimia humorum copiâ repletis, interdum fere nulla feri evacuatio fuerit secuta, cujus rei ratio indubiè quærenda in nimia fluidi copiâ. Certum enim est, quod ad excretionem, præter apertos poros, debitam fibrarum resistantiam, motum proportionatum, etiam debita fluidi requiratur copia, quod luculentè in negotio mensium & lactationis cernere licet. Præterea etiam notatus, post applicata ejusmodi subjectis vesicatoria, major orgasmus in humoribus, species verò quædam oscillationis in solidis non obscure fuit deprehensa; Ut jam de febris exacerbatione, deliriis & inflammationibus viscerum, motibus convulsivis, hæmorrhagiis nihil dicamus; Contra utilitatem eximiam attulerunt in diathesi humorum crassa ac viscida ad stagnationes & coagulationes velociter ruenti, in iis subjectis, quorum pulsus exilis, extrema frigida, quique propensi ad soporosos affectus erant, eò quod salia cantharidum partes viscidas dissolvant, disgregent & ad pristinam fluiditatem disponant. Et D. Preus quidem mirabilem efficaciam in Vesicatoriis, in principio morbi applicatis, deprehendit, cui nobiscum pollicem etiam premit D. Helwich, nisi quod ex hujus observatione, sitim nulla arte edomandam, per tres quatuorve dies inducant.

Fre.

Frequens erat illis diebus etiam coryza conjuncta cum *ναρηβαγία*, dolore Coryza. capitis, sternutatione, & licet omni horâ quasi occurreret, cui illud Juvenalis in aurem diceret: *Jam gravis es nobis, nam sæpè emungeris, exi*; non fuere tamen, quòd affectus à nemine non contemnatur, qui opem consiliumque à nobis peterent.

Depravata auditio plurimis Vratislaviæ molesta ægris, molesta & Me. Depravata auditio. dicis ipsis, hoc Mense erat communissima. Modo enim erant, qui sonum talem, qualem tintinnabulum pulsatum edit, sibi percipere viderentur; modò, qui de sibilo quererentur; nec nulli, qui pulsationem intra aurem sentirent. Pulsus autem ille exactè cum pulsu arteriæ convenit, nec aliunde nisi ab arteriâ dilatatâ pendere verisimile est. Senes nonnulli sonum fluctuum allisioni similem, vel strepitus varios in auribus suis excitari ajebant. Jam quidem communiter traditur, depravatam ejusmodi auditionem dependere vel à morbis cerebri, vel à morbis etiam auris, cum experientia affatim edoceat, & quosdam cerebri morbos, e. g. delirium, phrenesin, vertiginem, epilepsiam, &c. & nonnulla aurium pathemata, v. gr. inflammationem & abscessum tympani & labyrinthi cum tinnitu, &c. conjunctam esse, ut jam de corporibus, quibusdam externis, Vermibus, aliisque membranam meatûs auditorii & tympani commoventibus nihil dicamus; Nihilominus & illud exploratum est, quod nullo istorum morborum, aut externi alicujus corporis vestigio præsentis, subinde homines de sonis in aure querentes audire liceat. Unde quidem omninò nascitur suspicio, potius in aère ipso causam subinde latere. Et quid quæso, impedit, quo minus dicamus, quod aër aliis foetus corpusculis, in ejusmodi sonitu non tantum organum immediatum auditûs, sed & partes cerebri, in quibus filamenta nervi auditorii terminantur, concutiat, ac eo ipso varios sonos excitet; Tametsi aliàs minime contemnenda, quæ in hanc rem differit Dn. du Verney *Tract. de Organ. Audit. part. 3 in calce operis*, imò & Solender *Seçt. I. Consil. Med. Cons. 4. pag. 15. & seqq.* Varia contumacia huic malo & aliquando in omnimodam furditatem abeunti, opposuimus, non semper tamen eundem, quem optavimus, eventum consecuti fuimus. Crato Noster quondam accepit folia card. ben. cum summitatibus m. iiij conquassata in mortario, maceravit in ∇ . card. bened. lib. ij. per 24 horas, deinde destillavit, & elicuit liquorem, in quo linteolum vel gossypium imbutum auribus immisit. Cum Timæus à *Guldenkl l. 1, de affect. cap. 32.* Mindereri Balsamum mira in depravatâ auditione præstitisse narret, nos etiam vires aquæ acouisticæ Mindereri periclitati sumus, quas ultra meritum celebratas esse à Timæo comperimus. Idem etiam testamur de ∇ . Anhaltinâ Cephalicâ à Thonero *observ. lib. 2.* vehementer laudatâ; non inficientes tamen verum esse, quod ait, *effectum ejus esse præstantiorem in vaporosâ ac flatulentâ materiâ discutiendâ, quàm oleorum* *Quorum*, quæ nimio calore sæpius nocent. Dn. D. Tilesio meminimus in usu fuisse mixturam ex spirit. lil. convall., theriacal., formic. & essent. castor. Datâ occasione

sione etiam exploraturi sumus, quid valeat urina leporina, sive seorsim, sive cum spirit. vini, auribus calidè instillata, quâ nihil utilius esse in hoc affectu, Tulpius scribit *lib. 4. observ. c. 15.* Cæterum illud aureum Fabric. Hildani monitum *Obs. 25. Cent. 5.* de remediis non temerè auribus immitendis, quamdiu spes est, extra applicitis curam perfici posse, altè memoriæ nostræ semper inscriptum fuit; E re nostrâ ægrorumque esset, ut instrumentum (est illud instar infundibuli, cujus amplio rem partem objiciunt secum loquentibus, angustio rem auribus propriis applicant) quo ad acutius audiendum Hispani utuntur, teste Hœfero *lib. 1. de affect. capit.*, etiam apud nos in usum traheretur.

Raucedo. Raucedo, etsi hyberno tempore maximoperè soleat esse frequens, ac facile curetur, quia fortassis tantum ab exasperatione superficiei glottidis à frigore aut acribus falsisque humoribus inducta, dependet, occurrerunt tamen aliquot etiam in Majo nobis exempla raucedinis, omnem artem eludentis. Homo cœlebs quinquagenarius, strigosi corporis sine ullâ evidente causâ, gravio rem initio fieri vocem animadvertit, eam deinde brevi momento in asperio rem & tandem in clangosam abire sentit; cum autem muneris ratio expeditum vocis usum exigeret, multa molitus & hoc tempore curam molesti affectûs cum curâ institui voluit. Acta omnia, sed eventus confirmavit *Aphorism. Hippocr. 40. ex Sect. 2.* ac Gordonii prognosticon, vocis Raucedinem, quæ per annum duravit, non recipere curationem, quicquid etiam de efficaciâ syrup. de erysim. Lobel. tum Auctor ipse, tum Bauhin. in *histor. plant. lib. 21. c. 11.* scribant. Non incredibile hoc Raucedinis genus à siccitate laryngis dependere, ac ideò difficulter curari, quòd & humidum corporis absumptum restituere res sit ardua, & ferè ultra artis vim, humores ad alia emunctoria effluentes, per collapsas vias ad debitum iterum derivare locum.

Angina vera.

Mense Junio aliquot anginæ exempla nobis oblata fuere. Intelligimus verò per Anginam, faucium id est laryngis seu pharyngis inflammationem. Nam in anginâ semper guttur & fauces laborant, sive ut Hornius loquitur, commune iter ad asperam arteriam & gulam, quod retentâ græcâ voce, isthmum vocamus, & hoc vel exinde patet, quòd in anginâ semper adsit difficultas respirandi & deglutiendi. Cum verò Neoterici & interni & externos laryngis æque ac pharyngis musculos inflammari crederent, quod certè à vero non abludit, diversas anginæ species constituerunt, ac iis varia imposuere nomina ac artem sine ullâ utilitate reddidere difficilio rem. Nam si vel maximè iis concedatur, quod muscoli interni seu laryngis seu pharyngis sine externis inflammentur, & vice versâ externi sine internis ardeant, nihil ad curationem inde peti potest, & emolumentum, quod in prognosi ex eâ doctrinâ speratur, titubantibus, cum prognosi ipsâ, innititur pedibus. Hoc malum juvenibus, constitutionis sanguineæ, præ reliquis familiare. Post motus corporis impetuosiores, aut nimias spirituosorum potuum ingurgitationes, horrore corripiebantur, qui

qui aliquando post aliquam intermissionem subito revertebatur. Hunc ingens æstus cum siti Tantalea excipiebat.

Pulsus erat frequens, durus, inæqualis, urina saturatissimè rubra. Magna aderat respirationis difficultas, apertoque ore anxium ægri spiritum ducebant, & crescente malo strangulationis periculum instabat, ut videas non malè à Græcorum *ἄγχον* quod laqueum & suspendium significat, morbum hunc à Latinis dictum ANGINAM. Deglutitio etiam tantoperè impedita, ut potus faucium angustias vix superaret, quin sæpè in nares refunderetur. In faucium isthmo interdum apparebat tumor, interdum autem in externo collo, ubi morbus mitior erat, vel oculis cernebatur, vel manibus palpabatur, in iis verò, quorum vita in majori periculo, nullus planè tumor deprehendebatur. Non tantùm isthmus ita exurebatur, sed spectabatur simul in ore rubor flammeus, urgebat dolor acutus pulsatorius & punctorius, lingua tumida, obscurè rubra canum instar exerebatur, fauces arebant, si ægrotantum os aperias, omnia tensa videbantur. Venæ infarctæ, oculi prominentes & sanguine suffusi. Præterea aderat jacendi difficultas, ac frequens sedendi cupiditas. Ingens præ foribus periculum, quando articuli gelido torpore rigeabant, vultus livescebat, vox intercepta, & stridor quasi in gutture & pectore audiebatur. Inexorabilis mors instat, deficiente pulsu & voce quasi in caninam mutatâ, apparente subinde etiam spumâ oris. In summo juvenis periculo exoptatissimè Erysipelas in pectore cum symptomatum mitigatione, efflorescere vidit D. Helwich.

Omnia verò symptomata sunt mitiora in nothâ Anginâ; nam licet & in ipsâ subinde aliqua respirationis adsit difficultas, ac deglutitio impediatur, licet etiam tumor (qui serosus ut plurimum) tum intra fauces, tum in collo deprehendatur, abest tamen & febris, rubedo intensa imò & dolor acutus ac ptyalismo intra dies quosdam malum tollitur. In exquisitæ anginæ curâ minimè vestigiis insistere licuit Sydenhamii, cujus quidem curæ cardo vertitur in copiosâ sanguinis detractiōe per repetitas Venæ sectiones, in catharticis, epispastici fortis ac ampli applicatione, quâ de re latius legi potest in *Oper. p. 358*. Quâ viâ ante ipsum incessisse novimus Doctiss. Batavorum Medicum Lindanum, ita tamen, ut hic intra 2. vel 3. horas non unâ vice, sed repetitâ ad Unc. XXX. ex venâ popliteâ sanguinem detraheret. Horrent enim nostri tantam sanguinis profusionem, raroque ad iterandam V. S. in uno eodemque morbo persuaderi possunt. Itaque nobis unâ vice, aut summum duabus V. S. celebrare in more positum est. Quod quidem absque mora facimus, ut turgescen-
tiam sanguinis imminuamus, statim discutiamus, ac copiosiori affluxui occurramus. Fecimus verò pertundi plerumque Venas cubiti in latere affecto, quod evidentior & propior, ex anatomicis, venarum ejusdem lateris communicatio sit. Cum verò parti affectæ propinquiores sint raninæ sub linguâ, (quarum apertionem promiscuè in morbis ferè omnibus vulgus

Angina
notha.

apud nos flagitat,) præmissâ V. S. in brachio, aut si circumstantiæ id velint, e. g. in suppressione mensium, in talo, ex raninis etiam sanguinem detrahimus.

Vomitoria, quæ Agricola, Riverius, Deckerus, Hartmannus aliique in Anginâ laudant, periculum suffocationis veriti, omisimus. Subinde tamen purgantia in forma liquida, sed leniora, propinavimus, præprijimis, quod tamen rarius contingit, si crassæ ac nebulosæ adessent urinæ, his enim præsentibus in qualibet inflammatione ad purgationem à principio confugere nos posse, scimus edocti à primicerio Hippocratis interprete Prospero Martiano p. 387. *de ratione Viæ. acut.* Et sanè prudens hoc monitum fuit nobis instar columnæ vialis in bivio constitutis. Libertatem alvi Clysteribus obtinuimus. Cæteroquin ita ferè in periculoso hoc morbo progressi sumus; ut inflammationem discutere, & stagnantem sanguinem iterum in motum reducere tentaremus. Ubi quidem resolventia seu discutientia, & in sanguine viscidiori etiam attenuantia profuere, non neglectis lenissimis adstringentibus, quæ roborantium nomine vulgò veniunt, hæc enim laxior fibrarum tonus omninò indicat. Eâ intentione gargarismos ex adstringentibus & discutientibus mixtos ordinavimus ex rad. bistor. torment. bryon., herb. prunell., salv., pyrol. heder. terrestr., tarax. flor. bellid., sambuc., balauftior., tanacet., cort. granator. sem. cydonior. decoct., colaturæ nitrum etiam adjecimus, mandantes, ut his similibusve gargarismis fauces modestè colluerentur. Non imitati sumus Scultetum, qui acetum vini acerrimum, aliosque qui meliori consilio spiritum vini admiscent. Externe emollientia & discutientia sine adstringentibus adhibita, ex cujus generis simplicibus ferè constat cataplasma primum Barbetæ, nisi quod oleum chamomillæ, à nobis omissum & loco hujus aliquid saponis Veneti admixtum fuerit. Non abs re est, collum externè spir. vini camphorato rite inungere, ac deinde cataplasmata, vel si hæc propter celerem refrigerationem suspecta sunt, emplastra de meliloto, diachylo., de spermat. cet. diaphoret. M. &c. circumponere. Multi, & inter eos etiam Waldschmidt, ab initio suadent suffumigia ex succino, oliban. &c. sed non absque causâ Sennertus noster lib. 2. *prax. part. 1. c. 24.* ab eorum usu dehortatur. Remedia interna erant diaphoretica ex absorbentibus lap. 69. corall., mandib. luc. pisc., dent. hippopotam. & quem Variola & Burnet. specificum esse volunt, dente apri, ꝑ. d., bez. miner., & ꝑ. cinnabar. & nitratis, quibus interpolabantur lenientia, dam-natis, quibus alias specificam virtutem ignari tribuunt, sordibus non unius generis, stercoreibus, inquam, & urinis variorum animalium. Si verò conatûs discutiendi essent irriti, & dolor pulsatorius quarto vel quinto die nos suppurationis admoneret, hanc omninò promovimus tum collutionibus oris ex decoctis emollientibus & maturantibus tum cataplasmatibus & emplastris ejusdem censûs. Suppuratione jam factâ, ubi nimirum dolor pulsatorius ardorque remittit abscessûs apertionem modò hæc, modò illâ viâ procurare tentavimus, & post evacuationem puris, reli-

reliqua ex artis præscripto absolvimus. Sed dolendum omninò est, quod non in summo suffocationis discrimine asperam arteriam perforare liceat, cum iudice Sculteto ac comprobante experientiâ, in affectibus laryngis, qui suffocationem minantur, tutissimè id fieri posset, in Armament. Chirurg. in declarat. tabul. 34. p. 122. Hâc enim viâ certissimè non pauci liberarentur, sed quo minus id fiat, in causa est circumstantium morositas & crassa Chirurgorum in anatomicis ignorantia. Nothæ anginæ cura facilior est, & à quibusdam Nostrum purgantibus & blandioribus diaphoreticis post V. S. in Plethoricis feliciter intra paucos dies sublata. Post anginam notham externis repellentibus discussam, D. Helwich observavit delirium ac effectum paraphrenitidi seu inflammationi diaphragmatis simillimum.

A nobis consilium requisiverunt etiam eo tempore quidam vomitibus, aut certè vomendi conatu delassati, ac horroribus febrilibus, cardialgiis, punctoriis circa scrobiculum cordis doloribus, subinde & singultu miserè torti, quos equidem ventriculi inflammatione correptos fuisse suspicamur, ex eò potissimum, quòd omnia symptomata ab exhibitis stomachicis, carminativis, antifebrilibus intenderentur, mitescerent verò ab iis, quæ in inflammationibus profuisse, tot Seculorum experientia docuit.

Occurrerunt etiam eo tempore quidam alii inflammatorii affectus, quorum sedem, an in hepate, an in pleurâ, an in membranâ pulmonum quærere deberemus, dubii hærebamus. Et certè, tametsi in numero habeamus signa pleuritidis, peripneumonix, & hepatitidis vulgò tradita; Certi tamen omninò sumus, quod nullâ falli nescia diagnosi hæc inflammationes ex traditis illis signis dignosci queant. Febris continua atque acuta, difficilis & fervida respiratio, tussis, rubor genarum, aliquando & oculorum, lingua sicca & aspera, colli inflatio, sitis, vigilix, in omnibus tribus inflammationibus cernuntur. Cum aliqua veri specie major in respiratione angustia supponitur esse in peripneumonia, quam quidem in pleuritide; at verò! quod & in hoc ipso parum fiduciæ poni queat, elucescit ex eo, quod etiam illi, qui neque pleuritide neque peripneumoniâ laborant, sed vel cursu vel aliis laboribus sese fatigarunt, propter majorem sanguinis ad interiora confluxum, difficillimè & cum summâ anxietate spiritum trahant. Jugulum ipsum sententiæ de certâ inter pleuritidem & peripneumoniâ differentiâ petunt, qui ex inspectione corporum pleuritide extinctorum demonstrant, non pleuram, sed pulmonem esse sedem pleuritidis, in quorum numero sunt eximii Anatomici & observatores Felix Platerus, Johann. Zecchius, Alexander Petronius, Marsilius Cagnatus, Etius Cletus, Panarolus, Petrus Crispus, Julius Cæsar Benedictus, Petrus Castellus, Johannes Menelphus, Johannes Baptista Orius, & Herophilus, qui teste Tertulliano sexcenta secuit cadavera. (b) Et cum Romæ in hanc rem studiosè inquireretur ac in sectis cadaveribus pulmones

Vomitibus
ac vomendi
conatus.

Inflammatorii
affectus.

læsos in pleuritide reperirent, Affectæ Galeni, & sequacium ejus Arabum &c. ad peculiarem Romani aëris constitutionem confugerunt, docentes, dari & pleuritidem non exquisitam, & hanc propter cœli inconstantiam & humiditatis excessum, ortum trahere à capite, ac materiam, quæ non exquisitam pleuritidem excitat, descendere per arteriam asperam ad pulmones, eamque, præcipuè si biliosa fuerit, in pulmonis cavitatibus inflammationem inducere, & hinc in cadaveribus pleuritide interemptorum pulmones inveniri læsos, ut constat ex *Doctissimo Commentario Prosperi Martiani in libr. Hippocrat. de loc. in homine pag. 77. § 78. edit. Rom.* Et si dicendum, quod res est, multò feliciùs Phænomena in pleuritide occurrentia explicari possunt ex mente illorum, qui sedem ei tribuunt in ipsis pulmonibus, quàm istorum, qui natalem ejus locum quærent in pleurâ, quos sanè difficultas, quomodo sanguis, qui sputum pleuriticorum tingit, & purulenta materia, si non bene judicetur pleuritis, à pleura in asperam arteriam deveniat; Ubi in oppositâ opinione illud evidentissimè declarari potest. Nam cum ex oculatissimi Malpighii observationibus notum sit, compagem pulmonum constare ex infinitis propriâ membrana circumseptis lobulis, ac ex his vesiculis innumerabiles partibus interioribus emergere ramificationes, quæ cum trachæâ communicationem habent; Facile concipi potest, quomodo ruptis in membranosis illis sinubus minimorum vasculorum orificiis sanguis, aut etiam abscessu facto pus, in trachæam extillet, ac deinde per tussim ejiciatur. Neque ullo jure ab his requiri potest, ut credant, pulmonem sensu carere, nam hoc colore, qui sunt alterius sententiæ, utuntur, in pleuritide esse dolorem acutissimum, & hinc pulmonibus sensu destitutis adscribi non posse; nam quomodo persuadebunt, pulmonem sensu orbatum esse, cum moles ejus constet ex membranis, trachæâ, vasis sanguineis, nervis, omnimodò ex ipsorummet doctrinâ sensu exquisitissimo pollentibus? Ipse quoque Hippocr. de intern. affect. pulmonibus sensum & dolorem fortem tribuit. Quod verò in latere sentiatur dolor, ejus causa est, quod membranæ pulmonem constituentes ope aliquarum appendicum pleuræ uniantur. Si verò sedes pleuritidis in ipsis pulmonibus est, utique apparet, quàm arduum sit, exacte pleuritidem à peripneumoniâ discernere. Imò neque faciliùs, secus quàm multi non experti credunt, inflammatio hepatis à pleuritide dignoscitur. Nam ex dolore infra costas infallibile hepatidis argumentum, qui capiunt, næ! illi subinde vehementer falluntur, innixi communi illi axiomati, ubi dolor, ibi morbus, quod tamen minimè universale est, cujus rei exemplum in ipsâ inflammatione hepatis est: Nam referente Galeno *l. 2. de loc. affect. inflammatum hepar comitatur dolor in jugulo, in quo tamen morbus non est.* Ejus rei documenta in calculo, gonorrhæa aliisque morbis obvia sunt. Sed verò benè est in hac rerum incertitudine, quòd methodus medendi una eademque in his morbis inflammatoriis observari tutò possit, unde non abs re erit, quomodo in curâ procefferimus, tribus, quod ajunt, ver:

verbis attingere. Prima cura nostra fuit, ita in sanguinis inflammatoriam, de quâ inspicere meretur Portius in *Erasist. sive de sanguin. missione* p. 83. *seqq.* discutere. V. S. in statu plethorico celebravimus, sanguis ex venâ eductus ferè pelliculâ quadam tectus; Et omninò vera sunt illa Celeberr. Wedelii: *Venæ sectione emissus sanguis pro temporis ratione variat, modo confusus, fervidus, ruber, modo serosior, grumescens vel resolutus magis visus est.* Nec dubitandum, quin sæpè absque V. S. erysipelaceæ illæ viscerum inflammationes tolli queant, ac non nauci facienda illorum practicorum observatio, quòd post administratam V. S. morbi hi diutius protrahantur. Vulgò deprædicatur in sanguine dissolvendo efficacia spirituum C. C. fuligin., ebor., liquor. C. C. aliorumque similium volatilium, qui tamen à nobis, qui diaphoretica fixa hisce in morbis, quibus febris complicata est, præferimus, non adhibentur, nisi fortè in phlegmatico-sanguineis ac in dosi valdè mediocri. Semen cardui mariæ in pleuritide & peripneumoniâ, radix cichorei in hepatitide aliquam peculiarem exerunt virtutem, nec mumia transmarina prorsus effœta est. Cherefolium, hederæ terrestr., geranium majus, scordium commendari itidem merentur. In rasurâ dentis apri, in pleuritide, non potuimus observare vim quandam specificam, quæ major in dente hippopotam. præpt. In omnibus hisce inflammationibus prodest externè adhibitus sp. vini camphor. quemadmodum anodyna internè ut plurimum nocent, quicquid de cohibendo per illa affluxu vulgò jactetur. In pleuritide urinæ tenues per quatuor dies priores ferè semper calamitosæ sunt. Alvum non faciliè irritamus, sed diluentibus tepidè sumptis eam in officio suo continere satagimus.

Julius naturam suam planè quasi exuerat, (c) ac majori ex parte im-

Constitu-
tio aëris
Julii, Au-
gusti, Se-
ptembr.

bribus, procellosis aëris agitationibus ac frigore squalidus erat; credidisse-
mus, nos in Martio vivere, nisi grato Solis splendore, aliquot diebus,
corpora incaluisse. Benignior Augustus, non tamen absque pluviis cur-
sum absolvit. Æstiva amœnitas verò denuò in Septembri nobis affulsit,
ut iterum D. Grassius observavit.

Mense Julio vagabantur iidem propemodum morbi, qui præcedentibus
mensibus stragem ediderant, sed præ reliquis ferociebant catarrhi, qui dif-
ficillimè medicamentis compescebantur, ac præprimis illi admodum rebel-
les erant, qui sedem in artubus, & potissimum in superiori brachii parte
fixerant, ac ex dolore gravativo, motu partis impedito, imò etiam tu-
more aliquo, sine inflammationis signis, ex decubitu serosæ materiæ oriun-
do cognoscebantur. Proximum in pertinaciâ locum occupabant cum co-
ryzâ, & vertigine conjuncti, sive propter majorem lymphæ coacervatio-
nem, sive magnam feri visciditatem, intra corticalem, hoc est glandulo-
sam, ex mente Malpighii, cerebri substantiam. In curâ utroque oculo
ad proximam catarrhorum causam, hoc est, lympham stagnantem intra
partes & hâc ratione functiones earum lædentem, respeximus, & lympham
vel

Catarrhi.

(c) conf. *Castig. nostra Græbner.* p. 59.

vel motui suo restituere, vel ex corpore, ac præcipuè partibus laborantibus evacuare annisi sumus. Inde non tantum ea adhibuimus, quæ ferum vel per renes præcipitant, aut alvum derivant, vel per poros cutis dispellunt, sed & ea, quæ à parte affecta illud evacuant. Inter purgantia plerisque ex nostris placent pilulæ, quas Nostrates vocant Cephalico-Hystericas ex extr. colocynth., helleb. nigr., castor. resin. gialap. ꝑ. d., aut Massæ pilul. harum, M. P. de succin. Craton. addita cum appropriato in pilulas efformatæ. Vix vero in catarrho pulmones infestante purgantia, prudens Baglivii monitum secuti, laudare possumus. Ex diureticis seligimus lap. 69, L. sassafras, syrup. adianthin. Fern. de succ. veronic. de 5. rad. aperitiv., hyssopo. liquirit. &c. Oleum etiam foenicul., anis., balsam. sulph. anis. terebinth., & quod præ reliquis omnibus eminet, succinum, cui in catarrhis & spasmodis non immerito maximas tribuit laudes Hoffmannus, præclare quoque de eo sp. vini soluto sentit Helmontius, quibus suffragatur etiam Clariss. Ettmüllerus, totam affectuum catarrhalium curam in succino latere persuasus. Inter diaphoretica, quæ lymphæ exorbitantis correctoria genuina esse constat, cessare in remedium ea, quæ incidendi & attenuandi virtute simul gaudent, ex quorum albo sunt inter vegetabilia, serpillum, thymus, rosmarin., lavendula, hyssopus, centaurium minus, helenium, betonica, pimpinella, arum, china, &c. quibus ex chymicis tum Liqu. C. C. succ. tum tinct. bez. annumerare licet. Ad cauteria non descendimus. Rarus etiam apud Nos masticatoriorum usus, nisi forte in classem apophlegmatismorum referre placeat fumum Tabaci haustum, multorum sanè delitium. Ptarmicorum notus hodie abusus, quibus sanè cum damno sanitatis homines plethoricos, vertigini obnoxios, oculorum affectibus correptos, nares infarcire toto die videmus ac dolemus. An verò legitimus eorum usus aliquis esse possit in evacuanda lymphâ in cerebri ventriculis stagnante, in quæstione positum est. Negativam amplectitur Doctiss. Schneiderus, l. 2. de catarrh. c. 20. ac Clariss. Rich. Lowerus in dissertat. de catarrh. cujus hæc inter alia p. m. 167. *Quod autem nihil per os cribriforme in nares pertranseat, ipsius partis conformatio satis arguit, nam licet in aridis calvariis foramina istius ossis aperta & luci pervia videantur, in vivo tamen animali à nervis & membranis, à processu mammillari prodeuntibus omnino inferciuntur. Et paulo post, nisi, inquit, ∇. in cavitatibus processuum contenta per medullarem ipsorum substantiam in nares transeat & extillet, necesse est, ut per nervos fluat, & ipsorum corpora pervadat. Ac quid inde de olfactu fiet, si ipsi ejus organa continuo humore ita scateant. Ac iterum: Si conferamus, ait, vasa omnia, quæ ∇. in ventriculos cerebri deponunt cum infundibulo simul, & hisce nervorum tubulis, eaque in diversis animalibus inter se comparemus, clarè patebit processus mammillares nullum omnino humorem pertransire aut os cribriforme in nares perfluere. Nos his rationibus itidem moveremur, nisi praxis aliud nos docuisset, & cum Willisio vidissemus, toties per solam ex naribus excretionem,*

nem, multos à vertigine, aliisque cerebri morbis liberatos, nisi purulentam materiam per nares fuisse excretam recordaremur. Et nisi tandem ipse Hippocrat. *sect. 6. aph. 10.* non ex ratiunculis, sed diuturnâ praxi hunc canonem reliquisset: *Caput dolenti & circumdolenti pus aut aqua, aut sanguis fluens per nares, aut os, aut aures, solvit morbum.* Firmo itaque experientiæ talo innixi, post universalia, ubi illa locum habebant, etiam errhina suavimus, ac ex iis præcipuè spec. diamajoran., & cum debitâ cautelâ etiam euphorbium pulverisatum. Confer Miscell. Nostrar. Dec. I. ann. I. obs. 34. p. 110. & seqq. Difficillimum nobis esset, ab effectu nobiliori, sicut ab aliis factum, vitriolum album commendare. Præterea cum scopus noster esset lenire fauces aut asperam arteriam, linctus formam elegimus, ut remedium sensim partes affectas præterlaberetur, easque diutius tangeret. Nam ea nobis semper sedet mens, formam medicamento à parte affectâ & morbo determinari, & præterea, ut præclare monitum à Glissonio, laborante ventriculo prudenter pilulæ, pulveres, electuaria, &c. præscribuntur, quò diutius in eò commorentur, renibus autem liquida potius designantur, quo facilius ad eos cum sero deferantur &c. Sunt equidem, qui in nostro casu à saccharatis & mellitis parum opis in evacuatione contentorum in bronchiis sperari posse contendunt, sed eam ab aromaticis & volatilibus petere jubent, quibus tamen iterum experientia practica reclamât, nisi fortè, ubi humores viscidiores & glutinosiores sunt, tùm enim acriora & amara abstergentia juncta mucilaginosi & roscidis, utramque absolvunt paginam. Cæteroquin in affectibus pectoris non promiscuè cum vulgo empiricorum, flores sulphuris exhibuimus, nam quantum ex eorum usu emolumentum in catarrho tenui oritur, tantum profectò damni ex eorum præscriptione, materiâ existente viscidâ & glutinosâ, resultat, inde quidem non rarò pituitosos in difficultatem respirationis incidisse pro comperto habemus. Sanum quidem est consilium, quod Lowerus suggerit p. 173. his verbis: *Cùm catarrhus primo urget, nihil magis ei supprimendo conducit, modo absque febre sit, quàm ut sitim diutissime toleremus, tridui enim vel quatruidui abstinentiâ à potu, plures novi à catarrho prorsus liberatos, cujus alia ratio non est, quàm quod fomite subducto omnino exsiccatur, non aliter ac rivuli exarescunt ex pluviarum penuriâ; At hoc velle nostris proponere, est furdo narrare fabulam. Imò contra potius meminimus, quæstionem agitatam sæpius, annon ex re ægrorum sit, usum vini in catarrho concedere? nam vero esse perquam simile, lympham stagnantem haustu liberaliori generosioris vini in motum denuò reduci posse; Nos tamen potius probavimus sententiam Mercurialis Tom. 3. Conf. 53. & tom. 2. Conf. 4. illud dissuadentis, veriti majorem in sanguine orgasmum, & vehementiorem feri fusionem, non ignari cæteroquin, quòd quidem Doctissimi Medici vinum in catarrhis permiserint, quos inter. præcipui sunt Victor Trincavell. l. I. Conf. 42. & Paul. Neucranz de purpur. c. 20. qui ipsum etiam Hippocratem allegare pro suâ opinione possunt,*

sunt, nisi fortè magis placeat Valesii in hac controversiâ temperamentum, qui censet, Hippocratem dedisse, hodieque adhuc concedi posse sub declinatione, quando serum jam ad vias urinarias & alvi, cessante omni linguæ siccitate, præcipitatur. Postremò dissimulare non possumus, his etiam ritè factis, in plethoricis catarrhos vinci vix potuisse, nisi V. S. celebraretur. Catarrhalis quoque profapiæ alii morbi, odontalgia sc. & tumores palati à D. Grassio & D. Pauli in seipso, curati. Diarrhæas frequentiores D. Preus iterum rhabarbaro tosto c. N. M. & bolo Tockaviensi caryophyllatâ compescuit.

Hemicrania.

Varias quidem tractavimus hemicranias in praxi nostrâ. Vidimus, qui sibi caput quasi tendi & distrahi conquererentur, & omninò persuadere fatagerent, ipsas futuras enormi dolore unam ab altera divelli, quibus fidem non arbitramur subinde esse detrahendam. Quemadmodum in foemina 30. annorum etiamnum vivente, enormem hiatus, circa futuram lambdoideam & sagittalem, furentibus doloribus capitis cuivis petenti demonstrare potest D. Grassius; insuper in tribus puerulis catarrhofis trium & quinque annorum, intra aliquot septimanas, totam quasi capitis superiori parte figuram valdè mutatam, futuramque coronalem ad nasi radicem usque, notabiliter dehiscens observavit D. Paul. Suturas enim aliquando laxari & à se dehiscere, Medici exercitati nobiscum deprehenderunt. (d) Inter Arnoldi Bootii observationes Med. de affectibus omissis secundum à Cl. Meibomio editas, quarta p. m. 12. inscribitur de futurarum discessione: *Frequens, inquit, est in Hibernia, ut capitis ossa à se discedant, ac notabili spatio dehiscant, præcipuè in coronali futurâ, sed & quandoque in sagittali, idque cæcâ ac internâ causâ, absque ulla externâ occasione aut violentiâ, cui malo promiscuè obnoxii sunt viri æque ac mulieres, nec teneri modo ac delicati, sed duri quoque ac robusti, &c.* Laurentius Joubertus lib. de cap. affect. testis est, se in fronte puellæ separationem vidisse, cui post diutinam in infantia cephalalgiam unius lateris os alterius superavit latitudinem. In *Miscellaneis Nostris* Antonius de Pozzis, cujus pulvis in quibusdam nostris officinis prostat venalis, ejuscemodi dehiscenciam circa futuram coronalem, ad pollicis latitudinem observavit *Decur. I. ann. 4. observ. 33.* quæ aliaque plura exempla legenda apud Cornel. Stalpart van der Wiel, *Cent. 1. observ. Medico-Chirurg. Anatomic. p. 1. 2. 3. 4.* obstant sententiæ Columbi l. 1. c. 4. asserentis, futuras nulla vi posse laxari, nisi quis scapello divellere aut frangere tentaverit. Hæc opinio de divulsione futurarum roboratur etiam exinde, quòd ægri ex fortibus ligaturis aliquod levamen sentiant, quamvis aliàs non negandum, quòd frequentius arbitrentur sibi futuras dehiscere, quàm reverâ dehiscant, aut disjungantur. Meminimus nostra subsidia sollicitasse, qui asseverarent, caput sibi quasi gravi mole aliquâ aut pondere incumbente deprimi, ut

cervicem

cervicem erigere nequeant. Sed hi dolores ludus & jocus quasi sunt, præ tormentis, quæ patiuntur ii, quos tantum non in furorem agit acutus & pungens, ac teli infixi instar membranas dissecans. Aliquos curæ suæ commissos habuit D. Helwich, qui ait, sibi verba deesse, quibus ineffabiles illi dolores rectè exprimi possunt. Adeò furit, & vicina sensoria intolerabili dolore affligit, vigiliis ægros atterit, & brevi sanè necaret, si continuus esset. Memorabile sanè exemplum in nobili aliquâ personâ per aliquot annos oculis D. Pauli & modo etiam D. Helwich obversatur. Vir ille in juventute suâ genio indulgit suo, circa virilem verò ætatem, in tormina ventris atrocissima, tandemque in hemiplegiam, è quâ per inunctionem mercurialem evasit, incidit. Subsecuti postmodum atroces dolores arthritici, quibus ferendis cum parem se minimè crederet, nescio quo consilio, in aquam, in quâ Luna extincta, primò pedes, deinde & corpus totum facilè quadragies immergit eò cum effectû, ut dolores Podagrici evanescerent, ac in eorum locum ineffabilis capitis dolor succederet, cum quo per intervalla repetente adhuc hodiè acerbissimè, non sine intimâ circumstantium commiseratione, conflictatur. Præludunt reversuro dolori humiditate multâ perfusi oculi conniventes & aliquid convulsivi patientes, & aures tinnientes, fermentatio & ebullitio in ventriculo, ac urina cruda. Tragœdiæ ipsius exordium dolor initio aliquanto lenior, sed incrementa singulis momentis capiens. Frequenter iste in sinistrâ capitis parte affligit, nec tamen in hoc latere semper in una eademque parte hæret, sed modò posteriora versus aures, modo anteriora ad radices oculorum usque, qui longè gravissimus est, excurrit, imò nec his terminis contentus, calvariâ egressus, in maxillis, labiis sævit, imò ad humeros se extendit & regionem pectoris occupat. Non exactè tamen uno hoc latere circumscribitur, sed ad dextrum etiam sese diffundit. Circa nucham aliquando adest tumor rubescens cum pulsu & exquisito sensu, qui tactu lenissimo immane quantum efferatur. Est verò dolor ille & gravativus, mentum pectori ferè allidens, & tensivus sed maximâ ex parte punctivus; Quamdiu furit, æger lucem ferre nullam potest, nec propter sævitiam cruciatuum os aperire, vel plenum trahere spiritum, audet.

Apicem supremum attigit tyrannis isthæc, quando vomitus accedit, tum enim magis, quàm in Phalaridis torquetur equuleo, & tamen miser his tormentis minimùm 12. horas, sæpè, 24, imò & 50 transigit. Signum declinantis paroxysmi est urina saturata, & paulò post copiosum sedimentum deponens. Superatis his molestiis, corpus languet & partes musculosæ quasi fustibus percussæ, tangi renuunt. Minimè verò rarò contingit, ut, capite vix liberato, digiti pedum molestiâ aliquâ vellicentur. Nunquam verò, nisi sub paroxysmo, lumbaris regio doloribus vacat. In cura in paroxysmo ipso hemicraniarum, interdum sanguinem eduximus, vesicatoria, ubi indicia materiam peccantem extra cranium sub cute hære-re, applicari fecimus. Errhina quoque commendata, nec pediluvia ne-

glecta, topicis item modo in formâ cataplasmati, modò linimenti, & unguenti, modò emplastri, usi sumus. Rubefacientia plantis pedum admodum, quæ tamen omnia, ne minimum quidem levamen prælaudato Viro ad hoc usque momentum attulerunt. Pulveres præcipitantes nitrosi & cinabarini anodynis maritati internè exhibiti, pilulæ de Styrace D. Sylv. sub tempus nocturnum datæ sunt. Quidam, quamvis sic satis tenuis effectus, ex pulveribus ejus generis, in memorato ægro visus. Extra paroxysmum antecedentes causas ex artis præscripto tollere conati fuimus. Quæcunque verò D. Pauli & Helwich, junctis consiliis, moliti fuerunt, (non autem facilè ullum remedii genus, quod λόγος & methodus atque experientia suadet, intentatum reliquerunt) eventus optatus sæpius nominatum ægrum nondum exhilaravit, sed affectus ille adhuc hodie eum acerbissimè, quanquam post diuturniores inducias exercet. Aliorum Medicorum consilio usus eodem fato, licet ab iis & ad sumptuosas Thermas & ingratas Acidulas, ac Laconici sudores damnatus, ut de purgationibus, scarificationibus, V. S. fonticulis, &c. nihil dicamus. D. Preussius ex præposterè curatâ per balnea aliaque, quæ non conveniebant, ani fistulâ, epilepsiam singulis ferè horis repetentem, cum antea rarissimè invaderet, notavit. Sed nec minus observatu dignum est, quod D. Grassius memorat, usum Chinæ Chinæ in Febribus intermittentibus, hoc mense, licet summâ cum cautelâ adhiberetur, minus fuisse proficuum, nec eam vim, quam aliis temporibus, exeruisse.

Præter enumerata in antecedentibus symptomata, febribus continuis hoc Mense duo alia jungebantur, quod iterum debemus D. Grassio, sc. urinæ difficultas, & crebra oscitatio ac pandiculatio. Quoniam verò illa urinæ difficultas, ut Celso vocatur, significat molestiam, tam illam, quam quis mingere volens experitur in enitendo, quàm eam, quam quis subit in reddendâ urina, ob nullius non guttæ effluentis asperitatem, quam stranguriam, Vegetius vero indignationem vesicæ vocat, scire licet, priorem nostros molestiam subisse; Nam diu conari cogeantur, antequam proflueret urina, quantumvis in ipso fluxu deinde liberè ac facile fluere. Verùm brevi durabant hæ adversitates, nam ultra septimum diem ipsæ febres non extendebantur.

Melan- Ob venere etiam nobis quædam Melancholicæ Fœminæ 30. ætatis an-
colia. num supergressæ non quæ ridiculis se detinuerint negotiis, & in hæc præcipitia ex amorum phantasiarumque cœstro essent perlapsæ, sed mœstæ, alta suspiria ducentes, contra vulgarem fœminarum morem taciturnæ, à communi hominum consortio se subtrahentes, & ad nescio quem strepitum expavescentes, ac mirabilibus suspicionum procellis jactatæ levique causâ in epilepsiam hystericam devolutæ. Cùm verò dyscrasia humorum, ac impeditior eorundem motus in venâ portæ, ac excretionis menstruæ mora nostris sese ingererent oculis, facile nobis patuit, V. S., vomitoriis, pediluviiis præmissis, sanguinem attenuandum esse.

Ac

Ac ad viscidum & glutinosum sanguinem dissolvendum adhibita fuere ferè volatilia, quæ præsentissimum hîc præstant effectum, quibus qui norunt interponere sudorifera, tantò citius voto damnabuntur. Nec minorem merentur hic laudem ♂ alia, præprimis chalybs in substantia datus modò ventriculus non nimis debilis sit, in quo casu omninò melius est, vel essent. martial. hellebor. Wedel. vel essent. vitriol. ♂. tartaris. Ludovic. ægris præbere. Ex acidulis in plethoricas non exigua redundat utilitas. Vina quoque virtute herbarum spleneticarum & uterinarum imprægnata auxilio quibusdam fuere. Quibus omnibus si decens corporis & animi motus accedat, omnia in vado erunt.

Occasione Melancholiæ non possumus quin addamus aliqua de nodulis in partibus musculosis brachii & femorum, non quidem oculis, sed tactui obviis ciceres magnitudine excedentibus cum motu febrili protrusis à D. Helwich in corporibus luridis & squalidis Melancholiâ quasi tabescentibus, ter, nisi fallimur, & à D. Grassio quamvis paulò majoribus observatis. Stupuerunt ad Phænomenon antea sibi non visum, donec opportunè recordarentur, ejus generis morbum in Hungariâ frequentem esse, sicut didicerant ex Malach. Geiger. *Microcosm. hypocondriaco*; id quoque p. 105. cognati Daniel. Geigeri *epistola* adducitur, ex quâ aliqua hîc excerpere non pigrabimur: *Occurrit mihi ferè quotidie in Hungariâ morbus quidam curandus, solis incolis Hungariæ endemius — quo infectis in partibus musculosis brachii, dorfi, totiusque corporis excitantur ad modum glandularum, parvi nodelli exterius quidem invisibiles, interius tamen benè palpabiles, instar cicerum seminis lini, fabarum tamen quantitatem minimè excedentes: Paroxysmi invasionem comitatur horror & calor febrilis, ad modum erysipelatis, hinc erumpunt & excitantur modo enarrata tubercula sive glandulae. Haftenus ille. Nobis extra dubium, materiam horum tuberculorum esse humorem lymphaticum, ab indole genuinâ in vitiosam, h. e. acidam & glutinosam fortè degenerem, quod eò promptius in conceptum cadit, quo notius, substantiam cutis, præter filamenta vasorum sanguiferorum, nervorum fibrarumque nervearum varie contexta habere plurimas glandulas. Nam ex acutissimi Stenonis, Prosectoris incomparabilis, observationibus constat singulis poris suas subjacere glandulas, quæ juxta ἐφιδρώσεως usum majores aut minores existant. Nec improbabile est, tubercula hæc proximè accedere ad naturam grandinum in porcorum carnibus occurrentium. An verò ulcuscula hæc sint lepræ quædam species, cui grandines suum accenset Clariss. Collega noster Rosinus Lentilius in *Miscellan. Medic. Pract. tripartit. l. 2. p. 510.* disquirere hujus loci non est. Id verò aliis eruendum relinquimus, quomodo tumores hi aut quocunque nomine vocare placet, febrili orgasmo à centro ad peripheriam extrudantur. In curâ nullum ferè operæ pretium vel antiscorbutica, vel mercurialia, aut sudorifera aliaque fecerunt. Nec in ultimo successit therapeia, quam vulgus in Hungaria adhibet his verbis à Geigero descripta:*

Sale, aceto & allio locum & tubercula tamdiu & fortiter fricant, donec noduli illi resolvantur, nec coagulati amplius sentiantur, quo facto levamen illico sentiunt. Multi materiam hanc sudore discutere debent, illoque intermisso, ut in aliis malignis morbis, moriuntur. Ad sudorem eliciendum utuntur spiritu vini, in quo liquefacta sit portio axungiae veteris cum admixtione succi allii & pulveris piperis nigri, quantum cuspis cultri capere potest.

Parulis. Multò frequentiora apud nos mala praesertim in egenis sunt inflammationes gingivarum cum tumore, non rarò in suppurationem abeuntes, quas Græci Parulides appellant. Hunc verò tumorem cum inflammatione nonnunquam insequitur excrescentia spongiosa, laxa & flaccida, carni in vulneribus luxurianti perquam similis, ad intimos dentes molares adhærens, quam comitatur mandibularum dolor satis vehemens, & nonnunquam ipsa febris.

Epulis. Græcis ejusmodi tuberculum carneum ad dentes in gingivis oriens Epulis vocatur. Si apertio abscessus in Epulide negligatur, facili negotio caries succedit maxillæ. Nam dum puri exitus nullus paratur, periostium maxillæ consumitur, hoc autem facto, corrosio ossis vix evitatur, aut si fortè hoc malum imminens declinetur, quemadmodum nuper factum meminimus abscessu hoc sanato, semper durans Ichoris profluvium, fortè ob læsionem ductus alicujus salivalis remanet. Ex epulide gangrænam in fabro murario ortam vidit D. Helwich. In Parulide emollientibus, præprimis usu ficuum, abscessus apertionem procuravimus, aut instrumento Chirurgico aperiri fecimus. De discussione nobis rarò cogitandum, quorum nimis fero ut plurimum consilium & auxilium imploratur. Epulidem incipientem præmissis universalibus non sine effectu meminimus oppugnatam vel tinctura laccæ, quam & Barnerus & Deckerus ac Barbette non vane extollunt, vel tinctur. terr. Japon. seu Catechu cum spirit. cochlear. paratâ, cujus meminit Colleg. Noster Clariss. Hagendornius *Tract. Physic. Medic. de Catechu Sect. 3. c. 3. p. 43.* Sed imbellia plerumque hæc sunt remedia. Ubi enim epulis altiores egit radices, vix sine operationibus Chirurgicis variis curatur.

Febris Biliosa. Mense Augusto nonnulli laborabant feбри, quam veteres dixerunt biliosam, ejus typus ejusmodi erat: Initio gravitas & angustia sentiebatur in scrobiculo cordis, conjuncta non rarò cum nausæa (à quâ Fastidiosam nonnulli vocant.) Causam non ineptè patientes vel in refrigerationem ventriculi, vel cibos viscidos, aut iram clandestinam rejiciebant. Aderat horripilatio non nimia, sed frequenter recurrens capitis turbatio, & in sanguineo-cholericis etiam dolor. Exacerbabatur quotidie horis matutinis, cum sensu horripilationis, qui quo intensior, eò certius vomitus sequebatur, remissioverò & diuturniorem ferè sedes excipiebant. Ægri perpetuò jactabantur, nec ullam decubitûs figuram servabant, praesertim illi, qui nec per vomitum, nec per sedes materiam acrem ac fervidam rejiciebant, in quibus etiam æstus gravior, fauces aridæ

aridæ & sub finem deliria comatosa, quæ semper ferè funestum in hac febre minantur exitum, notabantur. Hypochondria non tantum continebantur, sed & acerbissimis puncturis infestabantur. Maximum discrimen mortis æstus internus retorridus & exteriorum frigus, intentabant, & ut Hippocrates pridem notavit, *circa ventriculum fortis æstus & cordis morsus malum* (κακὸν) erat. In curâ non tantum ad ductum Sydenhamii jusculum tenuissimum ex pullis gallinaceis ordinavimus, sed & nitrosa & theriacam optimo cum successu adhibuimus. Habebant etiam in curâ locum acida temperatiora, apozemata ex rad. & fol. acetos., fol. fragar., tamarindis syrup. acetos. citr. Erant etiam, quibus decoctum Hordei, quod eâ intentione veteres dedisse videntur, ut acrimoniam biliosam obtunderent, & intestina quâdam quasi mucilagine obducerentur & munirentur, præprimis si essent egeni, loco jusculi pulli gallinacei suadebatur. Topicis etiam suus constitit honos, inter eâ verò camphorata præeminebant. Linguam aridam & fissam mucilag. sem. cydonior. Psyllii c. convenienti aquâ extractâ lenivimus.

Biliosæ febres abeunt subinde in Lipyriam. Nam verissimum est, quod Lipyria primaria talis sit rarissima, ut rectè Ettmüllerus, quicquid etiam hic Sylvius, Primerosius, Borrichius alique dicant, sed potius cum neque vomitus, neque sedes, neque sudores in biliosis cernuntur, metuenda est Lipyria, vel interprete Stahlio in *Problem. pract. p. 7.* inflammatoria congestio interna, nisi fortè cum Lindano malis dicere, quod Lipyria sequatur partis valdè sensibilis inflammationem. Cum verò vulgò Lipyria describatur per febrim, in quâ interiora quasi uruntur, exteriora frigent, provide à Lindano monitum, quod nec per partes exteriores vulgò dicta extrema, manus, inquam, pedes, nasus, lobi aurium intelligantur, sed universus corporis habitus. Nec per algorem indigitetur frigus tale, quod tactum Medici, aut adstantium afficiat, sed satis sit, quod ægri se algere dicant & tegi jubeant, licet aliàs membra tepere videantur. In hac febre pulsus existit parvus & debilis, urina flavescit, lingua arida est, expiratio nares proximè adstantium ferit, vigilæ vires atterunt, vomitus torquent, inferius labrum, ut rectè Primerosius, tremat, & anxietas miserrime torquet. Hæc Phænomena facilè aperiunt, an verum sit quod prodidit Clariss. Ettmüllerus ratione frigoris, febrim hanc referri debere ad genus nervosum membranosumque undecunque irritatum, respectu verò æstuationis, ad sanguinem in præternaturalem fermentationem concitatum, hincque alteratos insigniter spiritus ex acido sui generis. Edocemur etiam ex iisdem, quid veri subsit sententiæ Sylvii l. i. *prax. c. 29.* quæ vult hunc affectum (si modò detur, de quo quidem nos minimè dubitamus) ex duplici febre constare, biliosâ, & pancreaticâ, ac à succo pancreatico, frigus, à bile oleosâ magis, quàm acri, æstum dependere. Nostro judicio hîc omnia plana. Nam certum est, in primarum viarum canali materiam urentem ac fervidam reperiri præsentē

hoc

hoc affectu, nec dubitandum quin facile, si non per vomitus aut sedes tempestivè ejiciatur, inflammatio, & forsan majori ex parte in duodeno, sequatur. Ab hac verò omninò par est, ut æstus illum internum, linguam aridam, sitim, vomitus, tremorem labri, expirationem fuliginosam, & inflammatione in gangrænam & sphacelum vergente, cadaverosam, puncturas in hypochondriis, jectigationes, anxietates, vigilias deducamus. Frigoris verò & algoris, de quo ægri conqueruntur, originem non aliunde rectius quàm à sanguinis ad interiora congestione, ac ex habitu musculofo ac ambitu corporis ad partem inflammatam, repressione ac derivatione petamus. Therapeia, quam suadet Primerosius, per refrigerantia & cardiaca instituenda, nobis ad palatum non est. Nec Hippocratis curatio *lib. de affect. v. 107.* quâ frigefactoria exterius admove-ri cupit, quicquid etiam hâc moliatur Martianus, nobis placet. Jonstonius Noster, post partium frictionem, calefacientia & poros aperientia applicanda esse suadet, omninò rectius modò olea, e. g. anethinum, irinum, vitrioli, &c. non laudasset; nam hæc non conveniunt, licet ante Jonstonium ea jam laudaret Expertiss. Joël Sylvii medicamenta, margaritæ, inquam, corallia, *lap. 69.* &c. habent locum, non quidem quatenus corrigunt aciditatem succi pancreatici & nimiam bilis oleositatem, sed quatenus in inflammationibus hæc ritè se gerunt. Nam ut præclare Ettmüllerus: *Lipyrria febris, ad modum inflammationum erysipelacearum partes internas occupantium, curanda per diaphoretica.* Ac profectò nihil agitur, nisi omnes cogitationes eò vertantur, ut æqualis sanguinis distributio obtineatur. Nullum verò humanum superest auxilium, quando dejectiones aut vomitus nigricantes succedunt.

Synochus Putrida, f. Causus. Iisdem diebus nonnulli etiam laborabant feбри, quam Synochon putridam, scholæ Medicorum antiquæ vocant, quam denominationem sine causâ carpit Francisc. Piens *Tract. de febr. p. m. 315.* alii Causum nominant, quamvis sint qui Causum à nostrâ Synocho differre velint. Ejus indoles ferè sequens erat: Plethorici hæmorrhagiis vel V. S. affueti, ante Solis ortum, horrore quodam corripiebantur, horripilationem verò illam sequebatur æstus valdè gravis ut non abs re sit, quod habet Pompejus Sacchus *irid. febr. c. 5.* partem sanguinis oleosam & sulphuream nimis excalefactam supra modum turgescere, & velut in flammam adigi. Respiratio anhelosa & suspiriosa erat, cum leipothymiâ ac *Ἐφωδῶσαι*, alias in febre syncopali occurrentibus. Dolores capitis lancinatorii ac tinnitus aurium, ut & vertigines, indivulsi hujus febris comites erant. Tenses dorsi & artuum non minori molestiâ afficiebant. Sitis premebat maxima, signum vehementis febris, quamvis ex Ballonio aliàs benè noverimus, quòd sitis aliquando major sit, quàm febris *lib. 3. consil. 5.* Non rarò in febris principio, inflammatoriæ sanguinis stases circa pectus, in incremento autem & statu, anginæ cum nostrâ Synocho copulabantur. Cùm symptomata quædam circa hypochondria & caput excita-

rentur,

rentur, præfenti feditento in urinâ, in junioribus circa diem feptimum hæmorrhagia narium largior morbum optatiffimè folvebat, in paulo anno-fioribus tum caufus die 14. copiofis folvebatur fudoribus, calamitofa autem horum fors, fi foporoſi fupervenirent affectus. Nam rectè Prime-roſius notavit, quòd fopor nonnunquàm in hâc febre contingat, ac fæ-pè funeſtus fit; nec melior illorum conditio, quando urina decolor red-ditur, nam tùm phrenitidis & convulfionum fummum aderat periculum. Aliàs urina primis diebus, diaphana rutilans & rubicunda erat, quarto circiter die feditentum deponebat, fuperiori ejus parte clarâ permanente, fauſtumque recuperandæ fanitatis indicium præbebat. Pulſus frequens, inæqualis & quodammodo durus, in iis potiffimum, qui puncturis in regione pectoris conquerebantur. Sunt, qui ſpem omnem fanitatis re-ſtaurandæ abjicere jubent, quotieſcunque ſitis, calore tantoperè urgente, ut etiam aliqui, inter quos Oliger. Jacob. Tom. 2. medic. ſeptentrion. Collatit. ex Actis. Tom. 2. p. 281. vi ignis febrilis, foëtûs in utero matris, quæ hâc febre laboravit, hoſpitis, offa in pulverem rubicundiffimum ſoluta fuiſſe, ſcribere non erubeſcant, deficit. At verò minimè deſpe-randum, modò tuſſis adſit, nam multiplici experienciâ compertum habe-mus, *quod ſiti non infeſtentur, quibus tuſſes ſiccæ leviter irritantes in ar-dentibus fiunt*, ut ſonat Hippocratis Aphoriſmus; (e) Et Eurianactis filia, feбри ardenti correpta, nunquam toto morbi decurfu ſitivit, tuſſiebat autem, ut legimus 3. Epidemic. Sect. 2. Oblatum D. Helwich exemplum in Foeminâ, quæ hac febre laborans die 9. excrementa albicantia excer-nebat, & ictero ſuperveniente feliciter liberata fuit. Eximius V. S. in principio hujus febris eſt uſus, modò illa non ortum trahat à nimis la-boribus, aut ab uſu Veneris, nam Neo-nuptis hanc febrim aliquando moleſtiam facere notum eſt. Ejusmodi enim viribus captis ſanguinis miſ-fio exitio eſſe poteſt. Cùm enim ſemen ſit quinta eſſentia, ſoſque ac cremor ſanguinis in toto corpore optimi, totaque ferè Medicorum ſchola Avicennæ ſubſcribat dicenti, plus decedere homini, effluente una ſeminis unciâ, quàm ſi 50. educantur ſanguinis; Poſt magnam ſeminis jacturam, ſanguis ſine piaculo vix educi poterit. Conf. Heiner. ab Heer obſerv. Med. p. 175. Pugnatum fuit contra febrim armis nobis uſitatis, i. e. bezoardicis & diaphoreticis, potionibus analepticis & refrigeranti-bus, decocto citr. tamarindor., emulſionibus &c. Epithemata cordi & hepatis imponi ſolita ferè apud nos in deſuetudinem abierunt, aut, ſi etiam hîc tyranno trium litterarum aliquid dandum fuit, factum illud, ſub declinatione, ipſiſque epithematibus ea addita, quæ tonum viſce-rum reſpiciunt.

ſpectatæ etiam à nobis aliæ febrium, ſi vulgaria Medicinæ ſyſtemata ſequimur, ſpecies, Affodes, inquam, Elodes, quæ intempeſtivos & inu-
Febres Af-fodes, E-lodes, Syncopa-les.

H

(e) Conf. Caſtig. Græbner. noſtra p. 60.

Hæmor-
rhagia pe-
nis. Diar-
rhæa.

Thermæ.

tiles sudores comites habent, Syncopales, cujus Arabes communiter duas constituunt species, sed quia rectius symptomata febrilia, quam febres statuuntur, neque in curâ peculiare quicquid à nobis observatum; non est, cur in his nos detineamus. Hæmorrhagiam penis profusissimam ex hæmoptysi suppressa D. Preussius, ex abusu Veneris nimio D. Grassius, ac ex imposito vertici vesicatorio D. Pauli, ortam vidit. Diarrhææ mixtur. ex essent. carm. traumat. ac anodynâ feliciter sublatae sunt. Fortassis non ingratum fuerit Lectori, si breviter hîc attexuerimus, quo cum successu nostri (quorum non pauci, cum Medicamentis sublevari non possent, ad thermarum opem confugerunt) thermis usi fuerint. Scimus ea commendari in diuturnioribus capitis doloribus, ac in nervorum affectibus; Cùm itaque Vir aliquis chronico malo jam per annos tortus, animum ad Thermas Carolinas appulisset, iisque ritè usus esset, tantum abest, ut malo hoc liberatus, ut potius atrociori insultu afflictus Vratislaviam reversus fuerit. Vir Plethoricus diætæ vinosæ & aromaticæ deditus, litibus de herciscunda hæreditate implicatus, post varias cum affine altercationes irâ effervescens, incidit in vertiginem, & mox lateris sinistri resolutione & refrigeratione prehensus est, ut nec brachium nec pedem movere potuerit. Truculentiam affectûs D. Helwich idoneis Medicamentis quidem domuit (ut & motus & sensus affectarum partium rediret aliquâ ex parte) sed nullâ arte perfectam ei sanitatem restituere potuit, & propterea ad Landecanas in Comitatu Glacensi aquas (quas thermas appellari non posse, quod calidæ non erumpant, sed ad lavandum eas calefieri necesse sit, auctor est P. Balbin. in *miscellan. historic. Regn. Bohem. l. 1. c. 24. p. m. 61.*) abiit ac prorsus sanus ac incolumis domum rediit, confirmavitque suo exemplo veritatem verborum Nostri Scriptoris Cl. Schickfusii *l. 4. der neu-vermehrten Schlesischen Chronica cap. 4. paragr. 7. p. m. 28:* * *Den Paralyticis, welchen die Glieder gantz unbeweglich und erlähmet oder contract seyn, ist disz warme Bad gar nützlich, &c.* Et idcirco rectissimè eas eo etiam nomine celebrat Kremerus in *descriptione fontium Medicatorum in Comit. Glacensi c. 3. p. m. 63.* Idem docent exempla plurium aliorum à membris resolutis curatorum, licet cum Willisio *de animâ Brut. part. 2. c. 9.* ad grallas, tanquam trophæa devicto morbo non provocemus. Unde nescii sumus, quô jure concludere potuerit Lamzwerde, quod thermarum balnea non sint conveniens paralyticorum medicina. In tremore, quo subinde post terrorem ex fortuito incendio ortum quinquagenarius sanguineus concutitur, frustra sollicitatam meminimus opem fontium Landeccensium, Carolinarum thermarum ac Hirsbergensium, ex quarum usu auxilium polliceri videtur. Casp. Schwenckfeld in *descriptione Germanica Thermarum Hirschbergensium. p. m. 100.* nisi forte loquatur de tremoribus, qui solutis febribus aliquando supersunt, quo in casu balnea aquarum

* Paralitici membrorum ob contractionem immobilium omni prorsus usu privati, in hisce thermis salutem felicissimo cum successu quæritant. *Schickf. annal. denuo auct. Siles.*

rum temperatarum laudat Cl. Andr. Baccius in *doctissimo opere de therm. l. 7. c. 23. p. 472. edit. Venet.* Vulgò recepta & communiter approbata doctrina est, quod thermæ præprimis Carolinæ, arthritidem, malum ischiaticum dissipent, imò eas ad articulos nodosos & duros emolliendos cum Greifelio *Tract. de cur. lactis in Arthrit. p. 149.* non pauci commendant, credentes quod podagram arthritidemque nodosam enodent, ut loquitur Cl. Langius *Tract. de Therm. Carolin. c. 5. p. m. 248.* & propterea Dn. Strauß. in *Therm. Carolin.* non sine causa adducit historiam p. 100. de profligatis podagrâ & calculis in sexagenario curâ ritè peractâ. At illa fortuna non affulsi afflictissimo cuidam arthritico nostrati, qui, ut acerbissimos dolores mitigaret, salivatione usus, & hâc spem ejus frustrante, cum nullum in pharmacis subsidium inveniret, ultimò ad opem Carolinarum thermarum confugit, sed minus auspiciatò, fereque in his, quam anticiatibus, Vratislaviæ tumbam nactus est, præoccupasset. Cratonis Nostri verbis sequentibus l. 1. *Cons. Med. Cons. 16: Thermæ Landeccenses profecto, si tempestivè à moderatis hominibus adhibeantur, plurimum momenti in curâ podagræ, modo morbus sit curabilis, afferunt*, non adeò frequenter respondit eventus. Idem dicendum etiam de Hirsbergensibus, quamvis aliter olim visum Casparo Hoffmanno in *Epistolâ quadam Schwenckfeldii Tractat. appendicis loco adjecta*, nisi forte non tam culpæ thermarum, quam luxuriæ immoderatorum hominum sequior eventus sit imputandus, quos incurabiles esse rectè Crato l. c. observat. Hoc ipso tamen minime sublimis earum virtutes, in profligandâ arthritide, in totum negamus, sed cum Cl. Sorbayt, Verzascha aliisque debitas laudes tribuimus. In tribus Polonis equitibus ex diuturno hæmorrhoidum fluxu cachecticis, magnam vim Landeccenses fontes, teste D. Pauli, exeruere. Steriles Fœminæ promiscuè maximum sibi pollicentur auxilium à thermis, & vix decima quæque voto damnatur suo, nisi fortè ejus causa sit uteri impuritas, frigiditytas ac superflua humiditas, (confer. Fallop. c. 17. de *Aquis Thermalib.*) quarum etiam satis paucæ prolibus post earum usum beantur.

Fluor albus pertinax malum, modo non ex contagio ortus sit, Landeccensibus curatus. At in fluxu mensium immodico, experienciâ edocti, non faciliè eas cum Cratone l. 3. *Cons. 33.* suaserimus; tametsi Dn. Vicarius in *Hydrophylacio novo p. 186.* itidem credat, quòd thermæ nimium fluxum mensium moderentur. In doloribus colicis, qui paræsin minabantur, scorbuticus aliquis emaciatus, insigne auxilium à Landeccensibus expertus, & optimè propterea has Hirsbergensibus præfert Crato agens de præcautione doloris colici l. 1. *Cons. 10.* In tympanitico corporis tumore cum optimo successu Carolinis usus vir illustri genere natus. Hominibus per multos annos cum calculo luctatis commendare thermas, valdè imperitorum est. Ii, qui primum doloribus nephriticis infestantur, fluctuante ex quorundam sententia materiâ tartareâ adhuc in vasis, quique renibus

nullâ labe notatis præditi sunt, à tormentis beneficio thermarum nostrarum inducias ad aliquod tempus impetrare possunt. Nuper, ut obiter indicamus, exemplum habuimus in Polono Equite, quantum noxæ reportent ex thermis ii, qui meatum urinarium, carunculis impeditum habent. In obstructionibus hepatis, lienis, pancreatis, vasorum Mesaraicorum, in fluxu mensium impedito, magna thermæ nostræ præstant. Conf. de usu thermarum in scirrhis viscerum Dolæum in *Encyclop. Chirurg. rational.* l. 3. c. 4. Virtus quoque earum elucescit in incipiente surditate, in quâ thermis Bollenfis c. successu usus est Horstius, ut ipse testatur tom. 2. Oper. p. 489. Morbis quoque cutaneis, achoribus, tineis, serpiginibus, tumoribus, ulceribus & abscessibus opitulantur, ut toto videmus die. In asthmate seni aliquot attulerunt auxilium. In pruritu, diro illo malo, septuagenaria aliquantulum per Landeccenses sublevata est. Hæc allata sunt eo fine, ut intelligeremus, quam consona vero sint illa Savanorolæ: *Medicus bonus & prudens oculos mentis omni studio apponere debet, antequam infirmo consulat de transitu ad balnea*; nam nullus paulo peritior Medicus est, qui non rarò ab acidulis & thermis æque languentes rediisse viderit, quales abierunt, quamvis industriæ suæ nihil reliquum in curâ fecissent, nam solatium illud per hystergiam sæpè numero evanidum est, & à subsequente letho fugillatur, ut nostra faciamus illa Clar. Collegæ nostri Rosini Lentilii in *Miscellan. Medico-Practic.* p. 475. Et sanè nullus aquarum medicatarum usus esse potest, nisi quando constat, morbum vel per vias urinarias (copiosi enim tales fontes urinam movent) vel per ejectionem sordium (quas vehementer & ferè sine torminibus exturbant, ubi thermoposia invaluit) superari posse. Et hæc tantò magis fidem merentur, quanto est certius, quod morborum, quorum medela ex aquis illis petitur, causa ferè sit crapula & alimentum supervacaneum, & vix deviaremus à tramite veritatis, si nostra faceremus in Silesiâ Clariss. Listeri ex exercit. alter. *descript. Thermar. ac Fontium medicatorum Angliæ* sequentia: *Universus victus nimirum & vita etiam optimorum virorum minime ex naturæ legibus sobria & parca est, neque quoad ciborum quidem genera rectè instituta, ut quæ nonnisi ex fructibus naturaliter sumi debuerint: ab ipsis, inquam, incunabulis gulositatem docemur, atque reliqua ferè vitâ nostrâ palato & voluptatibus indulgemus, atque hæc valetudinis nostræ præcipua calamitas est.* H. J. loco citat. p. 147. &c. Paralylin linguæ D. Preussius & D. Helwich, hic in Presbytero, ille in aliâ personâ, Deo annuente, intra bidui spatium iste, hic verò intra septimanæ inter-vallum curarunt.

Ophthalmia.

Dum ad Septembrem progredimur, primâ statim fronte occurrit Ophthalmia, de quâ quidem jam supra obiter mentionem fecimus, nunc verò frequentia requirit, ut iterum breviter de ea agamus; Collega Noster D. Oehmb, eam toties expertus, quid in proprio corpore observavit, paucis edifferemus. Ophthalmia ipsi habitualis est, per intervalla rediens, iterumque recedens, nunc in hoc, nunc in illo oculo, antea quidem dextro

tro

tro frequentius, nunc sinistro. Hoc anno per integrum Augustum & Septembrem, maximè ipsum cum aliis afflixit, febre stipata inflammatoria, quotidie sub vesperam recurrente. Præter ruborem, dolorem & tumorem oculi, tanta simul lippitudo; & copiosior lymphæ effluxus è narium sinistro oculo affecto vicino effundebatur, ita, ut per metastasin quasi omne ferum, per vias has effluere videretur, quod alibi nempe in intestinis & renibus adeò deficiebat, ut æque ac in hydrope, ubi propter eandem feri *ροπήν*, & alvus & urinæ excretio parca est, utraque harum excretionum ad stuporem usque retardaretur. Alio tempore oculi ejus inflammati collyria cujuscunque generis perferre poterant, tam calida, quam frigida &c. Hoc anno nullum planè perferebant, maximè frigida, & quibus mysti pulveres, sola humida sine pulvere, v. g. ex decocto cort. granator. c. croci orientalis paucâ quantitate calidè applicata, unice tolerare poterat, ex quibus etiam levamen sensit. Ex internis, cum ab aliquot jam annis, omnia remedia vinosa v. g. essentia c. spiritibus ardentibus factæ item salia volatilia propter orgasmum sanguinis, quem excitant, ipsi nocuissent, eorum nullo usus est, quocunque etiam nomine remedii specifi- ci aut depuratorii superbiret, nec reliqua etiam sicca, quæ quodammodo massam sanguineam calefacere, ut Diaphoretica, aut fundere, ut Cinna- barina, possunt, adhibuit, exceptis solis lapillis cancrinis, qui interdum sine damno capiebantur. Cortex Chinæ, quo in aliis Februm generibus cum successu multiplici in corpore suo usus fuerat, in febre fugandâ quidem virtute sua non destituebatur, alit cum inflammationis augmento, quod plus unâ vice expertus, ita ut, si febrim per aliquot dies mitigare vellet, Electuario Chinato uteretur; si ruborem & ardorem compescere, ab eodem desisteret. Inter universalia neque purgantia, neque decocta lignorum aliquid illi conferebant, imò malum exasperabant, ita, ut per integrum paroxysmi tempus, omni ferè remedio, tam interno, quam externo, carere cogeretur, solâ diætâ tenuiori immo simplicissimâ contentus. Ex externis vesicantia tamen experiri placebat, circa quorum applicandi locum, curiosum quid, suo damno, observavit. Applicabat eadem circa aurem sinistram in loco, oculo affecto, secundum Auctorum & Collegarum, qui ipsum visitabant, consensum, imò præscriptum, vicino, ex quâ re duplex damnum percipiebat.

1. Quamprimum cantharides, quod intra quinque horas factum fuerat, virtutem suam exeruissent, saporem in ore sentire sibi videbatur Xibetho analogum, qui, quamdiu vesicatoria eodem in loco relinquebantur, perdurabat, & cuius alimentorum & potulentorum generi sese miscebat, ut nauseam exinde caperet.

2. Dolor in dies, imo horas singulas, vesicis humorem plorantibus, exacerbabatur & lippitudo adeo augebatur, ut singulis momentis oculus aquam stillaret. Quo duplici incommodo permotus, vesicantia post tri- duum, ex eodem loco, in remotiorem, & quidem pedem sinistrum trans- ferebat, ex quo duplex iterum enascebatur observatio.

1. Quod intra Nyctimeri spatium vesica, emplastro etiam fortissimo, vix excitari potuerit, propter ferum ad superiora versum.

2. Quod, quam primum vesicæ in pede stillare incipiebant, quod parcius tamen contingebat propter eundem feri defectum, in momento quasi dolor oculi remitteret.

Plures experti, ut ante innuimus, eundem eo tempore affectum. Vidimus enim satis multos, quorum oculi tum lachrymis stillabant, in abdito latente adhuc causâ, cur humores hâc tempestate, ex sanguine in glandulis ad fauces sitis, evacuentur, alia verò, tum in aliis corporis partibus, tum in glandulis ad oculos, seu ut clarius loquamur, ignoratur hodieque, quid sit, quod sanguinem commoveat, ut modò hâc modò aliâ viâ, humores seroso-lymphatici exturbentur. Parcite verò Cartesii manes, quòd superfluum illam humiditatem non ex vaporibus condensari credamus, sed natales ejus in glandulis quæramus, sc. lachrymali, innominatâ, iisque quæ in palpebris reperiuntur. Pridem enim felix acutissimi Stenonis dextra detexit, quomodo humor per ductus ex lachrymali quidem per pauciores, per plures vero ex innominata ad oculos derivetur, & jamdudum Celeberr. Meibomius in *Epist. ad Langelot.* accuratè descripsit novos ductus glandulosos in utraque palpebrâ plures sæpè triginta, qui sub Limbo cartilagineo palpebrarum versus bulbum oculi siti, ostiola sua in ipsâ extremitate limbi habent: hoc vero indubitatum præbet argumentum, quod per hos ductus, qui, ut diximus, versus oculum hiant, ad superficiem oculi humor fluat. Sed præter humiditatem illam affluentem, quæ subinde satis acris est, ipsasque genas exulcerat & excoriat, in tunicâ adnata cernitur rubor, vasa arteriosa & venosa in conspectum prodeunt, quod vix fit, ubi membrana inflammatione correpta non est. Quin aliquando serpit labes ad reliquas oculi tunicas, uveam & corneam, ipsasque palpebras, & æstus ad humores in bulbo latitantes propagari videtur. Ruborem & ardorem comitatur dolor. Præterea ægris oculus conivertitur, & lucem ferre nequit, pupilla etiam aliquando angustatur, palpebræ coalescunt. Quibusdam hâc oculorum inflammatione laborantibus V. S. profuit, (confer. Hildan. *Cent. 4. obs. 14.* & Galen. *l. 13. Method. medend. c. ult.*) alii, ne minimam quidem utilitatem ex ea coeperunt. Hoc & Dolæus perspectum habuit, imo ausus est scribere: *V. S. meo judicio, hic magis obest, quam prodest, qui sanguis non est in culpâ nec ille est evasatus*, quæ quidem ratio satis jejuna est, ut enunciatio ipsa minimè vera, nam quòd obfuerit V. S. nemo nostrum unquam vidit. Purgantia ferè omnibus aliquod auxilium attulerunt; quod olim Duretus in Coac. prædiction. optimè notavit, & nuper adhuc Doctiss. Pechlinus in dialogo de potu thee ita scribens: *In oculorum inflammationibus, cum frustra diu laboratum topicis & collyriis, uno sæpè purgante totum morbum profligari.* Ac Spigelius *Anatom. l. 7. c. 2.* notavit, cæcos etiam à copioso alvi profluvio, derepentè exorto, visum, & quidem subito, recepisse.

Diapho-

Diaphoretica, ut omnium inflammationum remedia sunt genuina, ita quoque in hoc affectu apprimè juvant, quemadmodum præclare Dolæus in *Encycloped. Chirurg.* p. 168. confer Horstium l. 7. obs. 25. Et hîc quidem decocta Lignorum & Chinæ & sarsaparill. vulgo promiscuè laudantur, quamvis in plethoricis magis obsint, quam profint, idemque de his dicendum, quod de decocto fœnu Græci (quantum ad usum externum) scripsit Septalius l. 6. animadv. n. 79. sc. nimis esse calida. Et quod Simon Pauli *Quadripartit. Botanic. class.* 3. de vino Euphrasiato, ut vocat, habet, circumspectè agendum, ne promiscuè utamur. Nonnulli in pertnaciori ophthalmiâ ad salivationem confugiunt, quod in Nobili Fœminâ ante aliquot annos fecit D. Tralles: Verum in tantam ex hâc curâ oculi inflammationem mulier illa incidit, ut cœcitatâ periculum ægerrimè potuerit declinare. Juvenem ex contagio venereo ophthalmiâ laborantem salivatione mercurialibus excitatâ occæcatum, meminit D. Pauli. Topica, quæ fronti & temporibus sub formâ emplastrorum aut cataplasmatum ex adstringentibus v. g. myrtill. balauft., thure, mastiche, succo acaciæ &c. à Chirurgis affluxûs sistendi causâ apponuntur, vix approbare possumus, eò quod hæc adstringentia remoram injiciant humoribus in minimis vasis in orbem redeuntibus, cùm ad fluxiones prohibendas nihil melius sit, quàm liberum in minimis vasis procurare humorum motum. Consuetudinem illam vulgi & muliercularum, omnibus Collyriis vitriolum album admiscentium, jam pridem castigavit Celeberr. Wedelius de *Medicament. composit. extempor.* p. 208. Tutia, prout vulgo paratur, jam olim suspecta fuit Montano *Consult.* 142. Et sanè omnis dies docet, quod, nisi in tenuissimum pulverem convertantur tutia, cerussa, æs ustum, in oculorum affectibus vehementer noceant. Confer. Hildan. *cent.* 5. obs. 28. Et nemo paulò magis in praxi versatus diffitebitur, quod etiam ex laudatissimis præsiidiis insigne damnum in ægros redundet, nisi cum prudentiâ adhibeantur. Sacra anchora in inflammationibus oculorum est Seta-ceum. Non tamen vanus est Plempius, scribens, quod in siccioribus magnopere læsionem adaugeat.

Cæterum cùm sit satis clarum, medicamenta, quæ oculis imponuntur, non tam diu inhærere, donec vires suas exerant, optandum omninò, ut tandem vascula illa vitrea instar cucurbitularum oculi orbitæ respondentia ab Hieronym. Fabrit. ab Aquapendente (f) excogitata, in usum trahantur; nam liquore repleta oculo commodè admoveri poterunt, iis etiam cum fructu Silvatic. Capivaccium aliosque esse usos novimus. Paulo est obscurius, quid judicandum de remedio illo ophthalmiæ, quod quondam aliquis Bartholino, ut *Cent.* 4. obs. 80. testatur, communicavit. Hoc verò vult,

(f) De Chirurgic. Operation. cap. de suffusione p. m. 22. conf. etiam Sculteti *armament. Tab.* 8. fig. X.

vult, ut lobulus auris lateris affecti perforetur, perque foramen factum trajiciatur turunda longiuscula ex inverso & convoluto cortice radicis laureolæ, tam diu relinquenda, donec auris & vicinæ partes intumescant, ubi demum turunda leviter commovenda, ut aquæ copia collecta effluere queat, hæc exhausta spondit fore, ut auris detumesceret, & ophthalmia sedaretur. Conf. River. Cent. 4. observ. 100. Cl. Schneiderus lib. ult. de Catarr., quæstionem illam ventilat, an Febris ophthalmiam solvere possit, cum Hippocrates ipse doceat, *quod febris superveniens sit solutio lippienti*; Neganti nos testimonium perhibemus, quamvis omnino probabilè sit, motu febrili posse humorem in oculis hærentem, per metastasin ad alia membra, ad pleuram, jecur, pedes &c. protrudi. Ophthalmiam chronicam, cæteris omnibus frustraneis, abrasione capillorum capitis, sanatam vidit D. Preussius, succedente tamen tussi, quæ ab ipso laxantibus sublata fuit. Idem quotidianam algidam in seniculâ, cum Paralyfi pedum sub paroxysmo conjunctam, notavit; Et in aliquâ etiam dolores arthriticos cum paralyfi alterutrius lateris conjunctos, qui, salivatione ex propinato mercur. d. cum stimulo purganti fortuito succedente, plene fuerunt debellati.

Diar-
rhææ.
Febres
continuæ.

Perturba-
tio Men-
sium.

Diarrhææ satis erant frequentes, neque tamen, ut solerter observavit D. Grassius, nisi ad medium mensis durabant, ac locum deinceps cedebant redeuntibus febribus continuis cum doloribus capitis, nuchæ, faucium, orificii ventriculi, lassitudine ulcerosâ, &c. quæ bezoardicis fixis & temperatis optimè curabantur. D. Helwich non meminit, in ullo mense plures se audivisse fœminas conquerentes de perturbatione mensium, ac quidem in hoc ipso Septembri. Tot enim occurrebant, quibus gravitas circa regionem uteri, lassitudo, molestia circa præcordia, & nauseabunda adversitas, angustia in motu versus loca acclivia, & ascensu scalarum, palpitationes cordis, spasmi artuum, hemicrania, nephritis, hæmoptysis, aliaque symptomata erant molesta, quæque non immerito sibi metuerent ab asthmate, scirrhis viscerum, hydrope, epilepsia, paralyfi, phthisi, contracturis &c. Causa verò tam frequentis suppressionis unice quærenda erat in ingurgitatione ciborum frigidorum & viscidorum, fructuum horræorum omnis generis, lactucæ, olerum, lacticiniorum, panis calidi, carnis suillæ, aliorumque, puta placentarum mellitarum, &c. Ubi quidem res ipsa loquebatur, emetica iis, in quibus malum nondum egerat radices, danda esse, quorum etiam salutarem effectum non paucæ expertæ fuerunt. Illis verò, quæ jam per aliquod tempus suppressione mensium laboraverant, lenioribus purgantibus ac incidentibus & aperientibus subveniendum erat. In pituitosis cum fructu adhibita fuere ea, quæ pol-
lent facultate resolvendi mucum, v. g. rad. galang., ari, dyptamn. caryophyllat, bryon., helen., helleb. nigr. herb. agrimon., meliss., puleg., rorismar., crocus &c. flor. calendul., cheir., &c. sed sanguineæ præsentius sensere levamen ex usu rad. cichor., rub. tinct., taraxac., fl. cent. min., &c. Gummi ammoniacum palmam his omnibus faceret dubiam,
nisi

nisi delicatularum gustum offenderet, aut fortè placeat, resinosas ejus partes spiritu extrahere & in forma guttarum exhibere. Nihil quoque impedit, quo minus postmodum martialia exhibeantur, quod etiam non rarò factum. Stimulantibus non nisi circa Lunæ phases, præmissâ depletione sanguinis in exiguâ dosi, repetitis vicibus, (secus ac imperiti empirici faciunt) naturam officii sui admonuimus. Cum enim Wierus, Marchetti, alique notarint, non rarò copiosum circa uterum stagnasse sanguinem, quæ ex emmenagogis illis myrrhatis, sabinâ ac cumprimis oleo ejus sperari potest utilitas? Nulla, imò præsens potius noxa metuenda est; nam, per repentinum & præcipitem illum sanguinis appulsum, infarciuntur pori, ac major sanguinis stasis oritur, & obstructio redditur pertinacior. Quod quidem in juvenculis, quibus tardius menses erumpunt, sole clarius est, nam tantum abest, ut pellentibus natura ad reddendum tributum menstruum invitetur, ut potius ad alia molimina impellatur, & non raro convulsivi affectus, passioness suffocativæ ac hæmoptyses consequantur, sicuti aliquot exempla infelicitis ejusmodi curæ Nobis cognita sunt. Quandocunque vero circumstantiæ usum emmenagogorum eminentium exigunt, practici erit providere, ne alvus sit adstricta, nam nisi hoc fit, sanguis congeritur ad caput, & hinc occasio datur dolori gravativo, distensivo, vellicanti, ac inflationi exteriorum partium, tinnitui aurium, frigori circa verticem capitis, &c. quæ pathemata mulieribus hypochondriacis, & propter suppressionem mensium hysteris, admodum sunt familiaria, tum aliàs, tum quando alvo obstructâ pellentibus profluvium menstruum reluctanti naturæ extorquere Medici gestiunt. Nec minùs benè multis tum temporis menses prorsus cessabant quamvis satis inordinatè; Cum ejusmodi verò planè miserè per totam vitam agitur, nisi in peritum inciderint Medicum. Nam nisi is admodum sollicitè caverit, cholericæ quidem in asthma siccum, tussim siccam, hæmoptysin, phthisin, &c. facillimè prolabuntur; Phlegmatico-sanguinæ autem tumores pedum œdematosos incurrunt; Sanguineas verò lerna malorum excipit; Nam alias epilepsia torquet, aliæ doloribus hypochondriaco-hysteris, vomitibus, cardialgiis nauseabundis, per reliquum vitæ tempus obnoxia degunt; quibusdam per intervalla vox intercipitur, facies sæpè turgescit, cervix quasi onere aliquo incumbenti deprimitur, auditus hebescit, nonnullæ cum Rheumatismis conflictantur, alias iterum malè mulctat paralyss, ut de anginâ, erysipelate, nephritide &c. jam non dicamus. Et quamvis diætâ exactissimam servant, vitæ sedentariæ valedicant, placidè corpus moveant, sanguinem vel per V. S. vel per scarificationes depleant, nondum charybdim prætervectæ sunt, nisi motum sanguinis providè moderetur Medicus & spumanti ac exundanti sanguini debito tempore repagula objicere norit.

Nec nulli erant, quos tum vexabat dysenteria, quâ de occasione fluxus eo tempore grassantis, breve scriptum elucubravimus Collega noster D.

Christian Helwich, in quo Phænomena notavit & præter alia curam annexuit. Cum verò cum nostris observatis concordet, eum tractatum in suas distributum Sectiones cum veniâ Lectorum subjiciemus.

S E C T I O I.

§. I.

Dysenteria omnium maximè sub finem æstatis & autumnò grassatur, præprimis si *hyems australis* & *pluviosa*, *h. e.* Interprete Celeberrimo Tozziò clemens & placida, *ver autem siccum* & *aquilonium* fuerit; Ejus enim generis tempestates, difficultates intestinorum parere, innuit Hippocrat. lib. de *Aere, Aquis & Locis*, ut & *Sect. 3. Aphoris. 12.* & hoc tanto magis, si æstas fuerit calida. Idem tamen Hippocrat. etiam auctor est dysenteriam post frigidam & humidam aëris constitutionem oriri *lib. 1. Epidemic.*

§. 2. Interdum fluxus hic dysentericus sporadicè affligit, interdum verò epidemicè stragem edit in omnis generis homines sævitiam suam exerens.

§. 3. Otiosis, gulæ & ventri perlitantibus, ab eo majus periculum imminet; horum enim corpus pravis, glutinosis ex prava digestionem scaturientibus humoribus infarctum est In quem etiam suò modò referas phlegmaticos. Cæteroquin miris animi perturbationibus obnoxii ejus generis homines esse solent.

§. 4. Cholericæ etiam sanguineæ constitutionis qui sunt, facile dysenteriam incurrunt & ægrè ab illò malo liberantur. Exempla hujus rei passim obvia sunt. Juvabit hîc legere doctiss. Forest. *lib. 22. observ. 35.* & in *histor. agrotor. Lindan. XXII.* Ejus temperamenti etiam fuit Comes ille, cujus dysenteria describitur in *Fortis Centur. 2. consultat. & Resp. C. 96. p. 243.* Nam ait, *eum fuisse temperamenti totius & jecoris calidi & sicci, gracilis habitus, ad iram pronum, delitiis deditum &c.* Melancholici rariùs dysenteria excruciantur. Hinc Joh. de Lamoniere in luculenta illa descriptione *fluxus dysenterici* qui Lugd. Gall. 1625. populariter grassabatur, testis est, se non *vidisse melancholicum dysenteria correptum.*

§. 5. Ut plurimum etiam dysenteria viris magis est funesta quam Fœminis: ita, quod mireris, ipsæ etiam gravidæ frequenter per partum subsequum citra ullam foetus noxam hâc intestinorum difficultate exsolvuntur. Ita Bartholinus vidit gravidas, ne ultimis quidem mensibus dysenteria extinctas; & doctiss. Sennertus *lib. 3. Practic. part. 2. sect. 2. cap. 7. p. 621.* narrat, duas Nobiles fœminas dysenteria correptas & alteram quidem partui vicinam à dysenteria incolumi foetu liberatam, alteram à pariendi tempore adhuc longius remotam abortiisse quidem ac foetum mortuum edidisse, ipsam tamen matrem fuisse servatam.

§. 6. Pueri etiam & Senes ægerrimè dysenteriam ferunt ac rarò evadunt. Melior, si quid meæ hâc in re experientia credere possum, hîc fors

fors est lactentium, qua in sententia me confirmat de Lamoniere. Raygerus verò ait, se observasse multos infantes dysenteria interemptos esse.

§. 7. Præ cæteris ad malum hoc dispositi sunt, qui in morbo venereo quondam mercurio supplicarunt & ab Hydrargyrosi opem tulerunt. In eadem navi sunt phthisici aut occultâ viscerum labe affecti & gravibus ac contagiosis quondam morbis defuncti. Uberioris experientiae confirmatione eget, quod à Lamoniere traditur de contagio à cognatis non ad alios adstantes & famulantes, sed ad cognatos solum propagato; singularis etiam hic est observatio Cl. Waldschmidt *An. 2. Ephemer. German. D. 2. observ. 213.* de dysenteria consolidatum ulcus pedum excipiente.

§. 8. Præcedit autem dysenteriam ferè semper diarrhæa, interdum autem tumor aliquis sive distensio abdominis.

§. 9. Frequentissime cum horrore & rigore, modo graviore, modo autem remissiori invadit. Videas partes porosas constringi, vasa in peripheriâ corporis disparere, & extrema sensu frigoris affici recurrenteque æstu perfundi.

§. 10. Tormina mox invalescunt & molestissime affligunt; Audiuntur querelæ de intolerabili intestinorum cruciatu eorundemque depressione ac viscerum omnium descensu, ut accurate notavit Sydenham *in Op. p. 22.* quibus intimum illum lancinationis sive puncturæ sensum cum tensoriis atque pressoriis doloribus, quibus umbilicus retrahitur, expressit. *Conf. Miscell. Nat. Curios. 1673. observ. 11.* Hinc non immeritò torminum nomine dysenteria Celso venit. Dolor autem ille non unum eundemque locum semper occupat; nam interdum maximè furit circa umbilicum & hypogastrium; interdum autem circa hypochondrium utrumque, ilia ac inguina, ac ille quidem sævior, hic mitior est, hunc breviori intervallo sequuntur dejectiones, istum aliquantò tardius excretio excipit.

§. 11. Pessimis ægri rebus interdum dolores prorsus absunt, ut bis mihi observare licuit, & præterea Bartholinus, Rhodius, Wedelius aliique testantur, nisi forte cum Lindenio existimes, implicare contradictionem, dysenteriam esse & sine dolore esse; quamvis vel ipse Hippocrat. *2. Epidem. sect. 6. §. 50.* mentionem faciat dysenteriae *ἀνευ οἰσύνης.*

§. 12. Sequuntur dejectiones. Primo pingua prodeunt excrementa, ut plurimum mordaci acredine locis per quæ transeunt, infesta, modo flava, modo viridia, modo albicantia, rarius nigra, sæpè etiam varia, semper tamen magis minusve mucosa, quæ in altitudinem stupendam ab imò ad summum coherentem subinde tolli queunt; Deinde sordes illæ, cujuscunque fuerint notæ, sanguine parcius largiusve perfusæ sunt. In ambiguo enim est, an dejectiones illas torminosas cruoris expertes, quales & Willisius & Joh. Lamoniere memorant, fas sit sub ambitu dysenteriae complecti, præsertim cum aliam etiam ipsomet Willisio teste, curam quam dysenteria requirant. Hollerius excrementa ista ferè semper spumosa, de quibus consulendus Roderic. à Castro, esse notavit. Memini his

oculis vidisse excreta per fermentationem in magnitudinem satis amplam cum admiratione circumstantium sese extendentia & teterrimum foetorem exhalantia. Conf. Chesneau *observ. lib. 3. p. 311.* Si ulterius serpat malum, excrementis sanguineo-mucosis pelliculæ & fibræ permiscentur, ac, si nondum ferocia morbi compescatur, sed altius malum penetret, saniosa & putrida materia prodit.

§. 13. Visi etiam mihi sunt, qui sanguinem purum non infausto exitu in largiori quantitate excernerent. Nec defuerunt, qui sanguinem sine excrementis funderent & intra breve tempus morerentur, cujus rei notabile exemplum de ancillâ suâ intra triginta horarum spatium plus centies sanguinem nullis fæcibus admixtum rejicienti narrat Loffius *lib. 3. observ. Medic. p. 206. & seq.* Conf. etiam laudatus antea Chesn. *p. 306.* Ejusmodi excretionem, sinceram, appellant, quâ de inter alios agit Roderic à Castro *in var. Exercit. pag. 14.*

§. 14. Dejectiones interdum adeò frequentes, ut vix miseri sellam foricariam deferere possint, interdum tamen induciæ ad aliquot horas conceduntur. Utut verò sæpissimè urgeantur dysenterici ad alvum reddendam, non tamen id, quod excernitur, adeò magnæ est quantitatis, quin sæpissimè inanis tantum est dejiciendi appetentia ac anus perpetuâ punctione, pruritu tensivoque dolore molestat. Cum tenesmo non raro conjuncta est procidentia ani, vid. Holler. *lib. 1. de morb. intern. c. 43. & annotationes in illud.* Clariss. Sydenham in eâ est opinione, (g) quod morbo in longum protracto intestina ordine quæque suo deorsum versus afficiantur donec in rectum intestinum malum omne detrudatur & in tenesmum ac ani procidentiam desinat, quæ tamen viri hujus observatio experientiæ per omnia hæcenus non respondit. Ex dictis proclive est sanguinolentum cum torminibus profluvium id est dysenteriam discernere & ab hæmorrhoidibus & hepatico veterum fluxu, in quo dejectiones carniū recentium loturæ similes deprehenduntur.

§. 15. Ut plurimum dysenterici simul febricitant, & dum interiora ardent, exteriora corporis frigent, id quod per torporem frigidum Aurelianus significare voluit. Facile verò illa habitus musculosi refrigeratio ab aurâ provocatur & intenditur, subinde tamen æstus intercurrit, ac attendit observatio, quòd horrida quædam refrigeratio sedes præcedat, æstus vero sequatur. Appetitus præterea dejectus est & affligit sitis inexorabilis. Lingua viscida albicanti mucilagine obducta est, non raro etiam atro infecta succo squalet. Vigiliæ pertinacissimæ vires atterunt. Graviss quoque præcordiorum anxietas cum exacerbatione circa vesperam premit. Urina modò impensè rubet, modò turbida est, modò cruda, observante illustri nostro Schröckio.

§. 16. Multis symptomatibus dysenteria ordinariò quasi stipata est. Nam

initio

(g) conf. *Castigation. Nostræ Grabnerian. p. 62.*

initio frequenter conjuncta est cum vomitu. Ejus rei notabile exemplum affertur ab Hildan. *lib. de Dysenter. c. 6.* in Puero, qui ab initio morbi usque ad extremum vitæ diem omnia, quæ assumebat, cum multa putridissima materia & vermibus ultra duos de viginti evomuit. Quin imò & sanguinis vomitum observavimus, eumque non lethalem; & curâ Celeberr. Wedelii evasit aliquis qui aliquoties sanguinem per os excreverat *Decur. 1. Ephemerid. A. 2. observ. 44.* Quâ in re etiam testem se sistit Thomas Bartholinus.

§. 17. Comitantur dysenteriam nonnunquam singultus & convulsiones, quæ triste fere præbent prognosticon. Conf. *Ephemer. Decur. 2. A. 6. observation. 82.* Ejusdem commatis etiam sunt crebræ animi defectiones; evafere tamen nonnulli. Ita singultum incipientem meminime quoque feliciter pulvere præcipitanti adjuncto olei cujusdam aromatici momento sustulisse. Inter rariora autem numerandum exemplum, quod habet Hercules Saxonia *lib. 3. cap. 23. de Dysenter. & tenesmo p. m. 260.* ita scribens: *Quendam ex atrâ bile curatum vidi. Incipiebat à flavâ bile & post abibat in atram cum singultu & vomitu.* Pusionem dysenteria laborantem supervenientibus convulsionibus liberatum refert Cl. Paullin. *in Append. A. 7. Dec. 2. p. m. 133.*

§. 18. Urinæ fluxus solet esse impeditior, quod ante tot secula observavit Aurelianus, ejusque exemplum occurrit *in exercitat. Pœonis & Pythagoræ p. 64.*

§. 19. Non rarò dysentericis etiam exanthemata erumpunt, morbilli, inquam, (vide *observat. Decur. 2. Eph. A. 6. p. 174.*) variolæ, (conf. *Dec. 2. Ephemerid. A. 8. p. 103.*) ac petechiæ. Et licet aliquando dysenterico-petechialis febris curetur, ut legere licet *Dec. 2. Ephemerid. Germ. A. 9. p. m. 185.* & ipsemet in adolescente observavi, eventus tamen utplurimum solet esse tristior, quâ de re videtis *Dec. 2. Ann. X. observ. 15. p. m. 35.*

§. 20. Interiora oris frequenter aphthis obsidentur, videas enim non rarò repentinam phlogosin linguæ quasi erysipelaceam cum suppuratione momentanea aut sub uvulâ excoriationem & stigmata sanguinem transudantia; Et hæc rarissimè bonæ spei sunt. Quod etiam dicendum de prunellâ sive fissuris in crassiori linguæ parte cum æstu inflammatorio diuturniori & summâ faucium ariditate. Memorabile hac de re exemplum extat in Gabelchoweri *Cent. 1. curat. 50.*

§. 21. Nonnunquam etiam dysenteriis sese adjungunt dolores acerrimi circa regionem cordis, oppressiones pectoris, interceptiones anhelitûs, ad eò ut ægris nonnullis à suffocatione metus sit; Accedit & in faucibus lentæ pituitæ copia per aliquot dies recurrens, ut gargarismorum opem frequentem non secus requirant ac febres malignæ in fauces humorem noxium effundentes, observante Cl. Olaô Borrichiô.

§. 22. Mors præ foribus esse suevit, cum labia livent, genæ præternaturam rubent, oculi concavi sunt, nasus aquilinus cernitur ac extre-

ma frigent. Omnibonus Ferrarius *de cur. infant. fol. 226.* addit aliud instantis mortis indicium, quod non memini me observasse, dum ita scribit: *Qui habet dysenteriam & apparet post ejus aurem sinistram veluti res nigra similis orobo cum vehementi siti, moritur in decimo & non tardat nec evadit.*

§. 23. Et hæc & forte alia plura in viventibus observare licet. Videamus etiam, quænam in corporibus anatomico cultro subjectis sese sensibus offerant. In genere certum est, quod canalis intestinorum vitatus deprehendatur. Vitium autem hoc non est unius modi. De inflammatione eorum res certa, & tametsi non adeò copiosa prostant exempla, (ex hac fortassis ratione, quod mors raro sequatur, quamdiu malum intra inflammationis terminos coercetur,) sunt tamen aliqua. Joh. de Lamoniere *p. 4. de fluxu dysenter.* testis est, quod, cum cadaver dysenterici alicujus curiosius inspiceret, inter alia insignem inflammationem pylori & tenuium intestinorum invenerit. Cum Platerus dysenterici pueri corpusculum, in quo crassa intestina tumebant, aperiret, eadem liventia, ac si inflammata fuissent, deprehendit, jam autem loca inflammata, quæ in viventibus rubra sunt, post mortem livere solent; vid. Plater. *lib. 3. observ. p. 857.*

§. 24. Sæpius intestina inveniuntur sphacelata. Ita istius dysenterici, cujus modo ex de Lamoniere meminimus, intestinum rectum erat sphacelatum. Et Fabritio Hildano *lib. de gangr. c. 4.* teste, dysenterici sexagenarii intestina undique gangrænosa fuere reperta. Conf. etiam Barbette *lib. 4. Prax. c. 5.* Gangræna autem omninò convincit præcessisse inflammationem.

§. 25. Aliquando ulceribus & apostematibus obseffa sunt intestina. Clariss. Coberum hic testem laudo, qui, cum plura cadavera aperuisset, intestina passim pugnum excedentibus apostematibus & ulceribus perenni serie scaturientibus ebulliisse vidit. *Decur. 2. observ. 10. p. m. 110.* Hinc dejectiones saniosæ, ut audiendus minime sit Holterhoff in discursu de *erroribus Medicorum*, in quo non paucos ipse commisit, *c. 4. p. 33.* si hoc vult, in dysenteria nunquam esse ulcus intestinorum.

§. 26. Ulterius intestina modo excoriari, modo ad summam tenuitatem reficcari, modo in locis aliquibus perforari; interdum etiam coalescere fidem faciunt observationes congestæ à Boneto *lib. 3. Anatom. Practic. Sect. XI.* quæ per otium evolvi à quovis poterunt.

§. 27. Ex iis etiam disci poterit, ventriculum, hepar, mesenterium, epiploon, subinde gravissimè in dysenteria affici & tumoribus, ulceribus, gangrænâ, sphacelo, &c. defœdari.

S E T I O I I.

§. I.

Multa sunt, quæ dysentericum fluxum interdum sine morâ, aliquando verò post aliquod temporis intervallum excitant. Et hujus generis sunt initio venena quævis, & cumprimis arsenicalia. Quæ hic Mercurius possit, ii norint, qui salivationem vel per inunctionem Mercurialem, vel ipsum Mercurium dulc. internè datum provocarunt. Toto die etiam videmus à purgantibus drasticeis, in enormi, ut fieri solet à Barbitonforibus & agyrtis, aliisque Medicastris, dosi exhibitis, dysentericum fluxum provocari. Conf. Forestus *lib. 22. observ. 37. Scholio.* Tulpus *Observ. l. 4. observ. 26.* ut & Stalpart. *p. 131.* De dysenteria ab asperitate annuli excitata legatur Zacutus *l. 2. Pr. Mirab. Hist. 84.* Rex Poloniarum Michael extinctus ejusmodi sanguinis profluvio est, & non pauci causam ejus in adamantino pulvere, ab inimicâ manu ipsi obtruso, recubuisse suspicati sunt. Certè circumfertur vulgò adhuc subtilis hic ingenii lusus de morte ejus:

*Si pretiosa mors est sanctorum,
Verè Michael Rex Polonia
Sanctos inter primarios numerandus est.
Mors enim ipsius fuit pretiosissima.
Quis non pretiosam mortem existimet,
Quæ adamantibus comparata est?*

§. 2. De Lumbricis nota res est, eosque in flagranti delicto aliquando deprehendit Drelincourt, hominem 40 annorum, qui totos dies quindenos perdius & pernox abdomen manibus comprimens sellæ infederat foricariæ, post mortem secans, nam universi coli decursus in secretioribus cryptis atque cellulis vermium latibula passim prodidit. Alii hûc & illûc palantes grassabantur. Alios verò angineo flexu contortos, implicatos conglomeratosque vidit. Conf. etiam Brand. *Observ. in Act. Hassn. Tom. 5. obs. 31.* Usus aceti in plumbeo vase asservati, ut & aquæ in plumbeis canalibus diutius asservatæ in dysenteriam præcipitavit. Vid. Bonnet. *p. 618. lib. 4. Medic. collat. Septentrion.*

§. 3. Inter cibos dulcia, nimis salita, fumo indurata, male audiunt. Aretæus accusat cæpas, allium, carnes vetustas, s. quæ diu servatæ sunt, ut explicat Mercurialis *in prælection. pathol. p. 326.* Ab horariis, austerris, tota castra impleri dysenteriis novimus. Uvæ rubigine aliisque fordibus inquinatæ, nocentissimæ sunt. Et de uvis simpliciter idem illud testatur Conringius *in Exercit.*, ad Billich. *Anatom. fermentation. §. 9.* Pepones aliquibus Imperatoribus, Friderico Tertio inquam, & Alberto II. fuisse funestas, eosque ex usu istorum torminibus excruciatos animam expirasse,

raffe, refert Cuspinianus. De dysenteria post polyporum esum, evolve-
re, si placet, licebit Amat. Cent. 6. Cur. 73. Ab aliis ova barbi piscis
accusari recordor. Ex esu brassicæ capitatae, noxio rore infectæ, dysen-
teriam ortam legimus *Ephem. Curios. Dec. I. Ann. 3 observ. 88.*

§. 4. Ex potulentis hûc pertinet algida, præprimis si alio fuerit imbuta
sapore. Sane Drelincourtius vidit Parisiis dysenteriam ortam ex aquâ Se-
quanæ haustâ juxtâ navigia linteis sapone tergendis dicata. In eo etiam
censu sunt mustum, cerevisia fœculenta, vel ex aquis putridis parata.
Theophilus Imperator Constantinop. ex frequenti aquæ frigidissimæ, cu-
jusmodi nivalis est, potu in dysenteriam prolapsus est. Imo Constantino-
poli quotannis Turcæ plurimi æstivo tempore alvi fluxu divexati dece-
dunt, quod non nisi ex immodico potu nive & glacie refrigerato illis
accidere Medici asserunt, ex fide Mercatoris alicujus apud Marcell. Donat.
lib. 4. de Histor. Medic. Mirab. 325. Avenzoar de seipso recitat histori-
am, quòd in itinere comederit herbam, quam non nominat, ex quâ factus
dysentericus. Vinum Rhenanum liberalius haustum, *Ephem. Dec. II. Ann.*
II. observ. 168. dysenteriam induxisse legitur.

§. 5. Sæpè verò etiam illi dysenteria corripuntur, qui ab his omnibus
abstinuerunt, eo præsertim tempore, cum malum est epidemicum. Accu-
satur hîc contagium ab excrementis, supellectile, quâ dysentericus est usus,
accubitu, effluviis ex ægri corpore per poros aut halitum in adstantes
derivatis, Helidæus Paduanus observ. testis est per fistulam clysmaticam,
quam adhibuerat torminosus, dysenteriam in corpus sani esse transfusam;
Lac dysentericæ infecisse infantes, apparet ex *Ephem. D. 2. ann. 6. obs. 195.*

§. 6. Ut verò rectius constet, quomodo illa Phænomena ex his simili-
busque oriantur causis, tribus verbis præsupposita quædam ex Anatomi-
cis & Physiologicis hîc commemorare fas sit. Inter quæ primum sit.

1. *Intestina in fluxu dysenterico laborare*, excretio enim per alvum læsa
jure optimo ad intestina, tanquam ad *πρῶτον πᾶχος* reducitur, quia ip-
sorum est *ἐνέργεια* fœculenta excrementa ex corpore ejicere.

2. Ea ipsa constare, juxta sententiam ubivis fere receptam (1.) ex
tunicâ exteriori communi pinguedine passim obductâ, (2.) *media carnosiori*,
quæ instructa est duplici fibrarum ordine, longitudinali seu recto, qui
tunicam illam anteriorem membranaceam vulgò dictam tangit, & ad con-
tractionem intestinorum in longum à natura constitutus est, & annulari,
qui longitudinali superimpositus, ad coarctationem intestinorum in latum
factus est. (3.) *Nerveâ*, *crassâ*, & densâ vasorum sanguiferorum plexibus &
ramificationibus refertâ ac rugosâ. (4.) *Villosâ* quam nonnulli crustam in-
testinorum, alii *περίσσωμα*, alii aliis nominibus appellant, Willis glandulosam
nominat, quod parte convexâ, quæ Nerveæ jungitur, magnâ glandularum
copiâ consita sit; sicuti & alii, cum Clar. van Horne, velamentum bomby-
cinum nuncupant, quod parte oppositâ videatur contexta ex fibrillis bom-
bycini

bycini panni filamenta referentibus. Ab hac originem juxta Ruyschium *Epist. XI.* ducunt valvulæ conniventes, rugæ nempe seu juga per intestina jejuna distributa.

3. Tertium inter præsupposita est, *respectu totius paucas esse arterias ad intestina desinentes*, quæ sunt verba Malpighii in *Operib. posthum. p. 251.* imò si Borelli sententia *part. 2. præclari operis de motu animali propos. 146. p. m. 221. § seqq.* vera est, vix 25 pars totius massæ sanguineæ, tempore, quo una circulatio sanguinis per cor absolvitur, à vena portæ redit.

4. Quartum sit hoc, quod *venæ portæ ramificationes occurrunt ad intestinorum volumina*, mesaraicæ dictæ, & aliæ versus extimam tunicam inosculantur arteriis, ut revehendo inserviant sanguini, aliæ immerguntur intimæ tunicæ, & in intestina hiant, uti id præprimis Clariss. Hartmanni experimenta ostendunt, in quo consentit Ruysch., si D. Hartmann per intimam tunicam intelligat nerveam, per hanc enim in majori copiâ vasa sanguiflua disperguntur.

5. Glandulas tenuium esse *miliares* & *efformare plexus varios*, modo orbicularis, modo ovalis, modo angulosæ figuræ, *crassiorum vero glandulas esse grandiores* & ad lentis figuram accedere, & longius à se invicem distare, quarum descriptionem distinctè exhibet Doctiss. Peyerus in exercitat. *Anatom. Medicâ* hujus argumenti; & harum originem Ruyschius à tunicâ nervea, aut potius vasis sanguifluis petit easque spurias nominat.

6. Bilem per ductum Cholodochum in intestinum duodenum effundi, & succum pancreaticum per ductum Hoffmanno-Wirsungianum, in eandem derivari fistulam. Nec prætermittendum, quod ordinariò ferè insertioni pori biliarii seu cholodochi orificium ductûs pancreatici non longè à pyloro jungatur.

7. Adeste & Nervos, juxta communioem opinionem à sexto pari, qui juxta Willisium *de nervor. description. § usu cap. 25.* intercostalis nervorum paris soboles sunt.

8. Motum *peristalticum s. circumpressorium* fieri, dum circulares seu annulares fibræ ex ordine contractæ intestinorum cavitatem constringunt, & longitudinales breviores factæ, partem unam intestini ad alteram propius adducunt, quem vermicularem motum fæcum propulsio sequitur. Ordinariè ejusmodi motus ventriculi & intestinorum placidus est, & cibi ingesti hâc suavi tractatione, per quam distensus canalis coarctatur, promoventur. Qui plura de his desiderat, evolvat Sylvii *dictata ad Barthol. institut. anatom. c. X. § XI.* Willis. in *Pharmaceut. rational. Sect. 1. c. 2.* Glisson. *Tract. de Ventric. & intestin. c. XI. § cap. 15. de facultate peristalticâ.* Hornium *Microcosm. § 21.* & Hoffmann *dissertat. Anatomico-Physiolog. Hieronym. Fabric. in Operibus Anatomico-Physiolog. p. 138.*

9. Febrim excitari, quotiescunque in parte quadam vel fluidâ, qualis sanguis, lympa & serum, vel solidis, aliquid præsto est, quod vel corruptionem infert, vel eandem minatur, cujuscunque etiam generis sit, seu salini, seu ex numero pinguedinum & mucaginum; Hoc enim, quodnamecunque demùm fuerit, ut secernatur, & organis debitis per motum humorum localem colatorium excernatur, febris accenditur, id est, pulsus fit frequentior & fortior, ac ita non modo sæpius breviori tempore, sed & fortiori transpressione agitur sanguis, quam de febribus sententiam mihi omnino firmiter persuaserunt varia D. Stahlî Celeb. Professoris Hallensis scripta.

S E C T I O III.

§. I.

JAm dispiciamus, quomodo memoratæ causæ ad effectus eos producentes concurrant. Regnat ubique ferè civitate quasi donata sententia, quod enumeratæ causæ pleræque efficaciam suam exerant irritando, vellendo, stimulando intestina atque eo ipso tormina excitent & fluxum dysentericum. In hac sanè sententia est Paracelsus cum sequacibus, sal resolutum accusantibus; in hac Helmontius, ut apparet ex libr. *de potestate medicamentorum*; in hac Bertraud. *Tr. de acid. & alkali*, c. 6. & plures alii. Ac non vanum causæ hujus patrocinium potissimum in purgantibus vehementioribus fortassis aliquis quærat; nam ipsa esse actia sensuprehendimus, plurima enim in pila trita inque aërem abeuntia naribus sternutamenta, oculisque lacrymas excutiant. Hellebori pulvis membranæ pituitosæ percitis poris hærentem tenacemque blennam in rivulum dissolvit. Elaterium quoque & euphorbium aliqui in errhinis commendant. Rhabarbaro nonnulli frequentem provocant salivam, & aloën eodem fine commendat Brassavolus. Huic assertioni probandæ doctiss. Pechlinus *caput* 13. impendit in *Exercit. de purgant.* Ita ergò hi seriem causarum connectunt: Ratione temperamenti multi adsunt humores acres, biliosi, falsi, mordaces, pituitosi (nam homines temperamenti cholericî & phlegmatici potissimum dysenterici corripî diximus) ac præterea per pravam victûs rationem assumptis iis, de quibus antea locuti sumus, cumulantur humores, ac proinde non possunt non intestina rodi, ac hinc dysentericæ dejectiones provocari. Quæ quousque admittenda sint, ex sequentibus, opinor, elucescet.

§. 2. Non negamus, quod in dysenteria, ab ingluvie & incauto horæorum fructuum esu ortâ, adsint in intestinis cholericorum & phlegmaticorum humores, acres, austeri, acidi, urentes, &c. quibus generandis apta nata sunt edulia à nobis antea designata, eo, quem Sectione præcedente, explicavimus modo. Nec negamus, quod ejus generis humores molestiam eamque sic satis insignem intestinis asferre queant; at ve-

rò quòd irritatio tanta inde oriatur, quæ intolerabili propemodum dolore misere mactet patientes, id verò est, quod credere non possumus, his moti rationibus. Nam

(1.) Diximus intestina obducta esse muco quodam, qui id præstat officii tunicæ nerveæ, quod cuticula cuti veræ, i. e. nuditatem ejus amicit, ac eandem uniformiter oblnit. Nam judice Ruyschio *epist. XI. mucus utilis est tunicæ villosæ, ne lædatur ab acribus assumptis*. Hoc verò experimentum, qui vel semel attentius aspexerit, fatebitur omninò, non satis comprehendi posse, quomodo humores, quascunque etiam cum recentioribus philosophis iis figuras tribueris, nerveam intestinorum tunicam, quam *περίσωμα* illud munit, vellicare ac potenter adeò irritare possint. Sed ponamus, villosam tunicam non prohibere, quo minus humores illi mordaces in tunicam nerveam irruant, dicimus nerveam tunicam sensu adeò exquisito non pollere, adeoque fieri non posse, ut irritationem hanc ineffabilis dolor consequatur. Quod vero sensus nerveæ hujus tunicæ adeò acutus non sit, alia viscera nervis densissimè intertexta, hepar, inquam lien etiam enormiter læsa evidenter probant; nam quantacunque eorum noxa fuerit, dolor certè adeò penetrans non observatur. Ac multò minus de tunicâ illâ ex fibris constanti aliter judicandum, postquam Clariss. Wepferus detexit, *Fibras ventriculi, intestinorum &c. nihil aliud esse, quam nervos, vel saltem ad horum naturam accedere in Zodiaco Medic. Gall. ann. 4. observ. 2*. At verò admiratione dignum, nec tamen à verò ablu- dit, quòd in Salzmanni *observ. Anatom. Amstelod. edit. p. 59. & seqq.* legimus de interiore ventriculi tunica omnino corrosâ, ita ut quasi in lacerâ veste frusta plurima dependerent nigricantia, & ventriculo ita putrido, ut levissimo negotio disrumperetur, & tamen æger ille de tanto dolore ventriculi non fuerat conquestus, sed solummodò de imbecillitate totius corporis & dolore hypochondrii sinistri cum dejecta appetentiâ & siti continuâ, ut refert Salzmannus *ibid. p. 58*. Et cum primis notabile etiam est exemplum in *Observ. doctiss. Dodonæi c. 27. de cerevisiæ coctore*, qui non modo ulcere ventriculi laboravit, & omnia viscera corruptissima habuit, & gangrænâ in pede exortâ extinctus fuit, is ante mortem respondit, se nullâ corporis parte dolere, neque unquam doluisse. Nec sensit dolorem, cui ab usu magisterii perlarum ventriculus erofus, teste Cratone, & cui id contigit ab usu spiritus vitrioli. Nec adeò magnum sensit dolorem ille, de quo *Ephem. Dec. I. ann. 11. observ. 299*. Merclin. refert, quod in demortui ventriculo foramen repertum.

(2.) Id etiam perpendi cupimus, quod acria multa, e. g. piper, sinapi, falia herbarum fixa, per incinerationem facta, amara etiam e. g. absiythium, cent. min., fumaria, myrrha, aloë, Acida quoque, ut poma citria, aurantia, limonia, berberes, tamarindi, imo ipsum acetum, it. spiritus salis, sulphur., vitrioli, &c. Similiter & austera, fructus cynos-

bati, vitriol. ♂. &c. tandem & *urentia*, ut spiritus illi ardentes, toto die fumantur, ex quibus non nisi materia acris, austera, salsa, acida, &c. oriri potest in intestinis, & tamen illi, qui his delectantur, nullum in intestinis sentiunt irritationis, vellicationis, rosionis, ustionis, &c. sensum, aut certè non tantum, quantum quidem dysenterici perpetiuntur. *Accedit*

(3.) Quòd post usum horræorum fructuum, ingurgitationem musti, &c. non finitâ coctione, ut fieri necesse erat, si ex chymo, irritante intestina, dysenteria oriretur, de doloribus illis dysentericis conquærantur ægri, sed sæpè post plures demum ab usu eorum dies cruciatibus illis torqueantur.

§. 3. Obvia ergò in intestinis sive *intus genita*, ut humores, quos biliosos vulgò vocamus & acidos, sive *ex seminio specifico exorta*, ut vermes, sive *ex forinsecus haustis orta*, e. g. ex comestis melonibus, prunis, piris, pomis, &c. aliisque nocivis cibis, objecta quævis seu liquida, seu pulverulenta liquamini alicui *immersa heterogenea*, utique rodunt quidem ac particularum suarum acumine aliquam molestiam afferunt intestinis, non tamen, ut dixi, irritando, ac spiculis suis intestina vellicando, tormenta dysenterica excitant. Unde ergò illa oriuntur? Hoc ut eruamus, notandum, quod hæc in cavo intestinorum contenta, de quibus jam dictum est, ita sint comparata, ut massæ sanguineæ commixta, maximos in eâ tumultus faciant, imò sanguinem ad fermentationem, (nam timiditas Sydenhamii ab usu vocabuli hujus nos deterrentis merito reprehensa est à Clariss. Schelhamero de *curand. febb. method.* p. 41.) putredinosam disponant. Id præcipuè cernere licet in fructibus horræis, præcipuis dysentericæ autoribus. Hi, quemadmodum facillimè extra corpus in putredinosam fermentationem fatiscunt, etiam in ipso corpore facile vitium subeunt, id quod in dysenteria fieri nemo negat. Scilicet, ut reliqui cibi, ita fructus horarii in massam pultaceam abeunt, quæ perinde, ut alii cibi, constet ex parte aqueâ subtili, oleosâ & mucilaginosâ referente naturam ipsorum fructuum. Nimirum vel abundat in cremore illo pinguedo seu sulphur illud volatile, quod oleosum & vim balsamicam appellare Wedelius suevit, & magno impetu ad putredinem ruit, vel prævalet mucago illa terrestris, quæ salinæ profapiæ est, nec ab oleosâ, à calore corporis adjutâ, resolvi & conteri potest, & tum lentoris & visciditatis mater fit, quæque, cum ei crudior affunditur potus, in spirituosum quoddam sulphureum abit. Hujus itaque liquaminis & cremoris aut massæ fermentescentes partes sanguini permixtæ, eundem è mixtione suâ disturbare, partes ejus divellere omninò moliuntur, id quod apud recentiores in confesso est. Ac ipsa res non usque adeò intellectu difficilis est. Nam mustaceæ illæ particulæ motu intestino putrefactionis extenuantur in consistentiam halituosam, ac eo ipso redduntur dispositæ ad perreptandos colatorum atque secretoriorum viscerum meatus atque poros, ac corrumpunt

hoc

hoc suo motu materiam obviam, quæ apta est, seu partes sanguinis in suæ figuræ similitudinem transmutare fatagunt, atque ita semet multiplicant non sine præcipiti sanguinis destructione. Principium ergo movens, ad hostem hunc in intestinis hærentem, vitæ filum facili negotio abrupturum, si ex peninsula intestinorum in sanguinis oceanum ruat, ex corpore exterminandum nihil non molitur.

(1.) Enim fit copiosior humoris congestio ad intestina, eum namque in finem partes porosæ & vasa externi habitûs contrahuntur, ut sanguis è poris & vasis ad interiora propellatur. Manifestum verò satis est, humoris hanc congestionem ad interiora fieri ad materiam in intestinorum cavitate stabulantem diluendam & emolliendam, ut diluta & emollita tantò facilius è corpore secernatur. Hanc talem congestionem non potest non frigus aliquod consequi, ut vel circumstantiæ vomitûs accuratius perspectæ edocebunt.

Deinde (2.) ipsa intestina irrequite moventur. Fibræ istæ annulares tunicæ carnosæ arctius, ac ordinariò fieri solet, constringuntur, longitudinales etiam abbreviantur, ut materia aliena crustæ impacta avellatur & ejiciatur. Nec dubitandum, quin ipsum etiam Mesenterium, quod in singulis palmis duodecim circiter intestinorum palmos, calculum ponente Willisio, complectitur, variè contrahatur, imò, si laudatum modo Auctorem sequimur, *Fibræ motrices rectà à centro ad circumferentiam tendentes, prius contrahuntur*, & deinde in his aut illis intestinorum partibus pares contractiones cient: quod dum fit, ut fieri res ipsa docet, necessario inquietum hunc & impetuosum fibrarum in mesenterio ac intestinis motum ac mutuam collisionem, & ramusculorum mesaraicorum ab insigniori congestione sanguinis distensionem, gravissima ventris tormina non possunt non comitari, ut cuivis exactè trutinanti facile patet. Rectè itaque Celeberr. Ettmüller in *Colleg. Practic. p. m. 144.* nobiscum infert, *acerrimum dolorem, qui dysentericos torquet, non promiscuè ex corrosione sed fere maximà ex parte ex spasmodica intestinorum convulsione, qua intestina irritata spasmò quodam correpta se convellunt, aut motu quasi vermiculari torquent, oriri.*

§. 4. Dum verò intestina ita contrahuntur & miserè torquentur, sequuntur excretiones, &

1. Quidem mucilaginosæ albicantes. Cùm verò subinde enormis quantitas muci hujus albicantis exeat, non immeritò quæritur, unde sit? Puitam eam, quæ ordinario nuditatem nerveæ tunicæ investit, partem aliquam dejectionum constituere, solam autem non sufficere, in propatulo est. Nec hic Helmontium fuimus secuti, qui ait, talem mucum *destillare ex intestinis lasis*, & nihil aliud esse, quam *nutrimentum intestinorum proximum sed lasum*. Quis enim, ut alia taceam, credat, tam copioso indigere intestina nutrimento, ut hoc solum, tam frequentibus per diem dejectionibus, materiam præbere possit. In eandem difficultatem incidunt, qui chylum esse contendunt, ut Rolinc. *Conf. p. 665.* aliique plu-

res. Glandulas solas compressas hunc eructare humorem, si dixeris, eadem difficultate premeris. Ex unico ductu pancreatico itidem tam insignis quantitas stillare vix poterit, licet aliàs certum, quòd multa fæx serosa, ex ductu pancreatico, propter arteriarum ad pancreas delatarum copiam & magnitudinem, in intestinum despumet, & hoc ligatura in vivo animali facilè evincet. Ulteriùs aliquando vivo cani sub excrementorum in intestina delapsu, tusus venter fuit, intestinorumque tenuium partes hinc inde vinculo interceptæ sunt, atque hic confuto ventre relictus sibi canis docuit Cl. Pechlinum, quantum ex glanduloso texto liquoris, intra tempus non adeò longum, in intestina erumpat. Tumor enim ingens interceptas partes occupare cœpit, & ad apertionem serosa illuvies latè stillavit, manifesto signo, hoc liquidum, quod inter duo vincula eruperat, intestinalis tunicæ fuisse sudorem. Glandulæ intestinales insignem quoque, ut ante innuimus, quantitatem eructant serosæ materiæ, quæ similis est illi, ex pancreatico ductu fluenti, ut probat experimentum Cl. Wepferi in cane, cui *data opera ab eo fuerat abscissus canalis pancreaticus*, per totum bimestre, post hanc operationem, superstite, factum in *Zodiaco Medico Gallico ann. 4. obs. 2. pag. m. 4.* Cl. Ruyschius addit, magnam partem laticis aquosi per poros, quibus intestina scatent, diversæ capacitatis fluere in *Epist. Anatom. XI.* Si itaque hæc omnia conjunxerimus, quis non videt, quod partem aliquam mucilaginis constituat crusta illa intestinorum oblinens parietes, partem succus pancreaticus & lymphæ glandularum, ut & fæculenta materia in intestinis hærens. Nec dubium, ex vasis sanguiferis in intestina hiantibus excidere aliquid, quod ejusdem cum crustâ villosâ profapiæ sit, prout doctè, licet non ad genium seculi, explicat Glissonius de facultate secretrice, præprimis id fit, quando in massâ sanguinea peregrinum aliquod oberrat, ac sanè notatu dignum, ab usu colocynthidis colluviem quandam albicantem & glutinosam effundi, quod, quomodo fieri possit, datâ occasione docebitur. Facile vero captu est, quod sub motu intestinorum impetuoso & spasmodico concussæ glandulæ, ductus pancreaticus, ipsa etiam arteriarum oscula humorem hunc albicantem copiosius stillent, imò quandam crustæ, sub his intestinorum laboribus, abradi partem, ac quicquid in intestinis hæret, simul excludi à vero non abludit.

2. Frequenter etiam cernuntur excretiones flavescentes, quas biliosas vocant. Nec adeò arduum est, biliosi magmatis, quod sæpè etiam ut notum est, à dysentericis ejicitur, fontes recludere, postquam felix Malpighii solertia ostendit, etiam *ligato cystico ductu*, ex quo solo bilem in intestina depluere antea creditum fuit, frequentem ex hepatico transire ductu in intestinum. Quâ in re non minor eluxit industria Telescopii, qui bilem hepaticam, folliculo benè constricto, ad tres quatuorvè uncias, brevi temporis intervallo, lagenulâ excepit. Quo ipso satis edocemur, quantum ex utroque ductu, in duodenum, intra breve tempus præprimis in mor-

morboſo ſtatu effluere poſſit. Aretæi ſententiam, quod bilis etiam in ventriculô ac inteſtinis generari poſſit, in *Ephemerid. noſtris* tuetur Cl. Hartmann. Sed an etiam virides, nigras dejectiones bili adſcribemus? In hanc aliquis induci poſſet ſententiam ex eo fundamento, quod in anate & plurimis avibus, veſicaria bilis viridis ſæpè, hepatica, nigra & plumbea inveniatur. Sanè poſtquam ex foro Medico aduſtio illa bilis flavæ, per quam in porraceam & æruginofam abeat, proſcripta fuit, communi quaſi ſuffragio excepta ſententia eſt, quod à ſucco pancreatico, vel lymphâ acidiori mixta cum bile porraceus & Iſatodes color exſurgat. Et de acido quodam, ad hanc mixtionem concurrente, vel ex eo aliquis ſuſpicari poſſet, quod ab infantibus, in quibus acidum, cui Harris tanquam fundamento omne morborum infantilium genus ſuperſtruit, ejuſmodi dejectiones prodeant, quæ ſæpiſſimè acidum ſpirant, & in pelvi æneâ efferveſcentiam excitant. Favet huic ſententiæ omni ex parte hoc, quod fructus horarii, dyſenterix fontes, facile in ventriculo aceſcant, & ejuſmodi dejectiones gignant, obſervante etiam Bontio *de Medicin. Indor. lib. 3. c. 6.* Apodicticum fermè hujus rei argumentum ſuggerit Cl. Graſius de Succo Pancreatico, qui, cum in vivi canis inteſtino duodeno humorem ex atro viſcentem inveniſſet, unâ cum ſucco pancreatico, falſo, acido & limpidò, cupiditate incenſus reſciendi, quænam æruginofi hujus coloris vera cauſa eſſet, cum in veſiculâ bilem coloris ordinarii offendiſſet, oportune ſpirit. vitriol. ei immiſcuit, quo ipſo colorem ex atro viſcentem produxit. Sed id prætereâ etiam notandum, quod in malè affectis corporibus, in veſicâ fel deprehenſum, colorem rub. ceraſorum aterrimorum repræſentans.

§. 5. Quoniam verò ſedes etiam ſanguinolentæ comparent, ſcrutabimur, quo pacto ſanguine tingantur. Atque hîc communiter vaſorum in inteſtina hiantium eroſio ſeu diabroſis ab acri & mordaci ſupponitur, i. e. capillarium Venæ portæ vaſorum, quæ intimæ tunicæ telam contexunt dilaceratio ab humore inteſtinorum parietibus infixio fieri creditur. Neque perfractè negavero, ita aliquando rem habere. Multò tamen magis vero ſimile eſt, quod excuſſo per vehementem & impetuoſum fibrarum motum muco oſcula vaſorum intimæ tunicæ, in maximâ utique copiâ, ut diximus immerſa, ſanguinem hunc plorent. Eam rem apertè confirmat anatome mulieris cujuſdam, quæ à ſumpto pharmaco, in enormem ſanguinis vomitum inciderat, & Parcîs inexorabilibus ex hâc vitâ diſceſſerat, à Clariff. Wartono celebrata. Is, cùm in cavitate ventriculi non nihil ſanguinis reſtaret, dorſo cultri, ut penitus rem inſpiceret, interiorem tunicam deterſit, quo factò, innumera ſanguinis punctula in ſuperficie deterſa, ſenſim comparuère, ipſa quoque tunica cruenta viſa fuit, nec tamen ullum, vel ruptæ, vel exeſæ venæ veſtigium præſto fuit. Id, quin ſimili modo in dyſentericorum inteſtinis fiat, ambigendum minimè eſt. Si dixeris, in enormi ſubinde quantitate ſanguinem etiam nul-

lis fœcibus mistum effluere, eum verò osculis illis nullo modo excidere posse; Respondebo cum Glissonio, hæc puncta numerosa æquivalere eruptioni sanguinis, sive è vase rupto, sive exeso. Confirmor in hac sententiâ vel inde, quod in febribus malignis, ubi de torminibus ventris ægri quærule non erant, aliquando viderim per multos dies ex intestinis in largâ quantitate, sanguinem rejectum; nullis hæmorrhoidum vel externarum vel internarum signis, quem difficile est, ex alio, quam hoc fonte, osculis, inquam, illis, derivare. Deinde cogitandum & hoc, quòd vascula illa per transitum muci, (nam eum ex parte hinc fluere dixi) dilatentur, ac ita dilatati, accedente isto irrequieto motu, omninò copiosius sanguinem fundant. Ruyschius *epist.* XI. etiam ex glandulis, quæ meris vasorum protractionibus consent, effusionem sanguinis fieri statuit.

§. 6. Hæ dejectiones, quas breviter hætenus descripsimus, per motum intestinorum spasmodicum diriguntur, utique ad excludendum id, quod in intestinis est peregrinum & quod sanguini infusum, huic latici enormem esset allaturum noxam. Motus enim spasmodici ad exclusionem ejus, quod corpori molestum est, ordinariò concurrunt. Id cernere licet in vomitu, ubi illæ anxie ventriculi torsiones, ad excutiendam saburram tendunt. Dolores illi partum antecedentes, quid sunt, nisi spasmodicæ uteri contractiones, ad excludendum fœtum, directæ? Manifestò quoque in negotio hæmorrhagiarum hoc ipsum experimur, spasticæ enim contractiones, tractiones, pressiones, rigores, modò in his, modò in illis partibus, pro diversitate hæmorrhagiarum, circumspectis Practicis non possunt esse ignotæ, his verò ipsis principium movens sanguinis expressionem molitur, id quod in sequiori sexu multò manifestius in impedito mensium fluxu apparet. Acutissimi illi dolores calculi, spasmodici sunt renum, ureterum motus, quibus calculus ex corpore propellitur. Cùm ergò intestina & intestinis connexæ partes in dysenteriâ spasmodicè moveantur, fanè & heic oportet eundem subesse finem & exclusionem fermentescibilis ac putridæ istius materiæ in intestinis hærentis, ne sanguini mixta, turbas cieat, intendi admodum probabile est. Ac id tantò magis fit verisimile, quia, ut absterfio, & ablutio intestinorum sit major, tot humores concurrunt, & ne sanguini quidem ipsi, propter conservationem totius, parcitur. Quod ipsum dum agens in corpore nostro, quanto potest conatu, exequitur, effugere sæpè non potest, quin instrumenta motûs, scilicet intestina, ita violentè torta, damnum incurrant, ac sibi invicem impetuosè crebro allisa, partes quasdam deterant, quod pelliculæ & fibræ fœcibus permixtæ satis testantur. Conf. Rolsinc. in *Consil. Med.* l. 7. *consil.* I. p. 663. Et hæ pelliculæ ac fibræ utique sunt Hippocratis ramenta *sect.* 7. §. 67. Imò malum eousque aliquando invalescit, ut carunculæ exeant, *sect.* 4. §. 26. de quibus consulendus Martian. *ad sect.* 4. *Aphor.* 76. p. m. 453.

§. 7. Licet verò enixè rerum suarum fatagat Movens corporis nostri, sine suo tamen subinde excidit, quod fit, dum fermentescibilis illa hactenus in intestinorum voluminibus conclusa materia in sanguinem penetrat. Huic immixta, ut, sine dubio, subtilissima est, & forte instar halitus, latici huic sese insinuat, quia præcipitis efficaciae putredinosæ est, sanguinem in mixtione suâ turbat, ut jam superius diximus, novum Præfidi operationum omnium in corpore nostro, laborem creat ac necessitatem affert excitandi febrim, ut hæc noxia materia è corpore emoveatur. Cum verò illa fuerit ingressa per intestina, per illa ipsa natura iterum expulsionem tentat, adeoque feбри hâc fluxus dysentericus augetur. Neque tamen facilè hâc viâ, propter miasmatis ejiciendi subtilitatem, voto damnatur. Imò, si dicendum, quod res est, in novas molestias incurrit. Nam dum ad arcendum hostem, in intestinis latentem, vel in massa sanguinea oberrantem, concurrente motu tonico, ab acutissimo Stahlio ingeniosè detecto & explicato, sanguis ad intestina congeritur; facilè in angustissimis illis vasculis ac tenuissimis poris intestinorum pars quædam sanguinis in motu suo intercipitur, partim quia major adest sanguinis copia in illis angustis, quam proportio pulsuum sequentium iterum in motum concitare potest, partim, quia fibræ continuo isto motu debilitatæ laticem in vasorum cavitate contentum excutere nequeunt. Stasin hanc sanguinis sequitur inflammatio, cujus certum indicium præbet sensus iste satis acutus lancinationis & puncturæ, quæ cum pulsus subsultu exactè convenit. Ratio verò manifestè persuadet, quod hujus inflammationis sedes præcipuè quærenda sit, non ut vulgò putatur, in intima intestinorum tunica, sed potius in extimâ. Circumspectè enim factæ tincturarum injectiones docent, quod arteriæ densissimè, non in intimâ, ut vult Blancardus, sed in extima tunica, ramificentur, in his verò arctissimis tubulis, sanguis facilè in motu suo, ut modò dictum est, impeditur, atque ita inflammationi materia præbatur. Cui sententiæ etiam hoc patrocinator, quod post mortem non semper pus in cavitate deprehensum, sed sæpe inter tunicas ipsas visum fuerit, manifesto argumento, quod in extimâ tunica coeperit inflammatio. Accedit & hoc, quod capillaria venæ portæ vasa, intimam tunicam perreptantia, sanguinem in intestina evomant, præprimis sub spastico intestinorum motu, adeoque sanguinis stasi proximæ ad inflammationem viæ locus non sit. Quo ipso tamen minimè excludo ab inflammatione medias intestinorum partes, quas rami venæ portæ pervagantur, cum & in his sanguinis circulatio sufflaminari queat.

§. 8. Præfente inflammatione novus labor succedit, & alio ex fundamento uberius sanguis ad locum affectum dirigitur, nimirum, ut frequentiori & celeriori sanguinis appulsu, grumi illi subsistentes, resolvantur, & perpetuo attritu discutiantur, quod ad summum intra 7 obtinetur dies. Si huic negotio aliunde obstacula ponantur, transprimitur quidem sanguis ad distensionem usque partis & sensum ardoris, ut hoc calore putredo inhibeatur, & ex-

oriens tenuis & acris corruptela, quæ sese facile diffundere suevit, abstergetur, sed tùm relinquuntur nihilominus crassiores & terrestres partes, quæ in pus abeunt. Atque sic satis apparet, quod inter tres exulcerationis vulgo allegatas causas, primaria, imò juxta Walæum frequentissima, ac, nisi nos omnia fallunt, unica causa sit inflammatio, ac proinde minime facimus cum illis, qui in enodandis ulcerum causis vel acidos vel falsos vel lixivos humores allegant; imò & ab iis dissentimus, qui acres & corrosivos succos ulcerum causas esse prætendunt, quia, ejusmodi humoribus non suppositis, manifestè declarari potest, quomodo in sanguine poris partium infixis, tenerrimæ sulphuræe portiones, intestino motu à crassioribus avulsæ, impetuosè que comotæ, crassiores attenuent & penetrantiores reddant, tandemque auferantur; ex sulphurearum autem istarum absentia caloris remissio ac in album conversio ac consistentia densior consequatur. Nec verò ulla causa erat Holterhoffio, cur ejusmodi exulcerationem cum Helmontio, cujus sputum lingit, in intestinis locum non habere assereret, quod dogma meritò explosit Rolfinc. & quod de difficultate curæ obvertit Holterh. exempla multa refellunt, tùm præprimis illud, quod recitatur in Zodiacô Gallic. *A. 1. Mense Majo observ. 2.* Deploratus est status, cum dolor quidem non adeo intensus & lancinationes rariores sunt, ac grumulus, sanguinis loco impactus, in putredinem degenerat, quod fieri solet in majoribus inflammationibus, ubi sanguis affluens suo attritu & vibratili transpulso cruoris subsistentis partes in motum ciere, aut putredinosas partes abraderi non potest, sed potius suo accessu inflammationem & corruptionem auget. Subtiles enim & acres partes putrescentes sese citò multiplicant cum sphacelosâ partis corruptione.

§. 9. Febrim, quæ cum dysenteriâ est conjuncta, comitantur ordinaria febrium symptomata. Appetitus dejectus est. Nec enim consultum providæ naturæ visum, cum jam farrago putredinosæ materiæ in primis viis præstò est, eam novis accessionibus locupletare. Sitis, tùm ex crebris sedibus oritur, tum expirationem illam fervidam per frequentem necessariò sequitur. Somnus sensu caloris atque torminosis ac spasmodicis doloribus interrumpitur. Succus ille, quo os & lingua unâ cum faucibus obsidetur, ejusdem cum mucilaginosâ materiâ, originis & conditionis videtur esse, nisi quod lymphæ majori ex parte originem debeat. Aphthæ, quæ instar flosculorum candidorum, summis faucibus, & linguæ lateribus adhærent, sæpè etiam palati linguæque superficiem occupant, imò & totum aliquando œsophagum, ita, ut non facile vel fluidi quicquam præterlabi sinant, oriuntur ex humore, per capillaria in glandulosam oris, œsophagi &c. tunicam exposito. Halituum concursus ad earum generationem, non ex toto negaverim, quâ de re evolvi potest observatio Pechlini *LXXI. lib. 1. observ. Medic. Physic. p. 190.* Efflorescentias istas sinistri esse ominis, facile patet, quia extremum conatum naturæ videntur significare, per emunctoria quævis particulas illas fermentescibiles expellere satagentis, quod tamen votum suum, ob subtilitatem particularum, lympham spissiore, & tot evacuationibus ferè exhaustam, quæ tamen vehiculum expellendi miasmatis esse debebat, non consequitur. Depauperatæ & spissæ
lym.

lymphæ indicium etiam est, siccitas & æstus linguæ, præ quibus sæpè fissuris hiat, ardorque ille, de quo queruntur miseri, præprimis postquam acida aut acria sorpserunt, ut rectè observavit Scretæ de Morb. Castrens. p. 154.

§. 10. Vomitus sanguineus, qui interdum in dysenteria contingit, non est ejusdem naturæ cum vomitu cruento Hypochondriacis non infrequenti, quo sanguis vel arterias splenicæ, ut vult Hyghmorus, & docet exemplum apud Valverdam l. 6. c. 5. p. 267. vel per propagines venæ portæ imprimis autem per vas breve in p. n. statu, ut autumat Riverius, & luculento exemplo docet Wedelius, in ventriculū effusus, deinde motu peristaltico naturali inverso, cum impetu exturbatus per os; sed sanguis, qui à torminosis ejicitur per vomitum, ex vasis sanguiferis ventriculi excidit, eo ritu, quo declaratum est ex Glissonio in superioribus. Et omninò credibile est, præsto esse in ventriculo materiam acrem, acescentem (ut compertum est, fructus horræos in ipsâ concoctione facile acorem contrahere) & putredinosam, ad quam ejiciendam ventriculus spasmodice contrahitur, sequente deinde vomitu sanguinis. Cujus rei signum est, quòd aliquo tempore, antequam dysenteria se prodant, vel etiam suspicio eorum apud Medicos exoritur, ejusmodi homines cholera laborare judicentur. Vidimus verò vomitus tales in iis, quos vis temperamenti ad actiones præcipites & motus pro avertendis noxis promptos inclinât, cujus commatis præcipuè cholericæ sunt. (h) Ructus ipsi præcedunt vomitum, & sicut Hippocrat. l. 2. sect. 2. Epidemior. *ructum acidum in lienteria* bonum esse judicat; ita fortassis nec in dysenteria damnandus est. Vergunt enim humores ad contrariam ei partem, ad quam symptomaticè fluunt, ad eam verò alias ducere jubet Hippocrates. Ejus enim l. c. etiam hoc est; *Dissimilia operari, si vergant sursum elevata, infernè solvere & contraria*. Sic idem Demænetam lientericum helleborò, medicamento sursum purgante, curavit, & sect. 4. §. 12. hoc ipsum nos in *sananda lienteria* facere cupit, excepta hyeme, ubi vomitum in hoc morbo excitare juxta ipsum non licet. (i) Emesi etiam, quod mireris, utitur non tantum in *fluxu ventris diuturno, sed & in cholera*, 5. Epid. quia fortè in eâ majus est, quod infra dejicitur, quàm quod evomitur.

§. 11. Cum vomitu ut plurimum conjuncta est cardialgia, quæ, si rem rectè æstimes, peculiari in motu ventriculi, præprimis vero orificii ejus superioris consistit. Sensus indicat, fieri tensionem quandam fluctuantem & tremulam, quam aliquantò tardius contractio consequitur. Licet verò falsum sit, quod in parte nerveâ & tendinosâ diaphragmatis deprehendatur foramen, quod vulgò appellant sinistrum & majus pro transitu oesophagi, cum duobus nervis, ventriculū petentibus; negari tamen nequit, quod in parte carneâ, seu ad mentem Stenonis, quem ubique Bartholinus in scripto de diaphragmatis structurâ novâ sequitur, in superiore inferioris musculi diaphragmatis, parte, insertionis locus reapse compareat, testante Bartholino p. 19. Quando itaque orificium ventriculi superius spasmo corripitur, septum transversum in consortium trahitur, & respiratio turbatur, centro diaphragmatis nerveo itidem spasmodico

affecto. Et hinc singultus, cujus non causa sed potius effectus est flatus, unde ructus, singultui superveniens, eum ad breve tempus tollit. Motus illi compressorii & constrictorii, quibus fibræ fibris arctius junguntur, & rigidâ tensione afficiuntur, quos vulgo spasmodicos appellamus, una cum singultu in declinatione omninò suspecti sunt. Nam si rem rectè trutines, omninò dicendum, quod indicium præbeant, vel materiæ peccantis in primis viis adhuc hærentis, quam motu illo (qui in singultu evidens est) excutere natura satagit, vel jam in sanguine oberrantis, & eandem in corruptionem præcipitem rapientis. Cum ergo ordinarii motus ad illam ex corpore exterminandam non sufficiant, hi violenti suscipiuntur, ut nimirum ita compressæ fibræ vasa inter illas fibras interjecta arctius stringant & compressi canales humorem contentum ejiciant. Hac enim viâ agens quanquam ut plurimum vane se consecuturum credit, ut, humoribus copiosius ad primas vias directis, peccans materia ex iis eluatur, vel ex sanguine eliminetur. Nisi fortè dicendum, sanguinem sero, per tot dejectiones, exhausto, esse spissiore, ac hinc in motu impeditum, atque adeo propter hanc causam fibras fibris validè illidi, ut attenuetur sanguis & in motum cieatur, quia solo sanguinis motu vel miasma ex hoc exturbari, vel quicquid hæret vitiosi, vel ipso vel humoribus ex eò scaturientibus, abstergi potest, & in genere absque motu sanguinis vita conservari nequit. Sinistri verò eventus hi conatus sunt, vel quia jam corruptio putredinosa in sanguine nimis invaluit, vel, ut innui, ejusmodi materia hunc effectum in sanguine editura, in primis viis hæret, & vires jam ante fractæ sunt.

§. 12. Tenesmi non una causa. Est, cur hîc accusare liceat fæces transientes, quas, per nos licet, acidas, austeras, tartareas, & si hæc nondum vocabula sufficiunt, humores helleborinos, esulinos, colocynthiacos, voces. Cur enim non planè excludamus excrementa prætereuntia, suppositoriorum recordatio facit. Perpendenti tamen mihi, quod hæmorrhoides non ritè succedentes, laboresque pro calculo excludendo, tenesmus sæpè comitetur, causam non æque in intestinorum cavitate quærendam esse, fit verisimillimum. Apertum enim est, quod tenesmus hæmorrhoidalis & nephriticus à spasmodico, ille vasorum hæmorrhoidalium, hic verò viarum, per quas calculus transire debet, motu, omninò dependeat. Et unde spasmus gravidarum derivabis, nisi ab externâ intestini, à distento uterò, compressione & fortè à spasmodicè affecto utero, unde etiam abortus, *sect. 7. Aphor.* Credibile itaque planè est, quod in dysenteriâ à spasmodico intestini recti motu crebra illa desidendi cupiditas oriatur. Ac admiratione planè digna naturæ vigilantia, quæ pro excutiendo, quod peregrinum est, in dysenteriâ totum canalem, qui sub primarum viarum nomine communiter venit, spasmodicè concutit. Dum hoc in labore occupatur, vicinæ partes in consortium trahuntur. Et hinc sanè stranguria, quæ dysentericos aliquando infestat. Nec enim ulla nos cogit necessitas ad sal, nescio quod, acerrimum & simile cantharidum a credini confugere, aut spiritum nervorumque consensum hic allegare, nam affecto intestino, facile patet, vesicam urinariam inde quoque affligi propter

vici-

viciniam & *fibras ad cervicem ejus protensas*, ut rectè Cl. Peyerus *Exercit.* 13. p. 66. notat. Et hæc de potiorum dysenteriae symptomatum causis breviter dicta sunt, alibi, si Deus voluerit, hoc negotium fusiùs profecuturi.

CURA DYSENTERIÆ.

§. I.

IN curâ primò omnium respiciendum ad materiam in cavitate intestinorum contentam, eademque corrigenda, diluenda sive abstergenda est, atque blandè educenda. In eò nobis ipsum corporis movens præit. Hoc enim copiosè eò, quò dictum antea est, modò, humores congerit ad intestina, non alio sanè fine, quam, ut materiam in iis hærentem diluat, emolliat, fluxilem reddat, motum quoque peristalticum intestinorum idem energeticum principium auget, ut eandem ex corpore ejiciat. Cum verò illa materia sit acris, austera, acida, urens &c. manifestum omnino est, hic in usum vocanda esse absorbentia, inter quæ omnium maximè hòc in casu utilitate suâ, sese approbarunt corallia, terra sigillata nostras, crySTALLUS montana præparata, cui non immeritò quondam Crato plurimum tribuit in torminosis infantum dejectionibus, conchæ & lap. 69. præpar. quæ quomodo operationes suas exferant, hujus loci non est docere, cum id abundè executi fuerint Ettmül. Wedelius, & obiter in *genuina curandi febres metho-* do Schelhammer. p. 153. quamvis à prioribus dissentire videatur. Rem hic convenienter expresseimus, fassi cum Wedeliò, humores hujusmodi præcipitanti- bus edulcari, in *Amœnit. Mater. Medic.* p. 69. Temperandi intentione ab ultimâ usque antiquitate decoctum hordei spissius est commendatum. Trallianus, si febris absit, etiam lactis caprini vel bubuli recens emulcti aut cocti usum non absque ratione suadet, quod saccharo edulcoratum aut post absorbentia, aut cum absorbentibus propinare licet. Ubi quidem opportune incidit, quod Boetius *hist. lap. & gemm. Alabastrum candidum pulverisatum* ad scrup. j. cum lactè datum vehementer laudat *lib. 2. c. 27.* Alii juscula vitulina lacti substituunt. Frequenter accommodatis & illis à Wepfero ordinatis ferè æmulis sum usus gelatinis. Ad eundem collineant scopum, qui oleum amygdal. dulc. aut lini, apud plebejos extollunt. His mucidis, roscidis ac, ut ita dicam, pinguibus particulas acres & mordaces materiae in intestinis defixas involvi ac irretiri in propatulò est.

§. 2. Diximus materiam hanc etiam in intestinis stabulantem blandè educendam. Unde patet, abesse debere Vomitoria, quæ cum magnâ violentiâ ordinariò operationem suam exerunt. Nec immerito retractionem materiae ad superiora intestina ac ventriculum tanquam noxium aliquod inde metuit Sennertus. Accedit, quod eò ipsò naturæ motus pervertatur, id quod rarò sine discrimine tentatur. (k) Circumspectæ & providæ curæ Practici est, despicere, an, cum materia ad superiora vergit, nausea ac amarities in ore ad-

L 3

sint,

(k) Conf. Castig. Græbner. nostræ p. 66.

sint, quibus præsentibus alias vomitorium indicari scimus, ex 1. *Aphor.* 21. Hippocratis. Tunc vero ad vomitorium accedendum, imitandusque Mercatus est, qui *peccante pituita salsâ*, ut amat loqui, ab Emeticò non abhorret. Qui purgantia in dysenteria damnant, nec illis materiam ex intestinis eliminandam esse contendunt, inter quos nomen suum etiam proficitur Schelham, in *lib. de natur.* p. 306. in quorum præterea numero sunt Massar., Augerius Ferrerius, si, ut expresse Capivacius & Fuchsius, de fortioribus id intelligant, omnino nostrum assensum merentur. Nam & ob violentiam agendi suspecta sunt, & ob tumultus, quos in sanguine cient, majoremque affluxum materiæ & alias causas alibi commemorandas. Aliter autem de lenioribus, quibus sine magno tumultu materia ad exitum disponitur & sollicitatur, sentiendum; hæc intrepide sanè statim in initio fluxûs dysenterici, cum vires constant, & magnus materiæ cumulus in intestinis latet, nec tamen tantum evacuatur, quantum expediret, exhiberi poterunt, e. g. tamarindi, myrobalani, rhabarbarum, quorum ultimo semper ego quidem usus sum, nec exasperationem illam, quam Frigimelica, Rondeletius, Andrighet, alique hic accusant, observare potui. Exhibui verò tritum citra tostionem in substantia, utut delicatioribus moles minimè grata, nec sapor ad palatum esset. Neque enim prorsus rejicula est Dureti observatio, qui tostum *acrimoniam acquirere*, ait. Celebrissimus Boylæus rhabarb. cum grano uno Laud. opiat. exhibere solitus fuit. De Tamarindis experientiam meam interponere nequeo, an veritas pro *sententia Amati* militet, qui irritantem in illis aciditatem damnat, an *Mercurialis*, cui eò nomine minimè suspecti sint, quamvis, si optio detur, in hujus sententiam ire mallet.

§. 3. Clysteribus etiam omninò locus in educatione materiæ blandâ minimè negandus, eâ tamen lege, ut cautelæ expertissimorum practicorum semper oculis obversentur. Frequens experientia, quæ docuit majores nostros solide eruditos & ad Phænomena in praxi occurrentia attentissimos, non esse *prævaricandum in clysteribus*, & quæ Prævotii est observatio, *affluenti materiæ acri, non nimis esse detergendum*; eadem fida magistra docuit, exesse debere *pulveres*, & juxta Mindererum *olea, propter acredinem*, quamvis Duretus oleum amygdalorum dulc. præscribat, à quo nec Hollerius dissentit, docuit quoque, *is non indendum esse adipem hircinum*, quem *igneæ naturæ esse* vult Mercurialis. Levis, sed non omninò inutilis est illa Prævotii observatio, *alvò posita mox injiciendum esse clysterem*, ne affluente materiâ enema confestim egeratur. Nobis materiam enematum constituerunt hordeum ex cortic. furfur. tritic., flores sambuci, verbasc. vitell. ovorum, sacchar. &c. Pauperioribus suffecit clyster ex furfure in cerevisia coctus, ad imitationem consilii Facultatis Medicæ Hassniensis.

§. 4. Ulterius respiciendum est ad affluxum materiæ versus intestina. Hic omninò videtur esse cohibendus, adeoque indicari adstringentia, sit verisimile. Et certè in ipsò effluxu circa cavum intestinorum, ope adstringentium impediuntur humores. Ut verò appareat, quid statuendum sit, cum

omni

omnis experientia clamet, quod præpostera adstrictio, scaturigo sit anxietatum præcordialium, non rarò in lypothymiam desinentium, periculosissimarum metastaseon, obstructionis viscerum nobiliorum, motuum convulsivorum, meminisse par est eorum, quæ Sect. 2. indicavimus, fieri nimirum *congestionem sanguinis ad intestina*, & *facile inflammationes intestinorum ex hac congestione oriri*. Nam cum in insigni quantitate sanguis per arterias advehatur, facile fit, ut initio quidem in exigua quantitate stagnet, ex allapsu verò continuo augeatur, atque ita pori intestinorum infarciantur, tumeant, ac intensò calore afficiantur, id est, inflammentur, quod in quavis perfectâ dysenteria contingere certissimum est. In administratione ergo adstringentium patet, omnino ea esse eligenda, quæ & *inflammationem discutere* & *illum sanguinis impulsum alio avertere* & æqualem laticis sanguinei distributionem promovere possunt. In hoc censu sunt radix tormentillæ, bistortæ, corallia, bolus armen., terra sigill. ex compositis spec. confect. de hyacynth. ex parte etiam pulvis pannon. rub. &c. Eò etiam nomine laudem merentur cydonia, ac in frigidioribus nux moschata. Nimum, more suo, Agricola tribuit dulcedini aluminis ut & croco martis, in quo consentientem habet Finckium, quibus quidem ex experientia testimonium ferre nequeo. (1) Viri quidem docti, imprimis celeberrimus Rivinus & Dolæus, observantes non illaudabilem sacchari Saturni in externis inflammationibus usum, quem repressione sanguinis stagnantis ope blandæ aliqujus adstrictionis & absorbendo exerit, vires ejus in dysentericis intestinorum inflammationibus periclitati sunt. Me imitantem eventus destituit, & crebriores post usum ejus sedes secutæ cum gravissimis torminibus. Consideranti deinceps attentius & conferenti exiguam quantitatem, quæ interne porrigi potest, facile patuit, vix ex paucorum granorum usu emolumentum sperari posse. An majori accessu succus agrestæ dari possit, equidem ignoro, cumque aliorum experientiæ commendo: ego hæsitationem meam dissimulare non possum, quantumcunque eum evehat Deodatus. Idem sentio de uva querna, cujus encomiastes Encelius lib. 3. cap. 3. §. 109. At non vana sunt, quæ in laudem smaragdi scribit Grems p. 204. & Joann. Hartmann. Si verò inconsulto statim ab initio, ut subinde fit, adstringentia alia admoveantur ægris, non tantum, quæ brevi ante memoravimus, & Rudius metuit, frustra adhibitis etiam diureticis, quæ pro avertendâ ex adstringentibus noxâ à Scholzio laudantur, emergunt damna, sed funesta etiam succedit Gangræna. Norunt experti Chirurghi, quantum in externis inflammationibus damni afferant adstringentia & quam præcipiti gradu gangrænam accersant. Sed & illa à nobis laudata convenienti modo administranda sunt. Tilemannus non frustra monet, *adstringentia ante cibum esse danda*. Et cum experientia edocti sciamus, quantum aeris admissio sinè dubio propter frigus, tonum partium destruens, noceat, nostra illa saltem in *calidis vehiculis* obtulimus ac à *frigidioris potus ingurgitatione* nostros ægros arcuimus. Clysteres adstringentes nunquam, præcipuè ubi inflammatorum intestinorum signa, ac recti præsertim,

[(1) Conf. Castigation. Nostræ Græbnerian. p. 67.

tim, aderant, adhibere placuit, tum quia, ut astringentia, prout brevi ante monitum est, tum ut humida, emollitione suâ tonum relaxantia & calorem necessarium extinguentia, gangrænam mirâ velocitate inferunt. Cæterum in inflammatione hâc intestinorum non deprehendi specialem alicujus & quasi specificam efficaciam, sicut alias in inflammatione pleuræ & membranæ pulmonum semen cardui mariæ, in hepatis inflammatione cichoreum &c. laudabilem vim, etiam nostrâ experientiâ, exserunt. Ausus tamen ego sem abforbentibus, leniter adstringentibus ac discutientibus pulveribus, grana pauca camphoræ addere, mira camphoræ efficaciam, in inflammationibus externis indutus. Licet enim camphorata interna etiam in febribus malignis parcissimè adhibeam, cum tamen hic appulsum camphoræ ad inflammatas partes facile perperderem, libido tentandi animum incessit & eventus ausis ex votò respondit. A camphora sinè dubiò etiam Rabezoard. D. M. & Wedel. vim illam in dysenteria passim deprædicatam à multis & nostris etiam in curis successu nobilitatam, majori ex parte mutuantur. Præterea sciens, quo cum successu chærefolium sanguinem congrumatum discutiat, juscula ex eò parata commendavi & deprehendi, eadem laude suâ minimè esse defraudanda.

§. 5. Ad orgasmum sanguinis universalem compescendum, ac impetum naturæ, sanguinem ad intestina cum motione febrili propellentis, retundendum, utique temperata ex fixiorum numero antifebrilia & diaphoretica, atque anodyna commendantur. Et certè quantum ad posteriora, theriacæ Andromachi laus ex hoc capite maxime diffusa est, compertumque ejus usu plures ex tetrò morbo convaluisse. In epidemicâ Helmstädiensi dysenteria tantum non miracula patravit, testibus ex ore Conringii, Schelhammero & Lentiliò. Theriaca coelestis Hanoviensium præcipuum ingrediens utique fuit pilularum antidyntericarum D. Waldschmidii cum multo strepitu passim in usum vocatarum. Diascordio Fracastorii, licet compositio non sit ad palatum seculi, ex diaphoreticis, adstringentibus & anodynis constans, ea perfeci, quæ sine labe verecundiæ à me narrari nequeunt. Pilulæ Wepfero in colica usitatæ ex theriacâ coelesti succo papaver. errat. & extracto croci multiplici usu nobis probatæ sunt. Species massæ pilularum de Cynoglossâ expectationem nostram fortè ob semen hyosciami non fefellerunt. Panacea Solaris Wildengansiana non contemnendum *pro scopò anodynò satis blandò*, medicamentum est. Helmontius sulphuribus metallicis talem effectum tribuit additque *universam morborum cohortem iis auscultare*, sed genus humanum, quod mireris, dignum possessione hujus medicamenti non judicavit, imò ne definivit quidem, an quodlibet sulphur eâ virtute emineat, & omnes morbos debellet, aut an potius hoc huic, alterum alii morborum generi oppositum sit. Aliorum judicium sit, an Starckeï Angli adeò decantata medicina sit ex illorum número, de quibus ex vero Verulamius: *Spes hominum inflant, deinde destituunt*. Prædictis ego, præprimis mass. pil. de cynogloss. theriac. andromachi & coelesti usus sum, & luculente deprehendi, inanem esse timorem Capivaccii aliorumque ab opiatis abhorrentium & nescio quas noxas metuentium, cum

Rivini

Rivini observationes & locuples Wedelii experientia, Horstius, ac innumeri alii omninò aliud testentur. Verissima sunt illa Sydenhamii *ex pag. 229.* Nec vel minimum incommodi à tam frequenti medicamento narcotici repetitione mihi adhuc videre contigit, quantamlibet noxam inde secuturam comminiscantur inexperti, licet plures noverim, qui in morbo contumaciori idem ad septimanas aliquot continuando quotidie usurparunt; usus, inquam, sum anodynus, quamvis semper, memor moniti Prevotiani, parcè dederim, & quidem antequam signa exulceratorum intestinorum sese proderent. Nam in ulceratione intestinorum dubito, an usus opiatorum conveniat? Nec enim fides hóc in passu deroganda insigni viro Thomæ Minadoo, qui ex opiatorum usu in defunctis *vulnera magis putrida & sordidiora* deprehendit, ut Thonerus *lib. 3. obs. X.* auctor est. conf. Hoffmann. *de usu & abusu medicament. chymic. p. 30.*

§. 6. Præterea ad ipsa etiam intestina, quæ spasmodicè commoveri diximus, respiciendum in cura est; *motus* verò intestinorum nimius, ut & *conjuncta non raro flatulentia* indicat carminativa. Excedentis hujus motus respectu essentiam carminativam Wedelii aut Doct. Michael in dosi exigua cum aliis medicamentis maritavimus. Sed numquid & effluxus sanguinis peculiariter aliquid indicat? Certè V.S. non pauci eò ipsò significari contendunt: Et hi omninò dysentericos ut vulneratos considerant, in quibus ad cohibendum sanguinis effluxum pertusionem venæ eò usque necessariam esse, quamvis in eò humani aliquid eum pati credam, Schelhammerus de feb. statuit, ut salvâ conscientia eam omitti posse neget. Enim verò, si quis perpendat, quò consilio natura ad intestina uberiores sanguinis motum dirigat, quaque necessitate mechanicâ sanguis ex orificiis vasorum excidat, næ! iste cunctanter admodum ad profusionem cruoris descendet. Sanè prudens Sydenhamii monitum in commotionibus sanguinis febrilibus quoad usum V.S. etiam in dysenteria locum habet & hoc tantò magis, quod *sanguis hic non tam ad excretionem heterogeneæ materiæ in massâ oberrantis, sed ad exclusionem ejus, quæ in intestinorum volumine hæret,* ad quam major orgasmus necessario quasi requiri videtur, fervidè & rapidè moveatur. Isti autem sanguinis motui per V.S. frænum injicere, esset naturam in opere suo turbare. Deindè ut plurimum exigua sanguinis quantitas à dysentericis profunditur, ut è paucis illis guttis, quæ sedes eorum mucosas tingunt, magnum metuere periculum, non nisi timidi sit & inexperti. Quis enim ignorat, sæpè ad multas libras sanguinem citra notabile damnum effundi. Sanè Forestus *lib. 13. observat. 14.* locuples testis est de effusis duodecim; de octodecim Matth. de Grad. *comment. ad cap. 35. ad Almanf.* Marcellus Donatus de viginti quatuor, & Amatus Lusitanus, quod penè fidem excedit, de quadraginta libris sine noxâ evacuatis, Testimonium deponunt; ubi sæpenumero per totum dysentericæ decursum fortè non tres aut quatuor libræ sanguinis excernuntur. Proinde non absque causâ Rondeletius: *Nonnulli, inquit, sanguinis missionem imperant, sed sine judicio & utilitate & cum magnâ egrotantium molestiâ &c.* Cæterum, quæ pro V.S. disputantur à Prospero Alpino *lib. 2. de Med. Egyptior. c. 7.* dissolvere non

esset arduum, si disputatoriam arenam ingredi esset propositum, & non sufficeret adstruere propriam sententiam. Si tamen aliquibus V. S. Sydenhamiō aliisque placet, iis omnino cautelæ commendantur, quas Alpin. *p. m.* 25. adducit; vult is sanguinem evacuari debere in dysenteria, *viribus, etate, ac aliis consentientibus, & circa initia, revulsionis gratiâ*, præsertim *ubi magna affuerit humorum copia, aut impetus sanguinis valdè urgeat, aut dolor vehemens observetur &c.* cum quo in plerisque concordant Andrighet, Prævotius, Benedict. Sylvat. ac alii magnō numerō, quæ omnia clarius explicantur à Lamoniere *p.* 117. Ignorare verò me fateor, cur Duretus sanguinem non *ex venâ extremâ manûs*, sed *ex basilicâ* educendum esse præcipiat.

§. 7. Quod si inflammatio intestinorum abeat in ulcus, cujus curatio abstergentia, mundificantia, exsiccantia, consolidantia requirit. Inter detergentia & mundificantia ore assumenda prolixè commendatur lac, serum lactis, saccharum rosat., cui parum licet tribuat Trincavell. & Sylvius, non tamen planè rejiculum est, mel rosat., juscula hordeacea dilutissima cum saccharo rosato, & vitellis ovorum, decoctum agrimonix, & à nonnullis etiam laudatur succus apii. Et quidni liceret in usum vocare, quæ inter abstergentes herbas cumprimis extolluntur, veronicam, scabiosam, hyssopum, hederam terrestrem, marrubium, origanum, ex quibus & decoctiones & fyrupi ac conservæ conficiunt. Confugiunt hîc quoque nonnulli ad acidulas varias, sed quo cum successu, mihi, nonnisi ex lectione, compertum non est. Non tanti sunt, quæ contra mel, saccharum, conservas & fyrupos à Sennertō, Amatō Lusitano aliisque disputantur, ut eorum usum meritò suspectum reddere possint. Tametsi verò passim sulphur, flores ejus naturales & artificiales & ex sulphure parata sub formâ balsamorum, tincturarum, laudentur ob virtutem detergendi, ea tamen in usum in dysenteria nunquam vocavi. Cum crassa intestina ulceribus foedantur, suus etiam clysteribus detergentibus locus. Parari enemata talia possunt ex furfur. cicer. rubr. hord. integro. Deinde, in decoctis dissolvitur aliqua mellis, & sacchari rubri quantitas. Terebinthinam etiam in vitello ovorum solutam addere licet. Nonnulli cupiunt, ut parum urinæ addatur, non malè; nam magis deterget, sed hoc habet incommodi, quod partibus dolentibus minùs amicum ejusmodi enema futurum sit. Ad fortiora abstergentia ut aliquis descendat, non facile auctor fuero, quia est periculum, ne his adhibitis vasa aperiantur & sanguinis fluxus proritetur. Inter siccantia & glutinantia ac consolidantia eminet bolus armena, sanguis draconis &c. In frigidioribus non vulgari cum successu balsam. antiphthysicum Cl. Meibom. eâ intentione datum memini. Doct. Tralles expertus Practicus, gluten, quo Scriniarii utuntur, eò nomine maximè laudabat. Ad consolidationem plurimum alias facere creduntur decocta vulneraria, parata ex herbis, inter quæ eligendæ sunt, quæ magis detergunt, e. g. fanicula, consolida major & minor, plantago, hederæ terrest. Aristolochia rotunda &c. Pertinent huc etiam essentix traumat. Wedelii aliorumque. Non tamen diu eorum usui insistendum crediderim, quin potius cogitandum, *reunionem solutæ unitatis non posse*

posse ullis medicamentis præstari, sed potius esse opus naturæ rebus suis semper invigilantis, imò nec detergentibus & mundificantibus adeò egent illi, quibus in frequenti usu sunt tincturæ, essentiæ, sicuti observatum à me est, nam spiritus vini menstruum eorum omnibus mundificantibus & detergentibus palam facit dubiam.

§. 8. Non vacat corradere illa, quæ communiter tanquam specifica laudantur. Si quis successum eorum experiri velit, evolvat Helmontium, Heurnium, Frideric. Hoffmann. aliosque, in quibus multa hujus farinæ recitantur. Quædam à me tentata, irritò plerumque conatu, sive quod nec in principio nec in statu (ubi vulgò ita dicta specifica præsentio rem virtutem exerunt, cum cæteroquin ab optimis etiam in incrementò nihil læti expectari possit) eadem dandi offerretur occasio, sive quod vana hominum credulitas, ut ferè fit, iis unice pretium aliquod statuerit. Famofum hoc tempore antidyfentericum Ipacuanha est, quoniam verò parum hætenus ex Galliâ, in quam magna ejus copia illata est, ad nostras oras deportatum fuit, futile fuerit ejusdem hic attexere præconium, stolidum verò propemodum de substitutione alterius, cum modus operandi prioris istius adhuc latere videatur, cogitare. Fama etiam increbuit, ut jam ante verbo indicatum, de felici cura dyfentericæ per pilulas quasdam Cl. Waldschmidii, quarum descriptionem orbi erudito non communicavit, non obscure tamen innuit, nisi fallor in *Disp. de theriac. cœlest.* huic illas virtutem suam ferre acceptam. Fortassis non multum differunt ab illis, quas casu 32. describit; componuntur hæ verò ex extractò tormentillæ, theriac. cœlesti & Laudano opiatò, & in hac opinione tantò magis confirmor, quòd videam easdem pilulas à Waldschmidii intimo Cl. Dolæo laudari in *Encyclopædia* p. 495. Tintinnabulum illud Medicorum Burrhus in *Epistola ad Bartholinum* jactat in dyfentericis, nullum esse præsentius remedium *aqua rosar. in quâ aurum aliquoties fuerit extinctum*, sed fides sit penes ventosum auctorem. Nec multum censeo esse tribuendum lintheo in sanguine leporis per canum morsus occisi tincto & siccato ac in vino carptim exhibito, quò dyfenteriam curari prodidit Helmontius Pater.

§. 9. Luxuriant quoque auctores in efferendis externorum ac topicorum viribus. Borellus pro arcanò venditat *argentinae folium plantis pedum admotum*. Brunnerus describit Emplastrum in *consil.* 50. quod ipse vocat efficacissimum, ex *radice tormentill. & micâ panis coctis in vinò vel acetò &c.* Omentum arietinum vel vervecinum præsens ad tormina dyfentericorum auxilium est, ex Doctrina Lælii à Fonte *Consil.* 77 Plura ejus farinæ cumulant Hoffmann. Zimara, Varignana ac alii. Eximiam spiritus vini camphorati utilitatem hîc reticere nequeo ac ex verò laudari videbunt, qui experimentum capere volent. Linthea eò imbuta abdominique singulis duabus horis imposita, acerbissimos cruciatus egregiè mitigaverunt. Cæterum celare nequeo experimentum à me factum. Vocabar ad dyfentericos duos in eadem domo commorantes, quorum alter conclamatus, alter verò ante paucos solum dies in dyfenteriam inciderat. Opportunè recordabar remedii, quod

Franc. Oswald. Gremsius *lib. 2. c. 1. §. 5. n. 74. arboris integr. & ruinos. laudat*, ad comprimendum fluxum hæmorrhoidalem exundantem; & cum analogia obvia sit, institi, ut *sudor morituri linteolo affricatus*, id enim est pharmacum hæmorrhoidale Gremisianum, orificio intestini applicaretur. Respondit eventus ac fluxus remisit. Utut verò hic effectus fuerit secutus, non ausim tamen spondere, eundem semper ope hujus topici obtineri posse, præsertim cum in hoc casu non hoc unum remedium fuerit adhibitum, sed alia interna diligenter in usum vocata. Ea sanè mihi sedet mens, quod commendationes medicamentorum effusæ, quæ tamen credulos miserè ludificant, non aliunde oriantur, quam, quòd adhibitis plurimis remediis ultimo, præprimis si tum demum æger fateatur se sentire levamen, præpostere effectus transcribantur. An idem acciderit viris Cl. Michaeli & Langio eximias virtutes, in sanandâ dysenteria, Colcothar. adscribentibus, si nimirum super illud dysenterici alvum exonerent, penes doctiores ac expertos sit arbitrium. Sed satis de dysenteria, jam ad nostra redeamus.

Constitutio
aëris Octo-
bris, No-
vembris &
Decembris,

(m) Initia Mensis Octobris æstivâ amœnitate nobis adblandiebantur, & à Novilunio ad primum Cynthiæ quadrantem nos demulcebat sudum, quòd reliquis hujus mensis diebus, ventis, nebulis ac pluviis sæpè obscurabatur, donec (liceat nobis cum Claudiano loqui) Luna denuò nasceretur Mense Novembri, ubi iterum benigniori aëris temperie exhilarabamur, sed ad breve tempus, nam primus Lunæ aspectus, ad plenilunium usque rigido frigore horrescebat, quod quidem iterum minuebatur, ac insigniter remittebat, sed, ut tantò major vaporum copia ex terrâ humidâ ascenderet, ac crassiores inde nascerentur nebulae, sæpè propter admixtas exhalationes sulphureas, tetrum spirantes odorem, ac nubes à ventis hùc illuc agitatae, donec in pluviam fatiscerent. Nam, ut pulchrè Joh. Cleric. *l. 3. physic. c. 2. p. 240. Pluviarum matres esse nubes satis constat, cum non pluat, nisi nubes in caelo conspectæ sint.* Sed hoc obiter. Sub exordium Decembris, tempestas varia ac inconstans erat; circa medium Mensis, & anno in finem vergente intensius frigus dominabatur.

Febris
quartana.

In Octobri, præter febres tertianas cum insigni dolore nuchæ conjunctas, & continuas, quas comitabatur cephalalgia contumacissima, cardialgia & vomitus tussisque ferina, quâ, notante D. Grassio & Pauli, lumbrici ejiciebantur, etiam quartanæ occurrebant. Horis pomeridianis homines melancholici temperamenti ac segnioris naturæ, qui jam ætatis provectoris erant, adoriebantur, aut etiam febres malè curatas, aut diarrhæas ab empyricis suppressas, sequebantur in cujusvis temperamenti & ætatis hominibus, ne infantibus quidem & pueris exceptis. Rigeant plerique, non pauci etiam horrore concutiebantur, simillimo propemodum ei, quem percipiunt, qui in intentissimo frigore versantur. Æstus ut plurimum mitis per aliquot horas durabat, non sine notabili languore, & artuum dolore, & hypochondrii sinistri tensione & gravitate. Aliqui ad somnum propendebant in paroxysmo, citra incommodum ullum, ac illi, qui eum arcere gestiebant, vix vertigi-

vertiginem & dolorem capitis effugere poterant. Primos paroxysmos raro sudores sequebantur. Pulsus, ferè in omnibus, debilis erat, & alvus adstrictior. Etsi verò, juxta Hippocratem, morbus sit securissimus, tamen ut plurimum diuturnitate molestus est. Vero non respondit commune illud effatum, quòd quartana annua fiat, quæ jam per sex septemve menses afflixit, ut nec veterum illa assertio, quæ vult, unum hominem quartana per vitam bis non corripi. Nos certè, post Wierum, exempla sistere possumus eorum, qui ter quaterve quartanâ laborârunt. Falluntur etiam illi, qui fiducia recepti itidem canonis: Instanti Solstitio vel æquinoctio, finiri quartanam, blandâ suos ægros in confinio ejus temporis constitutos spe lactant. In curâ V. S. non adhibuimus, nec in principio, nec in progressu morbi, etsi nobis minime esset ignotum, quod Riolanus habet de quartana per V. S. in saluateria institutam superata. Suspecta quoque sunt hæc Edmundi de Mearâ in examine Diatribes Thom. Willis. de Febr. p. 105. verba: *In diuturnarum vero intermittentium progressu, secus, quàm dicit Willisius, postquam sanguinis massa tot paroxysmorum conflagrationibus & inquinamentis incanduit & computruit, nihil sanguinis missione salutaris, ut cuilibet experiri promptum est, & ego tum in multis, tum præsertim in Filio primogenito Illustris Arundelii &c. expertus sum, quem sanguine bis detracto à quartana liberavi, quæ biennii ferè spatio Clar. Medicorum operam, eluserat.* At parum abest, quin hic Mearam cum Lowero in vindicatione Diatrib. Willisii (p. 117.) ita compellemus: *Quis credet diuturnam quartanam unico phlebotomiæ remedio curatam fuisse. Id quod nemo, præter Te, unquam Medicus se præstitisse scripsit, aut, opinor, credidit. Verùm hoc tibi & Patienti fortunâ meliori quàm praxi contigit, ut morbus aliam ob causam, cæli fortè, aut anni mutationem ultro desierit, nec sanguine intempestivè detracto juvenis febrem hydrope aut cachexiâ mutaverit: Certo enim certius est, hujusmodi affectus, & non raro mortem ipsam, febricitantium phlebotomiæ nimis seræ frequenter succedere.* Hactenus ille. Vomitoria in robustioribus adhibita, ad evacuandos pituitosos ac biliosos humores, acidasque cruditates, in ventriculo contentas, aliis lenissimè evacuantia, diebus à paroxysmo liberis, data. Admodum conveniunt pilulæ ex g. *c. querc., g. galban., extr. cent. min., rhabarb. myrrh. select. & aloë. Egregio cum fructu datum est infusum ex rad. gentian., cichor., herb. card. bened., cent. min., absinth., capill. vener., fol. trifol. fibrin., summ. fumar., absinth., fl. cent. min., fibr. helleb. nigr., rhabarb. agaric. trochisc., & sale tartari. Et sanè, quod aperientibus & suaviter evacuantibus non obtinetur, vix ac ne vix aliis viis consequimur. Laudantur ab aliis diaphoretica ut remedia, quæ & circulum lymphæ & sanguinis redintegrent, vigorem conservent, miasma fermentificum febrile per poros cutis dissipent, insuper simul absorbendi ac præcipitandi vim habeant; at verò hoc extra dubium est, quòd sub paroxysmum cum regimine exhibita, vertigines & dolores capitis inducant, ne febrim ullo modo tollant. Adstringentia etiam ab initio non temerè delinimus, multo rerum usu edocti, quod icterus niger, hydrops, asthma, febris lenta &c. hac viâ facillime subsequantur.

Ita potius in usu dictorum aperientium & evacuantium ad tempus aliquod perstitimus, aut, si delicatiores fastidirent amaros potus, elixir antiquarium Wedelii ex extr. card. bened., absinth., plantag., cent. min., rut. scord. aa. c. spir. sambuc. &c. paratum, dedimus interpolatis, pro circumstantiarum ratione, etiam salibus volatilibus & præprimis * moniacalibus. Deinde verò impetu febris quodammodo fracto, corticem Peruvian. ad quem malo consilio statim ab initio nonnulli confugiunt, porreximus, & hoc pacto febrim plerumque subjugavimus. Ast satis frequenter contingit, ut feбри jam sublata circa consuetum paroxysmi tempus, ægri languidiores sint, ac propendeant in somnum & sæpè etiam rigeant, quo in casu martialia, e.g. pulv. cachect. Q., tinct. mart. Zwelf. cydoniat. Wedel. ipsa etiam limatura mart. alkoholifata &c. profunt. Nec opiata hic prorsus exclusimus. Specifica illa vulgò celebrata e.g. fel ranar. exsicc., quod, nisi fallimur, etiam laudat Cornarus, cor leporis in tres æquales partes divisum, & in vino albo datum, quod ipse Crato noster celebrat, aliaque ejus farinæ omnino vanis, superstitiosis, ac anilibus medicamentis, de quibus legenda Celeb. Rivini *censura Medicam. officin. cap. 5.* annumerari debent. Radix asari in quadratis ac agrestibus corporibus usum aliquando habere potest, sed quo jure à Strobelbergero, tanquam summum specificum extollatur, in propatulo est, cum operatio ejus lippis ac tonforibus nota sit. Externè sinistro hypochondrio resolventia & aperientia, e.g. empl. de g. *c., de cicut., carminat. Sylv. &c. nonnunquam applicavimus. (n) In diætâ, vino ægros ditiores non interdiximus, sed moderatè hausto, memores exempli illius, quod in Barclaji *Argenide l. 3.* recitatur, nec experientiæ suffragio destituitur Kergerus noster, qui tanquam præsens remedium & arcanum in quartana vinum commendat. Conf. Guarinon *Cons. 1.* Cautè tamen hîc mercandum, nam & noxæ exempla præstò sunt. Ita quidem in quartanâ duplici, malvaticum bibens, feбри ardentissima oppressus periit, alius quoque Rhenanum in copia ingurgitans mortuus est, apud Forest. *l. 5. in observationis novæ scholio.* Ideo nunquam fuerimus auctores, ut copioso vino quisquam vomitum excitare conetur ad profligandam quartanam, ne fortè, qui periculum amat, in periculo pereat, & cum saburrâ humorum animam ipsam evomat.

Legimus Sylvium, Batavorum Æsculapium habuisse aliquando in votis, ut plerosque morbos in seipso experiri posset, dummodo exinde sanâ mente reconvalesceret, ut de hominum affectionibus in proximi commodum constantius judicare, morbosque certius depellere posset. At verò tantam miseriam quidem nobis non optamus, unde cum Wilhelmo ten Rhyne, qui hæc refert de Sylvio, in descript. Febris Cardiacæ à semetipso passæ, ostentationem quandam hic subfuisse suspicamur. (o) Illud tamen nostrum est desiderium, ut docti Medici, morbos, quos ipsi patiuntur, accuratè describant. Colluctatus est Collega noster D. Samuel Graßius eo tempore cum lumbagine scorbuticâ, quidnam verò in eâ observaverit, præmissâ descriptione temperamenti sui

ac

(n) conf. Castigat. nostræ Græbnerian. p. 70. (o) ibid. p. 69. 70.

ac generis vitæ, hisce differit verbis: Nactus sum à Deo, Naturæ Authore, temperamentum sanguineo-cholericum, à Parentibus verò meis, à primis incunabulis, indulgentius habitus, nec feverioribus diætæ legibus adstrictus vixi unquam. Admodum puer, infelici fato, lapsus in cellam, unde aliqua tertiæ & quartæ vertebræ lumbaris luxatio, sine omni corporis vitio & deformitate obtigit. Ex ephebis egressus, cum probè scirem illud Socratis, in Theæteto, *habitum corporum ab otio & quiete destrui, ab exercitationibus vero & motibus conservari*, & præclarum sive Hippocratis, sive Polybii scitum, *Hominem, qui comedit, minimè sanum vivere posse, nisi laboret*, ad gymnastica exercitia, animum horis subcissivis, applicui, ac *ἰππασίαν*, quam Galenus l. 2. de tuend. valet. c. 2. inter reliqua gymnastica exercitia minimè infimum locum obtinere ait, præsertim, cum amor sapientiæ ad exterarum avocaret gentes, amavi. Medicinæ sacris initiatus, totâ vitâ observavi illud Celsi: *Sanus homo, qui & benè valet, & suæ spontis est, nullis obligare se legibus debet, prodest nullum cibi genus fugere, quo populus utatur, interdum in convictu esse, interdum ab eò se retrahere: modo plus justo, modo non amplius assumere: bis die potius, quam semel cibum capere, & semper quam plurimum, dummodo hunc concoquat*. Semper quoque, haustu vini delectatus, gnarus, quod vino alantur vires, sanguis & calor hominum, stomachusque recreetur, appetentia ciborum invitetur, ac utilitatem vini æquari vix non Deorum potentia posse, ut Asclepiades pronunciavit, teste Plinio lib. 22. c. 1. ac præterea à praxi respirans, & hodiè adhuc, candidos candidus compello ex Athenæo: O! amici, Dii vinum fecere beati, ut curas animi pellat mortalibus acres. Ebrietatem tamen semper detestatus sum. Concupitum, juxta aureum illud Celsi, neque nimis concupivi, neque nimis pertinui. Rarus excitavit modò corpus, frequens (dum adhuc bulliret sanguis) ita fuit, ut corpus non solveret. Fluctibus iræ sedandis, non semper fui par, non tamen arduum mihi, illos componere motus. Ita vivens, anno ætatis 30. dolorem gravativum in regione lumbari sentire cœpi, qui cum prodromus ultimi paroxysmi fuerit, ejus indolem, breviter, describam: Incurvato, & paululum inclinato, ad dextrum imprimis latus, corpore, gravativus, circa regionem hepatis, & diaphragmatis, dolor observabatur, cum interceptione spiritus & retractione testiculi dextri, ut diutius in hoc corporis positu persistere, vel pro lubitu corpus erigere, minimè ex voto, nisi post intervallum, potuerim. Artus, veluti in medio confracti, & ut paucis multa complectar, ulcerosâ lassitudine, quasi contusi erant.

Pronum & supinum decubitus æquè tolerabam interdiu, & noctu, evigilans tamen, languebam. Novilunium plerumque infestum erat, adeò, ut aliquando, furente gravativo illo dolore, stupor pedum invaderet, & in plateâ ferè confidere necessum habuerim. (p) Secus ac Simon. Paulli uxor, quæ super ponte versatili & sublicio pergens glacie obducto & lubrico, lapsa est, posteaque in hemicyclo plicatili federe solita, cum surgeret, de dolore lumborum conquesta est, ut testatur Simon Paulli in digress. de febb. malign. §. 53. p. 81. Interea

(p.) conf. Castigation. Nostræ Græbnerian. p. 70.

terea tamen appetitus semper viguit, ac nunquam non ὁρῶσαδι fui, nisi quod 26. anno ætatis febre tertianâ scorbutica decubuerim, & coryzâ frequentissimè molestatus fuerim, quam tamen, si diutius urgeret, post 3 vel 4 dies, hauſtu generosioris vini disculſi. Somnus item & placidus, &, si labores conceſſerint, longus, fovit corpus, quod facile ad sudores fuit. Alvus quotidie reſpondit, urina quoque copioſior, ob largiorem potum, fluxit citrini & rubelli coloris, cui aliquando ſabulum commiſcebatur ſcorbuticum.

Mentis commotiones, (quibus in principio enormiter, in progreſſu languidè indulgeo,) præprimis ira & rancor, malo fomitem præbuerunt.

Humidum aëris pondus, & variationes turbidas, moleſtiſſimas obſervavi. Sudum verò & frigus intenſum, dolores iſtos nimium quantum demulſit. Si quando tamen ventriculus laboraret, ei ſuccurri eſſentiâ abſinth. c. in vino generoſo ſumpta, quandoque emetico eundem evacuavi. Renes & vaſa meſaraica, liquore tartari tartariſati deoppilavi. Et ſic ſatis commode vixi, uſque ad anni 1699 Menſem Octobris, quò manè ante ſeptimam horam, cum ſurrecturus, forte fortunâ vacillante pede, in lectum pronus præcipitarer; Nam tùm diſtortâ paululùm cervice, ſubitò tantum cerebri motum expertus ſum, ac ſi, aperta futurâ ſagittali, cerebrum pyramidaliter inſurgeret, ſimul eodem momento, per longitudinem ad occiput devolveretur. Adeoque in proprio corpore invictum adverſus Highmori ſententiam, qui cerebro omnem motum adimit, mihi oblatum eſt argumentum. Et quamvis hinc cum Fernelio, Bauhino, Riolano, Mercato, Sennerto, Plempio, aliisque concludere nolim, quod cerebri ſubſtantia jugi conſtantique agitatione, cordis more moveatur; intimè tamen ſenſi in memet ipſo, quod ex ſe & ſuâ ſponte motum arteriarum ſequeretur, id quod in capitis vulneribus, in quibus cerebri ſubſtantia, ſuperioribus oſſibus ac meningibus cæſim ablatis, conſpicua evadit, etiam ad oculum patet. Conſideranti rem hanc exactius, occurrit, per lapſum, vaſa ſanguifera quodammodo fuiſſe compreſſa, cum autem ex calculo Malpigh. de cerebr. p. 118. ſi cum corpore univerſo fiat comparatio, dimidia, aut ſaltem tertia pars ſanguinis, ad caput feratur, atque hic reſluxus per lapſum eſſet inhibitus, vehementior exarſit motus, qui etiam impedimenta removet. Hic motus, cum ad ſpinæ principium progredederetur, brachium ſiniſtrum tremere incipiebat, hinc quaſi fracti artûs languebant, funiculusque ſpinæ dorſi contractus, extensionem ipſius & artuum negabat, ut ſedere ac incedere nequirem, (*ſicuti ille apud Gabelchoverum cent. 2. Curat. 78, qui ſubito corripiebatur tanto dolore lumborum, ut nec erectus ſtare, nec decumbere poſſet. Aliorum vero judicium eſto, an hinc cum Salmutho colligi poſſit, quod in ejusmodi caſu, materia aliqua vel in venam cavam, vel in arteriam magnam protruſa ſit, Cent. 2. obſerv. 77. p. 96. & Clariff. Lindanus in ſelect. Med. Exercit. 6. videri poſſet huic conſentire, cum & ipſe à tenſione arteriæ per lumbos deſcendentis originem doloris petat §. 72. p. 178. Certè jam multis temporibus recepta ſententia eſt, materiam à capite ad partes inferiores deſerri per venas arteriaſque, mediante ſanguinis circulatione, ſed & longe antiquioribus ſeculis obtinuit opinio,*

opinio, humorem collectum, inter cranium & meningem, per spinalis medullæ foramen, inter membranas medullam involventes, ossaque spinæ, & velamina nervorum derivari posse, tum ad alias partes, tum ad lumbos, ita, ut substantiam medullæ & nervorum non subeat; alterutro modo lapsa sit, ex superioribus ad lumbarem regionem, materia necesse est. Non ignoro quidem, quondam etiam in acroateriis Medicis traditum fuisse, quod per suturas, inter cranium & pericranium, itidem materia quædam exoneretur, & sub cute, in partes inferiores, cervicem, scapulas, maxillas, &c. propellatur, ac tandem alicubi in articulationibus obhærescat, sed parum probabilitatis hoc dogma habet) sequebatur horror & frigus intensissimum, cum repetitis vomitibus, & dolore, circa os sacrum, maximè gravativo, quem sudor profusissimus ad primam usque pomeridianam comitabatur. Videbantur enumerata symptomata remittere, lumbago tamen urgebat continuo, corpusque erigi vetabat. Appetitus planè prostratus erat, somnus tamen languentes artus recreabat. Cumque alternis diebus, symptomata hæc, & intendi & remitti observarem, febrilem motum subesse auguratus sum. Hinc, sumpto emetico, ventriculum à sarcinâ liberavi, & cephalicis stomachicisque, intermixtis antiscorbuticis, morbum debellaturus (non omissis extrinsecis nervinis) parum tamen profeci. Urinæ permanebant rufæ, claræ & insigniter tinctæ, appetitus aderat nullus, pulsus erat frequens, & paululum durus, caput tamen liberum & serenum erat. Hinc, cum cæteris, in largâ quantitate devoravi Electuarium Chinatum, ubi intra septimanæ spatium, urinæ præcipitatæ magnam copiam lateritii magmatis fundebant, originis tartaræ testem, quamvis alias minimè insolens sit, lumborum afflictionem tolli urinâ tenui crudaque affatim emissâ, cujus rei exemplum extat in Tulpio l. 4. observ. c. 28. p. 338. & seqq. Remittebant tendinum tensiones, lumbaginis dolor gravativus evanescebat, appetitus cum viribus redibat, & Deo laus! sanitas pristina sequebatur, eoque felicior, quod nullus alius succederet morbus, quemadmodum legere est in *Miscellan.* Smetii l. X. lumbalem ejusmodi dolorem, accedente totius abdominis subitaneò tumore velut tympanitidis (vid. p. 543.) evanuisse. Quod verò maximè me molestabat symptoma, erat obstructio pertinax alvi, quam pilulis laxativis solvere tenebar, cumque jam scybala exitum quærerent, sphincterque ani se laxare vellet, in contrarium idem à dolore illo lumbari retrahebatur, tanto quidem furore, ut in aëra exilire cogerer. Hisce tormentis per dimidiam sæpè horam excruciabar, donec inter mille dolores & sudores, inflexo corpore, mox ad dextrum, mox ad sinistrum latus, facibus exitum procurarem. Non verò est absque omni periculo intensior ille nifus, in reddendis recrementis, nec sanè Doctiss. Marsil. Ficinus, frustra apoplexiam vel epilepsiam hinc metuit, in opere de sanitat. studios. & nisi fallor, exempla probant, quod facile ex tali conatu venæ & arteriæ in plexu choroide rumpi queant.

Huic de lumbagine historiæ jungere nobis liceat, peculiare ἀπορίσσεως καὶ ἐκκρίτιν genus, quod aliquoties in corpore suo expertus est D. Maximilianus Preus, itidem Collega noster. Accipe autem lector ex calamo ejus historiam:

Naturâ ita ferente, Choleric-Melancholicus, ut vocant, proclivis subinde sum, ad congestiones seu tumores criticos subaxillares, instat furunculorum, aut bubonum quandoque benigniorum, inflammatos & suppuratos tandem, idque occasione utplurimum Motûs & incallescenciæ sanguinis ac spirituum notabilioris, seu ex ira hoc fiat, vel balneo, seu ex vini tantillo excessu, aut æris mutatione vitioque epidemico, vel miasmate aliquo morbofo, inter tot Ægros, Nosocomii potissimum curæ inspectionique meæ commissos, forte suscepto, & postquam reliquos corporis Mæandros, una cum sanguinis massâ liberè impuneque pervasit in carne musculosâ glandulisque subaxillaribus circa flexuram & summitatem intimiorem brachii sitis (ex frictione lotricis, quantum recordor, violentiore aliquando cum panno asperiore, sub balnei usu læsis, hincque magis fortè atonis, tortuosis, compressis & angustioribus factis) hærente ac nidulante, ibique, prægressis aut junctis utplurimum symptomatis febrilibus, pruritum initio intolerabilem, postque fricationem hinc vix evitandam, exigua mox tubercula duriuscula, aliquo modo acuminata, profunde factis interdum sita, ad ovi tamen columbini magnitudinem successivè excrescentia, modò unum, modò plura, excitante, cum dolore ardente, ruboreque & scititate primum ingenti, usque dum per humectantia, tepida, emollientia & maturantia, tùm emplastra scil. diachyli, meliloti & spermat. ranarum, tùm massam è farinâ, melle & pauxillo cepæ albæ sub cineribus assatæ, tùm cataplasmata desuper ex speciebus emollientibus in lacte coctis, tandem mollescant, rumpantur, & pus sanguinemque interdum quoque spissum aliquandiu fundant, donec unguento digestivo communi cum tantillo balsami Peruviani, ceu mundicativo, mediante turunda immisso, emplastroque nigro Tilezii aut diapalma, iterum consolidentur.

Qualia tubercula imprimis tum Fraustadii olim, cum ad Physici munus suscipiendum Vratislaviâ eò proficiscerer locumque sic mutarem, cum morbosa aliquo modo epidemicaque t. t. aeris ibidem qualitate, Martio Anni 1682, & Augusto 1683, sub utroque brachio; tùm Vratislaviæ iterum deinde Anni 1691 mense eodem, & Anni 1699 epidemicâ constitutione Januario Majoque, sub alâ tantùm dextra salubri eventu expertus sum. Simile tamen quiddam Anno inde proximè præterito potissimum, 1698 scilicet, Junio Mense singulari ex causâ occasioneque pariter mihi contigit. Postquam nempe 14 Junii sub vesperam ex balneo, tantillo vini & irâ nonnihil incalueram, nihil tamen morbi inde sentiens, sed benè valens, 15^{to} ejusdem circa prandii tempus, iturus ad convivium quoddam illustre, ad præveniendum vini noxam, accipio pulveris lapidis cancrorum scrup. ij. præter propter in aqua florum tiliæ, ex quo, antequam dimidiis hinc effluerat horæ quadrans, corripior sensu effervescentiæ & rosionis molestæ in stomacho cum nausæâ, sudore syncoptico, horripilationeque & æstu febrili alternis, ita ut convivio interesse haud licuerit, sed lectum petere, tincturæque bezoardicæ temperatioris guttas aliquas in vehiculo prædicto haurire necessum habuerim. Haud diu exhinc cum decubuerim, egregius emanat sudor, cum aucto inde ardore & pruritu insigni (qua-

(qualem & sub initium huius paroxysmi jam aliquo modo senseram) nec non exanthematibus erysipelaceo - scarlatinis per universam corporis peripheriam, brevi tamen iterum exarescentibus, & tumore exiguo, instar parvi bubonis aut furunculi potius, sub axilla dextrâ, qui ad cerasi magnitudinem successive auctus, maturatus, & exulceratus tandem fuit, per remedia superius intimata, cum euphoria & omnimoda subitaque satis judicatione ac convalescentia, postquam pauca insuper bezoardica fixa & balsamica myrrhata internè acceperam. Credo autem à balneo, irâ, paucoque vino, motum jam, naturali aliquo modo intensiorem, sanguini pridie impressum, postero die, occasione lapidum cancrorum, cum acido ventriculi manifestiore viscidioraque intensius effervescentium, sicque stomachi nervos ac spiritus irritantium, magis auctum, hincque effervescentiam febrilem separatoriam heterogeneitatum in sanguine latentium, per peripheriam cutis & vasa glandulasque subaxillares, excitatam, earumque secretionem facta, brevi iterum sedatam fuisse.

Ferax quoque erat autumnus febrium lentarum & hecticarum, quæ Febres succedebant partim *quartanis*, *malè curatis*, & *ut plurimum conjunctum habentibus gravativum dextri hypochondrii dolorem*, *tussim siccam*, *subinde hæc asthma*, *colorem corporis luridum aut lividum* & *flavescentem*, partim *hemorrhagiis*, per astringentia interna & frigida externa, *cohibitis*, partim, *ulceribus renum* & *mesenterii*, porro & *motibus corporis æstuosiss*, post ingurgitatum frigidum potum, unde & coagulationes sanguinis & scyrrhi viscerum, præprimis hepatis, non adeò rarò originem trahere videntur. Peculiariter huc quoque chronica illa febris pertinet, quæ sequitur scyrrhos & tubercula pulmonum; neque prætermittenda, quæ gonorrhæam copiosam excipiebat. Vidimus etiam, qui propter ulcera antiqua & pallida in locis externis sensibilibus contabuere. Licet verò vel ex his judicare, an causam hecticæ Malpighius ep. I. de pulmon. acu tetigerit, scribens: *Hecticam à nimia fermentatione sanguinis oriri, quando nimirum sanguis justo acrior, partes, ob fermentum suum quasi solvit, & fundit, ut foras partium per poros cutis innumerales evolent*; imò manifestissimè potius patet, focum ejusmodi febrium esse vel lentas nobiliorum viscerum obstructions, vel eorum exulcerationes, arrosiones, vel succorum corporis nimiam evacuationem, quam in rem juvabit legere, quæ habet phthisiologiæ Cl. Morton. l. I. c. 3. 4. 6. 7. & 9. (q) Ita vero cum hecticis comparatum est, ut sensim emacientur, & partes solidæ, i. e. fibrosæ, adiposæ, carnosæ pedetentim resolvantur & dissolventur. Et hinc febri huic nomen ἀπὸ τῆς ἐξέως, seu ab habitu, quia in habitu corporis fixa hæret, atque partes solidæ ab ea tentantur & marcescunt. Præterea semper plus justo calent, sitiunt, imprimis tamen acriore calore, post cibum sumptum, aduruntur, facile quoque in sudorem solvuntur, præprimis nocturno tempore, eumque foetidum, ut vel hinc facile sit hecticam ab atrophia discernere. Appetitus solet esse prostratus. Sæpenumero adest quoque tussis rauca, & præterea saliva viscida & glutinosa. In febre illa, quæ tubercula pulmonum con-

(q) Conf. Castig. nostræ Græbn. p. 71. 72.

sequitur, præter calorem vehementiorem, incrementum tabis, seu consumptionis carnis musculosæ notabile, ac flaccescentem ariditatem tussis frequentis & importunæ, sentitur in pectore pondus gravans, cui anhelitus seu difficilis frequens & molesta respiratio adjungi solet, ut optimè notavit ante laudatus Morton. *l. 2. c. 9. p. m. 69.* quanquam nostrum assensum in descriptione tuberculorum vix ei, per omnia, præbere queamus, dum vult tubercula illa esse tumores glandulosos, à liquoris glutinositate vel pori seu ductus glandulosi obstructione ortum suum ducentes, dum vult stagnantem liquorem, in formam gypseam, steatomatosam vel melleam, à naturali partis calore sensim concoqui & propria tamen cystide semper contineri; cum tribus sese potuisset expedire verbis, dicendo, tubercula illa esse expansionem membranarum per materiam seroso-pituitosam, & glutinosam. Multas alii Practici in therapeia hecticæ sibi formant indicationes, nos verò eò collineavimus, ut, quod planè arduum est, causam, per res solventia, mundificantia, & balsamica, tolleremus, & excedentem corporis calorem debite temperaremus, exturbatis acerbis recrementis per absorbentia, lenia diaphoretica, & diuretica imprimis nitrosa, quæ tamen non usu continuo, sed tum potissimum, cum os siccum est, adhibenda, ac profectò illa multis parasangis famosum Poterii antitheaticum post se relinquunt, tandemque dedimus operam, ut corpora vix ossibus hærentia restauraremus emulsionibus ex amygdalis & pineis circa noctem, aliisque analeptis. Vitavimus tamen ineptas illas aquas, ror. majal., pulmon. vitul., ex sanguine suillo, cochleis, ranis &c. quæ Cardanus multos se curasse jactat. (r) Electuarium de passulis mire deprædicat Riverius, sed sine causâ. Ex Electuario resumptivo pauci vires recipiunt; Nec titivillitio emerimus syrupum de testudinibus, aliaque hujus furfuris incondita medicamenta. Conf. Ludovic. *Pharmac. p. 46. p. 333. p. 547.* Sudores nocturni non adeo noxii sunt, ut vulgò creditur, nec ad eos inhibendos usi sumus tinctura vitriol. mart. saturnina, quæ sequenti modo commode paratur:

℞. Vitriol. mart. crud. absque pulverificatione Unc. j.

huic affunde aceti super minium infusi Unc. iij.

totidemque spiritus vini uncias, unde emergit intra paucos dies tinctura summè rubicunda. Hac, inquam, aliisque adstringentibus in hac non facile sumus usi, (imo ex eodem capite non per omnia satisfecit decoctum Zwelfer. antiphthisicum in *Pharmacop. Reg. p. 60.* ab eo descriptum) sed potius, quando sudores illos animus erat refrænare, elegimus pulveres ex spec. de hyacinth., corall., nitro, qui & in diarrhœâ egregie expectationi ac votis satisfecerunt. Inter externa remedia, balnea crebra tepidiora, quibus blanda partium externarum relaxatio fit & congestio ad internas impeditur, non minimam locabant operam. Litus quoque & inunctiones dorsi cum oleis rosarum, nymphææ & pinguedinibus humana aliisque, cum unguentis, resumptivo, rosato &c. non contemnendi usus fuerunt. Ad venæ sectionis mentionem, in gracilibus ejusmodi corporibus & circumstantes & ægri trepidant,

(r) conf. Castig. Græbner. nostræ p. 71.

pidant, imò & Medici ipsi; nihilominus nonnulli nostrum eam in primo hec-
ticæ gradu celebrarunt, probè scientes, quod in ejusmodi corporibus, non
rarò major sanguinis copia reperiatur, quàm in obesīs & turgidis, quod ante
Nos in œconomia sua rectè notavit Doctiss. Charleton.

Inclaruit quoque cura hec-
ticæ per lac, in quam justo severius Ludovici
animadvertit, & non veremur hic cum Celeb. Meibomio in *dissert. de phthisis
curatione per lac* ex §. 27. asseverare; quod *collato morbo, cum suo remedio,
lacte, facile pateat, esse id in ea præstantissimum omnibusque intentionibus sa-
tisfacere, accedente deinde Medicorum omnis ævi lactis usum in hoc morbo
laudantium experientia.* Conf. Ephem. Nat. Cur. Ann. I. observ. 19. Diemer-
brock. *Obs. Med.* 30. Act. Erud. Lips. anno 85. p. 84. in quâ alicujus Gallici
Tractatus de lactis usu compendium exhibetur. Imo ipse Clariss. Ludovici
p. 514. in *pharmac.* fatetur: *se restituisse sub circumspecta lactis adhibitione,
juvenes è venere, vel vinorum ingurgitatione nimia marcentes & tussientes.*
Quo ipso cum Wepfero in *epistola ad Verzascham*, tacitè agnoscat, necesse
est, *divini aliquid in lacte latere.* Id tamen iterum extra dubitationis aleam
positum est, quod, quando pulmones duri, scirrhusi ac tuberculis referti sunt,
lac juvare non possit; cujus rei exemplum DD. Preussius & Helwich in viro
cholicæ constitutionis, post pertinacissimam alvi obstructionem à Medica-
stro & Veterinario quodam drastico medicamento solutam in abscessum in re-
gione thoracis incidenti ac post illud consolidatum contabescente oblatum
fuit. Nam postquam is variis remediis, & imprimis etiam decoctis lignorum,
cum majori damno, quam emolumento usus esset, ac nihil aliud restaret, ad
lac, tanquam asylum confugit, cum audivisset ex Martiano, *antiquitus lac fu-
isse sacram anchoram, & omnium remediorum caput*, & ut tanto liberius huic
curæ vacare posset, auram Vratislaviensem cum rurali amœniori, & turbas ur-
bis cum quiete Tusculani alicujus mutavit, juxta præscriptum D. Helwich, la-
cte victurus & ita robustiores vires acquisiturus; at verò sine ullo fructu il-
lud bibit, propter malè affectos pulmones, quod ex gravi & anhela etiam in
levioris corporis motu, eo quod dura pulmonis apostemata dilatationem im-
pedirent, respiratione cognoscere licebat, atque ita brevi post fato con-
cessit.

Sporadice etiam in Octobri adhuc grassabantur febres Petechiales, sic-
uti puerum quendam, hoc Mense, ea affectum, una cum catarrho suffocativo,
partim bezoardicis, partim laxantibus per epicrasin, & cataplasmatibus pecto-
ralibus emollientibus ac resolventibus D. Preussius restituit. Magnam men-
suum perturbationem in solutis æque ac conjugatis, imò & gravidis hoc tem-
pore offendit D. Pauli. Et his quidem, cum immoderate fluerent, effi-
caciter per V. S. occurrit. Visæ etiam sunt mulieres molam excre-
visse, & supersunt adhuc nonnullæ, quæ fermè singulis annis molam
quandam seu massam informem carneam sine ossibus excludunt, postquam in-
utile pondus cum magna molestia sæpè diu gestarunt. Optandum omnino,
ut certiora essent molæ signa, quibus non solum ab hydrope uterino, flatibus,

Mola

scirrhus uteri, sed & à foetu vero discernere eam liceret. Jam verò ut plurimum, quæ molam gestant, omnia signa prægnantis mulieris præ se ferunt, menstrua retinentur, mammae intumescunt, urget cibi fastidium, nec infrequenter, ut illa apud Bauhinum, vomitibus primis mensibus divexantur, venter indies magis ac magis grandescit, ac os uteri clauditur, cui signo imprægnationis tantum tribuit Panarolus *Pentec. 3. obs 20. p. 78.* ut signa reliqua omnia incerta, fallacia, & vana principio gestationis dicat. Et quam fallax malorum indicium, à duritie tumoris, ab immobilitate ejus, quod in utero hæret, ac pondere & puncturis, quas Crato in abdomine semper, præfente mola, sentiri ait, petatur, norunt Practici exercitati, & cum potissimum inter hæc molæ signa sit *ἀκίνησις*, quis ignorat exempla molarum itidem sese moventium, annotata tum ab aliis, tum à Salmutho? Et quid, si uterus spasmodicè concutiatur, cum mola premitur, quod aliquando fieri, ipse tactus manifestat, annon facile talis motus spasmodicus etiam sagacibus foeminis imponet, ut utero se embryonem gestare credant? Et cum uterus una cum Tubis Fallopiæ gaudeat suis fibris motricibus, ac præterea cum aliis visceribus, ope nervorum ac membranarum, cohæreat, captu non est difficile, quam promptè & in consensum motus rapi, aut alias partes rapere queat, & certitudinem omnem molæ immobilitati ejus innixam, confundere valeat. Circumferuntur etiam alia signa molæ, quibus tamen iterum tutò acquiescere minimè licet. Verum est, quod molam gestantes, aliquando difficulter trahant spiritum, quod ex die in diem deterius habeant, in coitu, dolore, subinde etiam lipothymia infestentur, corpus marcescat; at verò, qui ex contabescencia corporis illa, lipothymiis, averfatione coitus, difficultate respirationis &c. statim infert præsentiam molæ, næ! is gravissimè decipitur. In casu itaque tantoperè dubio, Medicum quàm maximè circumspectum esse, æquum est. At in iis, quæ jam antea sæpius ejusmodi rudia indigestaque corpora exclusere, quales ubique locorum satis frequentes sunt, securius proceditur. Nempè tutò dantur, quæ menses cient, & secundinas foetumque mortuum pellunt, rectè purgantia etiam fortiora ingeruntur, & medicamenta ex sabina, myrrha, croco, castor. borrace &c. usurpantur, omissis vanis illis, testibus, inquam, equorum, quos commendat Rolincius, & fellibus animalium; & parum sanè abest, quin in censum hunc etiam hepar anguillæ Helmontio tantopere laudatum, referamus. Infusis uterinis sua etiam constat laus, ut & sternutatoriis. Externè balnea & infusus ex emollientibus & pellentibus adhibentur &c. Iis, quæ magis depudere etiam pessus, modò non nimis sint acres, & vaginam excorient, admoventur. Nos ferè ita progressi sumus: Cum aliquid sanguinis ex mulieribus stillasset, quod ut plurimum fit non sine deliquiis & anxietatibus, portionem illam sanguinis inspeximus, & affusâ tepidâ examinavimus, ut tantò rectius cognosceremus, an fibrosæ aut laciniosæ partes excretæ essent; His ita cognitis, ulterius perpendimus, an aliqui conatus excernendi sarcinam uteri sensibus sese objicerent, & si vel inquietudo, vel aliæ circumstantiæ de eo conatu nos redderent certiores. Primò omnium corroborantibus usi sumus, aqu. cina-

mom.,

mom., meliss. c., balsam., embryon., dominar. myns., tinct. corallor., confect. alkerm. incompl. &c. hisque non sufficientibus, progressi sumus ad pel-
 lentia, pulverem Augustan. borrac. venet., trochisc. de Myrrh., specif. cephal.
 D. M. quæ debitè remiscuimus, ac maiorem iis vim à volatilibus salibus & ol.
 destill. cinamom., caryophyll., fabin. &c. foenerati sumus, ac in aqu. artemis.
 puleg., organ. montan. &c. ejusmodi pulveres exhibuimus. Externæ par-
 tes inunctæ ol. scorpion., lil. alb., amygd. d., cheiri &c. aquam etiam calidam
 fellæ supponi iussimus, ac si neque hæc operæ facerent pretium, præter ster-
 nutatoria etiam aliquando infusa ex uterinis & purgantibus propinavimus.
 Chirurgiæ auxilium rarius à nostris imploratur, atque hinc apud nos ferè igno-
 ta ratio extrahendi coagulum istud tum per pedem Gryphii à Paræo l. 23. c. 35.
 quàm forcipem dentatum ab Hildano Cent. 2. obs. 52. commendatum. Et sa-
 nè, ut optimè Primerosius, *temerè chirurgiâ non est utendum, nam nisi mola*
ab utero & ligamentis laxata & divulsa fuerit, ac ad os uteri declinet, per in-
strumenta illa chirurgica facile noxa utero inferri, isque lacerari, ac distor-
queri potest. Edita mola, ut vulneratas tractavimus. Semper tamen in
 memori fuit pectore aurea illa Ballonii regula ex lib. I. Epidemior. & Epheme-
 rid. p. m. 57. *cum falsum germen excussum est, ne quiescas, donec pro comperto*
habeas, num aliud restet. Ibidemque providè monitum est, ne in hoc metu
 obstetrices adstringentibus utantur. Et licet uterus onere suo, per rejectio-
 nem ingentium grumorum, semel liberatus sit, frequenter tamen, post men-
 ses, novus labor, ad deonerandum uterum, redit. Non soli sanè Platero ob-
 latum exemplum Nobilis fæminæ, singulis anni quadrantibus, molam eniten-
 tis, sed & hodie frequenter aliis Practicis, atque hinc meminimus, quæsitum ex
 nobis, quomodo mola præcaveri possit? Provide in hac re nos gessimus &
 multa fecimus nostra ex consilio doctissimo Lentilii lib. 2. Miscellan. Med. Pra-
 ctic. Tripartit. p. 530. neque tamen nobismet ipsis satisfacimus, quia veræ mo-
 larum origines nondum ita evolutæ sunt, ut nulla supersit de iis dubitandi oc-
 casio. Magna cum probabilitate asseritur, quod generatio molæ eadem ferè
 mè, quæ polypi, quod *ex stagnante sanguine serosum diffluet, aut abeat cum*
parte magis fluida ipsius sanguinis, fibrosum vero restitet cum mucoso, novis
accessionibus, novi accrescant lobi, calor vero superficiei inducat tunicas. At
 totum hoc non exhaurit. Nos, cum in Republica literaria liberæ debeant es-
 se voces, læsi, aut fauciati uteri fructus, carneas illas excrescentias, hoc est,
 molas, tam diu credemus, quoad rectiora fuerimus edocti ab aliis. Inter
 omnes enim hujus negotii circumstantias, illa est cumprimis notabilis, quod
 fœcundæ sint uteri molarum matres, quæ vel abortivè, (ferè enim plus ne-
 gotii abortus, quam maturus partus exhibet) vel laborioso partu defunctæ
 sunt, vel in sævas obstetricum imperitarum manus inciderunt. Virginum
 molæ sunt aut nugacium figmenta, aut sane massa sanguinea in aqua utpluri-
 mum dissolubilis, nisi fibris sanguinis robustioribus conglutinentur, ac de
 ejus generis molis Horstius, Lindanus, Hoeserus aliique ex Medicis, qui mo-
 las à virginibus edi posse concedunt, loqui potissimum videntur, quæ tamen &
 ipsæ

ipsæ ruptorum inflammati & exulcerati uteri, vasorum quorundam, venerearumque phantasiarum partus sunt, adeò, ut in prophylaxi nihil agatur, nisi ad læsum uterum oculi convertantur.

Occasione molarum, antequam ad Novembrim progrediamur, verbo monemus, quod in metu abortus earum, quæ jam antea foetum immaturum excluderunt, præprimis cum conceptio mox post abortum facta est, non tam cogitandum sit, quod alias ordinariò Medici faciunt, quomodo impendens abortus inhiberi queat, sed severiori ac exacta trutina expendendum, an inhiberi debeat. Atque hinc à vehementioribus adstringentibus seriò dehortamur, cum non desint exempla, ubi per adstringentia ejusmodi miseræ ad molæ gestationem perpetuam quasi damnatæ sunt.

In Novembri D. Preussius in puella quadam prolapsum intestini recti notabilem in Orphanotrophio curavit. Prominebat illud ad 5 digitos transversos per duas septimanas, tandemque sponte tunica interior sphacelata decessit, & reliqua intestini substantia iterum in naturalem situm reducta est, egregiam opem præstante linimento ex mucilag. semin. frigid., lythargyrio, oleoque amygd. d. parato, atque hoc pacto puella integræ sanitati restituta est.

Hydrops
Ascites.

Aliquot Ascitici etiam nostram flagitarunt opem, ac requirit gravitas morbi etiam alio tempore stragem edentis, ut ejus historiam aliquanto diligentius enarremus. Nostri, antequam evidentiora hydropis signa præsto sunt, gravitate quadam & angustia, circa præcordia, ac tensione in hypochondriis afficiuntur. (s) Deinde difficultas respirationis in motu corporis & ascensu scalarum iis graviter molesta est. Quando verò circa mediam noctem, chylus, finita concoctione, cum sanguine miscetur, non tantum dolore, cardialgiæ analogo, torquentur, sed & tam ægrè spiritum trahunt, ut prope à suffocationis periculo absint; Et cum hoc fit, in procinctu tumor est, & singulis quasi diebus abdomen sensim intumescit ac distenditur, ac ante notabilem ventris tumorem, impulso abdomine aut corpore, in alterutrum latus provoluto, murmur & humoris fluctuationem interdum percipiunt. Quibus tandem succedit sæpè stupendus abdominis tumor, & tùm omninò notæ, quibus Ascites dignoscitur, sunt visu, tactu & auditu facillimæ, ut loquitur Aretæus *lib. 2. de morb. diuturn. cap. 1.* (t) Tumor verò non unius generis est, interdum in uno tantum latere cernitur, interdum in utroque, & quidem ita, ut venter quasi in duas partes divisus videatur, aut quasi duos sacculos appensos habeat, interdum verò æqualiter distenditur ab hypochondriis ad pubem usque costarumque fines & extremitates extrorsum pelluntur. Hic verò tumor, quando Ascitici recti sunt, versus inferiora magis vergit, quando verò decumbunt in latere, aqua volvitur ad latus illud, in quo cubant, cum verò supini dormiunt, summus ventris vertex collabitur. Præter hanc abdominis distensionem, morbo protracto, etiam œdematosus in dorso tumor exsurgit. Non solus autem venter, sed & pedes & scrotum intumescunt, licet aliquando à naturali constitutione non recedant. Interdum

(s) conf. Castigat. Nostræ Græbner. p. 72. (t) ibid. p. 74.

Interdum verò intumescencia pedum præcedit, illorumque, ut accuratè Platerus, infimam sedem eminentiorem, deinde eam, quæ in ambitu malleolorum existit, primum replet, inde sensim ad genu usque & ulterius extenditur, maximè in humiliori femorum sede ampliusque excrescit interdum sedente, aut eunte, ægro, decrescit verò nonnihil eo recumbente noctu, impressumque in hoc tumore aliquandiu remanet vestigium, qui, ubi admodum distentus est, splendere & pellucidus non nihil esse videtur. Postmodum aqua in scrotum ex abdomine per processum peritonæi quoque delabatur, illud sæpe ad magnitudinem stupendam distendit, imò vidimus totum colem tortuosum & translucidum, naturalem crassitiem longè excedentem, aquâ ex vicinis inguinis partibus sese inter cutem & carnem penis insinuante. Superiores partes interea exarescunt, ac veluti liquecunt, ut sola cutis, tendines, membranæ & ligamenta vix ossibus hæreant, nisi quod aliquando facies aliquo modo intumescat. Celeberr. Wedelius in *Exercit. Semiotico - Pathologic. p. 138. facies*, inquit, *ut in cachexiâ se habet, ictericum quid sæpè præ se ferens.* Aretæus vultui pallorem inesse docet. Aëtius autem tribuit hydropicis colorem ex viridi albicantem. D. Grassius & Helwich, hydropicam intense rubicundam tractarunt. Præterea adest in corpore lassitudo & torpor, non rarò etiam dolor, ab initio quidem in imo ventre, & coxis, in morbi progressu vero circa laterum inanitates & spinæ musculos, imò non rarò ad jugulum & mammas usque se diffundit. Nonnullis pruritus est molestissimus, aliis scabies infesta est, nonnulli erysipellate infestantur. Aliis maculæ in cruribus & fere mortem denunciant, ut compertum est D. Grassio & Pauli. Pedes tumidi plerumque frigent & albet. Ex iis aliquando transsudat aqua falsa cum intertrigine non sine discrimine gangrænæ. Tales scaturigines aquæ etiam alibi in corpore cernuntur. Uberior verò quantitas ex umbilico dehiscente effundi solet. Nec infrequenter hæmorrhagiâ ascitici vexantur. Accedit ad cumulum malorum etiam continua & lenta febris, sub vesperam potissimum, manifestius se prodens, quæ satis vehemens est, cum hydrops morbos acutos ac viscerum inflammationes sequitur. Pulsus ordinario est parvus, mollis & subdurus, cum aliquâ tensione. Præter hæc etiam alia symptomata hunc morbum stipant, nimirum sitis intensa, quam licet bibendo sedent, statim tamen denuo affligit, & si hic suis hydropici obsequantur desideriis, tumor abdominis magis magisque excrescit. Nam verè Horatius cecinit, quod crescat indulgens sibi dirus hydrops. Licet verò multum bibatur, urina tamen plerumque per pauca meijitur, & ea modo tenuis est & aquosa, modo crassa, lixiviosa & rubicunda. Difficulter quoque sudant Hydropici. Et licet Simecius sudorem hydropicis supervenientem bonum esse dicat, fuit tamen, ubi potius cum Avicenna eum laboriosam dices ægritudinem. Alvus aliquando sese rectè habet, interdum verò segnior est, quod ex Hippocratis aliorumque doctrina læsi hepatis indicium existit. Adest etiam nimium alvi prouvium, & inter initia, quando sine cruditate est, spem recuperandæ sanitatis facit, sub finem verò & cum viscera læsa sunt, mortem brevi secuturam præ-

sagit. Scybala alvi magis ferè cineritia sunt. Sub primum hydropis ingres-
 sum si vomitus superveniat, quod aliquando fit, is utilis esse solet, ac memo-
 rabile hujus rei paradigma legere est in Marcelli Donati *Histor. mirab. lib. 4. c.*
21. sed grave periculum ex vomitibus, cum vires dejectæ sunt, & tanto magis,
 si illi sanguinei sunt, quales vidit Ballonius, instat. Ex præcipuis symptoma-
 tibus inter tria illa à Sydenhamio allegata, est dyspnœa, & sanè verum est, quod
 ferè semper hydropem comitetur. D. Pauli & Helwich curæ suæ commissam
 habuerunt foeminam nobilem, quæ post puerperium incidit in ascitem & ex
 eo defuncta est, abdomine in magnitudinem stupendam propter incredibilem
 aquæ quantitatem post mortem educam, distento; hæc tamen nullum incom-
 modum circa respirationem, etiam ultimis vitæ diebus passa fuit. Appetitus,
 quod penè exciderat, plerumque deficit, imò hydropici nonnulli ad ciborum
 mentionem nausea tentantur, simul ac verò aliquid cibi modici saltem, & non
 flatulenti assumerunt, inflantur & ructus ac distensiones patiuntur, magnâ-
 que præcordiorum anxietate premuntur, cujus rei luculentum exemplum à
 Schenckio *l. 3. observ. Med.* recitatur. Ulterius aut tussis sicca & rauca affli-
 git, aut inane tussendi desiderium excruciat. Sociantur etiam vertigo, con-
 vulsiones, epilepsia, & in junioribus etiam major capitis magnitudo; ut de
 palpitatione cordis, podagrâ, ictero, non raro cum tumore ascitico compli-
 catis, nihil dicamus. Quidam somnolenti admodum sunt, nonnulli vero vi-
 giliis molestissimis enervantur. Plerumque experientiæ respondent Progno-
 stica illa Hippocrat. ex *lib. 2. prædiction.* quæ Celsus *lib. 2. c. 8.* latine ita effert:
Aqua inter cutem minimè terribilis est, quæ nullo antecedente morbo cæpit, de-
inde quæ longo morbo supervenit. Utique si firma viscera sunt, si spiritus fa-
cilis, si nullus dolor, si sine calore corpus est, aqualiterque in extremis parti-
bus macrum est, si venter mollis, si nulla tussis, nulla sitis, si lingua, ne per so-
mnium quidem, inarescit, si cibi cupiditas est, si venter medicamentis move-
tur, si per se excernit mollia & figurata, si extenuatur, si urina, & vini muta-
tione, & epotis aliquibus medicamentis mutatur, si corpus sine lassitudine est,
morbum facile sustinet. Siquidem in quo hæc omnia sunt, is ex toto tutus est,
in quo plura ex his insunt, is in bonâ spe est. Hactenus Ille. Aqua, quæ in
 abdomine dissecto post mortem reperitur, non unius generis est, sed ut cum
 Meibomio loquamur, aliquando observatur planè liquida, aqueo tantum co-
 lore, sine sapore; Interdum mucilaginosa quid habet, & igni admota, in gela-
 tinam abit. Sæpius autem ad flavum nonnihil inclinat, urinæ naturali similis
 vel lixivio, non colore tantum sed etiam sapore, quandoque viridis conspecta
 fuit, & spumavit quoque. Interdum verò materia adest, in stupenda quan-
 titate melli liquidiori aut syrupo dilutiori similis. Ubi quidem obscurum
 minimè est, quod hæc aquosa colluvies sit vel è feri laudabilis seu humoris
 lymphatici, aut etiam ipsius chyli, vel feri excrementitii prosapiâ. Prioris
 censûs est illa mucilaginosa & gelatinosa, posterioris autem generis lixiviosa
 ista &c. Non tantum autem gelatinosa illa textura de scaturigine vel origine
 istius testatur, sed hoc quàm maximè, quod corporis reliquæ partes contabe-
 scant,

scant, hæc enim contabescencia evidens præbet documentum, partes illas emarcescentes substantiâ alibili privari, eamque alibi in cavitate quâdam deponi, & hoc modo tabescentibus subtrahi. Nec est dubitandum, quin hydrops subito ob enormem in diætâ commissum errorem cum extravasatione chyli conjunctus sit, nam hoc dulcedo & suavitas materiæ stagnantis extra controversiam ponunt. Quod verò & serum excrementitium, motu ejus turbato, hydropem producat, loquuntur exempla apud Plater. *l. 3. c. 3.* Holler. *l. 1. de morb. intern. c. 39.* Dodonæum *observ. 34.* In hydropico Harlemensi post mortem dissecto deprehensus est ren sinister totus in putrilaginem abiisse, dexter ureter calculo obstructus, atque adeò urinam in abdomen sese effudisse, teste Clariss. Borrichio *Cent. 4. epist. Med. ep. 17. p. 76.* Quod insensibilis transpiratio quoque cohibita ad hydropem disponat, evincit exemplum apud Blankardum *Cent. 1. obs. 19.* Magis in hac sententiâ confirmabitur, qui perpenderit, nobiliorum in hydrope viscerum atonias, obstructions, corrugationes, indurationes scirrosas, exulcerationes, fissuras aliasque corruptelas, quibus motus lymphæ ad profusionem hydropicam usque impeditur; qui consideraverit vasorum laxitatem, rupturas &c. & ab altera parte excretoriorum, præprimis autem viarum urinariarum læsiones & vitia. Pleni sunt Practicorum libri de morbosis viscerum constitutionibus, ex quibus multa, singulari diligentia, congestit quondam Celeberr. Conring. in *dissep. de hydrope Ascite à §. 35. usque ad 39.* diligentissimus Theophil. Bonetus in *Sepulchreto l. 3. sect. 21. à p. 1033.* alique pro lubitu consulendi. Hæremus verò adhuc dubii, quasnam satis frequentis apud nos hydropis causas procatacticas nominare fas sit. Aliquid confert aër crassior, & crudioribus particulis gravis, dum poros occludit, liberam transpirationem impedit, & serum in corpore auget. Magis adhuc ad hydropem disponunt cibi satulenti & crudi, quibus non pauci delectantur. Fructus horræi malè audiunt apud Ægidium Euth. in *agonism. de hydrop. p. 38.* Allii esum etiam noxium esse, credit Tulpus *lib. 2. obs. c. 35.* Omnium verò maximè, nisi prorsus fallimur, abusus generosi vini (vid. Aristot. *l. 3. problem. 5.*) & cumprimis spiritus ex eo, ac frugibus parati, qui si aromatibus acuentur, aqua vitæ, cum rectius aquæ mortis dicerentur, jejuno ventriculo, intemperanter haustæ, in Ascitem præcipitant. Hæc fundi nostri calamitas est, hinc illæ lachrymæ. Atque utriusque ferè sexus delitiæ sunt, & privatim apud mulieres, variâ arte certatim confici solent, ut cum Listero *Exercit. Med. de Hydrop. p. 3.* loquamur. Nimirum internas ventriculi fibras sive villos, spiritus hi exedunt, ipsumque viscus inflammant, unde chylus crudus & lentus conficitur. Hoc modo rem habere, ostendit usus spiritus vini Chirurgicus, quando ad luxuriantem in vulneribus carnem depascendam ab artificibus adhibetur. Sæpè sanè attoniti stupuimus, quomodo in tantâ hi spiritus quantitate ingurgitentur, cum illo tempore, quo ex libris Arabum apud Mutinenses, modus eorum ex vino corrupto conficiendi, ad medicamenta ejus ministerio paranda, innotuisset, vix ultra guttam biberetur. Non diu verò intra hos terminos hominum intemperantia sese continuit, fo-

mitem subministrante avaritiâ. *Erat scilicet aliquando per totam Italiam copiosissimus vini proventus, ut Mutinensium vinorum, quæ Venetis vendi solebant, cum debiliora cæteris essent, nec emptores invenirent, bona pars corrumpere. Hinc Mutinenses aquam vitæ ex iis destillabant, quibus vina, nondum corrupta, sed quæ vendi non poterant, miscuerant, atque ut majori copiâ conficerent, bis stillatam, non sine lucro vendiderunt. Veneti, cum intelligerent, metallorum fossores in Germaniâ potu tali indigere, qui vigorem & calorem corporis conservaret, venalem illis potum mittentes, magnum inde quæstum confecerunt. Mutinenses postea majori copia, cum vino abundarent, aquam vitæ stillarunt, cum bonorum vinorum pretium ex eo crescere viderent, ut narrat Alexand. Tassonus, *Pensieri diversi*, l. 10. c. 26. & ex eo Celeberr. Morhofius in *epist. ad Clar. Langelottum de Metall. transmutat. sect. 11.* Dum vero passim in circulis & familiaribus colloquiis ingentes pateræ circumferuntur, quotusquisque est, qui cum Callisthene respondeat: *Nolo bibere, ut Æsculapio indigeam?* Aquas palustres & stabiles Hippocrates de aer. aqu. & loc. itidem culpat. Nec minus etiam suum confert symbolum hoc, quod nostri satis sint incuriosi & negligentes circa excernenda & retinenda, atque non adeo raro fiat, ut excernenda è corpore diu satis retineantur, & retinenda in magna quantitate excernantur. D. Pauli & Helwich nuper habuerunt exemplum dispositionis hæreditariæ ad Ascitem in foeminâ, adeo nati paternorum malorum sunt hæredes, atque sic patrum in natos veniunt cum semine morbi! Præterea cum apud nos sit tanta Medicastrorum multitudo, quanta Romæ muscarum, cum maximè calet, dissimulare minimè possumus, nos in eâ esse opinionem, quod per præposteram febrium, dysenteriarum, diarrhæarum, coeliacæ affectionis curam ab illis, qui, illotis manibus, sacra Medicinæ tractant, non pauci in hydropem conjiciantur. Nam inde sanè est, quod æquè frequenter apud nos & foeminæ & viri secus ac apud Anglos fit, teste Sydenhamio in libro de hydrope, laborent, & nulla fere ætas sit, quæ non huic malo obnoxia vivat. Illud tamen multiplici experientia confirmatum est, quod facilius in hunc affectum ruant, qui calidioris & siccioris sunt constitutionis. Ipse Medicorum Princeps Hippocrates in Coacis, non obscure insinuat, *biliosis accidere hydropes*, id quod & Fernelius passim in consiliis, & omnium diligentissime Guarinius notavit.*

In curatione primo ad continentem tumoris ascitici causam, aquam in cavitate abdominis, p. n. contentam, respeximus, eamque evacuare sumus conati, deinde in illo occupati fuimus, ut causam, ob quam aquea hæc colluvies in abdomine collecta est, & unde adhuc in cavum depluit, tolleremus. Et tantò diligentius enitendum est, ut aqua illa educatur, quia non tantum magnæ molestiæ ab illâ ægris inferuntur, vis medicamentorum infringitur, viscerum tonus destruitur, sed & quia jam corruptelam passa est, nec ulla apparet ratio, quâ iterum in vasa reduci queat; accedit vero & hoc, quod ipsa natura nobis hæc in educatione præeat sæpè in largam diarrhæam, umbilicum ruptum, vesiculas excitatas in pede, serum è corpore effundens, ac ægrum liberans. Quem

in finem in principio morbi, dum ægri adhuc essent *ὑσπλαγχοι*, paracensin aliquando rarius tamen instituimus. Censemus autem abdomen esse aperiendum acu subtili, tereti, cannulam exilem subintranti, vel solâ cannula ex argento aut chalybe ad latera perforatâ, & acumen ex chalybe cannulæ ferminatum habente, quibus pungitur abdomen & aqua educitur, quod inventum Thouvenotio debetur. Ad illam enim visceribus læsis & viribus morbi diuturnitate attritis, intestinisque corruptis, sese accingere, propemodum est gladium jugulo admove, nam & gangræna in parte eâ, in qua sectio facta est, consequi solet, notante Ballonio 2. *epidemic. p. 203.* & Thom. Fieno *Chirurg. tract. 6. cap. 2.* & licet hæc non sequatur, paulò post tamen fere vitâ excedunt. Non nescii sumus, quod scarificationes, vesicatoria, setacea, seroti perforatio & ustio, aliquando usum præstent, & scarificationem Collegæ nostro D. Acolutho feliciter cessisse in molitore, probè recordamur; tutius tamen fore, ne gangræna aut sphacelus excitetur, hæc omnia omittuntur. In morbo confirmato ob respirationis difficultatem, nulli etiam fuerimus Auctores, ut emetica, cum Sydenhamio Asciticis ad educendam serosam colluviem, promiscuè propinet, quàm difficillimè enim vomunt, quia forte muscoli abdominis nimis tensi, cooperari labori debite non possunt. Aliquando tamen vomitionibus magna aquæ quantitas effusa est, & ægri convaluere, ut ille apud Forest. *lib. 19. obs. 32.* ac Listerus à Magisterio veneris, succo ebuli, & elaterio, vomitum notavit cum euphoria in ægris 6. 7. 8. 9. 10. 13. 14. Tentari rectius ergò poterit eductio stagnantis aquæ per diuretica, resolventia, aperiencia, diaphoretica & discutientia. Equidem tenue satis est auxilium, quod posteriora, tum interna e. g. decoctum lignorum, tum externa, ut balneum Laconicum, præstant: Et facillè fieri potest, ut calidiora ejusmodi medicamenta, majores viscerum obstructions inducant, quod incommodum etiam Platero cognitum fuit. Interim, quia ipsos poros quodammodo aperiunt, locum aliquando invenerunt, præprimis minus calida, & sine regimine data, nisi quis malit frictionibus eadem intentione uti. Experientia docuit, quod ex usu diureticorum interdum abdomen detumuerit; sic mulierem hydropicam per urinæ fluxum sanari vidit Rondeletius c. 36. *Method. curand. morb. lib. 2.* Ex pulvere bufonum, ab uxore sibi dato, maritus, magnam aquæ copiam per vias urinarias exoneravit, & liberatus est, teste Sollenandr. *sect. 5. cons. 15. §. 19.* & Wiero l. 3. *de præstigiis demon. c. 35.* Nos itaque sine anxio examine, quomodo ex abdominis cavitate per vesicam exterminari possit, diuretica reliquis medicamentis interpolavimus. Ex his elegimus potissimum lixivium ex salibus alkalifatis vegetabilium, ac in hoc imitati Mynsicht & Welschium sumus. Tartari crudi efficaciam laudat D. Oehmb. Succus petroselini itidem prodest. In salviâ agresti, seu montana specificam illam vim à Mayerne laudatam deprehendere minimè potuimus, eam tamen nihilominus cum aliis, liniariâ, daucô, genistâ, bacc. juniper. cynosbat. &c. vino infudimus. Nitrosa omnium fermè sunt optima, quod simul etiam sitim sedent; maximè in illâ hydropis specie, quæ febrim conjunctam habet; nam tum calidiora illa grave

afferunt damnum. Est etiam, ubi tuto millepedes, lumbricos terrestres, & ipsas cantharides sub debitâ circumspeditione, adhibeas. Ingenue confitetur Bartholinus *cent. 4. epist. 14.* quod variis salibus, lixiviis, decoctis, aquis, pulveribus, hydropicorum aquas per vias urinæ aliquoties tentaverit educere, sed non nisi semel in juveniculâ successerit.

Summa præcipuè spes est in hydragogis, & certum est, quòd rarò admodum sine his hydropici restituantur. Inter initia lenibus, crebrius repetitis, quibus mercurium d., non sine causâ, à Mayerne laudatum, admiscuimus, agimus, deinde ad fortiora descendimus. Nobis ex his in usu sunt resina giap., G. Gotte f. de Peru ad gr. IIX. c. ol. destill. caryophyll. & mucilag. tragac. in form. pilul. D. Grassius & Helwich ad 14. gr. hydropicæ dederunt sine ullo ferè effectû. Nec elaterium tantum præstat apud nos, quantum ei Listerus ac alii tribuunt, perfrequenter illud adhibuimus nullo ferè cum fructu. Aliquantò est efficacius Euphorbium c. cortice frangulæ, extractis balsamicis in dosi moderatissima exhibitum. Iridis succus, quo vulgus nostrum utitur, fauces adurit. Luna hydragoga, in cuius laudem & Angelus Sala, & Illustris Boyle *de utilit. Philosoph. experiment.* & Willisius, multa scribunt, non implet semper spem tantis elogiis de se concitatam. At vero minimè hæc drastica conveniunt malè constitutis internis visceribus, nam, cum præsentissimo damno exhibentur iis, qui vel phthisi laborant, vel aliâ viscerum labe, aut morbo propemodum consumpti sunt. Hominibus tenuioris texturæ ac foeminis etiam, ut plurimum nocent. Et sanè, si candidè verum fateri volumus, non possumus non subscribere fere ex toto Clar. Volckammero Nostro, qui *Decad. I. ann. 9. in Schol. p. 65.* hâc censurâ hydragoga perstringit, quod sint tantæ violentiæ, quæ sanum è statu suo, in morbum, vel ipsam mortem deturbare valeant, & venenis potius quam salutaribus pharmacis annumeranda sint. Eò fere magis miramur, quod drastica ejusmodi sub nomine arcanorum, ab hominibus extra pomœria nostræ artis constitutis, impunè & arroganter, sub spe certissimi ac infallibilis successûs, miseris obtrudantur. Rariora robustioris naturæ exempla, quibus è voto successit talis temeritas, confirmatos reddit hos empyricos & agyras, qui ægrotantium animas mercari didicerunt, ut optimè iterum Volckammerus Noster *loc. cit.* In eo vero tonforiam stupiditatem, & anicularum fatuitatem superant suffeni illi blaterones, quod curam omnem hydropis, solâ evacuatione, per ejusmodi drastica absolvi contendant. O pecora æternum à nostris sacris arcenda! an his vasorum lacteorum lymphaticorumque rupturam consolidabitis? an viscerum obstructions, scirrhus, putrilaginem, purgantibus emendabitis? Unde fando audivistis, quòd cathartici feri extravasationes avertantur, & lymphæ extra vasa stagnans ad canales suos reducatur? An ergo viscera aquæ immersa, & ad soliditatem coriaceam semicocta, vel pure & tabo diffluentia, nihil nisi purgantia vehementiora, ut in statum naturalem reducantur, requirunt? Tantus est horum hominum & stupor, & quæ hujus germana est, arrogantia, ac bruta temeritas, ut non monitis salubribus, quæ alto contemnunt supercilio, ad frugem

gem reduci possint, sed multis, carceribus, à perdendis hominibus mature avocari mereantur. Infamia patrant latrocinia, quoties hi suis vehementissimis purgantibus, mulieres ex mensium suppressione, hydropicas, quas deobstruentibus à sarcina hâc liberare nobis mos est, tractant, quoties ab alio morbo, vix leviter, respirantes, suis secretis (nugis nugacissimis) torquent, cum iis cordati Medici digestivis & aperientibus subvenire possent.

Nos ergo scientes, quod sublatâ etiam aquâ, non tamen Ascites statim curatus sit, nam flebili experientia scimus, quod intra nycthemeron aut paucos dies, perpetuâ scaturigine ad cavitatem abdominis serum confluat, quod laboriosè intra multos inde evacuatum, hinc ad causam, ob quam serum collectum fuit, & propterea stomacho, cuius tonus omnino conservandus, diebus à purgatione vacuis, succurrimus; reliquis etiam visceribus mederi conati sumus aperientibus & appropriatis, ac vel inflammationi, vel scirrhus viscerum debitis remediis. Imò non raro ab alterantibus cachecticis subinde & martialibus curam auspicati sumus. Mercurialia his quoque sociavimus, nec enim vanum est, quod alicubi tradit D. Michaël, quendam hydropicum mercurio d. & bezoard. martiali sanatum esse. Interposuimus antiscorbutica & antihypochondriaca, quæ subtili acrimoniâ viscera extergunt, ac in usu etiam nobis fuit Wedelii mistura antihydrica. Tandem fecimus accessum ad purgantia, modo leniora, modò paulò fortiora. Diureticis usi sumus, cum urinæ essent aquosiores, nam tùm prorsus salia lixiviosa eximii usûs sunt. Interpolavimus roborantia, & alia attenuantia, ac viscositatem resolventia, ex rad. ari, helen., bardan., petasitid., irid. flor. herb. capill. vener., absinth., cent. min., ac carminativ., diaphoretica ex rob. ebuli, sambuc. ac bez. martial. itidem aliquando data. Externa & topica non neglecta fuere. Nec tamen magnus est hydropicorum numerus, qui sollicita nostra curâ fuerunt à nobis liberati, & singulari Dei benignitati potius in his quoque, qui evasere, auxilium & sublevationem tribuimus, quam medicamentorum viribus, cum Valeriolâ l. 1. obs. 2. narrante, quomodo ascitica uxor, congruis à se præsidiis, restituta. Quod nec Aretæum fugit lib. 2. de caus. & sign. diuturn. morbor., ita scribentem: *Ab hydrope perpauci liberantur, idque felicitate quâdam Deorum potius, quàm artis auxilio, manebitque in ævum omne inconcussum illud Hippocrat. de intern. affect. t. 27. Morbus gravis est hydrops & pauci hunc effugiunt.* Et hoc Græci omnes fatentur, qui ipsorum candor non debuisset à Cardano ad prognostic. 1. lib. 2. Hippocrat. suggillari.

Sed quid de V. S. in hydrope sentiendum? Eam prorsus rejicit Ægidius Euth. in agon. de hydrope, sed frivolis prorsus ex rationibus, dum p. 116. ita argumentatur: *V. S. rejicio ἀφ' ὅτι, quoniam homo 1. ad Corinth. 3. v. 16. 17. templum Dei est, spiritusque Dei habitat in eo: si quis autem templum Dei violaverit, disperget illum Deus &c.* Eam contra necessariam existimat Prosper Martianus in Comment. de rat. vict. acutor. p. 327. *Si spirandi adsit difficultas, tempus æstivum sit, ætas egrotantis vigeat, & virium robur.* Et ut dubium, quod facile alicui circa difficultatem respirationis occurrere poterat, diluat,

diluat, ita pergit: *Spirandi difficultas in hydrope duplici de causâ contingere Potest, vel propter copiam aquæ, ventrem inferiorem replentis, quæ diaphragma comprimendo, ejus liberum motum impediat, vel ob tumorem hypochondriorum eodem modo septum transversum comprimentem.* In primo casu, nullo modo convenit V. S.; in altero autem ex mente ejus locum habet. Doctiss. Sponius in *aphorismis novis* p. m. 367. docet, quod in praxi occurrat species hydropis, quæ largo potu, sero lactis, sanguinis missione feliciter tollatur, contra vero solitis alias artibus exacerbetur. Provocat & ad experientiam propriam, dum porro ita loquitur: *Vidimus hydropem viginti curatum V. S., qui ab exhibitis hydragogis & diureticis cujusvis generis, magis ac magis intumuerat.* In numero horum, qui V. S. in hydrope commendant, est etiam Leonardus Botallus in *lib. de Curat. per sangu. mission. cap. 15.* Nam ex ejus sententia, primus ac præcipuus scopus, imminuentis hydropis vitandi aut inchoantis, seu jam concepti curandi est penes ea auxilia, quæ inutilem sanguinis multitudinem imminuunt; conf. p. 214. & seqq. in *operib.* & ante hos omnes in hac opinione fuit Hippocrates & Galenus, hujus hæc sunt in *cap. 5. adversus Erasistrat. d. V. S. c. 5. sæpè spasmus, hydropemque sanguinis evacuatione sum medicatus.* At verò in nostris locis, ubi hydrops ferè semper est soboles depauperati sanguinis, diminuti caloris, corruptelæ viscerum, ac ruptionis vasorum lymphaticorum, V. S. cum summo periculo ægrotantium celebratur, ac apud illas foeminas, quæ ex suppressione mensium, aut viros, qui impedito fluxu hæmorrhoidum in ascitem labuntur, non nisi inter initia cum successu vena pertunditur.

Eodem mense variolæ infantibus erant infestæ. Eas comitabantur aphthæ ac tussis pertinacissima. Adultos febres continuæ cum levi rigore, æstu mitiori, dolore capitis & pleuræ, lumborum & artuum infestabant, sub finem verò notante D. Grassio in remittentes mutabantur, ac diarrhæis quasi criticis, non tamen sine omnibus torminibus, finiebantur. Foeminis solito frequentius hæmorrhagiæ uteri erant molestæ. Longè autem communissima erant apostemata ac ulcera. Ac sæpè sanè quasi manu palpavimus, quod in activioribus natura materiam p. n. è massa sanguinea ad ignobiliores partes protruserit, & excitato ibidem tumore, quem ἀπὸ σαρκὸς Hippocrates passim vocat, id quod visceribus noxam certò allaturum fuerat, cum corrosione partis, quam collectio ejusmodi occupat, è corpore proscripserit. Non tantum autem hoc tempore callosa, varicosa, & sinuosa, ac cum carie ossium conjuncta, aut quæ circa articulos erant, aut partes glandulosas, membranosas obsidebant, ulcera, Chirurgis crucem figebant, sed & alia benigniora in iis etiam corporibus, quæ cacochymicis humoribus non adeo turgebant, aut ex cachexia languebant, difficulter curabantur. Nam & symptomata, singulis autumnis, plura eaque graviora, curam alio tempore facilem, plerumque reddunt difficiliorem.

At verò ordo requirit, ut tandem etiam ad Decembrem festinemus. In eo à nobis spectati in hypochondriacis ac minime raro in mulieribus hysteri-

cis,

cis, tumores circa latus sinistrum. Non paucos miseros vidimus, in quibus ejusmodi tumores molles & fungosi, ferè universam sinistri abdominis partem obsidentes deprehendebantur. Fere autem sub costis nothis incipiunt, & quando supini jacent ægri, lineam albam aut transcendunt, aut proximè attingunt, & vacuum spatium inter costas & spinam illi implent. Hic, ut errandi occasionem vitaremus, soli visui arbitrium non commisimus, is enim imponit, ac inspicientes in eam inducit sententiam, quod peritonæum inter & integumenta tumoris sedes sit, sed manum post intestina clysteribus elota, jejuno ventriculo, admovimus. Tactu interprete non obscure constabit, quod tumefactus lien supra mesenterium, intestina, ventriculi partem, ac in mulieribus supra uterum emineat, ut in illa puellâ apud Fortem *Cent. 3. c. 47.* Initio ferè adsunt citra notabilem actionum læsionem ac molestiam, & loco moveri posse videntur; deinde gravativo & obtuso dolore sunt molesti, ac somnum in latere dextro prohibent, postea uberrima sudoris profusio sub somno illos comitatur. Sensim hæc ingravescent symptomata, & his jungitur crebra narium hæmorrhagia, in aliis etiam oris foetor, in quibusdam superveniunt pedum ulcera. Non citò verò evanescent hi tumores, sed satis diu durant, & nec clysteribus carminativis, aliisque facilè dissipantur. Urina modo est subtenuis, modò crassa & subruffa. Ex hæmorrhoidum internarum fluxu detumescunt, & quidem salubriter, vomitibus cruentis etiam minuuntur, at verò ut plurimum illos funestus excipit eventus. Inter rarissima sanè exempla Thomæ Bartholini Frater referendus, cui non semel per vomitum largissimum cruenti feri lien magnus subsedit, teste Thomâ *Cent. 4. epist. p. m. 54.* Alii largis evacuationibus ejusdem feri, & per alvum & urinam succedentibus, convalescent, quod de uxore suâ l. c. refert Bartholinus. Pristinam incolumitatem, teste Valetio, religiosus, lienis tumore pressus, recuperavit, urinis nigricantibus, atramento simillimis, per 5 vel 6 dies erumpentibus. Icterus & quartana sunt *ἐν τῶν ἐπιγινωσκέντων*. Ex his patet, quodnam ejusmodi tumorum subjectum sit, lienne an intestina? Nimirum quia intestina tenuia & crassa, ac ex his colon præcipuè, eâ parte, quâ ex ampliori cavitate arctius nonnihil constringitur, simulque angulari figurâ ad renem sinistrum deflectit, in hypochondrio sinistro delitescent; in eam aliqui lapsi sunt opinionem, quod scybala in colo, itemque mucilagines acidæ stagnantes, aut flatus coerciti hos tumores forment, cujus sententiæ est Clariss. Ettmüllerus in *disp. de dolore hypochondr.*, at verò omnes tumoris circumstantiæ facilè persuadent, quod in liene ejus sedes sit. Nam qui viscidiorum sanguinem esse, & crassiorum ejusmodi hominum, qui tumoribus hisce corripuntur, perpendit, qui oculos convertit ad ipsum lienem, ac ingentem cellularum, sinuum, quin & venosi ductûs amplitudinem, quæ arteriarum molem & capacitatem longè superat, attentè considerat; qui exactè trutinat, quomodo sanguis ab angustis arteriarum tubulis in cavitates illas impetu adactus in iis necessario aliquas moras agat; qui tandem non fugitive seriem fibrarum in tunicis lienis lustrat, ac motum constrictorium & relaxatorium

Tumores
Lienis.

istius visceris cognitum habet; is certè sine ullo negotio intelligit, quomodo latex sanguineus lentus & spissescens cavernulas infarcire, illas distendere ac distorquere, nimiam moram fibras relaxare, affluenti novo locum præbere, ac ejus generis tumores formare possit. Immerge, si placet, aquæ lienem, ac videbis, quomodo secundum omnes dimensiones, instar spongiæ, aquâ imbutæ, dilatetur, nec amplius erunt incredibiles illæ anatomicæ historiæ, quæ narrant, lienem consuetam magnitudinem aliquando excessisse, ut decem & septem librarum pondus æquaret. Patrocinantur huic sententiæ etiam juvantia, quæ sunt antiscorbutica pleraque & resolventia, e. g. rad. bryon., pimpinell., bardan., vincetoxic., dyptamn. alb., fibr. helleb. nigr., petasitid., herb. agerat., cherefol., scolopendr., epithym., bugloss. eaque omnia, quæ vulgò splenetica audiunt. Thee antiscorbuticum & spleneticum ac melancholicum à Borrich *de usu plantar. indigenar. in Medic. p. 82. § 83.* ordinata, egregium præstant effectum, si satis diu in usu perstiteris. Quod etiam dicendum de gummi resinis, ammoniaco, galbano, myrrha aliisque. His si succenturientur, quæ distensionem & flacciditatem fibrarum respiciunt, ex quò censu primaria sunt ipsa martialia, & salia vol. urinosa, tantò optatior eventus erit sperandus. Inter externa, emplastrum de cicuta, magni facit Bartholinus, ejusque usum continuatum suadet. Nos, inquit, quoque *in emplastro splenetico dispensator. Hassniens.* reliquis cicutam, nicotianam & ebulum adjecimus. Meretur quoque laudem ceratum d. g. *co Forest.

Hepatis
tumores.

Hepatis quoque tumores frequentiores sunt, quàm vulgò à Practicis creditur, quod certè mirandum non est. Quam facile enim obstructionibus obnoxium fiat hepar, est vel ex eo colligere, quod sanguis omnis, à tribus magnis arteriis, coeliacâ, mesentericâ superiori & inferiori ad ventriculum, intestina, lienem, pancreas, & mesenterium protrusus, mediante venâ portæ, reducatur in hepar, & per istud transcoletur in venam cavam. Heic verò cogitandum, quomodo vel minimo negotio 1. quidem ipsa Hepatis substantia, frigore, rebus adstringentibus, à compressione, contusione, ligaturis &c. ita coarctari possit, ut sanguis è finibus capillarium venæ portæ in ultimâ venæ cavæ capillamenta per ipsius hepatis acinos & glandulosos poros filtrari nequeat. 2. Ipse sanguis tartareus, viscidus ac pituitosus, hoc glutine parietibus quibusdam adhærescere & stagnare possit. Ut jam non commemoremus, quomodo plenitudo hujus infarctus causa esse queat. Cujus rei exemplum nuper in aliquo cœlibe victu aromatico & diætâ vinosâ in magnatum conviviiis, singulis fermè diebus uso, omissis corporis exercitiis & omnibus sanguinis depletionibus D. P. & H. viderunt, ac ortum ex hoc tumorem prægrandem manibus palparunt. Nec excidere nobis debet, quòd & biliosi humoris culpâ, si is minus expeditè in pori biliarii oscula pertranseat, ejusmodi obstructio hepatis oriri possit. Quo in casu color æruginosus & quasi ictericus faciem deformat. Enimverò obstructions hæc aliæque similes non possunt non parere tumores hepatis. Interdum totum hepatis parenchyma, ut cum veteribus loquamur, spongiæ instar æqualiter intumescit

intumescit, & hoc tumore affectum hepar in immensam molem excrefcit, ferè autem semper conjunctum habet (præter respirationis difficultatem, ac oris siccitatem, coloris mutationem &c.) tumorem pedum, præprimis dextri, œdematosum, nec ambigendum, quin inflatio illa hepatis sit causa tumoris pedum. Nam, cum nuper ejusmodi tumor in paupere quodam, à balneatore proprio ausu, apertus esset, magnaque contentæ in eo materiæ putrilaginosæ copia evacuata foret, tumor pedis dextri notabiliter remisit, sine ægri gaudio diuturno, quippe qui post breve tempus exspiravit. Id quod semper fit, cum tumores hi in abscessum desinunt. Ex re & vero Raym. Joh. Fortis cent. 3. conf. 58. agens de jecoris obstructione & tumore, *affectus*, inquit, *gravis, nec sanationis facilis, nec magnam ex ordinariâ methodo in ægros utilitatem redundasse novimus.* Succis depuratis cichorei, eupatorii, capill. vener., agrimonie, cuscute, sonchi, absinthii, aliquid præstant, nec prorsus contemptui habenda decocta ex hepaticis parata, in meliorem etiam spem animos ægrorum & medentium erigunt martialia, at verò curam omnem non absolvunt, quod nec expectandum à marrubio albo, quod mirifice extollit Forestus. Inter vana autem referendum hepar lupi, quod tanquam specificum tonicum ad hepatis affectus commendari suevit.

Multis apud nos, præprimis viris hypochondriacis & debili- Palpitatio
tate stomachi laborantibus, ac foeminis mensium inordinatione fatiga- cordis.
tis ac flatuosis, illis in decresciente ætate, post haustum vini largiorem, excessum in venereis, his autem post terrorem, cibos flatulentos, iram, refrigerationem, cor veluti concussum intremis & palpitat. In palpitatione hæc mucro cordis, tempore constrictionis (nam fallitur Valefc. de Taranta, in philon. p. m. 339. signum hujus morbi ponens motum cordis dilatativum) attollitur versus costas, easque ferit, & tantopere quidem, ut minimè rarò sonus concussionis istius ab adstantibus percipi queat. Arteriæ quoque toto corpore pulsant, maximeque distenduntur, ac ex illis ex potissimum, quæ supra jugulum sunt. Si malum mitius sit, vires non adeo prosteruntur, abest etiam animi deliquium, in graviore verò hæc cum aurium tinnitu conjunguntur. Recurrit sæpè affectus ille & per paroxysmos impetit. Non autem necessario omnes hi, ante senectutem, morte præveniuntur, imò toto die occurrunt, qui terminum 50 annorum a Galeno positum, excedunt, aut vel 60 vel 70 annum attingunt. Aliquando præcipiti syncope extinguuntur, nam palpitatio in eam frequenter mutatur. Sæpè παλμὴν præcurrit sensus auræ cujusdam ex hypochondriis vel ventriculo ad cor ascendentis, ructus, borborygmi, & alia flatuum indicia, ex quibus Horstius *decad. 5. problem. 3.* infert, plerumque flatus in hoc malo reperiri; quod sicuti negandum minimè est, ita etiam concedendum, quòd hujus mali causæ multæ aliæ esse possint. Nuper subitanèa morte extinctus, hoc malo per biennium laborans, in cujus corpore post mortem secto, palpitationis causa nulla potuit reperiri, quam inusitata cordis magnitudo. (x) Polypi quoque hujus depravati motus cordis

(x) conf. Castig. nostræ Græbner. p. 75.

authores esse solent, quamvis non semper, præsentī fibrosa quasi textura necessario adsit palpitatio, ut memorabile ostendit exemplum, quod habet D. Graßius in *Ephem. Nostr. Dec. III. an. 5. § 6. obs. 181. p. 423*. Magnā etiam verisimilitudine gaudet Willisii sententia, quæ vult, palpitationis cordis causam proximam subinde esse obstructionem & infarctum vasorum arteriosorum, arteriæ, inquam, pulmonalis & aortæ, quæ à segnitie & crassitie sanguinis &c. dependeat. Imò universaliter, quoties heterogeneum in corpore hæret, dum principium movens ad illud expellendum insurgit, rarò, qui tamen sæpe irriti sunt, conatus expellendi & proscribendi alienum istud è corpore sine palpitatione cordis animadvertitur, quod non solum in variis excrescentiis abundantiori copia aquæ in pericardio, sed & in motu calculi & lumbricorum, molarum &c. ad oculum patet. In paroxysmo profunt absorbentia, e. g. pulvis absorb. Wedel. spec. de hyacinth., cord. temperat., pulvis analept. Minde, rerum cum g. d. & cinnabari debite mixta. Præsentiore ope se commendant volatilia tum oleosa, tum spirituosā, ac in sanguineis & calidioribus etiam acida, e. g. spir. vitriol. volat., perlæ in aceto solutæ &c. Analeptici verò potissimum insistendum. Externè camphorata, crocata &c. dorso & pectori applicata officium faciunt. V. S. in plethoricis robustis vino ac diætā aromatica abusis, diutius durante paroxysmo, locum habet. Augenius credit, quòd applicatione hirudinum ad venas hemorrhoidales magna ægris utilitas præstetur. Si vires desint, ex consilio Hercul. Saxonie ad cucurbitulas veniendum. Extra paroxysmum, carminativa, antihysterica, splenetica, nephritica, anthelmintica, emmenagoga &c. juxta præscriptum & leges artis danda sunt, atque his remediis diutius immorari oportet, ut rectè suadet Epiphan. Ferdinand. *histor. 22*. & in diætā, oleracea, lacticia, decubitus supinus &c. vitari debent. Reperias autem non paucas mulieres, quibus palpitationes, post cibum sumptum, in toto corpore sentiuntur, cujus generis una multarum prolium mater, jam vidua, curis aliisque malis confecta, D. Pauli & Helwich hodieque sub manibus est. Ab Hippocrate vocantur ægri tales *παλμώδεις διόλας*, de quibus alibi ex professo.

Febris catarrhalis.

Phlegmatici & phlegmatico-melancholici inter 20 & 30 ætatis annum catarrho correpti, quotiescunque prioribus 5 diebus ex bronchiis rejectio non ritè procedebat, in febrim incidebant catarrhalem, seu continuam periodicam quotidianam veterum, quam Fernelius, sub titulo *lentæ febris* describere videtur. Typus ejus sequens erat: Post quartam pomeridianam, horrore & frigore levi tentantur fermè per horam unam, succedit calor non quidem vehemens & intensus, sed tantum acris, & aliquo modo mordax, & fermè per noctem durat. Lingua non est aspera, sed albo & lento humore imbuta, non urget magnoperè sitis. Pulsus est frequens, non adeò magnus. Urinæ excernuntur satis tinctæ, ac colorem Aurantiorum æmulantur, & hoc peculiare habent, quod post brevem moram parietibus vitri inducant cutem ex albo rubentem. Lassitudo artuum gravis est. Torquet & anorexia ac agrypnia cum cephalalgia gravativâ, aurium susurro, ut & tussi, quæ tamen nec patientes, nec Medicum terrere debent.

Ali-

Aliquid monstri alunt pleuritides & deliria, periculum autem maximum denunciant anginae & aphthae, si quando, quod fieri solet, cum febris hac complicantur. Inter initia sudor rarior, frequentiores sunt dejectiones alvi, quae sub initium febris impetum minuunt, sub statum verò, si non directe profunt, periculo tamen vacant, nec tamen laxantia multum profunt. Exantlato paroxysmo, bene sunt aegri dispositi, nisi quod langueant. Atque haec fabula ferè per 14 dies agitur. (y) Metuere majus malum Medicus debet, si febris illa singulis diebus non redeat. Doctiss. Ettmüllerus p. 240. in febris catarrhali epidemica Lipsiensi testis est, 1. utilissimam fuisse mixturam ex aqu. sambuc., cardui bened., spir. c. c., sal. vol. succin., & syrup. fl. papav. rhæad., & hanc unâ alterave vice repetitam profligasse febrim catarrhalem epidemicam. 2. Profuisse & pulverem ex succin. ppt., specific. cephalico, bezoard. solar. & duobus granis laudani opiat. Nostræ expectationi, votisque aegrorum magis satisfacere medicamenta, quae pollent facultate resolvendi mucum & salia diuretica commodo tempore exhibita. Experientia etiam nos docuit, quod tumentibus circa 12 & 14 diem, tonsillis, per alexipharmaca aestus intendatur, ac pulveribus nitrosis & cinnabarinis cura felicius expediatur. Quamvis verò ad sudores aegros non compulerimus, non tamen ex re visum, eosdem impedire. Non fuimus adeò rigorosi in diætâ, ut haustulum vini post paroxysmum negaremus.

Cæterum aliæ febres e. g. continuæ periodicæ, ex parte malignæ, per obauditionem & parotides, & tumores glandularum colli, circa laryngem, exulceratos judicabantur, notante D. Preussio.

Nephriticas passiones, strangurias, dysurias & urinæ suppressiones D. Grassius cum aliis Collegis tractavit. Dùm verò hic nephriticas passiones nominavimus, non loquimur cum vulgo, quod, teste Galeno, cum quis urinam cum difficultate reddit, vel etiam omninò reddere non potest, quando lumbos dolet, & mejit arenosa, nephriticum n dicit, (z) nec cum Doctiss. Caspar. Hoffmanno 3. institut. cap. 23. per nephritidem renum imbecillitatem intelligimus, sed inflammationem renum, quam non solum dolor & ardor satis vehemens comitatur, sed & juxta Authorem definitionum medicarum dysuria, fibrosæ excretionis arenosæ cum sanguine aliquo. Quod ultimum tamen, nescio, annon magis exulcerationem quandam renum aut vesicæ indigitet, juxta aphorism. 75. sect. 4. Si quis sanguinem aut pus mingat, renum aut vesicæ exulcerationem significat. Vidimus quidem interdum sanguinem & pus urinæ ita mixta, ut nec sanguis, nec pus, progressu temporis à se invicem separarentur, sed tantum urina, aut purulenta aut sanguinolenta appareret, & rursus in aliis mictu cruento laborantibus, animadvertimus, quòd licet sanguis aut pus, cum urinâ simul exeat, non longè à mictione in parte inferiori matulæ sanguis purus, aut etiam merum pus conspiciatur, in superiori autem parte urina proprio colore cernatur; nihilominus

Passiones
Nephriti-
cæ.

(y) conf. Castig. Græbner. nostræ p. 76. (z) ibid. p. 77.

utrumque hoc urinæ genus, solutionem continui, aut in renibus, aut vesicâ notat indubiè. Quicquid sit, in progressu mali omnino nephritici sanguinem mingunt. Fibrosæ autem illæ excretiones sunt parvæ carunculæ velut pili, seu corpuscula quæcunque, quæ carnis propriè dictæ aut membranarum portiunculas æmulantur, aut rectiùs fibræ sanguinis tenuissimæ, quæ longitudine suâ pilos repræsentant. Illi autem, qui nephritide tum temporis vexabantur, ferè erant sanguinei, & ut antea hæmorrhagiis assueti, ita ad hæmorrhoidales excretiones molimina sentiebant. Inflammationem vero hanc renum & mictum sanguinis ordinario lithogenesis sequitur. Dùm verò Anatomicæ inspectiones ostendunt, quod calculosorum renes ulceribus diffuant, hinc inde cuniculis excaventur, valdè probabile fit, quod rupto vase aliquo sanguifero ac fluente urina acri, ulcusculum excitetur, ac saniei spissior portio sensim in coagulum concreseat, quod pedetentim, vel sponte abruptum, vel spasmus renis tonico detrufum calculum exhibeat. Tantò autem magis hæc sunt verisimilia, quòd in renibus exulceratis talis tophacea & calculosa materia sæpè reperiatur, & post aliquot calculorum partus mucidum ac glutinosum magma, quod ab exulceratis renibus originem habet, cum urina emittatur. Tormenta illa calculosorum satis nota, quæ tamen ludus & jocus quasi sunt, si absit urinæ suppressio, at hæc præfens, diros illos cruciatus vehementer adauget. Contingere autem videtur hæc urinæ suppressio.

1. Quando glutinosa & tophacea illa materia in utriusque renis pelvi hærens, ita obstruit orificium ureteris, ut delabi in illum nulla urina possit, & tum adest dolor fixus & gravans circa regionem renum, difficilis spinæ flexio, dolor cum vomitu.

2. Decumbente calculo in ureteres, ac glutinosa ejusmodi materiâ iis inhærente, urina iterum ad vesicam descendere nequit, ac tum acuto dolore, inquietudine, anxietate, delirio &c. non rarò infestantur. Stupent etiam crura propter musculi psoas compressionem.

3. Calculo vesicæ orificio sese insinuante, ac tum adest in pectine tensio, gravitas, tumor & dolor,

Non ignoramus, quod etiam aliunde, nempe à vermibus, grumis sanguinis, diurnâ urinæ retentione, ac nimia hinc factâ vesicæ distensione, crescentiis variis, tumoribus, paralyfi &c. urinæ suppressiones inducantur, sed hæc à præfenti negotio aliena sunt. Nisi quòd

4. Verbo monendum sit, fieri, ut calculo in urethrâ hærente, urina supprimatur, in quibus duobus ultimis casibus catheter officium optime facit. Non dubitandum tamen est, quin sæpiusmodi spasmodicæ viarum urinarum contractiones, fluxui urinæ remoram injiciant. In diris illis calculi cruciatibus libertatem alvi clysteribus, ex consuetis vegetabilibus, præprimis autem herbâ veronicâ paratis, procuravimus. Iis, qui enomata averfantur D. H. etiam minorativum, secutus Septalium, aliquoties non sine optimo successu dedit. Spasmodicis doloribus occurrimus temperantibus, & ardorem urinæ tum mucilaginosi emulsivis, tum absorbentibus & nitrosis, lenivimus. In multo
apud

apud nos est usu decoctum Foresti, de quo Celeberr. Collega Noster Pechlinus in *Observ. Physico-Medic. l. I. p. 37.* scribit, quòd omnibus numeris absolutum sit, quòd nihil convenientius huic morbo excogitari possit, sibi in plurimis usus ejus felicissime cesserit, & ut juniores Practici, qui vanè arcanis inhiant, quantum huic tribuere debeant, ritè perspiciant, non possumus, quin verba doctissimi Viri, quibus docet, quod omnibus indicationibus ex æquo satisfaciat, hùc transcribamus, sunt verò hæc sequentia: *Reperies ibi primò aquam, ceteræ virtutis vehiculum, quæ etiam mucosum pelvis involucrum diluvio solvat, materiamque præbeat seri. Reperies mucilaginosam malvæ, altheæque dulce caricarum, sebesten, & glyzyrrhizæ delinimentum, hordeum, denique & ciceres, quæ cum nitrosa constant & abstergente facultate, secretionem seri adjuvant. Quibus si deinde juscula adjungas vitulina, acido citri, oleo amygd. d., mannâ tabulatâ & syrupo de althæâ Fernel., parte etiam vini Mosellani delibuta, jam haberi puto, quod omnibus Chymicorum arcanis, ipsi imprimis Aroph & Samech Paracelsi fastum facere possit.* Hæc ille. Pulverem famigeratissimi Nostri quondam Præsidis Volckammeri quidam nostrum cum successu dederunt, ob insignem, demulcendi spasmos, virtutem. In graviore malo etiam anodyna, sed non nisi alvo liberâ dedimus, & quidem in dosi refractâ. Spiritus nephritici ardentes, balsama, sulphura, therebinthinata, parcius à nobis adhibentur. Calculus formatus duo alia videtur indicare

1. quidem comminutionem,
2. comminuti aut integri etiam promotionem & exclusionem ex corpore. Magna est de lithontripticis declamatio in scholis, at verò magnæ illæ pollicitationes ferè in fumum abeunt, cum ad praxin venit. Specificum illud Bernitzii, lap. 69, sem. dauci, sanguis hirci, pulv. milleped., spirit. persicariæ essentificat., cantharidum, post curiosam experientiam, diu elogiis illis exciderunt, nec cochlearum aceto destillato tritarum & maceratarum spiritus, diu famam sustinuit. Idem dicendum de lapide Judaico, lyncis, gryllis, vesica leporis &c. & quis dabit vel unicum, quod non expectantium vota frequentissimè eluserit. Cardanus in *lib. de variet. rer.* refert, suâ ætate virum per Longobardos oberrasse, qui paucis diebus, quodam poculo passim securè, certò citoque sanaret, quotquot calculum in vesicâ (quod magis mirandum) habebant, aitque Cardanus, se non dubitare, hunc virum in inferis esse, quod moriens artem suam mortalibus inviderit. And. Libavius in *Syntagm. arcan. chymic. lib. 2. c. 29.* Sunt, inquit, Autores, qui lapidem vesicæ in mucum, resolvi posse scribant, idque testentur se feliciter procurasse non vanâ persuasionem, sed opere ipso, id quod non legimus audivimusque tantum ab aliis narratum, sed & nos Dei benignitate affecuti sumus. Hæc ille. O! quàm vellemus miserti essent eorum, quos sine sensu intimi doloris intueri nemo potest. At non majorem his aliisque tribuimus fidem, quàm lithontriptico D. Brocardi, de quo in *Zodiaco Gallico* plura legi poterunt. Aut tonsorio illi, sc. sanguini vulpis calido vesicæ injecto, in *Itinerario Dn. Monconysii p. 20.*

Hoc tamen verum, quod ex usu virgæ aureæ Gesneri, (quam Arnoldus Villanovanus, Joh. Prævotius aliique laudant, & in usu multiplici est D. Jænischio,) & hederæ terrestris levamen percipiant, & in majori quantitate sedimentum limosum in urinâ conspiciatur. Eâdem facultate gaudet liquor nephriticus D. Graffii. Quantum ad alterum, nulli fuerimus Auctores, ut pel-
 lentia ægris, e.g. petroselin. fraga, bacc. alkekeng. juniper., balsam. sulph. terebinthin. ol. destill. succin. &c. in paroxysmo dentur. Nam cum pelli calculus sine spasmodicâ constrictione renis & ureterum nequeat, hæc autem spasmodica constrictione dolores acutissimos ac inflammatorios augeat, omnino tutius iisdem abstinemus. Inter remedia prophylactica, quæ prolixè recenset Gualter. Charleton in *Diatrib. de caus. sign., & sanatione lithiasos sect. 2. c. 3. à pag. 147.* ubi non pauca tanquam antigorgonica credulè nimis extollit, nullum est, quod missionibus sanguinis vernalibus & autumnalibus, aut conservato vel revocato fluxu hæmorrhoidum, jure merito, præferri possit aut debeat.

Podagra.

Nec minus podagrici dolores illo tempore satis erant communes. Ejus historiam Georg. Bagliv. de *praxi Medicâ ad præscam observ. ration., revocanda l. 2. cap. 6. p. 183.* doctè tradit, aphorismis quibusdam comprehensam, hanc ab ipso mutuabimur, & nostris observationibus augebimus. Podagra, inquit, *dolorosus articulorum morbus, illos præcæteris invadit senes, qui, postquam meliores vitæ annos mollius, ac delicatius transegerunt, otio, crapulis, veneri, vino aliisque spirituosus liquoribus, uberius indulserint, ingravescente jam ætate ab exercitiis desuescunt, & vitam omnino otiosam degunt.* Hæc ille. Certum est, podagram esse dolorosum morbum, sed, cum varia dolorum genera sint, minimè fuerat tacendum, dolores podagricos esse spasmodicos, qui non quidem totum tendinem, aut membranaceas vel ligamentosas partes totas, sed fibras quasdam, modò has, modò illas, occupant, cum sensu tractionis, vellicationis, vibrationis, pulsationis, &c. Neque negari potest, quòd pelliculæ, ossa articulorum pedis propriè dicti cum tibiâ &c. cingentes, tortorem hunc frequenter patiantur, & verò ipsa experientia toties totiesque docuit nos, quòd minimè raro velamentum ossium tibiæ, fibulæ etiam in intermediis partibus extra articulationem, furibundum percipiant cruciatum, qui æque meretur nomen podagræ, ac alter ille, in articulationibus, membranulam delicatissimi sensus afficiens. Causam verò receptæ communiter sententiæ, quod in solis articulationibus, sedes hujus mali quærenda sit, putamus esse obviam in podagricis doloribus, motus difficultatem, quam non nisi ab affectâ membranulâ, articulos accingente, male deduxerunt. Nam, quod alii dicunt, articulos idè affectui huic magis expositos, quia propter motum continuum humores, quos Tartareos ipsis vocare lubet, per loca consueta exitum non invenientes, in cavitate suam, aut ex debilitate nativâ, aut acquisita recipiant, id non satisfaciet consideranti, partes per motum non reddi aptas ad recipiendum, sed potius expellendum humores, unde vel vulgò notum, collectos aut stagnantes in parti-
 bus

bus per quietem humores, per motum solere discuti. Deinde miramur Baglivium, præcipuæ circumstantiæ in descriptione senum (quamvis apud nos ferè ordinario homines ætatis consistentis podagricos insultus patiantur) esse oblitum, nempe illos fuisse in juventute hæmorrhagiis obnoxios, aut evacuati-
onibus artificialibus sanguinis assuetos, & illas suppressas, has autem neglectas ab iis esse. Quod verò res ita sese habeat, satis experientia quotidiana confirmat. Præfatus aliqua de juvenibus, interdum in podagram labentibus, revertitur ad senes, ac notat, *quòd habeant crana grandiuscula, habitum corporis ut plurimum pleniorum, humidum & laxum, salacem & robustam corporis constitutionem.* Nobis utique etiam attenta observatio fecit manifestum, quod podagrici sint habitus carnosissimi, venis exiguis præditi & inter initia floridiori colore spectabiles; sed quòd humidi & laxi temperamenti, i. e. uno verbo, phlegmatici sint, nobis non æque constat. Circa æquinoctia & solstitia generalem paroxysmum ordinario renovat. Errata in victu, animi pathemata & causæ vehementes latentem paroxysmum excitant, qui, sicuti derepente fit, & absque præviis signis, illum manifestantibus, ita brevi desinit, & præsertim causis prædictis omnino sublatis. Verbo, quæcunque commotionem in massa sanguineâ excitant, eadem ad paroxysmos podagricos renovandos sunt aptissima. Aliquot ante paroxysmum generalem, septimanis aut diebus, sensim corripitur æger a pepsia, ventriculi cruditate, gravitate corporis, & intumescencia ejusdem quasi ventosâ, quæ omnia quotidie sensimque augentur, donec tandem erumpat paroxysmus. Imo longè ante paroxysmum sentiuntur tensivi dolores inter scapulas, circa nucham & spinam dorsi, circa lumbos, os sacrum, coxas, donec sensim tandem in partibus inferioribus sedem figant. Paroxysmus autem ita procedere solet: Paucis diebus, ante illius insultum, torpor quidam & veluti flatuum descensus, per femorum carnes cum affectione quasi spasmodicâ præcedunt. Imò nonnunquam etiam pectoris angustia, & asthma humidum. Pridiè paroxysmum appetitus voracior est, sed præternaturaliter, licet sanus lecto se commiserit patiens, circa mediam tamen noctem excitatur à dolore, pollicem pedis ut plurimum, quandoque vero calcaneum, suram, aut talum occupante, paulò post rigor, horror, & aliquis veluti febricitatio, superveniunt, quæ omnia sensim remittunt, dolor vero gradatim crescit, donec ad summam vehementiam, circa solis exortum pervenerit, & ossicula tarfi ac metatarsi variè occupaverit, cum sensu veluti canis rodentis, aliquando pressuræ, & coarctationis, quandoque verò veluti dilacerationis ligamentorum. Dolor ille, quem patiens primo expergefactus sentit, refert eum, qui talium ossium luxationem sequitur, cum sensu quasi aquæ frigidæ, dolenti loco affusæ. Hæc Baglivius ex Sydenhamii *Tract. de podagr. p. m. 547.* & seq. qui, cum sit in omnium manibus, pro lubitu consuli poterit, utpote qui graphicè, tanquam exercitatus, in podagricorum castris, miles, ejus phænomena describit. Circa secundam & tertiam matutinam podagrici obdormiunt, at verò somnus frequentibus pavoribus est irrequietus. Cum dolore conjungitur motus voluntarii læsio. Nam sæpè instar

trunci sunt immobiles. Comitatur podagram etiam rubor & tumor, quamvis aliquando reperias podagricos, in quibus nullum tumoris vestigium cer- nitur, & hi atrocioribus dolorum facibus uruntur. Sitis, præcordiorum an- xietas, jectigatio, ciborum nausea, flatulentia, dolores lumbares, sunt quasi ordinaria podagricorum symptomata. His aliisque malis sæpè per aliquot septimanas miseri torquentur. Quando autem dolores decreſcunt, in oculos incipit incurrere ſpasmódica musculorum compreffio & ſtrictura, ac ſicuti antea de dolore, ita modo de tenſione, ſtupore & rigore conqueruntur. Uri- na podagricorum, prioribus ſeptimanis, rubicundior eſt, & ſedimentum ru- brum ac veluti arenofum deponit. Tumor, qui circa finem erumpit, ac tar- dius diſcutitur, ſpem facit, fore, ut ægri per longius intervallum, à cruciatibus podagricis vivant immunes. Neque tamen hinc ſtatim erit inferendum, *cri- ticè materiam tumoris, per glandulas mucilaginoſas musculorum copioſè fuiſ- ſe ſeparatam & inter interſtitia delatam, & non poſſe non diſtendere & ele- vare partes illas, quibus incumbit*, quæ ſententia eſt Clar. Haveri in *Oſteolog. nov. p. 278*. Nam longè probabilius hujus tumoris cauſa alibi à nobis alle- gabitur. Neque nobis placent, quæ de tumore in arthritide diſſerit Wil- helm. ten Rhyne in *diſſert. de arthritide* à p. 59. A quibus non abeunt ea, quæ occurrunt in libello, qui inſcribitur: *Das genau unterſuchte und auſer- fundene Podagra*. Reliqua, & præſertim irregularis podagræ, ſymptoma- ta proſequi, jam non vacat, illud tamen ſicco pede præterire non placet, quòd obſervante D. H., in pedibus podagricorum propter ſpasmódicam cutis ſtri- cturam, vel prorsus non ſentiatuſ fudor, vel cutis flaccida quidem madeat, musculi verò ſubſtrati nihilominus ſpasmò ſunt conſtricti.

Dùm ad curam convertimur, propemodum cum Podagrigo apud Lucia- num in *Trago-podagr. p. m. 807. Tom. 2.* exclamamus; *Incomprehenſum è ! mentibus mortalium malum irritis Te, ut mitigamus ſotibus omnes*. Sanè veriffima ſunt, quæ ipſa de ſe podagra jaçtat in eodem dialogo p. 813. *quòd ſit in- ſuperabilis Regina morborum, quam nec ipſe Bæon, omnium cœleſtium Medi- cus, Deorum vincere pharmacis poteſt, nec Phæbi doctus filius Æſculapius. Equi- dem ex quo mortalium fuit genus, omnes ejus vires retundere geſtiunt, omnem- que turbant pharmacorum induſtriam, ſed vere podagra illos omnes jubet plo- rare, atque ſic tentantibus ſe occurrere iracundior ſolet, ſed in ſe excogitantibus nihil mitem ac benignam præſtat ſe*; Nam in tanta, neſcio quæ arcana jaçtan- tium turbâ nunquam deſunt, qui iterum cum podagra apud Lucianum abſolu- to dolorum exercitio, baculi opem implorant:

O ! qui labori, bacule, fers opem meo,
Sortite partem tertii pedis, gradum
Fulci, trementem dirige, & nobis iter
Leviaque, ut inimitar ſolo, veſtigia.

In

In paroxysmo exhibuimus horis matutinis lenia diaphnoica, eaque cum nervinis debite miscuimus. Continuo sudorem non ursumus, eò, quòd nimis exhauriatur serum, & in junioribus facile viscerum nobiliorum inflammationes, ex abusu sudoriferorum, consequantur. Pomeridiano tempore, aperientibus institimus, ac sub noctem pulveres nitrosos ac cinnabarinos exhibuimus, subinde etiam gratis emulsionibus atque temperantibus aliis usi. Sæpè fit in hac morum labe, ut podagrici Venereis miasmatis simul sint inquinati, & tùm antiarthriticis, sanguinem purificantia etiam mercurialia, rectè admiscuntur. Si verò diathesi scorbuticâ laborent, aut ex cachexiâ tabescant, quod itidem subinde contingit, antiscorbutica & anticachectica rectè iis præscribuntur; Tartarea pro scopo diuretico, non prorsus sunt inefficacia. Et apud nos quidem arcanum tartari D. Sennert., toto die adhibetur. Anodyna, non more Sydenhamiano, quem eâ de causâ sugillat Listerus, sed post V.S. corpusque repurgatum, alvo non obstructâ, nec omissis humectantibus, in dosi non magnâ, cum aliis, sub noctem, imperavimus. Pilulæ Wildeg. à nostris hic etiam, citra Medici præscriptum, usurpantur. Opiata nisi his cautelis adhibeantur, facile tumores oedematosos, nodos ac tophos, vertiginem, paralyfin &c. inducunt.

Rarius Podagricis nostris Emetica, nisi forte ab inconvenienti diætâ paroxysmum irritarunt, præscribuntur. Scimus magnis sumptibus ad nos advectum arcanum Heinsii, sed sopitos hoc ipso dolores, post breve tempus, cum majori acerbitate recruidisse. Arcanum Cnophelii, sive, nisi nos omnia fallunt, phlegma vitrioli, pridem omni laude caruit, quamvis subacida sanguineis non frustra dentur.

Periclitati sumus etiam varia externa. Ab externo balsam. sulphur. succinat. usu, non vidimus illa, quæ refert Sylvius *l. i. prax. c. 30.* Neque apud nos emplastro illo, quod in Actis Hafniensibus *Volumin. 3. obs. 9. p. 14. & seqq.* describitur, ita ægros nostros restituere potuimus, ut altero statim die choreas ducere possent, imò dolorum incrementa ab ejus usu observavimus. Sub quibuscunque nominibus prostent topica illa venalia, apud nos fidem decoxerunt, neque nos movent splendida illa epitheta, dum divina, miraculosa &c. à vanis gerronibus illis vocantur. Omnia pingua & oleosa meritò nobis semper fuere suspecta. Ex his aliisque ut & conglutinantibus applicatis, facile nodi in sanguineo-cholericis excitantur. Quod etiam dicendum de usu emplastr. de spermate ranarum, quo egeni promiscuè utuntur. Ex usu repellentium non tantum tormina, cardialgiam, sed & vomitus observavimus. Inter omnia emplastra hic palmam reportat illud, quod describit Barbette *l. i. c. 4. p. m. 42.* illud sine dubio à Digbæo mutuatus. Camphorata verò ritè adhibita omnibus præferri merentur. Et hæc de morbis, qui in Decembri sunt grassati, dicta funto.

Nihil amplius restat, quàm, ut aliquid de temperamento Vratislaviensium, aut Silesiorum in genere, addamus, & modum vivendi in Silesiâ receptum, breviter perstringamus.

Silesiorum temperamentum inter sanguineum & melancholicum ambigere, scripsit Curæus. (a) Nam id exploratum est, non adeò frequentes esse, qui sint exquisitè sanguinei vel melancholici, multò minus in majori copiâprehendas, quos verè liceat appellare cholericos & phlegmaticos. Planè verò nullos esse Silesios in censu vel sanguineorum vel cholerorum, vel phlegmaticorum vel melancholicorum, nec nos profiteamur, nec affirmat Curæus. Ne verò temerarium alicui videatur vel nostrum vel Curæi assertum, accuratio-
ra temperamentorum criteria hic paucis commemorare fas sit. Petuntur illa, partim ab ipso sanguine, partim vasorum, per quæ sanguis ad partes corporis musculofas derivatur, capacitate, partim amplitudine interstitiorum inter fibras, (nam etsi fibrillæ immediatè sint junctæ, non tamen continuæ sed contiguæ sunt, ut pulchrè annotavit Ingeniosissimus Philosophus & Medicus Nicolaus Steno in *Specimine Myologiae* p. m. 12. & 13. & sic satis apta hæc connexio earum ad transmissionem humoris ejusdemque concussionem; quæ opinio illa à Clar. Blancardo propalatâ in tract. de Circulat. sangu. per tubulos, cujus fundamentum est, fibras esse tubulos cavos, quales sunt fistulæ arundineæ, multò nobis est verisimilior) ac denique ex aspectu externi habitus corporis. Scil. sanguineus appellatur 1. cui sanguis moderatè fluidus, 2. pori laxi ac partes distentæ, 3. vasa sanguifera teneriora & angustiora, ut Cl. Mœbium hic humani aliquid passum esse videas, qui in *epitome Institution.* p. m. 284. latas venas inter signa temperamenti sanguinei refert, 4. Corporis habitus turgidulus.

In Cholericis verò cernimus sanguinem 1. itidem floridum, 2. vasa capacia, 3. poros strictiores, 4. cum corpore gracili & macilento. Mœbius iis faciem cum virore pallidam tribuit, quamvis color non ingratus eos sæpè commendet. Cum quibus quantum ad vasa & poros melancholici conveniunt; nisi quod hi spissioribus ac cholericis gaudeant fibris, & pori eorum sint arctiores adhuc, sed sanguis ipsorum spissior & crassior est, & corpus macilentum, strigosum & aridum, facies pallida & subfusca.

Phlegmaticorum verò 1. sanguis vappidus & mucidus est, lentorem & visciditatem obtinet, 2. vasa exilia existunt, & 3. angusti pori, turgentibus fibris, quæ videntur in his esse cylindruli similes virgultis arborum plenis substantiâ seu medullâ quadam, aut funi madefacto, quibus rebus fibras, post elixationem, in genere comparat Celeb. Joh. Alphons. Borellus, 4. Corpus album, molle, glabrum.

Ipsa verò experientia loquitur, Silesios rectè numerari inter sanguineo-melancholicos, hoc temperamento, ut in juventute ad illos, in senectute verò ad hos propiùs accedant, non negato, quod aliqui, qui cum his in comparationem venire non possunt, alterius sint temperamenti, sed verò juxta Prudentii illud:

*in paucis jam deficiente caterva
Nec persona sita est Patriæ, nec curia constat.*

Jucun-

(a) conf. Castig. Græbner. nostræ p. 77. 78. 79.

Jucundum non rarò præbuit spectaculum sanguis Nostrorum venâ eductus, (b) aquâ calidâ, more Malpighiano, aliquoties lotus, oculis microscopio armatis, offerens deturbatis rubicundis partibus, texturam vehementer fibrosam, & rete ex nerveis, viscosis, crassis, (quales in cholerorum & phlegmaticorum sanguine frustra quæsieris) fibris pulchre contextam.

Confirmant vero etiam hanc de temperamentis sententiam, mores Silesiorum, quos alicubi Clar. Henelius veraci calamo describit.

Cùm verò ita comparatum sit de temperamento Silesiorum, jam liquet, ad quos præcipuè morbos inclinent, nimirum ad plethoram, & eos, qui plethoram pressò sequi pede solent, sc. 1. dolores varii generis, gravativos, inquam, æstuentes, lancinantes, pressorios, 2. hæmorrhagiam, circa diversa, pro ætatum diversitate, loca, 3. ulcerationes, 4. spasmos, 5. stases, 6. convulsiones, 7. pathemata hypochondriaca, inflationes, indurationes lienis, hepatis, atrophias &c. his enim morbis premi, qui ejus, quod diximus, sunt temperamenti, experientia docet. (c).

Ulterius dispiciendum erat, qualem in Silesia trahamus aërem, nam is non solum ad vitam & sanitatem conservandam, sed & ad morbos invehendos, plurimum facit: Hinc adeò commendata Medicis notitia constitutionis aëris ab ipso Hippocrate, in *libris Epidemicis, Prognosticis, libro de aere, aqua & locis*, ut Prospero Marciano Senex Noster nimium tribuisse visus sit aëri, quandoquidem ei primariò intelligentiam adscribat in *libr. de morbo sacro*, antiquo errore, quo aër divinitatis particeps credebatur. Sed hoc pensum absolvimus in antecedentibus, si tamen in genere aliquid de eo dicendum, talis communiter esse solet. Satis maturè, in ipso Novembri, plus minus regnat apud nos frigus, asperius verò sævit in Decembri, Januario & Febuario; quibus jacet aggeribus niveis informis & alto terra gelu latè. Nec tamen eo, quod sentiunt in Moscoviâ, in quâ, narrante Oleario, in itinerario Persico, terra in medio foro, ingentem in hiatum intensissimo frigore distracta. Mitior aliquantum aura est in Martio & Aprili, Majo autem omnia rident & est formosissimus annus. Junio, Julio, Augusto æstus nos infestat, non tamen continuus, & ut plurimum satis tolerabilis, reliquis vero mensibus, humorum & frigoris varia sentimus incrementa, cum non rarò aër singulis momentis variet, quâ de re, non ineleganter, disputat Ferrandus Imperatus *lib. 8. Histor. Nat. c. 6. & 7.*

Aëris constitutionem perstrinximus, (d) meritò itaque Ventorum, qui ex Plinii sententiâ, aëris motus sunt, mentionem facimus, præcipuè cum hi aërem variè mutant. Est verò Silesia, ut benè Doctissimus Schwenckfeld in *Geographica Silesiæ delineatione* præmissa catalogo stirpium & fossilium, exposita ventis præcipuè aquilonaribus & occidentalibus. Nam ad Austrum cingitur montibus Bohemis, ab ortu jugis Carpathi. Aquilones verò liberè ex Poloniâ

Q 3

in

(b) conf. Castigation. nostræ Græbnerian. p. 82.

(c) Ibid. p. 83.

(d) Ibid. p. 84

in eam incurrunt, & ex Marchiâ & Lufatiâ occidentales; ac hi quidem plerumque moderatè frigidi & humidi, ac pro diversis anni partibus, vel pluviarum vel nivis feraces; Septentrionales verò sicci & frigidi, ut meritò etiam aquilo, quod apud Nasonem *l. 6. metamorph.* de se dicit, in Silesia etiam prædicet, tristia nubila pello; Secus quam iis, qui meridiem & orientem habitant, quibus pluvius est, teste Theophrasto *l. de ventis.* Auster, siquando Silesiis flat, calidus & humidus est, & cum corpora nostra gravet, majorisque reddat ponderis, ut olim Aristoteles, Hippocrates & Galenus docuere, non immeritò etiam nos Horatium imitati, eum dixerimus plumbeum. Qui ab oriente Silesiam perflant, serenitatis nuncii sunt. Et licet magna inconstantia volvantur venti, non tamen vana etiam apud nos deprehendimus, quæ de ventis periodicis ac statis Varenius, de motu eorum annuo Isaacus Vossius *in lib. de motu marium & ventorum c. 23.* ac Dn. Mariotte de Circulatione eorum, differunt; nam compertum habemus, (e) quod occidentalem sequatur septentrionalis, hunc excipiat orientalis aliquanto obscurius, ita ut post austrum vices redeant ad occidentalem, quamvis etiam aliquando inter se confligant, & ut Poëta ait: *Una Eurisque Nothusque ruant creberque procellis Africus.* Cum Boreæ vis nobis incumbit, regnant catarrhales affectus, coryza, tumores uvulæ, tonsillarum, glandularumque sublingualium pathemata, ophthalmia, tussis, respirandi difficultas. Experimentiâ edocti sumus, lienosos etiam & calculosos pejus habere, præprimis verò hystericas; notavimus etiam facillimè tum obstructions mensium & lochiorum contingere. Urinæ difficultas, quæ itidem impetuosius nos, urgente hoc vento, affligit, etiam ab hac externa causa, ex parte, oritur. Phthisici, & malè sana corpora pessimè habent. Complexus hæc Hippocrates solitâ brevitate *3. §. 5.* Auster appetitum imminuit, ventriculo nauseam affert, & caput replet. Nec facile alio tempore homines deprehendas morosiores in Silesia, quam dominante Austro; Libertus Fromondus *in Meteorol. l. 4. c. 8. art. 2.* notanter hoc exprimit, ita scribens: *in insulis Flandricis quæ vulgo Azores, Austro spirante, homines manifestè morosissimos ambulare, pueros tristes, & lugubres desiderare domi, nec solennes eorum lusus & cœtus apparere in plateis, qui Borea restante, statim ad alacritatem redeunt &c.* Præterea Auster auditum hebetat, caliginem visus obducit, corpori tarditatem & languorem conciliat, & ventres humectat, ut Hippocr. *l. c. aphor. 17.* quæ sic satis accuratè etiam hic experimentiæ respondent, etsi apud nos non siccus, quod Hippocrates memoriæ prodidit, sed humidus existat. Austrinis quoque flatibus facile recrudescunt motus epileptici, nec absque causa Lemnius *l. 2. c. 2. de occultis Natur.* multitudinem epilepticorum in Belgio Austris tribuit. Prosper Martianus *p. 351.* queritur, quod, qui in aphorismum sententiam retulit *ex lib. de humor. v. 148.* omiserit ulcera glabra, maximè oris, pudendorum & aliarum partium, non absque utilis doctrinæ jactura.

Ægritudi-

(e) conf. Castigat. nostræ Græbner. p. 86.

Ægritudines, ad quas anni tempora nos disponunt, variæ sunt, & multiplicis generis. Vere, quod Hippocrates respectu ad alias anni partes, & feliciorum morborum decursum, saluberrimum vocat, oriuntur lippitudines, pustulæ, profusio sanguinis, (varia pro ætatum differentiâ, in pueris enim & adolescentibus per nares, in juvenibus ex pectore, in viris per hæmorrhoides sanguis expellitur, veroque consonum est Brassavolæ illud, sanguinis menstrui profluvia tum copiosè fieri, ut medicam manum requirant) abscessus corporis, morbus comitialis, angina. Hi quoque morbi, qui in articulis nervisque modò urgent, modò quiescunt, tum maximè & inchoantur, & repetunt, quæ sunt Romani Hippocratis, Celsi inquam, verba *l. 2. c. I. p. m. 43.* Et hinc chorus podagricorum apud Lucianum in Trago-podagr. : *At nos Tibi, Podagra, primo veris tempore, mystæ tui sacrificamus ejulatus miserabiles.* Quibus morbis non immeritò febres annumeres, utpote quæ vernali tempore potissimum grassantur, sanguinisque depurationem moliantur. (f) Æstivo tempore adeò frequenter morbi non sunt, nec in Silesia locum habet istud Aristotelicum problema, quare per æstatem magis adversa valetudine laboretur, quod expedire satagit *Seç. 1. problem. 25.* Et qui sunt, eos ingurgitationi horæorum fructuum & primariò post æstum diuturnum, refrigerationi nocturnæ, transcribere decet. Sicuti Mense Augusto, dysenteriam frequenti sæcum alvi dejectione cum materiâ sæpè cruenta, sæpè purulenta, satis molestam edidisse stragem compertum est. (g) Nullum verò tempus anni, morborum feracius est, quàm autumnale. Rara ea felicitas, ut non febres varii generis, præprimis quartanæ grassentur, querelæ audiantur de dolore hypochondrii sinistri, qui non rarò ad claviculas usque protenditur, pleuritidemque mentitur; Sæpè etiam furas ac tibias infestat. Tabidis quoque non favet, ut habet Hippocrates *l. 6. Epidemic. Seç. 7. v. 73.* nec podagricis & arthriticis. Verum quoque, quod habet Ballonius *l. 2. Epidem. & Ephemerid. p. m. 180.* omnia ulcera esse *δυσεπελωτικά* in autumnali constitutione. Ex tripode profecta sanè illa Nostri Senis *l. 1. Epidem. Autumno acutissimi morbi, & maxime lethales. Universum simile ipsis vesperi exacerbari &c.* quæ accurato commentario illustrat Vallesius *p. 88. & 89.*

Morbi maligni passim quoque grassari solent circa Septembris initia, febres ecchymaticæ, variolæ & morbilli ingrediuntur, ac per Januarium, Februarium sæviunt, sub cujus finem puncticulares plerumque caput efferunt non rarò, quibus non pauci fato suo occumbunt.

Sed de his omnibus, ex antecedentibus, judicium formari poterit. Verum memores promissi nostri, non possumus, quin etiam aliqua de recepto apud nos vivendi modo commemoremus.

Victum autem Silesiorum nemo magis vivis coloribus depinxit, quàm celeberrimus quondam Vratislav. Syndicus, Nicolaus Henelius, in *manuscripto opere*, cui *Silesiographiæ Renovatæ* nomen, cujus autographum in locupleti

ad

(f) conf. Castigat. nostræ Græbnerian. p. 87.

(g) Ibid.

ad S. Matthiam, bibliothecâ, tanquam thesaurus aliquis custoditur, exemplar vero manu Reverendissimi Domini Prælati, Michaëlis Fibiger, descriptum, & luculentis notis & additamentis, pro amore, quo in patriam & studia fertur, ab eo exornatum, nostris patuit, ex Ejusdem Per-Illustris Dn. Magistri indulgentiâ, usibus. Hinc bonâ cum Lectorum veniâ ex cap. 7. aliqua mutabimur, ex quibus etiam Nobilissimi Operis præstantiâ æstimari poterit. Verba Henelii ita habent:

Victus in Silesia mundior & elegantior, quin etiam parabilior, quàm inter plerasque alias gentes. Plebs urbana & agrestis, pane vulgari, cum ex hordeo, tum ex secali, pecudum domesticarum carne, lacticiis, anseribus, gallinis, ovibus, piscibus quâ recentibus, quâ salitis & infumatis, halecibus sive haringis præsertim, passeribus sive plateissis & asellis; leguminibusque, oleribus & pultibus victitat.

De carnis sufficientia Oppidanis prospicere tenentur laniones: qui ob id animalia, puta boves, vaccas, vitulos, oves, verveces, agnos, hædos, sues, porcos, non solum ex hac nostrâ, sed & vicinis provinciis, Poloniâ maxime & Hungariâ, procurant, mactatorumque in lanienâ carnes, ut in macellis suis quotidie, ita diebus Sabbathi, in foro publico venales exponunt. Sarcopolia appellare liceat, in quibus præcipua, Vratislaviense, Schwidnicense &c. sed quibus tamen parum concedit Oppaviense; Extraneis quoque annonam carnis adjuvare, omnis generis mactata inferre, & venalia exponere licitum est. Qui boni Patresfamilias esse, nec cuncta, à macellariis, præstinare volunt, emunt quot annis, pro familiæ & facultatum modo, unum & alterum bovem, tum & oves aliquot & porcos, quibus mactatis & sale conditis, ac fumo induratis, penaria sua instruunt, magnam anni partem inde victitant. Urbanis ditioribus, Nobilibus ampliora prædia possidentibus, Primoribus atque Magnatibus, ubi præsertim genio sacra parantur, victus dapsilior est, pollucibilior ac pretiosior, ut qui mensas cum alitibus domesticis, tum feris animalibus, volatilibus, ac piscibus lautioribus, in quibus nec osirea, testaceorum omnium nobilissima, aut sardellæ Venetiæ desunt, variè coctis, assis, frixis, elixis, artocreis, talibusque aliis, in quibus permagnus est aromatum, sacchari & aliorum condimentorum usus, cumulatè instructas habent: Nec oleribus exquisitis ea carent, non acetariis, intritis, intinctibus suavissimi saporis, non scriblitis, & tortis, non bellariis sumptuosius, aliisque mensarum secundarum deliciis, ac cupediis quâ dominatis, quâ exoticis & aliunde petitis. Adeo

quicquid queritur, optimum videtur.

Et hanc etiam Provinciam sumptuosus exterorum luxus ita contaminavit, ut non modo non subinde ad detergendam stomachi nauseam, excogitentur saporibus, & exquisita gulæ irritamenta: verum etiam in pompam, quæ spectes, non quæ gustes solum, fercula ponantur. Quasi oculis paretur cibus, exornatur. Mensa ambitionis scena quedam est, & jam divitias dapes indicant; Lauti sumus, si immensum consumimus. Ut quidem minimè mirum aut novum videri debeat, si nonnullos, quibus Attalico luxu ostentare & frequentare lautas epulas

epulas pulchrum fuit, paulo post obaudire oporteat, quod Diogenes, prateriens ædes cujusdam belluonis inscriptione notatas venalesque, dixisse fertur: Facile divinabam, fore, ut præ immodica crapulâ domum evomeres. Eousque certè luxus hic crevit, ut nemo æquus rei æstimator nobis vitio sit versurus, si cum Michaele Hospitalio, Galliæ Cancellario, (at quali & quanto Viro!) exclamemus:

O! Romanarum legum veneranda potestas
 Sublata è vivis! ô Fannia, & Oppia, leges!
 Existetne aliquis concessu & munere Divûm,
 Errorem hunc animis hominum qui demere possit,
 Et nostri immensis moderetur sumptibus ævi?

Priscus & promiscuus Silesiæ potus est, cujus usum etiam ante terræ inundationem, primi seculi mortalibus non incognitum fuisse, Germanos certè jam inde à primordio gentis Celticæ habuisse, una cum gente ex Asia in Europam delatum, probabiliter credidit Cluverius: de quo nimirum versus extant Leonini (ut vocant Grammatici, quales à Poetis priscis, tam Latinis, quam Vernaculis scribi solitos, & vix aliquando alios, ex epitaphiis & aliundè observatur) nec tamen illepidi, Monachi, manu tenentis tritici spicas:

Me piget hoc esse, cum sit potare necesse,

Vinum de messe, quod nos consuevimus esse.

Vinum, inquit, de messe. Ex sententiâ certè Diodori Siculi, fragrantia & efficaciam, vino haud multò inferiorem; sive ut Tacitus loquitur, in quandam similitudinem vini corruptum, potum nos intelligere palàm est, quem Bieram, sive Biriam, sive Beriam nuncupamus, acceptâ voce, ex sententia Viri Clariss. Gerardi Johann. Vossii à Romanis militibus, quibus illud in ore: Da bibere. Sic enim Romani loquebantur, ut Terent. Andr. act. 3. p. 2. sed pro bibere etiam dixerè Biber. Quod idcirco quidam veterum nomen ac neutrius generis, putant, uti apparet ex Charisio & Caprà. Ex biber autem contractum Bier; ut nomen biria sit generale. Quod quidem etymon multo verisimilius est, quàm quod alii quasi pyriam dici volunt, quia ex pyris exprimeretur similive pomorum genere. Sunt & alia illi nomina, sed usitatiores, zythi & cerevisiæ: Illa Ægyptiacæ originis vox est: hæc sic dicta, vel quasi Cerebibia, quia Ceres, seu fruges, bibitur; vel quasi Cereris vinum, vel quasi Cereris vis in aqua, vel à colore cereo, vel à Gallico sive Celtico vocabulo, Zerus, idem significans, quod frumentum; vel denique ab alia voce Celtica, Zehren, quod Germanis notat incoquere, & alere, nempe quia vim habet alimonie. Conficitur passim in urbibus Silesiæ & pagis ex tritico hordeove, primum ad regerminationem macerato, ligulisque enatis torrefacto, indeque molis crassiusculè contrito, (quod vocant nostri Maltz ex Latino molitum. Mediæ ætatis scriptores, Brasium

vocant: à quo *Brasarium*, vel *Bratarium*, quod horridius alii *Braxatorium* fecerunt, ipsumque adeo *braxare*, quod est *cerevisiam* coquere) ac denique aqua cum lupuli salictarii floribus artificiosè decocto. Potus sanè, si rectè paratus, ac ritè defecatus sit, saluberrimus optimique alimenti, ut, qui Spiritum roborat & excitat, animumque exhilarat & confirmat, non incommodat nervos, non apoplexiam, non paraplegiam, non nervorum resolutiones, non comitiales & convulsiones ac tetanos, non arthritidem denique concitat, quæ omnia potum vini comitari amant. Bonitas ejus & præstantia de spumâ colligi solet, in quam adhuc à recenti cocturâ vertitur: & adhibent quoque eandem Nostrates ad panis fermentationem. Quod & idem Plinius de Gallis pariter annotavit.

Inter triticeas, quæ diebus quibusvis per integrum annum parantur, præcipuam laudem habet *cerevisia Vratislaviensis*, quæ *Scheps* vulgò appellatur, quanquam non omnibus, quia fortior, vini præsertim potioribus, grata.

Hordeacea cerevisia certo & delecto tempore, hyberno nimirum, & sub veris initium coquitur, ac sine acoris vitio per integrum annum, imo plures quoque sexuari potest. Hujus rei causam, sunt, qui referant ad primi veris vim, atque singularem efficaciam, à quibus alienus Cardanus, lupuli salictarii seminibus, è quibus supervacaneus humor, omnis putredinis parens, absumptus sit atque exinanitus, vim eam assignat; quasi nimirum solum lupuli istius semen cocturæ immittatur valido effectu. Cur verò non cæteris mensibus eadem vis perstat, quibus etiam magis humiditas decoxit?

Commendatur præ reliquis *Oppaviensis*, *Martiana dicta*, quæ liberalius pota, verè Martios efficit: sed qua incolæ ejus *Ducatûs* (uti testatur *Thaddeus Hagecius* ab *Hagen*, *Moraviæ* quondam Medicus Celeberrimus, singulari de *Cerevisia* opusculè) etiam vice medicamenti utuntur, ubi se malè affectos sentiunt, & propterea Medicinæ non magnus, apud eos, usus est.

Schwidnicensem hordeaceam, *Raconizensi*, *Zacensi*, *Stirneni*, in *Bohemia* idem *Hagecius* annumerat; *Cerevisias* quidem istas, præterquam, quod urinam & menses provocent, in facultate nutriendi, & lac suppediandi triticeis istis anteponebat, ut quæ multo-celerius, unico quippe haustu factò, & pauculo somno capto, id præstent, atque ob id à nutricibus mirificè expetantur.

Tametsi verò jus coquendi *Cerevisiam*, in plerisque Germaniæ provinciis, urbibus tantum & oppidis competat. Nobilibus autem nonnisi pro necessitate, ac sustentatione familiæ suæ concedatur: In *Silesia* tamen Nobiles quoque eodem jure utuntur, cum de illo investiti fuerint, ultra miliare præsertim ab urbe positi. Nimirum ut in *Bohemia*, sic in hac quoque regione concessio juris *braxandi*, pro regali, sive jure reservato Principis haberi cæpit, ut nemo illo uti possit, nisi, vel privilegio, ut pleræque civitates, vel investitura, vel longissima temporis præscriptione, munitus sit.

Tenuiores qui sunt, itemque agrestes, *cerevisiæ defectum*, vel *secundariæ illius Cerevisiæ*, quæ plerisque locis *Tisch-Bier* *Vratislaviæ* *Langweil* vocatur, ac civium quoque familiis ut maxime præbetur: Vel alterius potionis ex
 pomis,

pomis, pyrisve tuis, aqua perfusis atque expressis impendio minori conficienda, multis nationibus usitata, praesertim orientalibus; vel lactis aut seri potu, suppleant. Aquae purissimus liquor, de quo Lucanus dicebat, Satis est populis fluviusque Ceresque, infimae duntaxat, omniumque rerum inopi plebi, usitatus, qui antiquissimum apud omnes mortales potus genus est.

Vino sanè olim pauci, nec nisi elegantiores utebantur, nunc optimo telluris succo nemo non abutitur, ex Hungaria praesertim, Austria & Moravia advecto. Quamvis nec Rhenensia, Rhætica, Italica, Gallica, Hispanica, Canariensis, & alia vina desint, apud Vratislavienses imprimis, quibus jam olim, privilegii loco, ab Henrico VI. Duce, concessum reperio, ut non solum esse illis, & vivere, sed bene esse, benè vivere liceat. Sine vino sane, nulla placent convivia, quasi Varronem edidicerint, ita ubique elegantibus illis & suavibus versiculis occini audias:

Vino nihil jucundius quicquam cluit.

Hoc continet coagulum convivia.

Hoc hilaritatis dulce seminarium.

Hoc ægritudinem ad medendam invenerunt.

Mellis cum lupulo aqua decocti (Medonem vulgo vocant, Plinius hydromel, & aquam mulsam) non infrequens est in Silesia potus, quod, cum ex Polonia & Lithuania importatur, tum Ratiboræ, Oppavia, & aliis quibusdam locis, coquitur.

At verò adusti, incertum, usus major sit, an abusus? eò quod multos, eo inebriatos, repentina morte & somno sepultos interiisse constat; Ad hæc multa millia modiorum siliginis & tritici, quæ ad usum panis & cerevisiæ prodesse, in hunc abusum insumantur & prodigantur, de quo ob id cohibendo sæpius, at frustra deliberatum fuit. Sublimatum idem dicitur, quia per sublimationem elicitur. Sed id non ex frumento tantum, sed ex vino etiam ejusque facibus, atque adeò cerevisiæ crassamentis in fundo vasis relictis. Indeque haud modo plebeji, qui artificio illi ex professo dediti, rem non contemnendam faciunt; sed Nobiliores etiam viri, ac fœminæ praesertim, luculentos proventus percipiunt; ex quo nimirum istæ, lucro allectæ, quod sordidis hominibus suave esse consuevit ex re qualibet, animum ad vinum istud conficiendum, adjecerunt, & hanc victus querendi rationem inferioris conditionis hominibus eripuerunt. Hoc vinum ardens venditant suis subditis, pro potu, publice propinandum. Ita autem illud plebs rusticana, vicem ferè jentaculi, pitissat, ut plerumque benè poti domum redeant.

Cæterum compotationes in Silesia frequentiores, ubi quidem (neque enim tam Patria chara est, ut manifesta negem, ut cum F. Fabri Sabotho loquar) ἀπνευσί, ἀμυσί, ἢ ἀδρόως, non Xenophontis modo minuta illa & rorantia, sed & portentosa pocula, quæ praesertim Sanitates vocant, (nempe ut bellum, quod in se nihil aut belli aut amoeni habeat) exhauriri videas, & sollicitè legem

illam Græcorum observari: Aut bibendum aut abeundum. Idque non magis in cauponis, ad quas vulgus computandi causa convenire solet, quam in Procerum convivis, in natalitiis & initiationibus liberorum, in nuptiis, in parentalibus, in aliis denique festis, conventibus & actionibus, certare poculis magnificentum, vincere gloriosum imprimis putant; indeque crebra inter vinolentos rixæ & contentiones, quæ non tam in convicia, quam vulnera & cædes desinunt: Sed ipsæ tandem in computationibus, ceu Bacchi auspiciis, transiguntur, hausto utrimque philotesio cratere, concordie firmamento.

Habent id commune Silesii cum reliquis Germanis, in quibus jam diu notavit quoque ebrietatem Tacitus, aliisque gentibus septentrionalibus, Sarmaticis maxime ac Slavonicis, vitium; quod inde à longa antiquitate sic invaluit, tamque altas egit radices, ut extingui, ut elidi, ut extirpari vix ulla posse ratione videatur. Desinit nimirum esse remedio locus, ubi, quæ fuerant vitia, in morem atque consuetudinem, non hominis, sed gentis, non exigui temporis, sed seculorum, abiire. Attamen verò si suus cuique populo attributus est error, si vitii nemo sine nascitur, & optimus ille, qui minimis urgetur, maneat sane hoc vitium nostris, dum graviora absint, levitas, fraus, dolus, perfidia, perjurium, blasphemia, immodica, sed inconcessa, Venus in nuptas, in virgines, in puellas, in pueros, in bruta animalia, quibus maxime urgentur improbatore nostri. Neque tamen ebrietas, quam objectant nobis, vel Germanis duntaxat, vel septentrionalibus populis, propria. Nulla in mundi parte cessare eam, verissime jam olim dictum. In Insula Americana, quam S. Mariæ vocant, regem bene potum ingenti cornu præcinente, & tympano triumphi in modum solenniter pulsato, cubitum deductum testantur, qui viderunt. De Græcis quid dicam, unde tamen virtutes, gratiasque omnes prodiisse vetustas memorat, potandi gratia famosissimos fuisse, nemo, opinor, negaverit, qui, quid græcari, quid pergræcari olim dictum fuerit, non ignorat? Quid veteres illi Romani? Minime paucos eorum, sed omnem civitatem, principes juxta, & plebem, potationibus crebris, adeoque continuis indulgisse, ebrios etiam servorum humeris ad ludum vel circulum symphoniacum à corona efferri solitos, unicuique libros eorum, maxime vero poetas, diligentius legenti liquet. In plebe quidem egregium exemplum memorat Ovidius Fastorum lib. 3. Festum graphice describens, ut non habeant, cur Germanis magis potationes exprobrent, quam Romanis, morum cultu principatum inter gentes adfectantibus. Quin non viros tantum, sed fœminas quoque illustres vinolentiæ deditas Romæ fuisse, notavit Tacitus, annal. lib. 12. Ipsa hodiè polita Gallia, & prudens Belgium, apud se vitium hoc frequentari, queritantur, nec nullos ex Italis reperire licet, qui tegere melius vitium hoc quam fugere norunt. Quæ ipsa tamen, non ad excusationis ansam, ei rei prætexendam, ex qua id fere consequuntur miseri, & heu! nimis prodigi salutis suæ, ut in corpora, quæ Spiritus S. debent esse domicilia, deserviant, ea demoliantur, fortunas, opes, facultates dilapident, dum ad restim res redeat, animas denique ipsas diabolo oppignorent: Sed eo tantum dicuntur, ut nihil heic, præ cæteris gentibus, in Germanis culpandum demonstratur.

tur. Licet non desint, qui minus culpabiles, veniaque adeo digniores putent, ob ventriculi sc. calorem, qui quo remotius cis Austrum homines colunt, eo maior & in ipso frigore, quod mirandum est, aestuant. Hinc igitur robustam illam sitim esse, cui sedanda, & crebriori & largiori potu sit opus. Sed quod ipsum tamen, si maximè ita esse concedamus, immanibus illis belluationibus, ad ebrietatem & furorem usque, institutis, nullo modo patrocinator. Etsi hoc quoque minimè dissimulandum, haud exiguum huic malo fomentum præberi à nimia Dominorum ac Magistratuum indulgentia, quibus, dici non potest, quàm fructuosa illa potandi licentia existat. Ex hac siquidem non exigua tributorum & vectigalium publicorum juxta & privatorum portio corrogatur.

Vasa Mensalia vili & promiscue plebi, pro antiqua simplicitate, lignea & testacea, sive figulina; qualia nimirum etiam Agathocles Rex apponi sibi iussit, ne, Patre figulo natus, prioris suæ fortunæ unquam esset immemor. Qui supra plebem, stannea quoque usurpant. Sed quibus honestiores non contenti, argenteis insuper utuntur, iisque inauratis, & vario opere calatis. Adeo, in hac quoque parte, prodiga rerum luxuries passim se exercet, ac stultitiam patiuntur nummi; nisi quod tamen in vasis & lanceis, argenteis, præter usum & decentiam, thesaurus inest, quia nimirum & durant, & in subitos casus statim prodesse possunt. Haftenus Henelius.

Nihil jam superest, quàm ut tribus indicemus verbis, quotnam morbis à nobis haftenus descriptis in designatâ aëris constitutione victu à nobis adumbrato antea usi perierint. Mense Januario mortui sunt 78. Februarius abstulit 92. Martius absorpsit 146. Aprili 138. numeravimus funera. Mense Majo 124. homines interempti sunt. Junio extulimus 91. Julius delevit 87. In Augusto tumulavimus 106. Septembri vero sepelivimus 112. In Octobri vitam hanc cum meliori commutarunt 87. Novembri occubuerunt 71. In Decembri autem decesserunt 67. Atque adeo hoc anno finem vivendi fecerunt 1199., in quem tamen censum non veniunt illi, qui in suburbiis aut templis à Magistratus Vratislaviensis inspectione exemptis requiescunt.

Ad pag. 133.

Gravior tortor est calculus vesicæ, cujus & diagnosi & cura valdè ardua est. Multa in Consilio quodam Germanico Collega noster D. Christian Helwich de utroque hoc capite disputavit. Nos pauca tantum ex isto huc transferemus. Cum autem, vesicæ calculus magnitudine, figura, situ, ac fortassis etiam substantia multum variet, facile apparet, cur tam diversis symptomatibus exerceantur, qui calculo vesicæ laborant. Fernelius lib. 6. de part. symptomat. & morb. cap. 13. p. m. 317. Inter propria calculi vesicæ signa primo loco ponit vagam quandam & oberrantem circa pubem & perinæum titillationem, dum exiguus & levis etiamnum est. In Wilielm. Laurembergio, prout ipse testatur, in dissert. epistol. de curat. calc. vesic. p. 8. non aliam, primo tempore, attulit molestiam, quam quod urinæ fluxum, quando ad vesicæ ostium,

cum lotio effluente delatus esset, nonnunquam impediret. Cum grandior calculus subest, ingens gravitatis sensus percipitur, qui valde tendit ac premit pubis regionem. Aurelianus lib. 5. *tardar. passion. c. 4. p. 225.* ait, sequi dolorem secundum pectinem atque veretri radicem & ilia & clunes & magis initio ac fine urinae reddendae, quae non raro, etiam prorsus ad aliquod tempus supprimitur, aut certe difficulter redditur, unde videas, alios membrum contrectare, extendere; foeminas quoque manus pudendis admoveere, eademque crebro scabere, ac alia indecora agere, ut urinam provocent, & dolores crebro redeuntes mitigent. Certum enim est, quod mictio crebrescat, adeo, ut tandem assidue mejendum sit, vixque possit urina cohiberi, prout optime iterum Fernelius notavit. Nihilominus ut primum coepit percurrere, quam mox tota incipitur, obviam nimirum impulso calculo, ac ita intercisa incidit mictio. At tum dolor alias universi pudendi ductum, alias glandem solam affligit, isque acerrimus sub emissionis finem, verbis Fernelii, cum calculus urinae cursu incitatus quasi proditurus sphincterem violentius comprimit. Aurelianus vim doloris hujus exprimit per fervorem incendiosum; quia verò graphice omnia describit, verba ejus hic legi omnino merentur: Sequitur, inquit, fervor incendiosus, item pulsus & extantia partis in passione constitutae cum jugi ac frequenti urinae reddendae desiderio, & repentina cessatio, ac rursus egestio fit cum dolore intolerabili per singulos mictus, ut extenti aegrotantes etiam ventum per podicem reddant, ac ad deponendam alvum sollicitentur. Quem mejendi conatum & desidendi cupiditatem à calculi magnitudine è perinaeo rectum intestinum & vesicae cervicem exstimulante rectè cum Fernelio deducunt Auctores. Urina, quam reddunt calculosi nostri, si Fernelium, Lommium, aliosque audis, alba ac crassa est, & cum grandior calculus jam diu in vesica detentus est, sedimentum ejus purulentum existit, aut narium muco persimile. Auctor. libr. 4. de morb. inter Opera Hippocrat. ait: urinam paulatim fluere, velut in urinae stillicidio, & esse cruentam, vesica nimirum à lapide exulcerata, juxta aphor. 79. sect. 4. Quibus in urinis arenosa subsistunt, his vesica laborat calculo. At verò ex his omnibus signis certo praesentia calculi in vesica colligi nequit. Ab excretis arenulis quam minus rectè deducatur lithiasis, tota die in hypochondriacis & scorbuticis experiri licet. Cardanus in Hippocr. aphor. p. 459. Mihi, inquit, ab annis hinc triginta rufae prodeunt & nunc etiam albae & quotidie & copiose atque omnino citra omnem calculi suspicionem, tam renum quam etiam vesicae. Quin etiam, quod longè majus est, jam toto decennio exacto tantum albae arenae adheret parietibus, adeoque concretæ, ut intra 15 dies, si non abluatur, tota lapidescat intus &c. Caetera autem signa calculi vesicae, quae recensuimus, etiam in gonorrhæa observantur. Hospes sit in praxi & tyro, qui ignoret, quantum patiantur ardorem in regione radice penis sub emissionem urinae, qui gonorrhæa virulenta infecti sunt. Nec minus atrox est is, quem in glande perpetiuntur. Adhæc in inveterata gonorrhæa vix matulam ex manibus deponere possunt, stimulaturque per consensum etiam alvus. Aegrè quoque vel exercitatissimus Medicus turbidam calculo-

calculosorum urinam sedimento non unius generis refertam, discreverit à *mucida & tenacissima illa materiâ, flava, viridescente ac fœtida*, quæ in gonorrhœa cernitur, quando in præputio abest *tumor, ardor, rubor, excoriatio, fissuræ purulentum plorantes ichorem*. Quando enim hæc adsunt, meritò suspicioni de gonorrhœa virulenta locus datur, quod etiam dicendum, quando *scrotum ardente & pruriginosâ erosione fœdatur, in tumorem attollitur, in rugas abit, asperitate crustosâ instar corticis alicujus digitos offendit, aut indurescit*. Confirmant etiam in probabili gonorrhœæ conjecturâ, *ulcera illa parva in virgæ genitalis reliquâ parte, si excoriantur, mollescant, suppurascant, colliquescant, particulamque cutis, quam obsident, erodant & abscedere faciant*. Sed si hæc omnia, ut subinde fit, in iis, quos gonorrhœæ labe inquinavit, non deprehendantur, iisdem premuntur symptomatibus, ut jam diximus, quibus vexantur calculosi, inde etiam fieri solet, ut illi obtentu calculi turpitudinem venerei morbi velare nitantur, quod crebrius fit, quàm credant inexperti. Hoc cum non lateret Viros doctos, in clinicâ praxi exercitatos, aliis modis præsentiam calculi in vesicâ explorare conati sunt. Galenus in *lib. introductorio c. 13.* iussit digitum per rectum intestinum in sedem immittere, hac cautelâ, ut *index inmissus reflectatur in priorem vesicæ partem*, ratus, calculum hac via tangi posse. Enimvero monente iterum Fernelio nonnunquam *summæ vesicæ adheret, & ex istâ quasi propendet nullumque calculi indicium manifeste exhibet*. Recte etiam monet Hildanus *de lithotom. vesicæ*: iis in partibus duos *tumores* atque *scirrhus* nonnunquam generari ac calculum mentiri, & symptomata similia inducere.

Alii magis illi explorationi fidunt, quæ per catheterem suscipitur. Sed vero quis sibi hoc tribuet, ut *rem tangibilem sensu auditus rectè certeque dijudicare possit, dum collusionem quandam ferrei instrumenti lapidem contingentis sentit. Impedimentum instrumenti vesicæ collum introire nequeuntis sine lapide à multis aliis causis provenire posse, qui neget, neminem futurum arbitramur. Adde, quod, cum per additionem augeantur in vesica lapides, ut plurimum fieri posse, ut nova facta additio, adhuc non indurata, nullam cum ferreo instrumento admittat collisionem.* (quod tanto majori gauderet probabilitate, si experientia comprobaretur assertum Beverovicii in *exercit. de calcul.*: calculos, quamdiu in vesica sunt, molliores exteriori præsertim superficie esse) *Ceterum nec illud hoc loco dissimulandum est, sæpè non tangi calculum ab explorante, quia vel in altiori vesicæ parte contineatur ille, vel in tumore crasso & viscoso sit immersus & involutus, ut præclare disputat Johann. Baptista Silvaticus Controv. 32. pag. 157. seqq. Conf. Ballonium paradigm. 61. & lib. 2. epid. pag. 247. Ex quibus omnibus constat, hoc quidem in affectu cognoscendo unicè Medico relinqui prudentem σοφισμὸν, innixum accurata præteritorum ac præsentium symptomatum cognitione, ut & juvantium & nocentium accurata exploratione.* Cardanus suggerit consilium, quod in re dubia, & perplexa sequi non abs re fuerit, his verbis in *cit. Hippocrat. aphorism. p. 467.*

Cum

Cum volueris scire certius, an aliquis calculo vesicæ laboret, jube eum equitare, saltare, exerceri vehementius, exhibe lapidem comminuentia, inde subsidentia in urina inspice, in qua si tribus aut quatuor diebus pulvis appareat, lapis est durus, si lapidum frusta & quasi arena, non autem arena tophus est, si nihil horum appareat, lapis procul dubio non est. Quanti verò æstimari voluerit consilium suum Cardanus, ex verbis illis, quæ annectit, colligas: Atque hæc sunt, quæ duobus millibus annorum latuerunt expositores. Cave tamen, ne exercendo magnum ardorem urina, aut, ut dicunt, uriginem intolerabilem efficias. Improbi enim & ignari medici maledicendi ansam, postquam bene facere non didicerunt, undique arripiunt. Ætatem etiam considerasse juvabit. Nam etsi procul absumus ab eorum opinione, qui calculum vesicæ puerorum & decrepitorum senum esse morbum cupiunt, (cùm experientia affatim edoceat, senes quoque calculum pati renum, nec infantes à malo hoc esse immunes, quem metuere prudentis Medici est, quando infantes absque signis dentitionis & coaguli lactis crebrò vomunt) nihilominus negari nequit, quòd majori ex parte, senes & pueri vesicæ calculo torqueantur. Et sanè de his posterioribus notum est, quòd obnoxii sint morbis lymphæ & glandularum. Quando autem lymphæ coagulum patitur & stasin, non solum tumores glandularum oriuntur, sed & calculus vesicæ; Modum declarare annititur Auctor. lib. 4. de morb. qui consuli potest. Cur verò senes calculo vesicæ affligantur præ adolescentibus juvenibus ac viris, explicare conatur Cardanus jam ante laudatus, præcipuèque accusat latiores in renibus meatus materie crassitiem ac visciditatem, & calorem sicciorum. Cruditas autem ventriculi ac ἀπεψία utrique ætati familiaris primum ex ejus mente, inter causas antecedentes occupant locum.

Calculus vesicæ remotionem sui omninò indicat. Removetur autem vel operatione Chirurgicâ, quem lithotomiam vocamus, de cujus administranda modo consulendi sunt tum alii, tum Hildanus in peculiari libro, Franciscus Tolet. in tractatu Gallico de la litotomie, ou de l'extraction de la pierre hors de la vessie, Joh. Mori in observ. sur la maniere de tailler dans les deux sexes pour l'extraction de la pierre pratiquée par Frere Jacques. Cornelius Solingen p. 289. ut & in der Nieuw lichtende Fackel der Chirurgie of hedendangze Heelkunst Cornelius van de Voorde, Hieronymus Fabric. ab Aquapend. Scultetus &c. vel medicamentis. Uterque verò modus pluribus obseptus est difficultatibus.

Et prior quidem ante non multos annos etiam Celeb. Medico Olao Borrichio fuit fatalis. Is enim cum ferro se submisisset, magnitudo & durities calculi, qui neque per incisuram extrahi, neque instrumento, absque presentissimo vitæ periculo diffringi potuit, optatum elusit successum, & tandem molestiæ, insomnes noctes, indomabiles dolores, in mortem terminata sunt, ut referatur in historia vitæ Posterior autem itidem plerumque spem miserorum frustratur. Medicamenta enim, si aliquod operæ pretium facere deberent, calculum vesicæ comminuere oporteret; at verò de hac virtute medicamentorum lithon-

lithontriptica, ut jam ante monitum, non immeritò dubitatur, quâ si vel maximè pollerent, cogitandum tamen, quanta sit *ab ore ad vesicam distantia*, quam cum considerat Fontanus *lib. 3. cap. 3.* externa velut efficaciora præfert internis. Fiat, per nos licet, periculum, an *aqua persicaria*, aliquem calculo vesicæ liberare queat, qua Gerardum Boot horis matutinis exhibita aliquem vesicæ calculo laborantem pristinæ restituisse sanitati refert Robertus Boyle *de utilitat. Philos. Experim. p. 2. s. 3.* Subeat examen *crystallus* magno labore in liquorem solutus, & videbitur frustra jactari à Turriano, vesicæ calculum comminutum hujus ope & fractum fuisse. Deprædicet spiritum ☐æ Schroederus, ☐. è calculo vesicæ elicatum Hæferus, ☐. M. Sylvius, alii alios, & spiritus & essentias & tincturas; ægros parum levaminis hinc sentire certum est. Heic potius pollicem premimus Rondeletio, qui *lib. 3. c. 44.* medicamenta ☐ frequenter ☐ ampla mensurâ sumi debere contendit; ut & Heurnio *Method. prax. lib. 2. c. 13.* omnia medicamenta calidiora ferio dissuadenti. Non prorsus autem rejiciendum censemus antidotum Lauremberg. *ex epistol. cit. p. 20.* quæ ita habet:

℞. Afellor. ppt. ℥ij.
Sangu. hirc.
Spong. ros. sylvestr.
Sem. volar. purpur. aa. ℥j.
Spec. lithontript. ℥ij.

Hujus antidoti acceptæ sunt ℥ij, decocti diuretici ℥x. ☐. juniper. ℥ij, ex mixtis factum est pharmacum, quod assumsit mane horâ ut plurimum quintâ. Effectum, quem exeruit, his verbis describit: ubi secundâ vice hausissem, post horas plus minus quatuor, sub pubis osse ad regionem ostii vesicæ, magnos cæpi sentire dolores, paulo post parum urinæ profluebat, ☐ cum eâ Lamella exigua, instar squamæ piscis, ampla, subrubra, quæ licet aliquam visciditatem habere videretur, ad tactum tamen in sabulum resolvebatur, ita ut manifesto apparet, tunicam vel crustam esse à majore calculo solutam; ☐ tandem hujus usu continuo à calculo vesicæ liberatus fui. Hæc ibidem & alia plura. Si quis tamen hoc medicamento uti vellet, ei cum Mercuriali *lib. 3. prax. c. 33.* effemus Auctores, ut corpus universum inediâ ☐ purgatione ante ejus usum præparet, ne uberior affluxus viscosorum humorum istius usu ad vesicam concitetur. Scimus cum utilitate adhibitam solam herniariam c. betonica in juscule coctam, ut ☐ *lap. 69. ℥ij. cum juscule limonum*, quod medicamentum laudat Poterius *observ. ☐ curat. Cent. 3. c. 72. ☐ 73.* Nec audemus rejicere oxymel cum anagallid. ☐ parietar. aquâ remixtum, quod, ait Guarinonius, mirifice fecisse vidi. Injections Rolfincius planè magni non æstimat, Zechius inanes judicat, admittit Cardanus cum aliis. Frustra solutionem calculi ab iis speres. Panfa quondam, narrante Clarissimo Sachio nostro in *Gammarologiâ per syringam* injecit, solutionem oc. 69. in ☐. ☐æ factam, eamque eximie solvere calculum

S

ita

ait Sachsius; sed nos imitantes eum nullum vidimus effectum aliquâ laude dignum. Hoc quidem certum est, quòd, quando *ostium vesicæ ab illiso calculo saucium est*, & *urina cum dolore profluit*, *mitigatio sequatur injectis per siphonem demulcentibus*, e. g. *lacte*, *oleo amygd. d.*, ut & *emulsionibus feminum*. Quantum ex his omnibus colligere licet, melius fuerit, *cavere generationem calculi*, quam *comminutionem generati ullo remediorum genere tentare*. Prohibent autem, si Cardanum audimus, *lapidis generationem sex sequentia*: *fomentum minimè potestate calidum*, *expressio diligens sedimenti*, *dum mingitur*, *quæ fit subsultum mingendo*, *ususque olei*, *abstinere à caseo*, *tum his, quæ ex lacte fiunt*, *tum à terreis ac salsis*, *tum à cruditate cavere*.



HISTORIA
MORBORUM,

QUI

ANNO MDCC.

VRATISLAVIÆ
GRASSATI SUNT,

ADORNATA A

LEOPOLDIN. ACADEM. NATUR.

Curios. Collegis VRATISLAVIENSIBUS.

HISTORIA

OF THE

AMERICAN

WARRIORS

OF THE

INDIAN

LEOTOLDIN ACADEMY NATURAL

OF THE



P R Æ F A T I O

A D L E C T O R E M.



Istoriā morborum, superiori à nobis anno editam, doctissimis & in arte faciendâ exercitatissimis Viris non displicuisse, ex epistolis ad nos scriptis læti intelleximus, Ab iis quoque nobis calcar additum est ad pertexendum hoc pensum, cui tanto promptiori, inter concatenatos clinica labores, animo, manus admove-

mus, quo magis nobis perspecta est eorum in judicando dexteritas, ac de publico bene merendi studium. Aliquod in Medicinam ex ejusmodi labore redundare posse emolumentum, Ipsi contendunt: quam laudem etiam si nobis minus arrogemus, lubenter tamen fatemur, morborum historiam exactè descriptam, plurimum ad artis nostræ incrementum facere. Graviter Ludovicus VIVES lib. 5. de tradend. disciplin., artes ne constare quidem possunt, si historiam sustuleris. HIPPOCRATES, GALENUS & alii Medici, quàm sæpe historicos agunt, dum experimenta narrant. Ipsa adeò Medicina ex historia collecta est, sicut PLINIUS ex M. VARRONE perhibet. Quot morborum genera, quomodo, & ubi orta, aucta, compressa, sedata, memoria vetus prodit; sine quorum notitia, manca est Medicina, & potissima sui parte orba, quam ex tot undique experi-

mentis necesse est colligi, ceu aquas pluvias, stillatim. Illi autem, qui morborum historiam fastidiunt, ac alto contemnunt supercilio, quod facient sine nostra indignatione, Φιλομαθεῖαν suam addicant, & industriam impendant in hypothesebus curiosis novis cudendis, poris solidarum partium & viscerum exilissimis describendis, firmas quoque glabras, flexiles, obtusas, terraqueas, salino-athereas, ramosas, re-torridas &c. particulas lynceis oculis in humoribus visas, in tabulis adumbrent; & sero olim discet Posteritas, quantum opis hæc lecto affixis afferant. Et nos in his olim studium non leve posuimus, quod sine dolore memorare vix possumus; nunc annis & iudicio maturiores scimus, quod sint apina tricaque & si quid vilius illis, quas ne titivillitio quidem emptitaremus. Per nos etiam licebit, ut porro commentariis inutilibus Auctores quosdam onerent & turgidiores reddant, aut, si iste summus Sapientiae gradus est, in aliorum scriptis refutandis versentur tanquam novi athlete & promachi, ac de amplo brabeo; nempe fumo sapientiae, iis gratulabimur, certi cum Celeberr. W E D E L I O, secundum sapientiae gradum esse, non occupari in commentando, vel refutando. Nihilominus tamen, si quisquam aliquid adversus nos parturierit, triumphum non paret; nondum abjecimus clypeum, nec eundem ab-jecturi sumus. Vale!



I. N. J.



N Januario anni post millesimum, à salutifero Virginis partu, septingentesimi, frigus Vratislaviae usque ad Lunam πανσέληνον satis erat remissum, quod nec nerveas fibras spasmodicè corrugare, nec glandularum subcutanearum meatus constringere, aut poros cutis coarctare aptum; reliquis vero ejusdem mensis diebus, usque ad interlunium, nebulae corporibus infestae, aërque humidus, & feri copiam accumulare, hujusque inter glandulas laxiores stagnationi, ansam præbere, tonumque partium relaxare, ac enervare potis erat. In Febuario,

jam grato solis jubare illustrabamur, jam verò pluviis & nivibus expositi torporem corporis ægrè declinare poteramus; frigus verò per aliquot dierum intervalla quodammodo adurebat nos, cum Luna totâ nocte luceret. Usque ad medium ferè Martii perpetuae frigidi & tepidi aëris vicissitudines notabantur, quas ad finem Mensis usque turbida ventis ac pluviis molesta tempestas excipiebat.

Præter morbos superiori anno enumeratos, variolæ grassabantur, & quidem multò frequentius distinctæ, quàm confluentes. Primis Variolæ. ab invasione diebus, seu tempore ebullitionis, nunquam non febris acuta aderat. Nec meminimus nos, quod variolæ quibusdam sine febre proruperint, tametsi sedulò attenderemus, an gemina illis, quæ Forestus lib. 6. Observ. 49. & 50. aut Rhodius Cent. 1. Observ. 24. ex ore Prævotii recitant, nisi fortassis Viri pariter doctissimi & expertissimi in observationibus suis, humano more, hallucinati, exempla Vratislaviae deprehendere liceret. Continua quidem illa febris erat, in his tamen vehementior, in aliis remissior, ejusque exacerbationis satis incertæ, nisi quod tertio die recurrentes aliquibus tertianæ febris suspicionem moverent. Præcedebant ferè febrim hanc lassitudo & gravitas corporis, pandiculationes & oscitationes, dorsi lumborumque dolores, qui in sexu muliebri, si adultioribus mulieribus credimus, parturientium dolori non dissimiles, pulsus ad spinam dorsi & sensus pruritûs ac punctiōis in cute, sed horror & rigor, præsertim recurrens, rarius paulò, quem tamen in Angliâ satis frequenter variolis laboraturos invadere ex Sydenhamio intelligimus. Frequenter etiam vomitus à primo morbi insultu fatigabant, iique interdum immanes, aut si hi abessent, præcordiales anxietates gravissimæ cum inani vomendi conatu conjunctæ ægris negotium faceiebant. Alvi fluxus rari-
iores

riores observati, & hæc evacuatio non adeò é re ægrorum est, fortè quòd motum materiæ à centro corporis ad peripheriam ejus protrudendæ impediat, & retrocedere ad interiora cogat: Itaque alia apud nos est hujus fluxûs ratio, quàm in Belgio, ibi enim, si credimus Auctori Tentaminis Medici *de Variolis p. 39. Pueri multi in principio, augmento, & statu morbi fluxu alvi laborantes sine noxâ advertuntur.* In pluribus alvus, sine damno ad aliquot dies erat adstricta, in paucissimis etiam urina suppressa; vix visi, qui sæpè se ad reddendam urinam urgeri conquererentur. Urina varia erat, quorundam flammea & intensè rubra; nonnullorum turbida & opaca, qualis jumentorum esse solet, quæ post eruptionem variolarum interdum clarior reddebatur, interdum verò per aliquot dies à protrusione adhuc turbida excernebatur; aliorum autem pallida, unus alterve cruentam micturiebat urinam. Nares etiam frequenter sanguinem stillabant & possemus hîc mutuari verba Stubbs in respons. Thomsoni: Multos cognovimus, qui suapte naturâ hæmorrhagias passi sunt iisque ad 18 vel 20 diem, magno cum commodo. Propensio in sudorem non tantum in adultioribus ingens erat, ut Sydenham observavit, sed etiam in tenerioribus. Nonnulli, præprimis qui erant temperamenti phlegmatici, dormituriebant, alii de turbulentis conquerebantur insomniis, ac sæpè expavecebant, ac altos subinde in illis tollebant clamores. Capitis dolores jam gravativi, jam punctorii, cum temporum pulsationibus erant molesti. Facies tumebat, atque maxillæ rubebant. Oculos prurientes rubentes ac splendentes, quin imò aquâ suffusos quotidie intueri licebat. Lacrymæ quoque injussæ aliquando manabant. Palpebræ ac nares dolore pruriginoso vexabantur. Præterea anhelitus difficultas, vox rauca, tussis sicca, cordis palpitationes, & tandem etiam deliquia non rarò observabantur. In aliquibus habitu corporis densiori præditis etiam saliva in majori quantitate rejiciebatur. Et hinc quadantenus confirmare licet sententiam Listeri, qui arbitratur, causam ejus alivationis latere in ostiolis cutis obstructis. Pars magna ægrorum corpus variè jactitabat, ipsique infantes in cunis hinc inde sese volutabant. In genere musculofo varias subinde motitationes, quas nec tumorem nec convulsionem, aut rigorem dici posse arbitramur, notavimus, in eâque sumus opinione, illas quasi subsultus momentaneos musculorum prorsus esse similes iis, quos Doctissimus Simon Pauli Medicus Danicus Celeberrimus *in digression. de febb. malignis p. 34.* nominat non incommode *ἰππον δέσματ' &c.* in quo partes aliquas blandè leniterque vellicari persentiscunt ægri ceu motacilla avis caudam motitare, aut mus sub panno ad parietes tricliniorum expanso, seu ludere, seu errare liberè hinc inde observatur. Hunc etiam fanis accidere Clarissimus Vir autumat, quod ob aëris subitas mutationes, cœlo jam pluvio, mox sereno aut sудо existente, calido, frigido, temperato, tempestuoso &c. venæ & arteriolæ musculorum, imò ipsius cutis, simulque sanguis in iis contentus, means, remeans, instar Euripi, ita offendantur, ut *αἰσχροί*, ac, ut par erat, ac naturaliter convenit illi, circulari aut distribui nequeat. Hæc utut ingeniosa sa-

tis sunt, malumus tamen ejus causam potius in subitam tensionem, sive tonum ac relaxationem vel remissionem fibrarum muscutorum, quàm vasa sanguifera conjicere, ac undulantem in iis sanguinem, cum ejusmodi alterationes toni etiam alibi satis existant manifesti. Enimverò Nos in Stadio Nostro pergamus. Minimè etiam rarò teneriores invadunt motus convulsivi, iique vel particulares e. g. in labiis, oculis &c. vel magis universales, hoc est, in partibus pluribus. Et sanè ex epilepticis motibus, quibus infantes, dentitione peracta, corripuntur, non vane, cum Sydenhamio, variolas in procinctu esse iterum iterumque prædiximus. Præterea in satis multis etiam deliria observavimus. Ordinariò post valetudinem, die quarto prorumpébant. Vidimus tamen, in quibus vel tardius, vel citius prodirent. Notum autem satis est in praxi occupatis, quòd, ut accuratè Sydenham describit, in eruptione subrubræ primò pustulæ tenuissimarum acicularum puncta æquantes, sparsim se prodant per faciem, collum, pectus & corpus universum; quanquam partes illæ, in quibus primò apparent, minimè certæ sint; ubi inter initia quidem exactè definire vix licet, sintne variolæ futuræ an morbilli. Ne tamen pulicum morsus haberemus pro variolis, memores fuimus, quod, ut optime Hafenrefferus in *Nosodochio lib. I. c. 5. p. 44.* advertit, *in pulicum morsibus, in medio tanquam punctum quoddam morsus vestigium insit, & hoc compressione non delitescat.* Nonnunquam genæ totæ rubro colore suffusæ, & una quasi lata macula conspiciébatur, nihilominus tamen postea distinctæ pustulæ oriebantur. Sensim efflorescentes illæ maculæ subeunte humore agebantur in altum & evadebant fastigiatae ac distinctæ, quæ multò erant tutiores, si in basi essent rubræ, supra autem albæ, eminentes & molles, quàm illæ, quæ in latum exporrigebantur. Et sanè depressæ & malè figuratæ, ut & duriores, quæ instar verrucarum sese habebant, nunquam fuere sine periculo. Quo paucioribus corpus erat conspersum, eo magis res in vado erat. Mali ominis erant, quamquam non adeò frequentes, lividæ, violaceæ, certi verò lethi prænunciæ, quæ maculâ nigrâ in medio deformabantur; id quod in Angliâ etiam compertum; ut videre est in *Mortono in pyretolog. p. m. 39.* In quibusdam cacochymicis corporibus notavimus in interstitiis variolarum petechias, aliasque maculas, nonnunquam etiam vesiculas aqueas, atque inde ut plurimum funesti eventus præsagium cœpimus. Ejus verò generis variolæ, quæ de malignitate non possunt non esse suspectæ, hoc tempore in paucis, ut diximus, spectabantur. Paulò ante narratum est, quòd symptomata cum eruptione variolarum ut plurimum conquieverint, non defuere tamen, qui feбри, difficultate spirandi, anxietate, cruciatibus insignibus circa lumbos, etiam post eruptionem, vexarentur. Atque hi non erant extra periculum constituti, evasere nihilominus plerique, modò abessent inexpugnabiles vigilæ, phrenitis, crebra deliquia, palpitationes cordis, motus convulsivi, urina nigra, vel hæmorrhagiæ enormes, alvi profluvium, hæc siquidem atrocia symptomata mortem denunciabant. In aliquibus admissò frigore, alioque incommodo regimine, retrocedebant, iterumque occultebantur, non sine summo discrimine vitæ. Et profectò de hac actum est,

T

ut

ut ex pallore, frigore extremorum algido, & anxietatibus immanibus, & denique rebus per momenta in pejus ruentibus, colligere licet, nisi iterum expellantur. Cæterum etiam apud nos circa octavum, à primo insultu, diem, in facie intervalla pustularum prius alba rubere incipiebant, in tumorem attolli, & dolore tenfivo affici, extendebantur palpebræ, & ut vesica inflata, haud raro, oculos claudebant, quæ & in Angliâ ita fieri discimus ex Sydenhamio. Proximæ à facie intumescebant, manus digitique distendebantur. Calamitosum esse, si pustulæ satis commodè elevatæ, vel suâ sponte, vel externâ aliquâ de causâ subito concidant, iterum iterumque experti sumus. Constat verò satis, quod in statu inflammatoriæ suppurationis nova febris accendatur. Variolæ debite elevatæ ac maturæ, pus fundebant satis coctum. Sensim sanies illa exsiccabatur, relictâ in mediò, post corrugationem, fofsulâ, ac ultimò variolæ exarescebant, & decidebant, quod, ut optimè notat Clariss. Wedelius, circa diem decimum quartum contingit, postquam ut plurimum à die XI. decrementum fuere sortitæ. Nihil autem attinet hîc commemorare, quod post hoc tempus occurrerint vestigia variolarum rubicunda, transparente per cutim attritam sanguine, & sæpius varii generis cicatrices remanserint, cum hæc non temerè quenquam lateant. Hoc neutiquam silentio prætereundum, quod variolis exsiccatis, majores tumores & abscessus subinde in artubus observaverimus, & licet tùm variolæ vel malignæ, vel epidemicæ non grassarentur, testari tamen possumus, ejusmodi abscessus plorasse subinde pus acerrimum, venas, nisi in tempore occurreretur, exedisse, consumpsisse carnes ac ipsa vitiasse ossa, & membris omne robur ademisse. Qualia duo miserranda imprimis exempla viderunt DD. Samuel Græf & Maximilianus Preus, ille in mercatoris filiolo tenerrimo 18 septimanarum, hic in pannificis filia unius anni ætatis, ex tumore & abscessu sinuoso circa flexuram cubiti dextri sub variolis confluentibus enato, ossa simul ibidem carie afficiente, & septima post eruptionem variolarum septimanâ filiolum, octavâ verò filiolum jugulante. Pariter quoque sub variolarum cursu in pueris quibusdam conspexerunt glandis cuticulam à lymphâ acriore & fervidiore in vesicas ingentes pellucas magnitudine castanearum elevatam, cum insigni simul rubore inflammatorio circa frænum, distorsioneque enormi totius colis, quemadmodum in asciticis quoque fieri solet, cataplasmate tamen ex speciebus emollientibus & discutientibus feliciter curatam.

Varias sensuum læsiones, à variolis etiam ritè tractatis, e. g. vitia oculorum, depravationes organorum auditûs & olfactûs &c. aliquoties notavimus, ut de noxis gravioribus pectoris ac artuum, paralyfi &c. jam non dicamus.

Cùm verò, ut optimè Mayerne in *appendice ad praxim Medic. p. 596. & seqq.* duo sint maximè periculosa tempora, initium eruptionis, alterum à IX. die ad XI. quando maturescunt, ad utrumque in curâ respeximus sollicitè.

In primo quidem consideravimus gradum effervescentiæ febrilis, præ oculis habentes pulsum, calorem, sudorem &c. Piaculum nobis fuit, si motus & agitatio jam satis magna in sanguine deprehenderetur, ebullitionem in infantum,

fantum, puerorum juvenumque corporibus calidioribus remediis augere, unde etiam apud nos exularunt tinctura bezoard. —.eboris, C.C. pulveres bezoard. myrrhat. c. salib. volat. misti &c. Religioni etiam nobis duximus intempestiva calefactione, cooperturâ lectorum, plumis distentorum, ac pannorum, igni, in sanguine, oleum affundere, alienissimi præterea ab obtrudendis jusculis, quæ vocant consummata, aut aromatibus, ut ferè mos est, conditis, imò in vehementiori istâ sanguinis despumatione, victum refrigerantem, moderatissimè calidum aërem (cavendo nihilominus præcipites refrigerationes) commendavimus. Novimus præivisse hîc nobis ipsos Arabes, qui seculo ferè duodecimo, primi hunc morbum descripserunt, ejusque curandi methodum ad nos transmiserunt; imò fortè primitus eundem etiam experti sunt, ejusque seminia & contagia ad alias gentes propagarunt juxta Sidobr. *de variolis c. 1. § 8. p. 6. 7. 82. 86.* Nam & hi, ut constat ex Avicennâ, variolis correptos cibari voluerunt jujubis, dactylis, lentibus, cucurbitis, tamarindis, succo prunorum, quibus quidam in Angliâ juscula alia, alterata acidis, e. g. acetosâ, berberibus, omphaceo uvarum, limonibus &c. haut incommodè adjungunt. Nos quidem in enormiori æstu, & hæmorrhagicis sanguinis exundationibus, tum subacidis aliis, tum succo citri, aut syrupo acetositatis citri diligenter usi sumus, tum ne quidem à nitrosis abstinuimus.

Venæ sectio ferè apud nos celebrata non fuit, quamvis minimè dubitemus, eam habere locum in initio ante eruptionem, in intensiori sanguinis ebullitione, si æger sit ætatis provectioris (quamvis Cl. Rolsincius ne tenellulam puerorum ætatem eam impedire scribat *lib. de febb. c. 80.*) adsit plethora, cum pulsu magno & vehementi, & robur virium infractum, si diætâ vinosam & aromaticam sectatus, & tandem nulla malignitas appareat, modo ante eruptionem celebretur. Nam etiamsi satis gnari simus, quòd etiam post eruptionem à V. S. Mercurialis alique non abhorreant, nos tamen periculo eam non vacare, imò lethalem esse posse, cum Vesalio credimus. Scrupulum illum de turbato per V. S. naturæ conatu atque humorum ab extimis ad intimas corporis sedes retrocessu doctè eximit Caldera *in Tribunali medico lib. de Variol. c. 9.* ac simul evincere satagit, quòd nec vomitus nec ventris fluxus sanguinis missioni contraindicet. Confer etiam Bartholinum *in Cist. Medic.* Nec ambigimus etiam loco V. S. surrogari posse cucurbitulas, ac eas rectè applicari lumbis, natibus, poplitibus, id quòd facere solitum Mercurialem patet ex ejus *lib. 1. de morb. pueror. c. 3.* qui hâc in re etiam sibi consentientem habuit Riverrum.

Avarissimâ manu dedimus opiata, quæ sanguini æstuanti frænum injicere aliàs non ignoramus, & ab ipso etiam diafcordio ordinariò ferè abstinuimus.

Cæterum cum Willisio, si effervescentia illa nobis justo videretur minor, lenis & blanda diaphoresis placuit & hinc cardiaca moderata aliquoties in die exhibuimus, rati nos eo ipso naturam ducem sequi, cum diaphoretica ad circumferentiam propellant, minimè aliàs inquirentes, an, quòd Willisio placet,

natura toto tempore eruptionis unam & continuam crisin moliatur. Elegimus verò hîc ea, quæ simul figunt & præcipitant, qualia sunt mater perlar., corall. ppt., ꝑ. d., C. C., lap. bez. oriental. & occidental. Interdum emulsi-ones ex sem. nap., aquileg., citr., c. ▽. card. b. scabios., scord. &c. factas & debite edulcoratas, ut tenellorum gustui adblandiremur, propinavimus. Ægris phlegmatici temperamenti etiam calidiora, in quorum numero sunt tincturæ bezoard. variorum, essentia myrrhæ, scord. &c. pro re natâ exhibui-mus; ut vel hinc videas, nos non approbare eorum sententiam, qui solis re-frigerantibus, vel solis præcipitantibus incumbunt, posthabitâ expulsi-ione. Pur-gantibus in hoc morbo apud nos locus nullus, imò propemodum hîc sub-scribimus laudato antea Mercato, Rudio, Minadoo, aliisque, qui eorum usum non satis tutum arbitrantur. Nec temere imitandum hîc Sylvii censemus ex-emplum, qui purgantibus & vomitoriis in principio variolarum sæpius est usus. Imò ne Enematibus quidem naturâ in expulsi-ione occupatâ, alvum ir-ritavimus, quâ in re nobis adstipulantem habemus Frid. Hoffmannum Senio-rem. Interim prorsus non negamus, in certis constitutionibus aeris aliquan-do lenientia tutò posse dari, id quod probat Ballonius *lib. 1. Epidem. & Epheme-rid. p. 37.* Et in præservatione quoque à variolis non sunt usus contemnendi cathartica.

Non possumus non hîc ὡς ἐν παρώδῳ monere, nimis audacem nobis vi-deri assertionem Cl. Dolæi, qui, cum multa scripsisset in liquoris antivariolosi, quem cum Waldschmidio invenisse aliunde nobis constat, laudem, quam ei minimè detractum imus, tandem in hæc verba prorumpit, in *Encyclopædiâ me-dicâ & dogmaticâ lib. 4. p. 130*: *Tot liquoris nostri antivariolosi videmus ef-fectus, ut spondere audeamus, neminem imposterum variolis mori posse, modò hoc utatur medicamento & calorem lecti primis fugiat diebus.* Innotuit qui-busdam ex nobis descriptio ejus liquoris, tantam autem virtutem in eo depre-hendere minimè potuimus. Profectò non injurii sunt in manes Doctissimi Dolæi, qui nimium hoc encomium adscribunt cœco in inventa propria amorî; adeoque in hoc remedio insigne prostat exemplum, quòd non tantum paren-tes filios, licet non optimæ indolis, & poëtæ sua carmina, sed & medici depe-reant sua medicamenta.

Ultimò alterantibus selectioribus & confortantibus sitim profligare & se-ri defectum supplere, ejusque acrimoniam retundere conati sumus. In ejus-modi medicamentorum censu sunt tum ante jam laudatæ emulsi-ones, deco-cta scorzonæ c. C. C. decoct. citr. papaveracea, hordeacea cum feminibus foeniculi, lentibus excorticatis, ficubus, dactylis &c.

Appetente exulcerationis tempore, & pustulis non debite sese attollenti-bus, pulveres bezoardici, tantillo myrrhæ & croci grano uno alterove remixti suppetias tulere exoptatas. Variolas planè maturas & pure acriori turgen-tes rarius quidem fecimus aperiri, nihilominus quidam Nostrum meminit. se pauperioribus non sine successu fuisse Auctorem, ut exanthemata ejusmo-di in magnum ulcus concreta vel acu aperirent, vel etiam forficibus capita refe-carent.

carent. Dum variolæ exarescerent, pulveribus, quorum mentionem fecimus, addimus lap. 69., de quorum virtute balsamicâ minimè aliàs ambigi solet. Symptomatibus magis fonticis remedia Practicis celebrioribus usitata opposuimus. Inter ista frequentiora sunt 1. vomitus diuturniores & graviores, quos bezoardicis compescuimus. 2. Hæmorrhagiæ narium nimix, in quibus sistendis internè nitrosa, externè autem camphora c. aceto aliquid laude dignum præstitit. 3. Convulsiones cum anxietatibus, tremoribus, pavoribus in somno, quibus in circumstantiis opitulabantur, quæ sanguinis distributionem æquabilem promovebant, quibus prælucent temperata alexipharmaca, non neglectis cinnabarinis. 4. Faucium, laryngis &c. pathemata, æstus inflammatorii, quorum mitigatio à notis mucilaginis, gargarismatibus & lacte ipso non vanè expectabatur. 5. Mictio cruenta, cui tollendæ lenientia, emulsiva & diluentia &c. inserviunt. 6. Diarrhææ & dysenterix, utut rariores, à quibus bezoardica & anodyna in dosi refractâ ægri nostri liberabantur. 7. Tumores emplastro de meliloto, aliisque emollientibus & suppurantibus auscultabant.

Alia mitiora hic loci recensere non vacat, nec immorari placet commemorandis iis, quibus macularum vestigia abolere licet, in quibus recitandis diligenter versatur D. Mayerne. Nihil certius verò tutiusve observavit D. Graffius sapone Neapolitano balsamico, si partes affectæ bis in die hoc illinantur & post quadrantis horæ spatium aquâ simplici abluantur. Coronidis loco tribus monemus verbis, nos, tametsi satis multos tractaverimus varialosos, hætenus minimè deprehendere potuisse, quod variolæ sint animatæ, ac innumerosorum minutissimorumque, vel atomorum ad instar insensibilium, vermiculorum pullago, quod Clariss. Langius defendit: Id extra controversiam est, quòd aliquando variolis laborantes infestentur vermibus, & hi sub crustis iterum fuerint deprehensi, id quod & nos vidimus, & ante nos præter Zacutum, Joëlem, Sennertus, Borellus, Crato aliique; Conf. Bartholin. *Cent. 2. Epist. 85. Cent. 5. histor. 20.* Rhodius *Cent. 3. Observ. 64.* Ephemerid. *Nostr. Dec. I. ann. 3. Observ. 28.* At verò hinc neutiquam colligere licet, quod ipsa variolarum ratio & essentia sita sit in hâc vermium pullulagine, quippe quam etiam cum multis aliis complicari morbis notum est, ut in Compendio cernere licet in *Cynographiâ curiosâ Sect. 4. c. 8.* celeberrimi Collegæ nostri Paulini. Vidi-mus aliquando variolas non pure sed flatu turgentes, ex quibus tamen inferendum minimè est, variolas inter morbos & tumores flatulentos numerari. Diximus de variolis, quæ satis fuere hoc anno benignæ, multò autem frequentius, hoc, quo scribimus, & cum majori clade fuere grassatæ. Præprimis autem confluentes stragem aliquam dederunt. Et ab hâc clade domus Collegæ nostri D. Helwich non fuit immunis. Confluentes enim variolæ trimulam optimæ indolis filiam, parentum & domesticorum amorem & delictum, Mariam Theodoram d. 9. Mart. more erysipelatis corripiebant & sequentibus diebus in facie sibi invicem implicitæ vultum instar vesiculæ rubræ contegebant. Diceret puellam hanc oculis Sydenhamii fuisse objectam, cum historiam vario-larum

larum confluentium adornaret: ita prorsus vivis coloribus ejus morbum descripsit. Maturè satis intumescebat vultus, palpebræ extendebantur, & ut vesica inflata oculos claudebant, & nimis citò, octavo scilicet morbi die, tumor recedebat, ita ut die sequenti oculorum ministerio iterum uti posset. Die morbi 10. facies planè flaccida erat, ac interstitia inter pustulas albescebant. Die morbi undecimo, hoc est d. 19. Mart. prægressâ turbulentâ admodum nocte, bis leniter convulsa, post preces, quibus animulam suam Creatori commendabat, placidè obdormivit, nimis acre sui desiderium in parentum animis relinquens.

Spasmodi-
ci affectus.

Varias morborum spasmodicorum species tractavimus eodem tempore, ac convulsionum genus non unum vidimus. In spasmo cynico compertum nobis, topica non tantum in principio nervorum, sed & bono cum successu musculis in latere opposito applicari. Tria illa capitis atque cervicis spasmodicorum genera aliquantò apud nos sunt rariora. Inter motus convulsivos, inter quos epilepsia primum tenet locum, satis communis apud nos erat in foeminis hysteris ac spleneticis ille gradus, quo sine ullis partium externarum spasmodis, omnium sensuum ac motus exercitio privabantur & concidebant ægræ ejusmodi foeminæ. Vulgus nostrum ait, *sie sind in Ohnmacht verfallen*; quanquam aliquando etiam Viri eundem affectum incurrant. Apud foeminas vulgò audit epilepsia uterina, & curabatur methodo à practicis præscripta. E contrario novimus, interdum corpus variis motibus concussum sensusque maximam partem fuisse integros, ita ut omnium, quæ circumstantes egerant, recordarentur finito paroxysmo, cujus commatis historias recitant Bartholin. cent. 2. hist. 9. ut & Doctiss. Neukranzius de purpurâ c. 33. cujus rei vidit duo isthoc tempore exempla D. Helwich, alterum in conjuge fabri murarii, sæpius in uno die ita concidenti, & ultra horas aliquando sine sermonis usu jacente, hæc enim cum à servâ duriusculè habita, in paroxysmo colaphis percussa esset, rediens ad se graviter de injuriâ istâ & ignominia cum ministrâ exposulavit, eandemque verberibus probè depexam ex servitio dimisit: Alterum in virgine plethoricâ antehâc vegetâ & robustâ, à cujus latere cum mors aliam virginem ejusdem lecti sociam improvisò abstulisset, eoque tempore Nostra tributum menstruum persolveret, in hanc miseriam, singulis mensibus instanti muliebri profluvio redeuntem, lapsa est, ita tamen, ut omnium dictorum factorumve, post superatum insultum, vivat memor. Acta, ad subigendum hunc affectum, varia, sed omnia hæcenus frustra. Singulare quoque Exemplum talis spasmodici affectus visum fuit D. Pauli in Matronâ Nobili, quæ miris modis eo agitata, integro & intellectus & omnium sensuum & loquelæ usu, tandem convaluit, optimumque per vesicatoria artubus applicata, nacta est auxilium.

Colica.

Colici doloris nomen Civitati nostræ non est incognitum, sicuti quondam Romæ tempore Principatûs Tiberii, quo id malum in illam irrepsit teste Plinio lib. 26. H. N. c. 1. Sæpissimè enim sævis illis doloribus homines apud nos torquentur, quos cruciatus diros non pauci arcessunt sibi, dum

dùm corpus distendunt pinguibus, omnis generis leguminibus, flatulentisque aliis, crudis ac dyspeptis, dùm cerevisiâ aut frigidâ vel acidâ vel recenti stomachum replent, aut nescio, quæ non alia deglutiunt, quæ idem præstant, quod aureus nummus ingestus, quâ de re Borellus *Cent. 4. Obs. 25.* & Bartholinus *Cent. 3. ep. 69.* evolvi poterunt, vel abdomen contra frigus non debite muniunt. Notum satis est, quod dolor ventrem inferum occupet, & licet sæpissime circa umbilicum feriat, nihilominus non raro vel sinistram, vel dextram abdominis partem affligit, unde ab ignaris, vel lien vel hepar affectum creditur, quin etiam circa dorsum, juxta renes, dolor ille versatur, & sicuti ut plurimum vagus & instabilis est, ita supra infraque umbilicum oberrat, & sub ipso cordis scrobiculo sæpe sese exerit, dextra tamen magis parte, atque hac ratione aliorum morborum, ipsius etiam pleuritidis larvam induit, cujus rei causa in anfractuoso coli situ quæri debet. Nam hoc, ut notum est, relicto intestino recto, ad sinistrum inguen divertit, ac ad sinistrum renem adscendit.

Non unius autem generis est dolor, sed modò *terebrans* ac rodens, ubi ferè pituita acida ejus causa est, subinde etiam in infantibus bilis porracea & æruginosa, modò *gravativus*, quem fovet pituita simplex, modò *distensivus* & *gravativus*, qui vel fæcibus induratis, ubi pali infixi sensus, vel flatibus &c. sua debet incunabula, hi enim, si non libere per superiora & inferiora erumpant, sed constrictis tunicarum intestinalium fibris, aut iisdem nervis nimium tensis (quod crebro experiuntur iræ, tristitiæ, mœrori dediti, aut suspicionibus nimium indulgentes) incarcerationentur, aut humoribus crassis, viscidis &c. obvolvuntur, aut propter herniam intestinalem, vel illapsum superioris partis intestini in cavitatem inferioris, aut propter tumorem canalıs cavitatem aliquo modo coarctantem, detineantur, exquisitissimorum tormentorum colicorum auctores sunt, & tantam intestini coli aliquando efficiunt tensionem, ut velut infantis brachium subesse videatur in foeminis. Sic colicos ejusmodi dolores atrocissimos ac pertinacissimos observavit in generoso quodam Equite, enterocele scrotali laborante, cum obstructione alvi & vomitibus biliosis ac stercoreis tandem, D. Preus, qui nec hernia reposita, nec aliis remediis cedebant, cucurbitulâ tamen, quam ventosam vocant, cum flamma regioni epigastricæ applicatâ, ex voto tandem sublatis sunt. Quotiescunque autem flatusturbas cient, magno cum murmure fremunt, & borborygmi aures adstantium obtundunt, qui futuram humidi dejectionem aliquando notant.

Sed tormentum immaniissimi doloris colici solet esse majus, si alvus sit adstricta, quod communiter fit, & sanè unicuique constat, quod ea sæpissime ita fit impedita, ut ne flatum quidem emittere possit, & si vel sponte, vel clysteribus sollicitata suo fungatur munere, excrementa sicca, vel more ovilli aut caprilli stercoris in globulos intorta deponat, non sine levamine, nam vel ructu, flatuve prorumpente, dolor ille solet imminui. E contrario aliquando alvus concitata est, & in quantitate satis magnâ ejiciuntur excrementa. Non raro etiam urget nausea & vomitus ac, in graviore malo, singultus & cardialgia. Cumprimis verò affligit anxietas cordis cum respiratione frequenti, conjuncta

cum

cum pavoribus, contractione crurum, torpore frigido, mentis hebetudine ac lipothymia. Pulsus celer est, ac, verbo Aureliani, parvus ac densus. Urina magis ut plurimum tincta ac spumosa, imò viis urinariis, in consensum doloris, tractis, ea nonnunquam supprimi solet. Ægri etiam siti satis magnâ premuntur, & ut de gravitate capitis, aliisque symptomatibus interdum supervenientibus, epilepticis, inquam, motibus, syncope &c. jam nihil dicamus, non infrequenter dolores colicos excipit icterus, obstructo à viscidis humoribus ac flatu, poro cholodochi; Hinc verò fit, ut bilis, quæ in intestina penetrare nequit, regrediatur in sanguinem, & cum eo totum corpus perambulet, ac illud citrino tingat colore. Vidimus dolorem colicum imprudenter emeticis tractatum, transiisse in hydropem.

Vocati ad ægros, dolore coli excarnificatos, ac de obstructâ alvo informati, eò laboravimus, ut eandem redderemus fluxilem, nec tamen unicum semper in enematis præsidium quærivimus, ac multoties experti, quasi ex tripode profectum illud Doctiss. Rolfincii effatum, *καταπραίνον unum, cum judicio adhibitum, in dolore colico unâ resolvi elavâ, quod vix decem attingunt clysteres*. Nec à verò abludit illud Riverii, observatum esse, quòd, cum æger quidam triginta clysteres, sine fructu, accepisset, alius Medicus mannæ unciam unam semis in oleo amygd. d. unc. duab. exhibuerit in pingui gallinæ jusculo, & ægrum dolore liberarit.

Quapropter non rarò curam auspicati sumus 1. à lubricantibus, pinguibus & oleosis, e. g. mannâ in aquis carminantibus solutâ, oleo amygdal. d. 2. Lenioribus purgantibus c. nitrosis & tartareis &c. prudenter mixtis.

Quâ occasione etiam virtutem Sii d. extollere minimè veremur. Eminere enim in illo virtutem eximiam carminantem, usuris erit manifestum. Novimus, quod à quibusdam purgantia c. opiatas in ejusmodi doloribus præscribantur, nostram tamen spem nullatenus adimplere, tametsi, ex præscripto Theoreticorum, aliquando nos fortiora purgantia c. anodynis, debita quantitate ordinasse, recordemur, imò potius majores subinde tumultus, citra scopum purgandi, ex istiusmodi pharmacis observavimus. Ubique itaque evacuantibus locus, optimo cum successu dedimus potiunculas ex ∇. laxat. vienn., syrup. Regio, domestico, rosarum solutivo, & sale essentiali tartar., spec. diatartar., pulv. gialap. &c. Habere autem lenientia locum, Practicis abunde constat, si dolor non hæreat fixus in fine coli intestini, sed aut in principio ejus, aut etiam in tenuibus. Nam licet dolori huic à parte affectâ colici nomen inditum sit, non tamen putandum, quòd alia intestina prorsus nunquam tortorem hunc patiantur, sed propterea huic cruciatui nomen colici tributum, quia colon illum frequentius patitur, eò, quòd utraque extremitate sit medio suo corpore angustius, unde hâc parte facile excrementis & flatibus repletur.

Itaque meminimus, nos lenitivo sopivisse colicam flatulentam, in quâ strepitus puri, resonantes & clari per intestina prorumpebant, cum nec enematis, nec carminantibus compesci antea potuisset, eò, quòd in superiori intestini coli parte, ut ex strepitu illo colligere licebat, excrementa admodum dura contine-

rentur.

tur. Quo in casu laxantia in formâ potiuncularum præscripta, reliquis antepo-
nenda esse censemus, quod & fecimus, quando flatus quasi stridorem refere-
bant, quippe qui exiguam humiditatem excrementis inesse notat. Nec est
contra Medici auctoritatem etiam ad hæc sordidiora attendere, quamvis *diagno-*
sticav τῆς διαβολῆς proderet, qui ad lectum ægri coram mulierculis aliisque cir-
cumstantibus, de hisce differeret. Per nos licet, sedes doloris etiam exami-
netur, modò memori sit in pectore, quod intestinorum positio mutetur nobis
jacentibus, à nobis stantibus, quâ de re consuli meretur Nicol. Chesneau lib.
3. Obs. c. 4. p. m. 256.

Ubi enematibus locus, ea etiam, adhibita fuere, atque plus vice simplici
observavimus in sanguineorum præsertim hypochondriacorum hysterica-
rumque doloribus colicis, clysteres ex carminantibus calidioribus, sem. cal.
bacc. laur., terebinthina magis obesse, quàm prodesse, ac his anteire enema-
ta ex emollientibus, inter quæ decocta capitum vervecum aut pedum vituli,
non postremam merentur laudem; Nam illa augendo tensionem fibrarum,
simul etiam augment dolorem, quem hæc minuunt & demulcent, quod etiam
præstat clyster ex lacte cum malvâ, quo sæpius utitur Celeberr. Wedelius;
omnibus verò palmam præripiunt olea expressa, loco clysterum infusa.

Topica ac externa profunt, tum potissimum, quando ab incauta refrige-
ratione malum oritur, aut aliunde nata obstructio transpirationem insensibi-
lem prohibet ac retenta effluvia in flatus obfirmat, quo in casu discutientia tem-
perata & humida actu calida, laudatissimi usus sunt, quemadmodum calidio-
ra in sanguineis & vino deditis, dolores intendunt; id quod etiam contingit,
quando sanguis stagnat, ac transitus ejus ex venis in arterias est impeditior, vel
etiam, quando orificia venarum mesaraicarum sunt obstructa, ut &, si lymphæ
per organa secretoria, prout leges œconomix animalis exigunt, separanda est
lenta ac viscida, in his, inquam, casibus omnibus, calidiora externa minus re-
cte adhibentur, ac temperatoria humida calidè applicata magis expectationi
respondent.

Interna, habito ad causam doloris respectu applicavimus.

In dolore à pituitâ acidâ profuerunt non tantum salia volat., prudenter
adhibita, e.g. sal. c. c. vol., succin. &c. sed ea omnia, quæ in cruditate acidâ
alias à Practicis laudantur, cujus generis sunt nota absorbentia, mater perlar.,
corall., crySTALL. montana ac cinnabarina. Sic novimus, multoties & refe-
rente D. Pauli, Illustri imprimis Personæ colicis doloribus ex accumulata in-
tra primas vias pituitâ acidâ tentatæ, & opiatibus ab imprudenti quodam Medico
exhibitis, in Iliacum morbum conjectæ, salia volatilia intra clysmata optimè
profuisse.

In molestiis à pituitâ simplici, danda opera est, ut saburra ex corpore
exigatur.

De cætero attendendum, an subjecta sint frigidiora, an calidiora; Istitis
optimè conducunt tum aromatica acrida, item essent. zedoar., galang., calam.
aromat., acori &c. imò ipsum balsamum Peruvianum: tum amara e.g. es-
sentiæ

sentia absinth., cent. minor. Majori autem æstu flagrantibus ea ferunt opem, quæ in acida cruditate convenire jamjam indicavimus. Optimè etiam se gerunt *salsa*, ut liquor terr. fol. tartar., tartar. vitriol. arcan. 2pl., cremor & cryſtalli tartar. &c.

Intenti etiam fuimus flatibus discutiendis, nihilominus decantatissimis illis carminantibus ∇.carmin., ∇. vit. Matth., physogon., essent. carmin. D. M. & Wed. ol. carm. M. ol. cort. aur., cumin., aneth., piperis &c. spir. menthæ essentific. juniper., cort. citr. &c. circumspectè usi fuimus, cum promiscuus & empiricus horum abusus, ut experientia docet, gravem inferat noxam, quam non facilè observare licet ex nitrosis & nervinis, ac ex haustu vini generosioris. Galanga & zedoaria eximii usus sunt in doloribus colicis, parum insequentibus, si virtus earum adjuvetur facculis paregoricis ex fl. chamom. R., sem. carv., bacc. laur. &c. In aliis atrocioribus doloribus cum successu licet abdomen fovere decocto hyoscyami ad exemplum Drawizii.

Colica biliosa.

In *Colicâ*, quam *biliosam* vocant, præter symptomata jam enumerata, adest æstus maximus (habitus verò corporis externus horripilationibus est obnoxius) qualis in ardentibus febribus esse consuevit, molesta est oris siccitas, graves sunt vigilæ, dejectus est prorsus appetitus, rubor faciei satis intensus in oculos incurrit, qui accedente ictero in flavum abit, singultus excruciat, anxietas præcordialis, conatus vomendi, ac non rarò ipse vomitus torquet, alvus in fluorem concitata est. Huic non raro per certa temporis intervalla in orbem redeunti molestiæ obnoxii sunt homines cholericæ & sanguineo-cholericæ diætæ calidiorem sectantes, quando vel brevi ante prandium & coenam, vel post cibum sumptum, iracundiâ effervescent, & nihilominus frigidiorum aut saculentum potum ingurgitant, vel dulcia fermentescibilia, in quantitate notabiliore, ingerunt. Facile enim apparet, quòd per impetuosam illam bilis sinceræ in duodenum dejectionem, præsentibus cibis fermentescibilibus ex subacidâ ciborum, & tenui ac sulphureâ bilis substantiâ, nascatur caustica quædam acrimonia, quæ exquisitissimo arrosionis sensu intestinum duodenum ipsumque ventriculum afficit, & si vomitu rejiciatur, fauces non rarò excoriat, ac dentes stupefacit, aut per alvum exturbata, intestino recto, erosionem & sensu ardoris ac pruritûs infesta est.

In curâ, tametsi alterantia, & intestinorum dolorem mitigantia, minimè sint aspernenda, & aliquando etiam ipsæ Emulsiones ex sem. cucum., cucurb., melon., papav. alb., non omissis reliquis, ut & serum lactis tamarindinatum, juvent, nihilominus acrem bilem potius abstergendam & blande evacuandam judicamus. In ingenti dolore, oleum ex amygd. d. selectis recens, & sine igne expressum mannæ in jure pulli dissolutæ rectè admiscetur. Accutentaturi non negabunt verè quondam scripsisse Thomam Mermannum, nihil præstantius inveniri diluto rhabarbari cum mannâ. Si enormiores vomitus usum horum non admittunt, clysteres ex lacte vaccino, oleo violaceo, additâ electuarii lenitivi Florentini aliquâ portione, adhibentur.

Porro

Porro cautissimè etiam processimus, quando suspicabamur, tendinem coli, quo tunica nervea & crustosa, in certis rugis & valvulis, detinetur, vel arrosum, vel inflammatum esse, quod in diuturnioribus doloribus fieri admodum est probabile. Opposuius verò huic malo eadem, quæ dysenteriae incipienti aliàs opponuntur, nisi quòd dolorifica hæc affectio commodiùs per clystere tractetur.

Præter modò descriptam colicam reperitur etiam alia, quæ *Colica convulsiva*, in hac abdomen modò cum umbilico retrahitur, modò distenditur, sive venter inæqualiter contrahitur & latera apparent obliqua, & muscoli recti recta introrsum incurvati, ut optime Tulpius *l. 3. obs. c. 22. p. 227.* ventriculus ac intestina fursum contrahuntur, ureteres & vesica urinaria, quin in abdomine contenta viscera omnia convelli videntur, nec ab hac libera sunt vasa genitalia, quòd involuntaria feminis excretio & retractio testiculorum probat. Confer. Hœchstetter. *Dec. 5. Cas. 1. & Heurn. in lib. de morb. cap. c. 25.* Imò thorax quoque in consortium trahitur; sicuti colligere licet ex respiratione sublimi & anhelosâ ac difficili. Nec his limitibus coercetur mali violentia, nam, ut vere Willisius *in parte pathologica de anim. brutor. c. 15.* in capite vertiginosi affectus frequenter huius morbi insultus aut præcedunt, aut sequuntur; observavimus etiam, nonnihil mentem in paroxysmo aberrasse. Cujus generis colica scorbuticis, venereis, & pertinaciori à febris non ritè liberatis est familiaris, ac ingravescentes dolores in membris exterioribus accersit, ac demùm in paralyfin terminatur. Ejus rei exemplum in Sacerdote Ordinis Carmelitarum hoc anno D.D. Samuel Grassius & Helwich viderunt. Quinquagenarius is circiter erat temperamenti melancholici & habitus siccioris, vino Austriaco adfuetus, ac præterea à multis annis herniosus, sæpius ab exordio virilis ætatis, etiam ante herniam, spasmodicis abdominis afflictionibus obnoxius. Summè ei adstricta erat alvus, quæ etiam acrioribus enematis sollicitata, non faciliè contenta sua deponebat. Indies malum hoc incrementa, non sine diris cruciatibus, capiebat. Cum itaque iliacum malum metueret, retentis per multos dies fecibus, nominatos ante doctores ad monasterium sex milliaribus Vratislaviâ distans invitavit, tum munere Provincialis fungens; ac hi quidem divinâ opitulante gratiâ debitis remediis alvum obstructam promptè reserarunt, at brevi iterum rediit cum doloribus his spasmodicis malum, quod in paralyfin alterutrius brachii desiit, quam cum nulla arte humanâ, miraculis Christi inductus, sanari posse crederet, fatis, post aliquot septimanas, ut audivimus, concessit. Aliis verò determinandum committimus, quomodo & per quas vias doloribus intestinorum paresis succedat; nec definimus, an metastasis materiæ spasmos excitantis fiat per vasa sanguifera, an per nervos, quamvis istud nobis magis videatur verisimile. Et sanè in hac collectione, si colicus dolor (de quo modo est sermo) est nervorum affectus, atque nervi tum abdominis, tum intestinorum crassorum aliqui, tum pedum & manuum furculi sint, ex eadem stirpe, spinæ scilicet medullâ, prognati, materia peccans, nimirum humor tenuis, ichorosus, vaporosus &c.

ab intestinorum & abdominis dolentibus membranis, nervisque, in nervofas tum pedum, tum manuum partes propellitur, in hac, inquam, ratiocinatione multa desideramus, de quibus forte alibi.

Cæteroquin satis est notum, quod ex profapiâ colicæ convulsivæ sit tum nephritica, tum hysterica, tum etiam, quam subinde infantes patiuntur, cuius postremæ facile convulsiones epilepticæ solent esse pedissequæ. Verè autem profiteri possumus cum Wepfero quondam nostro ex *Dec. 1. Ann. 2. obs. 39. p. 71. unice nos angit, quâ ratione constrictio hac specifico aliquo antepileptico mature solvi possit.* Id certum est, quod purgantia dolores exasperent, nec à V. S. sperandum aliquod auxilium, licet eam Chiffletius commendet. Institimus itaque antispasmodicis internis & externis, ac inter hæc quidem emplastro de galbano, unguento antispasmodico Myns., laudes debitas detrahere minimè possumus, sed tamen fatendum est, quod major horum sit efficacia in eâ, quæ sine præcedaneâ corporis dispositione à solâ causâ evidente, aut consensu cum membro vicino oritur, quàm in habituali, atque à certo, ut ferè fit, ac altas radices agente corporis vitio, dependenti.

Præterea gravissimi ac admodum diuturni dolores sunt, qui vel peritonæum, vel membranas, quæ abdominis ventrisque partibus obtenduntur, afficiunt, quos, nescio quo errore, indocti appellant colicos: imitati forsitan quosdam ex Gallis, qui ejusmodi dolorem, vel colicam notham, ut Fernelius, vel Pictonicam aut Pictaviensem, ut Riolanus, à cruciatûs quâdam similitudine & vehementiâ ac frequentiâ in Pictaviâ nuncupant. Non tantum verò ibi, nec clysteribus, neque medicamentis, neque fomentis, nec aliis remediis, quibus colici dolores declinantur, solent placari: sed & apud Vratislavienses, ubi frequentiores sunt, quàm inexperti credant, admodum rebelles sunt, ac fere tympanitidem præcurrunt. Et fortassis non hallucinabimur, si ex *sect. 4. aphorismum undecimum* de isto dolore explicaverimus: *quibus tormina & circa umbilicum dolores, & lumborum dolor, qui nec purgantibus, nec aliter solvitur, in hydropem siccum firmatur*, hoc enim ita fieri, aliquoties sumus experti. Quomodo huic occurrendum malo, edoceri cupimus ab aliis, nos enim omnia tentantes, hætenus ferè successus destituit. Aliquantulum auxilium ægri consecuti sunt ex usu nervinorum, carminantium & correctioni humorum dicatorum ac anodynorum, ut & applicatione discutientium topicorum. Sicuti verò alias minimè rarò dolor colicus genuinus transit in abscessum, ita sanè spurius ille in apostema aliquando degenerat.

Hæc dum revolvimus, occurrunt cruciatus illi intestini recti, qui hæmorrhoides cæcas earundemque exulcerationem aliquando anteire consueverunt. Qui, ut rectius intelligantur, meminisse omninò oportet, quod vasa hæmorrhoidalia in texturam intestini recti intexta, multò capaciora sint, quàm rami ad reliqua intestina distributi, ac quod profundius intra corpus longitudinem intestini recti ambient & perreptent vasa interna hæmorrhoidalia, à venâ portæ ortum ducentia; in his itaque sanguis congestus & stagnans venasque distendens, multorum dolorum causa esse suevit, qui, utut nitrosis & cinna-

cinnabarinis quodammodo mitigantur, ita omnimodè vix cessant, nisi stagnanti sanguini exitus paretur.

In febb. petechialibus hoc tempore à nobis observabantur subinde inflammationes in natibus, aliisque partibus musculosis, quæ interdum in gangrænam degenerabant. Hanc sanè prædicere facile potuimus, quando circum statum nec resolvebatur inflammatio, nec suppurabatur, & dolor pulsans satis gravis subito imminuebatur, horrores & rigores cum animi deliquiis superveniebant. Hæc in sententiâ magis nos confirmabat color cutis initio quidem intensè rubens, mox verò deinde livescens aut nigrescens. Nec amplius de imminente aut quasi præsentì gangrænâ dubitandum, quando in conspectum prodeunt pustulæ flavæ sero turgidæ.

Tractavimus etiam gangrænas, aliunde ortas. Non infre- Gangræna
quens ea est, quæ scorbuto prima debet incunabula. Hæc ferè scorbutica,
semper per maculas fuscas, quæ degenerant in escharam siccam, cum mem-
bri torpore, sese prodere solet, & vix ullam admittit medelam. Et ut illas
taceamus, quæ à violentiis externis, contusionibus, inquam, vulneribus, la-
cerationibus, compressionibus, combustionibus &c. oriuntur, non possu-
mus non meminisse illius, egenos sæpè mutilantis, quæ à partium refrigeratio- Gangræna
ne oriri solet. Hæc tum imminere suevit, quando derepentè à frigore
acutus dolor pungens & urens partem invadit, ruber, micans in inducta.
lividum colorem abit, & postea torpor, cum summo frigore ob-
servatur. Semper hujus periculosior eventus est, quam illius, quæ
à causis calidis originem ducit. Cæterum in omni gangrænâ consum-
matâ, à quacunque demùm causâ orta fuerit, dedimus operam, ut putredinem
inchoatam inhiBEREMUS, ne ulterius serperet, & in sphacelum degeneraret. Ad-
hibuimus eam in rem laudatas scarificationes, & incisiones, easque pro gan-
grænæ ratione varias, modò majores, modò minores, jam profundas, jam
verò magis superficiarias. Scarificatas partes iussimus elui iis, quæ ad manus
promptius esse poterant. Et sanè perindè est, an muriâ, lixivio chirurgo-
rum, decocto calcis vivæ, spiritu vini simplici, aut cum sale armoniaco acua-
to, aut spirit. vini camphorato, theriacali, tinctura myrrhæ lotio instituat. In
usu autem nostris chirurgis est unguentum Ægyptiacum, quod modò me-
moratis admiscant. Factâ hæc mundatione, varia apud Nos imponi solent.
Alii Chirurghi præeligunt Mercurium præcipitat., vel solum, vel cum alumine,
myrrhâ, aloë &c. mixtum, alii balsamum sulphur. extollunt. Plerisque bu-
tyrum ðii satisfacit. Hæc verò calida aut tepida applicantur, eousque dum
circa partem gangrænâ affectam, circulus vel linea rubicunda, naturam in se-
cretionem occupatam indicans, appareat, & ulcus incalescat. Si diutius in
horum usu perseveraveris, acribus hisce facile novam gangrænæ occasionem
suppeditabis. Quamvis enim minimè admistionem aliquorum acrium dam-
nemus, potiore tamen tum locum tribuimus digestivis & abstergentibus.
Optimè verò rem gerunt illi chirurgi, qui his aliisque medicamentis superim-
ponunt cataplasmata ac fomenta calida ex rad. angelic. Herb. scord. absinth.,
menth.,

menth., fl. lavendul., rorismar., stæchad., cent. min., bacc. juniper., farin. lupinorum &c. hac tamen cautelâ, ut sub principium modestè repellentia, in progressu verò resolventia eligantur. Quid fomentum cerevisiæ singulare præstet, nondum experti sumus, de eo agit Barthol. cent. 5. *Histor.* 41. Rectè verò ii etiam agunt chirurgi, qui partem sanam non negligunt, ne fortè gangræna ulterius serpat. Apud nos adhibentur varia, præprimis autem emplastrum, quod Hildanus *de Gangrænâ & sphacelo* c. 13. describit. Nec immeritò Barbette laudat defensivum rubrum & ceratum Vigonis. Alii unicè extollunt unguentum Würtzii. Nullum autem auxilium humanum, præter separationem membri, quod necrosi affectum, superest. Gangrænam verò in sphacelum degenerasse scire licet, si pars colore nigra appareat, tactu autem marmore frigidior sentiat, nulloque polleat sensu. Ubi tamen admonitio Ambrosii Paræi *l. 9. c. VI. p. 374.* memori tenenda mente est. Porro in sphacelo abest motus voluntarius, quamvis quædam ejus reliquiæ interdum appareant, tùm nimirum, quando altera musculi extremitas incorrupta adhuc est, & suâ contractione tendinem sibi continuum, quamvis emortuum, attrahit. Præterea magna adest partium mollities, nec pars digito compressa resurgit, imò cutis digitis facillimè avellitur. Tandem in sphacelo fætor magnus & acris exhalat, ut præsentibus ei ferendo minime pares sint.

Odontalgia.

Erat etiam hisce diebus odontalgia non paucis molesta, quemadmodum etiam aliis anni temporibus esse solet, quando aër frigidus, humidus & pluviosus existit. Diuturna etiam nobis experientia constat, quòd præter cibos flatulentos, quibus non pauci delectantur, & crapula, & hinc ortæ cruditates, somnus immodicus, illud malum foveant. Notorium est, quod austera & acida hæmodiam gignant, quàm maximè. Præterea saccharum & quævis dulcia dentes offendunt, ut rectè observavit Forrestus. In sequiori quoque sexu curæ, sollicitudines, & mœrores itidem istud malum provocant. Eum in censum referri etiam debent incautæ pedum refrigerationes. Agmen verò omninò ducunt inter evidentes odontalgiae causas, suppressiones consuetarum evacuationum, non tam earum, quod multi credunt, quæ per nares & os contingunt, quàmvis & hæ symbolam suam conferant, sed præprimis depletionis sanguinis, quæ per hæmorrhoides & uterum statis temporibus suscipitur. Huc pertinet intermissio scarificationis & V. S. quæ longo jam tempore erat consueta. Ambigimus, an usus balneorum, tam humidorum, quàm siccorum accusari mereatur tanquam causa odontalgiae. Nec pollicem hic premimus Doctissimo Cratoni Nostro, qui flatulentum spiritum, principem fermè doloris dentium autorem *Consil.* 75. apud Scholtzium esse putat. Nullo modo autem dubitandum, quin odontalgia à vermibus sæpè excitetur. Conf. Salmuth. cent. 3. *observ.* 32. Præterea neminem temerè latet, quod & suppuratio circa radicem dentis, dolorem inducat. Et lippis ac tonsoribus est notum, quod, cùm dentes sæpè putreant, ac frustatim excidant, corrosio eorundem sit causa doloris. In pertinaci & nulli remedio victas submittenti manus odontalgia, præsentibus symptomatis atrocioribus

Viri

Viri quidam Doctissimi veneficium habent suspectum. Vidimus id factum à plebejis, tum in dolore, qui circa radicem dentis hæret, tum in eo, qui maxillam simul affligit, aut obscuriori alio dentis vitio oritur. Nec præterire possumus, quod sæpè advertimus fallax remissuri doloris indicium fuisse peti- tum à vulgo ex tumore gingivarum & potissimum genarum, odontalgia su- pervenienti, quin potius cum tumore hoc malum auctum fuisse, ac cum sum- mæ ægrorum molestiâ oris diductionem inde impeditam vidimus. Pro cau- sarum varietate, varia dolori huic opposuimus remedia, de quibus anno præ- cedente aliquid dictum fuit. Varia Autorum experimenta tentavimus, nec tamen ullum deprehendimus, quod omnibus satisfaceret. Non malè magni- fecit decoctum persicariæ Paracelsus, decoct. fol. lappæ cum aceto addito sa- le Forestus verè, teste experientia, deprædicat. Nec fides iis abroganda, qui in laudem decocti verbenæ in vino, agrimonix, L. Guajaci, rad. chelidon. ma- jor., salviæ &c. varia scribunt. Hæc enim aliquibus aliquod auxilium tulisse etiam Nos recordamur, non neglectis tamen paregoricis, quæ alias *λυγυρόν- νια* vocantur, cujus generis sunt radices althææ & lil. albor., fol. malv. & bis- malv., fl. chamæmel. & meliloti, summit. aneth., sem. malv., lini & fænugræ- ci &c. quæ decoqui possunt in lacte tum ad os colluendum, tum ad fomenta extrinsecus applicanda: Hæc enim anteferimus oleis & unguentis, quæ illini- ri fueverunt. Narcoticis aliquantò rariùs usi sumus, memores consilii Doctiss. Fieni *Physograph. c. 14.* & si summa nos ad eorum usum compelleret necessi- tas, non quidem antiqua illa fastidivimus, qualia sunt Sotirella parva Augusta- nor., laud. opiat., Philon. R., pilul. de cynoglossâ, theriaca recens &c. sed tamen magis ferè placuit massula ex g. tacamahac., laud. opiat. & oleo quo- dam. Meminimus radicem hyoscyami in aceto elixam, aliquando ab Em- piricis cum successu applicatam. Præstat etiam aliquid decoctum nicotianæ c. fl. chamæmeli. Verum de his aliisque consuli possunt Strobelbergerus de dentium podagrâ, & Sebizius in Manual. Medico practico. Verum est il- lud Ballonii, dolores subinde recrudesce, si dens vitiat remaneat, nec ta- men facile, hæc in parte cum Erasistrato facientes, evulsionem dentis, quæ hîc satis est familiaris, suademus. Ex dente evulso diuturnam salivationem, & hinc natam contabescentiam observavit D. Helwich; conf. Highmor. in *dis- quisit. Anatom. l. 3. p. 2. c. 1.* Nota sunt funestarum hæmorrhagiarum inde orta exempla, non absimilia iis, quæ Cardanus *l. de caus., signis, ac loc. mor- bor. p. 3. cap. 60.* & Highmorus *Anacephaleos. circul. sanguin.*, ac alii recitant. Minimè rarò fit, ut maxillæ pars simul avellatur, quâ de re jam olim questi sunt expertissimi Viri, Forestus, Hollerius, Bartholinus *cent. 5. histor. 54.* ut de inflammatione, febris &c. jam nihil dicamus. Quando dandum aliquid fuit precibus ægrorum, cavimus tamen, ne dens evelleretur eo tempore, quo ca- put doleret, aut gingiva tumeret, aut atrox sentiretur dolor, monuimusque chirurgos, ne violenter & affatim uno ictu dentem extraherent, & cautè sese gererent, quod Riverius prudenter jam ante nos inculcavit. Quâ cautione in repellentibus adhibendis opus sit, præcipue, si, ut mos fert barbitonforum, maxillis

maxillis applicentur, providè monuit noster Sennertus & accommodatè ad rem exemplum ex Valesco de Taranta recitat de Medico, dolore dentium molarium afflicto cum inflatione maxillæ & post appositum oleum rosaceum c. aceto, in anginam lethalem incidente.

Antequam vero hanc materiam deferamus, non possumus non cum Carolo Pisone *de colluv. serof. l. 2. c. 3.* esse junioribus Practicis autores, ut phlegmaticis, quicunque de odontalgia conqueruntur, suadeant, ut neglectis remediis, quibus vulgò os colluitur, primo quoque tempore hydragogum fumant, hoc pacto enim levare posse atrociores dolores certo experientur. Cum verò arteriolæ à carotidibus in auriculas procedant, & inter has major quædam antitragum & anthelicem perreptet, superioremque maxillam conscendens singulis dentibus sanguinem suppeditet, in propatulo est, quid in sedendâ odontalgia ab acriori sero & fervidiori sanguine dependente præstare queat artificiosa apertio propaginis hujus arteriæ in anthelice, hæc sane mirabiliter sedatam fuisse odontalgiam, notatur à Bauhino, ac refert Riolanus, se Parisiis Virum vidisse, qui per illam curationem magnum faceret quæstum, qualem etiam in Geldria se vidisse narrat. Clar. Diemerbroek *Anatom. lib. 5. cap. 13.* cui hanc observationem debemus. Unicè dolendum, quòd hic chirurgorum dexteritati minimè confidere liceat.

Et hæc dicta sunt de morbis, qui tribus prioribus mensibus apud nos grassati sunt.

Constitutio
aëris ver.
nalis.] In Aprili terra blando tepebat calore, quæ aliquando etiam calidis fovebatur pluviis, de cæterò ferè semper grato solis jubare illustrabatur.

In Majo major aëris inconstantia erat, vidimus post nubila Phœbum, ac post Phœbum fulgur & nonnunquam tonitrua audivimus.

Ineunte Junio calore solis temperato refocillabamur, quo etiam in procedente mense, non tamen absque intermixtis pluviis recreabamur, circa finem verò turbidam experti sumus tempestatem, ac frequentes imbres.

Sub initium hujus trimestris, febres petechiales quadantenus remittebant, ac in quotidianas, tertianas, ac aliquando etiam, utut paulò rarius, quartanas degenerabant.

Erysipelas. Passim verò tum temporis Nostri erysipelate infestabantur, præprimis sanguinei & sanguineo-cholericæ, rarius sanguineo-phlegmatici, & tantò magis, si consuetæ sanguinis evacuationes ad tempus suppressæ, aut patientes terroribus, aliisque animi pathematibus concussi fuissent. Notorium est, quòd sæpius etiam erysipelate corripiantur, qui antehac vulnerati, aut aliam externam violentiam perpeffi fuerunt. Præcedit ferè horripilatio, sequitur vero calor præternaturalis totius æquabilis & ferè vaporosus, cum aliqua tamen acredine & morificatione conjunctus, ac cætera adsunt, quæ alias in inflammationibus observantur, rubedo, inquam, dolor, febris, aliqua partis intumescencia. Aliæ tamen hic occurrunt differentiæ. Nam non tantum in phlegmone major intumescencia, quam erysipelate, sed &

& in hoc calor est ex rubro flavescent, qui tamen, ubi digito urgetur, disparet, maculam albicantem relinquit, iterum ubi laxaveris, rubescit, quod non fit in inflammatione, nisi fortius premas. Præterea in hac est dolor pulsatorius ac distendens, sed erysipelas nulla cum pulsatione aut tensione est conjunctum. *Επιφλόγισµα* ex una parte in aliam migrat, quod inflammationi familiare non est. Confer. Overkamps *Chirurg. p. m.* 122. Tandem febris in erysipelate primaria est, quæ in inflammatione symptomatice existit. Cæterum tametsi Noster Kergerus *lib. de fermentat. p. 251.* accuset in erysipelate fermentationem sanguinis ad aciditatem vergentem, & in aliquam partem impactam, secutus hac in re Helmontium *lib. de febb. c. 9. §. 18.* Nobis tamen, salvâ aliorum sententiâ, erysipelas, seu diffusio tenuiorum & inflammabilium sanguinis partium per membranas & cutem, orta videtur, non aliundè, quam ex frustra tentato naturæ sanguinem excernendi conatu, cujus rei signum est, quòd partes illæ, ex quibus sanguis aliquando uberius effluxit, erysipelate afficiantur, statim ferè temporibus illis redeuntibus, quibus olim per hæmorrhagiam sanguis fuit depletus. Unde nullam quidem constitutionem organicam pororum læsam agnoscimus, quæ hujus *ἑµποδισµὸς* origo sit, multo minùs verò Archeum partium debilitatum causabimur, nec admodum verisimile videtur, quod arteriæ plus afferant sanguinis, quàm ex torosis musculis revehere queant venæ, nisi addas, partes musculosas ipsasque venas stringi atque hinc non adeò expeditè succedere refluxum per venas. Hanc nostram sententiam circumstantiæ in hæmorrhagiis occurrentes confirmant, & quotidiana ista experientia, qua edocemur, sæpe oboriri erysipelas in illis corporis partibus, ex quibus ante annos fortè plures sanguis aut per scarificationem, aut V. S. fuit eductus, nullis prorsus occurrentibus vestigiis vel Archei debilitati, vel etiam læsionis pororum &c. Erysipelas ex sua quidem natura mortis periculum non minatur, nihilominus circa caput efflorescens, non ex voto semper decurrit. *Malum etiam est juxta Hippocrat. aphor. 25. sect. 6. erysipelas ab exterioribus ad interiora converti.*

Cura ejus, ut experientia nobis constat multiplici, sine V. S. & sine purgatione, quam requirit Sennertus Noster cum aliis, absolvi potest solis diaphoreticis. Vulgus nostrum Rob. sambuci, & ocul. 69. aut C. C. utitur cum succellu. Loquimur autem hic de erysipelate ab interna sanguinis commotione orto, nam si à causa externa originem trahat, V. S. tanquam remedium revulsorium à nobis adhibetur. Quantum ad topica, remediis repellentibus solis nunquam usi sumus, hæc enim facilè gangrænam inducere scimus. Abstinuimus etiam à pinguibus, e. g. lacte *Θεο* seu mixtura ex oleo sambucino & lixivio, unguento de *ἡνο*, sed discutientibus institimus. Pulvis erysipelatodes M. usitatissimus fuit, aut extemporaneus ex farina hordei, fabarum, creta, glyzyrrhyza, myrrha, cerussâ, cum quibus paria facit pulvis à D. Ludovici descriptus, ut lithargyrium tritum inter duas petias externè erysipelati positum tepidè ex commendatione Clariss. Viri Bartholini *Cent. 6. hist. 724.* ut & Cratonis & Angeli Salæ. Unguentum de liquiritia Augustanorum non adhibuimus,

hibuimus, nec facile linteum crocatum M., aut linteum leporino cruore tinctum, de quo Helmontius consulatur *Imag. ferment.* §. 17. vel spiritum vini camphoratum, aut epithema Loffii *lib. 1. obs.* 25. ex decocto florum sambuci cum vino, sapone Veneto ac theriaca, vel cataplasma Overkampii in usum vocavimus. Non contemnimus humida, nec metu quodam anili absteriti ab applicatione humidorum nobis temperavimus, non ignorantes, quàm severa, quamvis forte non merita, virgula censoria eapropter veteres à Dolæo in *Encyclopad. Chirurg. rational.* l. 5. c. 6. castigentur, sed quod apud nos ægroti humidorum applicationem nullo modo ferant. Quamvis & in topicis applicandis summa cautio esse debeat, ne quid nimis fiat, quod ex parte rectè inculcavit Overkamp. Si ritè tractetur, per insensibilem transpirationem erysipelas evanescit, & accidente pruritu, cuticula quasi in squamas fatiscit, ac color naturalis redit. At verò, si ab imperita manu tractetur, non sine periculo suppuratur Hippocrat. *sect.* 7. §. 6. erysipelas, quod exulceratum, sacer ignis appellari suevit. Et tùm vel summa tantùm cutis afficitur in eaque crustulæ furfuraceæ oriuntur, vel tota patitur, ac faniem purulentam reddit, ac hic chirurgi nostri ferè empl. diasulph. Ruland., unguent. alb. camphor., diapomphol. uti solent, non omissis internis evacuantibus lenioribus ac diaphoreticis. Sed cura ferè difficilior est, si partes glandulosæ ejusmodi exulcerationem sustineant. Ita meminimus erysipelas capitis in Illustri Persona, triginta annorum, constitutionis cholericæ, non uno errore in diætâ, vino, ∇. physogon. commisso, hincque inflammationem ad canthum oculi majorem ortam, quæ ægilops vocatur. Hæc rupta est, ac in fistulam abiit, quæ ferè biennii curam exegit. Nihil autem attinet hic commemorare vana molimina chirurgi, nam dici non potest, cum epiphora, ut ferè fit, sequeretur, & præterea etiam ipsum ulcus perennem suppeditaret affluxum, & tenuem humiditatem exudaret, quibus machinis fronti applicatis impetuosum illum humorum affluxum avertere sategerit ignarus, & quod longè pejus, præ arrogantia non cupiens discere, quod non in fronte, sed lachrymali innominata ac in ipsis palpebrarum glandulis humor separetur, & per ductus à Clariss. Viris Stenone & Meibomio detectos, qui ad oculorum superficiem hiant, fluat. Diu durante affectu non mirum, quòd os cribriforme quadantenus læsum. Cum deinde pertinacis hujus mali cura prudenter institueretur, & interna à Medico, externa ab alio Chirurgo, juxta Medici directionem adhiberentur, melioris sanitatis spes affulgere cœpit. Egregiè inter chirurgica remedia debitis temporibus data, profuerunt ∇. vulneraria Ulmensium Balsamus vulnerarius Hantkii, ut & Prævotii, nec non sequens: R. decoct. rad. Aristoloch. long., fol. veronic., nicotian., betonic., c. f. q. ∇. mellis, & inspissetur ad formam balsami, cujus unciis duâbus semis deinde additur elix. propr. Parac. sine acido, balsam. Peruvian. a. a. drachma una semis. Adhibitus etiam citra ullam noxam fuit balsamus Arsenici, cujus descriptionem suppeditat Carolus Musitanus in *Chirurg. lib. 1. c. 5. p. 22. & seqq.* Cæterum cùm sæpè recurrat erysipelas, non rarò ægri à Medicis exigunt, ut debitis remediis præcaveatur. In
potione

potione ab Hildeshemio *lib. 5. spicileg. p. 471.* commendata (ex ∇ . rofar. mithridat. pulv. bacc. laur., & rad. aristoloch. Od.) ante novilunium hausta, virtutem prophylacticam deprehendere non potuimus. Nec placentulæ ex herbis absinth., taraxac., & chamædr. per mensem Maji assumptæ aliquid eximii præstant. Quod etiam dicendum de lacte cum floribus sambuci decocto, & singulis decrefcentibus lunis ter vel quater manè hausto. Multi spem omnem, citra tamen successum in acidulis collocant. De urina propria cum melle epota, non possumus, quin adscribamus verba Bartholini *Cent. 6. histor. 72. p. 327. Probatissimum*, inquit, *vulgi remedium unum chartæ huic assuam, quod nunquam fallere experientia inter nostros docuit, urinam propriam melle subactam, summo mane continuis tribus diebus assumunt, & exinde tutos se ab erysipellate per vitam sciunt. Mel sane humores calidos temperat & expurgat, urina vero vehiculi loco adhibita sale suo abstergit bilem.* H. I. Folia raphani rustici externè applicata extollit non immeritò Hartmannus. Nos in debitis sanguinis evacuationibus ritè susceptis, & catharticis justo datis potissimum causæ momentum reponimus.

Purpura alba solito frequentius hisce diebus infantes, pueros ac Purpura foeminas & præprimis puerperas cholerico-sanguineas &c. corripiebat, alba. Ultimas quidem omni tempore post lochia suppressa invadere suevit, at verò si hæc causa absit, nec iracundia gravior, ac illa quidem fere suppressa præcesserit, aliis anni partibus non æque multis infesta est. Typus morbi sequens est: Initio quidem mediocri corripuntur horripilatione, quam excipit æstus non adeò vehemens. Magis molesta est angustia præcordiorum, quàm dolor capitis, qui non acutus, sed ferè turbulentus existit. Adest etiam faucium dolor & ardor. Somnus propemodum omnis cessat, & paucæ sunt, quæ sub initium morbi, per unam alteramvè noctem somno non interrupto fruuntur. Alvus plerumque officio non satisfacit, vidimus quasdam tamen, quæ aliquoties manè dejecerunt. Pulsus celer est, & quasi oppressus. Urina cruda ineunte morbo sub exitum satis copiosum deponit sedimentum. Appropinquante die quarto, quanquam interdum etiam citius illud fiat, in artubus, collo, pectore, elewantur & extuberant pori cutis cum rubore, instar cutis anserinæ, ac sensim oriuntur numerosissimæ pustulæ magnitudinis exiguæ, pellucentes, aquea quadam humiditate gravidæ, quæ in siccioribus satis maturè ferè intra 24 horas exsiccantur; in humidioribus & junioribus aliquantò diutiùs erosa cute, aliquid humoris stillant, non sine aliquo corporis pruritu & ardore, qui ab initio vix observabatur. Unde facilè patet, quomodo hic affectus à petechiis differat. Nam in purpura miliari hac multo copiosius maculæ, quæ materiam purulentæ analogam continent, erumpunt, quam in maligna illa febre, quam *petechialem* nuncupant, & præterea etiam materia macularum petechialium multum tenuitate superat contentum in pustulis purpuræ. Accedit & hoc, quod disparentibus maculis miliaribus illis, mitescat febris, quæ ut plurimum omni vacat periculo, quod non fit evanescentibus petechiis, quibus adjuncta febris satis multos in mortem præcipitat. Nec ne-

cesse est, hic explicare, quomodo Purpura Miliaris differat à scabie & erysipellate, cum discrimen ex utriusque hujus historia abunde illucescat.

Nostri otii quoque non est, hic prolixè enucleare, in quibusnam miliaris Nostra abeat à morbillis, phlyctænis, epinyctidibus, sive sudaminibus &c. Hoc enim labore, cum summa laude Nobiliss. Melchiorem Sebizium Nostrum, esse defunctum, in *doctissimis de variolis & morbillis dispp.* ut ostenderet inter varia exanthemata differentiam, recordamur, hoc sanè nomine merito etiam laudatus à Celeberrimo Fehrio Nostro. Breviter cum famigeratissimo Wedelio dicimus: *Concipe tibi partes urtica percussas & purpuram bene noveris.* Cura non adeò operosa est, præprimis si, ut ferè semper fit, maligna non sit purpura. Ordinariò quidem optimè conveniunt nitrosa & salina aliquoties per diem exhibita, præmissis mane diaphoreticis & bezoardicis fixioribus (nam volatilia ut plurimum *φλωγώσιν* intendunt) aut etiam decoctis ex saponariis e. g. fumaria, sambuco cum sero lactis caprini paratis. Si verò morbus hic miliaris à lochiorum retentione exoriatur, & spes adhuc supersit hæc concitari posse, danda sunt ea, quæ lochiorum fluxum promovent, quod faciunt myrrhata, cum debita circumspectione post V. S. in plethoricis, repetitis dosibus exhibita.

Rosalia.

Sed neque præterire possumus aliud morbi genus à nobis observatum & à paucis Germanis, nisi fallimur, auctoribus descriptum, quod in pueris, ut & adultioribus quibusdam notavimus. Invadit illud eo propemodum modo, quo exanthemata cum febris satis vehemente, capitis dolore vertiginoso, tussi &c. & maculæ dilutè rubentes & flammeæ, rosarum instar, igneæ naturæ eo ferè ritu, quò morbilli tertio quartove die prodeunt, sed longè uberius sese diffundunt, nam cum morbus ad *ἰνὴν* pervenit, corpus quasi ignitum apparet. Vidimus sane habitum corporis universum magno rubore perfusum, crederes illud totum ab erysipellate obfessum, circa diem septimum circiter rubor sensim evanescit, ac calor remittit, maculæ instar petechiarum hinc inde sese oculis intuentium ingerunt, ac epidermis in multis locis squammatim abscedit. Per totum morbi cursum vehementer affligit sitis, adsunt vigiliæ, adurit calor vehemens, alvus adstricta est, appetitus prorsus dejectus languet, excernitur urina flammea ac rutilans, pulsus observatur celer ac durus, mens ut plurimum deliriis distracta stupet, præ siccitate cutis aspera est. Et sanè hæc cutis asperitas diagnosticum est, quò à rubeolis, in statu ferè milii granum superantibus, dignoscitur hic affectus. Hæmorrhagia nonnullos, alios autem diarrhæa hoc ab affectu liberavit. Ferè autem contingit metastasis quædam materiæ ad articulos extremorum, qui dolore vehemente torquentur. Sed neque his terminis continetur mali hujus ferocia, nam sæpe pedes non tantum ad talos & furas, sed & ad genua usque intumescunt, & si hypochondria tenduntur, ac respirationis difficultas invalescit, brevi post abdomen totum in tumorem attollitur, atque hinc vel hydrope moriuntur, vel ægerrimè sanè cum pristina sanitate in gratiam redeunt. Hic noster affectus, de quo hactenus diximus, videtur idem esse cum eo, quem

Itali

Itali scriptores rosariam dicunt. Proximè sane accedit ad descriptionem ejus, quam affert Ingrassias *Tom. I. p. 194.* & Prosper Martianus in *Epidem. lib. 2. sect. 3. p. 308.* & *seqq.* nisi quod non, ut vult Martianus *pag. seqq.* die quinto, sed ferè septimo asperitudines cum febris deleri sentiant, & apud Nos periculo minimè careat morbus ille, cum de rosaria scribat Prosper Noster, docere experientiam, nullum ferè ex rosaria interire, nisi miraculo quodam & ob errata maxima, quæ aut ægri committant, aut medici, potissimum verò sanguinem mittentes, cum remedium hoc *totis viribus sit huic morbo contrarium.* Curam adhibuimus eandem in hoc malo, quam in morbillis & rubeolis & variolis servavimus, nisi quod diluentia & temperantia, præprimis verò nitrosa largiori obtulerimus manu. Inter alexipharmaca non displicet pulvis bezoard. confortans Celeberr. Bauschii, Primi nostri Præsidis, optimè de Academia Nostra meriti, quem ejus Successor Fehrius in *anchora sacra* recitat *p. 91.* quique *p. 90.* asseverat, anno superioris seculi 52. Svinfurti maculas has primùm fuisse conspectas, didicimus autem ex annalibus quibusdam manuscriptis, Vratislaviæ jam anno 1628 visas esse, & quosdam ex iis, sub cura Clariss. Doringii obiisse, alios verò iterum convaluisse. Sed jam progrediamur ad alia.

Tanquam singulare aliquod recitat Sennertus, Mulierem quandam Aneuris-
Aneurisma nucis juglandis magnitudine in cubiti flexura ultra 30. ma.
annos gestasse, & certè communiter gangræna ac mors metuitur, si paulò majus sit & circumjacentes partes in tumorem magnum attollantur. Et sanè non vanum hunc esse metum, facile intellectu est, obvium enim est, quod levi de causa sanguis ex arteria rupta aut vulnerata ad partes intercutaneas & interstitia musculorum profusus & collectus putrescere possit, si aliqua in motu progressivo ei remora & obstaculum ponatur. Nihilominus DD. Preus & Helwich noverunt coelibem quandam, quæ ex violentiori motu brachii ad modum juvencula aneurisma, duas in pugnum contractas manus æquans, ultra 50 annos habuit, & nuper admodum, non ex gangræna, sed febris maligna obiit senex annos, nisi fallimur, 74. nata. Tumor semper fuit mollis ac laxus, nec per tot annos ullam contraxit duritiem. Pulsus quoque deprehendebatur in eo pulsui arteriarum respondens; quamvis propterea minimè fidem abrogandam censeamus Paræo, qui in aneurismate majore nullum pulsum observavit *lib. 6. c. 33.* eò fortè, quod nimia sanguinis profusio arteriæ pulsum obtunderet. Molestiam sæpè sensit Nostra ac ardorem cum inflammatione vicinarum partium, ut & pruritus, adeò, ut fonticulum, qui nescio cujus suasu non procul ab illo tumore excitatus fuerat, amplius ferre non posset. Non silentio possumus prætermittere puerulum, qui adhuc à partu rubens, sigillatione & exulceratione palpebrarum diuturna correptus, ab hac liberari non potuit, nisi per inflammationem abdominis supervenientem, sed verò cum & ab hac immunem parentes optarent, contra hanc remediis pugnandum erat, sed eo eventu iterum id factum, ut in locum inflammationis hujus iterum pristinus affectus succederet, exulceratio scilicet palpebrarum, quæ non nisi admodum tarde variis topicis, ac internis laxantibus, temperantibus adhibitis

cessit. Eodem tempore gravissimis torminibus, de quibus testabantur continuus ejulatus, jectigatio corporis, pavores &c. afficiebatur puerulus eufarci & sanguinei corporis habitus. Varia ad mitigandum hunc dolorem acta, sed præstantissimum ejus pharmacum erat superveniens vomitus pituitoso-bilio-sus & unica sedes, qua deiciebatur copiose sanguis instar loturæ carnis, sicuti fieri suevit in fluxu hepatico, in quo observatur liquida dejectio cum humore interfluente eoque diluto ac sanguinolento; sed ea tamen etiam hic cernitur differentia, quòd dejectio illa in Nostro non sine magno cruciatu contingeret, quod in fluxu hepatico non fit, vix enim nisi sensus aliquis pressionis in abdomine percipitur.

Fluor uterinus.

Satis etiam communis apud nos erat fluo, qui à Græcis *ῥέε γυναικεία* & fluo muliebris, aut *ῥέε τῆς ὑτέρας* &c. fluxus uterinus vocatur. Nonnullis menstrui albi nomine venit, non quod menstruum sit revera, sed quod menstrui in modum per uterum fieri soleat, quamvis Ballonio *lib. de Virgin. ac Mulier. morbis p. 110.* à ratione alienum videatur, menstruum album confundere cum eo affectu, qui à Græcis *ῥέε γυναικεία* dicitur. Nos cum Latinis vocabimus *florem album*, tametsi satis gnari simus, quòd non omnis sit colore albus. Hic affectus familiaris est foeminis cujuslibet ultra pubertatem annis, frequentius tamen evenit paulò provectioribus ætate, rarissimè autem eo corripuntur admodum puellæ, nec à nobis visæ hactenus hic locorum, quæ vel 6 vel 8 ætatis anno fuerint hoc malo obsessæ, cujus generis virgunculas Fernelio, Hœchstettero, Joh. Matthiæ Nesterio aliisque cognitæ fuisse novimus. Necesse autem est, illas fuisse vel cachecticas, vel admodum infirmas & debiles. Nam ubi natura tam præpropere & maturè agit, seque ipsam quasi anticipare videtur, ut plurimum futuræ valetudini & robori multum decedit. Affectus hic citra difficultatem omnem ex ægrarum relatu dignoscitur, ac illis exitus materiæ mucidæ inconsuetus non potest non esse manifestus. Ferè autem ista vel est *limpidior & albuginea* nec genitalia lædens, nisi sub labore corporis & attritu genitalium, & licet vel jugiter fluat, vel maxime tempore mensium appropinquante, aut sanè post cessantes menses, non tamen magnam noxam inde sentiunt ægræ, præter molestiam; vel *discolor flavescens, virescens, saniosa*, acris & mordax, quæ vaginam exco-riat, adurit, tumefacit ac inflammat, & huic subinde gravis odor adest. Hic fluxus malignus ac venereus cum aliis gravibus symptomatibus ferè conjunctus est. Nam ut plurimum adesse solent vitiosus corporis color, nausea, & fastidium ciborum, spirandi difficultas, virium dejectio, oculorum tumor & inflatio, mœror & tristitia, interdum etiam lipothymia, lumborum gravitas, intumescencia pedum & quæ non alia? de quibus Riverius, Primirosius & Zacutus Lusitanus *l. 9. prax. Histor. c. XI. p. m. 187.* consulendi. Benignus etiam est ferè fluxus, quo gravidæ ante imprægnationem ab eo immunes, vel per vices, vel per totum gravidationis tempus premuntur. Distat verò hic fluxus noster à gonorrhœâ: Nam 1. fluo iisdem, quibus menstruum, ductibus ejicitur; cernimus enim menstruum fluorem variis esse obnoxium mutationibus

tationibus & initio minus floridum, ac in cacochymicis & cachecticis postea pallidum sæpè prodire. Qua de re tanto minus hodiè dubitandum videtur, postquam vasa lymphatica uteri ab Olao Rudbeckio, Thoma Bartholino, Wepfero *histor. & observ. apoplect.* 13. p. 338. Warthono, Regnero de Graaf &c aliisque detecta sint, & ex Stenone, Malpighio satis notum, nullum reperi vas lymphaticum, quod non oriatur à glandula, vel in glandulam aliquam inferatur, ita, ut neque de præsentia glandularum in utero amplius ambigere liceat, præprimis, quia glandulas conglomeratas cum suis vasis excretoriis in utero muliebri Bartholinus vidit, quas in vacca descripsit in *libr. de diaphragm.* p. 107. & seqq. confer. Acta Hafn. Volum. 4. obs. 20. Ex utero, inquam, posse fluorem album prodire, glandulæ & vasa lymphatica probabile reddunt, quòd verò etiam ita fiat, dissecta post obitum corpora foeminarum, quæ in vita laborarant fluore albo, abunde loquuntur, utpote quæ varia glandularum & vasorum lymphaticorum in utero vitia oculis & manibus profectorum obtulerunt. Vid. Bonet. *Anatom. Pract. lib. 3.* p. 1354. & Pinæus *lib. 1. de not Virgin Problem.* 3. Atque hinc non malè ex fluore albo, quo gravidæ laborant, Charleton *de Oeconom. Animal.* p. 201. rectè contra Harvæum concludit, minimè uterum in gravidis ita clausum esse, ut ne aër guidem eum ingredi valeat, cum materiæ illi submucidæ in gravidis pateat exitus ex utero. Itaque in fluore albo pars affecta est uterus. Gonorrhææ autem sedes est, ut cadaveris cujusdam hoc vitio infecti dissectio Graaf palam fecit, corpus glandulosum, seu substantia illa membranosa & glandulosa, meatum urinarium circumdans, ac in vaginam uteri certis canaliculis & ductibus hians, quæ in mulieribus glandularum prostaticarum munere fungitur. Hoc ut deprehendatur, minimè necesse est, ut genitalia inspicat Medicus, an forte partes circa exitum meatus urinarii mucosa quadam materia sint obsessæ, an vero tota vagina squalleat ejus generis humore, quod quidem vult Graaf, nam datur aliud indicium satis luculentum, quo hæc symptomata à se invicem discerni possunt. Nimirum ut Mauriceau *de Morb. Gravid. & Puerper. cap. 7.* docet, gonorrhææ humor etiam tempore menstrui fluxus elabitur, hoc autem vix contingit in fluore albo, qui tum ferè supprimitur. Accedit & hoc, quod fluor albus quantitate superet humorem illum feminalem & in illo dolor lumborum & ossis sacri, in gonorrhæa autem cruciatus ulcerosus in pudendis sit molestus. Multò manifestius adhuc est discrimen inter fluxum Nostrium & pus ex ulceribus uteri, quod vel crassius & magis album est, vel si saniosum sit, cum cruore & dolore profunditur.

Mali hujus non ita facilis est cura, quippe in qua & viscerum chyli secretioni, & feri depurationi inservientium, & lymphæ ratio habenda. Ac sanè lympa excrementitiis crudis humoribus non tantum videtur inquinata, sed & modo nimis crassa glutinosa & mucosa, conf. *vol. 3. obs. 33.* Actor. Hafnienf., modo nimis tenuis & ichorosa &c. ut jam de motu ejus læso nihil dicamus. Eò autem collimavimus, ut abundantiam feri & excrementitii & viscosi ex corpore eliminaremus, materiæ fluxum hunc constituentis proveniunt impediremus, & uterum corroboraremus.

Curæ initium ferè ab universalibus fecimus. Præprimis nobis placere noduli, ex stomachicis, uterinis aliisque appropriatis ac purgantibus, & non possumus non illis subscribere Practicis, qui experientia edocti asseverant, nullum Medicamentum prodesse in hoc fluxu, nisi corpus probè fuerit expurgatum. Adeoque toto cœlo aberrant, qui curam ab adstringentibus auspicantur, atque ita rivulos, non obstructo fonte, occludunt; quo ipso & gangrænæ uteri ac tumoribus, variisque metastasibus, cum periculo summo conjunctis &c. occasio suppeditatur. Vomitoriis nisi sponte ad vomitum inclinarent ægræ, ac evidens in ventriculo vitium hæreret, rariùs sumus usi, etiàmsi prolixè & à Riverio & Montano sint commendata. Nec abhorruimus à diureticis, memores illius Swalviani axiomatis: *uterus albo fluore fœtens diuresi mirificè mundificatur*. Eo autem ferè scopo dedimus succinata, ut & terebinthinata, nec laude sua defraudanda sunt decocta pituitam & serum per urinas evacuantia, quæ Sylvio in crebriori usu fuerunt. Nec abs re decoctum dauci cum radice filipendulæ commendat Simon Pauli. Diureticis palmam longè præripiunt diaphoretica, quæ maximè laudat Felix Platerus *Tom. 3. l. 2. c. 7.* ac hic præ reliquis iterum elegimus succinum, ut & ḡ d. ḡ le, utpote quod non solum discutit, sed & simul roborat. Propter diaphoresin etiam famam videntur adepta lignorum decocta, quæ empiricorum asylum & sacra anchora sunt in omnibus ferè morbis chronicis. Non displicet formula, quam habet le Mort in pharmacia sua rationibus & experimentis instructa.

Salivatio generosum illud remedium est, quo etiam inveterati fluxus debellari possunt.

Cæterum V. S. vix celebravimus, etiàmsi eam vehementer laudet Sylvius, quia ferè medicam opem implorant Nostrates, viribus jam dejectis, & tabe corporis imminente, aut præsentē cachexia, hydropis matre. Ex fonte chirurgico magis nobis placent fonticuli & setacea, & utinam posterius hoc remedium Nostris persuadere possemus, citiùs sanè & faciliùs à spurco hoc fluxu Nostræ liberarentur; nec enim nobis excidit, quod refert Hildanus *Curat. 4I. Centur. 1.* se nimirum mulierem quandam diuturno fluxu muliebri laborantem, & hinc infœcundam & sterilem ex voto curasse. Cùm verò Nostræ exorari sese non patiantur, ut in hoc remedium consentiant, exemplo Galeni frictiones commendavimus; Is enim, præter medicamenta, has cum linteis primùm mollioribus, mox asperis quotidie instituit, in curando fluxu uterino uxoris Boëthi, ut ipse refert *lib. 1. de præcognit. ad posthumum c. 8.* eo successu, ut eam intra tredecim dies curaret, & 400 aureos, sosti loco, reportaret, ut hæc prolixius refert Rolsinc. *Method. cognosc. & curand. dolor. lib. 1. sect. 1. c. 5.* Cæterum adhibuimus ea ferè, quæ in aliis fluxibus uterinis cum successu à Practicis præscribuntur. Inter vegetabilia non sunt rejicula, sed eximiæ virtutis, melissa, mentha à Dodonæo laudata, ac præprimis rosmarinus. Hinc Lindanus: *Fluoris albi, inquit, cura est per decoctum rosmarini cum vino in diplomate, sed diutiùs usurpent, & quidem manè bonum haustum & supersudare debent, & rursus in prandio & cœna sumant.* Huic decocto

cocto viribus si non major, certè par est essentia rorismarin. composita aliquibus Nostrum usitata; Ex nominato roremarino & rad. galang., caryophyll. zedoar., florib. cheiri, galeopsid., betonic. bacc. lauri, juniper. costi, nuc. moschat., L. aloës &c. confici possunt noduli jam ante à nobis laudati. Crato, non absque fundamento, laudat pulverem ex gran. kerm. nuc. moschat. tost., thure albiss. &c. à Nobis tamen ferè tantum adhibentur pulveres ex succino, unicornu foss., ebore, off. sep. corall., matr. perlar., bolo Armen. osteocoll. &c. quibus pro re natâ tantillum olei alicujus Oliati, ad imitationem Wedelii additur. In formâ guttarum essent. ad flux. alb. succin. D. M. elix. uterin. variorum, tinctur. corallor., terr. catech. ipsam etiam tincturam bezoard. porreximus. Electuarium D. Sydenham debito tempore datum, itidem profuit. Id quod dicendum etiam de Galibus. Et fanè nostrâ suffragante experientiâ, merito inter rara experimenta & sæpè feliciter probata refert Bartholinus cremorem lactucæ, prius maceratæ in aqua extinctionis chalybis, addito pulvere eboris. Aliorum passim deprædicatorum virtutes satis sunt exiguæ. Omnibus autem hætenus enumeratis, jure optimo præferuntur pilulæ D. Becheri, de quibus Ipse in *Psychosophiâ* p. 241. scribit: (*) *Es ist nicht wohl zu beschreiben, wie gut diese Pillen den Weibern, der Gebähr-Mutter, und ihren Zuständen bekommen, denn sie reinigen die Mutter vom Wind, Wasser und Schleim, sie befördern die verhaltene Zeit, und die zu starck gehende stillen sie, sie dienen zur Fruchtbarkeit, hingegen, so was unnatürliches oder todtes in der Mutter ware, das treiben sie hinweg.* Atque hinc Celeberr. Stahlius, cautus, si quis alius in deprædicandis Medicamentis, in *Disp. doctiss. de Mens. muliebr. fluxu*, §. 45. ait: *Pilulas polychrestas Becherianas in omnibus uterinis affectibus ultra omnem expectationem & laudem positas esse, nec ullâ hætenus nota compositione exæquari.* Præterea nec externa negleximus. Ex iis usitatiora apud nos sunt, unguent. comitiss., ceratum de galbano, mass. ex tacamahac., g. carann. &c. Nullam adeò insignem efficaciam deprehendere potuimus in linimento Raymund. Joh. Fortis, quod conficitur ex bol. armen. lot. unc. sem. terr. samix, sangu. dracon., mastich. aa. drachm. 2. nuc. cupress. drach. 3. & ceræ parum. Suffitum ex Salviâ mirum in modum omne profluvium sistere, narratum est Lælio à Fonte, sed citra fundamentum. Jactantiam ciniflonibus usitatam redolet hoc Turneiseri: Oleum ex rad. dauc. cretic. Oli. & post balneum vulvæ illitum, menses albos miraculosè curat. Nam nec balneum, utpote quod fluxiones augere aptum natum est, convenit, quamvis Platerus in *Observat.* ejus usum serio commendet. Nota nobis est egregiæ spectatæque formæ mulier, quæ, cum nihil intentatum reliquisset, ut à fluore albo, quo per multos annos laboraret, liberaretur, tandem virtutem balnei aluminosi experiri statuit, unde suppressus quidem fluxus est, sed infaustè admodum. Successit enim ulcus circa orificium uteri molestissimum, quod ægerrimè admisit medelam, hæc verò, post longi temporis patientiam obtentâ, secutæ sunt

Y

(*) Incredibile dictu quam salutare istæ pilulæ sint in affectibus uterinis: uterum enim ventis, lymphâ, mucô, squallentem mundificant; fluxum mensium impeditum promovent, nimis copiosum cohibent; fertilitati inserviunt; si quid præternaturale aut mortuum utero cœstetur, id depellunt.

sunt hæmorrhoides (cum summis torminibus conjunctæ, non sine suspitione exulcerationis intestini recti) quæ circa singulas lunæ phases, cum sedibus frequentibus, non sine exquisitissimis doloribus totius abdominis turbas dant maximas, ac ægram in tabem conjiciunt, ex quibus malis hætenus nulla arte potuit eluctari. Nec adeò magna spes ponenda in pessariis, in cervicem uteri immixtis, cujuscunque etiam fuerint generis, quæ tamen etiam foeminæ, nisi perfrictæ frontis, non admittunt. Quantamcunque verò adhibueris diligentiam in medendo, sæpè tamen adeò contumax & rebellis est affectus iste; ut omnem eludat curam. Atque hinc verè scripsit Rodericus à Castro, in vetulis ad capulum usque affligere & commori, ut adeò nimis sit angustum menstruum spatium, quo curam circumscribit Riverius.

Fluxus
hæmor-
rhoidalis.

Jam addemus, quæ de fluxu hæmorrhoidali à nobis annotata fuerunt. Ex causis externis cujusvis temperamenti homines in virili ætate in illum incidere possunt: sed circa horum concursum ferè ii demum fluxum experiuntur, qui per aliquot annos pathematibus quibusdam in hypochondriis fuere obnoxii. Nam hi deinde interdum per aliquot dies; dum alvum deponunt, unâ cum excrementis aut minimùm inter conatus ejiciendi fæces, sine ullo abdominis dolore, absque vitio œconomix & nutritionis, sanguinem ex venis, quæ in anum explicantur, intercedente motu intestini recti expressorio, profundunt. Hoc ubi semel factum est, fluxus iste redit statis propemodum temporibus, nimirum aut tardius e. g. circa æquinoclia, aut citius, singulis scilicet mensibus, circa Dæ mutationes solenniores in paucis quibusdam per aliquot annorum decursum; citra intervalla ulla durat. Ubi autem fluxus ille impeditior est, nec ex voto succedit, corpus languet, appetitus imminuitur, sentiuntur tormina in intestinis, præprimis autem gravitas circa os sacrum, ac nonnunquam stupor in pedibus. Tum verò natura excretionem molitur, quando ægri asthmate hypochondriaco tentantur, inflationem ventriculi, ructus ac borborygmos perpetiuntur, ac dolores tensivos sensibiles admodum per totam sacri ossis longitudinem percipiunt. Omnium autem certissimi prodromi hujus fluxus sunt pruriginosi ardores in orificio intestini recti & sensus noduli alicujus inclusi in unâ alteravè intestini parte. Et nihil certius his Kozachii: *Nunquam sanguis ex venis hæmorrhoidibus profilit subito & insperato, sed priusquam erumpat, quid futurum sit, variis indiciis præsignat, quæ nosse Medicum decet.* Diximus paulò ante, sanguinem per venas sedales evacuari, & id fit ut plurimum; nihilominus in duobus notavit D. Helwich exivisse materiam instar spermatis ranarum, quod & observatum est à Greifelio *Ann. I. Ephem. German. obs. 75.* nec dubium est, quin ejusmodi mucus ex hæmorrhoidibus fluat, cum & Doctiss. Sorbait, *Med. Pract. tr. c. 68.* viderit, ex hæmorrhoidibus externis per sanguifugas duas ferè mensuras materiæ cujusdam instar spermatis ranarum manasse. Hæ autem subalbidæ fordes fero, quod ex tumentibus hæmorrhoidibus spontè apertis, ad plures libras tam acre & corrosivum, ut partes madefactas corroferit, effluxisse, testatur Meibomius, incunabula debent. Serum enim quàm variis modis inspissari in materiam albam & viscosam, albumini ovi non absimilem, queat

queat, discere licet ex Barbato, Willisio, Brunone & Malpighio. At verò interdum nullus humor evacuatur ex hæmorrhoidibus, sed illæ tantum tument & duræ sunt, ac vehementem in ano dolorem, maximè ubi dura alvi excrementa exprimuntur, movent. Tumentes ejusmodi hæmorrhoides vulgò cœcas nominant, alii cum Platero etiam clausas, quas, ut à mariscis, tuberculis illis carnosiss oblongis, à thymis sive eminentiis illis asperis ac subrubris, sanguinem, dum auferuntur, in magnâ quantitate profundentibus, à ficu, carne nimirum circa sedis foramen superfluâ, rhagadibus, fissuris, sive ulcusculis ani oblongis, & tandem à cristis & condylomatibus ritè distinguas, juvat historiam dolentium istarum hæmorrhoidum breviter annexere.

Produnt hæc sese communiter primò quidem pruritu & morfu propè exitum intestini recti, ac spasmodicis quibusdam intestini illius motibus. His deinde succedit perceptio molis alicujus, sive nuclei inclusi, id quod maximè fit, cum alvus deponitur. Huic molculæ complicatur dolor primò tensivus, & perpetua vellicatione punctoriâ quasi ægrum afficiens, sed multò magis sub ipsâ dejectione deinde acerbissimus, qui, si inflammatio aliquanto major sit, ad vesicam, testes, uterum & inguina usque dolor propagatur. Eæ, quæ sub sensum cadunt, non tantum ratione magnitudinis & molis, sed & ratione figuræ differunt, quæ occasionem quondam dedit Alexandro Veronensi, ut ineptè satis cœcas has hæmorrhoides in uvales, molares, verrucæ & vesicales distingueret. Nec color illarum semper idem, interdum ex atro rubescunt, aliquando autem albescunt. Porro modo sunt molliores & flaccidiores, modo turgidiores ac duriores, prout vasa hæmorrhoidalia plus minusque distenta sunt, nam cœcæ hæmorrhoides nihil aliud sunt, quàm varices seu intumescencia venarum hæmorrhoidalium tortuosa ac anfractuosa. Et sane venas esse subjectum protuberantiarum ejusmodi, edocemur ex pulsus absentia & ipso colore eorum, qui ex rubro lividus est. Nec attinet hîc repetere, quòd duplicis generis sint hæmorrhoides, nimirum externæ, quæ extremitatem intestini recti afficiunt, & visui patent, ac internæ, quæ profundior, sive altiore in intestini situm occupant, & oculorum aciem subterfugiant, nisi extra podicem, inter nîsum excernendi fæces urgeantur, quo in casu repositio earum non usque adeò facilis esse solet. In hoc conveniunt externæ ac internæ, quòd vel iterum dissipentur & dolores remittant, vel suppurentur, non sine immani dolore, ac in fistulam abeant, eamque initio quidem exiguam ac sine artis adminiculo coalescentem, interdum satis magnam, quæ tardè quidem invalescit, sed eò profundius serpit.

In curâ hoc modo nos gessimus: Consuetas moderate fluentes in ætate virili, præsentente plethorâ, præsertim omissis (olim familiaribus) sanguinis depletionibus supervenientes, minimè suppressimus, qui pessimus nonnullorum mos est, nescio quam inde cachexiam pueriliter metuentium, sed potius conservavimus, gnari, quòd eo ipso multi averruncentur morbi. Immo cessantem hunc fluxum in iis, qui eo sanguinis profluvio olim non sunt facti imbecilliores, helleboratis ac myrrhatis aliisque justo tempore datis, cum emolumento ægrorum revocare conati sumus. Nam nisi hoc fiat, subiti gravissimi-

que morbi plerumque verò aut hydrops, aut tabes, imò & apoplexiæ &c. incidere solent, ut jam de ulceribus, scabie, vitilagine aliisque vitiis nihil dicamus. Si verò Fluor ille nimius esset, & vires ægrorum attereret, vividus faciei color periret, gravitas sentiretur in coxis, & in cruribus magna imbecillitas, partim ebullitionem in sanguine nimiam compescuimus, partim fluxui huic frænum injicere studuimus adstringentibus, quæ simul vigorem naturæ augere possunt. Nam valida adstringentia ægros in hydropem, asthma, hæmoptyses, cardialgias singultuosas, anxietates præcordiales, membrorum torporem & gravitatem, maniam &c. conjiciunt. Hinc Hippocrates l. 6. aphor. 12. rectè præcipit, *ut in diuturno hæmorrhoidum fluxu una fluere sinatur*, quâ de re legi merentur, quæ habet Clariss. Fromannus *de hæmorrhoidib. parte posterior. problem. 5. p. 251. & seqq.*

In cœcarum hæmorrhoidum curâ ad sanguinis congestionem inhibendam, aut moderandam, usi sumus V.S., deinde tentavimus discussionem per sacculos, fottus, clysteres ex verbasco, parietaria, malvâ, scrophularia, flor. sambuc. chamomill. femin. lini, fabariâ, una cum adstringentibus paratos & calidè admotos. Quem in finem decantata etiam passim unguenta de liniariâ, verbenâ, ac illo, quod ex recenti scrophularia & telephio conquassatis cum butyro in cellam repositis ac super igne deliquatis conficitur, aliaque ejus generis adhibuimus.

Interne quoque dedimus chelidonium minus, crassulam majorem, scrophulariam, millefolium, & alia in exigua dosi, eâ potissimum intentione, ut vias roboraremus & stases prohiberemus. Ubi autem discussio obtineri non poterat, aliquoties tumores hi aperiendi fuerunt, tametsi ab apertione abhorreant non tantum ambo Lusitani, Grembsius, Hoffmannus, sed & Sennertus, Crato, Rolfincius alique, & hîc potius sequi maluimus Severinum, Riverium ac Drawitium. Nam istarum apertionem ex aloëticis, myrrhatis, colocynthiacis aliisque internis exspectare, & incertitudo eventus ac periculum majoris noxæ, ac ipse insanus patientium dolor vetant. Et sanè ex istâ apertione ope lanceolæ perpetrata, nec hæmorrhagias nimias nec fistulas consecutas meminimus. Ac sanè cum Alexandro Massaria ferro magis, quam hirudinibus, quas etiam eundem affectum præstare posse credimus, negotium perpetrandum esse opinamur. Apertæ, ut ulcus aliquod tractari debere videntur. Atque hinc absorbentia, diluentia, emulsiones (proscriptâ diætâ vinosâ & aromatica ac flatulentis aliisque noxiis) ægris nostris ordinavimus. Cæterum hæcenus experiri datum non fuit, an, si hæmorrhoides tuberosâ radice chondrillæ tangerentur, etiam exarescant, si chondrilla siccetur, & corrumpantur, quando radix corrumpitur, quod olim præsentî Thomæ Bartholino testatus est Petrus Castellus, ut testatur Ille in epistolâ præmissâ libello Herm. Grube de transplantatione morborum. Durantes & Ulysses Aldrovandus magni fecerunt hæmorrhoidalem herbam, quæ est species Polygoni Italiæ non ignota. De hac ita Rolfin. in *Epit. lib. 3. c. 21.* *Ea (sc.) herbâ tacta hæmorrhoides melius habent, si per diem circa femur gestetur, & mox in fu-*

ante

mante camino suspendatur, ut herba ita & hæmorrhoidales corrugentur omnisque evanescit dolor. H. I. Quod an succedat, nobis hæcenus non innotuit. In scrophulariâ, quæ propter virtutem eandem celebrari solet, efficaciam hanc deprehendere minimè potuit D. Helwich, cum ante aliquot annos Episcopus Warmienfis in Prussiâ ab eâ in dolore maximo sibi opem polliceretur. Et sanè ut obiter hoc addamus, nondum adeò liquidum est, quid de curâ per transplantationem statuendum sit. Rigidum nimis esse videtur, cum Conringio eandem prorsus reprobare, quamvis magnâ cum asseveratione scribat: *nec transplatationem quicquam valere in morbis, quos sibi relicta, ægrotantium natura non solet sanare, nisi accesserit constans quedam & temerè concepta persuasio, comperimus.* Longiùs adhuc processit Velschius, qui transplantationes istas ludibria vocat ex arte medicâ releganda. Sed neque intra hos terminos sese continuit Kircherus, qui curationem ejusmodi rogo mulctandam dictatoria severitate edicit. Quid enim tanta pœna dignum committitur, quando naturalia adhibentur remedia, nulla concurrente superstitione, aut verbis, aut characteribus, aut gestibus, quanquam non semper manca mortalium mens rationem assequatur, ut pulchre Bartholinus *cent. 3. hist. 66.* Vicissim fatendum etiam est, quòd in morbis rarò cura hæc ex voto succedat. Scimus tentatum esse experimentum in *epilepsiâ*, quod Sachsus Noster commemorat in *Gammalog. p. 876.* in *Podagrâ*, quod communicat Timæus *l. 5. epist. Med. 8.* in *Ictero*, quod proponit Hoffmannus *lib. de Method. medend. p. 327.* in *aridurâ*, quod hîc omnibus notum, sed absque ullo successu. In mictu cruento nimis patiens cruorem recenter emissum cum pulvere sympathetico miscuit & diligenter hæc inter se mista agitavit ac in loco non adeò calido sivit exarescere nullo cum levamine. Meminimus quoque, aliquem periculum fecisse, an verrucæ tolli possent eo modo, quò ab iis liberatus est Verulamius ab Angli Oratoris uxore, quæ accepit particulam lardi pelle non exutam ejusque pinguedine illevit omnes verrucas & inter eas, quæ penè ei fuerat coæva, ac deinde clavo affixam lardi particulam ad postem fenestræ cubiculi sui, quod meridiem spectabat, soli exposuit putrefaciendam eo cum successu, ut omnes verrucæ intra septem menses planè evanescerent, sicuti testatur Ipse in *Sylv. Sylvar. cent. 10. histor. 997.* At hunc effectum ex illo remedio neutiquam consecutus est Silesius, quem ex eo reportavit Angelus. D. Preus tamen suasu beati nunc D. Ettmülleri, Præceptoris olim sui, etiam post cineres venerandi, Lipsiæ anno 1673 clavum quendam in volâ pedis sui medietate pomi Borsdorffiani in duas partes dissecti, eo usque fricuit, ut interna pomi superficies inde aliquo modo incalesceret, & mumiâ verrucæ hujus vitali ac spiritali imprægnaretur, hincque medietate illâ sub acervum fimi conjectâ, ut putredine ibidem consumeretur, spatio 6 præter propter septimanarum, nullo insuper remedio in auxilium vocato, à clavo successive emarcescente, ac evanescente penitus liberatus fuit.

Qui isto tempore in ætate puerili fuerant immunes ab exanthematibus, sub finem veris, Achoribus & Tineâ infestabantur. Passim consulebamur

Achores & Tinea.

mur à parentibus, quando capita prolium deformabantur ulceribus madidis seu exiguis istis tuberculis, in cute excitatis, sub quibus humor acris & erodens continetur, qui non tantum ad scalpendum incitat, sed & cutem tenuissimis foraminibus post pruritus perforat & erodit, ex quibus erumpit, ac copiosam ac spissam crustam efformat. Magis anxios adhuc parentes habet Tinea. In hac capilli partim defluunt, partim ita arroduntur, ut emineant aliqua & ea quidem satis exigua parte ex cute & veluti stipulas exhibeant, ut videas non adeo accuratam esse Tineæ descriptionem, quam suppeditat Dolæus, scribens: *Tineam esse scabiem cutis cum squamis & crustis, pilorumque evulsione &c.* Et sanè pars illa capitis, quam tinea defoedat, non tam crusta est obiecta, sed vehementer rubescit, ac mediocriter turget, tennerrimaque nitet cute, quam si vel suspensis digitis scalpant, facile erodunt & abradunt, subsequente ichore subcruento, ac copiosè abscedentibus furfuraceis squamis. Ficofam nominant tineam, in qua stigmata sanguinea, sive, ut aliis placet, vivæ rubræque carnis quædam grana apparent ficuum interioribus granis haut absimilia, quæ ægerrimè consolidationem admittunt, & texturam debitæ crassitie induunt. Hujus loci non est, scrupulosius inquirere, an affectus hic pendeat à vermiculis, quos se per accurata microscopia detexisse aliqui gloriantur, ab illis sanè vermiculis, ex minutissimis, ut ajunt, ovulis prognatis & pilos corrodentibus nomen affectui inditum esse autumant. Nobis hic sufficit annotasse, quòd internè nostrâ experientia ea optimè conducant, quæ alias in scabie profunt, & à nobis anno præterito breviter fuere indicata. Externa administrant ferè apud nos barbitonfores & vetulæ, ac illa remedia omnium efficacissima sunt, quæ à Joële in cura Achorum commendantur, tametsi formulæ sint minus concinnæ. Nicotianam non sine fundamento laudant, at camphoratorum usus hic noxius. Tantum sanè exinde ægri percipiunt dolorem, ac si carbones vivi capitibus impositi essent. Cæterum meminimus ex voto successisse curam ad mentem D. Sorbait *Tract. 4. Med. Pract. c. 19.* ritè institutam. Compertum quoque nobis est, citra ullam efficaciam in linimentis adhiberi solere ranas virentes, tineas fluviatiles, serpentes ac viperas, quorum usum in Medicina introduxit & hodie adhuc alit superstitiosa inscitia. Quando ulcerosa hæc eruptio non succedit, & humores maligni circa caput stagnant, non rarò glandulæ exiguæ magnitudinis in magnum attolluntur tumorem, qui cum maximâ ægrorum molestia non detumescit, nisi puri exitus paretur. Imo hinc minimè rarò aures inflantur & vehementer pruriunt, unà cum cute auri vicinâ, quæ si leniter abradatur, per longum tempus ex illa liquor lymphalis ac serosus extillat, durante molesto pruritu ac inflatione.

Constitu-
tio aëris
æstiva.

In Julio terra per totum mensis cursum benigno ☉lis calore animabatur, ac simul calidis fovebatur pluviis, subinde tamen etiam tonitrua audiebantur. Per Augustum eædem gratæ inter phoebum & nimbila vices durabant. Nec alia aëris in Septembri constitutio, nisi quod frigidior aura post benignum ☉lis calorem allaberetur corpori ac aliquam ei afferret molestiam.

Hoc

Hoc tempore grassabantur Febres continuæ intermittentes cum doloribus hypochondrii dextri, pleuritides spurix, in infantilibus corporibus excretio miliaris notabatur. Multos cholerae, diarrhaeae ac dysenteriae fatigabant, ac eò à nobis modò curabantur, quem in historia morborum nuper adumbravimus. Febris quotidianis jungebantur dolores capitis enormes ac spasmodicæ pectoris constrictiones notante D. Grassio. Multi catarrhis obnoxii degebant ac pertinacissimis tussibus concutiebantur. Colluctati etiam fumus cum difficili malo, quod quidem nobis hîc familiare non est, sed tantò frequentius grassatur in vicinâ Silesiæ Poloniâ, unde ad nos non ita rarò Magnates nostris usuri consiliis excurrunt. Plicæ illi nomen inditum à Plica Polonica signo diagnostico, eò quòd pilos complicit & conglutinet. Ea ergò, quæ nobis de hoc gravi & sœntico morbo innotuere, hîc breviter perstringere liceat. Corripiuntur hoc malo omnis ætatis homines & nec pueri ac puellæ ab eo immunes sunt. Nec sexus alteruter aliquâ prærogativâ fruitur. Nam falsum esse comperimus, quod vulgò proditur, plures foeminas, quam viros laborare plicâ, inter mulieres tamen eæ citius infestantur, quibus menstrua non ritè fluunt, imò, quod mireris, nec temperamenta quicquam peculiare habent, nam & sanguinei & cholericî, phlegmatici & melancholici hîc æque suos patiuntur manes. Id tamen observatum est, eos, qui Gallica lue laborarunt, ac qui ab ejusmodi infectis progenerati fuerunt, facilius in plicæ incidere vitium. In hoc etiam magis propendent, qui tineam & capitis porriginem reperiunt medicamentis represserunt. Constat etiam ex propria Polonorum confessione, quod tametsi generosa gens minime ad severas diætæ leges sese adstringi patiatur, ii tamen, quos Plica deinde deformat, enormius initio exceßerint & in nimia ciborum, sale, aromatibus &c. conditorum ingurgitatione & in crebris computationibus, quibus ingentes cyathi cerevisiæ fæculentæ, vini Hungarici, mulsi cum lupulo decocti, & stygiarum aquarum, quas *crematum* vocant, evacuantur.

Obscura labis nostræ initia sunt. Imminentis Plicæ suspicionem concipiunt, quando ægri semper aliquid sibi deesse conqueruntur, neque tamen, quid patiantur, exprimere norunt, ac de cætero sat meticulosi sunt; Augetur metus, si appetitus eorum, licet aliàs languidior sit, præfractæ in hoc illudve cibi ac potus genus feratur, cætera etsi sapidiora esculenta & potulenta aversetur, ac color faciei, qui ante vividus erat, in plumbeum pallidumve mutetur, tùm verò de ingratisimî hospitis adventu nemo dubitat, quando corpus aut inopinatò præter morem convulsionibus concutitur, aut spasmis torquetur, aut artus cum juncturis acerbissimo exercentur dolore, & tinnitus aurium percipitur, aut tormina ventris crebrò infestant, ossa tibiæ & fibulæ, humeri & femoris nonnihil incurvantur, articuli nunc introrsum, nunc extrorsum inclinantur, tota spina intorquetur partim scilicet antrorsum, partim extrorsum, aut etiam partim dextrorsum, partim sinistrorsum. Imò ex pleuritidè spuria, paralyfi, præprimis recurrente, cœcitate & obauditione non temere Plica apud Polonos prædicatur. Imo horrores & rigores statis etiam temporibus repetentes cum subsequo calore, nullis antifebrilibus medicamentis expugnabiles, ferè pro-

prodromi sunt plicæ. In procinctu verò est plica, quando prædicti morbi præcesserunt, & furfures ac pediculi in capite generantur, fœtor etiam cum spurcitie exoritur, tùm enim unus & alter cirrus cum vicinis sibi crinibus in se implicatur & densus in conspectum prodit. His à syncipite, aliis ab occipite propendens, aliis totum caput involvit, ac villosi ac congeniti pili speciem refert. Quod cum fit, corpus à malis, quibus antea pressum fuit, ferè liberatur. Et sane multos videas cum crinibus in cirros convolutis rectè valere. Comperitum quidem nobis est, quod plicæ, quanquam non adeò frequenter, spontè decidant, constanter tamen Poloni asserunt, præcisionem & resectionem complicatorum istorum capillorum neutiquam vacare periculo. Hinc tot circumferuntur historiæ de cœcitate, artuum dolore, ac infinitis ferè malis post præcisionem hanc subsecutis. Dùm hæc scribuntur, D. Grassio, Pauli & Helwich oblata nobilis Polona, cui à Sacerdote, absente marito, abscissa fuerat Plica, Illa initio quidem non sensit notabile incommodum, postea autem strumam incurrit cum aneurismate supra costas spurias lateris sinistri. Nec fabula est, quod plicæ dissectæ sanguinem fundant aliquando, id enim ita fieri quibusdam Nostrum à Polonis magnâ cum asseveratione est confirmatum. Episcopus Posnaniensis narravit D. Connor, quod ipsemet abscindens plicam, observavit *eine düstige und flüchtige materie, in grossem Überflus durch die Gänge seiner Haare gehend, welche die Locken gekrümmet, und zusammen gezogen, &c. in Beschreibung des Kœnigreichs Pohlens Connors part. 2. p. 794.* Sed sine stupore legi non potest, quod meminimus nobis relatum, post abscissos plicæ funiculos in capite, alios exortos in pube, similes iis, quos describit *observ. 221. Ann. 3. Dec. 1. Ephem. Nostrar. Hainius.* Longa docuit Polonos experientia, ingruente morbo, & signis quibusdam jam sese manifestante, institutam V. S. prorsus esse noxiam, nec minus damnum afferre cathartica, unde jam olim Academiæ Zamoschenensis Rector in epistola ad Facultatem Medicam Patavinam de purgatione ex vero ita scribit: *Purgationibus usitatis, si plicæ medearis, agrescit & exsuperat magis, quod noxios humores nequeat superare purgatio, sed commotos per totum corpus dispergat: tanto enim dolore omnium deinceps membrorum hæc affecti peste ardent, ut ad cruciatus acerbiter nihil possit esse acrius.* H. I. Vulgus itaque nihil hîc aliud agit, ut ipsi Magnates nos sæpius informarunt, quàm ut plicam in capitis capillis procurant. Eum in finem instituunt lotiones cum decoctis ex brancâ ursinâ, sive acantho Germanico, rad. lupuli, musco terrestre. Quidam oleum & vinum miscent & sæpius caput abluunt. Et sanè non prorsus à scopo aberrant, dùm ita poros capitis ejusmodi externis blandè aperiunt, nam quia natura materiam peccantem in corpore ad capillos propellere molitur, eam in conatu hoc, per ejusmodi emollientia calida juvant, & ut enixius id faciat, invitant, prudentius adhuc facturi, si, quod nonnulli medici suadent, blandis diaphoreticis morbificam materiam ad ambitum corporis propellerent. Lautioris fortunæ Nobiles Medicos advocant, quorum quidam decoctis Lignorum & Galibus medica-

(*) Materiam tenuem & olentem, in tubulis capillorum, cirros incurvantem & contractantem. Connor, in Descr. Regni Pol.

medicamentis utuntur, alii volatilibus, alii absorbentibus morbum oppugnant non magno cum successu. Prorsus alii inter medicos à medicamentis dehortantur & ferè unicè in leniendis & mitigandis atrocioribus symptomatibus occupantur.

Quidam in curanda Plica tanquam specifico utuntur Musco terrestri serpenti, cujus decoquendi rationem & modum adhibendi describit Bernizius *Ann. 1. Dec. 1. Obs. 52. Miscellan. nostr.* Et sanè propter opem, quam multis in hoc morbo attulisse creditur, plicariam vocant Poloni. Ex his autem facilè perspicitur, quam falsum sit assertum illius Plico-Mastichis, qui plicam voluntarium morbum esse, quem nullus habeat, nisi qui non velit cavere, pronunciat. Et sanè nullo modo concipi potest, quomodo crines, ex negligentia pectendi, in cirros ex mente Nostri ita convoluti, hominem tam sævis mactare doloribus, horrendis convulsionibus torquere, & membra in functionibus suis impedire queant? Nec exhauriunt negotium, quæ de ductibus pluribus & hederæ in modum extensis atque hinc conjunctis ex glandulis subcutaneis miliaribus oriundis, copiosiori & densiori pilorum progerminationi ansam suppeditantibus, non adeò pridem proponi cœperunt, etiamsi lympham glandularum istarum viscidissimam supponas. Quemadmodum neque satis est in genere allegare hinc humorum visciditatem; nam hæc & alia ejus generis etiam in aliarum terrarum incolis, qui ne fando quidem aliquid de Plicâ audiverunt, inveniuntur. Scimus etiam, aliquos credere, morbum hunc veneficio inductum Polonis. Sanè Schenckius vocat Plicam tricas incuborum. Et ante seculum hic Vratislaviæ novimus à veneficâ quadam puerperæ, ex lochiorum, propter terrorem, retentione in peripneumoniam & phthisin incidenti, per fascinum ita intricatos capillos, ut nullo postea modo extricari possent, donec vitam cum morte commutaret, eò, quod anus opem auxiliumque suum ægræ offerens, à puerperâ fuisset domo exclusa, teste Nostro Rumbaumio apud Schenkium *lib. 7. obs.* Profectò multi inter Polonos, etiam non superstitiosi, impietatem Roxolanicarum mulierum hinc suspectam habent. Enim verò quàmvis rariores, etiam alibi Plicâ laborantes, visos esse, loquuntur observationes: Morbus enim hic in Helvetiâ, Brisgojâ, Alfatiâ, & Belgii parte ad Rhenum, ac in Hungariâ cognitus; ast non tam frequens; in Hungariâ interdum animalia morbo hoc infestari, præsertim equos, testatur Sennertus *lib. 5. Prax. med. Part. 3. sect. 2. cap. 9.* &c. quæ sunt verba D. Helwichii in *Observ. Physico Medic. posthumis* ab Illustri Præsede Nostro L. Schroëckio editis p. 114. & seqq. In Bavariâ etiam idem Helwichius cognovit Vice-Præfectum, qui cirrum densum, longum, à cervice ad lumbos usque pendulum & mirè implicatum & inviscatum gessit, ut *l. c. p. 137.* legere licet. Et tamen in his terris non quæras:

*Quidquid habet Circe, quidquid Medea veneni,
Quidquid & herbarum Thessala terra dedit.*

Rursus propter eandem causam Plicæ originem petere prohibemur ab aquis per Tartaros, immixtis cordibus humanis, quæ veneno imbuerant, infectis, licet has nova monstrorum genera peperisse Poloni credant, & sobolem horum in inexplicabili tricarum compage vulgò autument superesse, ut intelligimus ex Pastorii *Floro Polonico l. 2. c. 4.* Eò scilicet, quòd primitus infectæ aquæ, aliis in Poloniâ fluviis ac stagnis sese commiscuerint, cœcis nimirum ductibus, quò digitum intendit Eques Polonus, Auctor Epistolæ de Plicâ. Alii non tam de primâ plicæ origine solliciti, quàm hodiè adhuc durantem propagationem explicare conantes hujus causam esse contagium perhibent. Non abs re ait Hercules Saxonia *in operib. p. 806.* *Quispiam statim animo concipiet, Polonicam Plicam ex solo contagio quotidie ampliorem fieri, qui videat, tam facile in Pocutio duos & tres in eadem domo laborare, qui intelligat eos, qui locum illum attingunt, facilius infici, qui denique sciat, magnâ ex parte hanc lui & copulatam esse, quæ omnium consensione contagiosa est.* H. I. Tum in contagio, tum in rerum non naturalium usu incongruò veram causam Plicæ quærendam esse autumat Auctor *Absurdorum verorum seu Paradoxorum. Medic. part. 2. p. 28.* Quidquid verò sit de causâ proximâ Plicæ, in aperto sanè est, in hoc morbo magnam fieri congestionem lentorum ac viscidorum ex diætæ erroribus natorum humorum ad caput, & eam utique ad hæmorrhagicam tendere excretionem, hæc autem cum propter ipsius liquidi conditionem & impedimenta, aliisque de causis oriri nequeat, insigni infarctu humores illi circa caput restagnant, ac pars etiam in ipsis obhærescit capillis, eosdemque mutuo agglutinat.

Quantum ad curam, sub primum morbi insultum incidentia & & alia cautè data, & ea, quæ æquabilem sanguinis distributionem promovent, eximiè, quantum quidem nobis constat, profunt. At, ubi malum invaluit, therapeia longè est difficilior, & quænam conducant ad malum tollendum, ob notam Gentis inconstantiam & crebram Medicorum mutationem, non æquè constat.

Febris
Scorbutica.

In æstate hâc vidimus motus quosdam febriles, qui nullum typum observabant, neque statis exacerbabantur periodis. Mirabilis in istis vicissitudo est, eaque satis crebra. Qui hâc horâ ex angustia cordis gemit & trepidat, de fatigatione summâ conqueritur, post unius alteriusve horæ, erecti animi est, & frontis exporrectæ. Propemodum autem febriles ejusmodi excandescantias experiuntur homines scorbuticis maculis, modò rubicundis, modò lividis deformes. Hæ quando numerosiores in corpore comparent, ferè abest ejusmodi ebullitio, sed quando pauciores adsunt, præprimis in loco minus consueto, tum istiusmodi alterationes sentiuntur, præsens quoque est manifesta coloris macularum mutatio. Non carent hæc inordinatæ febres suis symptomatibus. Nam & anxietates gravissimæ præcordia premunt, languor totius corporis & ossifraga omnium membrorum lassitudo invadit, ac interdum alii graves impetus ac tumultus corpus affligunt. Partes antea maculis obsideri solitas dolor tensivus, gravativus, imò & rigor occupat.

occupat. Præterea hi ægri patiuntur vertiginem, alvum habent modò fluidam nimis, modò nimis adstrictam. Non rarò in his febb. anomalis æstuantem calorem sequuntur horripilationes. Pulsus ferè magnus est, interdum aliquo modo inæqualis & parvus, urina, quantum meminimus, ferè crassa est, & statim, postquam reddita est, conturbatur, ac deponit corpora rotunda, instar arenularum & superior substantia nihilominus crassa manet, & quasi pinguedo quædam vitri parietibus adhæret. Vix post sumpta cathartica, ut alias fieri solet, clarescit, sed turbida manet. Prudenter facit Medicus, si excretionem macularum scorbuticarum promoveat, aut materiam earum subigat & corrigat, id enim satis docet experientia, quòd factâ excretionem, aut etiam correctionem materiæ, interdum etiam ejusdem depositione ad extremas partes, omnes illi motus conquiescant. Id certum est, quòd antifebrilia sola hîc non conducant.

Vicissim eodem tempore excruciantur aliqui dolore artuum, statis horis, singulis diebus per aliquot septimanas redeuntibus, sine ullo febris signo. Acta varia & topica omnis generis sine patientium levamine in quâcunque formâ fuere applicata. Tandem cum antifebrilium imprimis autem corticis Peruviani efficaciam experiri animus esset, inventum remedium est, quo dein diri illi dolores, qui sudoriferis, purgantibus, diureticis exasperati fuerant, ex voto placari potuerunt. Quàmvis nec hæc remedia sub initium morbi æque prosint. Hoc tempore D. Helwich opem & consilium imploravit cerdo ferè sexagenarius, temperamenti melancholici, is sæpè hypochondriacis passionibus obnoxius hæctenus fuerat, ante annum etiam fluxum hæmorrhoidalem satis copiosum aliquoties erat expertus, nec non varia incommoda à flatibus perpeffus; modò verò conquerebatur de dolore pectoris & dorsi ac laterum præprimis sinistri & post sumptum cibum, de pondere, quod in visceribus sese percipere ajebat. Sub vesperam etiam febricula aderat cum dolore capitis leviori & obscuratione aliquâ visus. Vix per biduum huic curæ vacaverat D. Helwich, ubi clanculum obrepfit alius, & brevi suis arcanis omne sese sublaturarum esse malum liberaliter promisit. Sed ecce, post paucorum dierum intervalla, per vomitum rejicere coepit humores atros subcruentos, saporis acidi, dentes stupefacientes. Vocatus denuò D. Helwich, cum vomitus hi aliquoties in die redeuntibus & copiosæ dejectiones per quatrimum jam durassent. Iste cum advenisset, senem admodum languidum deprehendit, manus ejus erant frigidæ, infesta ei cardialgia ac ipsa lipothymia, ac propterea conjugem maturè admonuit, actum esse de vitâ mariti. Et profectò exactissimè conformis experientiæ est Hippocraticus ille aphorismus: *dejectiones omnes nigrae, qualis sanguis niger, sponte prodeuntes cum & sine febre, pessima*; ut & alter ille Ejusdem Senis: *Morbis quibusvis incipientibus, si bilis atra vel sursum, vel deorsum prodierit, lethale*. Sponte prodierat atra materia in nostro, (tametsi id uxori ægrè persuaderi potuerit, utpote quæ causam hujus melancholici, ut cum veteribus loquamur, vomitus, in medicamenta nimis calida ab altero illo propinata conjiciebat) adeoque prognosticon hoc tantò

tutius in ætate senili, attritis jam viribus, formari poterat; quod & eventus comprobavit. Nam etiamsi blanda diaphoretica, antispasmodica, leniter adstringentia, balsamica &c. ordinarentur, nihilominus vomitus hi per aliquot dies secuti sunt, quos tandem mors excepit. Quia verò satis probabile est, materiam hanc nigerrimam existere sanguinem sæculentum & corruptum propter stagnationem diuturnam, non possumus adhuc assequi, ubi tam enormis quantitas, quæ ejiciebatur, hæserit. Ter enim quaterve per diem ad duas hebdomades, nisi nos memoria fallit, integras patinas replebat. In ramificationibus venæ Portæ, (quæ de vasis brevis violentâ apertione produntur, aliàs nobis constant) sanguinem hunc stagnasse omninò quidem verisimile est, sed quia rejecti quantitas, mensuram ejus excedit, qui in his vasis continetur, addendum videtur, quòd sanguis per arteriam coeliacam & mesentericam immixtus dudum stagnanti admixtus itidem fuerit corruptus & colorem atrum sive in intestinis, sive in ventriculo, ob nimiam acidi copiam induerit, & tam per superius, quàm inferius guttur rejectus.

Icterus niger.

Occasione hujus morbi devolvimur ad Icterus nigrum, à nobis itidem tractatum. Is, ut notum est, à colore nigro, quo corpus inficitur, nomen trahit. Nam in hoc morbo coloris flos perit, isque pro vivido obscurus primùm, deinde sublividus & subniger, nullâ evidenti occasione apparet. Album oculorum etiam ejusmodi colore nigro suffunditur. Sputum isto morbo correptorum itidem vel nigricat, vel intensè flavescit; dejectio atque urina modò pro naturâ se habent, modò subnigra sunt. In sinistro hypochondrio gravitas inest, & non rarò etiam tumor subdurus. Aliqui hoc morbo correpti avidè cibum ingerunt, sed appetitus ille minus est constans, in aliis verò initio statim languet, os perpetuo siccum est, affligit sitis, & tamen potum antea sibi consuetum ferè fastidiunt. Languor corporis ac perpetua inquietudo fatigat hos ægros, sed tamen abest membrorum gravitas, quæ in ictero flavo à nobis observata est, nisi ubi tumor pedum oedematosus est, quod tamen rarius fit. Tametsi verò minùs ingravescat corpus, mens tamen eorum imaginibus perturbatur, quæ metus & mœstitiæ plenæ sunt, ut optimè observavit Fernelius. Hinc taciturni, morosi, ac omnibus graves sunt. Sensim calor hecticus corporis vires dejicit, & compertum nobis, quòd hectici & tabidi, postquàm prorsus exaruerunt, intereant. Et hoc fato præcipuè premuntur homines ætate provectiores, nam etiamsi in omnibus admodum sit rebelle malum, in senibus tamen ferè omnem medicamentorum efficaciam eludit. Quod tantò minus mirandum, quia fere aliis fonticis succedit morbis, præprimis autem febb. quartanis male curatis, aut alii notabiliore viscerum, hepatis, inquam, & lienis labi. Nam etsi minimè hîc faciamus cum veteribus, qui arquati nigri causam constituunt melancholicum humorem in omne corpus cum sanguine effusum, eò quod vel in sanguine atque jecore nimium exuperet, neque totus per lienem expurgetur, vel quod lien atræ bilis, ut loquuntur, copiâ infarctus, alium excipere nequeat, vel copiâ turgens illius portionem refundat in venas &c. etsi, inquam, hanc pathologiam minimè pro-

probemus, docent tamen omnes anatomicæ cadaverum post hunc morbum inspectiones, quòd viscera hæc prædicta fuerint vel obstructa, obstipata, vel alio notabili vitio laboraverint.

Et huc fanè oculos in curâ convertimus, quod nisi fiat, oleum & opera perditur. Nullus hîc locus V. S., nullus purgantibus, sed detergentibus, attenuantibus, deoppilantibus & deobstruentibus agendum. Quod ubi aliquousque factum, ad lenia purgantia progredi licet. Imò tùm etiam locum inveniunt diuretica. Balnea vix adhibenda, quia morbus hic periculum hydropis minatur, nisi debellato ferè morbo, ubi ad squalorem cutis discutiendum, foedique coloris reliquias delendas imperari poterunt. Non placet tamen inunctio corporis, quam post balneum relaxante & discutienti litu ex oleo anethino, aut chamæmelino instituendam esse aliqui suadent. Multò minùs in usum trahenda errhina ex succo cyclaminis, nigellæ, betæ, anagallidis, quæ absurdè ad bilem per nares derivandam ex usu esse, non nemo scribit. Cibi euchymi & eupepti, extenuantes & aperientes optimè conducunt.

Probè recordamur, quòd & viri quidam & mulieres fervido coelo Pruritus. de tormentis pruritus fuerint conquesti. Occurrerunt nobis, quibus pruritus totius corporis usque ad lipothymiam fuit molestus. Quædam gravidæ cum aliquibus exanthematibus tortorem hunc per multas septimanas sustinuerunt. Rursus aliis dolorosa illa titillatio in certis tantùm partibus negotium faciebat. Inter crebriores est pruritus ani, interdùm tam ferus, ut anum scalpant usque ad sanguinis profluvium. Nec adeò rara est prurigo pudendorum, tam internorum, quàm externorum, in sexu sequiori, quæ ita malè miseras sæpè mulctat fœminas, ut præ diritate doloris, quò se veriant, ferè ignorent. In inguine adulatorum & q̃i assuetorum, aut pollutionibus nocturnis obnoxiorum, maximoperè hîc affectus ferocit. Et cui non notum est, quod & palpebræ oculorum, aures, & aliæ partes sæpè pruriant? Cum verò pruritus sit affectus omnibus temperamentis & omni ætati ac sexui (quavis inter illa siccum & calidius aliquantò frequentius eò infestetur in ætate senili, unde jam olim ab Hippocrate pruritus inter senum morbos relatus est) familiaris, æquum est, ut quomodo illud malum tetrum abigere tentaverimus, brevibus edisseramus.

Et certè arduum est, hic aliquod operæ pretium præstare, quod fanè aliunde non oritur, quàm ex eo, quòd ferè ignoremus, quidnam illud sit, quod cutem & membranas, seu potius papillas miliares earum fibras per cutim dispersas hoc molesto sensu afficiat? Scimus hîc accusari acrimoniam humorum, seu principium salinum in lymphâ & sanguine vulgò causam hujus morbi constitui. At verò nobis illa humorum acredo minimè causa *ουρετικη*, ut cum Græcis loquamur, pruritus esse videtur. Nam si lymphâ & sanguis ejusmodi salinis recrementis abundans causa est pruritus, cur non tenerrime partes internæ, quos hi humores acres jugi circulatione permeant, etiam non pruriunt. Hoc verò non fit in hoc affectu. Quotusque Medicorum audivit ægros conqueri de pruritu pulmonum, hepatis &c. Sanè inter rarissimos

morbos est *ἔσπετος* in pulmonibus, cuius meminit Hippocrates *lib. de locis in homine*. Et quæ hîc nonnulli de stasi feri in glandulis subcutaneis arguantur, prorsus sunt levia. Nam certè sæpius in oculos incurrunt diffusissimæ feri stagnationes, tumores glandularum ex subsistenti acri lymphâ, quas tamen pruritus non comitatur. Rursus invenias homines acerrimis humoribus plenos, qui de nullo pruritu conqueruntur. Nuper admodum curavit D. Helwich virginem quandam ætate provectiorem, cuius saliva in acredine vix aquæ forti cedebat, nam non tantum linguam ægræ mordebat, & fauciabat, sed & in reliquas partes, casu illapsa, easdem erodebat; neque ullæ tamen de pruritu corporis audiebantur querelæ. Atque hinc etiam fit, ut vulgari-
 bus remediis incassum hic affectus oppugnetur. Novimus data esse purgantia ad eliminandam hanc acrem sabburram, scimus sudorifera ad halitus salfos, acres, ichorosos in ambitu corporis hærentes dissipandos fuisse adhibita; recordamur diuretica ad amurcam serosam salisam per vias urinarias evacuan-
 dam fuisse præscripta, & tamen tantum abest, ut ex istis omnibus ulla in ægros reduntarit utilitas, ut potius malum ex usu horum indies invaluerit. Eodem prorsus successu topica discutientia & poros laxantia fuere imperata, un-
 guenta item & emplastra varia, eo eventu, ut ægros & medicamentorum & vitæ ipsius tædium cœperit; Quosdam meminimus dixisse, se, cum lectum in-
 gredi debeant, toto cohorrescere corpore, & ex animo optare, ut maturâ mor-
 te ab infandis miseriis liberentur. Incidimus itaque in has cogitationes, pru-
 ritum non tam excitari ab humoribus acribus, quam à vermium morfu, præ-
 primis cum notum sit, eos rostellis suis in particularibus corporis locis per-
 sæpè pruritus provocare. Ita neminem opinamur ignorare, ab ascaridibus
 in recto intestino provorari dolorificam illam pruritus voluptatem. Porro
 ex omnium consensu inguinalis pruritus oritur à pediculis, vermibusque in
 piloso illo horto hospitantibus, quas plattulas vocat Forestus. Nec omni
 videtur destitui fundamento Clariss. Pechlini nostri opinio, quæ vult, prurigi-
 nem naturalium in sequiori sexu, prægnanti utero, ortum habere ex eo, quod
 injecti feminis virilis particulæ in interioribus vaginæ rugosisque processibus
 morâ putredinem aliquam, ut semen est vivax & volatilis succus, concipiant.
 Et nonne in morbo pilari non tantum infantes contabescunt, insomnes red-
 duntur & inquieti, sed & insignem pruritus patiuntur à crinonibus seu come-
 donibus, quos *Miteffer* vulgò vocant? Et unde in pustulis serosis sub cuticu-
 lâ manuum imprimis & pedum pruritus, nisi à sironibus seu cironibus, de qui-
 bus legantur observationes anno 82. in *Actis Eruditor.* quæ hodiè adhuc in
 Germaniæ Nostræ gloriam à Celeberrimis Viris summâ diligentia & accura-
 tione singulis mensibus Lipsiæ eduntur, ut & *Epistola Hauptmanni ad P. Kir-
 cherum*. Et cum filius rusticæ in Pomeraniâ post theriacam in aquâ card. ben-
 sumptam in universâ cute intolerabilem sentiret pruritus, ex frictione à ma-
 tre institutâ auctum; hæc à filio rogata, ut accuratius inspiceret corpus, undi-
 quaque minutissimos vermiculos è poris cutis partim egressos, partim egre-
 dientes deprehendit, teste Doctissimo Collegâ Nostro Dn. D. Paulini in cyno-
 graphiâ

graphiâ curios. p. 187. Et profecto hanc sententiam maximè roborat hoc, quòd remedia anthelmintica cæteris, de quibus ante dictum est, remediis virtute & efficacia in hoc affectu anteeant. De illis autem jam anno præcedenti egimus. Narrat quidem Bonetus, quòd mulier, quæ viva fuerit de pruritu vago conquesta; post mortem in vulvâ habuerit tumorem lividum & atrum; item quòd Mercator jugi & perenni pruritu in cole vexatus, foverit sordidum carcinoma circa meatum, qui à vesicâ urinariâ in intestinum rectum descendit in *Anatom. Pract. lib. 4. sect. XI. Obs. 4. § 5.*, at verò quis est, qui ignoret, dari abscessus, tumores & exulcerationes verminosas, de quibus Severinus, Hildanus, Paræus, Tulpius, Forestus, Platerus, & Nostræ Ephemerides consuli possunt. Quapropter relictis ante commemoratis topicis amara in vino decocta multoties D. H. cum successu applicuit, aliquando etiam pulveres prurientibus locis inspergi mandavit. Unguentum quoque diapompholygos cum aliis mixtum non rejiculum deprehendit. Hic obiter velut in diverticulo commemorare liceat, hoc tempore Vratislaviæ quæsitum esse, an, cum post contractas nuptias neonupta tanquam atreta & imperforata, aut etiam tanquam velata, adeoque ad admittendum membrum virile inepta accusatur, inspectio & exploratio hæc obstetricibus, an Medicis committenda sit? Nobis salvo aliorum judicio, posterius placuit, ac in hunc sensum respondimus: olim quidem obstetrices magnum in addiscendâ medicinâ, ut sexui pudibundo & ægrè ob verecundiam suas molestias viris detegenti in affectibus muliebribus succurrere possent, posuisse laborem; ita Agnodicen Viri habitu, tonsis capillis sese Herophilo erudiendam tradidisse, ac artem exactè didicisse, ut Higinius tradit, Ocyroën Chironis filiam dedisse operam huic arti, utpote quæ juxta Ovidium:

*Artes contenta paternas
Edidicisse fuit.*

Filiarum Æsculapii Hygiæ & Panacæ tanquam medicinæ gnararum, mentionem fecisse Hippocratem in jure jurando, & Aristophanem in Pluto, medicam quoque fuisse Aspasiâ Plutonis & Periclis Magistram, Phaneroten, Socratis matrem egregiè in Medicinâ versatam fuisse obstetricem, ut liquet ex Laërtio in *vitâ Socratis*, & Valerio Maximo *lib. 3. c. 4.* atque propter hanc peritiam artis olim iis rectè creditam fuisse in ejusmodi negotiis renunciationem. Tales autem obstetrices minimè reperiri nostrâ ætate, præprimis in Silesiâ, in quâ rudes quædam mulierculæ, rerum Anatomicarum & Medicarum ignarissimæ, hanc faciunt artem; ac de nostris verissimè dici posse illud, quod habetur in Jure Canonico: *Sepè fallitur oculus & manus obstetricum.* Et tantò esse clariùs, quod imperitis obstetricum oculis & manibus inspectio permitti nequeat, si finis ejus consideretur, neque enim nudè id quæri, an occurrat in genitalibus aliquod vitium, sed an illud ita comparatum sit, ut nullam admittat curationem, nisi cum gravi vitæ periculo conjunctam, ejus autem rei

dijudi-

dijudicationem quàm longiffimè superare captum fatuarum muliercularum. Et quis, quæſo, ab eis expectet, ſi membrana quædam ante uteri os obtendatur, an nervea ſit, an carnea, an, ſi incideretur, magna ſit metuenda hæmorrhagia, inflammatio, gangræna, convuſio, aut, ſi vagina ſecundum ſuos parietes coa- luerit, an exigua ſit, an magna, an à primâ nativitate, an morbo inducta iſta cohæſio & coaleſcentia? ut jam nihil dicamus de ulceribus ſcirrhoſis &c. Vid. *Fidel. Relat. lib. 3. c. 6.* Absque horum & multorum aliorum præſuppoſita notiâ ad cauſæ deciſionem non poſſe ritè deſcendi. Ad uberio- rem ejus cau- ſæ dilucidationem addebantur tùm alia, tùm præcipuè ſequentia ex Thomâ Sanchez *de Matrimon. Sacrament. Tom. 2. lib. 7. Diſp. 113. concluſ. 12. pag. 390.* *Quamvis regulariter ad mulierem inſpiciendam eligendæ ſint matronæ hone- ſtatis gratiâ, ut conſtat ex c. propoſuiſti &c. & ex c. penult. de probatione, & ex c. Fraternitatis, & cap. fin. de frigid., at ubi agitur de qualitate altiore periti- am ad judicandum deſideranti, quàm quæ in fæminis reperitur, ne probatio- num facultas pereat, aut matrimonium validum diſſolvatur, vel irritum ap- probetur, Medici periti adhibendi ſunt, quò fæminam inſpiciant, quod hujus rei gravitas ac neceſſitas præponderet naturali honeſtati, ſicut à Medicis in- ſpicitur, ubi neceſſitas urget morbi.* Et probatur ex cap. ex liter. de frigid. ibi: *Si vitium illud mulier à natura contraxit, nec ope medicorum poterit adjuvari.* Et cap. fraternit. v. per hæc autem eo tit. ibi: *nifi per incisionem, aut alio ſimi- li modo violentia inferatur.* Nam uterque textus ſupponit in his eventibus, fæminam à medicis inſpiciendam, utpote qui nec id judicare, nec decidere poſſunt absque conſpectu. Et ita docent Franc. Aretin. *Conſ. 142. dub. 4. n. 15. verſ.:* *venio nunc ad quartum:* referens id effectum fuiſſe cum Dorotheâ Filia Ludovici Marchionis Mantuæ. Decius *cap. propoſuiſti. N. 3. notab. 2. de probat:* & dicens eſſe veriffimum & obſervatum cum Filia Ducis Parmen- ſis &c. Quæ, quamvis proluxiora, adſcribere voluimus, tùm quod noſtrum af- fertum egregiè confirment, tùm quod notitia accuratior ejus rei apud nos uti- litate ſua minime deſtituatur. Non vacat alia, quæ ex Zachia & aliis gravi- bus Autoribus allata fuere, hic recitare, ſed potius è diverticulo redimus in viam.

Sternuta-
tio.

Cœlo ſereno & calenti frequentiffimæ erant ſternutationes, & jungebantur hæc etiam morbis tum graſſantibus. Diligenter attendi- mus etiam ad illas, gnari, quod veteres ſternutamentum ſacrum ac di- vinum habuerint, ſicuti id rectè colligitur ex problem. Ariſtot. *ſect. 34. pro- blem. 7.* & fortaffis ex *lib. 3. Xenophont. de expedit. Cyri.* Idcirco & ſternu- tantes jam antiquo more ſalutantur. Ac hoc fecimus eo majori ſtudio, quia aliqua excretio, ad quam Practici utroque ſemper oculo in morbis reſpiciunt, motu ſternutationis perficitur, & quidem non ſine admirabili naturæ artificio, quod ex comparatione tuſſis cum ſternutatione eluceſcit tantò clariuſ. Nam etſi tuſſis cum ſternutatione conveniat in ſubitanea aëris exploſione, quæ ſit opera diaphragmatis & pulmonum, in tuſſi tamen aër non modo à diaphrag- mate & pulmonibus inflatis exploditur, verum etiam in ſummum guttur, gur- gulionem,

gulationem, & extremum palatum arte quadam incurvatum quasi in fornicem impingitur; in sternutatione autem ejusmodi impactio in has partes non fit, sed clauso ferè ore spiritus ex pulmonibus erumpens, in illos membranæ pituitariæ anfractus, ubi vasa excre iora in notabili quantitate præsto sunt, impingitur, ut vel hinc videas in tussi pulmones, tracheam, summum guttur, extremumque palatum ab humore lento & viscido liberari, per sternutationem vero in aliis partibus ejus generis materiam excuti. Regnavit olim sententia, pituitosos humores, qui motu sternutationis excutiuntur, intra calvariam congeri & per Ethmoidei ossis poros & ostium in palato, ex pituitaria glandula expurgari, cujus sententiæ fuit ipse Martinus Schoockius *in prima, libri de sternutatione, editione*: at verò postquam Schneideri felix industria ostendit, vias has haud esse aptas ad ejiciendos hos humores, eo, quod interior dicti ossis paries à dura matre cerebri exacte tegatur, ipsa verò foramina, quæ in calvariis exsiccatis cernuntur, ex amussi occludantur, ostium item illud, quod ex pituitaria glandula serum viscidum ad palatum ducere credebatur, & omnia baseos calvariæ foramina ab eadem matre exactissime investiantur, ut nullus humor ex iis exstillare possit, rectius, quicquid etiam Auctor Ephemeridum Gallicar. anno 1665. Mens. Januar. p. m. 7. moliatur in contrarium, placet Vieussens opinio, quæ vult, in pituitaria membrana satis diligenter ab eo descripta & duodecim aquosis capitis emissariis, quæ ossibus sphænoideo, ethmoideo, frontali & maxillari insculpta sunt, liquorem illum viscidum contineri, qui, dum sternuimus, effluere solet. Quondam Clar. Vir Caspar Hoffmannus vovit, cum sternutatio opus sit mirabile, cujus modum nemo Philosophorum & Medicorum antiquorum explicarit, ut ante vitæ suæ finem id fieret: *de causa*, inquit, *epilepsie novimus fuisse votum Magni Cratonis, utinam ante vitæ suæ exitum aliquis ostendat de modo, quo sternutamentum fit, idem planè vovemus.* Non improbamus quidem hoc discendi desiderium, magis tamen optamus, ut propediem certatim à doctis ostendatur, in quibus morbis sternutatio vel ut causa, vel ut signum profit, vel obsit. Oppido falsa est opinio illa, qua sternutamentum omne salutare putant ei, qui sternuit, qua in opinione siue superstitione vulgus Galliæ est; nam, ut Salmasius *in epistol. ad Beverovicium* testatur, Galli, cum aliquem ægrotum sternutare audiunt, Medicum suum ab eo dimitti ajunt. Dextra, ut cum Catullo loquamur, (juxta experientiam Nostram) sternunt approbatione

1. Catarrhalibus obnoxii affectibus sub finem catarrhorum.
2. Ophthalmia correpti, quando collyria acris oculis ipsorum admoventur.
3. Odontalgia cruciati.
4. Cardialgia & singultu fatigati, unde noti versus:
Tollere singultum sternutamenta, Platonis
Conviva est nobis testis Aristophanes.
5. Mulieres hystericae in suffocatione uterina.
6. Etiam Menstruum pensum persolventes, cum alias justo parcior est fluxus.
7. Secundinarum remoram patientes.

His, & aliis pluribus, ut hoc tempore, & alias sæpè experti sumus, merito acclamaveris illud priscum ζῶσις. Cum formidine quadam sinistri eventus adhibueris illud Gentilium christiano sensu de Deo verò intellectum ζεῦ σωσόν, cum ægri sternunt,

1. Senes vertigine correpti, nam ferè frequentia illa sternutamenta apoplexiam præfagiunt, ut aliquoties observatum.
2. Epileptici.
3. Cephalalgia laborantes.
4. Ii, quibus magna adest in somnum propensio.
5. Hydropici.
6. Pleuritide & aliis inflammatoriis affectibus viscerum medii & infimi ventris exæstuentes.
7. Urinæ fluxum, aut nullum aut impeditum sentientes.
8. Hæmorrhagia narium correpti.
9. Herniosi &c. &c.

Nondum experti sumus, an aliquid veri subsit his Plinii verbis: *Oscitatio in enixu lethalis est, sicuti sternuisse à coitu abortivum.* Dubium etiam est, quod tamen proditur, an calculi renum, in ureteribus hærentes, sternutando possint expelli, quia illi musculos lumbares contingunt. Prorsus autem futile est assertum, flavedinem scilicet cutis ictero in facie contractam, sternutando discuti. Nec audemus definire, quid in febribus mali moris ex sternutatione divinandum sit. Probè edocti ex historiis novimus in ejus generis febribus ægros illos, quibus sternutationes frequentes acciderunt, mortuos esse, ut patet ex Thucidide, Suffrido, Presbytero, Cardano, Carolo Sigonio & aliis. In malignis illis febribus, cum quibus Nos colluctati sumus, alii sternuentes mortui, alii iterum cum sanitate in gratiam redierunt. Atque ita ab uberiori experientiae luce, harum tenebrarum discussio præstolanda erit, quemadmodum eo fine hæc hætenus allata fuere, ut pateret, quousque aliorum observationes nostræ experientiae sint conformes, & alios ad plura observanda excitaremus. Hoc admodum peculiare in Sene capulari (qui jam annum ætatis 83. agit) observavit D. Helwich & in sexagenario D. Pauli, quod sternutamentum, quotiescunque vino incalescit (uti illud minime raro à prima juventute fit) Senem admoneat depontanum & alium satis prata bibisse, & finem comotationi faciendum illico, nisi crapulam gravi dolore capitis, vertigine, &c. die postero castigari velit, à quibus tamen molestiis est immunis, si, quamprimum sternuerit, ab ulteriori haustu sibi temperet. Cæterum requiritur etiam Medici consilium in sternutatione frequentiori, seu ex causis internis, seu inepto ptarmicorum hodie nimis frequenti abusu excitata sit, nam hac via quosdam sensum olfactus, quosdam etiam simul sensum visus amisisse, constat ex Hildano. Præprimis etiam sternutamenta inania periculum minantur, quemadmodum constat ex Cardano & Salmuth. In sternutatione nimia optimè hydragoga & evacuantia ex gialappa porriguntur. Suus etiam sudorificis hic constat honos; à masticatoriis, quæ commendat D. Blanckardus, merito absti-

abstinemus, ne, dum his membrana pituitaria irritatur, simul sternutamentum excitetur, quia membrana nares investiens non fecus ac illa matris duræ propago est, cum tamen evidens sit, sternutationem oriri ab irritatione tunicae illius. Oleum amygdal. d., & butyrum non salitum non prodest, nisi quando externa irritantia naribus intrusa fuerunt, quo in casu etiam lac, ut & aqua calida abluendo juvant & demulcendo. Laudani opiatum efficaciam idem laudat Blanckardus, quo jure, nemo, nisi expertus, novit. Jonstons Noster in *Idea Univers. Medic. Practic. l. 4. c. 3.* in fine: *Venula*, inquit, *in majori oculorum angulo naribus proximo fortius compressæ crebram sternutationem statim sedant*, quia nimirum puncta lachrymalia in limbo palpebrarum breves dimittunt canales in nares desinentes, ut advertit Steno, canales vero illi contracti acris lymphæ descensum impediunt. Nam longius petitum est, quod habent problemata sub Aristotelis nomine à nobis in præcedentibus citata, quod calor fricatione concitatus discutiat calorem feri in naribus, aut, quod alii volunt, compressio sensum obtundat. Eximie verò præ cæteris juvant frictiones & ligaturæ extremorum, ut & V. S., nec non spiritus retentio.

Nulla non tempore mortalibus gravis est Hæctica, imprimis autem tempore Autumnali. Compertum satis est, quod & juniores, sanguinis evacuationibus aut consumptionibus debitis aut consuetis perperam intermissis seu oppressis, imò & post febres inflammatorias, corripiat, ut optime observavit Cl. Stahlius in *problem. pract. de febb.* & senioribus insidietur post febb. quartanas male curatas, & hoc etiam experientia docet, quod quamvis ætatem in hanc miseriam potus frigidus, post æstuosum corporis motum avide ingurgitatus, conjicere soleat. Nec causa proxima hæcticæ adeo nos latet. Conveniunt enim facile omnes in eo, quod tabificæ istiusmodi febres ortum suum trahant ab obstructione lenta, ulceratione, erosionem, ac abscessionibus partium internarum. Nec enim adeo ineptum est, quod docet Sæcra de febb. castrens. malign. p. m. 60. scilicet *hæcticas febres esse manifesta signa internorum seu latentium viscerum abscessuum*, modo vox abscessus in latiori significatione pro vitio, organicam visceris structuram aliquo modo lædente, accipiat, quamvis nullam hic insectandi veteres rationem Sæcra habeat, prout optime ostendit Celeb. Schellhammer in *genuina febres curandi method. part. 3. p. 117.* aliquanto tamen durius, quam par erat, in Sæcram invehit. Ulterius signa quoque hæcticæ neminem temere fugiunt. Ex chronica enim ejus duratione & lentè satis procedente (magis enim invalescit, & citius extenuatur corpus, si fortè febris hæc exacerbetur, aut evacuationes symptomaticæ subsequantur) tabe, vel à vulgo cognoscitur. Sed verè scire, cujusnam visceris labes febrem hanc excitet, utut Medici non parum interfit, ut postea intelligemus, arduum est, nec diagnostica signa ad hodiernum usque diem à quoquam sufficienter enarrata. Quodcunque demum læsum fuerit viscus, adest calor, & is quidem patienti non adeo molestus, nisi exacerbetur, quod sumpto cibo & circa vesperam contingere solet, ubi tamen in volis

Hæctica
pulmona-
ris.

manuum potissimum sese manifestat: adest perpetuò os siccius, & vel glutinosa, vel, quod rarius fit, spumosa saliva imbutum, & ut crescit potioris novæ potius quam consuetæ desiderium, ita summum urget cibi fastidium, nam, ut notum est, dum summopere corpus languet, etiam appetitus ferè nullus, vel languidissimus, aut admodum nauseabundus adest, aut si quando excitatior sit, fere in dyspeptos ac frigidos cibos fertur, unde nisi fastidium satis cito capiat, ut ante satietatem desistat, æger ferè tantum pejus habet; adest etiam somnus turbulentus, interruptus, & ob perpetuos sudores, squalidus, ac laborem faciens, interdum verò premit vertiginosa capitis debilitas, qualem experiuntur temulenti; hæc, inquam, & alia symptomata contabescences fatigant, in quocunque tandem viscere fomes tabificæ febris lateat, nisi quod, ubi nobiliora sunt affecta viscera, e. g. hepar, pulmones, longe atrocior sit hæctica, quàm ubi renes læsi eandem foveant. Quomodo vero hæctica, v. g. pneumonica, sive ea, quæ sequitur læsos pulmones, distingui possit ab hepatica, splenetica, nephritica, seu quæ læsum hepar, splenem &c. excipit, ex his signis non cognoscitur. Præclare de ægris & Medicis mereretur, si quis accuratè hoc exequeretur, eundo per nobiliores hæcticæ species. Observata à nobis breviter perstringemus, omissa ea, quæ diffusas, profundas, ac plurimum materiæ stillantes, ulcerationes externas consequi solet; De qua legatur Morton. *Tr. de phthisi l. I. c. 5.* In pulmonari hæctica adest tussis vehemens & valida, qua sputum satis multum ac illud etiam sæpè sordidum, striis etiam sanguineis notatum & purulentum, nec non materia tophacea redditur, quam epulis sumptis vomitio excipit, nam videas ejusmodi hæcticos eousque concuti, dum cibis vomitu rejiciatur. Rauca quoque voce, clangosa & exili, hæctici illi sunt præditi. Perpetuo in febre hac notare licet respirationem frequentem, aliquatenus molestant, difficilem, anhelosam, non tam à motu, e. g. levi deambulatione, sed etiam à quibusvis aëris alterationibus. Porro ægri hac tabifica febre affecti de pectoris gravitate, & quæ ab infarctu pulmonum pendet, oppressione aliqua conqueruntur, & quoniam lobus pulmonum affectus præponderat, hinc fit, ut ægri in unum latus decumbentes, impetuosiori vexentur tussi, quam si in altero cubent, quoniam dum in latere affecto jacent, glandulæ serosa colluvie secreta turgidæ comprimuntur, ab his vero compressis, continua seri exspuitio in bronchia pulmonum cum continua titillatione &c. sequitur. Aliquando fixus genarum rubor adest. Quando ad extrema ventum est, prominent scapulæ, pulsus fit durus, defluunt capilli, ungues incurvantur, corpus prurigine afficitur, mens errare incipit. Ad pleraque hæc rectius intelligenda, Mortonum in *Tract. de phthisi l. I. c. 3.* consulere juvabit. Multa hic cumulare exempla, eorum est, qui otio suo abutuntur, in praxi enim toto die occurrunt. Ac ne nauseam creemus, in cæteris quidem hæcticæ speciebus in recensendis exemplis occupabimur.

Hæctica
diaphrag-
matis.

Non dubium est, quin diaphragmatis inflammationes, vel in scirrhum, vel tumores & abscessus abire ac hæcticæ causam præbere possint, sed, quibus eam modis

modis cognoscere liceat, id non usque adeo est obvium. Non à nobis adhuc tractata est, quantum scimus, sed, impetuosam esse eique adjunctam insignem respirandi difficultatem cum tensione præcordiorum spasmodica, nulli dubitamus.

Hecticam ex læso hepate, ut indagaremus, varia egimus, & quæ-
sivimus, an in latere dextro senserit contabescens, antequam hecticam
incideret, dolorem gravativum, qui ad jugulum usque pertigerit, &
collum contraxerit, an exiguam tussim cum urina satis rubicunda, co-
lore totius citrino, aut plumbeo? aut nunquid expertus fuerit singultum?
an vomitu cum anorexia & siti satis magna pressus? An aliquam tumo-
ris speciem observarit? An respiratio fuerit suspiriosa, aut suspirio luctu-
oso similis? Conf. Bartoletti *method. in dispnæam lib. 4. c. 23.* Hæc enim &
alia cum præcesserunt, probabile, licet non apodicticum, de hepatis inflam-
matione præbent argumentum. Quia vero hepatitis facile in abscessus hepa-
tis vergit, operæ pretium esse duximus, sollicitè sciscitari, an purulenta mate-
ria, vel per urinam, vel per alvum evacuata fuerit? & cujus illa coloris? an
fusca & eo conjuncta cum foetore, quem alias amurca olei olivarum spargit?
Saniem hepatis ad rubedinem vergere quidem asserit Avicenna, sed experien-
tia non invictè probat, quibus in casibus etiam respiratio solet esse longè ma-
gis difficilis. Præprimis autem utile admodum est nosse, an feбри quartana
patiens laborarit, & quomodo ab hac fuerit curatus? an æstuanti corpore fri-
gidam affatim hauserit? Hoc enim cum sit, sanguis coagulatur, hepar con-
stringitur, & facilè oriuntur scirrhi. His, inquam, aliisque sollicitè discussis
symptomata ritè sunt perpendenda, quæ, quantum nobis constat, in hecticâ, à
labe hepatis oriunda, sunt sequentia: Ferè aliquam sentiunt gravitatem in dex-
tro hypochondrio, asthmâ obnoxii sunt sicco, colorem habent lividum ac fla-
vescentem, (quasi icterus cum hoc malo foret complicatus) alii vero sub pri-
mum insultum morbi crebra tentantur phlogosi ac facies ipsorum rubet, præ-
cipuè post potum, etiamsi is spirituosus non sit, cum tempore vero incipit pal-
lescere, nisi, quod pallor ille maculis floridis post cibum sit distinctus. Urina,
quæ mingitur pauca, colorem aurantium æmulatur, consistentia autem e-
jus crassa est, ac sedimentum multum, illudque submucidum, grave & spif-
sum, ac rosei coloris existit. Dejectiones jam nimium duræ, jam liquidæ ci-
to diffuentes & consistentiæ inæqualis, jam verò spumosæ. In appetitu est
aliqua varietas, modo nimis languet, modo autem fertur in cibum quendam
incongruum &c. Quanquam vero ita res sese habeat, non tamen putandum,
quod semper, quando hepar male affectum, febris sequatur tabifica. In au-
tumno anni præterlapsi, Matrona, diuturna inappetentia, magna siti, dolore
gravativo in hypochondrio afflicta, post aliquot ab ▽. bened. Rul. à Medico
exhibita dies, inopinato moritur, quod D. Helwich. ultimo morbi die vocatus
fore prædixerat. Anatomicæ inspectioni cadaver patuit. Ventriculus aqua
quasi elotus videbatur, intestina flatu turgebant, viscera reliqua sine labe & si-
ne putrilaginosa labe, in hepatis vero parte ima spectabatur corruptio, ac he-
par præ siccitate friabile erat, & nihilominus nullo modo contabuerat.

Hectica
hepatica.

Hæctica
splenetica.

Hæctica ex splenis vitio orta, nunquam hominem invadit, nisi præcefferint seqq. 1. *Tumor in sinistro hypochondrio* versus anteriora protuberans, & hominem quasi in medium cingens, quem, credimus, expertus leno ille apud Plautum, qui ita de se: *Nunc jam quasi zona liene cinctus ambulo, geminos in ventre habere videor filios, nihil metuo, nisi medius disrumpar miser.* 2. *Palpitatio lienis* interdum satis vehemens, ut ab adstantibus audiri queat. Vid. Tulp. l. 2. c. 28. 3. Febris conjuncta cum fervore in sinistro hypochondrio, cibi fastidio, siti. 4. Dyspnœa, & oppido fallitur Craan, dum autumat, non tam spirandi difficultatem adesse, quam respirationis metum, ob ingravescentem ex respiratione dolorem, cum in ejusmodi casibus nemini ignota sit aliqua diaphragmatis compressio. 5. Decubitus in dextrum latus molestior. 6. Durities sub costis sinistri lateris oblonga, ex acutiore principio in latus quasi & arcuatum ventrem turgescens. Hæc, inquam, aliaque ejus generis symptomata febrim tabificam splenicam anteeunt; hæctica autem lento satis pede procedit, & cum hac ferè conjuncti sunt maximi sudores, color faciei & totius corporis luridus & sublividus, pedis sinistri intumescencia dura ac tensa, fusca & nigricans conjuncta cum dolore urente, vibratili, contusorio, appetitus ut plurimum non dejectus quidem, sed tamen interdum absque evidenti causa fastidiosus, oris siccitas, & tamen non usque adeo magna bibendi cupiditas, cum nauseabunda hujus illiusve potus generis aversatione, urina sublivida in virorem vergens, & interdum dilute nigricans, alvus ut plurimum adstricta, interdum aliquo modo concitior. Ipsi verò contabescences torpidi sunt, taciturni, morosi, & profundis cogitationibus defixi, anxii & moesti, oculis suis concavis adstantibus formidinem aliquam incutientes.

Hæctica
Pancreatica.

Cum in Pancreate origo hæcticæ hæret, quid fiat, vel ex solo Tulpio l. 4. *observ. Med. c. 32.* colligere est. Prudenter Vir Ille à pancreate supra infraque ut turgido & extuberante, sic intus sordido pure ac viscida pituita impendio nimis infarcto juvenilis corporis emarcescentiam, summas præcordiorum anxietates &c. deducit.

Hæctica
Nephritica.

Hæcticam Nephriticam præcedit 1. Nephritis, i. e. inflammatio renum, si propriè vocem accipias, nam nephritidem inter inflammationes recenset Hippocrates lib. 1. *de morb. text. 3.* Nephritis vero cognoscitur, ut notum est, ex dolore in lumbis præcipuè tamen in sinistro, acuto, ardente, lancinante &c. (Unde & Auctor *Definition. Medicar.* ait, quod nephritis sit inflammatio renum cum dolore vehementi &c.) ex motu illo febrili vago, horripilatione & æstu, dysuria, urina pauca modo tenuiori, modo autem crassiori, fibrosa & veluti filamentis mucidis interspersa &c. 2. Sæpe etiam uberius calculi proventus aut tantum excretio sabuli calculosi, quod statim cum urina erumpit, & ad imam matulæ præcipitatur. Febrim verò nephriticam comitantur & ab aliis hæcticæ speciebus distinguunt copiosa muci excretio, striæ sanguineæ vel muco vel urinæ intermixtæ, exacerbationes vehementiores post iracundiam, motum corporis violentiorem, recur-

recurrentes, contabescencia lentiori pede, quam in aliis hecticæ speciebus progrediens.

Omentum quoque hecticam fovere potest. Exemplum ejus occurrit in Warthonio in virgine cachectica. Illa per tres menses ante obitum diarrhæa lenta per vices recurrente unaque frequenti materiæ porraceæ vomitu laboravit, pulsus erat languidus, urina pauca & incensa, abdomen circa regionem umbilicalem duriusculum, & subtumidum apparebat (quæ symptomata DD. Grassius & Helwich etiam in septenne puero Illustris profapiæ, omento plane destituto, notarunt) decubitus in latus dextrum molestè ferebat, paulò post tussicula, spirandi difficultate, febricula cum linguæ ariditate infestabatur, ac tandem macie confecta fatis cessit *cap. 12. Adenograph.*; alias, sicuti tumores omenti nulla arte à tumoribus mesenterii distingui valent asserente Riverio, ita nec hectica ex omento discerni potest ab ea, quæ ex affecto mesenterio oritur.

Hectica
Omenta-
lis.

In Hectica tamen à Mesenterii vitiis oriunda, quæ teneriori ætati magis familiaris est, quam virili aut senili, febris ipsa est satis languida atque graviorum symptomatum exors, nec functiones ægri quotidianas interpellat, abest ferè sitis, sed anorexia premit tanto gravior, adest etiam tensionis ac gravitatis sensus subter ventriculum, imo advertitur quoque aliquando contactu durities, (ita Fernelio oblata est ingens contactu durities à ventriculi fundo in utrumque hypochondrium diffusa *in Consil. 67. & rursus lib. 2. pathol. c. 7.* testatur, usque adeò durum à se esse deprehensum tumorem, ut penitioribus subter umbilicum partibus vel os, vel calculus concrevisse putaretur: Ab Heurnio totum mesenterium quasi saxeum est inventum *Commentar. 6. aphorism. Hippocr. 7.* Ejus generis tumores duos à Coitero, Hollerio, Cornelio Gemma, Paræo, Fabric. Hildano, aliisque sunt observati.) Nonnunquam ejusmodi tumores non sentiuntur, quod fit, cum abdomen turgidum, ac sensim nimis protuberat. Alvi successus inconstans est, jam nimis lubrica existit, egestionisque chylosi non absimiles cernuntur, jam verò dura & adstricta est. Rupto abscessu, pus vel sincerum, aut fæcibus permixtum, albi vel citrini coloris, citra dolorem enormem excluditur. Est tamen ubi abscessus isti multorum gravissimorum symptomatum, vomitus, nausea, cruentarum alvi dejectionum, lypothymiarum, vigiliarum, sitis clamoræ &c. causæ sunt, ut constet ex Donato *lib. 4. c. 7. histor. Med. Mirab. & Benivenio de abdit. c. 33.*

Hectica
Mesaraica.

Nec dubium est, quin in febrim hecticam homines ex scirrhis & apostematibus ventriculi ac intestinorum incidant. Ita meminit D. Helwich, ante novem annos aliquem sensim Regiomonti extenuatum & summè languidum, ad mentionem cibi potusve præ fastidio cohorruisse, & febre hectica contabuisse, in defuncto autem ad finem orificii sinistri ventriculi inventus est abscessus per totam partem gibbam ad fundum usque in orbem exporrectus &c. ut ex Novis Litterar. *Ann. 1701. Mens. Jul. p. 197.* cognovimus.

Hectica
stomachi-
ca & inte-
stinalis.

Galenus

Galenus *lib. de different. febb. c. 9.* testis est, se vidisse, in coli inflammatione diuturna tabidam febrim secutam fuisse. Idem etiam de vesicæ affectibus perhibet. Ex ulceribus prostaticis diuturnis in gonorrhæa maligna quid fiat, alibi est indicatum. Sed difficiliora sunt signa diagnostica. Quando in crassioribus intestinis labes est, semper adest aliqua, in deponenda alvo, difficultas. Meminimus Nobilem foeminam hæmorrhoidariam, post ulcus uteri, asseverasse, sentire se, quasi per angustum aliquem canalem aliquid ejiceretur, summis doloribus, quoties alvus esset exoneranda, fæces verò, quæ non sine dolorificis illis sedibus exhibant, erant mucosæ subcinerii coloris. Extenuabatur indies sensim cum calore circa noctem increbescente, atque hinc minime dubitamus, eam hectica intestinali laborare. Habet autem accuratior notitia visceris, quod hecticæ oleum præbet, tum alias utilitates, tum præcipuè hanc, quòd evitetur incongrua antiphthificorum in hypochondriaca hectica administratio. Nam cum antiphthifica pleraque sint traumatica, & adstringendi virtute gaudeant, non possunt non augere malum illius tabificæ febris, cujus origo ab obstructione viscerum in imo ventre dependet. Et sanè verissimum est illud vulgatum: *Traumaticorum noxius abusus Epitaphium hæcticorum.* Imo inde à sagacibus Medicis disci potest, quibus viis & modis Natura viscerum quorumlibet corruptelas avertere laboret.

In omnibus hisce tabificis morbis, ut & in febribus acutis subinde frequentem & largum urinæ fluxum, qui diabete quodammodo affinis, notavit aliquoties D. Helwich, ac operæ censet pretium tribus commemorare verbis, quibusnam ille evenit, quo potissimum tempore, quidnam indicarit &c. Quantum autem recordatur, plerique eorum, qui hoc symptomate fatigati hæcenus sunt, constitutionis phlegmaticæ fuerunt, vix autem unus & alter cholericus temperamenti. Ex relationibus ægrorum didicit, in hisce læsæ ciborum concoctionis etiam ante morbum indicia sese obtulisse varia; ita aliqui, priusquam in hos inciderent morbos, narrarunt, se compressivum ventriculi dolorem, Sodam etiam levi data occasione, sitim & absque Soda ardorem aliquem, quamvis non adeo ingentem in regione pectoris & ipso etiam ventriculo variis temporibus percepisse, viscera sibi calidiora visa, quæ pathemata induxerunt doctissimum Anglum, ut statueret, ingestum potum quemvis vim contrahere *diureticam à stomachi & intestinorum ardore.* Ac sanè nimis verum est, frustra nos laborare in moderando urinæ fluxu, nisi quodammodo suum ventriculo robur fuerit restitutum. Porro retulerunt, cum antehac ad sudorem fuissent propensiores, dum commoda uterentur valetudine, eum inclinante sanitate fuisse imminutum, ac sensim largius stillasse urinam. Ulterius plerique etiam incommoda aliqua circa regionem renum, sive doloris punctorii, sive gravativi nomine veniant, se passos fuisse commemorabant, ut non absque causa conijcere liceat, etiam renes ab omni labe in iis aut non fuisse, aut etiamnum esse immunes, quamvis ex circumstantiis vix assequaris, an eorundem inflammatio accusanda, an nimia pororum laxatio, aut an aliud quoddam subsit vitium? In omnibus autem hisce ægris, qui nimiam urinæ quanti-

quantitatem profundunt, magnum in sanguine orgasmum ac vehementem ebullitionem deprehendas, unde etiam Willis rarum illum affectum diabete sanguinis potius, quam renum affectionem esse, suamque originem sumere à malsâ sanguinis in serum fusâ, credit, ratus sanguinis crasin per acorem ita laxari & quadantenus dissolvi, ut particulæ aquosæ à crassioribus contineri nequeant, quin illæ harum amplexibus evolutæ & falsedine imbutæ per tubulos renum excurrant. Sylvius quoque *salī volatili* & *valde acri* ut & *acido acerrimo in sanguine* & *lymphâ* tribuit vim fundendi serum & concitandi uberiores urinæ fluxum; ex quibus manifestum est, quod etiam hi clarissimi duumviri quandam in sanguine eorum, qui sæpe & multum mingunt, fermentationem observaverint. Imò ante multa secula accuratissimus Aretæus colliquationem humorum cum hoc affectu conjungi, acutè ut multa alia vidit, & illam hujus esse causam luculentè docet. Liquari verò atque insigniter evolvi in ægris, de quibus nobis sermo est, glutinosam ac balsamicam sanguinis portionem, imò & ipsam fortasse pinguedinem & carnem, colligitur ex macie totius corporis, sanguine in venis fluidiori, motu cordis & arteriarum celeriori, mordacitate & acredine, quâ digiti tangentis offenduntur, vigiliis nimis &c. Quando autem urinam reddunt in viis urinariis in ipso effluxu lotii acrimoniam & ardorem sentiunt. Verum est, quod scribit Listerus *p. m. 28.* ejusmodi ægros habere *abdomen rugosum, venas extantes, totumque habitum corporis gracilem, esse anxios ac animo dubios*, quando nimirum urinæ profluvium & sitis jam insigniter aucta sunt; sed non æquè adhuc compertum, num ante accessum & quando morbus *adhuc parturit*, (quod longo tempore fieri opinatur) *os humore privetur, saliva albida sit & spumans* &c. Ultimo etiam pedes intumescunt. Quod tempus concernit, observatum est, in constitutione aëris australi humidâ æquè ac calidâ, quam aura frigidior excipit, ægrotantes illos & sæpius & plus mingere; an verò hinc inferri queat, quod ipse hic humidior aër in urinam abeat, in quam sententiam Clarissim. quondam Wittenbergensis Medicus Schneiderus *lib. 3. sect. 1. cap. 7. de catarrhis* propendet, nostri non est otii disquirere; sed illud addimus, etiam post iram, ad quam valdè proni sunt nostri ægri, terrorem aliasque animi passiones concitatori cursu ac uberiori quantitate ferri urinam, id quod etiam contingit post frigidum, quem avidissimè appetunt, potum, ac notatum est, quod tum reddant urinam, quæ parum ab assumpto potu ratione coloris & odoris differt; & Trincavellus *lib. 13. de ratione curandi humani corporis affectus* omnino fidem meretur scribens: quod nobilis ille Venetus, frater Cardinalis quondam Pisani febre correptus, postquam assumtis quibuscumque gelidissimis usus esset, vinum non solum & aquas, sed & syrupos non alteratos minxerit. Conf. *Dec. 2. A. X. obs. 155.* In acutis febribus circa dies criticos potissimum ejusmodi uberior fluxus urinæ cernitur: in diuturnioribus verò illis cum tabe conjunctis, quando de mordaciori calore viscerum incipiunt ægrotantes conqueri. Est autem ejusmodi urinæ fluxus symptoma certè in morbis illis gravissimum, & vix ullam admittens medelam, nisi in primâ herbâ viribus ad-

huc constantibus debitis remediis, quæ hic invenire difficile est, suffocetur, ita tamen, ut semper ad morbum præcedentem, debilemque ventriculum habeatur respectus. Unicus casus est, quo Medicus etiam in paulò uberiori urinarum tenuium fluxu per aliquot dies spectatorem agere tutò potest. Nimirum satis constat, quod in febribus quotidie exacerbationem conjunctam habentibus primis statim diebus subinde reddantur urinæ crassæ ac planè perturbatæ, (in quibus grumi quasi innatant) & quidem in exiguâ satis quantitate, quas aliqui in Praxi minus exercitati pro criticis venditare solent satis imperitè, cum harum sedimentum sit & *levius & magis unitum, compactum ac pendens*, istarum autem *asperum, dissolutum magis, fundo matule inherens*. Urinas illas crassas & paucas declinante febre excipiunt claræ ac tenuiores, quæ quò copiosiores produnt, eò citius febris subigitur. Et in his circumstantiis, etiamsi ubertim urina effluat, & ægri etiam ipsi male sibi ominentur, nihil quicquam sinistri Medicus metuat, multò minus sibi imponi patietur textu aliquo Hippocrat. ex libro de judiciis, qui in hunc sensum depravatè citari solet: *si ex crassis omnino tenues fient urine, difficilis & inconstantis sunt judicii*: Sed potius rem omnem securo animo naturæ committat. At in reliquis casibus majori circumstantia opus est. Nulla hic evacuantia locum habent, cum ægri hoc in affectu admodum debilitentur, satisque per se evacuentur. Aliqui ad adstringentia confugiunt, & modò *julepos* parant ex ∇ . centinodiae, burs. pastor. folior. querc. tormentill. bistort. ac syr. myrth. cydon. corallior. granat. ac. de agrest.: Modò *decocta* ex rad. tormentill. bistort. rosar. rub. balauft. bacc. myrth. nuc. cupress. sem. plantag. arill. granat. &c.: modò *Pulveres* ex coralliis, bolo armenâ, lap. hæmat. &c. exhibent. Enim verò certissimum est, quod adstringentia in humores ipsos exiguam exerceant energiam, quam promptissimè in partes solidas exerunt; jam verò in hoc nostro affectu vitium maximum hæret in sanguine, utpote cujus partes connubio & nexu arcto non amplius conjunguntur. Hoc cum vident alii, id sibi credunt dari negotii, ut humores contemperent, salium combinationes & sanguinis fusionem impediant &c. & ut destinatis suis potiantur, exhibent decocta hordei, emulsionem ex amygdalis, ex semine papav. albi melonum, cucumerum &c. ipsum etiam lac; Et sanè non malè, nisi amplius his debilis offenderetur ventriculus, aut si ea dentur cautelâ, ut illum lædere non possint; neque sic tamen ex toto assequaris, quod intendis. Neque ulla ex usu Martialium in ægros redundat utilitas. Opiata tantum abest ut rem afflictorum restituant, ut potius perdant & anxietates enormiter augeant. Frustra etiam ab amylo, tragacanth. restitutionem mixtionis sanguinis sibi quisquam fuerit pollicitus. Succinum aliàs egregium est medicamentum, sed quod propter vim diureticam etiam hic quodammodo est suspectum. Mastichina, nisi æstum augerent, palmam cum thure reliquis remediis facile præriperent. Restant ergò quasi unice blandiora quædam extracta & mitiores gummi-resinæ, prudenter exhibita, quæ & ventriculo profunt, accretiones salium, fusionum autorem dissolvunt, partium in sanguine iteratum consortium promovent ac balsamicâ

famicâ virtute corpori robur restitunt. De aquâ solutionis calcis vivæ & Tincturâ antimonii à Willisio commendatis testimonium ab experientiâ interponere non possumus. Externa, quæ Joh. Francisc. le Conte *in cap. 35. de curatione ardoris in urina* recenset, inefficacia sunt.

In iis, ut hoc in transitu moneamus, personis, quæ affectibus spasmodicis obnoxie vivunt, ac in mulieribus, quæ passionibus hypochondriaco-hystericis vexantur, copiosæ tenues urinæ quæ longè quantitatem potus superant, certissime prænunciant, præ foribus esse novos insultus asthmatis convulsivi, epilepsiæ uterinæ, passionis hystericæ &c. In aliis autem, qui ab his affectibus immunes degunt, & nihilominus nimis copiosam urinam reddunt, ferè semper tutò prædicere licet, eos in hydropem præcipitatum iri, nisi maturè venienti occurrant morbo, ubi tamen plerumque furdus narratur fabula, sicuti toto die experimur. Occurrit nobis aliquod rarum singultus exemplum, quod mereri credimus, ut illud paulò distinctius narremus. Nimirum tenerioris constitutionis puella annum ætatis 13 agens ex mœrore ob morbum matris periculosum & superveniente terrore ob imminentem forori lapsum in lipothymiam incidit, quæ crebrò redibat pertinaci alvi obstructione, intensiori æstu, cephalalgia & anorexia stipata. Vocatus Medicus creberrimo usu pulverem altero Jno, altero Jali & tincturæ, quam dicebat auream, morbum profligaturus, effecit, ut lipothymie toties accederet singultus per dimidium horæ quadrantem sæviens, quoties vel cibum vel potum assumeret. Cum itaque exhaustâ ad luxuriam usque auri speciosâ Panacæâ & aucta pulverum mole indies augmenta sumerent memorata pathemata, Medicus arcanis suis nimium forsan fidens, petulantie, in quam sexus sequior ætasque juvenilis pronâ judicatur, adscribere haud verebatur hanc malorum lernam justissimâ licet ægræ indignatione. Transactis lubrico sub hoc solatio viginti, & quod excurrebat, septimanis, singultus periodicus tandem degenerabat in continuum, nunquam nisi somni tempore inducias permittentem, quem præter alvi stipticitatem, æstum, anorexiam & in deglutiendo sonum (*) (*wie bey einem leeren Topffe*) paralytici oesophagi indicem, tanta subsequēbatur virium prostratio, ut nec artus, nec oculos movere amplius valeret miserrima. Parentes credulitatis pertæsi & filiam verè agonizare animadvertentes consilium auxiliumque postulabant à D. Klaunig, qui accedens externè pariter atque internè adhiberi curabat remedia, quæ judicabat deplorato statui appropriata. Clausæ alvo clysmata, stomacho & pectori stomachica confortante insimul & imprimis antispasmodicâ virtute pollentia exhibebat omnis generis, internè quidem ut plurimum liquida, quoniam sciebat ægram pulveribus jam abundanter fuisse nutritam, externè verò applicari suadebat spiritus, fots, emplastra motibus convulsivis & nervorum debilitati dicata. Tragoediæ huic solus per aliquot septimanas adstabat D. Klaunig, morbo interim in eodem statu permanente; quapropter ipse autor erat atque suasor, ut alius ipsi adhuc adjungeretur Medicus. Deveniebat hæc sparta ad D. Helwich. Hi conjunctis viribus morbi ferociam aggrediebantur, usque dum, continuato insuper alteran-

(*) Inanis olla.

tium & ita dictorum specificorum usu, aliquid solatii invenirent in balneo tamdiu singultum auferente, quamdiu aquis immersa sedebat ægra. Cum de instante mensium fluxu suspicio nasceretur, venæ sectionem pariter in auxilium vocarunt, non tamen eodem exoptato successu, quo gloriatur Th. Bartholinus in *Act. Hafn. vol. I. obs. 73. p. 143.* scribens: quod virginem quotannis per 14. dies continuò singultientem apertâ venâ integræ restituerit sanitati. Generosiora medicamenta propter accessum nimis tardum, cum ægram jam invenirent omnibus penitus exhaustam viribus offerre non potuerunt. Interim famosum illud Δ epilepticum, quod blandis vomitibus cruditates in ventriculo latentes excutere solet, iteratis vicibus, in exigua tamen quantitate, exhibebant; postea verò re aliquoties in deliberationem vocatâ visum fuit commodum justam ejus medicamenti dosin repetere. Hoc facto aliquot sequebantur vomitus, quos gravissimum excipiebat animi deliquium. Tandem horâ tertiâ sequentis diei matutinâ tres singultus eæque vehementissimæ concussiones & vibrationes præter spem & opinionem singultui per 15 septimanas continuò sævienti totique insimul morbo finem imponebant exoptatissimum.

Octobris initia benigno calore grata, reliqui autem mensis hujus dies turbidiores & propter pluvias ac frigus inamœniores erant. In Novembri temperato fruebamur aëre, usque ad Plenilunium, postea autem nebulosus ac pluviosus corpora nostra ambiit. Mense ad finem vergente inconstans ingruerat frigus, ut plurimum tamen satis remissum. Decembrem inter nebulas, fluctus aëris (ita Verulamius ventos argutè vocat) & pluvias, sicuti ferè apud nos semper fit, transegit. Multi sub hac aëris constitutione tussi infestabantur. Regnabant etiam febres cum mediocri calore, doloribus hypochondriorum, dorsi, siti immodicâ, exanthematibus serosis, purpurâ, pleuritide, ictero & diarrhæâ singultuque conjunctæ, ac bezoardicis fixis & volatilibus, intermixtis anodynis, oppugnatae fuerunt. Parcè data volatilia, & diarrhæa, quandiu pulsus constabat, aut exanthemata sese oculis ingerebant, anodynis non est sublata. In his febribus, ut aliquoties D. Grassius cum aliis collegis observavit, non continuò singultus vitæ periculum est minatus. Quàm terrificum verò singultus in malignis febb. symptoma sit, norunt Practici. Epiphanius Ferdinandus *histor. 27.* DEum testatur, singultum in febribus malignis, tanquam characterem summè exitialem, sibi semper observatum, & certè si delirium accedit, ferè de vitâ actum est. Hinc Hippocrates in *Coac. 89.* inquit: *Desipientia, cum difficultate spirandi & singultu, mortem affert.* Quò in casu veteres adesse insignem & validam inflammationem hepatis sunt suspicati, quod suo relinquimus loco. Cùm verò in singultu primariò vel diaphragma vel ventriculus, & hujus ferè sinistrum orificium patiatur, licet ventriculus diaphragma, & hoc, vice versâ, illum trahat in consensum, unde divortium sententiarum enatum, dùm hi pro ventriculo, alii pro diaphragmate pugnant, ipsimet nos fatemur, in nostris patientibus magis ventriculum fuisse affectum, quia singultu imminente continuæ febres hæc in intermittentes, quarum focus in primis viis hæret, mutabantur. Et ferè ea Nobis sedet sententia,

tentia, quod singultus medicamentis in febb. acutis obtemperantes, sedem suam primario in ventriculo habeant, atque hoc evidenter patet, ut fieri aliquando solet, singultus in febribus nonnunquam intemperatum Juleporum refrigerantium usum sequitur, & vel carminativis, vel vini potu tollitur. Quod etiam fieri credimus, cum enemata aut lenissimæ evacuationes singultum compescunt. Id autem non rarò accidit, ut ex Rhodio aliisque Observatoribus intelligimus. Hinc optimè Doctissimus Duretus: *Permulti*, inquit, *cum singultiendo frangerentur, ductâ alvo per 5. dies hierâ picrâ, singultiendo finem fecerunt.* Et in bilioso illo juvene (de quo Timæus Cas. 5. lib. 3.) causo laboranti cum singultu, qui solo nivis potu edomitus est, ubi mali fomes nisi in ventriculo? Optandum sanè esset, ut præsto forent signa, quibus pars primario laborans exactè dignosci posset. Aliqua in singultiendo occurrit differentia, quæ nec scribi, nec verbis fatis exprimi potest, & à nullo, nisi exercitato in praxi, aurium judicio percipitur. In febb. malignarum singultu, in quo diaphragma afficitur, quicquid agas, ferè frustra agis, ut etiam hoc anno aliquoties experti sumus. D. Pauli præerat curæ viri sanguinei febris malignæ correpti, qui, ubi in singultus incidisset, Collegam sibi adscivit D. Helwich, ambo nulli pepercerunt labori, alexipharmaca in variis formulis propinarunt, initio quidem, post exhibitum bolum ex conserv. scord. confect. de hyacinth., theriac. andromach. & bezoard. miner. cum saccharo paratum, & cataplasma contra singultum Myns., aliaque topica applicata, singultus remittere videbatur, sed mox iterum pristinam feritatem induens, nullis bezoardicis cum carminativis remixtis, nullis externis, etiam selectissimis, nec vesicatoriis demulceri potuit, & æger post triduum fatis concessit. Eandem tragoediam in aliis spectavimus. Cæterum in febb. illis, de quibus jam sermo nobis est, rarò purgantibus, V. S. vix unquam usi sumus. D. Grassius emetico subinde primas vias expurgavit. Is ipse etiam curavit hanc febre decumbentem viduam 40. annorum, cui menses ritè fluxerant, ei non tantum vomitorium, sed & purgans propinavit ac sudoriferis sudorem provocavit, cum verò illa circa 12. nocturnam totius corporis pandiculationem, cum levi debilitate per aliquot noctes experiretur, tertium evacuans dedit, & morbi reliquias essent. absinth. cum essent. cochlear. sustulit: eo quidem effectū, ut jam ab epilepsia, cui antea fuit obnoxia, vivat immunis.

Jungebantur etiam his febb. paralyse lingue, & insultus apoplectici, sine evidenti periculo. Circa solstitium hybernū iisdem febb. etiam asthma convulsivum supervenit, aliquando etiam parotides acceperunt.

Quartanas D. Preus emetico, & alibus & cortice Peruviano brevi curavit. Idem cum affectu paralytico-spasmodico lingue & lateris dextri sæpius recurrente luctatus est. Paralytin quoque febre superveniente solutam vidit. In sene quodam eadem febre correpto, cum contumacissimâ narium siccitate, faucium ariditate, obauditione, vigiliis & inquietudine summâ, natura crisim moliebatur per sputationem, & incredibili quantitate intra aliquot dies exturbabat pituitam, similem liquori, quem alumen albumini ovorum con-

quassato solutum reddit, ut observavit D. Helwich, qui etiam illicò recordatus, simile olim fatum esse expertum post pertinacissimas lucubrationes, neglectum capitis muniendi, & tumultuaria per saxa, per ignes, intempestis noctibus, stridentibus austris & coris; itinera, æternum eruditæ Germaniæ decus ac Polyhistorem incomparabilem Thomam Reinesium, sicuti Vir summus ipsemet testatur in *epistol.* ad Casp. Hoffmann. XI. 26. atque hinc nominatus Collega noster nullo modo naturam turbare voluit, & ferè tantum egit spectatorem, præprimis cum quotidie vires ægri crescere videret.

Dolores
parturien-
tium spu-
riti.

Parturientes in Autumno hoc, quas nobis noscere datum, experiebantur dolores & spasmodicas vellicationes ac contorsiones in diversis locis, ut ambigui hæreremus, an Ileum, cœcum, aut mesenterium has afflictiones pateretur, an in colo mali hujus radix esset? Omnes sursum magis, versus umbilicum, stomachum ac dorsum vergebant; uno verbo, spuriis fatigabantur doloribus, quos ex pomorum, pyrorum & aliorum fructuum ingurgitatione ortas esse autumamus. Opportuno tempore vocati, ac de spatio gestationis informati, ut & de conditione officii uteri interni, & situ foetus certiores redditi, dolores illos sylvestres sopire sumus annisi. Ac in cruciatibus his placandis, singularem exerunt efficaciam in phlegmaticis & melancholicis essentia carmin. D. Mich. & Wedel., cort. aurant., galang., zedoar., castor., croc., spirit. menth., pulegii, meliss. sal. *ic. anis., anticolicus &c. pulv. stomachicus D. Birckmann., spec. diacumin. &c. In sanguineis spiritus nitr., elix. citr. cinnabarina &c. Externè sacculi paregorici, linimenta ex oleis carminativis, lauri, anethi, carv., fœniculi, juniperi, balsam. stomachale, balsam. embryonis cum pane mellito impositus, cataplasmata ex spec. decocti carminat., emplastr. de bacc. laur. &c. Laudantur communiter hic & diaphoretica, sed ex eorum usu æstus majorem fuisse accensum recordamur. Abstinuimus etiam ab enematis, ne ullo modo præcoci foetus exclusioni ansam daremus, etiam si aliàs minimè ignoremus, clysteribus flatus discuti ac intestina corroborari quàm optimè. Hoc in casu etiam rarissimè V.S. apud nos celebratur, tametsi in sanguineis, ubi sanguinis depletio necessaria est, cum maximo ægrarum levamine adhiberetur. Toto verò hic die ab imperitis obstetricibus peccatur, quæ cum summo matris & foetus damno, præsentibus crudis doloribus, ad conatus pariendi & verbis, & incongruis remediis (nam & pharmacorum dispensandorum licentiam sibi vendicat mulierularum istarum arrogans simplicitas) gravidas compellunt, quo stolido ausu sæpè optimus situs foetus in periculosum convertitur, & hanc temeritatem mater aut proles sæpè morte suâ expiat; Interea illa, quæ foetum roborant, minimè sunt negligenda, & potiones analepticae cæteris interponendæ remediis. Nostrium quoque consilium expetitur fuit in urinæ suppressione cum ardore genitalium conjuncta, qua fortè ob compressionem sphincteris vesicæ ex grandiori foetus mole ultimo gestationis tempore nonnullæ infestantur. Cautè hîc mercandum cum

Urinæ sup-
pressio in
gravidis.

cum diureticis, & vix à nobis potuimus impetrare, ut propinarem^{us} spiritum falis, tinct. nephritic. Ammelungi, malvat. juniper., tartar. vitriolat., juscula cum petroselino parata &c. ac ferè unicè externis contenti fuimus. Balneorum virtus hìc eximia est. Pectini quoque & perinaeo cataplasmata ex rad. alth., herb. maly., cherefol., parietar. nasturt., apii, bacc. laur., ol. scorp. optimè applicantur. Mulierculæ cæpas butyro frixas apponunt, non sine levamine. Cùm verò sermo noster inciderit in affectus gravidarum, non abs re fuerit paucis delibare, quomodo in spasmis & tenesmo earum removendis fuerimus versati. Spasmi vicinarum partui, quantum nobis quidem constat, ex compressione & extensione fibrarum ac nervorum, dùm uni lateri diutiùs incumbunt, oriuntur. Ac ita quidem fert usus communis, ut in hoc affectu juncturæ secundum nervorum ductum, essent. castor., elix. uterin. aqu. apoplectic. & epilepticis variis, articulari Mynsicht., spir. formic. vel unguento nervino illinantur; enimverò tantùm abest, ut hinc mitigatio spasmi sequatur, ut potius intendatur. Calidum lac hìc omnibus reliquis factum fecerit medicamentis. Imò ipsam & calidam spirituosam omnibus, duce experienciâ, præferimus, minimè cæteris quin inficientes, quòd pedilavia cum emollientibus & blandis nervinis remixta, optato etiam gravidas exhilarent eventu. In remediis, quæ tenesmo utero ferentium opponuntur vulgò, nihil est, quod desideremus. Apprimè satisfaciunt expectationi fetus ex fol. querc., florib. thapsi barbat., chamæmel., rosar., sem. lini, linar., furfure tritico, in lacte, vel vino, pro re natâ decoctis. Nec minùs ritè se gerit suffimentum de verbasco Myns. in fellâ ano exceptum. Internorum hoc in casu non adeò magnus est usus, nisi ab hoc censu oleum amygdal. d., cujus spectatæ in demulcendo vires sunt, excipere velis, quod & nos non adeò nauseabundis ordinavimus.

Spasmus &
tenesmus
gravidarum.

In hoc autumno frequenter observavit D. Helwich artuum tumores à scabie solis externis unguentis præposterè curatâ; hi, partim laxantibus, partim sudoriferis & Æialibus unicè tolluntur, externa, cujuscumque etiam generis sunt, sive adstringentia, sive discutientia, nullum effatu dignum hìc præstant effectum. Ab emplastro diasulphur. grave damnum idem in ejus generis tumoribus notavit; nimirum cum antea appetitus optimus esset, & respiratio liberrima, post hujus emplastri applicationem dejectum appetitum, & respirationem impeditam & anxietates præcordiorum natas vidit.

Notabile exemplum paralyseos linguæ habuimus, hodieque adhuc habemus in Viro generoso temperamenti sanguineo-cholerici. Is in juventute itinera plurima quovis cœlo peregit, & errores plures in victu, cibo & potu commisit. Postquam ex itineribus illis in patriam reversus esset, initio quidem per aliquot annos satis bene vixit, ferè verò jam à tribus lustris aliquam in loquendo difficultatem sensit, quæ tardè sua sumpsit incrementa, donec non nisi dentibus fortiter constrictis vocem quasi inarticulatam ederet, an in utroque latere mandibulæ fragorem inter loquendum perciperet.

Linguæ
Paralysis.

Fati-

Fatigatus à malo, varios fatigavit Medicos, donec in aliquem 7 Vra-
tislaviâ milliaribus distantem incideret, qui perfectam mali curam promisit,
balneisque ex nervinis & aliis id affecutus est, ut non tantum jam verbum nul-
lum, nisi fortè aliquando manè, quod tamen modò sit rarissimè, clarè ac di-
stinctè proferre possit, sed & obambulandi & corporis movendi facultatem
amiserit, lingua ipsi gravis & continuo salivâ abundat. Initio locum affe-
ctum meritò credimus fuisse nervos paris septimi, secuta deinde plena paraly-
sis non nervos tantum, qui motum organis sermonis impertiunt, sed etiam
linguam & musculosas vicinarum partium partes afficiens. Dentium ista
constrictio omnino etiam magis paralyti, quàm motui convulsivo maxillæ in-
ferioris musculorum tribuenda videtur, & si quid videre nobis datum est, mu-
sculi maxillæ inferioris deorsum trahentes invalidiores sunt sursum trahenti-
bus & os cludentibus, atque verisimile est, eos magis robore suo destitutos
esse. Frigor, quem olim inter loquendum percepit, à mucosâ ac glutinosâ
humiditate ipsam articulationis cavitatem occupante, ortus est sine dubio. Nec
falletur, qui hujus paralyseos causam conjecerit in serum, quo magis, quàm par
est, nervi & fibræ musculorum sunt irrigati, copia autem illa feri fortè origi-
nem trahit à diætæ erroribus, motibus corporis cœlo vel nimis fervido, vel ni-
mis algido, abusu vini, catarrhis &c. Observatum etiam aliàs à nobis est,
non magnam ex balneis nervinis nancisci paralyticos utilitatem, sed majorem
fere præstare effectum sacculos ex lavend. salv., hyssop., thymo, roremarin.,
majoran., chamædr., betonic., fl. prim. ver., lil. conv. calidè & siccè im-
positos, aut sanè epithemata non adeò madida. Ad hunc virum nuper vocatus
D. Helwich, is, considerata habituali in eo paralyticâ, non tantum in linguâ,
sed & in artubus debilitate, quæ per tantum tempus profundè radices egit, per-
penso etiam torpore, somnolentiâ ac fere stupiditate Viri, rotunde, non esse
in artis potestate, hîc auxilium aliquod tam afflictis afferre rebus, passus est, &
cùm instaretur, nodulum ex carminativis & nervinis jamjam memoratis ad-
movit, ut ita alvi insolitæ siccitati per 7 & 8 dies fere & ordinario duranti suc-
curreretur. In solatium etiam ægri, morsulos cephalicos, linimenta, mixtu-
ras cephalicas &c. præscripsit, ac autor fuit, ut ceratum de galbano afflictorum
musculorum principiis & potioribus tendinosi insertionibus applicaretur, his
saltim apoplexiam, quæ merito metuitur, pro virili averruncaturus. Quâ
occasione tacere non possumus, nullam prorsus specialem efficaciam in para-
lyticis observatam fuisse ex usu olei vulpini, lumbr. terrestr. pingued. castor.
externo, essentiam quoque castorei cum spirit. lumbric. internè minùs expe-
ctationi satisfacere. Ubi à refrigeratione mali initium, ibi oleum succini, la-
terinum, spic. carv., serpill. therebinth. &c. non contemnendi usus sunt. De-
coctum ex lumbricis, rad., valerian., herb. betonic., salv., majoran., sum-
mitatibus rorismarin., fl. lavend., sem. milii & lis, melle &c. debitâ quanti-
tate & tempore, corpore evacuato, præmissis etiam reliquis, est remedium sa-
tis præclarum in imminentibus paralyticis debilitatibus & fatigationibus. Non
tamen dissimulamus, quod in pulvere ipso lumbricorum virtus longè sit præ-
sentialior, quàm in omnibus præparatis.

Creber

Creber etiam affectus erat hisce diebus inflatio ventriculi interdum Inflatio
satis enormis, quam ructus, difficultas deglutiendi, orificii ventriculi dis- Ventricu-
tensio, comitabantur. Ructibus suppressis, tendebatur regio epigastrica, li.
& sensus distensionis ejus ad pectus, collum atque dorsum sese diffunde-
bat, non sine magna præcordiorum anxietate, spirandi difficultate, dum
ægri cubabant supini; epigastrica regio percussa sonum edebat, ac dum
ab uno latere se in aliud ægri provolverent, motum flatulentiarum per-
cipiebant. Facilis erat parata his medela in evacuantibus & carminanti-
bus, non tamen nimium calidis, quibus pituita stomachalis facile in fla-
tus resolvitur. Egebat tamen hæc cura suis cautelis. Nam flatibus tor-
quebantur etiam illi, qui flatulentis & dispeptis corpus non repleverant, sed
ut hypochondriaci solent, acida cruditate abundabant, quibus purgantia non
conveniunt, ut rectè jam monitum est à Sylvio.

Alii hoc Autumno corripiebantur Lienteria, ac assumptos cibos nihil Lienteria.
alteratos statim post prandium dejiciebant. Sublevabantur hi egregiè sto-
machicis præprimis ex mentha & absinthio paratis, nisi, quod aliquando
eveniebat, cum ictero, hydrope, febribus tertianis lentis eadem complica-
retur. Quidam cibos in pulticulam resolutos non diu post prandium e-
gerebant, uno verbo, coeliaco laborabant fluxu, atque hoc vitium iisdem,
quibus Lienteria, remediis superabatur.

Exempla etiam Asthmatis Stomachalis nobis offerebantur, siue cru- Asthma
ditates in flatu resolutæ diaphragma comprimerent, siue ventriculus, à stomacha-
contentis suis in spasmum concitatus, contiguum sibi diaphragma simul le.
afficeret. Hujus asthmatis nulla sunt certiora signa, quam quòd ab as-
sumptis alimentis paroxysmi recrudescent, & humoribus vitiosis vomitu
rejectis sedentur ac compescantur. Imò unum alterumve datum fuit
exemplum febris anhelosæ & asthmaticæ, quam describit Sylvius lib. I.
prax. c. 30. Invadebat illa cum magna abdominis distensione atque præ- Febris an-
cordiorum anxietate, quæ tamen decrescebant flatibus ἀγὼ ἢ κατὰ, ef- helosa.
fractis repagulis, cum sonitu erumpentibus. In eumetis, ubi circum-
stantiæ permittunt, cura vomitorio expediri potest, quod in ejus gene-
ris affectu non sine causa Platerus, Sennertus, Riverius, Timæus aliique
commendant.

In Viro quadragenario circiter chylosam urinam, qualem descripsit Urina chy-
Timæus l. 3. cas. 43. vidimus, qualem non meminimus à veteribus no- losa.
tatam. Certè Casp. Hoffmannus, in veteri Medicina sine exemplo ver-
satus, cum post visitationem pharmacopolii torpore corporis & animi cor-
reptus conniveret potius quàm dormiret, & vomitu dejecisset pituitam
lentam, quæ sensum præbebat sui quasi pertranseuntis lardi &c. ac uri-
næ hujusmodi tantillum singulis penè quadrantibus mingendo reddidisset,
vix habuit, quod responderet ad verba hæc uxoris: *Lac minxisti hac
nocte.* Et Archiater ejus, cum ostenderetur urina ista, dubitavit, an quic-
quam tale vacuasset Hoffmannus, donec his verbis rei veritatem æger adstru-

xisset: *Quam vere hic jaceo, inquam, tam vere hæc minxi.* Unde Medicus amplius admirans, abiit dubius, ut ipse testatur Hoffmannus in epistolâ quâdam ad Reinesium. Cum verò hujus urinæ natales nuspiam cum majori verisimilitudine quæri possent, quàm in ventriculo (nam dùm hoc primæ coctionis organon in operatione sua deficit, cruda & minus cocta non tantùm ad intestina, sed & sanguini mista, ad reliqua viscera, ipsosque renes confluunt, & magnâ salium vi iterum à sanguine, cum quo ad breve tempus erant confusa, præcipitantur) cura ad vitiosam digestionem emendandam convertebatur, hæcque correctâ corrigebatur etiam urina. Huic non adeò absimilis est urina puerorum gulæ nimis deditorum & se cibis sapidis quibusvis infarciunt, quæ etiam reliquis anni partibus non prorsus insolens est, & ex eodem fonte, cruditate scilicet ventriculi, oritur, quam cum sustulisti, etiam urinam mutari videbis.

Ulcera callosa & sinuosa.

Consilium nostrum non minùs hoc tempore à Chirurgis requisitum fuit, quomodo in ulceribus sinuosis inveteratis interne ortis & oblongis, exterius verò callosis, ritè sese gerere deberent. Hæc enim ulcera tum aliis temporibus apud nos, tum maximè in Autumno Chirurgis crucem figunt. Et hic optandum quidem esset, ut Chirurgi nostri Italos imitarentur, & ubi res patitur, totum ductum fistulosum discinderent, at frustra iis, nec minùs ægris hæc cantilena canitur. Difficultas autem curandi fistulas cum oriatur & à superficiei callositate aut fungosa deturpatione, & à fibrarum absumptarum residuo, tandemque vasorum per ejusmodi tractus disseminatorum erosione, ac ultimo, si diutiùs ulcera duraverint, ossium carie, nec enim novum est, quod recenset Muys, quod ex ulcere fistuloso aliquot fragmenta ossium pertraxerit. Nos hos fontes malorum convenientibus obstruere remediis satagemus. Ad callosam horum ulcerum cavitatem tollendam, & fibrarum residuas partes absumendas, septica commendavimus. Ac sane hic ærugo egregium præstat effectum, modò ad ossa & tendines fistulosa corruptio non pertingat, ibi enim grave infert damnum. Ut notabili exemplo tum edoctus D. Helwich in Viro ecclesiasticâ dignitate conspicuo, post febrem ardentem parotide correpto, hæc non debite tractata fistulæ maxillari sub dentibus molaribus inferioris maxillæ erumpenti occasionem dederat. Postquam itaque dentem Chirurgus evulsisset, rectè credens absque evulsione hac nullam sperari posse curam, improvidè admodum unguentum Ægyptiacum non tantùm injectionibus admiscet, sed & locum ab evulso dente vacuum eo infercit, ratus, optimè se rerum suarum sategisse, ac persuasus fordes ita detergi, spongiosam carnem absumi hoc unguento, quod aliàs quidem verum est. Sed quid hic fit? Non tantùm post applicationem hanc pura effluebat lymphæ in quantitate insigni, unde corpus ad maciem redigebatur, pedes intumescebant, sed & pars maxillæ abscedebat. Inter disceptationes, unde effluxus ille lymphæ ortus esset, & quænam causa, cur secisset pars illa maxillæ, ordinario quidem Medico Chirurgum accusante, quod Valibus, se inscio, usus esset, Chirurgo vero id strenuè negante, æger facilè contabuisse; D. Helwich

Helwich advocatus facile videbat, stillicidium illud lymphæ non aliunde ortum, quàm ex læsione glandulæ Warthonianæ & secessionem partis illius maxillæ ab incongruo unguenti Ægyptiaci usu profectam esse, ac id agebat, ut modò spiritus vini rectificatus, modò essentia succini debite adhiberetur, quæ medicatio ægro tandem etiam salutaris extitit. Cæteris indicationibus in curâ fistularum, præprimis autem consolidationi promovendæ, primario inferviunt balsamica, externè verò etiam discutientia & nervina applicata profunt, non neglectis succinatis interne ad avertendum feroforum humorum affluxum propinatis. Quo scopo etiam vulgaria lignorum decocta non inutiliter commendantur. Alii etiam multa in laudem variorum traumaticorum scribunt, inter quæ tamen hedera terrestris, bellis arvensis, fanicula, reliquis palmam præripiunt. Novimus quendam, qui multa ab usu sulphuris hic sibi pollicetur, quod quidem facile admittimus illo in casu, quo humores ab ulcere in corpus regressi turbas cient, tum enim sulphuratis iterum ad ambitum corporis propelluntur, & turbæ ex retropulsis humoribus ortæ sedantur. Si à carie ossium consolidationi obex ponatur, parum fanè spei in medicamentis reliquum est, sed hinc necessariò partes corruptæ sunt abrasendæ, quod ubi factum, essentia balsamica rectè ad integritatem ossium conservandam, ulterioremque corruptionem avertendam adhibentur.

In communi ista morum labe, quâ major Europæ pars contaminata est, omni tempore oculis observantur nobis in praxi gummata Gallica, sed, ut compertum est, maximopere circa autumnum sæviunt, ac pravam sementem non nisi messis sævissimorum dolorum excipit. Conspiciuntur, ut notum est, hi tumores non tantum circa articulos partium, sed & in mediâ fibulâ, ac in medio cubito, ac nonnunquam ferta sunt, quibus capita horum procorum (an porcorum) coronantur. In partibus mollioribus porosioribus non adeò nidulantur, quàm in membranaceis & glandulosis. Materia horum viscida ac lenta est, & quidem lymphatico-salivalis, ut patet ex foetido & summe putredinoso odore, qui sufficiens mucido-pinguis substantiæ, qualis lymphaticus est humor, signum præbet. Hinc etiam fit, ut in ambitu horum ulcerum insignis durities offendatur, quæ vel ex fissuris elucescit; nam notum est, quòd fero-salivales humores tenacissimi morâ & quiete reddantur. De hac origine horum gummatum etiam testimonium perhibet insignis ille pruriginosus ardor, qui molestus ægris esse solet, nam hic non aliunde, quàm ab acri lymphâ esse potest, si enim à sanguine esset ardor, esset inflammatorius. Non rarò cum his ossium corruptio combinatur. Et experientia testis est, quod Gallicis illis stasibus ossa arrodantur, & nigro imbuantur colore. Ejusmodi Quos nodos non impetu quodam aggressi sumus, quem materia lenta ac viscida vix admittit, sed lentè in curâ istorum festinavimus. Et primò quidem ante omnia sanguinis depurationi solerter intenti fuimus, ac mundato sanguine ad curam gummatum illorum progressum fecimus. Aliquando Clar. D. Sorbait imitati, applicavimus

Gummata
Gallica.

empl. diachyl. c. gummat. & Ꝟio, aut de ran. Vigon. c. Ꝟio, aut alio modo putrefactionem tumorum horum procuravimus, ac caustico aperuimus. Mundificationem instituimus unguento basilico, cui parum Ꝟii præcipitati admiscuimus. Circa partem affectam in ambitu emollientia emplastra, & alia remedia, rariùs lamellam plumbeam Ꝟio dealbatam apposuimus; omnia tamen frustra adhibentur, quando ossa carie infecta sunt, nisi huic malo eò, quo ante dictum est, modò occurratur. Hoc tempore etiam hæmorrhoidem oris, à Medicis prætermisam, observavit D. Helwich, quam fusius descriptam in Ephemeridibus nostris proximè edendis legere licebit.

Nobilitate generis & virtutis insignis foemina, temperamenti sanguineo-cholerici, Anno ætatis quinto & trigésimo, cæteroquin aliquot prolium mater, post abortum maximo sanguinis profluvio illi fere funestum, iterum concepit, & sub dimidio gestationis tempore oedematoso pedum tumore correpta fuit, tanto quidem, ut difficili gressu incederet. Neque tamen vasa in pedibus tumentibus, sicut alias in gravidis, valde fuere conspicua. Hæcque, licet procedente tempore magis magisque lassæ redderetur, & de lumborum & femorum dolore ac gravitate, aliisque incommodis quereretur, fortiter tamen satis omnia, ut erat animo generoso, pertulit. Imminente verò partus tempore, cum, comitantibus Amicis, quos manè convivio exceperat, & cum Domino Marito, ad captandum liberiores aërem extra moenia vecta, corpore carpento leviter concusso subito ad reddendam urinam stimularetur, humorque aquosus ante foetum efflueret, illa necessitate coacta domum rediit, ubi languidiori dolore, perque longiora intervalla repetenti stimulo afflicta, tandem puellam, qua tenerior non visa, per Dei gratiam enititur. Post partum vomitibus fatigata gravibus puerpera D. Helwich vocari iussit, qui in circumstantias causasque inquirens, admissum frigus, & negligentiores obstetricis in circumponenda abdomini fascia manum, accusari percipit. Præscribitur ab eo potiuscula ex ▽. pulegii, artemis. meliss. carminat. polyophel. Cinam. borrag. essent. carminat. elix. uterin. D. M. & syrup. melissophyll. ad sedandos vomitus, compescendos flatus, & promovenda Lochia. Externè illinitur ▽a Panis cum Vino Malvatico destill. & essent. Croc. ex his vomitus conquiescere coepit; ast Lochiis segniùs fluentibus necessum videbatur tale remedium, quod & debili ventriculo succurreret, obstructionem alvi tolleret, & illorum simul fluxum augeret, huius generis est elix. propriet. P. s. acid. c. essent. myrrh. tartaris. ex ejus usu & externa applicatione cum ▽. virtut. cordial. citr. balsam. vit. & aliis contra deliquia, omnia ex voto fluebant, nisi quod cerevisiam ex tritico coctam minus benè ferre posset, ejusque in locum decoctum ex hordeo, rad. polypod. scorzon. &c. surrogari permetteret.

Sexto à partu die tussis nostram adoriens, mox pectoralibus, succinatis, & decocto ex rad. altheæ, liquirit. farfar. fruct. filiq. jujub. sem. anis. &c. opugnata facilè cedebat; ingens tùm malacia erat, in ingentes imposterum naufragio infames tempestates desitura. Quippe post mensem exhibiti ordinario

dinatio Medico tumentes Pedes terrorem incutiebant, dum facile praevideret, tumorem hunc aliquid monstri alere, nec esse ex eo genere alias gravidis solito, qui lochiis rite procedentibus, sicuti in nostra factum, sensim evanescit, hic enim majus augmentum capiebat. Quid consilii? Lactatio infantis, vires partus labore exhaustae, motuumque in corpore variae ataxiae, nec drasticis purgantibus, nec validioribus diureticis, nec fumosis sudoriferis hic agendum esse suadebant. Calculo probe subducto & demonstrata ablactationis necessitate, supra nominatus Medicus curam auspicabatur pilulis ex extract. angel. helen. helleb. n. gran. chermes, succis absynth. scord. card. b. gummatibus juniper. heder. arbor. &c. Quibus ad tempus adhibitis progressus est ad electuar. ex rob. juniper. sambuc. sale. absynth. genist. & diaphoret. & tial. c. syr. d. spina cervin. adjunctis enematis ad serosam colluviem educendam. Tumidis pedibus circumpositum cataplasma ex rad. plantag. bryon. herb. calamenth. organ. saliv. chelidon. major. summit. absynth. flor. chamom. melilot. balauftior. sem. levistic. baccar. juniper. laur. in vino decoctis. Inter quotidiana de ablactando infante monita, post usum multum & aperientium, anticacheticorum e. g. & tial. tartareor. & pepticorum, carminativorum in formis variis, sane opportuno tempore datorum & saepius repetitorum, providè factus fuit progressus ad evacuantia, puta, nodulos.

1. Ex rad. galang. calam. arornat. pimpinell. fol. agrimon. absynth. fenn. ff. flor. persic. centaur. min. rhabarb. sem. cartham. ebul. foenic. dauc. cret.

2. Ex rad. apii, petroselin. levistic. imperat. pimpinell. cord. median. sambuc. guajac. herb. marrubii. fol. menth. &c. addito sal. tartar. Et cum subinde corpus ad sudorem inclinaret, diaphoretica interpolata diebus ab evacuatione liberis, imò & diuretica in usum vocata, e. g. lixivium ex ciner. genist. stipit. fabar. juniper.; non omissis corroborantibus: vino nempe absynth. enulat. ut & trageis; quibus & topica varii generis diligenter adhibita, annumeranda. Et quo major ex horum remedium usu sperari posset effectus, potus & alimenta virtutibus hydragogis graviora praescripta fuerunt. Et hæc enarrata methodus tam proficua Nostræ videbatur, ut hac appetitum ad tempus redire, pedes detumescere, sitim & dyspnæam remittere sentiret. Ast dolenda gaudii hujus brevis; quippe denuò crescens pedum tumor, ad femora usque protendebatur, nec non circa lumbos extravasati feri indicium præbebat leucophlegmatica inflatio, ita ut omnibus in pejus ruentibus D. Pauli in consilium simul vocatus fuerit, qui rebus optimè perpensis, & ablactandum infantem, & in prædictis medicamentorum generibus pergendum esse monuit. Nostra dictis patientissimè audiens, nullatenus tamen convalescebat: Hinc tertius arcessitus Medicus multus quidem in celebrandis hæcenus adhibitis remediis, fortiora tamen suadebat purgantia. Nos conclamatum hujus statum videntes, indeque facilius tertio consentientes, post quartam validiorum ejusmodi pharmacorum dosin ægram longe pejorem magisque longè distentum abdomen observavimus. Quatriduo hinc ante mortem para-

centhesi, cujus mentionem fecit tertius, & à Nobilissimo Marito, tanquam unico servandæ uxoris remedio, approbatæ, jam dies & hora destinabatur, sed prævenit eam hydropicæ mors, formidine operationis maturata, nam sub vespérâ satis bene adhuc respirans, & cum Dn. Marito cœnans, primo diluculo exspiravit.

Subditum manè lustrationi corpus, properante cultro peritonæo per-
tuso, aqua, cui intestina innatârant, ex sanguinis tincturâ subflavescent, ast
minime foetida, decem congiorum circiter promanabat. Profectione ulte-
riori factâ, obiter insipientibus illæsa videbantur viscera, præter duriores li-
enem, qui non videbatur justam magnitudinem adeptus. Quanquam Mal-
pighius in *Respons. ad opposit. centenas in Triumph. Galenistar. p. m. 238. in
oper. Posthum.* providè moneat, tum in aliis, tum in pulmonibus ipsis adesse
posse internam rupturam pulmonum, quæ sufficiat necando homini mediâ
laceratione vasorum & substantiæ pulmonum, & consequenter inflammatio-
ne ac motu impedito totius ferè sanguinæ massæ &c. & eam tamen agnosci
non posse à Prosectoribus etiam accuratissimis in Theatris Anatomicis omnia
diligentissimè & oculis microscopio armatis rimantibus; ut proinde nulla
his tribus Medicis inferretur injuria ab eo, qui iis de integritate viscerum, vel
vasorum in iis contentorum lymphaticorum in hoc cadavere testibus fidem
derogaret. At verò, Laus Deo, benè factum, quod in hac festinante inspe-
ctione omentum benè inspectum, quod disruptum, friabile, putridum ac o-
mni pinguedine destitutum, hincque serosæ istius colluviei intra abdomen
collectæ scaturigo, consequenter causa mortis hujus est inventum. Nec
prima est Nobilissima Matrona, quæ propter omenti læsionem obiit, sed pro-
pter eandem causam Virgo mortua legitur apud Theophil. Bonet. in *sepulchr.
l. 3. Sect. 21. Observ. 33. p. 1127.* Omentum quippe duplicatum, emissis aqua-
rum 46 mensuris, omni ex parte saniosum repertum, cæteris officinæ natu-
ralis visceribus optime constitutis. Propter similem omenti defectum obiit
alter ille, de quo Warthon. in *Adenographia c. 12.* consulendus, nec non mu-
lier alia hydropica, apud Barthol. *Centur. 1. Observat. 2.* Accuratissimus Ste-
nonius secuit Rangiferum ex hydrope demortuum, ac unicam morbi & mor-
tis causam lynceis manibus in omento offendit teste celeberrimo Borrich. in
Act. Med. Hafnien. An. 1673. Quin Volckammerus noster, Practicus experi-
entissimus, veram hydropis ascitis originem omento assignare audet in *schol.
observat. 18. & 19. decur. 1. Ephemerid. nostr. p. 64.* eamque in duobus cada-
veribus Norimbergæ ad oculum ab ipso demonstratam vidit D. Pauli. Idem
accuratissimus Anatomicus D. Hartmann confirmat *decad. 2. & 5. Observat.
72. p. 166. nostr. Ephemerid.* Jam verò si rupta saltem vel tenui quâdam omenti
fibrâ vel subtili canaliculo guttatim aquositas in cavitatem ventris stillet & au-
geatur, optimè annotante *l. c.* Volckammero, quid fiet, si non tantum mar-
gines extremi sint lacinioli, sed & reliquæ partes disruptæ; an forte non sa-
tis constat, quod epiploon vasis amplis & evidentibus conspersum sit? Mitta-
mus, quæ ex Hippocrat. *lib. de loc. & Sect. 7. Aphor. 57.* afferri solent. Quis
ignorat,

ignorat, quod habeat vasa à ramis coeliacis & mesaraicis, eaque satis ampla & numerosa, conf. *Medic. Physiolog.* Linden. p. m. 59. Bartholinus in *Anatom. reform.* p. 62. Rectissime Clar. Diemerbrock. lib. 1. *Anatom.* p. 28. hoc peculiare omentum præ reliquis membranis habere, ait, quod venis copiosis instar retis intertexatur. Quibus vasis etiam glandulæ sunt interstratæ, observante Veslingio, & Warthono in *Adenographia* c. 12. Plurimas in eo vesiculas multo refertas humore vidit Boschius & Malpighius in *Exercit. d. oment. pingued. & adipos. ductibus* Tom. 2. oper. p. 232. Quem ab alimentis separari & per aliqua vasa in omentum derivatum in cavitatem ventris depluere rectè affirmat, atque hinc cum Hippocr. hydropis originem petit. Et in quantâ copia colluvies confluet, adeo copiosis vel omnibus vasis ruptis & liquorem, quem vehunt, in abdominis cavum, effudentibus (ut in nostra ascitica factum) si ex uno canaliculo juxta Volckammerum, vel vesiculis quibusdam juxta Malpighium, hydropico tumore venter intumescit? Et in statu tali quid emolumenti misera nostra ex celebratâ paracenthesi (cujus terribile nomen sanè illius fata præcipitavit) capere potuisset? Memorem enim oportet esse Medicum effati Hippocratis, etiam tyronibus noti 6. *Epidem.* Tom. 7. Paracenthesin instituendam esse, quando ægri sunt ευσπλαγχνοί, viscera ritè constituta habent, ac viribus integris gaudent, nisi forte animam cum aquis effundere cupiat. In nostra proinde hydropica ob tantam omenti læsionem vasorumque ruptionem ejusmodi operationi nullus erat locus, indeque testibus celeberrimis Medicis, ac iterata nostra experientia verissimum manet: quo plus subtractæ, plus cumulantur aquæ; dum vulnera illa interna nullis balsamis consolidare, nullis vinculis constringere licet.

Ultimò ecce Lector numerum eorum, qui mortalitatis legem impleverunt hoc anno. Nimirum ad meliorem, ut speramus & optamus, vitam translati sunt:

In Januario	-	-	102.	Julio	-	-	-	80.
Februario	-	-	121.	Augusto	-	-	-	106.
Martio	-	-	178.	Septembri	-	-	-	134.
Aprili	-	-	163.	Octobri	-	-	-	95.
Majo	-	-	120.	Novembri	-	-	-	91.
Junio	-	-	86.	Decembri usque 24. d.	-	-	-	66.

Summa 1342.



HISTORIA

HISTORIA
MORBORUM,

QUI

ANNO MDCCI.

VRATISLAVIÆ
GRASSATI SUNT,

ADORNATA A

LEOPOLDIN. ACADEM. NATUR.

Curios. Collegis VRATISLAVIENSIBUS.

THE STATE OF I A

IN SENATE

1891

AND HOUSE OF REPRESENTATIVES

VERA T. L. A. V. T. A.

GRASSLANDS UNIT

AND


LEONARD ACADEMY NATURAL

OF THE STATE OF VERMONT

D 1



I. N. J.



Rdo jam nos deducit ad Historiam Morborum, qui Anno supra millesimum septingentesimum primo, in Silesiæ Metropoli haud paucos fatigavere. Eâ verò, quam hætenus observavimus, in illis describendis Methodo iterum uti non dubitamus. Exordium laboris, sub divinis auspiciis, à constitutione aëris ducimus. In Januario variæ erant ratione frigoris vicissitudines. Modo enim aër liquefcere & quodammodò diffluere, ac in ampliora spatia se diffundere videbatur, modo autem frigore constipatus in angustum cogeatur. Finem verò mensi

Constitu-
tio Aëris
in Mense
Jan. Febr.
Mart.

imponerant nebulæ illæ infalubritatum fomites. Februarius tum his, tum etiam nivibus (nisi has cum aliquo florem brumæ, lætamen, quo stercoreantur agri, plumas, quibus fovantur, & à frigore defenduntur segetes, esse velis) & variis ventorum mutationibus horridus erat, nonnunquam tamen quodammodo placidus & æquabilis aëris fluxus observabatur. Sub initium Martii frigidiuscula aura subito cum blandiori aëre commutabatur; nec tamen Mensis ad finem sine nimbis, grandine, variis ventorum tumultibus decurrebat, sic tamen, ut blandus solis calor, in his aëris varietatibus nonnunquam Silesiæ incolas exhilararet.

Mense Januario Febres continuæ periodicæ, variis stipatæ symptomatibus, præprimis autem cardialgiâ, vomitu, spasms hypochondriacis &c. non paucis erant molestæ. Grassabatur etiam pleuritis spuria; erant, quos erysipelas capitis in periculum vitæ conjiciebat. Lumbago quoque iis, qui Baccho & Venere delectabantur, molestiam creabat. Nec minùs febb. petechiales fatis erant frequentes, quæ etiam ad domesticos, incautè cum ægris conversantes, præprimis, si hi essent meticulosiores, per contagium propagabantur. Tractati fuerunt hi morbi non sine felici successu eâ methodo, quam in

De Con-
tagio.

Historia Morbor. An. 1699 & 1700 adumbravimus. In Febribus malignis & contagiosis iterum V. S. omiffa fuit. Nec in his curandis calidiora alexipharmaca fuerunt adhibita. Multò minùs calidiffimo regimine ad eliciendos profusos sudores ufi fumus. Ex hoc capite à nonnullis, ut accepimus, reprehensi fuimus. Jure ne an injuriâ id factum, ut elucescat, liceat nobis, bonâ Lectoris veniâ, summam eorum, quæ de morbis contagiosis, à Collegâ quodam nostro, alio tempore accuratiùs disputabuntur, hic breviter sistere, & quidem eo fine, ut patefiat, non rejiciendam esse methodum, quâ in debellandis contagiosis morbis ufi fumus. Exordiamur autem rem ab ovo, sed, ut diximus, summa tantum capita perstringemus. *Per Contagium*, à quo morbi contagiosi denominantur, *hoc loco intelligimus verbo Hippocratis ἀπορροίαν νοσώδη*, sive morbosum defluvium corporis ægri, quod in aliis corporibus similem morbum producit. Neque enim propriè loquendo vel iste morbus, à quo alius originem trahit, vel ille, qui ab alio oritur, contagium, sed uterque tam inficiens, quàm ab inficiente propagatus, rectius à contagio dicitur contagiosus, tametsi uterque eò, quòd similes morbos procreet, non rarò contagium vocetur. Unde etiam patet, quòd à proposito nostro aliena sit illa contagionis significatio, qua quævis gravior ægritudo, quæ inter viventia stragem edit, (quam nos Germani vulgò *eine Seuche* appellamus) usitatâ loquendi consuetudine denotatur. *Contagium hoc*, de quo nobis sermo est, *corpusculum est*, (adeoque substantia quædam) *quod effluit ex corpore ægro*. Nam non esse qualitatem quandam putridam, quod Erasius quondam alicubi statuisse videtur, res ipsa loquitur, cum, accidentia ex subiecto in subiectum aliud non migrare, etiam pueris notum sit. Quoniam verò corpuscula ejusmodi vel solida, vel fluida, vel amborum, potissimum autem horum, ἀποκρίσεις esse queant, cujusnam generis ac indolis sint, id porrò indagandum erit. Hoc ut fiat, brevibus præcipui morbi, qui communi suffragio nostris in oris contagiosi sunt, erunt percurrendi, & quodnam illud medium sit, quo ægri sanos alios inficiunt, dispiciendum.

Contagiosi autem morbi alii *σποράδικοι* alii verò *κοινοί*. Priores sunt nobis notiores posterioribus, & inter illos partim nimia frequentia, partim etiam turpitudine suâ infames, lues venerea, scorbutus, scabies, tinea, ophthalmia, conf. Schenck. l. 2. p. 279. Thoner. l. 3. obs. 4. Ballon. Epidem. l. 1. p. 11. phthisis, hydrophobia, &c. Inter hos potissimum sunt ἐπιδημιοί, e. g. febres malignæ petechiales, quæ in civitate hac per aliquot annos populariter sunt grassatæ, ut & dysenteria. Hi morbi, quomodo inficiant, videamus.

In *hydrophobia* omnium maximè in oculos incurrit, quomodo per morsum canis rabidi rabies propagetur canina, id nimirum sit, dum saliva à ferociente cane in vulnus hominis demorsu instillatur. Nec minùs obscurum est, quâ ratione lues, impudicorum amorum flagellum, hodie quidem communissimè alios inficiat. Cùm enim lippis & tonsoribus constet, in moderna morum licentia vix alibi quæri oportere ejus natales quàm in συγγασία cum infectis; præterea verò etiam satis notum sit, ejus generis personas de-fœdari solere vel *gonorrhœâ malignâ*, i. e. effluvio faniolo tetro, putrido & foetenti

foetenti varii coloris ex interiori pudendi virilis parte, vel *fluore*, quem vulgò *album* vocamus, etsi sit discolor, (nam non rarò flavescit, virescit, & instar chamæleontis colorem mutat,) qui genitales mulierum partes excoriat, adurit, in tumorem attollit ac inflamat; facile intelligere licet, quomodo, dùm partes Veneri inservientes incalescunt, putriformis materia patentibus & exæstuantibus genitalibus illapsa sese diffundat, & in innoxios sæpè luis confortium derivet. Hic modus communissimus est, quo lues venerea propagatur, magis dubius, quo per impudica oscula, in partibus oris mollibus defigi inquinamenta, vel per nescio quem contactum poculorum, lectorum, vestium, &c. serpere creduntur. Non abnuerimus tamen, quod aliquoties nobis compertum, & lactantes à fugentibus, & hos ab illis, & per ipsum lac infectum & per contactum papillæ nutricis & tenerrimi oris lac haurientis infici.

Scorbutum ex contagio propagari, observatum est à peritissimis hujus labis scrutatoribus, Severino Eugaleno *obs.* 59. p. 398. Salomone Alberto N. 65. Disseminatur autem in alios, judice Sennerto Nostro, & per salivam, & per halitum, & per lac, *Traët. de Scorbut. c. 5.* Et profectò ita est, ut scribit Charleton *libr. de Scorb. c. 2. art. 5.* *Fuere, qui charissimis communicarent conjugibus morbi seminio oscula inter & amplexus, transfuso. Nec desunt nutricum ex numero, quæ cum lacte in subrumantia pupulorum ora instillarunt: quos alere susceperant, lentâ morte lactarunt. Tacitè serpit insidiosum virus ab hospite in hospitem spiritus, lecti, mensæ, poculorum communione* (id quod tamen nobis intellectu aliquantò est difficilior) *imò post mortem, quoque vivit vigetque nonnunquam dira lues, ipsis eâ extinctorum cadaveribus exhalante vespilonumque & disseccantium Chirurgorum vitalia inficienti, toxicorum ad instar, fætores, &c.*

Seculi decimi sexti scriptores narrant, Anno 1591. in Silesiâ Stomacacen & Scelotyrben verno tempore ita fuisse grassatam, ut humi reptantium ægrorum corpora passim spectarentur; gingivis violentiâ luis erosio plurimi occumberent, hanc verò deducunt ex lacticiniorum crebro apud nos usu; ea autem tum meritò fuisse suspecta, eò, quod verno tempore aliquoties venenatus ros, cujus virosâ sævitie detonsi arborum vertices, flores cum foliis ambeffi, deciderit, ac pabula animantium infecerit, ex illorum verò pastu armentis femina morborum infusa lactis usum reddidisse formidandum & vehementer noxium.

Nam nulla apparebat causa, unde cum verisimilitudinis quâdam specie malum illud deduci posset, siquidem auster interjectu nemorosissimorum fudetum, qui Silesiam meridionali parte prorsus ambiunt, excluditur, scabræ melancholicæque nautarum dapes hinc penitus fastidiuntur; terra non stagnis, non lacunis, sed fluviis irrigatur, ut disputat Coberus *Traët. de lact. & pultibus*, aliique plures, quæ tamen alibi scorbuti fontes sunt.

Neque dubium est, quin *Scabies* contagio propagetur. Tametsi non sola conversatio cum scabioso in scabiem præcipitet, compertum tamen est, quòd sordes scabiei contagiosæ per communem lectum, vestimenta, mantilia, &c.

promptè excipiantur; unde ambigendum non videtur, quod illa viscida & lenta humiditas, quæ in superficie cutis scabiosorum observari solet, illud ipsum sit medium, quo scabies alteri affricatur. Cui rei argumento etiam hoc est, quod scabies humida sit magis contagiosa quàm sicca.

Idem, quod de scabie asseruimus, etiam dicendum de *tineâ*. Nam & illa per ichorem illum subcruentum, qui, tenerrimâ cute erosa vel abrasa, extillare solet, quomodocunque exceptum in alios transfunditur.

Paulò obscurius est, quomodo *ophthalmia* possit inficere alios & contagio se extendere. Nam utut hoc negare videatur Plempius in *Ophthalmograph. l. 5. c. 2.* extra controversiam tamen est illud Poëtæ:

Dum spectant oculi lesos, leduntur & ipsi,

Multaque corporibus transitione nocent.

Et sanè non adeò intellectu arduum est, quomodo in inflammatione tunicæ adnatæ oculi cum rheumatismo humorum conjunctæ halitus elevari & halituosa effluvia aliorum inquinare valeant oculos.

De contagio *Phthiseos*, illam & eruditi & vulgus foveant opinionem, quod illud & ad vestes (qua de re memorabile recitatur in Ephemeridibus nostris exemplum de Phthisi per usum tegumenti manuum tempore hyberno in conjugem phthificè defunctæ in toro succedentem propagatâ) cameras, lectulos ac tabulata universumque cubiculum transeat, ut constat ex Massar. Fracastorio, &c. eoque minus res habebit admirationis, si inter conjuges per amplexus & basia, ut notavit Septalius, virus hoc serpere comperiatur; nam sive graveolens sputum, sive sudores copiosi, sive tandem halitus hujus infectionis statuatur medium, illi, qui cohabitant, tantò illud promptius excipere possunt, ut non abs re jam ante tot secula monuerit Galenus *lib. 1. de different. febb. c. 2.* consuetudinem eorum, qui tabe laborant, minus esse tutam.

Febres malignæ virus suum vix alio modo in corpora sanorum diffundunt, quàm sub halitus aut vaporis formâ. Hinc etiam ipsum vulgus omnimodo præcavet, ne sudore ægrorum pars quædam corporis imbuatur. Imò fugit & pocula ægrorum & cochlearia &c. persuasum, & quidem non immeritò, quicquam salivæ iis adhærere & contagium ad alios hæc etiam viâ apportari posse. Halituosâ formâ sese in corpora insinuare venenum, crediderunt Medici in Germaniâ, ab illo usque tempore, quo febres hæc innotuere, quod factum post medium seculi decimi sexti, cum Maximilianus II, sacratissimæ memoriæ Imperator, bellum contra Turcas gereret. Nam tum in castris ad Comorram & Jaurinum invaluerunt. & à milite exauctorato domum ad suos properante, per omnem Germaniam, non alia, quam diximus, ratione propagatæ fuerunt. Conf. Thuanus *lib. 39. ad An. 1566.*

Dysenteriam Helidæus Paduanus testis est per fistulam clysmaticam, quam adhibuerat torminosus, in corpus sani esse transfusam. Lac dysentericæ infecisse infantes, apparet ex Ephemerid. *Dec. 2. An. 6. obs. 195.* Et quivis ferè abhorret ab

excre-

excrementis, supellectile, & præprimis accubitu dysentericorum, eo, quod compertum sit, quanta noxa sanis immineat ex effluviis & halitu dysentericorum.

Et hæc, quæ hætenus allata sunt, satis ostendunt, corpuscula contagio graviora debere natales suos, non solidis partibus corporis sed humoribus. Evidens verò est, non à quibusvis humoribus, sed suo modo corruptis miasmata emanare.

Jam indagandum, quinam illi sint humores à quibus corruptis ἀπορρίσσει contagiosa oriuntur. Hoc ut fiat commodius, affectiones quasdam contagii, per seculorum experientiam cognitæ breviter lustrabimus & quidem in morbo omnium maximè contagioso. Nimirum

1. Id certum est, quòd corpuscula ejusmodi contagiosa adhærere queant vestibus, e. g. indusiis, caligis, tibialibus, lintheaminibus, lanis etiam ut & gossypio, culcitris, funibus, pellibus, omnibusque iis, quæ porosa sunt, rara, laxa & foraminulenta. Ita cum Imperator Maximilianus Veronam obsidione premeret, & peste duo hominum millia perirent, compertum fuit, viginti quinque milites unâ pelliceâ veste ordine infectos ac mortuos esse, exustâ verò hac veste pestem factam esse mitiorem. Et hæc sanè causa est, cur à suspectis locis in salubriora invectio ejusmodi rerum prohibeatur.

2. Nec minus exploratum est, quòd, ubi à primo infecto in fomitem secesserunt, illuc diutissimè perdurare servarique incorrupta possint. Quâ de re præprimis memoratu dignissima extat historia apud Trincavell. l. 3. consil. 17. quâ edocemur, Justinopoli, post sævissimam pestem, funes, quibus mortui ad sepulturam deferiebantur, post capsulam quandam projectos fuisse atque ibi per annos viginti aut plures latuisse, quos, cum servus loco postea moveret, incidit in pestilentialem febrim, contagioque illius reliqui infecti sunt, ut 10000 homines hoc, ut ita loquamur, incendio perierint. Alexander quoque Benedictus ait, se audivisse patris sui ætate, in urbe Venetâ, culcitram pestilentia tempore suspectam, in interiori domus partem cujusdam Patritii ejectam, ac post septennium requisitam, quam cum Materfamilias discuti jussisset, servos subita peste fuisse correptos. Et ejusmodi historiae alibi passim recitantur. *Et profecto admirationem non parvam præbent lectuli, vestes, ligna, & id genus, quæ phthifici tetigere, sæpissimè vidimus virus illud per duos & tres annos servatum*, ut loquitur Fracastorius lib. I. de Contag. c. 4. p. 106.

3. Sed præterea per ejusmodi fomitem ac receptaculum non rarò ad longissimè diffusa loca corpuscula ejusmodi, quæ seminaria morborum meritò dixeris, deferuntur.

Et sanè minimè vanus est Listerus in scitissimo libello, quo Sanctorii statica Medicina clarius elucidatur, cum scribit *μιάσματα* pestis per 200 millia Londinum fuisse advecta. Hujus rei etiam satis conspicuum eventum præterlapso seculo senserunt Siculi. Nam cum à piratis quibusdam præda, quæ in Alexandria tractu capta erat, ab iis emeretur, haud multò post pestem magno hominum rerumque impendio senserunt, ut narrat Fidelis *de relation. Med. lib. 1. cap. 6.* Ægyptum quoque quotannis octo integros annis
mensēs

mensēs pestem pati è Græciæ Syriæque ac Barbariæ locis per contagium delatam, idem ex Prosper. Albino *de Medicin. Ægyptior. l. 1. c. 17.* refert. Plura in hanc rem exempla peti possunt ex libello D. Ewich *de officio fidelis & prudentis Magistratus tempore Pestis, c. X.* Ex his aliisque colligi posse videtur, quod

4. *Μιάσματα* ejusmodi sint ex censu viscosorum & glutinosorum; nam id genus corpuscula; cum sensibilem atque notabilem succi portionem contineant, facile aliis rebus adhærere & cum illis circumferri possunt, diutius verò vis eorum perstat infracta, eò quòd abundant partibus igneis; ignis autem, ut nos quidem putamus, non globulis rotundis, sed filamentis constat, quæ, ut alia, ita præprimis viscosi corporis partes continere apta nata sunt. Conf. Honorat. Fabr. *Physic. Tract. 2. libr. 4. propos. 28.*

Porro & hoc 5. ex ante dictis fluit, quòd eximiâ polleant subtilitate effluvia contagiosa; nam tametsi glutinosa essent, non tamen per tot annorum decursum incorrupta servarentur, si vi aëris externisque alterationibus liberimè paterent, unde ratio dictitat, quod propter subtilitatem etiam minima penetrent & in recessibus ac foraminibus aëris promptæ incursioni haud undique subjectis recondantur, in quibus deinde ad multos perdurant annos. Et sanè nisi effluvia hæc adeò forent subtilia, comprehendi minimè posset, quomodo ab uno homine infecto integræ civitates & circumjacentia loca hoc malo afflari possent, quod tamen multæ testantur historiæ. Ita novimus Anno 1556. Patavinam civitatem ab uno Studiofo, qui Venetiis rediit peste infectus, totam fuisse contaminatam. Pestem etiam sævam & atrocem, quæ Hamburgi An. 1566. grassata est, ab unius hominis, qui Dantisco illuc venerat, contagio originem habuisse, annales referunt. Bremensis etiam Respublica unius polluti hominis, qui Hamburgo æger eò venerat, vitio, eodem anno paucissimis diebus fuit infecta, ut nullus fere vicus ab ista lue esset liber. Utut verò corpuscula hæc mole sint prorsus exigua, summæ tamen 6. existunt efficaciar & agilitatis, quod præcipuè elucescit in febribus contagiosis. Nam *μιάσματα* illa in motu subtilissimo constituta esse, penetrare, ac subtilissimas sanguinis particulas è mixtione suâ dimovere & corruptionem promovere, extra controversiam est. 7. Sed nec dubitari debet de vi miasmatum multiplicandi, nam dum in mixtione suâ primas sanguinis partes turbant, easdem extenuant, similem, quam habent corpuscula contagiosa, corruptionem & labem iis imprimunt, iisque eundem, quem ipsa habent, motus gradum communicant. Humor autem, ex quo ejusmodi corpuscula, qualia jamjam descripsimus, effluere possunt, serum sine dubio est, in latiori significatione, quâ & lympham & salivalem laticem comprehendit. Hoc, quàm facile concreascit & in gelatinam abeat, coctio ejus in aquam calentem infusi facile probat, ut dubium nullum superesse queat, partes ejus viscosas esse, & vi adhærendi polere, adeoque facile ad maximè diffusa posse transferri loca. Constare etiam serum ex tenuissimis & summe subtilibus particulis, certum est, nam ex illo calente exhalat halitus, qui acri & falsâ mordacitate palatum & linguam ferit.

Et

Et certè saliva, igne incalescens, abit in bullas, non secus ac spiritus vini in vase ab aëre evacuato repositus ebullire solet: & negotium chylicationis abundè evincit, quod in salivâ, præter partes aqueas, etiam adsint subtiles & penetrantes. Si Salivæ aliquot unciae evaporaverint, in capite ejus mortuo invenies plurimas particulas scintillantes, quæ salem in se continere vel hinc elucescit, quod ad Mercurii mortificationem saliva non sit inepta. Nec minus cognita est vis salivæ in fermentando. Huc referenda est fermentatio potûs illius, quem ex fruge Maiz nonnulli populi parant in Insula Mocha, quæ est è regione Chili Americæ Meridionalis parte; describitur autem illa ab Auctore de mirabilibus locorum Australium verbis seqq. in lib. Meibomii *de cerevisiis* cap. 17. paragr. 15. *Anus edentula Mayz suum gingivis comminunt, & in aquam exspuunt, ubi à salivatione fermentari incipit, & tùm in cupas infunditur & Cica nominatur. Quo anus sunt magis vetula, eo potus melior habetur. Hoc ad ebrietatem se invitant, saporis autem est boni & acidiusculi.* H. I. Zafius etiam Auctor est, panem biscoctum comminutum, & salivæ probè mixtum, fermentare massam farinaceam, si ei addatur. Hactenus ergò constat, in sero reperiri eas in genere proprietates, quas in corpusculis contagiosis tot seculorum experientia deprehendit, ut dubitandum minime sit, quin effluvia vi inficiendi prædita ex sero corrupto oriantur.

Et profecto ad oculum patet, plerosque contagiosos morbos esse serofos. Pestem ipsam & febres malignas ac contagiosas esse ex hoc genere.

1. Probat hoc, quod ab ipsâ naturâ materia peccans in glandulosas partes congeratur; enim verò nisi foret salivalis profapiæ, non ab humoribus reliquis tam promptè secederet in colatoria lymphæ, nec natura à laboriosis motibus remitteret, postquam ad glandulosas partes corruptela hæc deposita fuit. Notorium enim est, quod furor pestis in hoc vel illo individuo conquiescat, si bubones maturè & promptè erumpant.

2. Evincit & hoc, quod largis subdoribus sub initium fluentibus atrocissimus morbus finiatur.

3. Demonstrat & idem mors eorum, qui pesti & aliis malignis morbis succumbunt. Nam certum est, quod miseri pereant, quibus nulli sudores aut bubones debito tempore erumpunt, vel, si hoc fiat, iterum mox retrocedunt, translata, ut fere fit, materiâ ad interiora secretiora & excretiora organa, unde vomitus, conatus vomendi irritus, diarrhææ, singultus, cardialgiæ, urinæ discolores, aphthæ, anginae &c. supervenire solent. Symptomata varia in pusione ex salivâ vetulæ quartanâ laborantis pulmento immixtâ recitat Clarissimus Ledelius in *Ephemerid.* Nec de lue venerea aliter sentiendum esse, & in feri depravatione illam consistere, cura mali felix per ptyalismum facilè suaserit. In scorbuto magno consensu hodiè ut crassior sanguis stagnans circa extrema corporis, artûs, inquam, gingivas, os, &c. ita viscida & acida ac salsa lymphæ accusatur. Et ulcerationes sub cute leniter colliquativæ in scorbuto de vitio feri non contemnendum præbent argumentum. In phthisi quoque serum peccare nemo ignorat, vel hoc indicio est, quod

sæpè catarrhos falsos excipiat. Et hinc tanto minus mirandum, quòd phthifica, sicuti in miscellaneis nostris legere est, ptyalismo spontaneo septem dies perdurante, sine ullâ mercurialium medicamentorum exhibitione restituta fuerit. Notum præterea etiam est, quod phthiseos imminenti signa sint, sapor falsus, stimulus ad tussendum, sudores nocturni &c. quæ omnia nos non obscure de feri vitiis commonefaciunt. Non facile etiam reperias, qui serum in scabie, ophthalmiâ, hydrophobia &c. non accuset. Cum itaque contagiosi morbi sint serosi, & præterea serum ad suscipiendas illas impressiones, quas in corpusculis contagio infectis deprehendimus, maximè aptum sit, non videtur amplius dubitandum, quin corpuscula contagiosa ex sero, tanquam fonte suo, scaturiant.

Accedit tandem & hoc, quod, tùm partes istæ, à quibus proximè contagia effluunt, tùm etiam illæ, quæ recipiunt, sero sint quam maximè irriguæ. Ita ore ejusmodi exspirari ac recipi effluvia contagiosa, certum est. Jam autem, ut in vulgus notum est, tot glandulæ, jugulares, inquam, buccarum, labiorum, maxillares, sublinguales & palatinæ ac parotides, variis ductibus laticem suum in os exonerant, ac humore salivali illud lætè imbuunt. Nec minus manifestum est, cum sudore per poros cutis maligna illa corpuscula ex ægri corpore elabi, ac iterum per poros patentes in corpus alterius irruere.

Enim verò iterum ex solertissimi Stenonis observationibus constat, cuius poro suam subjacere glandulam, ex quâ exsurgit vasculum excretorium ad eliminandum sudorem, in cutem desinens. Porro pudenda muliebria & virilia constituunt illam sentinam, ex quâ putrida miasmata, quæ sanos inficiunt, exhalant. Quis autem ignorat, etiam has partes lymphatico humore uberrimè irrorari? In toto certè ductu vaginæ reperiuntur multi pori seu meatus, non tantum exigui illi, sed & aliquantò majores in parte ejus inferiori circa exitum meatus urinarii, ex quibus foeminis vivacioribus in florente ætate constitutis, magna liquoris serosi quantitas ad humectandas partes illas extillat. Idem verò etiam dicendum est de oculis, à quibus & ad quos derivatur ophthalmia, etenim & illi suis non destituuntur glandulis. Absque dubio autem vana est sententia Fracastorii, qui ophthalmiam per radios propagari credidit, quo nomine etiam jure merito fuit reprehensus ab Hieronymo Cardano *lib. I. de venen. c. 13. p. m. 891.*

Tàm multa sunt, quæ persuadent, ἀπορίστως illas contagiosas debere natales suos sero. Evidens autem est serum illud, quod contagia spargit, esse corruptum.

An verò ita corruptum sit, ut putridum vocari mereatur, & num exhalet semina contagiosa itidem putrida, in quæstione positum est. Affirmativam tuentur Montanus, Fracastorius, Mercurialis, Augenius, Erasius, Crato. Negativam cum multis aliis defendit Cl. Melchior Sebizius & Diemerbroek. Nostra parum refert hæc curiosius discutere, cum lis tantum de nomine esse videatur, & in hoc conspirent omnes, laticem illum, qui diffundit, υπερκείμεναι, non posse non esse corruptum, in mixtione suâ varie turbatum, unde

non

non incommode *μῖασμα* hoc ab Hippocr. *lib. de natur. hominis* vocatur νοσερὴ ἀπόκρισις; Et nescio, an non de hac insigni humorum depravatione ipse pulsus testimonium perhibeat. Simon Pauli in doctiss. digressionem de febb. malignis narrat, quod manus sibi pulsu in maligne febricitantibus explorato, aliquoties ita prurire cœperint, ac si urticâ Rom. vel etiam marinâ essent perfrictæ. Multò minus eam ingrediemur disputationem, an illa putredo viva & animata sit, unde non nisi viva effluere possunt *μῖασματα*. Placuit hæc sententia admodum Kircheri, juxta quem omnis putredo insita sibi ad animalium generationem quædam seminaria habet, quæ mox externo & opportuno calore in vermium colluviem erumpunt, tantò quidem periculosiorem, quantò ipsa putredo ex peregrinâ & spurîâ quâdam degeneratione virulentior est. Placuit eadem quoque, ut notum est, Langio, & nuper quoque eandem sententiam argumentis quibusdam novis confirmare aggressus est Clariss. Paulini; sed, ut diximus, hanc litem non facimus nostram, nec magnam ex decisione in clinicâ praxi nobis pollicemur utilitatem.

Arduum autem prorsus est, varias humoris serosolymphatici depravationes accuratè explicare. Et, nisi omnia nos fallunt, vitia lymphæ, *tum in quantitate*, nisi quòd defectus ejus in longâ inediâ & atrophîâ satis notus sit, *tum in qualitate* nondum exactè à quoquam detecta sunt. Id quod etiam dicendum de salivâ, etiamsi inficiandum non sit, quòd Clar. Nuckius in *Sialographiâ* non inutilem hîc posuerit laborem. Experimenta ejus ad indagandam penitiùs salivæ naturam facta cum variis liquoribus, variisque spiritibus ipse recenset *l. c. p. 44. & seqq.* Nec adeò multa in eodem tractatu ejus vitia pandit. *Saliva*, ait *p. 49. à naturali constitutione multum quandoque deflectit, & pro insipidâ fit salsa vel amara, vel dulcis, vel acida: Subinde etiam colorem deponit, & ex albo fit crocea, pro aqueâ & crassâ viscosa evadit, imò & vermiculi in eâdem visi sunt, ut testatur Clar. Dolæus.*

Lymphæ depravationes gustu perceptibiles omnium maximè in scorbuticis sunt manifestæ, quorum querelæ de ingrato Salivæ sapore neminem latent. Observationem præcipuè meretur hoc, quod Saliva in morbis contagiosis ferè deprehendatur spumosa. Nam rariùs & ferè extra artis usum est, quòd semel fortè lactea, aut in calcem excrecens fuerit visa, quâ de re idem Nuckius *l. c.* agit. Nec sanè apparet, quâ viâ exactè vitia laticis seroso-lymphatici detegi queant. Certè laudabili studio quidam Viri Celeberrimi chymica hîc instituerunt experimenta, sed nondum ea, quam cordati Viri optant, hinc consecuta est utilitas. Et si quæ inde ad Medicos rediit, ferè nulla est alia, quam ut *σοχαρμὸς* in eligendis remediis aliquantò sit certior. Si enim v. g. mihi sit cognitum, quòd serum hydropicorum mixtum c. spir. falis coaguletur, cum spir. vitriol. aut nitri instar gelatinæ per plures dies remaneat, è contrario verò in fluore perseveraverit remixtum cum spir. *ci, si hoc, inquam, scio, facilè colligo, minùs tutum esse usum vitrioli & nitri ac fortè aliorum acidorum in hydrope, ac his præstare volatilia. Dubius tamen sum, an idem interne datus spir. *ci præstiturus sit, & serum in fluore servaturus, quod

præstat sero extra corpus hydropicorum infusus, ac nihil nisi conjectura probabilis, experientiæ lance examinanda, inde remanet. Id quod dicendum etiam de aliis, quæ a famigeratissimis Viris, Malpighio, Vieusseno, Majore, Bohnio, Ettmüllero, Rivino, aliisque adducuntur. Neque credendum est, humorum vitia magis innotuisse ab illo tempore, à quo Chymici à productorum Chymicorum similitudine humores corporis vane denominarunt, imò, absit invidia verbo, plurimi hîc eorum naturam magis obscurarunt, qui non tantum nitrosos, aluminosos, vitriolatos sales, sed & tot tartareos, tot Mercuriales, &c. in humoribus contineri ajunt, quorum naturam ne ipsi quidem illi Doctores assequuntur.

Quid Anatomia ad hoc usque tempus ad intelligendam fluidorum constitutionem ejusque varias depravationes adjumenti attulerit, itidem in aprico est. Meritò extollimus industriam Cl. à Leewenhock, aliorumque exantlatos labores, at nullius microscopii adminiculo minimorum constitutivorum magnitudinem, figuram, situm & motum nos posse assequi, verè monuit Leonhardus Capuanus, cujus scepticismum alias minime probamus. In vitiis verò etiam obviis perpetuo ambigui hæremus, an ad classem causarum morbificarum, an verò affectuum morbosorum pertineant?

Cum verò ita cum vitiis & deturbationibus laticis seroso-lymphatico-salivalis comparatum sit, & ea adhuc abyssò naturæ immersa majori ex parte lateant, facile patet, frustra esse eos, qui à nobis requirunt, ut *μιασμα* & contagiosi naturam omnem & differentiam præprimis aut modum, quo in corpore symptomata varia excitat, exponamus; nam liberè fatemur, oculos nostros hîc caligare non secus quàm vespertilioes ad clarum diei jubar. Nec fraudi nobis debet esse hic candor. Nam, qui inquinamenta illa ajunt esse arsenicalia, mercurialia, galica, napellina, quid aliud dicunt, quam sibi seminarii istius naturam esse ignotam? Et quam nihil hîc prorsus agatur, elucesceret, si vanitas eorum, quæ de singulorum contagiosorum corpusculorum naturâ à Doctissimis prodita sunt Viris, ostenderetur. Sed hoc nimis prolixum. Miæsmatis Venerei enodationem tentarunt multi, & inter celebriores sæculi hujus Doctores Magnum in Medicinâ nomen Sylvius. Huic, & multis ejus sequacibus, præprimis autem Blegny, Lemery & aliis fermentum hoc acidum est, medicamenta Siphyllidos malo opposita, & inter ea ipse mercurius alcalinæ naturæ, quâ de re mentem suam Clar. Sylvius uberius in peculiari de lue venereâ libro exponit. Et licet speciosè satis dolores, pustulæ, ulcera, gummata & topi ab acido deducantur, non tamen propterea illud venereum inquinamentum in acore consistit. Nec enim ullo pacto repugnat rationi credere, quòd *μιασμα*, postquam corpori illapsum intercedente motu humorum, quem fermentativum multi credunt, acrimoniam illam humorum excitet. Deinde quis unquam ab acido, fortissimo licet, tales effectus in corpore nostro oboriri vidit, quomodocunque etiam corpori & quibus ejus, partibus communicetur? Quotidie enim Chirurghi partibus externis corporis etiam maximè sensibilibus & porosis, acidissimos, nec unius generis, spiritu

spiritus admovent, unde, nisi in parte illâ, effectus nullus, aut si propter ætatem fibrillas nerveas alibi in corpore quid observatur, nihil cum lue venerea id commune habet, ut optimè alicubi Clariss. Medicus & Polyhistor. Henricus Meibomius, qui etiam ingeniosa alia hypothesi huic objectat. In Febribus malignis Doctissimus Simon Pauli & Tilingius, de febre petechiali, miasmata credunt esse salia volatilia, naturâ temperiei corporis humani inimica; ab illis, utut sub aliquo colore, ebullitio in sanguine, dolor capitis, deliria, deduci queant, alia tamen symptomata, enormem illam lassitudinem, appetitus dejectionem, obstructionem alvi, cardialgiam, &c. frustra hinc arcessere fueris conatus.

Illis igitur inutilibus theoriis sepositis magis è re fuerit, *primo* dispicere, quidnam unumquodque fermentum (nam unius generis non esse, ex multiplici inquinamentorum illorum operatione innotescit) in corporis humoribus operetur, quod in Histor. Morbor. Anni præcedentis factum. *Secundo*, quomodo ejus energię efficaciter occurri queat, quod alibi Deo dante exequemur. Cum verò occasione febb. malignarum in hunc de contagio sermonem inciderimus, hâc vice suffecerit ostendisse, quod natura contagii, quatenus nobis cognita est, nostrum malignas febres curandi modum luculentè satis comprobet. Non probatur in febb. contagiosis nobis V. S. nisi in circumstantiis planè singularibus. Non, ex nostrâ mente, locum in illis habent purgantia fortiora, nec calidiora alexipharmaca, & ubique, præter multiplicem experientiam, huic curandi methodo prælucere rationem in propatulo est. Hæc enim apertissimè dictitat, materiam, quæ sub halitus formâ in quantitate prorsus exili in corpus irrepsit, nec per venæ, scalpello aut lanceolâ apertæ, vulnera, nec per volumina intestinorum, quæ crassiorum excrementorum emunctoria sunt, ex corpore exterminari posse, inutilem quoque esse prorsus profusam feri per sudores nimios excretionem. Moderatum adhibuimus regimen & temperatissima diaphoretica & bezoardica, eorumque usum continuavimus, rati, hoc pacto auctiorem nos impetrare posse exhalationem & miasmatis vaporosi sese latius diffundentis & multiplicantis exclusionem, quam non impetu quodam, sed sensim tentari debere, mechanicæ, ut innuimus, circumstantiæ contagii evicerint. Talis autem blandus mador temere expectatur, si remedia illa vulgò decantata, e. g. spirit. C. C. sal. vol. viperar. camphora, tinct. bezoard. dosibus majoribus & frequentioribus obtrudantur ægris; nam hâc viâ medentes nihil aliud consequuntur, quàm ut majorem in sanguine ægrorum excitent commotionem, quæ placidæ excretioni, dum nimis propere latex ita commotus poros effugit, aut præterlabitur, repagula ponit, imò declinante æstu, post exhibita ejusmodi acria & calida, non partes halituosæ illæ fermentescentes, subtiles, &c. sed aqueæ exprimuntur, unde sanguis redditur viscidus, & halituosorum *μιασματων* discussio difficilius obtinetur. Ulterius potum concessimus ægrotis nostris sufficientem, & vidimus, quòd iterum sana firmat ratio, jugem inde excretionem facilius ægrotantibus evenisse, quo accedit & hoc, quòd, sufficienti potu concessò, alvus liberius, optimis

febricantium rebus, suo fungatur officio. Rursus tùm hoc, tùm præteritis annis, dedimus medicamenta in majori æstu subacida in sanguineis, nitrofa tùm his, tùm cholericis & melancholicis, quâ arte nimiam humorum effervescentiam, quæ remoram exclusioni miasmatis ponit, ut dictum, compescuimus.

Intumescencia abdominis post partum.

Quam infestum sit puerperis, post exantlatos partûs dolores, frigus, quantumque noceat neglecta arctior ventris compressio, tùm sæpè alias, tùm etiam hoc tempore vidimus. Nam, præter alia incommoda hinc in puerperas redundantia, sæpè in illam prolabuntur miseriam, ut ventrem admodum inflatum ac distentum per totum, quod reliquum est, vitæ spatium circumferre teneantur. Tympanitide illas laborare, aut uterum gerere crederes, ita abdomen est expansum ac tumidum. Sed præter deformitatem vix alia adest corporis læsio aut dolor, eoque ipso differt illa abdominis inflatio à pneumatosi hysterica & flatulentâ ejusdem distensione, in quâ dolores à pectine per abdomen usque ad mediam ventris regionem excurrentes, & lumbos etiam ac dorsum fatigantes, & caput in consensum trahentes, sentiuntur. Quomodo tum frigus, tùm omisio arctioris, post partum, compressionis, ad hunc affectum concurrat, sanè non adeò evidens est. In eò ferè omnes conveniunt Anatomici & Medici, quòd uterus à partu non illicò recuperet statum illum, quem antè habuerat. Aliqui etiam eò usque progressi sunt, ut affirmarent, primogenito foetu nonimestri vel semel expansum atque spissatum ad pristinas angustias ac tenuitatem sese nunquam revocare. Atque adeò intellectu facilè est, abdomen fasciis post partum comprimi, ut uterus, post illam à partu expansionem, sensim magis magisque ad figuram pristinam accedat, & *hiulca vasculorum oscilla, hæc ipsa contractione strictius atque strictius concludantur, ac omnino solide-scant*, ut Clariss. Drelincourtii verba faciamus nostra. Quid verò dicendum de frigoris energiâ? An credemus, aëre frigido subtilia evibrari corpuscula, qualia è nive aut glacie cum sale contritâ in circumfusam aquam illabuntur, eamque non solum congelant, sed partibus ejus arrectis & rigefactis magnâ nonnunquam violentiâ in amplius extrudunt spatium? Sicuti de frigore post P. Honorat. Fabri philosophatur Cl. du Hamel. Non absona hæc planè esse, suspicari quisquam posset ex eo, quod orificium uteri tùm hiet & ipse uterus exundet colluvie humorum, cui frigus violentam inducere quietem, eamque ad firmam condensare immobilitatem aptum est. At perpetuus calidi sanguinis allapulus in vivo corpore hanc opinionem facile evertit. An fortè dicendum erit, quod aëris subtilis in uterum sese insinuantis pondus gravitate suâ impediat, quo minus iterum sese contrahere possit ad solitas angustias. Hanc sententiam vix reprehendent affectu acutissimi Perraltii, qui laudatissimus naturalium scrutator effectus omnes, qui frigus in corporibus frigefactis sequuntur, à gravitate aëris subtilis deducere *in tentamin. de duritie p. 41.* fatigit. At neque eam hîc locum habere, difficultas curæ, quæ omnis frustra-nea est, si non in primâ herbâ malo occurras, facile evicerit. Non aliud occurrit,

currit, quod majori probabilitate se nobis commendet, quam quod per admissum frigus tonus & robur membranacearum uteri partium labefactetur, quâcunque etiam agendi energiâ frigus hanc vim exferat. Cura, ut jamjam dictum est, variis implicita est difficultatibus. Nullus hic locus est purgantibus, quæ tantum abest, ut profint, ut potius concitatis variis turbis malum augeant. Omnia, quæ modestè lochiorum, vel, si etiam hoc tempus jam elapsum sit, mensium promovent fluxum, aliquam præstant utilitatem, si cum judicio carminativa iis jungantur, & opportuno tempore exhibeantur, non neglectis tamen topicis, ut & enematis ac injectionibus uterinis. Aliquod notabile incommodi redundantis in puerperas ex frigore externo & post partum neglectâ abdominis per fascias constrictione, præter multa alia, notavit exemplum D. Samuel Grassius. Scilicet, mulier 40 annorum, multorum liberorum felix mater, dum incautiùs frigori se exponit gravida, post partum, & expurgata lochia, sensit intumescientiam abdominis resitantem instar utriculi, indies incrementem, quæ, cum per aliquot septimanas, nullas, vel admodum exiguas ei afferret molestias, successu temporis tamen in immensum extollebatur tumorem, cum doloribus circa regionem hepatis & umbilici enormibus, quibus jungebatur pressio molestissima circa pubem in dextro latere, & tandem ascites. Appetitus in principio non erat dejectus, deinde verò languebat, nonnunquam erratica febricula aderat, somnus cæteroquin placidus, vixque de aliquâ re, præter sitim & dolores in abdomine conquerebatur. Succedebat post 18 septimanas mors.

Nihil non tentatum est, quo ægræ succurreretur, & pro recepto, pro! dolor, apud nos more, agyrtæ, Cingari, & carnifices, & fures & mulierculæ Medicastræ cum Medicastris in consilium vocati sunt, non sine notabili ægræ damno & dilapidatione æris. Concessa tandem tamen est cadaveris sectio, ubi ingens quantitas purulentæ & sanguinolentæ materiæ cum particulis carneis in cavo abdominis reperta fuit, omentum planè corruptum erat, ipsos etiam abdominis musculos putredo corripuerat, & necrosi diceres tactos, peritonæum per totum abdomen hydatidibus purulentis erat repletum, & in mesenterio hinc inde scirrhusæ glandulæ sese offerebant, testis dexter cum tubâ Fallopiânâ faxeam induerat duritiem, & in fine Peritonæo accreverat, ulcusque magnitudine nucis juglandis fovebat. Hepar prægrande, sed sine ullâ labe, uno lobo lienem attingebat. Ventriculus, propter tumultuarium & nimium usum medicamentorum, flaccidus inveniebatur, pancreas plane erat corruptum, cætera viscera nullo polluta erant vitio.

Quid verò de causâ malorum hujus ægræ dicemus? Estne probabile, quod lymphæ in musculis abdominis & in aliis corporis partibus, frigore externo in motu impedita, & per stagnationem acrior reddita, & minuta aut suppressa transpiratione, & reductione per vasa cessante, contraxerit tandem acredinem tantam, quæ vasa lymphatica & partes fibrosas erodere potuerit? An verò potius accusabimus inflammationes, & has credemus abiisse in ulcera, hæc autem & vasa lymphatica & sanguifera exedisse, hanc verò vasorum corruptionem secutam fuisse effusionem humorum in abdomen?

Hernia
Umbilicalis.

Vix quidem fieri potest, ut non Practicis quovis anni tempore, & singulis propè diebus occurrant variæ herniarum species; hâc tamen tempestate potissimum meminimus Herniam Umbilicalem à nobis fuisse tractatam. Vulgò affectus hic noster describitur per prominentiam umbilici, & ὀμφαλὸν in infantibus potissimum affici, extra controversiam est. At in adultis res secus habet. Nam prolapsus omenti & intestini fit non tam in umbilicum, quàm in hujus loca finitima, rarius ea, quæ super illum sunt, & ad scrobiculum cordis sese extendunt, frequentius in partes ad latera umbilici positas, aut eo inferiores. Ex omphali causa esse possunt quivis motus violentus, casus, percussio, saltatio, equitatio, vomitus, tussis, &c. Observavimus tamen multoties, quòd graviorum onerum, per scalas statim à prandio sumpto, gestationes, huic malo præbeant occasionem. Dùm enim ingentia pondera humeris imposita per scalas deportantur, fieri non potest, quin diaphragma deprimatur versus abdomen, quod est cibus distentum, & ab ingestis turgidum, quo in casu quàm facilè Peritonæum laxari possit, in aprico est. Peritonæum rarius (non autem cum Clariss. Munnick in Chirurg. p. m. 170. dixerimus impossibile esse, ut valida hæc membrana dilacerari ac rumpi possit; aut in herniosis post obitum nunquam rupturam, verùm dilatationem peritonæi semper observari) violentiâ externâ rumpi, vel inde colligere est, quòd rarissimè, sicuti peritonæo rupto fieri necesse erat, omentum, vel intestinum in sedem umbilici statim post ejusmodi casum incidant, sed sæpè post dies aliquot & integras septimanas Omphalocèle in sensum incurrat, licet exquisitæ puncturæ sensus statim ab initio in regione umbilicali adsit. Cùm tumor sese exerit, ferè ovi columbini magnitudinem æquat. Quando ab omento est, mollis existit ac indolens, nec color cutis mutatur. Post cibum sumptum tumor crescit, sed ægro supino aliquantum minuitur, quod etiam fit, si leniter comprimatur, & ad interiora digitis adigatur, ubi sine murmure residere solet. At aliter res habet, cùm ab intestinis tumor oritur, nam etiamsi evanescat quadantenus, quando comprimitur, non tamen sine murmure disparere suevit. Præterea etiam magis est inæqualis, si ipsa excidant intestina, si autem illa quoque incarcerentur, & ex compressione & strangulatione inflammentur, magna adest æstus & sitis intensissima, & facilè iliaca passio succedit, quæ meritò metuitur tanquàm instans, cum adest nausea, conatusque vomendi cum ructibus. Ab Omphalocèle sine difficultate distinguuntur tumores à flatu sub unguibus tinnientes instar tympani, ac lividi ab extravasato sanguine, ut & duri à carneâ mole aut ecchymosi oriundi, qui ultimi omnem chirurgicam pariter & medicam opem eludunt. In curâ eò nostra collinearunt consilia, ut partes prominentes blandè in debitum (remotis per enemata aut levia cathartica, carminantia, cataplasmata & foci &c. impediementis, intestinorum, inquam, infarctu distensivâque à flatibus expansione &c.) reponerentur locum, quod faciliùs succedit resupinato ægro, ita ut caput pendulum deorsum vergat. In hoc enim corporis positu, si blande herniosus exspiret, diaphragmatis musculus, eique annexa versus thoracem trahuntur.

hantur. Quando ergò digitorum accedit ministerium, promptius, ut diximus, repositio perficitur. Enim verò eo etiam est annitendum, ut partes repositæ in loco suo retineantur. Quod ut obtineas, necessario per aliquot septimanas corporis imperanda quies est in situ corporis supino; nam hoc pacto ea, quæ exciderant, versus dorsum vergunt, & dilatatio facilius claudi ac corrugari potest. Deinde ab omni retrò tempore, ad constrictionem & fibrarum divulsarum aut laxatarum unionem laudata sunt externa adstringentia & remedia glutinantia, è quorum censu sunt variorum emplastra ad herniam, præprimis autem nobile illud Barbet. *in Chirurg. p. m. 30.* Nobis non infeliciter cessit usus compositionis à Blegny excogitatæ, quam, ut ipse memorat, *p. m. 232. in arte herniarum curatrice*, confecit ex *duabus* partibus mastiches & succini *unâ*, gypsi & vitrioli calcinati ad albedinem, contritis & commixtis æquis partibus visci & ichthiocolle in forti aceto dissolutorum. Infantibus meminimus cum successu applicatum emplastrum ex tritis cochleis, thure & albumine ovorum & exuviis anguillæ recentis. Nihil solidi subest Crollianæ deprædicationi de efficacia malorum in foliis quercus propendentium mense Majo collectorum in vitro soli expositorum & per se resolutorum in aquam. Nec majori utilitate tentatum fuit experimentum Digbæi, juxta quod sterus vaccinum linteo inductum & cumino aspersum calidè repetitis vicibus applicandum venit. Experiatur, qui volet, an vera sint illa Fabri verba: *Curantur herniæ succo depurato herniarie, qui admixtus farina fabarum & parti applicatus per 15 dies ægro in lecto quiescente perfectissimè curat herniam.*

Nos etiam hoc promissum fefellit. Res autem ipsa loquitur, quanta hîc subligaculorum & perizonarum necessitas sit & utilitas. Internè admodum commendantur vulneraria medicamenta ex consolida utrâque, tormentillâ, saniculâ, hyperico, persicariâ, vincâ pervincâ, aristolochiâ, bardanâ, &c. Solenander laudat pulverem lunariæ minoris in decocto consolidæ vel vino per aliquot tempus diligenter adhibitum. Ari radicem singulari virtute herniosis auxiliari Doctiss. Laurenbergius ait; sed nos ex experientia didicimus, nullum inde ad ægros redundasse fructum, imo potiones vulnerarias cum damno ægris propinari plus simplici via observavimus. Nam ut de aliis incommodis non dicamus, adstringunt alvum, quam liberam esse omninò ægris expedit. Nulli etiam erimus Auctores, ut ad imitationem vel Blegny artificiales cum alumine & vitriolo paratas, vel Fallopii chalybem præparatum cum saccharo exhibeat, etiamsi vel maximè magneticum emplastrum in subsidium vocare animus sit. Dehortamur etiam ab usu famosi remedii jussu Regis Galliarum orbi communicati, sc. spiritu salis, quem Abbas per 20 dies in vino rubro dedit gradatim ascendendo à scrupulo uno usque ad enormem drachmarum duarum dosin, quam summè ægris noxiam esse, noverint ii, qui spiritum hunc absque interruptione per aliquot tempus ægrotis dederunt.

Januario hujus Anni pariter ferrarius quidam circinorum faber per multos jam annos enterocèle dextri lateris laborans, quæ commodo subligaculo

culo intra cancellos abdominis hætenus cohibita est, ex inæquali violentaque corporis commotione prolapsum denuò intestini in scrotum patitur, tam diuturnum, ut decennii spatio nullis remediis, nec internis, nec externis quicquam auscultaret, quin imò cum obstructione alvi pertinacissimâ & doloribus colico-iliacis atrocissimis vomitus stercoreus quoque accederet.

Quo rerum in statu tandem vocatus D. Preufs, cum nec clysmata blanda, nec fots per cataplasmata emollientia & sacculos nervinos discutientes aliquid proficere, spasmosque intestinatorum flatulentos maximam partem subesse sentiret, propinatâ sæpius essentiâ stomachico-carminativâ cum anodyna remixtâ, & epithemate calido à chirurgo herniæ frequenter applicato ex aq. calcis vivæ, spiritu vin. camphorat. & essentiâ carminativâ balsamico-nervinâ, DEi gratia eò rem brevi redegit, ut, spasmo prolapsi intestini rigidissimo remittente, manu peritâ chirurgi illud iterum in cavum abdominis blandè reponeretur, mediante subligaculo ibidem firmaretur, sicque æger ab interitu vindicaretur.

Quemadmodum is eodem quoque tempore œnopolam ex podagra per agyrtam retropulsâ, ut vocant, colicâ nephriticâ truculentissimâ laborantem, aliis omnibus frustraneis, ex voto sanitati restituit usu alternis diebus modo tincturæ tartari, copiosum cum urinâ fabulum educentis, modò haustuli tepidi unciarum 3 vel 4. misturæ sequentis diuretico-laxativæ:

℞. Decoct. emoll. contr. calc. Foresti.

Aperitiv. Major. an. unc. jv.

Aq. contr. calc. Conrad.

Fragor.

Cinam. bugl.

Syrup. Regii.

Byzantin. an. unc. j. M.

De catarrhis, tussibus ferinis, aliisque morbis, qui tùm grassati sunt, dicere jam non attinet, quia de iis in Histor. præcedentis anni est actum; id sufficit verbo monuisse, quòd hoc tempore opiata catarrho & rheumatissimo laborantibus minimè profuerint.

Constitutio
Aëri in
Mens April. Mai.
& Jun.

Mense Aprili admodum inclemens erat aëris constitutio, & miris ventorum, frigoris, grandinum, nebularum, nivium, pluviarum vicissitudinibus, etsi ad teporem nonnunquam inclinaret, ingrata. Nec in Majo veris fruebamur deliciis, sed sub turbido & nebulis obducto ac pluvio cœlo per majorem mensis partem egimus; eoque gratior erat blandus in Junio solis calor, qui tamen & ipse pluviis & tonitru subinde turbabatur, quo ipso id consecuti fumus beneficii, ut minùs æstu solis exureremur.

Febris semitertiana.

Hoc tempore omnis generis febres grassabantur. Præprimis crucem figebat nobis illa, quæ typum talem observabat. Primo die horror satis gravis homines catarrho obnoxios & crassiori victui assuetos, aërisque injuriis crebro expositos, aut ad tabem pronos invadebat, horrorem seque-

sequebatur calor valdè inæqualis, pulsus autem ferè debilis erat; æstus per horas modò pauciores, septem, inquam, novem, modò plures v. g. 12. 14. &c. perseverabat, post quem aliquibus sudores effluebant, quibus manantibus, utut febris remitteret, plenè tamen non cessabat. Vidimus, qui post calorem nondùm sopitum, eòdem die, denuò horrore & frigore concuterentur, ac illis jam dicto die vomitus erant molesti, iis præprimis horis, quibus febris intendebatur. Die secundo perseverante adhuc calore denuò eadem propemodùm horâ, quâ primò, miseros opprimebat, alius horror, aliudque frigus & tandem etiam calor, qui sensim augebatur, sed tamen longè adhuc aberat à ferociâ ejus, qui primo die ægros exurebat, sed neque tot horis, quàm ille continuabat. Tertio die eadem, quæ primo, ludebatur fabula; Quarta iterum secundo respondebat. Verbo, semper uno die febris erat gravior & quasi composita ex tertianâ & quotidianâ, altero autem erat levior, typum unius quotidianæ referens. Solvebatur intra 14 aut 20 dies per diarrhæam, mutabatur etiam in tertianam duplicem, in aliquibus scabies succedebat per totum corpus diffusa. Cadunt etiam hæ febres adhibitâ ordinariâ methodo nostrâ curandi, quam alibi adumbravimus. Lenia evacuantia eximie profunt secundo aut quarto die imò & aliis diebus paribus etiam repetitis vicibus exhibita. Omnia symptomata erunt leviora, si illis diebus, quibus unus tantùm affligit paroxysmus, sub declinationem blanda dederis alexipharmaca. Ante paroxysmos præcipitantia cum salibus alkalicis & nitro rectè etiam morbo huic opponuntur. V. S. non celebravimus.

Præter has febres occurrebant etiam, quæ itidem tertio quoque die, ut priores ingravescebant, sed absque rigore & horrore stata observantes tempora. Et hoc ipso differebant à præcedentibus, quæ exacerbationes habebant horriferas, atque statas. Hæ enim etiam si rigoribus non carerent, illi tamen ἀτάκτως καὶ πεπλανημένως inordinate & erraticè, non unâ cum paroxysmo invadebant. Non mali videbantur esse moris ab initio, sed procedente morbo ferè in pejus ruebant, ac criticis præsertim diebus excandescebant. Aderat morsus ventriculi, aliaque symptomata maligna, in his lethargus, in aliis vigiliæ c. deliriis conjunctæ. Impeditus erat urinæ fluxus eo tempore, quo rigeabant. Satis erant contumaces hæ febres nec nullos interimebant. In curâ nihil peculiare à nobis observatum, nisi quòd è re sit superato rigore ad æqualem sanguinis distributionem obtinendam diaphoretica & alexipharmaca propinare. Cæteræ febres ferè omnes conjunctæ erant cum Otalgia, quæ certè & ægris & Medicis facessit negotium. Emetica, quæ in aurium dolore ab Auctore *lib. de affectibus* commendantur, hic locum non habent. Idem sentiendum ferè de purgantibus, quæ ab Hippocrate de *locis in homine*, damnato vomitu imperantur. Nec V. S. placuit nobis, consilium Ballonii *lib. 2. epidem. & Ephemerid. p. 234.* secutis. Expertissimus ille Practicus, si, inquit, *vena secatur & aliquid est egressum è vasis & aliquid paratum est adhuc in partem fluere, retardamus suppuratum, refrigeratur & crudescit materia; sic occasio ma-*

jorum posthac dolorum datur. Si dolor in profundioribus hæreat partibus, etiam ea, quæ in aures instillantur, parùm profunt. Nam cum ad tympanum usque tantum pervenire queant, interioribus partibus affectis exiguum afferre solatium apta nata sunt. Prorsus autem improbamus consilium Galeni, qui opium auribus indi jubet, tametsi non usque adeo evidens sit, quòd opium, sicut credit Schneiderus, peculiariter sensui auditus sit infestum. Ex internis ea elegimus, quæ aliàs in viscerum & meningum inflammationibus præscribi consueverunt. Inter externa potissimum linimenta spirituosa, & hæc quidem camphorata & crocata elegimus, eademque sæpius applicari imperavimus. Aliquod etiam in pediluvii est subsidium, si dolor ille, quod tùm temporis vidimus, solitarie absque febre affligat. Otalgiam alias in hemiplegiam, quæ tamen & ipsa adhiditis debitis remediis cessit, esse mutatam in virgine plethoricâ meminimus.

Dolor dor-
si in puer-
peris.

Primiparæ habitiores lautioris conditionis, imò & aliæ puerperæ partus laboribus defunctæ, hisce diebus ferè omnes conquerebantur de dolore compressivo satis vehementi in dorso, quem nec mulierculæ suis remediis domesticis, nec Medici selectis etiam pharmacis depellere poterant. Acerbiores erant cruciatus earum, quæ jusculis consummatis, ut vocant, lapsas reparare vires gestiebant, præprimis si infantes essent debiliores, & in uberibus sollicitandis negligentiores. Nihil æque his profuit quàm victus tenuior & evacuatio lactis ex mammis liberalior, evidenti certè argumento, dolorem hunc non aliundè pendere, quàm ex vasorum lacteorum, ipsiusque ductus thoracici chylosam materiam pro lactis generatione advehentium repletionem ac nimiam distensione. Quòd si itaque, quæ in dictis canalibus hæret, eo, quem intimavimus modo, evacuetur materia, & caveatur, ne vitio gulæ alimenta euchyma affatim ingurgitando, chylus nimis augeatur, non adeò difficilis fuerit medela.

Vertigo.

Præcipuè autem hoc tempore communes de vertigine querelas audiebamus. Occurrebant satis multi, quibus caput & visus objecta circumagi videbantur. Nec nulli erant, quorum oculis tenebræ, aut intra tenebras splendida quædam obversabantur, & caput in turbinis modum circumduci videbatur. *Horum auribus etiam murmur veluti delabentis cum strepitu fluminis insonabat, aut tanquam ventus flatu vela percutiens, aut tiliarum fistularumque cantus, aut veluti stridor plaustris currentis obstrepbat,* ut nostra faciamus verba Aretæi ex lib. 1. de morb. diuturn. cap. 3. Hoc autem malo vidimus vexari eos, qui in otio viventes liberaliùs subindè se vino invitarant, aut qui antea hæmorrhagiam narium, vel fluxum hæmorrhoidalem experti, his evacuationibus per tempus aliquod caruerant; aut qui aliàs catharsi fuerant assueti, eandemque omiserant. Multat etiam fumus nicotianæ suos amatores vertiginosâ capitis debilitate, ut non malè alicubi Helmontius, ab immoderato tabaci usu, initia apoplexiæ derivet. Post opiatorum usum non semel vertiginem observavimus; nec incongruè Sylvius lib. 2. prax. notat, homines ex assumptis nimiam

miâ quantitate narcoticis in apoplexiam incidere. Nec minus vertiginem patiuntur ii, quos stupor aut paralyseos prodromi infestant. Cæci etiam hîc suos patiuntur manes. Est autem vertigo hæc conjuncta non tam cum dolore & debilitate capitis ac pulsatione arteriarum, sed & subinde cum tremore, & ingenti circa os ventriculi pressione & manifesta stomachi inflatione, ac anxietate præcordiorum, quam ii potissimum experiuntur, qui cibis flatulentis delectantur. Videas etiam vertigini obnoxios subinde sine omni causâ moestos & præter consuetudinem antiquam subtristes, ac quarumvis prope modum, quæ contigerunt, rerum immemores. Non defuerunt, qui, quoties ipsos vexat vertigo, quamcunque in partem caput flecterent, in eam veluti cadere sibi viderentur. Atque hîc gradus vertiginis, quamvis aliquanto rarior, summus est, quando totum corpus vertiginosi vacillat, & nisi fulcro alicui innitatur, in terram corruit. Ad hanc scotomaticorum classem etiam referendi sunt illi, quos, nescio quis timor, cum sedere cupiunt, occupat, aut quibus, quando obambulant, terra fugere videtur, ac pedibus sese subducere. His in partibus corporis superioribus nonnunquam sudor sponte erumpit. Vertigo omnis crescit, quando ex alto in inferiora visum defigunt, aut ubi velocem rapidi fluminis motum, aut gyrum rotæ circa axem vel flammam latè se diffundentem vertiginosi intuentur, item si onus humeris gestent, proni incendant, aut si ex improvviso intentos audiant clamores.

De vertigine à compressione cranii & cerebri ab immoderatis, sub æstu solis, exercitiis, irâ, somno prolixiori &c. non est, cur verba faciamus. Notum etiam satis est, quod diuturnæ vertigini, quæ focum in primis viis, hypochondriis & utero non habet, succedat apoplexia, vel epilepsia, quod etiam olim notavit Hippocrates l. 4. *acutorum*. Cura difficilior est, quam credunt minus experti. Nec adeò indicationes in promptu sunt, eo quod causa ἀμερος mali latuerit. Novimus, communiter accusari confusum spirituum animalium motum, & vulgò doceri, quod tum excitetur vertigo, quando spiritus non æqualiter influunt, sed rotantur & nutant, eos autem tum in ordinato suo motu turbari, quando aut liquidum nervorum in vortices abit, quod vult Willisius, aut ipsi spiritus vapore quodam heterogeneo & maligno inquinantur, & caractere peregrino notantur, quod, juxta acroamata Sylvii, tum potissimum contingit, cum bilis & succus pancreaticus vitiosi effervescent, juxta Hornii autem doctrinam, quando pylorus patet & fordes ex intestinis attrahit. Quæ omnia captu satis difficilia sunt. Nos autem cum verissimum esse arbitremur illud Pitcarnii in *Dissert. Med.* p. 106. *In omni morbo, cujus Phenomena æque possunt oriri à motu liquidi in arteriis impedito ac à motu liquidi per nervos venasque sublato, semper putandum, potius peccari intra arterias quàm intra nervos aut venas*; jam à multis annis credimus vertiginem idiopathicam oriri à dimotione quâdam retinæ, aut nervi per distensionem arteriarum oculi; quandoquidem facilè intelligi potest, quod, quando vasa sanguinis in oculo intumescunt, sive illud fiat per copiam sanguinis, sive per copiam alicujus ex humoribus, sive per calorem rarefacientem, adeoque vasa

extendentem, cum impetu in retinam & nervos nitantur & partes eas loco moveant, ut optimè expositum à Clar. Bellin. *lib. de morb. cap. p. 594.* & motu hoc vertiginem excitent. Illuc fanè oculos in cura convertimus.

Atque hinc primas fanè V. S. ferè semper detulimus, edocti ab Hippocrate in *coacis*, quòd *tenebricosas vertigines sanguinis ex naribus fluxio solvat*, cujus oraculi sensum Noster Jonstonus in *notis p. 280.* minimè est assecutus. Nec frictiones & ligaturas negleximus. Suus etiam relictus fuit locus pediluvii. Præmissâ V. S. etiam non tam *ἐκτονωτική*, quàm fortiora elegimus pharmaca. Rarò emetica adhibuimus in plethoricis, etiamsi adestent ructus & rugitus, aut si quando juxta 4. *Aphorism. 17.* id factum est, exemplo Langii delegimus sal vitrioli, quod non tantum evacuat, sed & humores fundit ac dissolvit. Inter sudorifera hoc in affectu tinct. bez. D. M. omnium minimè expectationi fatisfecit. Carminativa aromatica, si sollicita instituaturs observatio, non parùm nocent. Idem ferè dicendum de spiritibus apoplecticis ex vegetabilibus cephalicis & nervinis, ut moris est, paratis. Nec melius se gerunt martialia, & inutilia magisteria perlarum, corallorum, ac inanes fæcularum fæces. Nec aliquid peculiare præ reliquis obtinet specificum Mich. ungu. alc. præp. Visc. Colurn. ppt. saphir. ppt. smaragd. ppt. Aliquantò major virtus est in succin. spec. de hyacinth. Maxima autem inter usitatiora in cinabari nativâ, quamvis nec ab illâ miracula sint expectanda. Nullius pretii est spiritus vitrioli cephalicus, prout vulgò paratur. Rad. doronic. sem. coriandr. cubeb. aliquid faciunt operæ pretium. Salviæ laudes non immeritò in vertigine celebrat Paulini in *Salv. p. 74. & seqq.*

Peculiare
tumoris
genus.

Non possumus etiam, quin singulare recenseamus exemplum de apostasi καὶ ἀπόσθεςιν, ut medicinæ Parens vocat, in scirrhum sanguineum degenerante cum doloribus atrocibus & aliis mali moris symptomatibus. Ubi in antecessum jure meritoque notamus, quod aliàs notum est ex Hippocraticâ doctrinâ, apostasi seu abscessione per sepositionem significari materiæ morbificæ è nobilioribus partibus ad ignobiliores depulsionem, non autem plenam è corpore excussionem, quod, licet principium movens corporis intendat, proposito tamen suo hîc frustratur, vel, quòd vires corporis fatiscant, & ad secretionem non sufficiant, vel materia ad motum inepta exclusioni reluctetur, vel etiam viæ minus patulæ obicem ponant. Atque hinc fit, ut non penitus ex corpore proscripta materia sed ad extremas partes detrusa, ibique altius impacta, etsi mole non magnâ, tanquam fomes facilè novos morborum ac dolorum faces accendat, quod in Matronâ ferè quinquagenariâ plethoricâ, ac turgido corporis habitu prædita expertus est D. D. Helwich & Grassius. Hæc genere & virtute Illustris in sterili matrimonio vivens, periculorum ex diætæ legibus contemptis secura, cibos etiam maximè noxios avidius ingesserat, quod non fieri oportuerat, quia & menses, statis quidem temporibus fluentes, sed haud rarò admodum dolorificos antehac experta & varias ejusdem menstrui fluxus ataxias autumnis & hyeme ultimum morbum antegressis senserat, & diros calculi labores sæpius-

cule

scule jam pertulerat, quoties dyspeptis ventriculum præter modum & omnem mensuram distenderat. Nec ignara etiam malorum, quæ hæmorrhoidalem fluxum ex licentiâ hâc, quam in victu sibi indulgit, impeditum sequi sueverunt. Non minus etiam sordidis apostematum molestiis aliquoties præterlapsis annis divexata, sed tot tantisque malis nondum satis edocta cœca hâc indulgentia in alios subinde morbos sese tempore præcipitavit, ac aliud grave tormentum sibi accersivit. Scilicet rediens ex dynastia suâ Vratislaviam circa vesperam, post cephalalgiam aliquot dierum, horrore febrili, quem æstus satis intensus, per totam noctem durans, excepit, concutitur. Æstu isto interpescente, immani dolore in digitorum manus sinistræ internodiis corripitur, qui miseram per 5 horas, nisi fallor, atrociter afflixit. Cùm sub vesperam cruciatus absque omni febris indicio recrudescerent, vocatus D. Helwich accurrit & vix compotem mentis præ dolorum atrocitate invenit, inter mulieres de ineffabili articulorum dolore ejulatus, quam singultiens, ut enormiter tensivum, vibrativum ac vellicativum & lancinatorium describebat, scrupulosæ indagini nullus erat locus, quamvis vivendi ratio ejus, & pleraque, quæ scire medicorum interest, illum non fugerent. Dolores illos videri arthriticos affirmat, nec adstantes abnuebant, & inter has vidua podagrico olim juncta, eandem jam ante accessum ejus cantilenam cecinerat. Absque morâ etiam post severè injunctam diætam accuratiorem, medicamenta ipsi in arthritide familiaria præscribit, pulveres nimirum nitroso cinnabarinis, ad aliqualem sanguinis distributionem obtinendam, tincturam aliquam diaphoreticam. Etsi enim procul absit ab opinione eorum, qui calidissimis in arthritide medicamentis ad proliciendum sudorem sanguinem exagitandum esse censent, diaphnoica tamen manè exhibita amat quàm maximè. Postero die redeunti narratur, noctem inter cruciatus, quibus ferendis humana natura non par sit, esse transactam, & simul ostenditur manus, quam dum accuratius intuetur, in pulposâ digitorum carne maculas deprehendit lividas, ac in atrum vergentes colorem, quales cernere licet, cùm tubercula, quibus tendines, qui digitos contrahunt & extendunt, annectuntur, incautè durioribus corporibus gravius alliduntur, læsis enim his partibus, acutissimo sensu pollentibus, excitatur crispatura, quâ sanguinis puncta ad ambitum eorum subsistunt. Interrogata, an casu quodam cubitum offendisset, negat istud contigisse, ne quidem se credere, quòd in somno irrequieta partes dolentes contudisset. Medicamentorum continuationem suadet. A topicorum usu, præprimis conglutinantium, pinguium, oleosorum usu dehortatur, ac in spem meliorum labantem suffulcit animum, at verò horæ, dies ac septimanæ labebantur, & tamen tantum abest, ut tormenta dolorum cessarent, ut potius quotidie per horas aliquot diurnas, quod primis diebus non contigerat, & nocturnas vagis paroxysmis repeterent, & eam indignè mulctarent. Itum fuit obviam dolori huic omni remediorum genere (nam cùm laudata ante medicamenta non mitigassent, alia subinde, ita volente ægrâ, substituebantur) evacuatum blandè corpus, vena pertusa, cucurbitulæ applicatæ, blanda diaphoresis, cùm eò vergeret natura,

insti-

instituta, humores antiscorbuticis aliisque accommodatis, quantum fieri poterat, correcti, antispasmodica verò prora ac puppis erant, nec, quod tamen in ejusmodi casibus rariùs ipsi in more, opiata fuere neglecta; at ne hilum his omnibus dolores mitigabantur. Tribus elapsis septimanis, tumor in carpo exoriebatur, ex quo alii in spem erigebantur, fore, ut brevi dolores demulcerentur. Medicus verum esse aiebat, quòd, quando tumores arthritici in conspectum prodeunt, dolores mitescant, imò id etiam docuisse experientiam, diutius esse à paroxysmo, quibus ejusmodi tumores tardius dissolvuntur, immunes, sed tumorem hunc non videri ex genere eorum, qui arthritidi superveniunt, sed propius accedere ad phlegmonem, nam esse statim inflammatoriam in amplum & quantum apparebat etiam in profundum diffusam, cum ardore & æstu conjunctam, sola duritie absentia à phlegmone differre. Atque tum facile intelligebat, affectum non esse verè arthriticum, quamvis dolores arthriticorum cruciatibus simillimi essent, ac tumorem hunc magis magisque considerans, & ægræ corpus, nec non motus animi perpendens, manibus quasi palpabat, scenam hinc apperiri Hippocraticarum apostasew. Quia tamen etiam hæ periculo minimè vacant, ac tumores phlegmonodes etiam in sphacelum præcipientes feruntur; commendabat cum D. Grassio externa, lenem materiæ noxiæ discussionem promoventia, & interna diapnoica ac antispasmodica præscribebant; sed, quod dolores ex eorum usu non statim sopirentur, emplastra, nescio quæ, erant imponenda, quibus id, ut eventus docuit, effectum est, ut crassiores sanguinis partes poris altius adigerentur, secedentibus subtilioribus partibus serosolymphaticis, grumosa sanguinis stagnantis condensatio sequeretur, uno verbo, scirrhus sanguineus, *ein harter braun-rother Buckel*, neque tamen, quod aliàs fieri solet, malacia cruciatuum obtingeret. Hic duo Medici illi gnari, quàm facile in ulcerosas, gangrænosas aut sphacelosas corruptiones scirrhi sanguinei abeant, omnem chirurgo sollicitudinem commendabant. Is verò, ut fieri solet, utroque absente, scirrhum aperiendum esse contendit, pollicitus fore, ut, factâ levi apertione, dolor omnis conquiesceret. Fit ita. Extillant tres vel 4 guttæ ichoris, & cruciatus quasi incantamento sublatis omnes per 24 horas suspenduntur. Hic nobis ægra cum consanguineis insultare, quod reluctati essemus huic tumoris incisioni, nos quidem, absque jactantiâ benè facere & malè audire, jam assueti, jubemus in vulnusculum, lanceolâ factum, instillare liquorem balsamicum vulnerarium, & precamur, ut gaudium hoc ægræ sit diuturnum. Sed vix elapsæ 24 horæ, ubi infandi iterum eam dolores corripunt, qui incertis paroxysmis eam per tres adhuc septimanas aggressi sunt, ubi post multa antispasmodica interna, & camphoratorum usum externum, primò languidè, tandem prorsus conticuerunt. Circa scirrhum nihil temerè movendum esse, constans nostra erat assertio, edocti, citra magnum ægrorum incommodum ejusmodi scirrhos, nisi passionibus animi, præprimis verò excandescentiâ, abusu vini, violentiori corporis motu imprudentibus refrigerationibus occasio novis punctoriis & æstuatoriis doloribus præbeatur, in corpore circumgestari. Dum verò dolores

res remittere incipiunt, novo terrentur symptomate, nempe incipienti quasi aridura, à nimia fibrarum tensione, cujus tamen progressum fotibus, cataplasmatibus, unguentis ac spirituosis linimentis facile inhibuerunt, atque ita ægram diuturnis dolorum fluctibus concussam, sub auspiciis divinæ gratiæ, in portum sanitatis perduxerunt. Ejusmodi effectus satis frequenter absque dubio in praxi occurrunt, dum larvam dolorum arthriticorum, sub quo schemate incedentes etiam oculatis imponere possunt, conjunctam habent, & sub nomine dolorum articulare, podagricorum, chiragricorum aut certè rheumatismi, occultantur. Manifestum verò satis est, sævos illos dolores excitari, dum humor, præprimis verò sanguis motu vegeto tensis fibris illiditur, adeoque hos cruciatus esse ex classe spasmodicorum, eos etiam credimus esse causam tumoris, & hunc ipsum, propter dolores illos formari ac colligi, non propter copiam materiæ per apostasin rejectæ, quippe quæ non adeo magna est, ut sensus docet. Res etiam ipsa loquitur, quod sepositâ ejusmodi materiâ vix maturationem admittat, ac scirrhi exulcerationes, si quando eveniunt, genuini imperitiæ chirurgorum foetus sint.

Rectè Sydenham in *dissert. epist. p. 485.* ait, passiones hystericas inter chronicos morbos omnes frequentissime occurrere, easque, ut *p. 486.* innuit, chronicorum partem mediam esse. Nos quidem hoc jam non agemus, ut totam mali illius hystoriam Lectori sistamus, quam non malè descripsit Paschalius *l. 1. d. cur. morb. c. 57.* attamen licebit, opinor, nobis describere affectum, qui satis frequenter corripit foeminas sanguinei temperamenti, impedito mensium fluxu laborantes, non ad aliam morborum classem, ut judicamus, commodius referendum; is verò sequens est: Mulieres quædam, cum imminet tempus, quo tributum menstruum solvendum est, primo quidem Affectus
Hysteri-
cus. experiuntur anxietates præcordiorum, cordis palpitationes, anxietates miras cum artuum lassitudine & cephalalgis, deinde post varios spasmos hypochondriorum, & dolores tensivos in dorso & osse sacro ac regione pubis tandem erumpunt in quantitate non magnâ menses, iste verò fluxus apud has paucis durat horis, apud alias diurno, aut longiori adhuc spatio circumscribitur, at infra tempus debitum atque justò citius sistitur. Cessante verò fluxu exquisitissimi dolores vibrantes & lancinantes per dorsi longitudinem ad cervicem usque diffusi sese exerunt, in abdomine autem acutissimi dolores flatulenti adsunt. Ex dorso irruunt acutissimi isti dolores punctorii in caput, & tempora occupant, atque hinc singulis momentis exacerbantur. Dum autem caput dolore gravissimo, distendente, gravativo ac punctorio torquetur, facies inflatur, malæ rubore suffunduntur, ac vultus mediocriter ardet. Nonnunquam dolor acerbissimus in certo pericranii punctulo, quod transverso pollice contegi posset, tantum hæret, non minus tamen est penetrans, quam si clavus ferreus in caput vi adigeretur, ut optime describit Sydenham *p. 487. & 499.* unde etiam affectui nomen clavi hysterici indidisse videtur. Dolorem illum aliquando etiam comitantur enormes vomitus, plerumque vero cum illo conjuncta sunt febricula, agrypnia, lassitudo artuum,

tuum, alvus adstricta, horror per intervalla recurrens, extremorumque frigus. Post aliquot dies inclinatur morbus, & symptomata mitescunt.

Initium curæ fecimus ab enematis, quæ bis etiam in die applicari iussimus. Paregorica & discutientia capiti applicata aliquam præstant utilitatem. Cæterum vulgaria anti-hysterica & nervina internè data, tantum abest, ut opem afferant, ut etiam dolores intendant. Dedimus essentiam carm. Mich. Wedel. elix. uterin. utriusque, ut & Crollii, at illud tantum his laudatissimis medicamentis assecuti sumus, ut dolores auferentur, & diutius protraherentur, mens vacillaret, membra stuporent & alvus pertinacius obstrueretur. Multum nostra experientiâ hîc præstant temperantia, salia digestiva, pulveres nitrosi & salini. Superato paroxysmo opera à nobis data, ne affectus repullularet. Hoc autem multoties obtinuimus iis remediis, quæ fluxum mensium promovent, studiosè caventes à cortice Peruviano, quem in affectibus hysterici immeritò Sydenham tantopere extollit. Quodsi sanguis viscidior & spissior impediti mensium fluxûs causa esset, aut etiam sanguinis orgasmus, curam à V. S. auspicati sumus, & deinde post usum leniter evacuantium, emmenagoga mitiora dosibus exiguis justo tempore, &c. exhibuimus. Cujus commendatæ methodi efficaciam singulari epilepsiæ uterinæ exemplo D. Pauli magis confirmare potuit. Erat tum temporis Nobilis cujusdam uxor, lautiori & liberiori diætæ addicta, sanguineo-melancholica, venerea, concubitus tam ob prolis numerum, quam ingrati mariti austeritatem, fugiens. In partu filioli mortui, quem ante biennium enixa fuit, paralytica facta quoad manum sinistram & transacto puerperio lumbagine quâdam rheumatica, maximâ sæpè, quanquam per intervalla, cum molestiâ tentari cœpit. At vero paralyti sequenti anno thermarum Hirsbergensium usu sublata, lumbago usque remansit. Alias menstrua ipsi hætenus in debitâ & quantitate & qualitate, ordinarioque tempore fluxerunt; attamen faciem pallor & tumor veræ cachexiæ signa occupant. Decimo Maji eam invadebat febris continua cum ingentibus spasmodicis & capitis & totius trunci doloribus, agrypniâ, magnâ ventriculi nausea & frequenti vomitione, atque insigni virium prostratione. Febris hæc temperatis bezoardicis, & salino-nitrosis oppugnata, ac post nonum diem dissipata, simulque dolores prædicti penitus extincti prosperam valetudinem promittebant. Verum post duas hebdomadas spes decollabat; dum subsequenti lunaris fluxûs initio hæc ex improvise epilepsia sic dicta uterinâ corripere, cum perpetuis vomendi conatibus, & copiosis involuntariisque urinæ excretionibus. Dies fermè præteribat, priusquam afflicta sensum reciperet. Fluxus prædictus menstruus posthæc statim cessabat, eumque imposterum prorsus emanfurum conjectare licebat. Interea quilibet vel septimus vel nonus dies novorum semper epilepticorum insultuum, vomituum sensuumque omnium abolitionum periodus erat, quam accessuram ex limpidissimâ & albißima urinâ per sesquidiem semper prædicere licebat. Data in paroxysmo impetuosæ salia volatilia, sternutatoria, dolorum capitis vertiginosorum, febrilium commotionum, mentisque majorum abalienationum causæ erant, ideoque

ideoque ægra pedetentim absque externis excitantibus ad se redibat ; postque paroxysmum partim lenes clysteres, partim blanda laxantia, nervina cum carminativis offerebantur. Præservativè martialia dosibus parvis, sed repetitis ante & post mensium tempus usurpabantur, sed absque minimo effectu. Quippe omnimodam mensium emanationem spasmodici & dolorifici sensus in toto corpore comitabantur. Proinde ad nimium in sanguine commotionum impetum mitigandum, cinnabarina ; ad acrimoniam verò humorum contemperandam salia tartareo-nitrosa ; instante vero mensium tempore essent. myrrhæ c. spir. * anis. tanto cum effectu propinabantur, ut desideratæ excretiones in debito ordine redirent ; ægraque sub finem curationis accepto nodulo anticachectico optatæ sanitati restitueretur.

Præterea multorum infantum corpora hisce diebus motibus convulsivis concutiebantur, quorum non pauci à parentibus suis per mortem avellebantur. Imitatus hic Nostrum aliquis curam Hieronymi Cardani, qui cum vocatus esset ad infantem convulsione acerrimâ correptum, non desinente acutâ, quâ laborabat, febre, *perfusionem*, & *lintea madefacta ex oleis lini & liliorum adhiberi jussit*, præterea infantem molliter tractari, nutricem etiam à carnibus, lactantem ab omnibus aliis potibus ac cibis, præterquam à lacte ; cuius moderatum usum permisit, abstinere voluit, & ægrum perfusionem in cunis & loco calido habendum, ac perpetuo sed leviter, donec somnus obreperet, agitandum esse edixit, eo cum effectu, ut infans intra quatrimum prorsus convalesceret, sicuti Cardanus ipse narrat in *lib. de Vit. propr. p. 90. & seqq.* Enimverò hanc medicationem hic Vratislaviæ nullus felicior eventus exhilaravit. Plebs nostra multum fiduciæ collocat in ungulis alcis, & regnat etiam alibi in multorum animis hic error, in ipsâ etiam Norwegiâ, quem scitè redarguit Autor *der Nordischen Reise*, hoc Anno Lipsiæ editus. Ille, cum ei Nobilis offerret dono pedes alcis, & in laudes virtutum ejus antepilepticarum excurreret, subridens, respondit : Se sibi persuadere non posse, (*) *dass dieser Fuß so viel Krafft habe, indem sich das Thier, so ihn stets an sich trüge, damit nicht zu curiren vermöchte* ; Nobilis responsionem argutam perpendens, non tantum advenæ sententiam probavit, sed & fassus est, multis morbo caduco detentis, frustra à se ungulas illas esse datas. Imò cum alces sæpè convulsionibus laboret, Auctor non absurdè arbitratur, (†) *dass das von diesem Thier gegessene Fleisch solche fallende Sucht verursache*, ut legere licet p. 12. & 13. Et propterea tantò magis miramur ; qui Clar. Charleton in *Onomast. Zoic. p. 9.* scribere potuerit, quòd ungulæ hujus animalis epilepsia & hysterica affectioni summopere opitulentur.

Nec minus frequenter tum infantes infestabantur ranulâ, quam Græci Batrachion vocant, Germani *das Fröschelein*, à figura, credo, quam exhibet frequenter, tametsi illa non semper eadem sit, & nonnunquam globuli rotundi speciem referat. Tumor hic imam linguæ partem obli-

G g 2

det,

(*) Alcem pedem aliis tam salutarem sibi ipsi minime medentem circumgestare.

(†) Quòd qui ejus carne vescantur, convulsivis motibus concutiantur.

Epilepsia
Infantum.

Ranula.

det, arteriisque venisque, quas raninas chirurgi vocant, accumbit, ut jam innuimus. Modò phlegmonis, sæpius autem œdematis mollis laxique figuram repræsentat. Si aperias, ut sanè etiam crudum aperire juvat, vel mucus albumini ovi non absimilis extillat, vel pus & sanies emanat. Sed quia persæpè timiditas parentum chirurgi manum non admittit, in subsidium vocatæ fuerunt in ranulâ œdematosa collutiones ex decocto salviæ, hyssopi, plantaginis, origani, menthæ, majoranæ, summitatum anethi, in inflammatoriâ ad suppurationem tendente ex lacte, cui pro re natâ fuerunt emollientia incôcta. Sive autem sponte sive arte aperiretur humor, quod relictum fuit ulcus, eluimus decocto veronicæ, marrubii, agrimonix, cicerum, melle rosato, syrupo è rosis siccis, capillorum veneris, betonicæ &c. Multoties autem observavimus, quod, nisi cystis, quæ humorem continet, absumatur, tumor iterum iterumque repletâ vomica resurgat. Contingit tamen etiam, ut effluente pure cocto pellicula putrescat, & totum simul excernatur, quod morbum facit.

Inter omnes, qui hisce diebus ex febb. ardentibus moriebantur, vix inventi aliqui fuerunt, qui non nigritie ac scabritie linguæ infestarentur. Prunella. Prunellam vocat vulgus Medicorum à temporibus Paracelsi, fortè quod herba Prunellæ optimè ipsi, ex sententiâ Theophrasti, medeatur. Cùm vero vuneribus etiam asperæ cuticulæ subnigræ, similes iis, quæ in lingua conspiciuntur, facile superveniant, hinc idem Paracelsus non absurdè Prunellam vulnerariam statuit, ut colligere est ex *Chirurg. Magn. Tract. I. c. 6. p. m. 6.* Indicat autem talis lingua inflammatorium viscerum æstum, & nihil boni portendit, ut jam olim observavit ex Hippocrate Prothus C. fulanus in opusculo de *linguâ quâ maximum est morborum acutorum signum l. 3. c. 12. p. 110.* Mitigant, sed non tollunt affectum mucilagines sem. Psyllii, cydoniorum c. aqu. semper vivifactæ; ut & misturæ ex ▽. prunell. phlegmate vitrioli aut tinct. rosar. violar. Nobis præ aliis placet lapis Prunellæ in ▽. appropriata dissolutus. Nec aspernendum est remedium Wittichii ex oleo olivarum vitrioloque, si porrigatur in quantitate nucis avellanæ. Hartmannus in *Praxi Chimiatri.* agens de anginâ, laudat non immerito corium *de lardo assulatum*, ut vocat, *incisum*, & ex eâ parte, quâ adhuc lardum est, linguæ impositum, & aliquamdiu ore detentum. At in his ipsis remediis unicam spem ponere, omissis internis, temerarium est. Hi duobus circiter diebus ante mortem febricitantes, cùm biberent, potus iis descendebat quodammodo in præceps cum sonitu, quasi in vacuo & inani descenderet, & obaudiebatur murmur & borborygmus circum præcordia, quod phænomenon doctissimi inter veteres Medicos à siccis laryngis musculis deducere solent. Meminit ejus in Coacis ipse Hippocrates.

Sub illud tempus, quò fraga & ribium baccae passim apponebantur, & avidè, ut fit, ingerebantur, alii diarrhœa corripiebantur, alii autem Cholera. Cholera, præprimis, si vinum in glacie refrigeratum ingurgitarent. Cholericici non tantum fursum & deorsum magno cum impetu humores biliosos egerebant, sed & ingenti siti torquebantur, & assidua corporis jectigatione fatigabantur. Mens eorum percellebatur, aderant vigiliæ & partium extimarum refrigerationes; quæ symptomata, nisi statim ab initio blanda data abs-

tergentia aut levissima evacuantia ac præcipitantia cum diaphoreticis & discutientibus, ipsa mors excipiebat.

Varii oculorum affectus in praxi etiam tum nobis occurrebant. Nonnulli laborabant *epiphorâ* & tenuis humor, calidus & mordax lachrymarum specie in oculos irruebat. Ex his aliqui in febb. intermittentes lapsi non modo molestiæ levamen ex febre supervenienti non senserunt, sed & dolorem augeri eo, quod forte acerrimum remaneat, dissipatis humidis & aquosis particulis, crebro conquesti sunt. Alios *acres & salsi humores cum rubore & palpebrarum exulceratione gravi* afficiebant tædio. *Inflammationes* quoque oculorum aliæ aliis erant pertinaciores. Interdum oculi satis erant squalidi & vasa supra modum extumescebant, & tamen totum malum remediis debitis facile tollebatur; nonnunquam verò inflammatio multò minor erat, & tamen, quicquid etiam ageretur, frustra tentabatur. Erat autem hoc in casu cum ophthalmia dolor capitis diuturnus indissolubili nexu conjunctus, qui satis ostendit, in consortium mali meninges & intimas cerebri partes trahi, quod etiam subinde in aliis fieri morbis patet ex Clar. Baglivii scripto de *Fibrâ motrice*. Visus autem eorum, qui ita affecti erant, indies magis obscurabatur, nec in minimo cœcicatis secuturæ periculo versabantur. Id creberrima nos docuit experientia, alvi profluvium sive sponte naturâ motum, sive pharmacis excitatum ophthalmicis esse admodum utile, sicuti prius inculcavit Hippocrates *& in Coac. & 6. aphor. 17.* posterius autem subinnuit *lib. de capit. vulneribus*, scribens, *quibusdam vulnerato capite, ophthalmias supervenire, quæ purgatione conquiescant.* Nihilominus summâ curâ saluberrimum Galeni suadentis, ne toto *fluxionis tempore in revulsoriis acquiescamus*, sed & *doloris sedandi rationem* habeamus, præceptum erit observandum.

Porro sæviebant etiam maximoperè brachiorum dolores, qui omnem remediorum applicationem eludebant. Præprimis autem admodum rebellis cruciatus erat, qui nostrum alicui curandus imponebatur. Scilicet, implorabat Medicam opem Vir quinquagenarius, habitu corporis atletico præditus & venationi deditus, qui in juventute & virili ætate strenuè in castris Bacchi militaverat. Iste, cum ante annos aliquot dolorem tensivum in nuchâ & scapulis cum aliqua vertigine percepisset, ex Medici Viennensis, qui apoplexiæ prodromum hunc dolorem esse credebatur, consilio, tum aliis usus fuerat, tum unguento, cui admixta erant *℞. succ. spic., salv. &c.* Enimverò non tantum non dolor illi hinc fuit sublatus, sed potius maximoperè auctus, & sedem circa scapulam in altero latere fixerat. Ab illo tempore varia alia dolori demulcendo usurpata fuerant remedia. Præmissa de difficultate curæ prognostico, cum in aperto esset, ab ægro, ut non rarò contingit, *præproprio sanitatis desiderio* esse peccatum, curæ auspiciu sumebatur à V. S. in altero brachio. Sequebatur blanda evacuatio cathartica cum euphorîâ. Subnectebantur diapnoica & leniter diuretica, e.g. essent. succin. c. tinct. tart. pulver. ex absorb., nitro & cinnab. com-

Affectus
oculorum.

Dolores
Brachio-
rum.

positi. Ad mitigandos autem dolores nocturnos, qui semper fuerunt gravissimi, dabantur pilulæ de styrace, emulsiones &c. Aliquid de sævitia remittebant dolores, postquam per aliquot dies his remediis usus esset. Quia tamen malum subinde repullulabat, loco potus ordinarii adhibuit decoctum blandum ex radicibus & lignis, & in usu aliorum selectissimorum remediorum perrexit. Sanguisugæ etiam circa orificium ani fuerunt applicatæ. Nihilominus ex toto malum hoc inveteratum his aliisque remediis tolli non potuit. Topica in ultima hac cura per priores septimanas certis de causis fuerant omissa, at deinde compellente cruciatu, sacculi sicci ex nervinis & discutientibus, item in vino aliquando & lacte decocti, linimenta camphorata varia, balnea etiam &c. in usum & subsidium, absque dolorum levamine, vocabantur. Æger pertæsus curæ, eo, quem optarat, eventu destitutæ, hætenus multos Medicos fatigavit, nec ad hodiernum usque diem quicquam ei profuerunt aliorum consilia, nec thermæ. Jam, ut fama fert, ærumnas salivationis sufferre constituit.

Dolor hypochondrii dextri.

Hisce etiam diebus mulieres sanguineæ constitutionis, quæ paulò liberalius vinum bibunt, dolebant hypochondrium dextrum, spirandi aderat difficultas sine tussi, quæ in horas increbescebat. Accedebat nonnunquam febricula, quæ dolorem, modo is esset mediocris, ne ad claviculam aut ilia pertingeret, solvebat. De hoc ipso dolore videtur loqui Hippocrates lib. 6. aphor. 40. *quibus dolor ad hypochondrium sine inflammatione, his febris superveniens solutio.* Nihil æque profuit, quàm primo quovis tempore sanguinem liberaliter ex venis in pede detrahere, id quod argumento est, aut hepar phlogosi in hoc dolore corripui, aut sanguinem in trunco venæ portæ vicinisque ramis stagnare. Difficilior est cura, si dolor hic sit conjunctus cum tussicula inani, ex hac enim, ut putamus, non vanè colligi potest, etiam diaphragma in societatem doloris rapi, id quod fit, cum gibba hepatis pars inflammatur, utpote quæ propius diaphragma attingit. Si paulò gravior sit inflammatio, ne digitorum quidem pulsus ægrotantes ferre possunt. Jactantur plurimum, lingua arida & scabra est ob ingens in sanguine incendium.

De Aneurismate interno.

Occurrebant & tunc & hodie adhuc oculis observantur, qui de internis doloribus nullâ arte expugnabilibus conquerebantur, vel hodie adhuc conqueruntur. Causæ dolorum istorum in abdito latent. Nos sæpè suspicati sumus, ejusmodi dolores ab interno quodam aneurismate dependere. Nam exempla ab aliis narrata satis edocent, quod aneurismata magnorum morborum causæ existant. Mercatori, ut doctissimus Medicus Parisiensis narrat, *dolor summus ad spinam dorsi, annum integrum laborabat.* Quod aliquando lue venerea infectus esset, id attribuebant veteri malo Medici. Nihil malum quievit. Tandem sursum deorsum ingens sanguinis copia excreta est. Aperto cadavere, aneurisma compertum est in divisione magnæ arteriæ ad ilia, qua parte spina incumberet. Coquus quidam, ex ejusdem Medici relatione, *difficultate menjendi tenebatur,* aliquan-

aliquando suppressio erat urinæ. Calculum in vesicâ, aut aliquid simile suspicabantur. Per quædam intervalla malum repetebat; derepente interiit, subitæ cladis causa fuit *aneurisma ruptum*, valde enim erat dilatata arteria, quæ vasis urinariis subjacebat. Ac credibile est, dilatationem istam arteriæ, difficilis mictionis causam fuisse. De aneurismate in pectore oborto à vomitu, legatur Paræus in *Operib. p. m. 230.* ubi commemorat, quod vestiarius ex *aneurismate arteriæ venosæ rupto* mortuus, dum viveret, *micantium impetu arteriarum omnium pulsum*, ingentemque toto corpore calorem se percipere dixerit, ac sæpè in lipothymiam inciderit. Sanè præclarissimè de medicinâ mereretur, si quis curiosius indagaret, & signa latentium aneurismatum detegeret, ac cum, iudice Paræo, incurabilia sint, rationem, quâ ægri in tantis molestiis ex parte sublevari possent, solide ostenderet, quod nuper Cl. Baglivius pollicitus est sese facturum.

Mensis Julius erat amoenissimus, nam & grato solis jubare exhilarabamur, ac tepidis aliquando pluviis terra refocillabatur. Major æstus erat in principio Augusti, & crebra audiebantur tonitrua; Eoque gratiores erant, quæ subsequiebantur, pluviae, etesiæ quoque gratè spirantes nimium temperabant fervorem. Nec minùs blanda & grata erat aëris constitutio in Septembri, nisi quod circa novilunium rigidior aer corporibus nostris esset molestus.

Constitu-
tio aëris in
Me. s. Jul.
Aug. Sept.

Hoc tempore incidit notabile hæmorrhoidum vesicæ exemplum, quod descripturum D. Christ. Helwich, anno præcedente diximus, sed nihil vetat, quò minùs ea, quæ de hæmorrhoidibus oris & vesicæ ab eo annotata fuerunt, etiam hic legantur.

De hæ-
morrhoi-
dibus vesti-
cæ & oris.

Diligenter in enodandâ hæmorrhagiarum secundum ætates, temperamenta, sexum &c. varietate, quidam nuper versati sunt, iidem quoque fluxum hæmorrhoidalem, tum eum, qui ex propaginibus *venæ portæ ac splenicæ* oritur, tum illum, qui ex *ramis vasorum iliacorum internorum* scaturit, ingeniosè explicarunt. Et hætenus quidem tantum non omnes, quamvis sanguinis rejectionem per os, vel ad hæmoptysin, vel vomitum cruentum reduxerunt. At verò, quàm benè id fiat, colligere licet ex *Histor. Morbor. anno 1699.* & aliis fide dignis exemplis. Neque sanè quisquam facile crediderit, quod profluvium illud sanguinis, quod *multis per ora, statò tempore*, ut *Macrino Visco Prætorio*, & *omnibus annis Volusio Saturnino*, urbis præfecto, qui *nonagesimum excessit annum*, teste *Plinio. lib. XI. cap. 38. p. m. 814.* fiebat, vel hæmoptysis fuerit, vel vomitus cruentus *Aristoteles l. 2. de part. animal.* non tantum veritatem huius fluxus confirmavit, sed & appposito hæmorrhoidum nomine eum insignivit, ita scribens: fiunt etiam aliquando *αἱμαρροΐδες ἀπὸ τοῦ ἐκ τῆς σόματος* hæmorrhoides *sine labore omni ex ore*, neque, *ut ex arteria violenter.* Unde colligere est, quod post Aristotelis tempora, à Celso & Galeno demum vox hæmorrhoidum ad *venas sedis & uteri restricta* fuerit, quoniam illæ præ cæteris frequenter sanguinem fundunt. Nam ipse Aristoteles etiam alibi *nimium lib. 1. de generat. animal.* simpliciter scribit; quod *ἐν ταῖς φλέβιν* fiunt hæmorrhoides, qui locus etiam simul indicat, quod non malè Celsus, cui

&

& Paulus adstipulatur, scribat, *Ora venarum, tanquam ex capitibus surgentia* vocari à Græcis *hæmorrhoides*. Conf. Hieronym. Fabric. ab Aquapendente *de Chirurg. Operat.* p. 106. & Frommannum *tract. de hæmorrhoid.* p. 6. Tales oris hæmorrhoides, nisi me omnia fallunt, ipse agnovit Hippocrates *lib. 2. Prædiction. Sect. 2. p. 82. edit. Foësi*, ita scribens: *Quibus fauces sanguine noctu & interdiu replentur, dum neque capitis dolor prægressus fuerit, neque tussis, neque vomitus, neque febris prehenderit, neque pectoris aut dorsi dolor tenuerit, in his nares & fauces inspicienda, num quod ulcus in eo loco compareat, aut ἢ βδέλλα?* Quæ ultima vox tenebras Hippocratis verbis affundit, ac difficultate hac motus Hippocrates Latinus, Celsus, inquam, *lib. 2. de Medicin. cap. 7. p. 60*, nostrum, qui præ manibus est, textum Coi latinis efferens verbis interpretationem omisit, contentus dicere, in eo, quem Hippocrates describit, casu, ulcus reperiri. Jam notum quidem est, quòd illa vox alias hircinam, quæ à fuctu sanguinis sanguifuga tempore Plinii dici cœpit, significet, ut constat ex Theocritici *Pharmaceutica*, Hesychio *p. m. 186*. Suida *Tom. I. p. 549*. Varino *Phavorin. p. 358*. Clariss. Lindanus *in Select. Medic. Exercit. XI. paragr. 58. p. 381*. dicit, quod Strabo *lib. 17. Geograph.* lampetras vocat βδέλλας. Alia quoque ejusdem vocis significatio occurrit apud Plaut. *in Curcull. Act. 1. Scen. 2. p. 265*. harum tamen neutra hujus loci. Galenus *in exegesi vocum Hippocraticarum*, sive ut Latine inscribitur, *in explanatione linguarum* inter libros *Isagogic. p. 143*. *Mihi*, inquit, *videtur propriè dici nomen de ipso animali, etenim affui olim, cum hoc diceretur in eo libro, & dubitantibus multis de his, quæ fierent, solus ego ex scripto aggrediens præcognovi veritatem.* βδέλλαν in primâ significatione accipi debere contendit, & *lib. 4. de loc. affect. 5. p. m. 52. class. 4.* provocat ad historiam juvenis, in quo ad narium foramen in eo meatu, ubi nasus ad oris regionem perforatus, hircinam latentem conspexit; allegat etiam aliam historiam de homine sanò Galen. qui cruorem evomuerit epotâ cum aquâ hircine. Et his exemplis confidentior redditus loco ultimo fluxus sanguinis per os, ab hircine contingens signa pandere non veretur, ita scribens: *Quodsi pluribus diebus aliquis cruorem & screaverit, & emunxerit, idque citra capitis vel dolorem, vel gravitatem, sive præsentem, sive præteritam, neque plaga eo loco existente, hujus & totum per nares meatum, atque eam oris partem, qua ad nares perforatur, exactè considerare oportet. Istud enim aliquando contingere potest hircine huic loco adhaerente, quæ quidem indies augeri solet, quamvis enim primis diebus, quod sit exigua, latere queat, tertio tamen quartove die haud obscure conspicitur.* Hæc tantopere placuerunt Aetio, ut sua fecerit *lib. 8. c. 59*. Galeni interpretationem probat etiam Foësius & *in Comment. ad Hippocr. Prorrh. & in Oecon. Hippocr. p. 119*. Jam non negamus, fieri aliquando posse, ut hircus cum nocturno potu aut alio modo in guttur irreat, ac ibidem sanguinis fugendi gratia hæreat; nam præter Avicennam *lib. 3. Fen. 9. c. 5*. illud testatur etiam Borellus *Cent. 1. observ. 24. p. 33*. & hinc jam olim ad epotam sanguifugam descripserunt remedia Dioscorid. *lib. 6*. Celsus *lib. 5*. Paulus *lib. 5*.

c. 37. Nicander aliique plures ; at verò quòd h. l. Hippocrates per βδέλλα hirudinem intellexerit , illud est , quod negamus , nullo modo moti auctoritate Galeni , sed potius memores istius aureæ sententiæ ipsius Galeni l. 2. de comp. medicament. c. 8. difficile est , ut , qui homo sit , non in multis peccet , quædam videlicet penitus ignorando , quædam verò malè judicando , & quædam tandem negligentius scriptis tradendo. Nam 1°. ex textu senis nostri patet , quòd agatur ibidem de morbo , ad cuius diagnosin necessarium sit nosse , utrum capitis & præcordiorum dolores , tussis , vomitus , febricula , &c. præcesserint , id est , uno verbo de affectu , cuius causa est interna , non externa , qualis est hirudo , quæ aliis omnino indiciis detegi poterat. Et estne ullâ ratione credibile , Hippocratem prætermisurum fuisse certiora præsentis hirudinis criteria ? Atque cùm hirudo dicatur βδέλλα à verbo βδέλλω , quod significat exsugo , qui potuit Hippocrates oblivisci fuctus , quem Dioscorides lib. 6. memorat , in commemorandis hirudinis indiciis , ab imagine sanè fuctus ipse Cicero pulchrè l. 1. Epist. 13. ad Atticum , concionalem hirudinem ararii commemorat. Imò propterea ab Arabe quodam Damire apud Bochart. in hierozoico , hirudo definitur vermis niger aut ruber in aquâ degens , qui propendet à corpore , ut exsugat sanguinem. Et quid 2°. dicam de dolore , de quo testari potest & sensus eorum , quibus applicatæ hirudines fuerunt & vulnusculum in parte , cui adhærebant , relictum ? Et sanè non improbabile est , eas dentibus esse instructas , si vel maximè ad limacum eas censum retuleris , nam etiam cochleas dentibus esse instructas , testatur Martinus Listerus ex Hookii autopsiâ & Clar. Velschius in Hecathosteâ suarum Observat. 67. Nec nodi , quos hic texit Clar. Bonanni in recreatione mentis & oculorum part. 3. problem. 228. & seqq. sunt indissolubiles. Villanovanus illis fistulam tribuit , alii docent , quod os illis trianguli instar hiet. Sanè Plinius l. 8. c. 10. p. m. 497. testis est , quòd elephantes cruciatum maximum sentiant , haustâ hirudine. Sed nullam ejusmodi doloris mentionem facit Hippocrates. Aut si vel maximè abesset dolor , omninò æger frustum quasi carneum gutturi infixum , ut ille apud Borellum l. antea cit. , percepisset , sed altum & de cruciatu , & pondere tali in textu Hippocratis , silentium. Imò si textus Hippocratis accuratius inspiciatur , manifestum est , quòd in eo sermo sit de ejusmodi symptomate , quod per plures dies & noctes durat ; at fieri non potest , ut hirudo in alicujus faucibus per tantum temporis spatium hæreat , & ab eo , quem affligit , aut providis Medicis & Chirurgis adstantibus non agnoscatur. Certè intra horæ quadrantem , non mediocrem sanguinis quantitatem imbibit , & facilè etiam non magna sanguisuga ita distenditur sanguine , ut vel digiti magnitudinem adæquet ; cruore verò satiata spontè decidit. Quod & Horatius indicat de arte in fine canens : Non missura cutem , nisi plena cruoris hirudo. Hæc & alia , de quibus meretur consuli Marsilius Cognatus lib. 3. variar. observ. c. 2. satis evincunt , quod βδέλλα in loco Hippocrat. non significet animalculum illud reptile , sed in tropico sensu capiendum sit. Hic ut tantò magis innotescat , meminisse fas sit , quod sanguisuga sit animal oblongum , transversis lineis (vid. Jon-

ston. lib. 4. de Insect. tit. 2. p. 143.) *distinctum*, ore subrotundo ac veluti calloso & aspero, & ut benè Gesnerus, *moveatur extensione & contractione corporis sui ceu annulis constitutis*, sc., ut diu ante monuit Aristot. in lib. de animal. inces. c. 9. ἰλύσσωσις vermi & hirudini convenit; scribens alia (animalia) *volubili tractu utuntur, ut lumbrici, quos intestina terræ appellant, & sanguisugæ*; quàmvis, ut demonstrat Borellus part. alterâ de motu animal. prop. 13. *corrugatio illa non sit causa, sed effectus contractionis internorum musculorum*. Si itaque hirudines cum venis sanguiferis comparentur, manifestum evadit, quòd in non paucis conveniant. Ad unguem resecare omnia, à proposito nostro alienum est, & ut analogia rudior, ratione externæ figuræ, manu quasi palpabilis est, ita extensio ista, & contractio in utroque corpore non minus clarè patet, quandoquidem & venæ vi fibrarum (quas sine causâ in vasis reperiri negavit Vesalius in Exam. observ. Fallop. p. 129. & Clar. Ent. in Apolog. pro circulat. sanguin. p. 42.) circularium & stringuntur & comprimuntur successive, una enim pars post aliam comprimitur, ut sanguis agitated & conquassatus debite misceatur & confirmetur; conf. Borell. l. c. prop. 33. & 34. Sed præprimis etiam conveniunt hirudo & vena ex mente Hippocratis, ratione tractionis, sive suctionis sanguinis. Nam passim attractionem quandam legitur tribuisse venis, cumprimis evidens locus occurrit in lib. de carnib. ita sonans: *Venæ, quæ per ventrem & intestina feruntur, in quibus cibi & potus coacervantur, ubi hi incaluerint, id quod est tenuissimum & humidissimum attrahunt*.

Zwingerus in doctrinâ Hippocr. exactè versatus in Comment. p. 135. ita effert mentem Hippocratis: *tenuissimum & humidissimum, à venis mesaraicis ex ventre & intestinis, quæ supra jejunum sunt, ex ileo videlicet & duodeno ad hepar, ab hepate ad venæ cavæ propagines, in universum corpus trahitur*. Propter has aliasque Bdellæ cum venis analogias istius nomen ad hanc designandam transtulisse videtur Hippocrates. Major adhuc est similitudo inter βδέλλα sanguine distentam & venam varicosam seu dilatatam (einer schwarzzen auffgelauffenen Ader), quam etiam nomine hoc Hippocratem intellexisse quondam Dioscorides commentator teste Galeno existimavit. Et sanè nihil prorsus impedit, quin ejusmodi varices, sicuti in artubus, circa tempora, anum, uterum teste Paræo lib. 12. c. 20. in hypogastrio, genis, palpebris & mammis Heurnio Auctore lib. 6. Commentar. Aphor. Hippocr. oriuntur; ita etiam in ore subinde exsurgunt.

Ac notatu utique dignum est, quod Moebius fundament. Physiolog. c. 16. narrat, eas aliquando sub linguâ & inferioribus labiis cerni. Minimè verò novum est, quod ejusmodi distentæ & dilatatæ venæ spontè aperiantur, & sanguinem profundant, id quod in hæmorrhoidibus cæcis quoque, quæ nihil aliud sunt, quàm crispatæ venæ hæmorrhoidales sanguine stagnante turgidæ, & in varicibus sæpè compertum est. Confer. Ephem. Dec. II. ann. 3. Obs. 12. p. 51. & Dec. I. ann. 3. Obs. 104. Sententia ergo Hippocratis id vult, repleti aliquando fauces sanguine vase quodam sanguifero dilatato & sponte aperto, de quo

quo tanto minus est dubitandum, quantò est certius, sanguinem modò ex ipsis *cutis poris* stillasse, ut Benivenius, Tulpius & alii testantur, modò ex oculis *lacrymarum instar* fluxisse, ut perhibet Forestus, (& nobis recentissimum ante oculos versatur exemplum Viri senis literati sedentarii, sanguineo-melancholici, qui post subitaneum verticis dolorem tensivum ophthalmiâ oculi dextri correptus, cum aliquot sanguinis guttarum spontaneâ eruptione è cantho ejusdem oculi majore seu interno) modò ex saphænâ, modò poplitæâ in pede prorupisse, quod Schenkus & Ephemerides *Dec. I. ann. I. observ. 96. p. 197.* &c. asseverant. Hæmorrhagiam itidem penis spontaneam memorari videàs in Ephemeridibus Nostri *Dec. II. ann. 3.* Et sanè ita prorsus est, sicuti Celeb. Wepfer. in *observat. Anatomic. de loco affecto apoplexiæ* scribit: *Vasa sanguifera, tam intus recondita, quam externum habitum perreptantia, suâ sponte aperiri, notius est, quam ut probatione indigeat.* Vivit, ita pergit Wepferus, *nobilis quædam matrona 44. annorum, habitu corporis gracili prædita, facie rosæ ac cætera sana ac vegeta, huic ante 15 annos in manus sinistra pollicis extremi parte externâ macula atrorubescens, quam extremo minimi digiti apice ferè tegeres, aborta est. -- E medio hujus maculæ singulis annis ter quaterve sanguis cum saltu aliquot cubitorum altitudine suâ sponte, erumpit & quidem non parva quantitate &c.* Sic destillatoris novimus uxorem juveniculam summè plethoricam, cui venæ in pedibus varicosæ nonnunquam spontè rumpuntur, & copiosum, cum euphorîâ, sanguinem effundunt, imprimis tempore ingravidationis, & quando venæsectionis consuetæ terminum transcendit, eam ultra statum tempus differendo, aut prorsus negligendo. Quòd verò intra os interdum ejusmodi quid fiat, exempla evincunt. Apud Kerkring. in *Spicileg. Anatom. Observ. 25. p. 61.* & seqq. recitatur exemplum de Viro quodam sexagenario majori, utpote qui Kerkringium consuluerat, an Viri aliquando menstruis laborent? de quo non immeritò Auctor noster suspicatur, quòd quondam hæmorrhoidum periodos in se fuerit expertus. Is primò quidem per plures dies ejecit sanguinem, cohibita autem primâ istâ violentiâ sanguinis effluxus ei post mensem rediit, ac statas vices menstruas servavit, donec tandem fortè incongruâ medicatione, mense octavo è medio tolleretur. Hoc sputum sanguinis ipse Kerkringius non ausus est nominare hæmoptysin, quanquam sine dubio ex eo solo collegerit, Virum illum phthisi incepisse laborare, quod & hodie multis est solenne, imò ipsum hæsisse ambiguum, unde sanguis ille profluxerit, satis patet ex admonitione ad lectorem, quam huic historiæ attexuit. Et profectò non diffitemur, nos in eâ esse opinione, quòd noster sanguinis fluxus per os sæpius hactenus quidem observatus, sed sub nomine hæmoptyseos descriptus ut plurimum fuerit. Quantus enim sit vocis hujus abusus, nemini ignotum, adeò ut etiam *fluxum sanguinis ab hirudine insciè deglutitâ & in faucibus hærente, l. a. Borellus hæmoptoidem* vocet. Illustre verò affectus nostri sub nomine hæmorrhagiæ oris periodicæ paradigma prodidit Doctissimus Medicus Arnoldus Bootius in *observ. Medic. de affectibus omis. c. 7.* quod ferè totum huc

transcribere non pigrabimur: *Jacobus Usserius Archiepiscopus Armachanus*, 64. ætatis annum agens, jam à plurimis annis patitur bis terve periodicum sanguinis profluvium ex ore, ut plurimum in latere ejus sinistro duntaxat; nec ibi semper in uno loco, sed interdum ex linguae latere, aliàs ex gingivis, quandoque ex alterutrius labii aut buccæ parte interiore. Antea & dum junior erat, exiliebat quandoque sanguis tantâ vi ac copiâ ut in præsens vita periculum, inde conjiceretur, omnique valentissimorum remediorum genere tentato, agerrimè tandem restringeretur. Sed permulti jam sunt anni, ex quo citra ullum impetum, & guttatim tantum sanguis promanat, id autem fit assiduo absque ullâ intermissione, noctu æque ac interdiu, donec periodus absoluta sit, quæ nunquam minus uno die naturali, plerumque duos, aliquando etiam diutius durat. Initio aliquamdiu nihil non tentatum fuit, ut ab hoc symptomate liberaretur, sed posteaquam apparuit, corpus ejus huic evacuationi penitus assuevisse, destitit ejus suppressionem amplius moliri, monitus à me, eam cum inevitabili ipsius pernicie conjunctam fore, cum hoc profluvium in beneficium suum, olim converterit natura, eoque soleat à superfluo onere se liberare, quoties nimium increvit sanguis, humoresque ei permixti; quæ ratio, in quocunque corpore pondus habitura, magis etiamnum in eo prævalet ob peculiarem ipsius constitutionem, quippe naturaliter multo sanguine abundat, eoque præservando ac bilioso: prætereaque vix ullis exercitiis utitur, nisi concionandi singulis Dominicis, quod cum faciat singulari cum affectu & efficaciâ, corpus ejus mirum in modum inde afficitur, ita ut à singulis concionibus sudore totus madeat ac diffluat; Alioqui toto anno lectioni & scriptioni assiduo vacat. Eò autem libentius huic consilio acquievit, quia præterquam quod id sibi absolutè necessarium vidit, nec posse se jam absque exitio solenni hanc hæmorrhagiâ carere: nullum magnopere inde incommodum capit, nisi quod noctibus ac per somnum sanguinis, quem toto die continenter exspuere cogitur, aliquanta portio in ventriculum ex ore defluit: quod ipsum, aliis multis periculosum futurum, discrimine ferè vacat in ipso, siquidem natura, finitâ hæmorrhagiâ, solet omne id, quod in ventriculum, interea confluit, spontè expellere, eoque absque ullâ notabili corporis perturbatione, per inferiora se exonerare. Duo ejusmodi exempla rejectionis periodicæ sanguinis per os sibi notasse videtur D. Helwich, alterum in foeminâ, in viro alterum. Et foemina cholericæ in conjugio fecundo vivens quadragenariæ propior, citra ullam sanitatis labem aut mensium ἀταξίαν, vere & ultimo etiam æstate, & autumnò jam per aliquot annos sine prævio capitis dolore, falsedine in ore, aut catarrhorum indiciis, absque febre, nullâ comitante tussi ad hodiernum usque diem, aliquâ respirationis difficultate, aut præcordiorum dolore, sanguinem ex ore ejicit. Duobus diebus antequam status ille fluxus sanguinis erumpat, in palato titillationem post uvulam percipit, noctu autem ut plurimum sanguis sese in linguam infert non floridus, non spumofus, qualis in hæmoptysi esse solet, neque grumofus, neque talis, qualis ex venis hæmorrhoidalibus stillare suevit, cum screatu non magno, interdum simplici sputatione per quatrimum circiter ex intervallo drachmas

drachmas duas sanguinis reddit, deinde verò iterum sponte cessat. Vir 30. ætatis annum agit, & est sanguineo-melancholicus, quem anxîa formidine secuturæ phthiſeos medentes replevère, is in itinere Italico generosioris vini abusu 27 circiter ætatis anno hæmorrhoides provocavit, cum verò Medici magnas eidem ex fluxu tam maturo ominarentur misérias, nihil non egit, ut hæmorrhoides supprimeret. Damnatus est voti. Postmodum verò Nodo, ut quidam veterum vocant, & dolore circa os sacrum gravativo sæpius pressus, spasmis vagis & anxietatibus imò & lipothymiis, ut ferè solent esse repentinæ translationes cum his molestiis conjunctæ, exagitatus est. Deinceps inopinatò post uvulam dolore lancinatorio & ardore afficitur, qui tamen brevi transiit. Hinc prout timidus est, nescio, quæ sibi imminere mala ratus, tantum non exanimatus, cum die quodam sanguinem ex ore, sine tussi, cephalalgia &c. ferri videret ac continuaret per biduum sanguinis iste fluxus. Ad hunc compescendum variis irritò conatu adstringentibus usus est, nam quintâ jam vice circa illas Lunæ phases, quibus antehac fluxum hæmorrhoidalem est expertus, sanguinem per os nuper adhuc ante duos menses per 24 horas in magnâ quantitate reddidit. Nostro consilio iis jam utitur medicamentis, quibus hæmorrhoides pelli norunt practici, ut naturam ad pristinam excretionem hæmorrhoidalem vocet, & æger opinionem hæmoptiſeos exuat, incertum quo exitu. Fugit sollicitè motus corporis nimios, clamores, saltus, aromata, piperata, vini ingurgitationes, cibos falsos, acidos, acres, &c. Sed pathemata animi regere debite non potest, atque hinc incongruos motus in corpore excitat, eoque ipso intentioni nostræ obicem ponit. Sensus ille titillationis in priori & lancinatorius in posteriori omninò indicant tensionem quandam pororum & vasorum, & hæc præsupponit congestionem sanguinis, ut congestionem ipsam in aliis hæmorrhagiis fere pressiones spasmodicæ variæ præcedunt. Et si locus, undè sanguis effluit, visui pateret, omninò etiam turgescencia vasis in oculos incurreret. Et licet hæc, de quibus sermo est, personæ in mediocri tantum quantitate sanguinem rejecerint, non est tamen dubitandum, fieri posse, ut, si iracundia hæmorrhagiæ sese comitem jungeret, vel alio modo natura & principium agens exacerbaretur, aut nimium turgesceret sanguis, in enormi quantitate hinc profluere queat. Statæ autem istæ vices fluxus hujus facile falsi convincunt istam opinionem, quæ ejusmodi sanguinis fluxus aut fortuitæ stasi, aut obstructioni, aut massæ sanguineæ exæstuationi aliisque circumstantiis accidentalibus, quæ ad majorem quidem eruptionem aliquod momentum possunt fortassis conferre, transcribunt, & acceptum ferunt; contra eam, quæ destinatum hic naturæ consilium, ac intentionem minuendi pletoram hujus hæmorrhagiæ causam esse suspicatur, invictè roborat. D. Oehmb ejusdem excretionis sanguineæ exemplum notabile in quodam sanguineo, qui modo organa musica animat, se vidisse recordatur. Ille itidem absque ullâ tussi, aut concomitanti dolore sanguinem expuit; sed, quod itidem observatu dignissimum est, gargarismate ex adstringentibus parato, fluxus ille quidem cohibitus, enimverò large sanguis per vias urinarias effluxit;

fluxit; cùm verò & huic frænum injiceretur, secuta febris cum exanthematibus scorbuticis, quâ itidem dexteritate & vigilantia Collegæ nostri liberatus est. Nisi nos omnia fallunt, fluor ille sanguinis, de quo hætenus locuti sumus, ab Aureliano *lib. 2. Chron. c. 11. (p. 55. edit. Basil. 1529.)* his verbis describitur: *Is, qui ex supernis faucium sanguis fluit, primo parvus intelligitur ferri, aut, si plurimus, non spumofus. Præterea cum quodam excreatu despuatur, ipsæ quoque partes, sumpto cibo vel potu, aut gargarismate mordicantis materiæ dolore pulsantur, & insipientibus nobis expressâ linguâ visu lozorū probatur asperitas. Plerumque etiam, ut Erasistratus ait, tubercula, quæ Græci condylomata vocant, visibus occurrunt, quæ sunt similia hæmorrhoidis, ex quibus sanguis fertur.*

Excretioni sanguinis per vias urinarias, quæ sub nomine mictûs cruenti ferè nota est, varii à Medicis fontes tribuuntur. Non attinet prolixè commemorare, quod subinde in renibus causa lateat. Ita sexagenarius quidam ex vehementi saltatione in hunc affectum incidit, & licet huic malo occurreretur per V. S. & ∇. ferratas, nihil tamen effectum est. Imò post sesquiannum sanguinis plus minus per aliquot septimanas urinæ stillicidio, tumore ingenti & duro in abdomine contra renem dextrum, summo ardore in imo abdomine è regione renis ejusdem, venis abdominis externis ejusdem lateris varicosis & præter modum tumidis, habitu corporis leucophlegmatico, siti, vigiliis, coxendicum stupore & crurum imbecillitate, affectus vixit; ac licet quodammodò ex periculoso affectu respiraret, brevi tamen iterum in eundem incidit & post aliquot dies ex urinæ suppressione interiit. Hic æger cultro anatomico subjectus est, ac in cadavere deprehensus fuit ren dexter immensæ magnitudinis cancrusus ad 50. uncias pendens, atque in hoc plurimi exigui calculi apud Celeberr. Listerum *in dissert. medicinal. de calcul. hum. p. 22. & seqq.* Nec minus per urinæ ductum ex ureteribus sanguis prodire potest, uti comprobatur exemplum apud Steeghium *lib. 8. Pract. c. 41.* Ulteriùs quoque dubitari nequit, quin ex vesica sanguis erumpat, quod testantur Aetius *tetr. 3. Serm. 3. c. 3.* Paulus *lib. 3. c. 45.* aliique plures. Atque hinc consentienti suffragio approbatus est Hippocraticus aphorismus 75. *ex Sect. 4. Si quis sanguinem aut pus mejat, renum aut vesicæ exulceratio significatur.* Quod iisdem ferè verbis *lib. 2. c. 7.* Celsus expressit.

Meminimus in testibus aliquando observatos varices, neque rarum est, alterutrum laxiùs propendere, & unum altero esse turgidiorem; ac propterea prorsus non est incredibile, dilatatas venas hæc aliquando dehiscere & sanguinem eructare, eumque per urethram prodire. Quòd & ex ipsa aliquando urethrâ sanguis effluat, jam ante multa secula annotavit Aurelianus *lib. 5. Chron. p. 152.* Nec, quâ erant in indagandis abstrusioribus *angustia* antiquiores, intactum reliquere, fieri aliquando posse, ut à suppressione hæmorrhoidum mictus sanguinis oriatur, prout liquido constat ex Nicolo *Serm. 5. Tract. 10. c. 19.* Savonarolâ *Pr. tr. 6. c. 19. rub. 19.* Alexandr. Benedicto *lib. 24. c. 22.* aliisque. Atque hinc iterum Aurelianus *l. c.* testis est, *solere sicuti in podice,*

vel fœminarum sinu, aut matricis collo, etiam in vesicâ hæmorrhoides generari. Sed subinde maximæ difficultates in diagnosi partis affectæ sese produnt (conf. Celeb. Welschius *decad. X. conf. X. in Curat. propr.*) atque hinc omnino signa in enumerato habere necesse est. In renibus causam quærendam ait Aurelianus *lib. 2. Chronic. c. 3. quando sanguis multus collectim effluit*, cui signo Aurelianus dolorem in clunibus h. e. in lumbis l. c. adjungit. Prius illud Hippocrat. his effert verbis: *qui inopinanter sanguinem mejunt, iis è renibus venulam ruptam esse significat*; quibus verbis innuitur, renes esse læsos, quando sanguis mingitur confertim, uno impetu, largissimè, sine causâ externâ, de repente, absque ullo prægresso symptomate. Vesicam affectam arguunt 1°. lancinatio quædam perquam molesta circa vesicæ collum cum ardore. Id enim vesicæ læsæ signum Celsus *lib. 2. c. 7. pronunciat, si circa pubem interiores partes doleant.* 2°. Stillicidium urinæ, hujusque gravis odor, juxta *sect. 4. aphor. 80. Breviter τὸ πρὸ τῆς οὐρῆς laborant, si quis sanguinem aut grumos mejat, aut urinam guttatim emittat, dolore sese ad hypogastrium, seu peræctinam & perinæum, intestinum rectum & prostates extendente.* Et quoniam profluvium ejusmodi sanguinis calculum, qui asperitate sua, & acutie vasa lacerat, præsupponit, necesse est, ut concurrant *tempus* a illa, quæ calculum renum & vesicæ patefaciunt. Collum vesicæ locus affectus est, quoties dolor circa veretri initium sævit. Læsam autem urethram esse, constabit ex eo, quando sanguis paucus sine intermissione per notabile tempus manat doloreque urethra uritur.

Varices testium sanguinem plorare, dilatatæ venæ, oculis sese objicientes, & cæterorum signorum absentia manifestant.

Hæmorrhoides autem vesicæ sanguinem profundere ait Aurelianus *p. 153. cum non coacervata primo fit effusio, sed augmentis quibusdam promota, interjectis defectionibus: quando retento sanguine dolor pubetenus vexat, ac inguina & clunes, i. e. ilia, ac forte etiam testes, tenduntur, effluente autem iterum sanguine symptomata hæc omnia cessant.* Quæ signa pathognomonica tantò erunt certiora, si fluxus hæmorrhoidum consuetus antea fuerit suppressus, lapilli nunquam antea excreti, nec ulla ruptorum vasorum indicia præsto fuerint, & tandem, si ejusmodi fluxus periodos statas servaverit. Tùm enim certiùs concludi poterit, ejusmodi exclusionem sanguinis per urethram referendam esse ad hæmorrhagias, quas natura suo bono, non ruptis, sed hiantibus tantùm vasis instituit. Nec videtur statim de hæmorrhoidibus vesicæ cogitatio abjicienda, si in majori copiâ sanguis erumpat, quàm è venis ani uno cursu excerni solet. Nam etsi ordinariò non confertim ex hæmorrhoidibus vesicæ & ani exeat, quod rectè notavit Aurelianus, fieri tamen potest, ut magno aliquando cum impetu erumpat. Fœminis menstrua plerumque sensim stillatim fluunt, at quidnam in certis casibus fiat, fluxus mensium nimius, ipsis tyronibus notus, edocet. Atque hinc rectè Hercules Saxonia *l. 3. Pract. c. 40. refellit argumentantes à copioso sanguine excreto ad renes affectos, allato exemplo de Nobili Patavino, cui per 5 annos, ex intervallo, sanguis*

guis multus sponte & subito ex apertis colli vesicæ venis vacuatus fuit. Multoties hunc affectum videtur tractasse Doctissimus Casp. Hoffmann. nam *lib. 3. Institut. c. 97.* docet, *mictum sanguinis accidere iis, quibus copia peccat sanguis, iisque singulis mensibus hæc exire, ut videantur fæminarum naturam induisse.* Luculentum ejusmodi hæmorrhoidis vesicæ exemplum sub titulo mictus sanguinis copiosi, sine detrimento sanitatis proponit Nesterus in *Miscell. Nat. Cur. Dec. I. ann. 8. Observ. 23. p. 42.* Quid nuper nobis in praxi compertum fuerit, breviter recensebimus. Vir septuagenario proximus, temperamenti sanguineo cholericæ, cum venis turgidis & latis vitæ sedentiariæ deditus, victuique crassiori à teneris assuetus, eumque semper etiam in lautissimâ forte sectatus, à multis abhinc annis, fluxum hæmorrhoidalem semel iterumque expertus, ac, cum hæmorrhoides substitissent, in Podagram nullo atrociori dolore molestam lapsus, ac hoc quoque emanente, dysenterico fluxu, per aliquot hebdomadas, atrociter afflictus, tandem ante biennium sanguinem per urinæ ductum exclusit merum & crassum in notabili satis quantitate, absque omni dolore, gravitate ac tensione circa regionem renum, ureterum, vesicæ, ulloque alio calculi indicio, aut visceris alicujus labe, ac deinde per dies aliquot urinam, aquæ, qua caro recens lota fuit, non abfimilem reddidit. Ante annum iterum aliquoties, statis periodis, sanguis eadem viâ effluxit. Hoc anno seculi 18 primo tempore vernali insigni copia & copia sanguis iterum per menses septem certis intervallis prodiit. Circa Julium vocati fuere Medici, à quibus renes magnam exulcerationem minitari, ut fieri solet, in perplexo statu initio creditum fuit; adhibita varia (quanquam non satis constanter) absque ullo levamine. Succus urticæ, & decoctum equiseti, consilio nostro sumpta, egregiè se gesserunt, etiam tùm, cum mictus esset copiosissimus, & integras matulas mero, sine urinarum aquâ, & crasso sanguine impleret. At nimis citò ab usu salutarium horum medicamentorum, quæ sola certe, nihil quicquam proficientibus venæ sectionibus (quarum una sine Medicorum præscitu in pede celebrata ausu certè temerario) hirudinibus etiam frustra venis hæmorrhoidalibus debito tempore applicatis, exundantem sanguinis massam intra venarum canales coercere visa sunt, suo consilio destitit. Cùm fluxus ille cessaret fere per mensis spatium, nonnunquam vehementer angustabatur, eò quod grumi in vesica restitarent, his verò post topicorum usum, non sine dolore in pube & virgæ radice, ac dysuriâ, ut & tenesmo exeuntibus, facile sese recolligebat. At verò quia iterum cum impetu maximo prorumpebat, metus erat, ne in illo etiam sententia Aretæi 2. *Chronic. c. 4. sanguinis effluviū tametsi non admodum citò enecet, tempore tamen procedente infinitos jugulavit,* locum tandem inveniret, tametsi alias oraculi loco habendum illud Hippocratis: *Sanguinem mingere rarò quidem & sine febris ac dolore nihil mali significat, sed lassitudinum solutio fit.* Sanè pes ægri nostri sinister tumore magno distendebatur, collapsis insigniter viribus, & parum nuper, cum Barbitonforis consilio, (qui ne Æsculapio quidem ipso minor sibi esse videtur) fonticulum in tumido pede excitari curaret, à gangrænæ periculo abfuit. Accedebat

cedebat & hoc, quòd & in adhibendis medicamentis, non tam medicorum suafui, quàm suo obtemperaret ingenio. Id in nostro erat peculiare, quòd testium alteruter esset notabiliter major, & laxius dependeret. Tandem eodem anno, suppressione urinæ & gangræna vesicæ, postquam acidulas frigidas ingurgitasset, mortuus est.

In simili materia alia duo exempla D. Pauli proponit: Alterum in Puellâ decennali; alterum in viduâ nobili quinquagenariâ. Illi circa plenilunium jam ab aliquot annis superius oris labium intumescit, moxque infecuta ex hujus fissurâ tanquam arteriâ incisâ sanguis exsilire videtur; cujus effluxus antea prohibitus periodicam ophthalmiam attulit. In vidua jam à duodecim annis natura lunare tributum per hæmoptysin cum prævia dyspnæa, tensione hypochondriorum spasmodicâ, levissimâque tussi in magnâ sæpè quantitate persolvit, talique excretionem finitâ hæc optimâ valetudine fruitur.

Hæ similesque historiæ abundè demonstrare videntur communionem hæmorrhoidum cum venis vesicæ, & collo vesicæ implantari venas majusculas, quæ largiùs sanguinem fundere possunt. Certè minimè paradoxon est ex venâ hæmorrhoidali externa ramulum aliquem in collum vesicæ excurrere & eidem immergi. Qualem pariter ramum hæmorrhoidalem externum in illo affectu satis raro ad medium & summam offis sacri tumoremque singularem, sanguineo-varicosum quasi, in eo natum & connatum, ascendisse, quem D. Preuß hisce annis in recens natis quibusdam infantibus notavit, non ineptè suspicatur, quin & sequentibus demonstrare conatur. Nascebatur scil. Anno 1697. Novembri G. J. Pistori filiolus, 1701. Octobri G. K. pileorum formatori puella, & 1703, quo hæc scribimus, Augusto H. C. S. militi urbano gnatus, cum tumore in medio offis sacri circa basin latiore & fimbriâ quasi crassâ cutis veræ cuticulæque albæ latitudine digiti cincto, ad magnitudinem pugni, in hoc minoris, in alio majoris p. m. assurgente, de cætero molli, flaccido lividoque, transparente per cutem tumorisque tunicam valdè attenuatam sanguine quasi fluido & venoso, qualis etiam per hæmorrhoides externas tumentes cum & absque fæcibus dein prodibat, effluxuque suo tumorem prædictum notabiliter diminuebat; manifesto sanè indicio mutæ cohæsionis aut communicationis hæmorrhoidum cum intumescentiâ hac circa medium offis sacri, quæ & ipsa nil aliud esse videbatur, quàm tumor sanguineo-varicoso-ulcerosus, ad abscessus sanguineos seu sanguifluos M. A. Severini p. m. 170. 171. 172. & 179. *de recondita abscessuum naturâ*, à super-vomitu venarum æque ex venosis, quam parili ratione aliàs ex arteriosis vasibus oriundos, non incongruè referendus, natus forte ex compressione vel obstructione, hincque stagnatione & corruptione successivâ sanguinis venosi crassiusculi intra valvulas rami cujusdam hæmorrhoidalis externi, interstitium valvulosum illius venæ accumulatione suâ majori in majus spatium sensim distendentis, tandemque hinc inde perforantis, quemadmodum cum hydatidibus in amplissimos sacculos lymphaticos simili modo extensis fieri, in Ephemerid. nostr. Dec. 2. ann. 7. Ob. 141. p. 278. fusius deduximus, & ex Dolæi *Encycl. Chir. p. m.* 1248. 1249. ac 1251. pluribus addisci potest.

In Pistoris enim suprà dicti filiolo 1697.d. 9. Novembr. nato cum Paralyfi trunci corporis inferioris, pedumque, tumore isto in summitate ossis sacri brevi putrescente hincque aperto ichor cruentus foetidissimus effluxit, carie ossis subtus apparente, convulsionibusque tandem accedentibus, quibus etiam 18. Novembr. puer ille iterum extinctus est.

In pileorum formatoris puella 10. Octobr. in lucem edita, paralytica quoque quoad femora & pedes, licet consilio D. Oehmbii meoque, præter interna præcipitantia & confortantia, topica quoque nervina & putredini resistentia indefesso chirurgi labore applicarentur, corrupta successivè tunica tumoris, 16. ejusdem Mensis sub auroram is sponte ruptus est, profluente sanguine ichorode putridissimo, vesperi dein accedentibus convulsionibus, perseverantibus usque ad diluculum sequentis diei, finemque vitæ tunc imponentibus. Inspecto accuratius post obitum abscessu, tunica disrupta, in qua ichor fuerat contentus, apparuit alba crassa, uti venarum tunicæ solent, & in summitate in funiculum seu ductum quasi quendam venosum corrugata iterum coierat, per quem etiam mediante stylo usque ad interstitia musculorum ibidem & os sacrum descendere poteramus, in cuius quoque medio notabatur foramen magnitudine pisi minoris cariosum cum foetore summè putrido; nullibi tamen hic ulla penetratione usque in cavitatem intestini recti se exhibente, ut sanguinem itaque, qui & hic per anum simul prodierat, solis hæmorrhoidibus externis elapsum pateat. Militis urbani gnatum quod concernit, præterquam quod tibiis in crucis formam sibi invicem impositis, & anteriora ac interiora versus ad femora sursum flexis, pedibusque extremis introrsum seu ad latus internum contortis, ac una cum femoribus motu spontaneo prorsus destitutis, satis monstrosus 17 Aug. nasceretur, similem insuper, ac supra descriptus, tumorem in medio ossis sacri monstrabat, instar marsupii vel sacculi longitudine latitudineque palmi ferè propendentem, qui altero mox die vestigia putrefactionis & sphaceli maculis latioribus tum pallidis, tum lividis viridibusque tum etiam atris quibusdam ac foetentibus, hinc inde ostendebat usque ad fimbriam baseos superius intimatam, nunc valdè rubentem & inflammata; hinc exiguo vulnuscule in apice tumoris per lanceolam primitus inflicto, emanabant ichoris cruenti fluidique unc. ij. fermè, quo subsistente, ne pars sincera traheretur, tunica undique putrida, valde attenuata & transparens (post resectionem & corrugationem verò satis deinde crassa) usque ad fimbriam modò nominatam successivè amputabatur absque ejulatu notabili, columellæ verò ejus aliquot lymphatico - arterioso - venosæ à basi ossis sacri ad summitatem illius tumoris tunicæque usque protensæ, & huic firmiter connatæ, ligatura propè fundum majorum earundem cum filo duplici injecta, ne hæmorrhagia fortè nimia accideret, spatium aliquo supra vinculum dissecabantur, cavitate abscessus hujus stupæ (Corpey vocant) expleta, melle rosato cum essentia myrrhæ remixto imbuta, emplastroque defensivo desuper imposito. In cavo verò ulceris hocce apparebant etiam hinc inde tubercula livida varicosa, disparentia deinde, cum sanguis per hæmorrhoides & intestini recti extremitatem

tem flammea rubedine tinctam reliquis diebus prodiret, serum autem paucum ichorosum per abscessus prædicti sinus hinc inde prorumperet.

Suctu tandem ex paralyfi maxillarum quoque deficiente, (quam vocant *das Gläfen fallen*) postquam succellivè emarcuerat, vigesimoque nono Augusti sine ullis convulsionibus tempore matutino placidè obierat infans, viscera omnia sana (circa finem autem ossis sacri foveam ingentem) & vasorum prædictorum, venosorum imprimis in medio & radice abscessus excavati, continuationem satis amplam, supra os sacrum & tandem inferius *per ejus foramen* quoddam laterale, nervo destinatum, descendentem usque ad intestini recti extremitatem,prehendimus, ita ut nihil aliud viderentur, quàm propago quædam magna venæ hæmorrhoidalis externæ, quemadmodum D. Helwich exenterationi præsens una mecum distinctè intuitus est. Causa, quorum hætenus mentio facta, tumorum non fuit eadem. Pistoris enim & pileorum formatoris uxores nil aliud noverant, quod ansam pessimo huic & semper ferè funesti in osse sacro ominis phænomeno suppeditare potuerat, præterquam quod illa brachium aqua fervidissima combustum hincque vesicas ingentes in illo mox elevatas & exulceratas ancillæ; hæc autem tumorem lividum mariti (*eine blaue Beule*) ex contusione in tibia contractum, dum prægnans esset, abhorruerat manuque propria tractaverat, hinc verò, more gravidis solenni nec adeo semper laudando, s. v. natibus mox applicata, ut illic, non autem in locis conspectui magis expositis, foetus nævo hoc, sicubi horror & imaginatio fortè nociva, notaretur.

Militis denique uxor pedes foetus monstrosos terrori quidem à consimilibus in mendico quodam visis, tumorem verò prædictum supra os sacrum gravi cuidam tempore pentecostes sub uteri gestatione lapsui in posteriora & percussioni cum frusto ligni ingente procul dubio debebat; quibus non solum ex collisione foetus summa vertebra ossis prænominati aliqua, foveam superius intimatam constituens, introrsum magis acta, & spinalis ibidem medulla una cum nervis inferioribus, hinc necessario paralyticis, in maximas coacta angustias, sed ex tanta contorsione partium illic mollium nova etiam vasorum, aliquomodo sic laceratorum, divaricatio, ramificatio, & extensio tandem morbosa facile fieri potuit.

Parallela aliquomodo hisce exempla si cui volupe fuerit legere, adeat D. D. Burgii olim, Graßiique nostri, nec non aliorum quorundam observationes recensitas in Ephemer. nostr. imprimis Dec. 2. Ann. 5. obs. 69. pag. 157. & Ann. 6. Obs. 58. pag. 141. 142. 143. uti & D. 1. A. 3. O. 57. pag. 177. D. 2. A. 2. O. 158. pag. 363. & A. 5. O. 108. p. 431. & C. H. I.

Scenam hoc tempore ingrediebantur dejectiones dysentericæ, de quibus nihil novi à nobis observatum fuit, quàm quod in corporibus cacochymis, tum etiam quando symptomata remittunt, & scybala minus sunt cruenta, nec sedes adeò terminosæ, sed ad legem naturæ accedentes, nec non somnus recurrit, & denuo alimenta appetuntur, adeoque in portu ægri sunt, ex improvviso sequatur diarrhæa, quæ corpus variis

Diarrhæa
post dys-
enteriam.

humoribus repletum depleat, & ab eluvie repurget. Nihil sinistri portendit illa diarrhæa, sed, etiamsi vires aliquo modo dejiciat, firmiorem impostero sanitatem pollicetur. Ita morbi congeneres facile in se invicem commutantur. Notum enim satis est, quod sæpe *alvi profluvium* verbo Hippocr. *sect. 7. aphor. 76.* excipiat dysenteria, & hanc, ut aphorismo seq. innuit, iterum lenteria, vel, ut hoc anno non rarò visum est, diarrhæa.

Post propulsas ejus temporibus febres in diversis hinc inde corporis partibus, præsertim autem in volis manuum & plantis pedum (confer. Haffnerrefferi *Nosodoch. p. 156.*) reconvalescentibus epidermis discedebat, & quasi per squamas abradebatur, quam cuticulæ abscissionem in febribus jam olim etiam annotarunt Salmuthus *Observ. Anatom. Cent. 1. obs. 98. p. 59.* Lotichius *l. 1. c. 7. obs. 36. p. m. 90.* Platerus & alii, eamque malignitatis constituunt notam, quæ tamen in nostris febribus non observabatur.

Porri-
go.

Alias iisdem diebus multi ex egenis cacochymi deformabantur porrigine. Affectus hic cutaneus est, & , ut constat, potissimum derma capitis, paulò rariùs reliqui corporis, in tenues & furfuraceas squamulas citra exulcerationem faceffit. Et si quando posterius contingit, videas verissimum esse, quod Celsus habet *l. 6. c. 2. inter pilos squamulas illas surgere, & interdum madere, multo sæpius autem esse siccas.* Causa ejus rei videtur esse, quod verbo Foessii plurimi maximique pili nascantur, qua corporis parte cuticula rarissima est. Notus etiam est nobis, cui singulis annis in Julio & Augusto totâ sede ima inter clunes divisâ à podice ad perinæum usque primò rubedo & pruritus excitatur, & tandem squamæ succedunt furfuraceæ, & metus est, ne, quod alicui, teste Platero *l. 2. obs. p. 519.* evenit, malum serpat, & scrotum ac penem occupet, quod post morbum aliis contigisse constat. Pars illa, quæ in squamulas abit, est cuticula seu pellicula illa tenuis, quæ cuti cohæret, ac ab externis injuriis defendit. Conf. Willif. *de Medicam. operat. sect. 3. c. 5.* Cæterum quænam sit mali causa facillè patebit, si ad ea respexerimus, quæ cuticulam à subjecta cute separant. Præstant hoc admotus ignis, aqua fervens, phænigmi &c. hoc autem ipso satis edocemur, causam porriginis esse vel fordes acres & calidas cuticulæ à parte exteriori accrescentes vel ejus generis recrementa ex arteriis ad glandulas cutis & ex his per lymphæ ductus sive vasa excretoria ad cuticulam rejecta eamque partibus suis pungentibus & activis in squamulas resolventia. Nec sanè mirandum à fæculentiis talibus cuticulam pati ejusmodi decolorationem, cum admodum probabile sit, illam non tam ex fibris certâ lege contextam esse, quàm ex materia viscosa à subjectis partibus exhalante, & per compressionem corporum incumbentium, ne diffuere possit, coercita oriri. Id quod manifestè satis probat promptissima cuticulæ regeneratio: Nam illa ablata ferè eodem modo restituitur, quam pellicula in pulve, & decoctis viscosis, eam enim, si materia calenti detraxeris, alia ejusdem rationis subsequitur. Si autem cuticula ex viscosis, tenacioribus generatur, cur non ex recrementis, acrioribus, ferventioribus ac tenuioribus & facillè diffluentibus destrui posset? Tametsi autem longe melius sit, ejusmodi

acribus

acribus excrementis cuticulam, quàm interiora viscera in discrimen venire, negandum tamen non est, porriginem, quæ cutem foedat, haud fallax esse signum, quod corpus cacochymorum humorum colluvie redundet, unde Aëtius non malè à depravatis humoribus pityriaseos originem petit, cum quo etiam consentiunt Trallianus, Paulus & alii veteres. Nec immeritò lividi ac foetentes furfures à Gilberto lepræ aliorumque fonticorum malorum nuncii esse creduntur. Cura mali hujus in eo consistit, ut præparato corpore blanda catharsis instituat, & cum ipsa natura ad corporis ambitum fordes extruferit, & ulteriorem exclusionem per poros molietur, blandis diaphoreticis provide adjuvetur, ut & acres illæ partes per diuresin ex corpore eliminantur, tandemque & topica circumspectè adhibeantur. Nihil autem medicamentis proficitur, nisi in victu cibi durioris digestionis, fumo indurati, muriâ conditi, falsi, flatulenti &c. vitentur. Id, cum per inopiam egenis non liceat, non magnam ex remediis percipiunt utilitatem. Inter topica primum locum obtinent abstergentia non tam ea, quæ veteres adhibuerunt & à Foresto recitantur l. 8. in observationis 12^{mæ} Scholio, sed quæ ipse in Scholio seq. 13. observat, & Sebizius in Specul. Med. Pract. p. 239. & seq. commendat. Inter illa cumprimis placent ex herbis obrotonum, chelidonium majus, betonica, saponaria, quibus addere licet lapathum acutum juxta Dioscoridem lib. 2. c. 140. etiam scabros ungues curans, scolopendrium seu phyllytin Dioscorid. calamintham, quæ ex ejusdem Dioscoridis elogio l. 3. c. 43. nigras cicatrices dealbat & fugillata emendat, ac ex mente neotericorum inter cosmeticas plantas non est postrema. Ex radicibus elegimus rad. gentianæ, ari, & sigilli Salomonis; ex feminibus, foenu Græci & staphidis agriæ, ex leguminibus farinam fabarum, ex fructibus amygdalas amaras. His, si cum eodem Sebitio addideris flores cent. min. ex gumm. myrrham, ex succis aloën, & ex frugibus hordeum, jam sufficienter à præsidiis omnibus fueris instructus, nisi fortè aliquod oleum e. g. laurinum, rutaceum superpondii loco adjicere volueris. Possunt autem à nobis jamjam enumerata simplicia decoqui vel in vino, vel in aquâ, nec enim vel necessitas requirit, vel utilitas ulla suadet, ut muria & lixivii, nisi ægri fortè sint ex ima plebis fæce, parentur. Unguenta & emplastra minùs probamus. Cum solum caput furfuribus obsidetur, illud, ut optimè laudatus Sebitius monet, *primò radendum, deinde cum linteo asperiori fricandum, tùm topica usurpanda & maxime capitis lotiones.*

In hac ipsa æstate passim etiam audiebantur querelæ de doloribus artuum & infimi ventris. Crurum dolor potissimum multis infestus erat. Hunc alii tensivum, alii obtusum, alii mordicantem, alii autem pungentem & erodentem in profundo circa os experiebantur, qui in motu corporis graviter efferebatur. Alii dolorem hunc ita describebant, ut dicerent, malleolis sibi quasi crura contundi. Nec minùs brachia gravissimis torquebantur doloribus, qui non secus ac à lue venerea oriundi nocturno tempore ingravescebant. Alii per intervalla luctabantur cum doloribus & lancinationibus intestinorum intolerabilibus, qui ex-

Dolores
artuum &
infimi
ventris.

hibitis carminantibus & anticolicis remediis magis intendebantur. His autem aliisque variarum partium cruciatibus obnoxii illi erant, qui cibis crassis, salitis, pane non benè à furfuribus purgato, cerevisia crassa, turbida & fœculenta, aut vino nondum satis defæcato, vel nescio quibus mangoniis corrupto utebantur. Hic unicè antiscorbutica cum radicibus chinæ, sarsaparillæ, & lignis exoticis decocta aliquo modo ægris erant solatio, quibus ipsis etiam remediis sublevabantur ii, quos de languore, etiam nullo præfente morbo, lassitudine totius corporis cum aliqua oris siccitate conquestos esse meminimus.

Empyema
Pectoris.

Hoc tempore in Illustri Matronâ notabile empyematis exemplum fuit observatum. Illa in inferiori Germania, scorbuti sede, nata & educata, initio felici matrimonio, aliquos annos in vicina Silesiæ Marchia egerat, tandemque domicilium fortunarumque sedem, Vratislaviam cum generoso Marito, esse voluerat. Incolumi sanitate usa fuerat, à scorbutico molestias si excipias & mensium (absque noxa tamen notabili) per multos annos, suppressionem, ac hinc forte resultans ulcus pedis rheumaticum; sed hoc anno publicæ vacans devotioni, altera post Festum Trinitatis septimana, febrili insultu gravissimo opprimitur, qui cum summa respirationis difficultate & acutissimis puncturis in regione pectoris conjunctus erat. Aperta fuit vena, exhibita varia medicamenta, & res eousque perducta est, ut ægra videretur esse in vado. Sed ex improvise acerbis correpta doloribus, in magnum suffocationis periculum incidit, quod ei etiam fuisset funestum, nisi inter tussendum ex profundo thoracis purulentam materiam ad libras duas rejecisset. Hoc defuncta discrimine inter miras vicissitudines, præcordiorum anxietates, lipothymiam, frigus extremorum &c. vixit, hoc momento morti, propter suffocationis metum, proxima, illo autem iterum quasi ad portum delata. Deinceps dubiam & nunquam non nutantem sanitatem lacte caprillo sustentavit, donec ex febre hectica plane contabesceret & placidè tandem expiraret. Quemadmodum autem in hac ægrota purulenta materia per os rejecta fuit: Ita aliquoties compertum est, pus in pectore collectum per alvum fuisse vacuum. Scimus hoc in dubium à nonnullis vocari, eo quod ignoratur adhuc via, qua id fiat. At à temporibus Hippocratis illud à præstantissimis Medicis fuit observatum; tot autem seculorum experientiam in dubium vocare, non nisi stolidi & arrogantis hominis est. Nondum ad hunc usque diem clare explicatum est, quo pacto per asperam arteriam pus evacuetur, quod in cavitatem thoracis (*nam in pleuritide suppurata antequam rumpatur apostema, ac sese in thoracem exoneret, non improbabile est*, ut loquitur Celeb. Rivinus, *redire per venæ azygos ramificationes materiam illam in pulmones, atque tum supervenienti tussi vehementiori excuti per asperæ arteriæ canales*) effusum est, eò quòd vasa non in cavum thoracis, sed in poros musculorum intercostalium hient; (nam utut admodum sit ingeniosa Rivini sententia, statuentis, *pulmones in superficie perforatos instar spongiæ absorbere saniem, eamque ad arteriam asperam ablegare ad exspuendum, accedente inter tussendum, valido diaphragmatis motu versus superiora cum impetu materiam*

riam purulentam excutiente, non tamen ita comparata est, ut non iustis ex causis in dubium vocari queat) neque tamen invenies medicum, qui ambigat, pus in thorace fluctuans per pulmones cum tussi subinde excerni. Scilicet ut pulchre Jacobus Sponius, Vir longè doctissimus, in *aphorismis novis* p. 334. agens de pure in pectore collecto, per alvum exeunte, scribit: *Vias medicis invias reperit a'ulodisau' natura.*

Multi intensiore ætate constituti, circa dies caniculares, etiamsi nulla dysenteria aut diarrhæa essent correpti, assidua desidendi cupiditate cum torminibus quibusdam conjuncta vexabantur. Cum judicarem ab humore acri & tenaci affectum oriri, in subsidium vocavimus clysteres anodynos & humectantes ex decocto malv. sem. lin. frig. maj., ficuum c. sacchar., vitell. ovi, & sevo hircino, deinde verò iis exhibuimus evacuantia lenia, ex ∇ . laxat. vienn., syrup. Regio, de cichor. c. rhab. ol. amygd. d. rhabarb. &c. nec non ea, quæ humori acri demulcendo inserviunt. Cum hæc non adeò evidentem præstarent utilitatem, exemplo veterum confuginus ad balneum, à quo dolores solent sopiri, acri materia per cutis spiracula è corpore proscripita. Enimvero neque hac via datum est optatam contingere metam. Inde ab ascaridibus malum foveri autumantes, anthelminthica cum majori successu enematibus admiscuimus, eademque etiam in convenientibus formulis per os exhibuimus.

Nonnulli, præprimis autem obesioris corporis, & phlegmaticæ constitutionis, otio languentes, & cibum ac potum in nimia copia ingurgitantes, ac, ut fit, fructibus horræis corpus distendentes, experiebantur somnum perturbatum, non pauci etiam incubum vel ephialten. Notum est in hoc affectu respirationem impediri, ut dormientes metu suffocationis angantur, intercludi vocem, ut non nisi obscure sibillare queant, hebetari sensus, & ita affici, ac si moles quædam ponderosa thoraci incumberet. Multi de causis hujus suppressionis nocturnæ solliciti, multa commenti sunt, quæ commemorare jam non vacat. Nos potissimum ab incommodo corporis situ, qualis supinus est, ad alterutrum latus inclinans, phænomena illa excitari credimus. Scilicet extra controversiam est, quod diaphragma, cum majori ex parte, ut optimè Steno, & qui hic Steno- nis vitulo aravit Casp. Bartholinus in *lib. de Structura diaphragmatis*, ex musculis, quorum functio est motus localis, sit compositum, respirationis motui inserviat; nec minus indubitatum est, idem diaphragma in inspiratione cum contentis abdominis in homine tendere deorsum, in expiratione, ut optimè Diemerbrock, sursum cum inpetu tendi, & pulmones versus thoracis anteriora cedentes insequi. Uterque hic diaphragmatis motus non sit impeditus necesse est, quando absque impedimento spiritum ducere, aut clarum ac distinctum formare sermonem animus est. Enimvero in illo, quem innuimus, corporis situ, expiratio & motus versus superiora non est liber, quod facile patet perpendenti, musculum diaphragmatis inferiorem seu crassiorē suis extremitatibus tendinosus in vertebrae lumborum, earundemque processus transversos

Tenesmus
infantum.

Ephialtes.

versos terminari eo modo, quo adumbravit Bartholinus *de diaphr. p. 25.* & delineavit *in tab. 2.* ut & Clar. Verheyen *in Anatom. p. 235.* & isto, quem diximus, situ supino nimis extendi, ac hinc diaphragma sursum non posse propelli. Quod cum non fiat, diaphragma non contrahit pectus, pectus autem non contractum non premit inclusum aërem, nec aër pulmonum superficiem, atque hinc à vesiculis in tracheæ ramulos non debite depellitur, ac aër eliminatur. Inde autem & respirationis difficultas & vocis interceptio & sensus incumbens ponderis oritur, quâ de re alibi distinctius. Credibile autem est, pondus illud à distento per ingluviem ventriculo, cujus superius orificium fibris suis motricibus circularibus & inflexis diaphragma premit, augeri; quod etiam fit, dum motus chyli, cujus receptaculum tendines illi constringunt & constringendo promovent, interpellatur. Elucescit vero hinc, an, quod vulgò creditur, ægri falsò sibi imaginentur, quod thoraci pondus incumbat. Cognita autem vera incubi theoria, non est necesse, de therapeia sollicitè esse anxium, nisi quatenus repletio quodammodo, tanquam situs supini occasionalis causa & ponderis augmentum, evacuationem requirit. De reliquo omnes illi morbi æstivales, qui in superiorum annorum historia enumerati sunt, etiam hoc trimestri fuere à Nobis tractati.

An diebus
caniculari-
bus adhi-
benda sint
medica-
menta.

Quando Syrius ardet, multi præfractè usum medicamentorum apud nos respuunt. Doctis interdum in ore sunt illa Hippocratis, *libro de medicament. purgant. : Tempore æstatis à canis ortu per dies 50 vitare oportet & non dare medicamentum*; nec non notus Ejusdem aphorismus: *sub cane & ante canem difficiles sunt medicationes.* Sed hæc in Græcia locum habere potuerint, quamvis incertum, an difficultatem medicationum ex peculiari astorum vi atque influxu, an ex solo hujus temporis æstu immodico, pendere crediderit divinus senex. Apud nos sanè vires Syrii aut nullæ sunt, aut obscuræ, nec semper æstu exurimur tanto, qui corpus exsuccum reddere queat. Deinde de solis purgantibus loquitur medicinæ pater, quibus & ipsi libenter abstinemus, gnari, humores ad habitum corporis per sudorem fluentes, non tutò ad interiora duci, nisi necessitas exigat & ægritudo purgationem indicans incidat; si id enim fiat, nulli dubitamus exhibere cathartica, edocti, potissimam indicationem agendorum in morbis, non à temporibus, sed causis morbificis sumi oportere. Nam nisi id fiat, pereundum erit ægris, antequam tot dies (nimirum juxta Hippocratem 50, juxta Keplerum 35 vel 40, juxta Manginum 30, & quod minimum est spatium, juxta Argolum 26 à die 23 Julii ad diem 18 Augusti) præterlabantur. Confer. Doring. *de Medicin. & Medicis p. m. 252. 253.*

Constitu-
tio aëris in
mense Oc-
toabr. No-
vembr.
Decembr.

Initia Mensis Octobris blando calore grata sed plerique sequentium dierum, ventis, pluviis & variis aëris mutationibus horridi erant. In Novembri modo pluviae decidebant, modò nives. Et utut aura subinde esset satis temperata, nonnunquam corpora frigore rigeabant; hoc autem in Decembri erat intensius, præprimis circa plenilunium, at paulò post & intercurrentes nebulae & pluviae solisque jubar violentiam frigoris mitigabant.

Inter

Inter varios hujus temporis morbos, non rarò occurrebat gonorrhæa virulenta, quæ ut omni tempore Veneris amasios mulctat, autumnio tamen, qui exulcerationibus omnibus minus favet, inclementius sævit. Suas hæc de re meditationes D. Helwich fufius alibi edifferet, hîc tamen etiam aliquem hujus affectus considerationi locum dabimus.

Fundamenti vero loco hîc substernimus, gonorrhæam contrahi ex coitu cum infectâ sive ejusmodi muliere, cujus vagina uteri ulceribus serpentibus, sæpe etiam profundis cum multo saniei profluvio, nonnunquam tamen etiam solis pustulis foedata est. Diximus gonorrhæam contrahi ex cohabitatione, quando tum membrum virile à sanguine arterioso continuò affluente & corpora fungosa ac spongiosa turgesciente (eò quòd tonica musculorum mediorum contractione venæ circa os pubis comprimantur, ac compressione hæc sanguinis refluxus impediatur) tensum & erectum; tum propter hanc sanguinis stagnationem, & motum incalescit, patente nihilominus, urethra, ac hiantibus viis seminalibus. Quòd verò impurus pollutusque coeubitus gonorrhææ seminarium sit, ei rei argumento vel hoc est, quòd durante adhuc vetitæ Veneris palæstrâ, intra urethram sensu lancinationis, qui gonorrhææ prædromus est, libidinosi afficiantur, ac ab illo temporis, quo congressum celebrarunt, puncto haud rarò acrimoniam, quæ reddita urinâ etiam urethræ ductum adurit, & dolorem in erigendo pene, quasi is fune substringeretur, percipiant, qui tamen post tres septimanas sensim evanescere solet. Blasius etiam observavit gravitatem ad radicem penis cum quâdam intumescentiâ. Cæterum pervulgatæ res est notitiæ, quod post aliquot, quatuor, septem, sæpè etiam plures à congressu dies, prout mulier magis minusvè fuerit inquinata, & vir ad suscipiendum *μίσχυμα* aptus, materia subcitrina ac viridis putriformis, non rarò sanguine permixta, per colem elabi incipiat ac fluxus ille noctu & interdiu ad menses & annos continuet. Interposito spatio virus illud ex pene exiens, majorem putredinem ac acredinem acquirit, nisi idoneis occurratur medicamentis, unde urethræ excoariatio imò & totius corporis tabes ac marcescentia præcipuè circa lumbos, sequitur. Memorabilis præterea est dolor testiculorum spasmodicus, qui ab initio mali sese exerit, & macula parva rubra parùm protuberans, glandis partem occupans, tandemque in ulcus degenerans, quæ in oculos incurrit. Si minus utili consilio fluxus ille præmaturè supprimatur, dolores in lumbis & hypogastrio oriuntur, proximè ad illorum dolorum genium accedentes, qui à suppressis mensibus circa istas partes excitantur. Compertum nobis etiam, quòd non rarò, præprimis vegetos & succi plenos, febrilis horror & æstus sub noctem occupet, quod meminimus ante eruptionem fluxûs ordinariò contigisse.

Hujus mali subjectum sunt glandulæ illæ collo vesicæ adjacentes, quæ magnitudinem juglandis nucis ferè æquant. Has Vesalius glandosum vocat corpus, paraftatas Columbus, assistens glandosum Fallopius, corpus spongiosum variis glandibus infarctum de Graaf. *Per harum medium, verbis nominati Grafi, transeunt vasorum deferentium & vesicularum seminalium com-*

munes ductus, qui ad ejus ingressum coarctari attenuarique incipiunt, donec tandem subtilissimis duobus ductibus simul copulatis in urethram separatim terminentur. Patent præterea hæc etiam glandulæ in urethram poris quibusdam five exiguis foraminibus, quorum numerus non adeò exacte constat, cum Rolfincius 4. de Graaf ultra 10. in cadaveribus invenerit. Nec prætereundus meatus ille exilis à Clar. Majore detectus; quorum ductuum (hactenus memoratorum) orificia exiguis carunculis obturantur. Illam quoque observationem adhuc ab anatomicis mutuabimur, quòd membrana firmissima, quâ undique glandulæ illæ obvolvuntur, multas fibras carneas à vesicâ urinarîâ provenientes obtineat, & vasa sanguifera planè *insignia per externam corporis superficiem* excurrentia, atque hinc inde subintrantia, præter nervos accipiat. Hoc, quod hactenus rudi minervâ delineavimus corpus, subjectum gonorrhææ esse anatome docet; nec hîc audiendus Carolus Musitanus, qui saniosum hunc fluxum à solo urethræ nutrimento perverso derivat. Warthono contradicenti opponimus Wirfungum, qui in tribus cadaveribus gonorrhæâ extinctis in prostaticis vestigia ulcerum advertit, & Bartholinum, qui in omnibus ex gonorrhæâ mortuis vel ulcera, vel callum, ulceris præteriti signum, reperit, Riolanum, Blanckardum, qui ulcusculum in parastatis ejus, qui gonorrhæâ laboraverat, inventum esse testatur; ita tamen hæc adstruimus, ut non illibenter malum invalescens etiam ad alias serpere partes largiamur, præprimis vesiculas feminales, sed quod veræ gonorrhææ sedes sint, illud nec à Jungken, nec à Dolo demonstretur.

Num verò glandulæ duæ minores phaseoli parvi magnitudinem non excedentes, quas ad quartam circiter pollicis partem sub prostaticis utrimque ad urethram paulò supra spongiosum corporis bulbum sitas nuper admodum Cowperus in *Philos. Actis Anglican. Mens. Novembr. Ann. 1699. N. 258.* orbi manifestavit, etiam malo sedem præbeant, (nam dùm Auctor Clar. illas unicum esse focum hujus affectus vult propter coarctationem membranæ interioris urethræ à vicino sphinctere, in eo aliquid humani illum passum esse certissimi sumus:) tempori, quod antiquitas sapientissimum prædicabat, dijudicandum, meritò relinquimus. Eo certè ratio vehementer inclinât, si verum, quòd, dùm penis erigitur, aliqua liquoris quantitas in urethram ab iis affundatur, favet etiam situs, nec ulla prægnans, quæ contrarium suadeat, apparet ratio. Quo verò modo ex mente nostrâ gonorrhæa in prostaticis oriatur, quod maximè præsentis *œtatis* argumentum est, jam edifferemus brevibus. Initio nobis certum est, quod in impuro congressu cum infectâ, peni patratori ex uteri vaginâ tempore coitus multum incallescanti halitus aliquis communicetur, atque ille per ductus patulos, ex quibus semen elabatur, ac per poros paulo ante descriptos, ex quibus liquor prostaticarum extillat, apertos, ad corpus glandosum diffundatur. Halitum hunc esse salivæ naturæ persuademur tum, quòd natalem in glandulosis partibus agnoscat locum, tum, quòd prompte in colatoria lymphæ secedat. Quæ autem salivæ profapiæ sunt, fermentescunt facile, ut obvium exemplum est in salivâ, nam juxta Zassii experientiam

rientiam panis biscoctus & salivâ probè mixtus massæ farinaceæ additus, hanc fermentat, & jam in vulgus innotuit, quomodo apud Indos aliqua frumenti grana ab edentulâ anu comminuta & decocto injecta huic fermentationem concilient. Fermentelcentes verò halitus facilè corruptelam diffundunt, ut ex antecedentibus liquido patet. Res ipsa loquitur, quòd halitus ejusmodi exiguæ molis promptè cum humoribus confundatur ac propter exiguam quantitatem non facilè per colatoria ordinaria fecernatur. Talis verò halitus (quamvis mora aliquot dierum, ut diximus supra, post coitum intercedat) commixtus cum humore in parastatarum glandulis contento, iis labem suam promptè affricat, eos in motum concitat ac in agitationem ciet. Nihil autem in universo corpore occurrit, quo principium movens hunc virulentum halitum corrigere, ac in naturalem statum reducere posset; relictum ergo hoc solum est, ut iterum è corpore ejiciatur, & quidem viâ illâ, quâ ingressus, quippe quæ omnium brevissima est. Ad hoc præstandum copiosiori opus est humorum affluxu, ut halitus iis implicatus, & corrupti per eum humores abluantur & abstergantur; Ut vero copiosius humores affundi queant, motu tonico vasa ad vicinas partes tendentia constringuntur, eo fine, ut humores regurgitent ad vasa, quæ ad parastatas feruntur. Ecce verò, quod remedium ex naturæ intentione esse debebat, facilè in damnum vertitur; nam dum sanguis copiosius affunditur, inflammatio excitatur ejus generis, quæ in glande cernitur eorum, qui infecti sunt; partes enim aliquæ sanguinis in extremitate vasculorum stagnant, & ipsæ glandulæ adeo porosis & robustis fibris instructæ non sunt, ut stagnantem sanguinem in motum ciere valeant, sanguis autem ille extra motum relictus, præcipiti cursu ad dissolutionem mixtionis suæ devolvitur. Nimirum tenerrimæ sulphureæ ipsius portiones intestino motu à crassioribus divulsæ violente in omnes partes feruntur, & crassiores tandem etiam commovent, easque reddunt penetrantiores, ac in magnam cum ipsis acrimoniam fatiscunt, quæ acredo noxam suam in ipsas fibras propagat, undè fieri vix aliter potest, quàm ut vasa sanguifera iis immerfa arrodantur, & sanguineæ guttæ ex eorum orificiis excidant. Deinde sensim calore remittente, etiam aliqua coloris mutatio exsurgit. Hi sunt & inflammationis & puris veri fontes, ut nos arbitramur. Non imus inficias, satis magnam halitui illi venereo inesse acrimoniam, ab eâ tamen inflammationis originem arcessere prohibemur hac ratione, quod ne glans quidem, cui purulentia illa in coitu affricatur, statim post petulcum congressum, sed interpositis demum aliquot diebus inflammeretur, non aliâ sanè ratione, quam ipsi parastatæ, cum ea, quæ acrimoniam vellicante inflammant, sine morâ affectum hunc exerant; inflammationem illam comitatur febricula symptomatrica. His ita declaratis dicimus: materiam illam, quæ in gonorrhæâ effluit, i. esse purulentam, à plurimo sanguine ad prostatas affluente, & eò, quo delineavimus modo, in ichorem puri similem mutato; nam sanè nisi hoc esset, nullo modo comprehendi posset, quomodo ad tot annos tantum puris effundi queat, citra detrimentum ægrorum, qui, si modò acrimoniam cor-

rigant, durante etiam illo fluxu ad omnia rite sunt dispositi. Ex hac sanguinea corruptione putrilago illa nares feriens deducenda est. 2. Ajimus huic materiae purulentae admisceri lymphatico-serosam subfalsam, praepriis arrosis vasis lymphaticis, & hanc potissimum esse causam, cur corruptio adeo late diffundi nequeat, hac enim falsedine partes sulphureae, quae putredinem alias late diffundunt, absterguntur, imò humore hoc irretitae, tanquam vehiculo è corpore deportantur. Et à variâ lymphæ, quam sæpe acidam esse nemo ignorat, conditione pendere videtur diversitas coloris materiae, quae in gonorrhæa excernitur. 3. Addi his etiam debere liquorem illum, qui ex parastatis effluit in coitu, quivis etiam nobis non monentibus intelligit. 4. Eum in censum humor ille quodammodo viscosus è glandulis Cowperi stillans referendus est. Sane ex evacuatione ejusmodi humoris in urethra existentis ardorem illum quondam non malè deduxit D. Donipertius. 5. Addimus his etiam semen ipsum non tantum, quod Vesalius, cum dissecaret corpus glandosum hominis, qui involuntario feminis fluxu correptus fuerat, illud femine completum conspexerit, sed quòd motus spasmodicus testiculorum, qui in his ordinariò observatur, quemque sub nomine rotationis Sydenhamius delineavit, id nobis omninò persuadeat, qui scimus in convulsione & epilepsiâ non infrequenter ejici semen, quàmvis fortè potissima spasmodicæ istius testiculorum constrictionis causa sit intentio prohibendi, ne halitus ille noxius gyrum vasculorum, ex quibus testiculi conglomerati sunt, ingrediatur. Quòd enim id fieri soleat in metu corruptionis partium nobiliorum, quales etiam, ex Borelli judicio, testes sunt, docet strictura in facie, collo, brachiis & scapulis, imò nodi plexus glandulosi occurrentes in foeminis, quæ cancro mammaram laborant, cujus sanè constrictionis beneficio, quasi limites serpenti corruptioni ad notabile tempus ponuntur. Et sanè nisi semen ex testiculis ad vesicas feminales & parastatas in gonorrhæa affectis fluat, qui fit, ut ex repentinâ & intempestivâ gonorrhææ suppressione à vehementioribus adstringentibus inductâ, tumor (ex quo malè Warthonus aliique sedem gonorrhææ etiam testiculos esse colligit,) testiculorum sequatur? Sanè propterea intumescunt, quia feminis fluxus intempestivè restrictus est. Nec abs re Lowerus illam spinæ debilitatem, quæ in gonorrhæa laborantibus cernitur, inde deducit, quòd in progressu mali arteriæ spermaticæ succum sanguinis nutritium nimia & plus solitâ copiâ in testes deponant, qui in semen mutatus, justò majori quantitate per vasa deferentia ad vesiculas feminales fluit & inde dispensatur. Apparet hinc luculentè admodum naturæ sollicitudo, quæ ut miasma venereum ex corpore ejiciat sanguinem, lympham, semen congerit, ac hisce absterсионem & extrusionem molitur, ne fortè, quòd subinde fit, in toto latice sero-lymphatico fermentativa corruptio invalescat. Et ut hinc principii moventis providentiam agnoscas, tanto id agit studio, ut etiam vicinis partibus debitum subtrahat alimentum, à subtractione enim alimenti vicinis partibus debiti circa lumbos emarcescentia illa omninò deducenda est. Et quantâ non admiratione dignum, quod foramina, per quæ humores nominati in urethram exeunt

exeunt, ordinariò in statu sanitatis extra concubitum carunculis obturata, in gonorrhæâ fervet noctu diuque aperta, ne fortè ingratus hospes fugam capturus, portam inveniat clausam; si verò malo medentium consilio viæ hæe constringantur, alibi exitum quærit, cujus notabile exemplum reperitur apud Hildanum, quo fluxum hunc ad perinæum fuisse directum narrat. Cum verò ex tot humoribus constet materia, quæ in gonorrhæa excernitur, præprimis etiam purulenta & saniosa, mirum non est, acrimoniâ insigni pollere, unde tandem erosio urethræ pendet. Et fanè humor ille in gonorrhæâ effluens, chemico igni subjectus, quod à quodam factum recordamur, sal volatile præbet adeò corrosivum, ut vix aquis stygiis in vi causticâ cedat, & hinc mirum planè non est, penem quasi fune substringi, seu convelli potius, ut isthac contractione accerrimam illam materiam excutiat. Incurvationem illam penis ab inflammatione ligamentorum & muscutorum penis derivant nonnulli, non recordati, quod etiam ante inflammationem apicis glandis dolorificâ penis tentigine ægri crucientur. Urinæ fluxus impeditior aliquando est, propter affectas carneas membranæ parastatarum fibras, quæ originem vesica urinariâ trahunt, illis ergò afflictis, necesse est & hanc in consortium passionis trahi, ac in munere suo turbari.

Curam hujus mali, præprimis inveterati, satis arduam esse apparet, tum propter continuò erumpentem humiditatem, tum propter absorptionem membranaceæ glandularum harum tunicæ, quæ ægerrimè consolidationem admittit. Ipsa tamen ratio dicitur, quod si statim percepto, lincinationis, ab impurâ cohabitatione sensû, medela petatur, non commodius quàm per diapnoen exclusionem miasmatis tentemus, quæ diapnoica etiam locum habent jam præsentem parastatarum inflammatione; cujus quidem præsentiam ex urinæ ardore, & dolore penis in erectione non vane colligere licet. Hoc in statu drasticis miseros fatigare purgantibus non rationalis medici est, sed barbitonforum ac fatuorum empiricorum. Si verò, ut semper ferè fit, ad medici opem ab ægro, quem fluxus molestat, confugiatur, inconsultum prorsus est, vel exsiccantibus, quo nomine decoctum radicis staticæ, quæ caryophilli genus est, laudatum legimus; quem curandi scopum teste Velschio, Veslingius commendavit, vel purgantibus ad mentem Sydenhami, statim ab initio curam aggredi, id enim esset non sequi & adjuvare naturam, sed eandem impedire; supra enim diximus, quòd principium movens humores diversos, quorum quosdam aliis quasi partibus subtrahit, ad abstergendum & eliminandum virulentum miasma ad prostatas congerat. Optimum ergò & præsentissimum hîc consilium fuerit in initio fluxûs, diluentia, quæ lenem vim diureticam obtinent & abstergentia propinare, non omisis diaphoreticis. His per aliquod tempus ad excludendum miasma exhibitis, ad purgantia, pro affluxu lymphæ ad prostatas impediendo transire licet. Totus deinde curæ cardo vertitur in ulceris parastatarum mundificatione, ulteriori corruptionis inhibitione, noxii affluxus revulsione & demùm consolidatione. Et hîc quidem nullam, nostrâ experienciâ, ab internis cuidam spondere opem possumus, multò maxi-

mam verò à liquore balsamico antivenereo, per urethram injecto, qui per poros & ductus ad affectum locum illibatam virtutem diffundit, ac curam intra breve tempus absolvit. Destituet eventus omnes, qui cum Sylvio sperant opem à remediis spirituosus volatilibus, à salibus lixiviosis fixis, oleosis & pinguibus, aut cum aliis, à cantharidum infuso &c.

Febres erraticæ.

Porro inter communiores morbos erant febres, quæ nec statum tempus servabant, nec eodem modo semper invadebant, sed modò diebus singulis, diversis tamen horis; modò alternis, homines opprimebant, jam diurno, jam nocturno tempore ingravescebant, hoc die cum horrore notabili aut rigore, alio autem sine sensu frigoris paroxysmus ingruebat, hodiè immanis cardialgia molesta erat, cras ventris tormina affligebant, jam hoc symptoma, jam aliud miseros magis fatigabat.

In curâ obsecuti sumus saluberrimo Hippocratis consilio *lib. de ratione victus in acutis*: *Inconstantes & erraticos morbos curare non expedit, priusquam constiterint*, seu certum typum & periodum observaverint, quod circa 7. diem, hoc anno, evenire solebat. Nam tùm vel in tertianas vel in continuas degenerabant, & methodo convenienti curabantur.

Quartana febris.

Quartanæ quoque autumnalium, ut præteriti, ita & hujus anni morborum numerum augebant, ut solent morbi, qui focum in splene & vasis venæ portæ habent, quos hodie vel tartareos, vel melancholicos ab acido oriundos nominare moris est. Cessit plebejis quibusdam in cura quartanæ febris illa non malè, quantum recordamur, temeritas, quâ febricitantes subito terrore graviter percellunt, si vel sedes, ut fit, vel deinceps sudores copiosi, aut alia quædam evacuatio largior succederet. Nec methodus illa, quæ has per anodyna, præmissis lenibus evacuantibus febres tollit, inutilis aut inefficax deprehensa est, sed circumspectum requirit Medicum.

Stillicidia urinæ.

Præterea urinæ stillicidia, vel ab humorum ad renes per arterias delatorum acrimoniâ, aut, (quod vero similis nobis est) à renum ulcere oriundâ exasperabantur.

Trichiasis.

Notavimus eâdem tempestate in quibusdam Trichiasin, seu capillos unâ cum urinâ excretos, quos à renibus, cum crassâ urinâ excerni docet schola Hippocratica, secuta *l. 4. aphorismum 76*, & textum *ex lib. de naturâ humanâ propè finem*. Ejus autem generis excrementa, seu, ut impropriè loquitur Celsus, carunculæ exiguæ, quasi capilli, crassos indicant in corpore humores. Hi autem ipsi capillorum figuram induunt, non in venis, sicut credidit Galenus *l. 6. de locis affect. c. 3.* nec in renum pelvi, sed in illis tubulis exilibus, aut, ut ita dicam, fibrillis urinariis, per quas serum transcolatur, quarum figura, si Bellino, Borello aliisque credimus, ad filamenta illa producenda est aptissima. Ejusmodi autem urinam mingunt arthritici, ut *l. a.* advertit Hippocrates, & qui cibis duris & viscosis delectantur. Incidentia & purgantia leniora in hoc casu ad prævertendam renum noxam optimè conferunt.

Tabidi etiam pejus habebant, sicuti autumnali tempore plerumque con-
tingit, quod perpetuis aeris vicissitudinibus sanguis diversimodè afficiatur, &
ulcera pulmonum in deterius vergant. Et quid mirum humanum corpus eo

tempore deteriori esse loco, quo pleraque viventia, plantæ, inquam & ar-
bores multæ amissis frondibus, quasi succo nutritio destitutæ, exarescunt?

Grassabantur etiam iterum Ischiadici dolores, qui periostrum & membra-
nas, quæ locum affectum ambiunt, & innumeris nervulis refertæ sunt, ex-
quisitissimo dolore torquebant. Sed non facile fuit reperire, qui ex coxendi-
cum dolore in paralyfin ac tabem cruris inciderent.

Dolores
Ischiadici

Multi, qui cælo pluvio sub dio laboraverant, aut etiam in aquis, ac Ortho-
paludosis locis manuum opera exercuerant, difficili respiratione & orthopnæa
sine ronchis vexabantur. His non tam expectorantia, quam evacuantia diu-
retica & sudorifera conducebant.

Magnus etiam inter egenos epilepticorum numerus erat, & inter hos ali-
qui in tantum, vi morbi, prolabeantur stuporem, ut eos obbrutescere cre-
deres. Quosdam ex his melancholia exagitabat.

Epilepsia

Inter morbos illius temporis etiam recenferi debet Passio Iliaca, Passio Ili-
acæ aliquos horrendo modo afflixit. Tametsi verò Sydenhamius
p. 89. & seqq. satis accuratè symptomata enarraverit, nobis tamen
aliquod spicilegium reliquit, quemadmodum & nos aliis medicinam
facturis, forte etiam ipsam messem. Quasi complexus omnium sym-
ptomatum notatus in aliquâ cælibe provectoris ætatis, herniâ umbilicali ab a-
liquo tempore laboranti. Illa post consanguinei obitum nocturno pavore
concussa, mane inclementiori tempestate levibus induta vestimentis sub for-
nice in pavimento lapideo horam exigit. Corripitur dolore colico penetran-
tissimo, perfert, quia vehementer aversum à medicamentis gerit animum, au-
gentur cruciatus in immensum, tandem accersitur Medicus. Is enema inji-
ciendum esse monet, reluctatur ægra, elabuntur aliquot horæ, tandem ægrè
consentit. Inijcitur satis acre enema, at alvus tam arcta erat, ut ne flatui qui-
dem, multò minùs ullis excrementis pateret locus. Adeò verum est illud
Hippocratis de affection. cum volvulus corripuerit, venter durus redditur,
nihilque infra demittit; alvus quidem erat distenta ita flatibus, qui ad podicem
usque, ut verbis Aretæi lib. 2. de caus. & sign. morborum acutor. utamur, per-
strepebant, sed, ut diximus, ibi exitus intercludebatur. Imponebantur fac-
culi ex emollientibus parati, denuò clysmata adhibebantur, sed irritus erat la-
bor omnis. Singulis horis sæva augebantur tormina, quæ per integrum ab-
domen sese extendebant, præprimis tamen supra umbilicum erant planè into-
lerabiles. In hypochondriis quidem offerebat sese tumor aliquis, sed major
circa regionem umbilici spectabatur, ipse umbilicus in tumorem attollebatur,
& tangenti intestinum, ad modum chordæ, unde affectum veteres etiam
chordapsum appellarunt, convolutum apparebat. Tumor autem hic tactui
non cedebat, sed duritiem satis insignem præ se ferebat.

Hoc

Hoc in statu ferè per biduum erat constituta. Post hoc tempus per aliquot horas inanibus fatigabatur ructibus, & immuni cardialgia cruciabatur. Tanta autem aderat cibi nausea & tædium, ut ne odorem quidem esculentorum ferre posset. Tandem superveniebant vomitus, quo primo humores visciidi & glutinosi, deinde bilis æruginosa in admirabili quantitate rejiciebantur; postremò peristaltico intestinorum motu mutato etiam fæces per os egerantur. Omnia assumpta protinus, excepta limpidâ, quæ sola retinebatur, sine morâ etiam reddebantur. Tentata fuit variis modis repositio intestini prolapsi, adhibita fomenta ex decoct. malv., verbasci, melilot. violar., linimenta ex unguentis & oleis &c. Balneum autem vomitus manifestissimè augere visum est. Itaque in eâ sumus sententiâ, quòd, quando Hippocrates ipse met lib. 6. Epidem. sect. 5. loquens de promovendâ evacuatione, mentionem facit balnei (ut sc. citius evacuatio procedat) non nisi de catharsi per vomitum agat. Nam, ut optimè Prosper Martianus in commentario ad hunc locum, scribit: *Balneum humores sursum elevat evehitque ad partes superiores, quod partium superiorum turgescencia ex balneo attestatur, & quantum supernas evacuationes faciliat, tantum inferiores impedit & difficiliore reddit.* Nisi forte censeamus purgans ante ingressum balnei dandum. Nam ita in pistore quodam, qui ex nucibus avellanis avidè comestis, in pertinacissimam alvi obstructionem inciderat, balneum conduxisse recordamur. Cæterum nostræ agræ nihil quicquam proderant purgantia. Initium factum ab haustulo, quem nisi fallimur, commendat in casu 30. Cl. Waldschmidt & sic habet:

℞. ol. amygd. d. unc. j. mann. liquid. unc. jj. semis, vini Malvat. unc. j. Enimverò ex usu hujus vomitus fuere aucti, quos nec anodyna, nec alia medicamenta sistere potuerunt. Deinde progressus factus est ad purgantia *δρυσινωλίσσα*, quibus in forma pilulari etiam ex consilio Dolæi aliorumque adjecta fuerunt opiata, sed sine effectû, tandem exhibito medicamento cinnabarino, postquam jam 5 dies duraverat vomitus stercoreus, secuta est alvi apertio. Etiam si verò deinde alvus suo iterum fungeretur officio, nihilominus vomitus non conquievit, quasi volvulus degenerasset in choleram. Nihil hic theriaca, anodyna, tam interna, quàm externa proderant. Pugnatum fuit cum morbo iterum generosissimis remediis per aliquot dies sine magno fructu, donec & hujus symptomatis truculentia pulvisculo ex spec. confect. de hyacinth., pulv. absorb. Wedel. & grano uno vel altero nitri ac anodynâ debellaretur. At ne sic triumphum canere licebat. Mox succedebat febris cum singultibus, intentissimâ siti, vigiliis, præcordiorum anxietatibus conjuncta, ut de inflammatione intestini nullum superesset dubium, quam & prægrandis hypochondriorum ardor confirmabat. Deprehendimus etiam verissima esse illa Duretii comment. in Coac. prænotion. verba: *In ileo cerebrum quando adducitur in sympathiam stomachi, graviter in vomitione ex singultu vexati, non solum dementiæ, sed etiam convulsionis consecutio adfertur; nam & deliriorum perpetua aderant vestigia & inexplicabilis anxietas ac in diversis partibus spasmi. Redibat impotentia continendi ea, quæ ederat & biberat, & extimarum partium frigus.*

frigus. Urinæ mingeantur paucae ac tenues, tandemque cruciatui per mensem duranti mors colophonem imponebat. Merito autem de hac nostrâ adhibueris illa senis nostri l. 3. *Epidem.* verba : *servari non potuit, nec potis fuit quicquam opis adferri, proindeque tali sorte interiit.* Abhinc aliquot annis phosphoro artificiali, more Boyleano parato, magna in deobstruenda alvo in volvulo adscribebatur virtus, & sanitas illustrissimi cujusdam Comitis huic tribuebatur, sed collega noster quidam curæ cum aliis præfectus, re omni diligenter expensâ, gloriam servati ægri vino medicato, quod Dolæus in *Encyclopæd. Medic.* p. 511. virgini ordinavit, deberi hodiernum adhuc credit. Plebeji usum globorum plumbeorum æstimant, rati, quâ in re & medicos quosdam sibi habent consentientes, quod intestina in hoc morbo convolvantur, & gravibus ejusmodi corporibus, qualia globi plumbei sunt, convoluta debite explicentur. Si enim vel maxime intestina implicarentur, quod tamen qui fieri queat, vix apparet, nisi vel rupta, vel à mesenterio fuerint soluta, difficulter tamen concipi potest, à pondere globuli alicujus præstari posse, quod motu intestinorum & stercoris propulsione, quam natura molitur, in actum deduci nequit, hydrargirum absque scrupulo dari potest. Placet verò modus exhibendi Welschianus in *Curat. propr.* Dec. 7. Cur. 5. p. 405. & merc. crud. per alut. purgat. unc. iij. ol. amygd. d. unc. j. semis, pulv. sacchar. cand. alb. drach. j. bis tervè ægris hæc dosiis tutò datur.

Choleræ quoque tribus verbis meminisse integrum sit. Ex voto suc- Cholera
cedit in eâ curanda methodus à Sydenhamio usurpata. Is, ut notum est, pullum gallinaceum in tribus aquæ mensuris elixat, & aliquot decocti hujus admodum diluti cyathos ægro exhibet, imo & enemata ex eodem decocto admistis syrupis portulacæ & nymphææ admiscet eo fine, ut ventriculus quantitate hujus liquoris quasi subvertatur & volumina intestinorum ope clysterum elutrientur & hoc ipso acrimonia humorum ad debitam revocetur temperiem; hoc facto ad narcotica descendit. Verum hoc non ita festinanter censemus esse faciendum; nam meminimus, nondum sufficienter absoluto eluvionis penso narcotica fuisse exhibita, & hinc ægrum oculis captum, donec retusa anodynorum vi evacuationes iterum succederent. Præferimus autem hoc in morbo reliquis omnibus theriacam Andromachi in ∇. *carm.* quadam simplici, sed calidâ dissolutam & per intervalla exhibitam. Verum non ulla est necessitas, ut eluens hoc jusculum unice paretur ex pullo gallinaceo, cum æquè benè illud, quod ex carne vitulina confit, canalem alimentorum eluat, nec segnius sit, imò utrique; nisi fallimur, præferendum hordeaceum, quod veteribus Practicis fuit usitatum.

Plenus periculi & terroris affectus est catarrhus suffocativus, qui Catarrhus
sæpè intra 12 horas, aut diem naturalem, hominem jugulat, rarò autem suffocati-
vus.
ultra diem tertium extenditur. Adoritur autem hic ipse magnus & præceps catarrhus, ut à Mercuriali vocatur, homines succulentiores & humoribus refertos. Hi ex improvise hoc malo obruuntur. Nimirum citra ullam apparentem causam, in magnam respirationis difficultatem incidunt.

Adest dolor pectoris gravativus & stertor, (nam ebullitio spumescens respiratione, atque ejiciendi aliquis conatus ferè semper irritus, qui tussim in principio sese prodit, ab adstantibus observatur) graviter læditur vox & oratio, ac in magno suffocationis discrimine versantur. Pulsus ab initio celer est, deinde autem rarus & debilis. Præcipuè autem illa subitanea virium totius corporis exsolutio admiratione digna est.

Nam utut sensus & motus supersit, secus ac fit in apoplexiâ & in catalepsi, in quâ ut stipites & trunci decumbunt, nec respiratio cesset, quod in syncope contingit, vires tamen omnes fatiscunt, ac extreme debiles sunt à primo invasionis principio.

In hoc affectu motum thoracis admodum torpere, ipse sensus docet. Nec dubitandum, quin & motus pulmonum sit depravatus & eo ipso etiam sanguinis per pulmones propulsio impediatur. An autem affectus hic ab obstructione cavernularum ac vesicularum & pororum pulmonalium oriatur, sub Judice lis est; Nam si hujus sententiæ Patronos de causis hujus obstructionis differentes audias, crassitiem & visciditatem, ut & acorem sanguinis & præcipuè lymphæ accusari percipies. Et sanè negari nequit, quòd spiritus acidus, nitri, salis, vel vitrioli ad drachmas tres aquâ dilutus, per syringam in jugularem, aliamque venam injectus, sanguinem coagulet; coagulatus autem sanguis similia phænomena exhibeat, imprimis autem spirandi difficultatem, quæ in catarrho suffocativo cernitur, testibus Viris Celeberrimis Fracassato, Bohnio, Ettmüllero aliisque. At verò cum visciditas, crassities & acor multorum hominum, quos catarrhus suffocativus non obruit, humores inquinant, & in istorum humoribus, quos hic catarrhus suffocat, multo prius, quam illa strangulatoria suffocatio istos perimat, ut plurimum reperiantur, de aliâ causâ (quâ positâ sequatur catarrhus suffocativus) omninò non immeritò sumus solliciti. Nisi autem nos omnia fallunt, si ponamus pulmones flaccescere, membranas eorum & vesiculas enervari, nec tonicâ virtute ac robore ad laticem sanguinis propellendum concurrere, conceptu admodum facile erit, quomodo admissio sanguine ac lymphatico humore confertim irruente, nec vegete propulso, & respirationis difficultas, anxietas, stertor, interceptio sermonis &c. viriumque debilitas consequatur. Nihil ergò impedit, quò minus paralyticam pulmonum, ac forte etiam musculorum thoracis debilitatem tanquam catarrhi suffocativi causam proximam accusemus. Hinc autem dispalescit, quòd, nisi cæteræ circumstantiæ repugnent, curam sicuti in paralyti à V.S. exordiri fas sit, præmissa tamen, revulsione gratia, enemate acriori, cujus formulas Hoffm. in *M. M. c. X.* exhibet. Sanè probè adhuc recordamur, vix dùm celebratâ V. S. respirationem multò fuisse faciliorem quàm ante pertusam venam. Cucurbitæ scarificatæ segniorem edunt affectum, licet Harvæus illas vehementer alicubi laudet. Nec cum multis ex recentioribus, insuper habendæ extremorum frictiones & ligaturæ. Suus etiam locus meritò vesicatoriis relinquitur. Cæterum ex internis ea potissimum commendari merentur, quæ virtute & efficacîâ tonum corroborandi & humo-

humores resolvendi pollent, ac simul recessus ac anfractus corporis omnes vegetè penetrant. His verò dotibus, præ reliquis medicamentis, ornantur salia volatilia urinosa cum tincturâ salis tartari acriuscula, ut decet, remixta; & repetitis vicibus, dosi non magnâ, præprimis si æger sit plethoricus, exhibita. Laudant aliqui vehementer sperma ceti cum cerevisiâ calidâ vel aquâ hyssopi datum, alii extollunt gummi ammoniacum in aquis pectoralibus solutum, at in vehementiori malo expectationi non satisfaciunt, cum vi tantum resolvendi congruatum & coagulatum sanguinem polleant, nullo autem modo tonum roborent. Quod si febris, ut fit, quando non ita promptè catarrhus suffocativus cedit, superveniat, quæ ut plurimum vaga & inconstans est, à volatilibus illis urinosi maturè desistendum, & in locum horum surroganda sunt lenia alexipharmaca, absorbentia ac diaphoretica, nec non diuretica, atque abstersiva, interpolatis ad refocillandas vires, analeptici.

Quid verò de vomitoriis in curâ hujus affectus dicturi sumus? Profectò, nisi gravissimi in diætâ errores præcesserint, & manifestissima repletionis ventriculi indicia præstò fuerint, nemini fuerimus Auctores, ut Jonstono, Hartmanno, Hoefero, aliisque, qui eadem tanquam Deum ex machinâ afflictis rebus opem unicè allaturum venerantur, vacivas præbeat aures, nisi in præsentissimum suffocationis discrimen ægrum conjicere & loco soltri & famæ divitem convitiorum messem sperare maluerit.

Colluctati etiam sumus cum Anasarcâ, quam aliqui non malè vocant Oedema universale. Excipiebat autem hic affectus vel febres malè curatas, vel scabiem retropulsam, vel denique hæmorrhagias vel nimias, vel prorsus suppressas. Hic morbus vel subito invalescit, vel lentè & tardis gradibus procedit. Nimirum corpus sensim in tumorem assurgit maximè in facie, pedibus ac manibus. Ac pedes quidem cum asciticorum oedematibus ratione tumoris ac splendoris magnam habent convenientiam. Initio autem subtumidus ille corporis habitus ferè pallidus est ac pituitosus, quem leucophlegmatiam vocant, tumque oriri ajunt à pituitâ, gelatinam, verbo Sylvii, imitanti. Cedit iste tumor tactui, ac mollis est, & foveam à compressione relinquit, ac indubitatus est *humoris aquosi extravasati & intra musculorum interstitia, & carniū, cutis, glandularum, & membranarum poros aggesti*, ut loquitur Willisius, affectus. Atque hinc optimè Celeberr. Wedelius ait, *Anasarcam limitare aquositatem ad certum locum*, & propriè esse *aquam intercutem*. Leucophlegmatia tandem abit in anasarcam, in quâ tumidum corpus plus justo nitet ac splendet, nec tam diu, quàm in leucophlegmatia fit, impressorum digitorum vestigia servat. In hoc statu æger admodum est debilis. Conjungitur ferè ordinariò lenta febris. Pulsus parvus, creber & inæqualis est, urinæ autem crudæ & tenues. Anasarca illa, quæ febres malè curatas excipit, medicamentis febrim ipsam profligantibus optimè curatur, ea verò, quæ scabiei malè curatæ soboles est, requirit medicamenta scabiei expulsionem antiquitus dicata. Cum à nimio sanguinis fluxu malum originem trahit, balsamica & analeptica utramque faciunt paginam, contra in a-

naſarca, quæ à ſupreſſione ordinarii fluxus ſanguinis excitatur, aperitiva & emmenagoga cum judicio data optimè ſeſe gerunt. Cæteroquin, utut hæc hydropis ſpecies facilior ſit & nonnunquam diarrhæa ſponte ſuperveniente tollatur, ardua tamen ſic ſatis ejus cura eſt, ſcopus, ad quem etiam collimare decet, primarius eſt, ut aqua intercuſ quoquo modo abſumatur & evacuetur, ac provideatur, ne nova generetur. Fit autem evacuatio illa per purgantia, diuretica & ſudorifera. Ultima reliquis merito præferuntur, ſi abſque magnâ ſanguinis commotione ſudor elici queat. Et hîc ſanè balneorum lacônîcorum eximius uſus eſt, prout jubentur parari à Sebizio in *Manual. pag. 1262.* Non contemnenda de cætero in corporibus robuſtioribus formula ſequens eſt.

℞. Rad. enul., aſar., aa. unc. ſ.
 Herb. ſalv., eupator., cichor.,
 veron., cuſcut. aa. m. j.
 gran. paradyſ. drachm. iſ.
 mac. drach. j.
 Sem. Cartham., aniſ., petroſelin. aa. drach. iiij.
 Rhabarb. Alex. drachm. ij.
 Coqu. in vin. menſ. iiij.
 Colat. R. lib. iiij. adde
 Syrup. Byzantin. unc. iiij. M. F. Potio.

Ne nova autem denuo generetur aqua, providebitur exhibitis ſtomachicis & anticachecticis.

Coronidis loco addimus, determinatum fuiſſe à quodam ex Noſtris, eum non cenſeri poſſe impotentem, qui utroque teſticulo inſtructus eſt, & membro, longitudine pollicem, craſſitie verò digitum annularem æquante, ſi illud erigere, ſceminam inire, ac clauſtra virginalis ſepti reſerare queat, ac tandem ſemen emittere, præprimis, ſi cum arctâ aliquâ matrimonium inierit, quâ quidem in conſultatione Collega Noſter ſecutus eſt judicium Præſtantiffimorum Medicorum, tum aliorum, tum Fortunati Fidelis *l. 3. de Relation. Medic. cap. 2. Zachix lib. 3. quæſt. Medico-legalium Tit. I. quæſt. 7. Sinibald. in geneanthropiâ, &c.*

Dùm finiremus hanc hiftoriam, obvenit exemplum aliquod molæ paulò rarius D. H., cujus deſcriptionem addere non abs re fuerit. Vocabatur is ad mulierem dura egeſtate preſſam. Illa tribus, antequam conſideretur, ſeptimanis molem aliquam & ſarcinam ſatis gravem in uteri vaginâ ſenſerat. Imperita obſtetric, cujus opem imploraverat, non diſcuſſis circumſtantiis, ad excludendi conatus, quos pellentibus improvide datis medicaſter aliquis alebat, ſtrenuè ſolicitans, manus, ut hoc muliercularum genus eſt moleſtè officioſum, admoverat & corpus vaginæ cavitatem occupans vi protrahere tentarat. Irritum autem hoc officii genus, ſicuti eventus comprobavit, quamvis iſta violentiâ eo res fortassis perducta videri queat, ut maſſa ex ſinu pudoris ad tres circiter digitos propenderet. Narrantur illi hæc, advolat cum duobus aliis

Do-

Doctoribus, ad quos fama insolentis casus pervenerat, ac quæ relata erant, vera esse deprehendit, massa illa pendula ex parte sphacelo jam erat corrupta, ac cadaveroso, quem spirabat, odore, naribus admodum infesta. Re tamen, quoad fieri poterat, diligenter exploratâ, chirurgo emortuæ partis separatio demandatur, ne putredo altius serpens vicinas partes corripiat & inquinet. Dùm ille tergiversatur & in perficiundo opere difficultates, ut fieri amat, ubi spes lucri veterum non excutit, varias obvertit ac tricas movet de utero in consortium mali tracto (cum tamen, si Nicolaum Fontan. *in analectis* p. 62. audias, ille integer, si sphacelatus sit, abscindi queat:) diris cruciatibus confecta diem obit. Apertò cadavere apparuit uterus undiquaque distentus. Magnam cucurbitam & profunditate densitateque & amplitudine referebat. Longitudo ejus ferè cubitalis aut sesquipes erat, latitudo autem circa fundum & spissitudo, ut ex filò circumjecto patuit, sex palmos excedebat, pondere autem novem libras, quarum in vitâ civili usus est, pendebat. In uteri hujus cavitate massa carnea concreverat, quâ intimæ illius membranæ, quam aliqui nervosam appellant, pertinaciter adhærebat, imò ut verba, quibus Olaus Borrichius in Sarcocoele describenda in Act. Hassn. Vol. 1. observ. 97. utitur, mutemur, *non tam annata quàm innata videbatur*, ita totam hanc membranam ejusque vasa omnia materiæ novæ accessu nec minus cavitatem cervicis oblongam ejusque partem inferiorem, quæ propriè osculum internum dicitur, exacte infarciebat. Postquam his angustis caro illa egressa esset, iterum sese in majorem amplitudinem diffundebat & cavum vaginæ exactè, citra hujus dilatationem, replebat, plane ut consultò ad hujus figuram structa caro credi posset. Massa illa informis, quæ in uteri cavitate deprehendebatur, cum ipso utero, ut dixi, magno adhæsu & pertinaci conjuncta erat; hæc autem, quæ in vagina erat, caro, cum ipsa vagina in similem naturam non coiverat, nec eidem accreverat, id quod obstetrici imposuisse videtur, ut de educendâ manuum ministerio massa consilium caperet & manibus admotis exclusionem moliretur. Hæc autem laxior cum vagina hujus carnea molis conjunctio causa fuit, quod fluxus urinæ non fuerit interceptus, sed lotium guttatim extillare potuerit. Anceps autem D. H. hæret, an hujus sarcomatis pars propendere eo cœperit, quod aberrans natura non feriretur ab augendâ mole per appositionem à fluido interno (ad hujusmodi productorum classem, de quâ Steno *de solido intra solid.* p. m. 37. aliqua monet, molæ saltem quoad incrementum referendæ sunt:) donec in eam extenderetur magnitudinem, ut cancellis vaginæ coerceri non potuerit; An quod ab violentâ rudique obstetricis manu massa illa immodestiùs esset tractata? Nihil certi quidem ex ægra hâc de re explorare licuit. Cùm transversum mola hæc dissecaretur, in meditullio ejus cavitas (tanquam rude uteri vestigium,) quam Lamswerde etiam in tumore scirrhuso, qui vices uteri explebat, conspexit, ut ipse testatur *in histor. molar.* p. 14. apparebat. Cæterum tota mola massæ carneæ fibrosis gyris distinctæ similis reperiēbatur. Adeò dura non erat, atque hinc subit mirari, quòd Plinius *lib. 7. Nat. Hist. c. 15.* secutus, ut vero simile est,

Aristot. *lib. 4. de generat. anim. c. 7. & lib. 10. de histor. anim. c. 7.* in definitione molæ addiderit, *eam ferri ictum & aciem respuere.* Color illius magis ad rubrum vergebat, odor erat cadaverosus, tota verò moles hæc informis carni & densitate & humiditate non erat absimilis. Ab accuratiori examine D. Oehmb & Helwich intolerabilis foetor avocavit. Mulier, quæ sarcinam hanc gestavit, ab ultimi puerperii, quò ante 10. annos defuncta erat, tempore, semper causariâ fuit valetudine. Ante lustrum alii juncta marito fuit, dum autem ei menses sistuntur, abdomen intumescit, mammae sororiantur, cibi urget fastidium & ventriculus subinde ad vomitum laceffitur, utero sese gere credit. Post aliquot verò hebdomades hæmorrhagiâ uterinâ, quæ per quatuor annorum intervallum frequentissimis periodis recurrit, correpta est, ac indies sanitas ejus deteriori cœpit esse loco, quod ex facie discolori, dejecto ciborum appetitu, œdematosô pedum tumore, ventris duritie, anhelitus difficultate &c. facile intelligi potuit. Crebræ eæque flebiles de gravissimis & acutissimis in abdomine puncturis querelæ ejus auditæ fuerunt, ut videas vel ex hóc exemplô, puncturas non male à Cl. Cratone peculiare molarum signum constitui. Plumbeo etiam pondere in imô ventre sese vehementer fatigari, ac uterum suum ad excutiendum foetum mendosum irritari, aliis mulierculis sæpissimè facta est.

Non rarò præterlapsis his annis Vratislaviæ contigisse meminimus, ut mulierculæ ægrotantibus gravidis adstantes & medicos alios & nosmetipsos etiam in non adeò periculosis prægnantium morbis, monuerint, perpendendum esse, annon è re sit maturè moliri foetus exclusionem, ut mater salvetur; nam hæc in re non exiguam sanitatis spem illæ collocant. Loquacioribus in ore est ab arboribus & ramis, jam olim à Theodoro Prisciano usurpata similitudo, quam procaciter urgent ad tædium usque, ut foeminæ vehementer cupiunt, quæ cupiunt, ingeminantes: arborem conservandam esse, quicquid etiam agatur de ramis, & quicquid etiam de fructu fiat. Tuentur etiam opinionem hanc suam auctoritatibus & exemplis Medicorum, quos hæc in re, non adeò difficiles fuisse causantur. Et certum est, quòd frivolis etiam de causis abortum veteres non nulli Medici censuerint provocari posse. Avicenna in *lib. 3. fen. 12. c. 12.* licitam censet procurationem abortus, *si sit mulier tenera, & partus laboribus sustinendis impar judicetur*; quasi non satis constaret, multas in tenerimâ ætate peperisse, sicuti patet ex Plinio *l. 7. c. 2.* Arrianô *ver. Indic. c. 174.* Sigism. ab Herberstein *p. 104.* Aug. Busbequio in *epist. 3. de Legat. Turc.* ac itinerariis multis. Aetius *Tetrabibl. & serm. 4. c. 16* foetus corruptionem non obscure suadet, quando *uterus foetæ parvus est, aut collum uteri angustum, aut intra se condyloma habet*; Cum tamen à nullo hactenus medico fuerint parvi uteri ulla, quantum scimus, observata indicia aut signa. Alii pharmaca *εὐπρία* concedunt, *si vesica debilis sit, & ex incumbente utero pleno ejus metuatur ruptura*, cum iterum ex nullis tecmeriis vesicæ debilitas colligi possit. Multò securius negotium expulsionis aggrediuntur nonnulli, quando foetum debilem esse ac moriturum augurantur, quasi non sæpè Deus sospitet,

tet, quos Medici morti addicunt; & non quotidie experiamur, vera esse illa Averrois verba: *Sanantur interdum ægritudines, quibus nec Medicus, nec natura videbantur ad curam sufficere.* Nostro tempore & potissimum apud nos agitur quæstio hæc de expellendo foetu, cum gravida morbo acuto corripitur. Ventilarunt illam præcipue Theologi morales, ac non uno modo eam definiverunt. Passim recepta est sententia Thomæ Sanchez Cordubensis Theologi è Soc. Jes. l. 9. de S. matrim. Sacram. disput. 20. ubi contendit, licere prægnanti Medicinis uti, & Medico eas applicare etiam cum abortus periculo, quoties mater periclitatur, & ea ad salutem necessaria sunt, modo non directe ad foetus occisionem tendant, in unico autem casu lethaliter peccare contra charitatem & prægnantem medicamenta assumentem, & medicum applicantem, ubi spes probabilissima à peritis Medicis concipitur, fore, ut matre ab iis medicamentis abstinente cum vitæ tamen propria periculo foetus in lucem prodeat, ut baptizari possit; ea autem assumente pereat foetus baptismo minime recepto, quod ordo charitatis adstringat unumquemque & præferendam vitam spiritualem proximi propria corporea. Placuit illa decisio etiam Paulo Zacchiæ in quæst. Med. legal. lib. 6. tit. 1. quæst. 7 N. 16. p. m. 503. Argumenta, quibus utitur ad confirmandam sententiam suam Sanchez, sunt communia, quod actiones humane bonitatem & malitiam habeant ex eo, quod per se est in operantis intentione, non autem ex effectu per accidens subsecuto; quod per accidens ac præter intentionem occidere nulla sit culpa, ut, quando in bello justo comburitur civitas tormentis aut igne admoto, in quâ multi sunt innocentes, ut infantes &c. quia invadente fera mater fugere potest, etiam cum abortus periculo &c. Hanc sententiam arbitrantur aliqui esse securiorem, cum foetus nondum est animatus, & verbo medico *ἡγούσας* sequitur, præprimis cum juxta illud (quod tamen ex Christianis vix admiserit quispiam) vulgatum: *Non est homicida, qui abortum procurat, antequam anima corpori sit infusa.* Conf. Franc. Torreblanca in Epitome delictorum lib. 2. c. 43. p. 311. sed nihilominus merito dixeris, illam sententiam esse securissimam omnium, quæ negat ullo modo, aut ad ullum finem, etiam ad servandam matrem, licere foetum expellere, quam ex medicis defendunt Mercurialis lib. 2. de mulier. morb. c. 2. Silvaticus in controuv. Medic. Controuv. 82 Codronch. l. 1. c. 22. Rodericus à Castro, Joan. Henricus Meibomius & alii. Fortassis autem etiam imposterum alii nostri ordinis eandem nobiscum sequentur opinionem, ubi rem paulò accuratius perpenderit & ex medicis principiis dijudicare cœperint. Nobis quæstio illa, an in febris acutâ gravida medicamentis liceat foetum pellere, ut matre in vitâ conservetur, alias quæstiones consideratu dignissimas vel præsupponere, vel involvere videtur. Inter quas 1. est, an dentur revera medicamenta, quæ infallibiliter foetum abigere possint? Nam si talia Medico fortassis ad manum non sunt, temerè ad ejusmodi finem alia remedia gravidis obtrudi prudentia medica dictaverit. 2. Si autem aliqua *εμβλαστικὰ*, quamvis non in rigore ita dicta reperiantur medicamenta, secunda exsurgit quæstio, cujusnam generis illa sint, & quomodo

modo operentur ? Nam si fortassis nimium calida fuerint , aut operationis nimis vehementis , sine dubio religioni sibi duxerit Medicus æstuantibus illa infundere visceribus , & ignem addere igni , ac vires dejectas magis magisque suppressere. 3. Quæritur , *quanto temporis spatio abortum procurare queant ?* si enim aliquot dies usui horum medicamentorum impendendi fuerint , Medicus conscientiae suae rationem habens , merito angetur & trepidabit , quod per tempus notabile præcidatur sibi occasio exhibendi remedia febris acutæ opposita , dum pellentium usui sibi inhærendum censet. Quarta verò quæstio est , *an abortus fortassis insequens occasio possit esse , aut causa ullo modo , ut febris acuta & citius & tutius & jucundius postea tollatur ,* sin illud fecus habet , imprudentia & impietas summa est , abortum procreare , ex quo nulla ad ægrum redundat utilitas , imò evidens fortè damnum. De his itaque quæstionibus tria nobis addere verba ex indulgentiâ lectoris integrum esto. Quantum itaque ad primam quæstionem attinet , ea apud plerisque est extra controversiam , imò fortassis de illâ dubitare velle , hodiè censeretur fere piaculum. Nam & civiles & Ecclesiasticæ leges illam tanquam certam præsupponunt , ac gravissimas exhibentibus & fumentibus ejusmodi pharmaca poenas irrogant. Nota sunt Ulpiani illa verba : *Mulierem , si visceribus suis vim intulisse constiterit , quo partum abigeret , à Præside Provinciæ in exilium exigendam.* Paulus adhuc graviori subjicit poenæ , & summo supplicio affici debere sanxit , *si mulier , aut homo eò perierit.* Augusti verò Imperatores , Valentianus , Valens & Gratianus *piaculum infantis necandi aggressos supplicio capitali puniendos censuerunt.* Nec minùs canones Ecclesiastici severè hoc facinus prohibent , & iisdem poenis Ecclesiasticis afficiuntur , quibus olim homicidæ afficiebantur. Synodus Constantinopolit. sexta can. 93. expresse decernit , *tàm eas , quæ propinant , quam quæ assumunt abortiva , homicidarum poenis subjiciendas.* Sixtus V. in bullâ , quam anno 1588. promulgavit , decernit , *ejusmodi homines puniendos ut homicidas , qui deliberatum homicidium reipsâ perpetrarunt.* Nec minùs alii ex S. Patribus hâc de re in eundem sensum loquuntur. Nota sunt illa S. Augustini : *Nulla mulier potationes ad abortum accipiat , nec conceptos aut natos occidat &c.* Admodum significanter Tertullianus lib. advers. gentes scribit : *Etiam conceptum utero , dum adhuc sanguis in hominem delibatur , dissolvere non licet : homicidii festinatio est , prohibere nasci , nec refert natam quis eripiat animam , an nascentem disturbet.* Ex Philosophis quoque Aristoteles in eâdem fuisse sententiâ videtur , quod medicamenta inveniantur , abortum pro lubitu scientia , id quod colligitur ex illaudabili ejus consilio l. 7. Politic. ubi suadet , ut , *si conjugibus plures liberi , quam legibus definitum est , nascantur , priusquam vita & sensus inferatur , abortus fœtui inferatur.* Poëtæ etiam eâ de re ut satis certâ loquuntur. Apud Juvenalem Satyr. 6. *foeminæ divites & luxuriæ deditæ reprehenduntur :*

Quod

*Quod jacet aurato vix ulla puerpera lecto,
Tantum artes hujus, tantum medicamina prosunt,
Quæ steriles facit, atque homines in ventre necandos
Conducit.*

Denique ipse Medicorum Parens, Hippocrates, in jure jurando vult Medicum quemque in hæc verba jurare: *Nec mulieri pessum ad fœtus corruptionem subjiciam*, h. e. si credimus Scribonio Largo *epist. ad Jul. Callistum*, medicamentum, quo conceptum excutitur. At verò, ne quicquam dissimulemus, hic locus quidem frustra adducitur. Nam omninò hîc Hippocrati sermo est de supposito, quod intra finem pudoris recipitur, quod ab aliis *ἐγκολπισμός* vocatur. Nonnulli etiam *πριαπίσκον* vocant; ab Aureliano *lib. 4. chronic. c. 7. βαλανός* nuncupatur. Et vix dubium est, quin pessus Hippocratis sit *hebes ille uncus* Tertulliani *in lib. de anim. c. 25.* quo *totum pecus* (veteres, quicquid non erat homo, pecus vocabant) *attrahitur violento puerperio*; aut inter tela Ovidii *l. 2. amor. Eleg. 14.* numerari queat. Hîc sanè respexisse Poëta credi potest, dum ita tales foeminas alloquitur:

Vestra quid effoditis subjectis viscera telis?

Reliquorum à nobis adductorum testimoniorum auctoritati nihil quicquam detrahetur, si dixerimus, verum quidem esse, quòd interdum usum medicamentorum foetus immaturi abigendi gratiâ exhibitorum sequatur abortus, ac tam exhibentes, quàm accipientes ejusmodi remedia ex meritò severissimis coërceantur poenis & civilibus & ecclesiasticis, ac nihilominus intrepidè affirmaverimus cum Mich. Boudewin *ventilabr. Medico-theolog. p. I. quest. 26. non posse assignari in universâ medicinâ medicamentum tale, ad quod necessario & infallibiliter sequatur abortus.* Cujus asserti veritas evidentius elucescit, si medicamenta, quæ pro ciendo abortu dari consueverunt, breviter percurrerimus. In hunc censum referuntur ex universalibus primo *purgantia drastica*, 2. *Vomitiva*, & ex subsidiis chirurgicis 3. *V. S. in pede administrata.* Ex stimulantibus ac pellentibus huc inter salina pertinet *borax Veneta*, quæ falis uterini nomen adepta est, & ea autem *crocus*, *myrrha*, *succinum*, ejusque *oleum*, ut & *oleum destill. junip. fabinæ &c.* nec non *specificum Helmontianum hepar anguillæ c. felle exsiccatum &c.* Quòd purgantia etiam vehementissima gravidis propinata foetum non excutiant, etiam si sæpissimè reiterentur, omnis dies docet. Ante aliquot annos gravida coqua, ex errore diagnoseos, à chirurgo credebatur *hydropica*. Incredibile dictu est, quot non fuerint exhibita vehementissima purgantia, nec tamen ullus inde secutus abortus, sed justo tempore, proles mascula, valdè debilis, in lucem hanc prodit. Hujus commatis historias plures recensere, neque enim rarò ejusmodi errata contingunt, jam non vacat. In Ephemeridibus Germanorum

manorum ex Martiano annotavimus, quòd ab emeticis non sit metuendus gravidis abortus, sicut multoties fuimus experti. Et quis ignorat, quantis vomitibus gravidæ tribus aut quatuor mensibus prioribus (citra tamen abortum) ad stuporem usque adstantium fatigentur. Non tantum ex Thom. Bartholini *observ. in Ephem. Germ. Decur. I. ann. I. observ. 52.* sed & propriâ experientia novimus, ope φ ii salivationem, quæ & cum vomitibus & sedibus non rarò sub initium conjuncta est, in gravidis, citra foetus damnum fuisse excitatam. Venæ sectionem quod attinet, non diffitemur inter Hippocrat. *aphorism. sect. 5. legi & seqq. qui in ordine est 31. Mulier uterum ferens aborti sectâ venâ, eoque magis, si foetus sit grandior*; at verò illum in Europâ non confirmat experientia. In Galliâ Riverius septies, nisi fallimur, phlebotomiam celebravit in gravidâ, quæ tamen nequaquam abortiit. Labores concatenati non permittunt, ut adductis Auctorum testimoniis demonstramus, quod in Belgio, Germaniâ, Italiâ, Hispaniâ, jam non rarò, ad præcavendum abortum, ex suasu Celeberrimorum Medicorum secetur vena, tantum abest, ut hodie in illis locis credatur per V. S. abortum posse procurari. Salaces mulieres ac impudicas puellas tumente utero nequicquam ad saphænæ sectionem confugere, etiam tonsoribus nostris constat. Forestus quoque *l. 29. obs. 24.* refert: *Fœminæ cuidam octavo gravitatis mense varices propè talum ultro fuisse exesos, & plus quam tres sanguinis libras emisisse, & nihilominus tamen feliciter peperisse.* Mulier quoque illa apud Zacutum Lusitanum *l. 2. prax. admir. obs. 114.* præter assumpta valida purgantia, exactissimam inedia, viribus invalidis ad saphænæ phlebotomiam decies & ter celebratam, ac hirudines in fede ter applicatas se convertit, sed nunquam voti sui compos evadere potuit, imò geminos nono mense obesos edidit in lucem. Imò, quod fidem penè omnem excedit, narrat Stalpartius *Cent. I. p. m. 275. seqq.* mulieri uno eodemque foetu gravidæ quadragies ac novies venam fuisse scissam, eamque sub noni mensis finem vivis interesse desiisse, nullâ oris uteri interni apertione factâ. Nec majus præsidium prostitutæ pudicitie fœminæ in pellentibus inveniunt. Narratur in *Ephemerid. Dec. II. ann. 3. obs. 106.* mulierem quandam per integras tres septimanas, singulis diebus, mane centum guttas .°. destillati juniperi adhibuisse, & tamen postea filiam fuisse enixam. Novimus aliquas oleum sabinæ in largâ quantitate hausisse, ac citra ullam noxam deinceps peperisse; & profectò, si quis paulò curiosius inquirat, creberrima experientia convincetur, ac confessione meretricularum, quàm frustraneo conatu pellentibus famæ suæ, cujus dispendium ex læsa pudicitia jure metuebant, consulere voluerint. Subit adhuc memoria eorum, quæ alicubi tentavit pharmaceutices studiosus, cum ei copiam corporis sui fecisset honesti civis filia, eaque postea uterum gerere cœpisset; si brevibus rem, multis ambagibus perplexam, eloqui licet, omnia egerat, quò foetus immaturus è domicilio uteri excuteretur, sed infelici hoc eventu, ut malè sibi conscius statione sua semetipsum citius moveret, quam foetum, qui justo de-

mum

mum tempore ergastulum uteri materni perrupit. De difficultate hâc abortum provocandi fufius differit Vir Clariff. Dn. D. J. P. Albrecht in *Ephem. Dec. II. ann. 8. observ. 165. p. 384. & seqq.* cujus integra observatio legi meretur. Porro facile etiam declarari poterit quæstio fecunda, cujusnam scilicet *sint generis* remedia illa, quæ interdum, quanquàm fortassis paulò rarius, propter effectum verè *αγώγικα* dixeris. Purgantia draftica, cujus sint indolis, cuivis notum est. Habent autem hoc cum reliquis pellentibus commune, quòd magnum orgasmum ac ebullitionem in humoribus concitent, & resolvendo pariter, ac fundendo agant, quicquid agunt; ut videas, quàm inconsultum fit, æstuantibus præ febrili ardore visceribus ad usum horum remediorum descendere. Imò, si rem rectè perpendas, nec mitiora quidem nervina ac balsamica ex plantis nervinis, cephalicis & uterinis in morbis acutis conveniunt. In febribus acutis cum majori sanguinis calore & fortiore ejusdem transpulsione ordinariè ferè conjuncta est partium musculosarum & membranofarum tensio, undè fit, ut vultus etiam in obesioribus & vivacioribus ferè sint contracti & macilenti, palleant, aut inæquali rubore tingantur. Et nisi fallimur, etiam ille exquisitior sensus, qui in febricitantibus animadvertitur, non aliunde nisi à majori partium stricturâ & tensione ac arctatis pro copiosiori secretionem poris dependet. Jam verò nervina etiam mitiora insigniter æstum augent & stricturam partium porofarum intendunt, quod nisi facerent, non capi posset, quomodo partes membranofas uteri, & glandofas papillares ad effundendum sanguinem stimulare valerent. Ac propterea etiam hoc respectu malè ejusmodi remedia febricitantibus gravidis applicantur. Tandem, quicquid etiam hæc remedia agant, ac quomodocunque operentur, tardè satis & vix intra septimanarum aliquot, imò & mensium tempus speratum edunt effectum. Toto hoc experimur die in mensium suppressione, in quâ, etsi mulierculæ & barbitonfores, rudisque empiricorum cohors, sæpè pellentibus miseras per septimanas & menses afflictim fatigent, voto tamen suo non damnantur, nec guttam sanguinis, validis hisce remediis ex utero elicere queunt. Enim verò notum est, quam brevi periodo febres acutæ finiantur, quamque hîc præceps sit occasio, quam prudentis est non é manibus dimittere, eoque minus Medicus ad remedia à præfenti morbo alienissima, vix per aliquot septimanas effectum aliquem editura descendet, nam curas tam longas spes vitæ brevis periclitantis gravidæ inchoare vetat. Tandem abortus nec occasio, nec causa est ullo modo, ut deinceps febris, eo fortè secuto, rectius per medicamenta tractari possit, ut patet consideranti aliquas notabiliores abortus circumstantias. Non jam dicetur aliquid de doloribus, quos irritatus uterus & fibris transversis agentibus in se contractus excitat imensos, quibus tamen nihilominus vires gravidæ febrili aliquot dierum jam antea fractæ magis & magis dejiciuntur; sed tangemus tantum i. violentam placentæ ab utero separationem, quâ uterus valdè excoriatur, & ingens, ut ita loqui liceat, ulcus internum excitatur, cujus deterfioni & mundificationi

deinceps invigilandum est, ne gravissima ægræ mala accerfantur. 2. Vehementissimum illum sanguinis fluxum, qui abortum ferè semper comitatur, ob placentam ab utero quasi dilaceratam, aut ad minimum ægerrimè ab eo separatam, quâ vires summoperè prosteruntur, quo respectu partus legitimus abortu semper tolerabilior est; nam illo appropinquante placenta facillimè ab utero separatur, sicut Harveus alicubi, nisi fallimur, observavit. 3. Lipothymias, ad quas abortientes præparientibus valdè sunt pronæ, sicco pede præterire non possumus, quæ, quantum periculi in acutis portendant, nemo in praxi exercitatus ignorare potest. Hæc itaque quoniam cum abortu connexa sunt, mente captus sit, necesse est, qui credit, exclusionem hanc dolorosissimam foetus præbere posse occasionem rectius occurrendi debitis remediis febri acutæ. Imò necessitas imponitur medico post abortum, ut debitum ac sufficientem lochiorum fluxum per medicamenta apta, quantum in se est, conservet, ne vel sanguinis grumi, vel aliud quid præternaturale post partum in cavitate uteri remaneat, & sæva inducantur symptomata, ac præcipuè, ut ulcus uteri liberiori lochiorum fluxu detergatur & mundificetur. Quomodocunque res consideretur, undique elucescit, quòd per medicamenta abortum procurantia, mater non tam servetur, quam in manifestum vitæ periculum præcipitur. Res vulgò innotuit ac Poëtis. Ita enim Ovidius l. 2. amor. Eleg. 14.

*Dùm labefactat onus gravidæ temeraria ventris,
In dubio Vitæ lassæ Corona jacet.*

& iterum:

*Sapè suos utero, quæ necat, ipsa perit.
Ipsa perit ferturque rogo resoluta capillos;
Et meruit, clamant, qui modo cunque vident.*

Hæc viâ periit Tesinii uxor apud Hippocr. l. 5. § 7. epidem. cum ultro pharmacum corruptorium hausisset. Et rectè judicat Suetonius in Domitiano c. 22. quòd Domitianus fuerit causa mortis filix fratris, dum coëgit eam, ut conceptum abigeret. Sit tamen, qui ex voto sibi successisse abortus provocationem foetuque exturbato matrem à morbo vindicatam gloriatur, id rectum ex errore erit judicandum, inquit Roder. à Castro de morb. mul. l. 3. c. 21. in schol. quod imitari non licet, nec prudentiæ Medici tribuendum est, sed mulierum robori, quod erratum medicantis valuit sufferre, ut pulcherrimè Henr. Meibomius. Tandem & hoc considerandum est, quòd non omnes gravidæ morbo acuto correptæ pereant. Notus nobis est Hippocrat. aphor. 30. sect. 5. Mulierem uterum gerentem ab aliquo morbo acuto corripì, lethale est; sed & hoc effatum non semper, sed ut plurimum tantum existit

existit verum, & pro robore naturæ in gravidis variat etiam periculum, à morbis acutis vel ægræ, vel fœtui metuendum, ut rectè ad hunc aphorismum notat Wedelius. Nam quædam gravidæ etiam acutas malignas febres feliciter superant, ut vidua D. Lachmund, quæ post hujus obitum gravida superstes febre malignâ atrociter infestata, ac nihilominus à truculentissimo morbo feliciter liberata, post aliquot septimanas, sine multis difficultatibus peperit filiam optime constitutam, ut narratur in *Ephemer. nostr.* Dec. II. ann. 8. p. 386. Si autem non omnes pereunt necessario, cur abortum per se periculosum, pro salvandâ matre, concitare vellemus? Et ne quis lætetur, cum prægnantem in morbo acuto abortire videt, scire eum cupimus, eum abortum nihil læti ominari, sed iudicem esse summæ debilitatis ac instantis mortis. Et propterea fortassis non malè Schelhammerus in *Ephemer. l. c. p. 395.* statuit, in acutis, non vi morbi, multò minus medicamento cujusdam drastici mulieres abortire sed fracto naturæ robore, & quòd illata vi, omnes corporis partes ac viscera fibris suis laxentur, ipse etiam embryo debilitetur, ut sustinere se non possit, sed concidat languens & in utero collabatur &c. Concludimus ergò cum Sylvatico in *controvers. p. 362.* Undiquaque detestandum esse flagitium huiusmodi, abortusque procurandi sententiam execrandam esse, utpote quæ liberos prius vitâ privare contendit, quàm illi propriam lucem à natura accipere potuerunt &c. His aliisque rationibus motus Collega noster D. Helwich hactenus nunquam ullo remediorum genere fœtus exclusionem in acuto gravidarum morbo moliri voluit, & cum eò re perpensa censemus, rectè quemvis medicum facturum, si omissis abigendi fœtus curis prudenter & cordatè methodo febribus acutis convenienti ejusmodi gravidas tractaverit.

Nihil jam amplius restat, quàm ut pro more nostro catalogum in Civitate Vratislaviensi per singulos anni 1701. menses defunctorum breviter subnectamus. Nimirum farcinam corporis mortalis deposuerunt,

In Januario	-	-	86.	Julio	-	-	63.
Februario	-	-	100.	Augusto	-	-	114.
Martio	-	-	76.	Septembri	-	-	120.
Aprili	-	-	86.	Octobri	-	-	115.
Majo	-	-	81.	Novembri	-	-	103.
Junio	-	-	70.	Decembri usque ad 24. d.	-	-	82.

Summa 1096.



HISTORIA
MORBORUM,

QUI

ANNO MDCCII.

VRATISLAVIÆ
GRASSATI SUNT,

A

COLLEG. ACADEM. LEOPOLD.
NAT. CURIOSOR. VRATISLAVIENS.
IN LUCEM EDITA.

THIS IS THE

MORRISON

OF

THE

WAR

GRASS

COLLEGE

NATURAL

OF



BENEVOLO LECTORI

SALUTEM.




Cce post longum satis mirum & diuturnum silentium Historiæ nostræ morborum Vratislaviensium continuationem, annum scilicet quartum. Miraberis, nos non eadem, qua cæperamus, sedulitate perrexisse. Initia, inquires, fervebant; nam inter tres annos non tantum tria historiæ morborum volumina, sed & prodromus examinis animadversionum Gr. in historiam morborum Vratislaviensium, &

ipsum quoque examen & castigationes earundem animadversionum publicam aspexerunt lucem; medium tepebat, præter curatam enim ad votum & desiderium multorum novam Historiæ nostræ editionem observationibus quibusdam & appendice, tractatu nimirum de experientia auctam, non nisi observationes practicæ de Hydrope pectoris anno currentis sæculi sexto fuerunt edita; Friguerunt hætenus, fate-mur, ultima: Sed, absit jactantia verbo! non deferbuit noster in artem nobilissimam affectus & studium. Crevêre interea nostri labores, ac illius Collegæ, qui onus scribendi in se suscepit. Unus enim fuit, qui more in Collegiis ubique terrarum recepto & manum operi & calamum admovit, ac observationes nostras partim viva voce, partim scripto ipsi communicatas, nominibus nostris ubique additis, historiæ

contextui, qui post elaborationem ab omnibus nobis relectus est, magna fide inseruit. Is est, ut Eruditis passim constat ex Novis-literariis Germanicis An. 1706. Mense Novemb. p. 362. ac Nouvelles de la Republique des Lettres, Mois de Mars An. 1707. artic. 6. p. 345. &c. noster ab anno præterlapsi sæculi nonagesimo sexto, quo relicta Prussia, Patria sua, hic Vratislavia sedem fixit, & in Academia Leopoldina Imperiali & multis de agrorum salute consultationibus, adeoque rerum nostrarum apprime gnarus Collega D. Christianus de Helwich. Illum & clinici & alii literarii labores hætenus occupaverunt. Luctus etiam, cui per mortem filia sibi unica chara Catharinæ Dorotheæ immersus fuit, animum ejus ita perculit & afflixit, ut per multos menses mente tranquilla his studiis vacare non posset. Cum verò undique a doctissimis viris & exercitatissimis Practicis ad opusculi continuationem sollicitaremur, prædictus Collega noster horulas illas, quas a clinicis laboribus ac continuis interpellationibus utcunque vacuas habuit, huic labori impendit. Prioribus vestigiis & in hoc anno institimus. Fuit, est, & erit nobis Medicina, Jani instar bifrons, altera facie veterum monumenta, altera autem moderna inventa respiciens. Placuit nobis semper indefessum antiquorum observandi studium in Semeiotica, Diagnosi & Prognosi, neutiquam tamen vetustatis amore ita excæcati fuimus, ut obliquo recentiorum experimenta, inventa & merita oculo aspiceremus. Credidimus semper, Medici-Philosophi esse,nectere nova antiquis & boni Practici, in succum & sanguinem vertere utraque. Propterea per illa lustra, quibus clinica Praxi insudavimus, antiquorum observata venerabundi magni fecimus, modernorum tamen placita neutiquam sumus detestati, laudata quoque chymicorum medicamenta non flocci pendimus, omnia vero experientia propria ac judicii lance ponderavimus, ac, quæ dubia sunt, ulteriori disquisitione reservavimus. Hujus propositi & consilii tenaces nudam saltem Dianam, id est, praxin clinicam fausto & infasto eventu porro sistimus. Quemadmodum verò non sine modesto rubore experti sumus, hos nostros conatus viris bonis & in arte facienda exercitatis hætenus non displicuisse; ita eundem nobis favorem pollicemur, observationesque nostras publicæ luci exponimus, DEUM ex animo precati, ut aliqua ex lectione earundem, Lector erudite, utilitas ad Te & agros redundet! Vale!



F. F.



Ilum Historiæ nostræ nos ducit ad seculi Constitu-
decimi octavi annum secundum. Per hu- tio aëris
jus Januarium variis aëris mutationibus per tres
Vratislaviæ obnoxii viximus. Initia qui- mensēs
dem mensis frigore aspera erant minimè priorēs.
diuturno, maxima verò ejus pars inter ne-
bularum, ventorum, nivium, imo & plu-
viarum vicissitudines effluxit. Ineunte Fe-
bruario cœlum nubibus & pluviis turbi-
dum. Elapsis aliquibus diebus serenus no-
bis illuxit Sol, ita ut die mensis septimo
Veris delicias pergustaremus. Amœnitas il-

la semel iterumque pluviâ & nebulis parum interrupta, nihilominus ferè ul-
tra mensis medium duravit. Reliqui dies ferè omnes, excepto 23 & 24,
vel propter nebulas, vel propter ventos, vel propter nives, vel tandem pro-
pter pluvias minimè grati fuère. Sub initium Martii omnia gelu rigeant,
sed altero mox die terra nive cooperiebatur, quæ brevi liquecebat. Ter-
tius pluviis, nive, ventis horrebat. Et ut brevibus dicamus, toto ferè
mense aëris inconstantia erat, modò nungebat, modò pluebat, modò venti spi-
rabant. Decimus nonus & pauci alii e. g. 21, 23 per intervalla erant sereni.

Frequentissimi hoc tempore occurrebant affectus Rheumatici vel nullâ,
aut certè non admodum notabili febris ut plurimum stipati. Quidam ex
ægris sub initium horrore & rigore concutiebantur, frigus hoc calor non
adeo vehemens excipiebat, ac post aliquot horas spontè iterum remitte-
bat. Tantum non omnes dolorem, quem Scholæ tensivum vocant, circa
dextram cervicis partem percipiebant. Is impedimento iis erat, quò mi-
nus ad oppositum latus caput liberè moverent. Brevi post malum dif-
fundebar in scapulas, & humeros, ubi tantas subindè agebat radices,

*Affectus-
Rheuma-
tici.*

ut ægris per menses multos negotium faceretur. Innotuit nobis hoc tempore aliquis, qui jam Wolaviæ agit, cui, quicquid etiam tentaret, (tentavit autem multa) per annos integros insigni cum tædio hæc molestia devoranda fuit. Quæ tantò major erat, quod, sicuti etiam aliis usu venire solebat, sub mali principio per intervalla acutis, lancinatoriis ac vibrativis doloribus mulctaretur, à quibus nec dorsum usque ad lumbos immune restabat. Nostrum etiam consilium imploravit Æger, cujus pectus à claviculâ ad cartilaginem ensiformem & ad costas spurias infirmas atroci cruciatu obsidebatur. Sub manibus fuere, quorum hypochondria dolore non vacabant. In paucis admodum femora & tibiae laborasse meminimus, & ut differentiam inter arthritidem & dolores rheumaticos videas, hi non circa articulos, sed loca intermedia carnosâ hærebant, secus ac in arthriticis fieri solet. Cujuscunque verò generis cruciatus fuerint, sive ex classe tensivorum, sive lancinatoriorum, aut etiam tantum gravativorum censu existerent, ferè circa noctem ingravescebant; circa horas matutinas minuebantur. Aliqui ex iis de siti conquerebantur, cuncti autem cibos fastidiebant; unus & alter etiam ad vomitum pronus. Rauci erant, in quibus malum circa pectus sedem fixerat. Præmissâ Venæ sectione, cui tempestivè administratæ meritò plurimum in hoc affectu tribuimus, diaphoresis blanda matutinis horis instituta ægris solabatur. At cum sudoriferis calidissimis massa humorum exagitur, quod Vratislaviæ non tantum plebi, sed & cordatioribus ferè solemne est, dolores quam maximè intenduntur. Aliqui inconsultò & non sine damno illicò ad sacram Medicastrorum anchoram, Decocta, inquam lignorum convolant. Quando autem dolor circa lumbos, partes vertebris adjacentes dextras pariter ac sinistras occupat, tum absque omni hæsitazione de Calculi renum præsentia decernitur. Pessimè res antinephriticis, quæ plurimum obesse circumspecta docet experientia, geritur, dolendumque est, quod etiam à Medicis, ac his non infimæ classis, totò die hæc incautis obtrudantur. In externis mirè luxuriant hîc locorum, à quibus tamen præstaret vel planè abstinere, vel si ægrorum precibus aliquid dandum fuerit, Spiritus Vini, in quò sapo Venetus cum camphorâ quomodocunque solutus, usus vel solus ferè suffecerit, nec tamen rejecerimus misturam Celeberr. Lentilii, quâ dolores fuisse mitigatos satis enormes recordamur. Ea sequens est:

℞. Ciner. clavell. ℥iij pulveris. affunde

▽ si paralyf.

carvi.

fœnicul. aa. ℥bj

solve & solutioni injice

⊖ Xci depurati & in pulverem comminuti. ℥jss.

solve vitro probe clauso, solutionem filtra & in vitro probe munito serva, nodulo insuper suspenso in liquore ex

Castor. opt. 3j.

Theriac. Venet. 3ij.

Hæc

Hæc partes dolentes (cute prius pannis mastiche & succino fumigatis ad rubedinem perfricta) illini jubet, opemque non sine ratione præsentio-rem, quam ex litibus aliis expectat.

Passim grassabantur etiam Variolæ majori ex parte benignæ, & non Variolæ adeò multis funestæ, confluentes si excipias, ut subinnuimus in Historia Morbor. An. 1700, ubi historiam Variolarum dedimus, modumque curandi plenè narravimus. Adjicienda tamen censemus paucula illa, quæ hoc anno observata, & sequentium annorum experientia roborata fuere. Promiscuus Decocti lentium cum liquiritiâ, semine fœniculi, &c. usus fraudi est iis, quorum victus crassior ac viscidior est, aptusque ad lentos humores in corpore accumulandos. In iis variolarum eruptionem nisi impedit, certè retardat. His blandiores Essentiæ ex radicibus alexipharmacis quam optimè conveniunt in aquis cordialibus exhibitæ, & vellemus fanè, ut Sydenhamus unicè abusum notasset, non penitus autem verum Cardiacorum usum proscripsisset & damnasset. Rursus hoc anno observatum fuit, quod humani quippiam idem Vir Clarissimus fuerit passus, dum asseverat, neminem *perire ex Variolis, quòd non eruperint*, multos verò mori, quòd *cum eruperint præmaturè nimis detumescant*. Obversatur adhuc memoriæ infans vicini cujusdam Sutoris, qui gravissimis convulsionibus concussus variolis leviter apparentibus exspiravit. Memini etiam puellam quandam, fratre variolis laborante, tertio morbi die præsentibus omnibus variolarum indiciis inopinatò extinctam fuisse, sive apoplexia, quod parentes credebant, sive quod ad verum propius accedit, syncope eam abstulerit. Potissimum verò nonnullis hoc anno Diarrhœæ, quando exarescere variolæ cœperunt, exitiosæ fuerunt. Nobis sollicitè in causam Diarrhœæ hujus inquirentibus patuit, potum tenuem avidè ingurgitatum non immeritò in suspicionem culpæ venire. Affatim bibisse omnes facilè comperies, qui eo tempore in Diarrhœam incidunt. Neque tamen inevitabile periculum, modò maturè obviam eatur. Theriaca in adultis spem non fallit, in pueris Essentia theriacalis vel spiritus etiam theriacalis cum spir. Nitri mistus in vino exhibitus expectationi satisfacit. Nondum hæcenus à me impetrare potui, ut Thom. Mayeri methodum imitarer, laudanumque opiatum in Variolis, vel in Diarrhœâ, vel in aliis symptomatibus exhiberem. Febris illa, quæ suppurationem individuo nexu comitatur, si ultra 14 aut 17 diem extendatur, utique periculosa existit, & quosdam hoc anno in mortem præcipitavit. Quodsi quodammodo 13 die aut post eundem intermitentis typum induat, ut ferè semper fieri solet, licet intermissio brevi etiam dureret, cortex Peruvianus singulis duabus horis tempore hoc intermissionis in justâ quantitate oblatus, egregium est remedium, quod in manu multorum Empiricorum alias idem est ac gladius in manu furiosorum: & vel hoc solo nomine laudandus eximiè Morton, qui vel primus, vel certè inter primos hanc medendi rationem indice digito nobis demonstravit, majorem utique meriturus laudem, si non in aliis occasionibus hoc

fuiſſet abuſus medicamento, alioſque ſuo exemplo in errores ægris noxios induxiſſet. Certum eſt, quod in Confluentibus, ſi & hoc addere licet, abſque ptyaliſmo ægri adultiores in ſummo verſentur periculo; certum tamen & hoc eſt, quod hâc ſalivatione Variolæ in quantitate non minuuntur; quod utique argumento eſt, materiam, quæ hâc ſalivatione ex corpore eliminatur, non eſſe eandem, quæ diſtinctas Variolas in majorem elevat altitudinem, ac rûſus depreſſionem, quæ in Confluentibus cernitur, non ab exitu ſalivalis ac ſeroſi humoris pendere, ſed ab ampliori & latiori harum per ſuperficiem cutis expansione.

Apople-
xia.

Nunquam quidem non Apoplexia aliquos è medio tollit Vratiſlaviæ, & de incolis hujus Civitatis hîc in paſſu eadem fere dici poſſent, quæ de Amſtelodamenſibus & Delfenſibus ſuis habet expertiſſimus Foreſtus lib. 10. Obſerv. 70, maximè tempore brumali illos opprimit, (epidemicam enim Apoplexiam nunquam hîc locorum apparuiſſe crediderimus, cujus generis eam fuiſſe, quæ An. 1694 & 1695 in Italiâ regnavit, cenſet Baglivius) tantoque eſt frequentior, quantò aëris intemperies eſt notabilior. Non unam hâc tempeſtate, tum in hâc Metropoli, tum paſſim per Sileſiam omnem ea edidit ſtragem, ut non abs re futurum cenſeamus, ſi paulò plenius graviffimi hujus morbi hîſtoriam fuerimus perſecuti. Familiarior ille eſt apud nos hominibus in virili ac ſenili ætate conſtitutis, ac locum hîc habet etiam Aphoriſmus Hippocratis 57 ex ſect. 6: *Siderationes maximè fiunt ætate à 40. anno uſque ad 60*, modò in aliquâ latitudine, prout ſubſtrata materię indoles requirit, & non in rigido, & ad vocum apices nimis adſtricto ſenſu capiatur, quanquam ſatis cautè locutus ſit Hippocrates, addens, *Siderationes maximè fieri eâ ætate*, quam designavit. Paulò rarius infantes, pueros, adoleſcentes, juvenes adoritur, tum hîc, tum alibi ferè ubivis. Exempla Apoplexiæ in omnibus hiſ ætatibus à Nobis viſa ſunt, ſed ut jam dixi, minus frequenter. Juſtus Cortnummius *de morbo attonito* c. 19 p. 74 refert, unicum ſe vidiffe exemplum per vitam in infante. Hoc anno quò hæc ſcribimus, non tantum illuſtris puſio, ſed & frater cum ſore in infantili ætate apoplectici interièrè. Amatus Luſitanus *Cent. 3. Curat. 22.* memoratu dignum judicavit, quod infans ex *ictu bombardæ morbum incurreret attonitum*, quem mox Paralyſis & mors ſecuta ſit. Idem, quem antea laudavimus Cortnummius *lib. cit. c. 30. p. 131.* auctor eſt, quod puella Variolis correpta, cui carnifex ad febrem continuam debellandam ante Solis exortum potiunculam ſupra gladium ſuum exhibuerat, ab enſe ita fuerit perterrita, ut in morbum attonitum illicò concideret. Conf. *Decur. Ann. 4. obſerv. 39. Dn. D. Dobrzensky, ut & Medicinæ Collatit. Boneti P. 1. p. 166. c. 13.* De Juvene apoplectico extat exemplum apud Tulpium *lib. 1. obſervat. c. 7.* Præterlapſo anno puellam circa 14. ætatis annum horâ ſeptimâ è lecto ſurgentem, cum vix tria protuliſſet verba, ſubitò apoplexia abſtulit. Major pars eorum, quos apoplexia apud nos invadit, eſt temperamentum ſan-

sanguinei aut sanguineo-cholerici. Ejus temperamenti erat Reverendiss. Dn. Prælati Heinrichov. qui in autumnio præterlapsi anni 1701. Mense Novembri, postquam cœlo pluvio ingressus esset iter, & vehementius incanduisse, insultu apoplectico obrutus, & efficacissimis remediis adjuvante divino Numine ita me medicinam faciente restitutus, ut sanus fospesque Vratislaviâ Heinrichoviam redierit. Cum hoc ipso anno denuò ferali morbo correptus esset, rursus quidem medicamentis meis convaluit, at brevi post tertium accessum expertus fatis concessit. Ejus temperamenti etiam erat Reverendissimus Dn. Suffraganeus, gente Italus, familiâ Brunetti, quem fortissima apoplexia post paucarum horarum intervallum extinxit. Ac hisce diebus, dum hæc scribo, idem fatum expertus est Vir longiori vita ob candorem & cultissimos mores dignissimus Dn. Kretschmerus, Mercator florentissimus. Si quis alius, is certè sanguineæ complexionis erat. Neque tamen ab apoplecticis insultibus planè liberi sunt alterius temperamenti homines, ut multoties hîc locorum nobis observare licuit. Id quod & alibi contingit. Ita primus apoplecticorum à clariss. Wepfero descriptorum *habitu corporis gracili, capillis flavis & crispis præditus erat, ingenio pollens ac ad iram paulo pronior, quantum quoque idem Wepferus ait vergentem fuisse temperie totius ad calidam & siccam, coloris fusci, habitu corporis utcunque carnosum & ad iram vehementiorem.* Celeberrimus Anatomicus Marcellus Malpighius, qui anno 1694 ex apoplexia mortuus, temperamenti erat *ad siccum vergentis, mediocri corporis habitu, & mediocri pariter staturâ præditus*, referente Baglivio *in dissert. 3. de observationibus Anatom. p. m. 115.* Apud Forestum Juvenis nobilis, *naturâ melancholicus* sub noctem in apoplexiam fatis fortem incidit. Non vacat operosius inquirere, verumne sit, quod Forestus *in Schol. observ. 78. lib. citati* notavit, *apoplexiam rarius ab humore melancholico*, ut ipse loquitur, *oriri*, cujus quidem assertioni è diametro adversatur Cardan. *Commentar. ad 55. Aphorif. lib. 6. Hippocrat.* & omnium maximè Francisc. Boyle *in tract. de apoplexia*, Illud quoque meâ multiplici experienciâ fuit confirmatum, quod collo sint breviori & toroso, qui apoplexiam incurrunt, quod de sene apoplectico expressè notandum censuit Willisius *de anim. brut. part. 2. p. 143.* Cujuscunque verò fuerint temperamenti, qui vel hoc anno, vel etiam secutis temporibus apoplexiam incurrerunt, in eo ferè omnes convenerunt, quod vel in potu, vel in cibo, vel utroque excefferint, id quod etiam alii scriptores de suis apoplecticis diligenter observarunt. Monachus apoplecticus apud Forestum *crapula fuerat deditus & copiosè crassam cerevisiam ingurgitavit.* Delphius quoque quispiam, teste eodem, *bibax erat ac victu inordinato utebatur.* De primo quoque suo apoplectico Cl. Wepferus expressè scribit poculis eum indulgisse, de quarto verò fusco illo, cujus mentionem jam fecimus, prælaudatus Wepferus *p. 15. in observat. Anatom.* ait, *multum ipsi usum cum Baccho fuisse, & non rarò sicca labore pectora fervido maduisse mero.* Tales etiam in au-

ctario recenset idem. Doctissimus Vir Carolus Piso *de prætervisis hætenus morbis affectibusque à serosâ colluvie oriundis* sect. 2. part. 2. cap. 5. civem & fartorem Pontanum lautiori fuisse victui assuetum affirmat, ut ferè urbanorum artificum genus omne genio passim indulget, tribuitque abdomini in saginando, quicquid lucelli aut manuum industria, aut corporis labor parit affertque. Expertissimus Hollerius lib. 1. *de morbis internis* p. 27. pictorem & figulum utrumque vinosum apoplecticum factum fuisse narrat. Nec possumus, quin adscribamus verba Heinrici ab Heers *ex observ.* 18, quibus homini, quem novum ex veteri monacho Medicum scitè appellat, Mercatori ex fynusiâ lasso venæ sectionem suadenti respondet: *Nostrates ingluvie commensationibusque ferè apoplexiam incurrunt.* Quæ profecto, ut & ea Celeberr. Ettmulleri *in Op. p. m.* 447. apud nos sunt longè verissima. Notorius vini abusus multos & quidem ætatis consistentis optimique aliàs habitûs his annis in apoplexiam præcipitavit. His omnibus jungere licet vitam desidem & otiosam. Non facile recordor quenquam apoplexiam incurrisse, ubi non vel manibus fuerit palpabile, inter assumpta & motum corporisque exercitia nullam fuisse servatam proportionem, sed illa modum excessisse, hæc verò defecisse. Eum autem in finem hæc adducenda esse credidimus, ut clarissime elucesceret, veram ab apoplexiâ præservationem non æquè à medicamentis, quam à vitæ sobrietate & debitis corporis motibus pendere. Ferè exciderat, sæpius à me fuisse observatum, gravidas medio circiter gestationis tempore levi ac brevi iterum evanescente apoplexiâ, quæ nulla gravia incommoda secum trahit, fuisse tactas. Ingratum verò sui adventum multoties quibusdam prodromis designare solet apoplexia. Inter primaria indicia ferè semper vertigo est, non tam matutina quam pomeridiana, imò & nocturna, quæ multò est deterior, quando cum scotomiâ conjungitur. Multis etiam apud nos familiares sunt torpores & stupiditates præter morem contingentes (de quibus tanquam futuræ siderationis signis jam mentionem *in Coacis prænot.* Hippocrates injecit) antequam apoplexiâ opprimantur. Suspectus etiam meritò est incubus, si paulò frequentius eo vexentur, quibus vertigo molesta est. Mali etiam ominis sunt insueti totius corporis tremores, inprimis verò labiorum & dentium stridores in somno, extremorumque perfrigerationes. Subita linguæ impotentia, eaque sæpius recurrens, ferè non fallax metuendæ apoplexiæ τεκμήριον existit, jam tum ab Hippocrat. *in Coacis prænotation.* memorata, quo etiam à nonnullis refertur *aphorism.* 40. *ex sect.* 7. Aristoteles, aut quicumque autor est *Problematum* sect. XI. probl. 54. ipsam linguæ hæsitantiam partis esse apoplexiam quandam judicat. Unde etiam tum multis aliis, tum hoc anno prælaudato ante Abbati Heinrichovienſi ex insolitâ linguæ titubatione timendam ipsi apoplexiam subindicavi. Præter linguæ hæsitantiam nihil sinistri præsensit correptus apoplexiâ aliquis Hebrææ linguæ Professor apud Cortnummum p. 199. *Conf. Harderum in apiar.* p. 123. Non jam dicemus de oculorum corruscationibus, sed solummodò

lummodò memorabimus hoc minimè rarò contingere, ut quidam aliquot ante insultum apoplecticum annis, vel de deficiente auditu, vel quod adhuc sæpius fit, de visu imminuto maximoperè conquerantur, quibus addere licet ex Aureliano frequentem indigestionem, vultûs plenitudinem ac mœstitiâ, difficilem excretionem ac tandem vehementem meningis saltum in pueris *lib. 3. de morb. acut. c. 5.* Licet verò hæc & alia plura signa (inter quæ tamen studio tinnitum aurium citra sinistrum omen hic pluribus familiarem non recensuimus) apoplexiam præcedant; contingit nihilominus apud nos, *ut sanum etiam derepentè invadat dolor circa caput, & statim voce privetur ac sui impotens sit,* verbis Hippocrat. *lib. 2. de morb. text. 6. & 21.* Simulac verò apoplexia hominem obruit, is subito 1. ferè collabatur & sui, ut jam jam loquebatur Hipocrates, impotens fit. Quæ causa est, quod ejusmodi hominem vocent sideratum. Hoc autem ipso convenit apoplexia cum *lipothymiâ paulò graviore & syncope*, quibus correpti itidem non rarò in terram prosternuntur, ut & cum epilepsiâ, cujus signum esse subitum & improvisum in terram lapsum docet Unzerus *lib. 1. de epilepsiâ c. 18;* differt verò à *Paralysi particulari* e. g. linguæ, palpebrarum, brachii, &c. à *tetano*, in quo universum corpus rigidum ac immobile permanet, *emprosthoto* ac *episthoto*, quando incurvantur omnia vel versus anteriora, vel versus posteriora, nec non à *catalepsi*, quâ æger instar statuæ immotus perstat. 2. Sermonis usu privatur, qui integer adhuc ipsi in primo morbi insultu fuerat. Nam nihil crebrius audias, quam ejusmodi homines aut de intolerabilibus capitis doloribus aut anxietate inexplicabili conqueri. Quibusdam memini usum sermonis per aliquot superfuisse horas, alii paucis verbis prolatis illicò obmutuerunt, similes illi apud Clariss. Harderum in *apiar. observ. 27*, qui ex templo domum festino cursu petens hæc verba tantum protulit: *Herr Jesu wie will mir werden.* Confer *Wepferum p. 239.* Convenit ergo in sermonis interceptione apoplexia cum paralysi linguæ, epilepsiâ, suffocativo catarrho, syncope, in quibus omnibus loquela cessat; differt verò à lethargo, nam lethargici valido clamore excitati ad interrogata respondent quamvis incondita & absona. 3. Corpus apoplectici instar trunci jacet ac 4. sensuum munere orbatur. Ad hæc respiciens Galen. *1. method. medend. c. 9.* si quis, inquit, *sive tribus horis, sive quatuor, sive etiam dimidio tantum horæ toto corpore vehementer captus sit, ut neque sentiat, neque moveatur, hunc nos attonitum appellamus.* Usque adeo autem abest sensus, ut, judice Foresto, *si perforaretur brachium & frangeretur, non sentiret.* Per hanc sensûs & motûs interceptionem differt apoplexia à catarrho suffocativo, in quo sensus ac motus quodammodo integri supersunt, usque dum mors instat. Eadem distinguitur & quidem ratione motûs ab epilepsiâ, in quâ variis motibus caput ac membra contorquentur; respectu autem sensûs à suffocatione uterinâ, nam hystericæ audiunt, cum vocantur, sentiunt ac intelligunt,

quæ secum agantur & acta referunt, quâ de re legi potest *Codronchius lib. 1. de Christiana ac tutâ medendi ratione c. 21.* Etsi verò apoplecticus nec loqui, nec sentire, nec movere se queat, nihilominus pulsus superest & respiratio, secus ac fit in syncope & strangulatu uterino, in quibus ad sensum cessare deprehenduntur. Magna tamen spiritûs difficultas adest, & tantum non præfuffocatur apoplecticus perinde laborante pectore ac si vinculo quodam adstrictum attolli prohiberetur, in quo stertore aliquam habet convenientiam cum peripneumonico & empyematico, ac iis, qui spasmo diaphragmatis corripuntur, nisi aliquis forte cum Bartholeto in *methodo in dyspnæam* laboriosissimam ponere velit in respirationis difficultate pro varietate morborum distinguendâ curam. Non ignoramus, quod celebris quondam Medicus Horatius Augenius in *epistol. & Consultat. med. Tom. 2. lib. 3. p. m. 398.* & *Tom. 3. lib. 11. Epist. 11.* doceat apoplexiam aliquando sine omni sensu & respiratione contingere. Nostri tamen experientia vero magis conforme reperit illud Expertiss. Foresti in *schol. observat. 72. p. m. 405:* *Nulla apoplexia quatenus est simplex, potest esse sine aliquâ inspiratione, seu respiratione, quia illico, quando spirare desinit, apoplecticus moritur.* Fortassis verò Augenius loquitur de apoplexiâ cum syncope conjuncta, cujus exemplum ibidem recitat Forestus, & mihi præbuit mors matris meæ dilectissimæ. Nec enim novum est apoplexiam cum aliis morbis conjungi. Non tantum enim cum syncope, ut jam diximus, sed & epilepsiâ complicatur, cujus generis apoplexiam tum multoties aliâs, tum præcipuè vidi hoc tempore in Fratre Ordinis S. Francisci laico ac cellæ præfecto circiter quinquagenario, qui cum alio ex Ordine jocatus repente de lipothymiâ conqueri cœpit, subitoque concidit sermonis usu destitutus. Horrendis convulsionibus, me aliosque postquam per aliquot horas obstupescisset, apoplecticus mortuus est. Simile in virgine 22. annorum post vehementissimum capitis dolorem exemplum habes apud Francisc. Rubeum in *noctar. exercitat. 40.* Confer. etiam *Ferdinandum hist. 71. p. 211.* & *Pisonem p. 126.* In nonnullis apoplecticis præter hæc etiam videas, ut probè loco citato observavit Aurelianus 1. distantiam oris hiscentem 2. vultus conductionem seu spasmus 3. palpebrarum suspensionem, 4. involuntarias lachrymas. Præ reliquis omnibus ferè dignissimum notatu censemus, quod ipsis ægris vasa circa tempora ac faciem inflata appareant non sine insigni vultûs rubore. In hoc, quem delineavimus, statu est apoplecticus. Certum est, apoplexiam esse morbum acutissimum, adeò ut non immeritò Jachinus exclamet: *apoplexia velocissimè viget, & brevissimum, imò imperceptibile habet principium & augmentum, ita ut tota status esse videatur.* Ferè autem fit ut apoplectici graviores septimum non excedant diem, quod Hippocratis oraculum ex *aphor. 51. sect. 6.* & 2. de morb. apud nos eventu semper comprobatum fuit. Cum verò apoplexia vel perfecte desinat, quod certè si paulo sit fortior, rarissimè contingit, vel hominem in alium præcipitet morbum, vel denique

que *funesta* sit, non abs re fuerit, observata horum eventuum salutis inquam & mortis signa breviter commemorare. Inter salutis signa refertur 1. respiratio libera, pulsus & faciei color naturali non admodum dissimilis. Profecto prout spiritus aut facile aut moleste trahitur, morbi modum omnem, ejusque magnitudinem ostendit. 2. Si consuetæ excretiones aliquò tempore suppressæ redeant. Ita optimum sanitatis omen est liberalior hæmorrhoidum fluxus, consentiente ipso *Hippocrate in Coac. prænot. tex. 318.* Quem in censum etiam veniunt menstrua quibus rite fluentibus apoplexiam sublatam meminit *Zacutus Lusit. de Princip. medic. hist. lib. 1. observ. 33.* Id quod etiam dicendum de ptyalismo in paulò annosioribus, & minimè fallax est illud *Sennerti lib. 1. Pract. med. part. 2. c. 32. Nunquam apoplexia fluxu phlegmatico oris finitur*, Sennerto suffragatur *Barbette, Deckerus, Sylvius*, aliique plures. 3. Faustum etiam signum est, si post venæ sectionem æger aliquantulum sese recolligat, ut optimè notavit doctissimus Hippocratis interpres *Prosper Martianus. Præsertim si sumpta pocula non per nares aut os refundantur, sed penitus descendant*, quemadmodum *Forestus præclare observavit.* 5. si acriter aut vellicatus, aut punctus æger, aut tandem intentâ voce compellatus palpebras moveat & labia quodammodo comprimant. 6. Inter signa salutaria refert *Aurelianus*, si partes quædam saltu errante, i. e. spasmodicè agitentur. Ex doctrinâ Hippocratis, *si apoplecticum febris corripuerit, sanus evadit.* De quânam autem febre loquatur ipse, incertum est, ex *Coacâ 480.* liquet, hoc ejus assertum de lentâ intelligi non oportere, hæc enim ex mente ejus, *adveniens mortifera* est, ut exemplum filii *Numenii* probat *1. Prorrhæ.* Nec cum *Foresto* de febre ardenti Hippocratem loqui crediderim. *Martianus* contendit, febrim illam esse ex genere ephemerarum, cui solutionem apoplexiæ tribuit Hippocrates, quando scilicet statim, non confirmato adhuc morbo, superveniat. Ego sanè inter plurima apoplexiæ exempla nunquam aliquem vidi per febrim ab apoplexiâ fuisse liberatum, licet multoties statim post insultum apoplecticum deprehenderim pulsum verè febrilem. Jam ante facti sumus, quod rarissimè graviores apoplectici perfectè restituantur; nunc addendum, quod vulgò putetur, non malè cum iis agi, qui vitatâ ad tempus morte in aliud morborum genus incidunt. In varios autem morbos transit apoplexia, frequentissimè autem omnium, ut vel vulgò notum est, in paralyfin. Licet verò hâc de re dubitare nemo queat, nihilominus sine fructu non legentur exempla, quæ recitat *Thonerus lib. 2. observ. 3. 4. Lotichius in lib. observat. p. 163. 165. & 172. Piso l. c. p. 121. & Forest. l. 10. observat. 75. & seqq.* sequitur verò apoplexiam paralyfis tam dextri quam sinistri lateris, & illius quidem frequentius, quam hujus. Apoplexiam *Illustriss. Baronis 66.* circiter annos nati, ante semestrem spatium non tantum paralyfis, sed & inexpugnabilis dormiendi necessitas comitabatur. Pes dexter ejusdem, ut & alius decrepiti cujusdam senis ephidrosi semper madebat. Abit etiam apoplexia

plexia aliquando in epilepsiam, sicuti evenit ædituo alicui apud Forest. *lib. cit. obs.* 80. Ante 4. annos post apoplexiam gravem melancholiam in fene aliquo notavimus. Licet verò apoplectici evadant interdum, profunda tamen læsionis vestigia verè semper in iis remanent. Malpighius post 40. *dies liber evadens ab apoplexiâ & paralyfi, summoperè læsus in memoriâ & ratiocinio, & quavis minimâ de causâ in lachrymas solutus fuit*, teste Baglivio *l. c.* Posterius hoc etiam in Clarissimo Aristotelico Philosopho Melch. Zeidlero post apoplexiam observare licuit. Nunquam quoque à metu recidivæ liberi vivunt. Ex levibus sanè occasionibus denuò apoplexia incautos opprimit. Postquam signa salutis in apoplecticis recensuimus, etiam tristitia ac mortis prænuncia tribus verbis commemorare juvât. Inter hæc 1. loco est stertor magis ac magis ingravescens, 2. spuma circa os. 3. si ab usurpatis sternutatoriis æger non sternutet, quamvis sternutatio ipsa non provocata aliàs non magni quicquam promittat. 4. Cum nullum post V. S. levamen in apoplectico advertitur, imò si post eandem celebratam res in deterius labuntur, non est dubitandum, quin mors post paucarum horarum intervallum sit secutura. 5. Tremor etiam juxta Moebium in apoplexiâ & lethargo malus est. 6. Facies cadaverosa ac tandem 7. sudor frigidus, præsertim superiorum partium est indicium certum naturæ succumbentis. Tantò verò magis calamitosa signa hæc omnia existimanda sunt, quando æger est decrepitus, naturæ debilis, vel antecedentibus morbis exhaustus. Post mortem non rarò fatis copiosè sanguis ex corpore effluit, præcipuè in iis, quibus assuetæ sanguinis evacuationes fuere suppressæ. Insigne ejus exemplum prostat apud Fabricium Hildanum *Cent. 1. observ. XI.* de aurifabro familiarem sibi narium hæmorrhagiam amuletò quodam supprimente & per hoc artificium in apoplexiam, ut probabile est, lapso, ex cujus naribus & ore post 12. ab obitu horas copiosissimè sanguis effluxerit. Ex ore senis septuagenarii plurimum cruoris manavit apud Wepferum *p. 238.* Id quod etiam toto die passim observare licet. Si in causas remotiores fatis frequentis apud nos apoplexiæ placeret inquirere, aërem quoque symbolam suam conferre deprehenderemus. Unde tum potissimum, sicut etiam hoc anno factum, apoplectica pathemata crebriora sunt, quando aer frigidior est, aut imbribus & nivibus madidus. Et in hac re tantò magis confirmamur, quod videamus etiam in aliis Provinciis sub ejusmodi aeris constitutione mortales apoplexiâ corripì. Jam ante mentionem fecimus, annis 1694. & 95. Romæ & in Italiâ non exiguam hominum partem periisse apoplexiâ, aitque Baglivius *Diss. 3.* tam frequentes fuisse hujus casus, ut *instantis mortis horrorem quovis ferè momento viventibus incuterent.* Causam verò illius frequentiæ etiam in aëre quærit *loc. cit. p. 117.* Germaniæ frigidum clima accusat in *Consil. Mercurialis*, cum de frequentia apoplexiæ disputat. De pluviosa aeris constitutione legendus est *l. c. p. 415.* Forestus. Ferdinandi Medici Frater, vigilum Præfectus, cum per 15. dies cœlò nubibus obducto

iter

iter fecisset, apoplexiam incurrit, teste Ferdinando p. 211. Monachus Franciscanus continuo per integrum diem in seram usque noctem in cellâ cerevisiariâ commoratus, ipso etiam prandii ac cœnæ tempore, apoplecticus factus est, exemplo memorabili, quod aër frigidior & subterraneus ad apoplexiam concitandam concurrere possit; Quod etiam, teste Wedelio, ferentissima Persona in senio constituta, aëri frigidiori & subterraneo exposita, suo damno probavit. Senior in Ecclesiasticâ dignitate constitutus adulto jam autumnò sub cœlo frigidiori piscationi ab horâ octavâ matutinâ usque ad secundam ferè pomeridianam in loco uliginoso adstans in paralyfin manûs incidit. Multò autem major hominum pars, ut credimus, culpâ assumptorum apoplexiam incurrit. Et vulgus quidem apud nos viscidis ac lentis cibis, quos jure accusat Wepferus p. 203. affatim vescitur. Opi-ficum omne propemodum genus frumenti spiritus variis lenociniis ad palati delitium corruptos jejuno ventriculo ingerit. Paulò ditiores manè vinum absynthites de quo Goclenii observ. nota, aut aliud aromaticum ingurgitant. Qui lautioris adhuc conditionis sunt, Ungarici vini cyathos integros creberrimè ac per multas horas strenuè evacuant. Hæc autem omnia quantam vim ad concitandam apoplexiam habeant, in propatulo est. Certè hîc non ignota sunt exempla apoplexiæ summam inebriationem fecutæ. Celeberrimus Rolfincius memorat Ratisbonæ Principem quendam in Comitibus ex nimio acidularum usu lapsum in apoplexiam, qualem etiam describit Francisc. Hildesheim *spicileg.* 6. p. 526. Tres mihi apprimè noti sunt, qui acidulis in æstate usi, post aliquot menses ex apoplexiâ sunt mortui. Invaluit apud nos jam per aliquot annos empiricus planè acidularum abusus, unde optandum, ut alii damno aliorum cautius mercari discant. Tenet etiam nostros insatiabile cacoëthes pulveris sternutatorii. Hoc & infimi subfellii & sublimioris etiam ordinis viri singulis penè momentis nares inferciunt. Si itaque non laborat fides observationis Anni 4. Dec. 2. *Ephemerid. German.* quâ docemur, à *pulvere tabaci* assumpto coma somnolentum, tandemque apoplexiam esse secutam, evidens est, quanti res sit periculi sine intermissione pulverem hunc intrudere naribus, & id tanto magis, postquam felix Celeberr. Bohnii industria anatomica nobis detexit, eum etiam ad intima corporis penetrare ac pulmonibus ipsis labem affricare. Non minor error committitur in attrahendo peti fumo, quò, mirum est, quam multi unice delectentur. Non pauci, ubi vix pedem lecto extulerunt, statim ad has suas delitias convolant, & per magnam diei & noctis partem tædia sua hoc nepenthes vino fallunt, ingenti utique & temporis & sanitatis dispendio. Quotquot his annis ab apoplexiâ necatos memini, ad unum omnes ultra modum hîc fumo se fuisse pascere solitos rescivi. Parum profecit Angliæ Rex Jacobus I. in Misocapno graviter suos ab usu dehortatus; multò magis nos furdus narrabimus fabulam, tametsi solum abusum, seriò dissuademus. Vir Clariss. Dominus Johan.

Hellwig. in *Observ. Phys. Med. obs.* 45. narrat, duos fratres quorum alter 17, octodecim alter exhausserat fistulas apoplecticorum instar prostratos fuisse, & unum eò momentò mortuum, alterum verò per bihorium, vel trihorium misere spirasse & animam egisse. Si illud, ut non dubitamus, verum est, fatis mirari non possumus, cur Vratislaviæ non quotidie multò plures apoplectici discedant, cum multos invenias, qui in hoc certamine par istud fratrum longè superent. Accedit ad cumulum malorum vita pigra ac sedentaria, quam inter congerrones & commilitones suos agunt hi fumi ductores, cum sola motus intermissio ad apoplexiam fatis disponat. Certò cuidam apoplexiæ generi obnoxios esse qui perpetuo torpent otio, ex solerti observatione Wepferi in libro sæpiusculè citat. p. 203. didicimus Paradigma exhibet curiosissimus observator p. 264. in nobili viro multum in evolvendis historiis occupato, qui ob molem corporis vastissimam vix alio labore quam tardigradâ deambulatione corpus exercuit. Nec hoc effugit diligentiam expertissimi Foresti, qui aliquoties in suis observationibus de apoplecticis, otiosæ vitæ eos fuisse mancipatos providè animadvertit. In memori pectore est, virum egregium post somnum meridianum apoplexiâ fuisse percussus, non auderemus tamen ejus injicere hoc loco mentionem, nisi prælaudatus Wepferus p. 211. nobis facem prætulisset. Multo evidentior est ratio, cur declivem inter dormiendum corporis situm atro carbone notet Lowerus in doctissimo tractatu de corde c. 2. p. 103; nam intellectui obvium est, quomodo hòc corporis situ pars feri in cerebrum deponatur, & tandem ita hinc accumuletur, donec vel in apoplexiam, vel in alios fonticos morbos hominem conjiciat. Consuetæ sanguinis evacuationes diu suppressæ via regia sunt ad feralem hunc morbum. Irrepsit in hanc civitatem aliquod hominum occultiorum genus, qui seriò dissuadent, ne qui quinquagesimum ætatis annum exceßerunt, usum V. S. & scarificationis continent, qui, quantum in ipsis est, id agunt, ut hæmorrhoides fluentes supprimantur, istud verò præconceptis nostratium opinionibus apprimè convenit, & hinc pronis auribus illorum dicta excipiuntur; alii verò, qui gravissimis rationibus ac experienciâ fulti nænias illas explodunt, vix audiuntur. Suppressæ narium hæmorrhagiæ apoplexiam post se trahentis exemplum ex Hildano jam recitavimus. Narrat idem *Cent.* 3. *observ.* 12. mulierem tributum menstruum per nares & os fatis copiosè reddidisse, hac verò excretionē impeditâ eandem in apoplexiam incidisse. A suppressione lochiorum ortam apoplexiam refert Nicolaus Fontanus *respons.* & *curat. medic. lib.* 1. p. 25. & Ballonius in *Paradigmat.* p. 318. Nec dispar est ratio hæmorrhoidum. Eò, si non nullos sequaris, Hippocrat. respexit *Coac. prænotion. sect.* 3. *text.* 66. his verbis: *Ex hæmorrhoidæ parùm apparente vertigines oborta parvâ ac modicâ siderationem significant.* Amatus Lusitanus *Cent.* V. c. 3. exemplum refert. Ausimus certò affirmare, per aliquot annos vix unum alterumve apoplecticum apud nos elatum esse, qui non vel arti-

tifi-

tificiales sanguinis ventilationes omiserit, vel spontaneas ejus excretiones inhibuerit. Inde verò manifestissimè dilucescit, quomodo strangulatoriæ jugularium vasorum cohibitiones apoplexiam accersere possint. Quid de nimia succi genitalis profusione dicemus? An & illa ad apoplexiam concitandam concurrat? Judicium nostrum meritò suspendimus, nihilominus tamen præterire non possumus, quod de Nobili quinquagenario Heinric. ab Heer in *Observat. Med.* 9. p. 103. memorat. Is ducta virgine suæ fortis inter uxorios amplexus apoplexiâ corripitur, sed ab eadem industria Heerii liberatus cum post paralyfin ad furias illas reverteretur, in uxoris sinu, ipsâ non advertente, dulci periit morte. Non dissimili fato defunctus est Dan. Beckherus, Med. D. ac Profess. Regiomontanus. A. 1670, qui cum ad secunda vota transisset, ne in se jaceretur illud Juvenalis:

*Jacet exiguo cum ramice nervus,
Et quamvis totâ palpetur nocte, jacebit:*

sumsit aphrodisiacum, ostensurus Juvenulæ, quam duxerat, se virum esse, sed in certamine illò succubuit, ac in thalamo tumultum sibi paravit. Enim verò magis sit verosimile, hos Duumviros non apoplexiâ, sed syncope esse extinctos. Animi pathemata graviora apoplexiæ periculo non paucos subjecerunt. Ex mœrore & subitâ animi consternatione matrona apoplexia periit apud Hildan. *Cent.* 6. *Observ.* 12. Præ terrore ex terræ motu Beroaldus libello de *terræ motu* incidisse aliquos apoplexiam memoriæ prodidit, nec defunt, qui territi ictu bombardæ subito exanimati fuerunt apoplexiâ, ut Lusitan. & Camerar. in *Sylloge memorab.* auctores sunt. Multos, qui occasione fulminum attoniti sunt facti, congestit Schenkius in *observat.* Celeberrimus Wedelius testis est, literatum quendam senem accepto tristi de filio absente nuncio territum lethali apoplexiâ fuisse correptum. Iracundiæ præcipites gravissimæ etiam à vulgo accusantur tanquam causæ apoplexiæ. Et profectò vix reperias Medicum, in praxi occupatum, qui non adhibere possit verba illa Foresti *Lib. X. observ.* 70: *multos conspeximus, tam viros, quam mulieres ex ira vehementiori & animi percussione in apoplexiam incurrisse.* Porro vehementiores capitis & cerebri concussionés sæpius in apoplexiam præcipitant homines, quâ de re videsis Gregor. Horstium *lib. 2. de morb. capit. Observ. Medic. rar.* 63. Hildan. *Cent.* 4. *Observ.* 11. Wepferum in *auxilio* p. 348. Wedelium in *pathologia med. dogmat.* p. 334. Nicolaum Fontan. *Disc.* 6. *fol.* 92. Dum verò passim exempla obvia sunt de apoplexiâ colaphos vehementiores secutâ apud Benevenium, Hildanum, Schenckium, Felicem Platerum aliosque, non difficulter assequimur, quod etiam alapis violentis cerebri commotio excitari queat. Quorsum refer etiam casus violentiores apud Heerium *Obs.* 21. Wepferum *loco citato histor.* 1. 2. 3. 6. alias capitis aut partium ei vicinarum læsiones ac vulnera, de quibus jam loqui non vacat,

vacat, sicut neque de tumoribus sive venereis, ut apud Welschium, sive aliis è capite ablati apud Thom. Bartholinum in *Observ. Cent. 4. hist. 86.* Prætermittimus etiam vermes, de quibus Zacutus Lusitanus *Præxi admiranda lib. 2. observ. 42.* videndus, item scabiem retropulsam, de qua legatur *observatio 58. anni 1. Decur. 1. Ephemerid. German. p. 136.* tantum adhuc addemus verbum de flatibus, quos apoplexiam producere posse credidit Hippocrates *sect. 19. text. 4. de flatibus* scribens: *Si plurimi flatus per universum corpus discurrant, totus homo sideratur, si per partem, pars illa percutitur, atque ubi abierint flatus, cessat & morbus.* His verbis non crederemus nisi aliquoties vidissemus ablationem motus voluntarii ad breve tempus conjunctam, cum stupore leni absque difficili tamen respiratione, quæ aliquam apoplexiæ imaginem exhibet. Conferri hic meretur Francisc. Valleriola *E. M. l. 1. p. m. 74.* & Dovinatus *Apolog. l. 3. c. 1.* Post mortem in apoplecticis inspectione factâ, in aliis quidem effusionem sanguinis, in aliis verò serosæ substantiæ reperiri, res est passim nota; hinc verò certum est, rectè inferri, motum sanguinis in apoplexia intercipi, atque ideò vel sanguinem sincerum è ruptis vasis excidere, vel serosam transsudare substantiam. Carolum Fracassatum in *Dissert. Epist. de Cerebro* testem advocamus omni exceptione majorem, qui jussu magni Ducis Hetruriæ corpora ex hoc morbo denatorum secuit, cui Wepferum summi judicii, experientiæ ac fidei Medicum & Anatomicum jure optimo jungimus. Perquam verò notabile est, quod causæ intercepti motus sanguinis non in cerebro sed frequenter in corde apoplecticorum deprehensæ fuerint. Ita e. g. pinguedo in sinistro cordis ventriculo à Bartholino *Cent. 1. Epist. 2.* reperta Polypum cordis grumumque sanguinis in Carotides delatum Crato reperit. Corpora calculosa, viscida, ac glutinosa in omnibus, quotquot quidem aperuerit, se vidisse refert Greifel in *Miscell. Curios. Dec. 1. an. 1. p. 156.* Quando itaque aut sanguis extravasatus cum grumis, aut serosa colluvies cerebrum vel extus vel intus largiter inundavit, istud subsidere & per hanc compressionem ac subsidentiam, de qua Bonet. in *sepulchr.* consulendus, ad operationes suas reddi ineptum, valdè est credibile. Cum vero sanguis concretus vel in ventriculis, vel in pulmonibus tantum deprehenditur, apoplecticus stupor in cerebro exinde probabiliter nascitur, quod sanguini arterioso liber aditus ad cerebrum sit præclusus. Quid enim ligata arteriâ etiam in aliis partibus fiat, à Lowero aliisque ad oculum est demonstratum. Aditus autem sanguini arterioso tantò magis præcludetur, si arteria fuerit rupta apprimè enim notatu digna est observatio Fracassati in *Diss. Epistol. ante laudata ad Malpighium p. 135.* durante adhuc motu cordis vasa dissili-
re factâ in vasis pulmonariis obstructione. Admiratione tamen dignum est, quòd interdum nulla evidens apoplexiæ causa in defunctorum corpore post mortem deprehendatur. Illustre ejus rei exemplum sistit
Clariss.

Clariff. Willis *de animâ brutorum part. patholog. c. 8. in fine p. m. 43.* Verùm pluribus egimus de apoplexiâ, quàm ferè huic nostro instituto conveniebat. Jam de curâ breviter aliqua erunt dicenda. Varia illa molimina ad excitandos apoplecticos etiam vulgo nota sunt: at nondum à nobis visi, qui acclamationibus, vellicationibus, frictionibus in plantis pedum &c. crinium evulsionibus, concussionibus &c. in apoplexiâ paulò graviore adjuti fuerint. Quantum etiam est inane in suffitibus, quantum in balsamis quocunque etiam titulo superbientibus! Næ eum, qui in his spei anchoram figit, valdè ignarum esse oportet eorum, quæ apud ægros gerantur. Quàm verò lepidum est universaliter præcipere, ut linguæ ac palato theriaca Andromachi vel mithridatium cum castoreo &c. mixtum & in aquis appropriatis dissolutum illinatur, cum os sæpè arctissimè clausum sit! Tale quid nuperrimè nobili Matronæ per quinque dies contigit. Non hæc eò fine dicuntur, quasi omnia ista damnemus; nam sæpissimè pro re natâ ipsimet his usi sumus: sed solum hæc ad sciolorum quorundam arrogantiam, imperitiam ac improbitatem convincendam pertinent. His enim, ubi unum horum omiseris, planè solemne est, clanculum funestum exitum adscribere Medici seu oscitantix, seu ignorantix. Ad validiora, si hoc ab adstantibus impetrari apud nos posset, descendendum videretur. Per admota plantis pedum ignita ferramenta ad vitæ officia in xenodochio nonnullos fuisse vocatos, quos nullum quantumvis validum remedium excitaverat, legere licet in doctissimo de *subitaneis mortibus* opere Celeberr. Lancisii lib. 2 c. 5. §. II. Et certè, ut ipse commemorat, jam multi ante eum Practici laminarum ignitarum futuris admovendarum meminerunt. Lancisius verò credit, *præsentem ignem validissimè irritando fines nervorum, maximum in iisdem tremorem & subtilissimarum partium excursum per eorum filamenta inducere posse, qui ad usque principium propagatus fortiter etiam excutiat, quicquid cerebro & nervorum ostiolis pertinaciter hæret, & per talem duntaxat maximam nervorum succussionem & particularum ignearum penetrationem amoveri potest.* Post enematum usum, vel ad V. S. vel ad vomitorium progrediendum esse censemus. Vomitorium non nisi illis offerre ausi sumus, qui phlegmatici, ut ajunt, temperamenti sunt, aut ante hac excretionibus serosis obnoxii vixerunt, multumque modo tussi humidâ, modo coryzâ affecti, aut ulcerationibus diuturnis exerciti fuerunt. His in apoplexiam lapsis, ubi serosæ ac mucidæ excretiones per memorabile tempus cessarunt, nec virium imbecillitas fuit impedimento, sine morâ exhibuimus emeticum, nec dubitavimus hoc in casu cum doctiss. Langio \ominus li vitrioli primas tribuere. Floridis ac sanguineis diætâ aromaticâ & vinosâ usis illicò vena pertusa fuit, quicunque demum exitus sequeretur. Utinam omnibus Medicis expertissimi Sylvii verba in memori essent pectore: *Judico prudenter & exactè posse imò deberi in omni apoplexiâ (præsertim verò sanguineâ) institui VStionem, & pro agrorum*

constitutione sanguinisque copiâ in vasis existente satis largam sanguinis evacuationem. Non diffitemur bis terve evenisse, ut post apertam venam apoplectici, qui adhuc initio balbutiebant, usum sermonis amitterent, sed non nisi garrulis ac stultis mulierculis condonanda inscitia est, credere, quod aphonix ipsiusque mortis causa sit celebrata V. S. Imò non sine causâ suspicatus sum in ultimo mihi obveniente ægro rupta fuisse vasa sanguifera, & hoc tanto verisimilius, quod ante VStionem tota pubis regio & partes vicinæ, ut referebat, quæ enema injiciebat, sanguine essent suffusæ ac liverent. Inter interna hucusque ex receptâ methodo, quod non meliora suppeterent, sæpiusculè usus sum sequenti Potiunculâ:

℞. ▽ antapoplect.

lavend.

salviæ aa. ℥ij.

℥ ⊖ X ci ℥ij.

lil. convall. ℥j.

Ess. castor. ℥ij.

succin. ℥j.

fyr. stœchad.

ceras. nigr. aa. ℥ß.

M. F. P.

Nec minus crebro in usu fuit liquor CC. succin. aut ~ cephal. Moebii, qui sub ~ apoplect. D. T. nomine in quibusdam officinis venalis prostat. Nec negleximus vesicatoria, imò & alia omnia, quæ à Medicis præscribuntur facienda. Non verò apud cordatos, ut speramus, nobis fraudi fuerit ingenua confessio, omnia ista in paulò vehementiori apoplexia nihil quicquam prodesse. Celsissimus quispiam Princeps in familiari mecum colloquio incidebat in mentionem pilularum, quarum virtutem in apoplexiâ multum laudabat. Dùm obiter quædam earum ingredientia commemoraret, etiam verbum de opio modo planè singulari præparato ei excidebat. Protinus memoriæ obversabatur candidissimi Ludovici observatio consimilis, sed de quâ ex propriâ experienciâ nihil addere licebat, quamvis opii usus in apoplexiâ admodum mihi sit suspectus. Cum verò hodiè usitata apoplexiæ curandæ ratio adeò parùm succedat, sæpius in mentem venit prisca methodicorum methodus, quæ modernæ è diametro opposita est. Nam locò frictionum, vellicationum, crinium evulsionum, imperat hæc *articulorum blandi tactus continentiam*, id est, suavem contrectationem; Nos hodiè spirituosissimis aquis ac odoratis nervinis verticem, tempora, vultum, spinam dorso imbuimus; methodici olim *medias capitis partes* ☿ *collum limpidâ lanâ tegebant*, ☿ *fomenta olei dulcis* ☿ *calidi adhibebant*, ☿ *expressis ex aquâ calidâ spongiis vultum fovebant*. Nos hodiè spirituosâ ac volatilia apoplecticis exhibemus; illi *simplicem aquam, sed calidam*,

dam, aut *mulsum* infundebant. Nos acribus clysteribus alvum irritamus; illi clystere simplici ac blando intestina crassa eluebant. Verbo, nobis tonica & strictoria; illis relaxantia ac stricturam nimiam solventia curæ prora ac puppis erant. Methodici, quod mireris, post declinationem passionis tantum aliquod spirituosum, scilicet vinum ægris suis indulgebant. Meretur omnimò hæc de re legi Coelius Aurelianus *lib. 3. acutor. cap. 5.* in editione quidem Lugdunensi satis accuratâ *p. 180. § seq.* in novâ verò elegantissimâ *p. 202. § seq.* De hæc prisca Apoplexiæ medendi ratione iudicium ferri accuratum nequit, ante quam eam in usum aliquoties vocaveris; in usum autem ut vocet quisquam, non temerè fuerim autor, quomodocunque cadat res, nisi animum planè adversus calumnias, vulpinas fraudes ac mille technas obfirmaverit. Quanquam, ut nihil quicquam dissimulem, rationi & recentissimis principiis methodicorum via, nisi me omnia fallunt, non adeò adversa videatur. Mira fuit ratio, qua Cardinalis Richelius Patrem Josephum Capucinum, notum in Galliâ, imò totâ ferè Europâ nomen, cum eum secundâ vice apoplexia an. 1638 die 18. Decembris obruisset, excitare voluit; nam, ut in hujus vitâ scribitur, intentâ voce subinde Cardinalis acclamavit: *Courage, Pere Joseph, courage, Brisac est à nous.*

Hoc tempore passim audiebantur querelæ de aurium dolore acutissimo. Laborabant illo potissimum Juvenes sanguinæ constitutionis, unus & alter etiam virilis ætatis. Vehemens dolor excruciat ægros parte intimâ & imo meatu audiendi. Et licet verum esse fateamur istud *Plinii, quod suus cuique dolor ad præsens atrocissimus videatur*, non possumus tamen non Galeni iudicium probare, qui differentiam quandam magnitudinis doloris juxta locos, in quibus fiunt, faciens, auris dolorem post acerbissimos colli cruciatus primo statim loco ponit. Describunt autem hunc suum dolorem ægri tanquam pulsatorium & lancinantem, qualis solet esse, quando inflammatio circa membranas & arterias oboritur. Præterea vehemens sensus ardoris adest, qui vetat originem doloris ab acribus & saniosis humoribus arcessere. Febris etiam accedere suevit. Quanquam verò dolorem hunc periculo carere minimè asseramus (cum facilè continuatione quadam per nervum & membranas ad cerebrum usque propagari queat) nec detrahimus illis observationibus fidem, quæ narrant, quosdam ex immani isto cruciatu repente perinde atque apoplecticos esse mortuos: apud nos tamen, quantum meminimus, malum hoc non facilè cuiquam perniciem attulit. Intra septem plerumque dies suppuratione finitum est. In sanguineis adolescentibus etiam citius exquisitissimum dolorem per largam narium hæmorrhagiam fuisse sublatum recordamur. Sub initium curæ discussionem inflammationis moliti sumus exhibitis blandis diaphoreticis, mane quidem in formâ guttarum, sub noctem verò in pulvere, ac horis matutinis placidum sudorem expectare iussimus. Quapropter commendavimus regimen ad uberiores transpirationem promovendam aptum, id est, corporis conti-

mentiam absque jectigationibus, & potus calidos, puta infusum Thé, Decoctum Caffé, C. C. juscula hordeacea. &c. Externè pulverem ex vegetabilibus solventibus cum Camphorâ mixtum, uti & pulverem, quem Clariss. Ludovici in erysipelate commendat, applicavimus. Ab infusionibus oleorum rutæ, chamomillæ, ovorum, scarabæorum, amygdal. scorpiionum abstinuimus, posthac multiplici usu edocti olea hæc noxia esse, quoad spes superest discutiendæ stasis sanguinæ, dum in propatulo est, emollitione membranarum uberiores affluxum sanguinis ad partem affectam concitari. Noti isti spiritus otalgici Minsichti & Barbette sensum doloris subinde augere deprehenduntur. Quando autem ex voto discussio stagnationis & inflammationis non succedit, sed ex pulsatione in auribus increbescente, febris majori ac deliriis intercurrentibus, suppuratio phlegmones instare colligitur, ad focus progressi sumus ac cataplasmata ex radice althææ, fol. malv. fl. melilot. chamom. sem. fœnugr. lini, crocô, medullâ panis triticei, vitell. ovor. &c. Res in vado est, simulac pus album, leve & æquale effluxerit, febris ac deliria remiserint, somnus placidus & profundus fuerit secutus, cum signis coctionis in urinâ.

Tinnitus
aurium.

Tinnitus aurium frequens apud nos malum, de quô primò Historiæ anno egimus, sed circa finem hyemis hoc & sequentibus annis longè fuit frequentissimum. Huic hypochondriaci potissimum apud nos obnoxii agunt. Celeberr. Wedelius *lympham elasticam halituosam, rarefieri aptam ac minus placide motam* accusat, & præter pilulas ex resinâ turpeth. scam. extracto agar. pul. rad. jalap. cinab. nat. ol. fœnic. commendat mixturam ex Ess. carminat. ʒij. Tinct. ♂ t. balsamic. vitriol. cephal. aa. ʒj. ol. citr. gt. ij. ut & pulv. stomach. Querc. c. ʒij. conch. pp. cinnab. nat. hepat. rub. Dresd. aa. ʒj. ol. mac. gt. j. Tentavimus in rebelli malo efficaciam horum remediorum, sed apud nos quidem illa expectationi non usquequaque satisfecerunt. Irrito internorum usu fatigati nostratium quidam majorem à topicis externis, quæ tamen multo parcius quam olim commendare suevimus, præstolantur opem, sed frustra; Imo sat in proclivi esset exemplis docere, quam noxia fuerint. Hic autem non possumus non atro notare carbone eos, qui auribus non probè à sordibus purgatis varia in notabili quantitate, & quod mireris, frigida, crassa, lenta ac viscida intrudunt, & paucis interpositis horis nova subindè, non absterfis prioribus infundunt, id verò cum damno ægrorum fieri incertum est.

Febris
maligna.

Unus & alter hoc tempore etiam febris malignâ detinebatur. In iis, quibus ea funesta fuit, maturè admodum tremulum in manibus ac labiis motum observare licebat; is brevi post ingravescibat; scilicet mirè incipiebant manum dimovere, palpabant, quasi aliquid captarent. Ferè taciturni jacebant demissis palpebris, & dum dormire viderentur, aliquid submurmurabant, nunquam tamen cessantes à gesticatione manuum, ex qua etiam eos delirare concludebamus. Biduò ferè ante mortem taciturna hæc

hæc infania in turbulentam mutabatur, exiliebant, clamabant, rixabantur; paucis tamen ante fatale momentum horis iterum ad sanam redibant mentem. Nec minus periculosè circa initia Martii ex malignis febribus decumbebant sanguinei quidam in floridâ ætate constituti. Ab initio statim variis obnoxii erant per intervalla vicissitudinibus. Modo per horam unam atque alteram omnia erant tolerabilia, mox iterum graviori æstu & anxietate urgebantur, sed remissiones illæ ac exacerbationes non in stata incidebant tempora, quod aliàs continuis solemne est, quæ circa noctem exacerbantur, horis matutinis remissione ægros in spem erigunt meliorem. Increbescabant vices illæ circa dies criticos. Maxima virium fatifcentia ac deliria metum augebant; & quod rei caput est, absentia excretionum ac imprimis sudoris blandi quippiam boni sperare vetabat. Urina cerevisiæ nostræ ferè similis. Tempore æstus intensioris pulsus fortior ac celerior cum vivaciori in vultu colore, tempore verò instabilis illius ac fluctuantis remissionis pulsus multò debilior erat, ac color etiam vultûs minuebatur. Tribus aut quatuor ante ineluctabile fatum diebus, angustiiis in pectore, & faucium siccitate ac ardore querentes audire licebat. Ultimis diebus rubescebat vultus, interdum etiam oculi, dolor capitis augebatur, mens deliriis gravioribus distracta hærebat. In reliquo corpore habitus strictior erat. Inferiores partes parùm calebant, integro etiam ferè die ante mortem frigebant. Antequam penitus malignam hujus febris indolem cognovissemus, & ipsi Hippocratis autoritate suffulti credebamus, ac aliis etiam persuadere nitebamur, non adeò esse metuendum, sed hæmorrhagiam criticam expectandam. Fefellit nos hæc spes, & ut verum fateamur, ad hanc usque horam, quâ hæc scribimus, ancipites hæremus, quidnam potissimum Medico agendum incumbat. Illud quidem evidens est, quod miasma vel in massâ sanguinis diffusum, vel principalioribus visceribus infixum hærens, indicet eliminationem per poros totius corporis, quod commodissimè per placidum sudorem efficacioribus alexipharmacis excitatum, & per aliquot dies continuatum impetrari novimus. At nos omnes, qui lectis ægrorum cum debitâ curâ & attentione assistunt, obtestamur, ut liberè edisserant, quam vanè sæpè ars præsidiiis suis ad hunc scopum collineet? Resistere videtur ipsa natura, quæ operosis moliminibus ferè tamen frustra hæmorrhagiam narium moliri videtur, strictura verò inferiorum partium, quæ ad hæmorrhagiam concitandam requiritur, auctiorem transpirationem, lenes sudores, ac madores peripheriæ totius remoratur ac impedit. Quapropter in eas sæpius cogitationes incidimus, Medico, si sub initium morbi advocetur (contingit autem hoc quam rarissimè) incunctanter ad V. S. & eam quidem largam (quam tamen in malignis aliis omnibus non tantùm tutò omitti posse, sed & oportere, sumus persuasissimi) esse confugiendum; & hanc præmissâ sanguinis evacuatione, Sydenhamii methodo, quæ post V. S. calidiora aliàs nobis in malignis non adeò probata, com-

mendat, insistendum, & si hac viâ negotium non successerit, ultimo etiam raninas aperiendas, nullâ utique temeritate, cùm certò si aliter procedas, ægro sit pereundum. Verùm de hac re alibi. Hoc tempore medicinam fecimus adolescenti cuidam, febre continuâ correpto & periculosissimè decumbenti. Accedebat ad cumulum malorum aphonia, quæ tametsi nos non adeò terreret, cum viderimus puerum septennem per triduum, alium verò paulò adultiorem integrum octiduum voce privatos fuisse, & tamen iterum pristinam recuperasse valetudinem, percellebat ac turbabat tamen vehementer, quod instar attoniti jaceret omnibus viribus exhaustus. Oculos subindè aperiēbat, iterumque claudebat. Cum quasi conclamatum esset de eo, primo quidem largiter ex naribus sanguis effluxit, deinde etiam pituitosa saburra per vomitum ex ventriculo sine ullo emetici stimulo in enormi quantitate fuit eliminata. Exclusa criticè opprimente materiâ per nares & ventriculum ephebus ad mentem rediit & locutus est. Idoneis confortantibus summo languori ac debilitati fuit prospectum, quo facto brevi post ex voto convaluit. Suris cum pectore communicationem quandam intercedere, alibi notatum fuit, & certè Baglivianam observationem de insigni vesicatoriorum usu in furis, quando ægri asthmate torquentur, cum conjunctissimo Collegâ nostro D. Klaunig quantivis esse pretii in Praxi experti sumus; nunc tribus annectere verbis lubet, quod furis etiam cum capite arctior sit necessitas, quam vulgò creditur. In feбри acutâ graviora conticuisse deliria oborto in furis dolore memoratum est Hippocrati, & etiam à nobis visum; rursus dolore in illis cessante, scilicet nullo prævio sudore accensas fuisse deliriorum faces itidem memoriæ proditum à nostro sene, ac semel etiam à nobis observatum est. Hactenus verò sensum Hippocraticorum verborum *in Coac. dolores circa suras mentem emoveant*: affecuti non fuimus, quia nobis nullum fuit oblatum ejus rei exemplum in febribus acutis cum tremulo partium motu conjunctis, de quibus Hippocrati ibidem sermo est. Extra febrem autem in rustico propemodum quinquagenario melancholici temperamenti durâ egestate presso, qui aliquoties consilium meum imploravit, singularem hanc circumstantiam notare datum fuit, quod præsentē dolore gravi pollicis pedis sinistri, qui per intervalla aliquoties in anno recurrit, ac in æstu ei ferè continuus est, mente sibi non constet, dolore autem illo cessante rationis usu pro modulo suo optimè polleat.

Arthritis. Arthritis & calculus multos excruciant, potissimum verò sanguineos illos, quorum functioni assidua & pigra sessio indivulsè est connexa. Certè apud Vratislavienses non exiguus est eorum numerus, qui totos dies aut domi, aut in auditoriis causarum & curiis sedent. Videas non paucorum limen à matutinis statim horis obsideri à turbâ hominum, & quorum janua

Manè salutantem totis vomit ædibus undam.

Sunt, quorum otium à prandio moribus nostris largo, & ubi res domesti-

ca permittit, vinoso statim interpellatur, totumque tempus pomeridianum rursus sedendo ac scribendo consumitur. Ac hi maturè admodum nephriticorum & arthriticorum castris aggregantur. Sæpè mirati sumus huic hominum generi vel mediocrem constare posse sanitatem, cum adeò nulla inter assumta & motum fervetur proportio. Nam non in curiâ tantum, sed ditioribus etiam in viâ sedendum, & pessimo mori manus dederunt, vehiculum perpetuò conscendendi. Si ut olim tantillum itineris, quod bis aut quater in dei repetendum est, pedibus conficerent, poterat sedentaria fatigatio hac incessûs agitatione discuti. Sed quid est tanta curruum frequentia per strata viarum nostrarum quotidie diffundit, ut nisi pedibus equorum obteri, aut conspurcari luto platearum velint, etiam ad vectationem cogantur decurrere. Huc nempè ventum est, ut videamur usum pedum amisisse, quem restitui frequentiae pristinae non dubiè censendum interesse sanitatis hominum. Martialis insaniae adscribendum putavit, si homo juvenis & validus alienis pedibus ambularet per urbem, Philippum quendam infectatus hoc epigrammate:

*Octophoro sanus portatur, Avite, Philippus,
Hunc tu si sanum credis, Avite, furis:*

ut ex togatorum militiâ non ultimus Petrus Xylander quondam Regi Catholico in sanctiori senatu à consiliis &c. in epistola ad Plempium conqueritur. Hæc vivendi ratio etiam alios morbos post se trahit.

Non paucis hujus ordinis hominibus molesta etiam est ventriculi anxietas ac dolor, qui post cibum assumptum invalescit eâ de causâ, quia ventriculi distensio à sumto cibo necessario sequitur. (Nec verò solet mitescere, donec cibus concoctus per pylorum descendit. Credibile est, hanc ventriculi debilitatem & inde resultantem molestiam non parum augeri per compressionem ejusdem post ingestum cibum legendo ac scribendo, ut jam olim observavit Platerus. Ventriculi dolor.

Mirè etiam flatibus obnoxii sunt sedentariam hanc vitam agentes, ac multi Vratislavienses alii. Paulò est obscurius, unde flatus, id est, halitiosa substantia expansionibus apta tam facilè in ventriculo & intestinorum voluminibus cumuletur. Hoc certum est, quod hîc locorum cibi, qui facilè in halitum dissolvuntur, frequentissimè apponantur. Multi vescuntur frigidis & humidis e. g. lacte, fero lactis, jusculis aqueis &c. Rursus alii delectantur viscidis, ac multorum deliciæ unicæ sunt pisces; plurimi inhiant pomis, fructibus horræis, & inter viliores non pauci fabis & pisib. &c. *quorum spiritus levi de causâ exhalant.* Tandem dulcia ac mellita, ut & massæ farinaceæ cum fæcibus cerevisiariis paratæ ac pingua quævis in frequenti apud nos usu sunt. Cerevisia quoque nostra crassa his annis ac turbida fuit multoque sedimento fœculento fœta. Admodum

dum verò est simile ex cibis his ac potu nostro halituosam substantiam evolvi in illo intestinorum angulo, in quò bilis, succus pancreaticus, lympa intestinalis, & quicquid ex poris oesophagi & ventriculi destillat, confluunt, & aliquo motu fermentationis seu effervescentiæ, ut scholæ multæ crediderunt, agitantur. Sed cum experientia affatim testatur, eos etiam, qui ab his aliisque ejus commatis cibis abstinere, nihilominus flatibus infestari, rationi non repugnat credere, eos sæpius ex reliquis alimenti non ritè concocti, ac mucos in ventriculo & intestinis semper obvio excitari. Dùm vero omnis dies docet, multos homines affatim ingurgitare cibos; quos flatulentos dicimus, & iterum, dum certè non defunt, quorum canalis alimentarius mucos satis est repletus, qui tamen aut nulla planè, aut satis levia à flatibus experiuntur incommoda præ aliis, qui minimum in cibis flatulentis commissum errorem multis molestiis expiant, necesse est, aliquam in tubo intestinorum tam disparis conditionis hominum reperiri diversitatem, adeoque intestina ipsa plurimum sanè momenti ad generationem flatuum conferre, prout hoc, vel illo modo comparata sunt. Quod si autem ad vivum omnia refeceres, deprehendes faciliè in intestinis eorum, qui flatibus vexari levi datâ occasione solent, majorem inesse flacciditatem ac remissionem tensionis illius, quâ motum peristalticum absolvunt, scholæ tonum vocant, & quidem multò significantius. Putare ergò licet, flatum excitari, quando in intestinis reperiuntur fermentescibilia ad diffusionem & expansionem elasticam apta, & intestina in hac illâve voluminis sui parte non ita tonicè tensa sunt, ut halituosæ fermentescibilium diffusioni obnitantur, sed ita flaccida existunt, ut expansioni faciliè amplius concedant spatium. Quodsi præterea fermentescibilia in intestinis præsentia hisce irritatione, acrimonia, acore, aut alio modo infesta sunt; absque dubio spasmodicæ contentiones ad amovendum & eliminandum ea, quæ molesta sunt, in intestinis fiunt, unde fit unò eodemque tempore, ut in hac intestinorum parte tonus intendatur, in alterâ verò remittatur. Quando verò portio intestinorum illa, quæ relaxatam partem excipit, etiam spasmodicè contrahitur, & hoc pacto illa à flatibus propter tonum remissum debilitata pars intestini utrinque & in superiori & inferiori regione cingitur à strictis & spasmodicè contractis intestinorum partibus, fieri profectò aliter nequit, quin flatum incarcerentur, & tormina ac dolores distensorii & quasi ruptorii sentiantur, dum nimirum flatum vi suâ elasticâ contentioni intestinorum renituntur. Arduum verò est definire, an halituosa illa substantia, quam flatum dicimus, aqueæ, an verò aëreæ sit indolis, quamvis sciamus in posteriorem sententiam propendere non paucos, quod 1. hujus generis corpori competat rigiditas, cujus ratione etiam vim elasticam exercent, illi verò partes sint molles & lubricæ ac flexiles, nisi in glaciem densentur: 2. quod ad flatum requiratur insignis rarefactio, cujus

cujus adeo capaces non sint aqueæ indolis substantiæ. Si itaque hos autores sequimur, cibi illi, qui à Fieno, & ante hunc à Celso flatulenti dicuntur, hoc nomen merentur, quod copiosorem intertextum gerant aërem, ac emittant, ad quam rem dilucidius explicandam experimenta Boylii multum conferre possunt. Si per omnia hæc Philosophia esset vera, caro bubula omnium maximè esset flatulenta, eò quod teste Boylio, ex nullo propemodum alimento major aëris copia educi posset; at verò ignoramus, an non experientiæ repugnarent, qui carnem bubulam omnium maximè flatulentam profiterentur. Sed his missis nos rursus ad flatum revertimur. Benè res habet quando deorsum spontè erumpunt; si verò aliter fiat, & ad ventriculum connitantur, major subest difficultas, nisi per ructum elidantur. Quodsi verò his viis non procedant, sæpius contingit, ut ventriculus, ad quem flatum propulsi sunt, sese nimium constringat ad flatum per hanc constrictionem expellendos, cui violentæ contentioni non rarò jungitur summa respirationis difficultas, cum gravissimis anxietatibus præcordialibus, vertigine tenebrosâ, tinnitu & strepitu aurium, frigore extremorum, ita ut ægri & circumstantes suprema instare credant, cui molestiæ generi valdè obnoxii sunt hypochondriaci ac ii, quibus hæmorrhoides negotium faciunt. Nec immunes sunt ab hac calamitate mulieres abortum passæ, & quibus menses non ritè procedunt. Verbo, incommoda à flatibus vel congenitam, vel contractam aut ex morbo e. g. dyfenteriâ, vel spasmodicis contractionibus sæpè reiteratis flacciditatem ac debilitatem ventriculi & intestinorum præsupponunt. In gravioribus à flatu angustis eò ante omnia laboravimus, ut obstructions tollerentur, & pravæ alimentorum reliquiæ, pituita viscida, fæces alvi induratæ &c. è corpore eliminarentur, quod quidem commodissimè per clysteres obtinuimus. Peto Hispanico enematis admixto vim maximam educendi flatum non sine veritate adscripsit doctissimus Glissonius. Efficaciam fumi tabaci per instrumenta fumiductoria in Angliâ & alibi eò modo parata, prout ea depingi fecit Stifferus, intestinis immisisti in rebus summè angustis summam, ut plurimis in hac civitate constat, experti sumus. Profectò si ea fumi virtus viro doctissimo V. F. Plempio fuisset æquè cognita, non excidissent ei hæc verba, lib. *de togat. valetudine tuendâ* p. 137. *Audio nuper in Angliâ excogitatum esse, & populo persuasum, atque adeo nunc esse in usu, ut fumum tabaci per tubulum flatu ingerant in eam partem, quâ ciborum onera & reliquiæ redduntur. Quid non moliuntur insani in hoc gyrgatho? &c.* Non multum solliciti fuimus de flatibus contemperandis & mitioribus reddendis, in quam rem etiam ex mente Glissonii Medico est incumbendum. Et ille quidem eâ fine commendat carminativa vinosis mixta, ratus, ea haud minimum levaminis, quoniam blando suo fotu flatuum ferociam mitigant, in dolorifico hoc malo afferre posse. Enim verò cautum in eorum usu Medicum esse oportere, certum est, tum

quòd calida sint, tùm quod strictionem in partibus intestinorum jam antea tensis augere possint. Solis phlegmaticis, qui cerevisiæ usu delectantur, in dosi moderatâ ac blandioribus aquis mixta sic dicta carminativa, nec adeò frequenter repetita prodesse experti sumus, si interpolentur nitrosa cum cinnabarinis & absorbentibus, quæ sola utramque paginam apud sanguineos & cholericos hoc in passu absolvunt. Vix autem Medicus anodynus hypnoticus & narcoticus e. g. theriacâ, philonio romano, opio &c. indigebit ad fibras præter modum irritatas iterum placandas, multò minus ad eas ita disponendas, quo minus arctè comprehendant, sed facilius dimittant & traduci sinant flatus, dummodo cinnabari & nitro peritè uti didicerit. Securius etiam mitigationem fibrarum irritatarum ab oleosis & gelatinosis, quàm opiatis sperare fas est. Nulli verò fuerimus auctores, ut ad exemplum Glissonii adstringentia ad torporem intestinis inducendum, eademque ad flatuum dissipationem coarctanda temerè ægris exhibeat. Nam ut jam ante monitum, in omni flatu adest aliqua intestinorum coarctatio. Eximium planè usum habuerunt facculi ex emollientibus & paregoricis, in quorum externorum usu commendando Aurelianus alicui nimius non immerito videri posset. Inter carminativa ut hoc adhuc addamus, egregiè locum & dignitatem suam tuetur extractum radicis pimpinellæ oleo carvi imbutum, in phlegmaticis. Spiritum tartari ritè præparatum insigne esse medicamentum testari possumus. Dedimus etiam cum effectum Essentiam cortic. Ciant. ac millefol. cum tantillo ~⊖Xci anis. &c.

Catarrhi.

Sub finem Martii regnabant catarrhi, varii generis, destillationes narium, epiphoræ, palpebrarum superiorum laxitates &c. Proderant diuretica ac inter reliqua succinata. Egregium est sequens in exiguâ quantitate ægris oblatum:

℞. ol. succin. 3j.
 ⊖ succin. volat. ʒß.
 M.

Digestione leni opus esse, quivis facile intelligit. Proderant & sudorifera serosis humoribus per cutis poros excutiendis destinata. Mihi tum in usu fuit sequens:

℞. ▽ beton. ʒiiß.
 serpill. ʒj.
 cephal. 3vj.
 ~ lign. sanct. 3j.
 Tartari compos. 3ß.
 Ess. lign. sassafr. ʒj.
 fyr. corallor.
 beton. aa. 3ß.
 M. D.

Multi

Multi etiam tumoribus paristhmiorum vexabantur, aliisque morbis fe-
 rosis, de quibus prolixè agere, non attinet. Non possumus tamen
 euporiston Joelis cataplasma in tumore tonsillarum præ reliquis satis lau-
 dare, quod, nisi fallimur, paratum ex farina hordei, sem. lini, fœ-
 nigr. aa. ʒij. coctis in æqualibus aquæ & aceti partibus ad consistentiam pul-
 tis, huicque massæ per setaceum trajectæ ol. chamom. q. f. admiscetur.

Initia Mensis Aprilis ferena & accepta erant; at reliquos ejus dies
 propemodum omnes transegimus inter varios ventorum, nebularum, plu-
 viarum, nivium ac frigoris alternationes, etiamsi interdum per aliquot
 horas nos gratior refocillaret aer. Eadem aeris erat inconstantia ineunte Ma-
 jo usque ad quintum ejusdem Mensis diem, quo veris amœnitate frui

Tumores
 Tonsilla-
 rum.

Constitu-
 tio aeris
 per Apri-
 lem, Ma-
 jum & Ju-
 nium.

cœpimus. Non tamen perpetua ea nobis fuit felicitas, nam aliquot die-
 bus nonnulla à ventis incommoda experti fuimus; sed eò gratior, quò cali-
 dior die vigesimo nos afflavit aura; pluvix quoque, quæ 23, 24, 25, 26
 die decidebant, non erant ingratae. Sub finem omnia ridebant & erat for-
 mosissimus annus. In multis Junii diebus pluit, ac in paucis admodum sol
 nobis illuxit ferenus; nam tametsi 6, 7, 10, 11, 18, 19, 22, 26, 27,
 28 non plueret, cœlum tamen nubibus erat obductum. Fulgura ac toni-
 trua cum ingenti tempestate nos terrebant die 16, ac eum sequenti im-
 petuosus imber cum grandine effundebatur. Durabant morbi, quos ante
 enumeravimus; communes valdè erant tusses, gravedines, raucitates.

Passim etiam grassabantur Epilepsix puerorum. Plures, quam præce-
 dentibus annis scabie fœdabantur. Nunquam meminimus, tot homines hoc tem-
 poris, & ferè etiam dixeris, ætatis, morbillis laborasse, quam
 quidem hoc ipso tempore. Sub finem morbi gravissimâ vexabantur tussi,
 quæ laxantibus bis terve repetitis debellanda fuit.

Morbi
 hoc tem-
 pore gra-
 fantes.

Multi adhuc exquisitissimis doloribus podagricis fatigabantur. Memini
 tum cataplasma ex radice quâdam arefactâ cum vino decoctâ pedibus podagricis
 illustris Podagrici à Chirurgo Castrensi applicatum, post horæ circiter spa-
 tium acutissimos dolores sine ullo ægri damno penitus sustulisse. Tametsi ve-
 rò tum temporis, quænam illa esset radix, resciscere non possemus, brevi
 tamen postea innotuit, esse eandem, quam, Johannes Raicus in tractatu de
 Podagra Medico-Chymico anno superioris seculi 21. edito p. 48. & 49. commen-
 dat, quam alii ambrosiam, alii cervariam, germanice *hirsch-Wurtzel* appel-
 lant. Cum verò cervariæ nomine à Tabernæmontano & argentina Monspe-
 liaca p. m. 356. & chamædris major, p. 769. vocetur, in neutram verò
 quadret descriptio Raici, diu perplexi hæsimus, quænam ea esset radix, sed
 dubium illud exemit nobis Bernh. Verzascha p. 468. scribens: * *Etliche setzen
 dieses Kraut auch zu dem Peucedano oder Haar-Strang. Es hat eine Wurtzel mit
 groben langen haar, das über sich gegen den Stengel steht, bedeckt, auswendig*

Q q 2

schwartz-

* Sunt qui hanc herbam volunt esse speciem Peucedani. Radix ejus villis crassis, lon-
 giusculis, caulemque versus erectis cooperta, extrinsecus nigri, intrinsecus albi coloris,
 odoris saporisve acris & vehementis.

schwärtzlich, inwendig weiß, an dem Geruch und Geschmack hitzig und starck. Hanc ipsam esse radicem, quam designat Raicus, patet, ex hoc, quod & ipse agnoscat, quod Tragus eam velit esse speciem Peucedani *parte 1. herbarii sui c. 148.* Nec dubium est, quin cervaria sit Libanotis altera quorundam, item Daucus felinoides major, saxifragia Venetorum &c. Accuratus adhuc eam describit celeberr. Rajus *in historiâ Plantarum lib. 9. c. 4. p. 413.* docens: *Radices plures digitales in unam coire, quæ sensim attenuata pedes duos aut tres horsum, illorsumque vagatur altius humo depacta, foris nigricans, intus alba lentam mucilaginem vulnerata manans, sapore resinaceo, aromatico, grato ad pastinacæ Germanicæ accedens saporem, substantiâ teneriusculâ &c.* Hæc radix ex mente Raici 1. abundat sale adeò corrosivo, ut ferrum penetret. 2. habet Δ purum anodinum. 3. prædita est Ψ io subtilissimo anodyno: Enim verò hæc notitia hæctenus podagricis nostris nullam attulit utilitatem, quod radix hæc nostris non sit cognita officinis. Eum autem in finem hæc à nobis commemorantur, ut ii, quibus alibi eâ utendi occasio suppetit, vires ejusdem periclitentur, & uberiores de effectu ejus cognitionem Medicis non invideant.

Affectus
oculo-
rum.

Cum variis etiam oculorum affectibus colluctati sumus. Non leve nobis dederunt negotium pustulæ in adnatâ post variolas & morbillos reliquæ, quamvis neminem latere queat, quòd omnia ea, quæ corneæ inæqualitatem ac scabritiem inducere possunt, etiam generandis ejusmodi excrescentiis apta nata sint. Meminimus, quòd multoties etiam sine prægressis variolis aut morbillis tales pustulas conspexerimus. Initio interdum vix magnitudinem seminis cannabini æquant, hærentque in corneâ non aliter ac guttula aquæ. Credibile est nutritii humoris exfudantis partem quandam esse transparentem hanc materiam subtilissimæ membranæ inclusam. Illa vero post intervallum temporis interdum satis breve turbatur, & affluxu ex vasis sanguiferis uberiori aucta in crassiusculum pus abit. Jam verò fieri aliter nequit, quam ut pustula à puris subtili falsedine rumpatur, ac pus effundatur. Quod quando contingit, remanens membrana cum antea pure distenta ac elevata esset, in se rugosa collabatur, & cuticulæ ita adhæret, ut sensim ei adnascatur, ac cum eâ coalescat. A novâ subinde materia affluente, cui rugosus ille situs faciliorem præbet aditum & domicilium, illa fibrillosa accretio augmentâ capit, & si ab angulis oculorum, majori imprimis prodit, ut certè frequentissimè ab interiori oculorum cantho prognascitur, sæpè ita invalescit, ut non tam corneam tunicam, sed ipsam etiam pupillam tegat, ac specierum visibilibus, sicut scholæ vocant, accessum prohibeat. Speramus non adeò fore improbabilem hujus texturæ ex succo alibili generationem considerantibus, & ipsos nodos & cicatrices eidem debere natales, illos quidem, ubi erosio periostiis, hos quidem ubi carne, cuteque vulnerata nutritius liquor copiosius effluit. In curâ universalibus præmissis, ruptâ pustulâ ad extergentia septica, & quæ rodendo agunt illicò progressi

gressi fumus. Nunquam enim probavimus consilium eorum, qui fotui & suffumigiis multum tribuunt, edocti à Wedelio, quod ab intempestivis fotibus studiosus aliquis cataractam reportaverit, *in Amœn. Mat. Med. p. 133.* Nota sunt collyria Foresti, Riverii, Claudini, aliorumque, sed nunquam censuimus, tantâ esse opus farragine. Initium ferè fecimus vel à pulvere ex ovorum testis parato, vel osse sepiæ, vel etiam matre perlarum alioque terreo. Ubi vidimus, hæc aliaque minus sufficere, quemadmodum certè rarò sufficiunt, illicò ad alia progressi fumus, scilicet ad vitrum antimonii, crocum metallorum, vitriolum ꝑis coeruleum &c. vitrum ꝑij. & crocum metallorum in pulverem redeimus, vino vel aquâ rosarum aut euphrasie diluimus, pulverem, qui in fundo subsedit, oculis cautè inspersimus, & cavimus ne partes oculi illæsæ tangerentur. Vitrum ꝑij est paulò segnius. Crocus metallorum oculum premit, eique pondere suo molestus est. Efficacissimum est vitriolum ꝑis in aquâ rosarum solutum, at vehementer urit, quapropter necessarium, ut brevi post oculo aqua rosarum cum saccharo Saturni instilletur. Novimus lapidem medicamentosum Crollii non sine utilitate fuisse adhibitum. °. laterini virtutem in dissolvendis laxioribus epigenesibus extolli ab aliis probe recordamur, sed istud nos quidem in oculis hætenus nondum adhibuimus.

Hæc occasione liceat nobis addere, quod experti fuerimus in quibusdam junioribus Strabismum posse corrigi, in aliis verò, quicquid etiam egeris, laborem omnem inutiliter impendimus. Et omni quidem dubio vacat, in his conformationis vitium subesse debere, nam etiam diuturnæ consuetudinis vis tanta in puerulo esse non potest, ut nullâ contrariâ consuetudine immutari queat. Vitium autem illud congenitum in nonnullis consistere videtur in hoc, quod humor crystallinus pupillæ non rectè opponatur, sed in utroque oculo vel ad latus, aut sursum, aut deorsum vergat & declinet. Eo ipso autem fit, ut ille non secundum lineam rectam, sed obliquam rebus videndis opponatur. Apud alios vitium non tam in vitioso humoris crystallini situ hæret, sed in pravâ musculorum oculos moventium dispositione ac conformatione, quâ fit, ut oculus non in situ æquali contineatur, & præterea necessaria musculorum synpraxis lædatur. Quando enim hæc pervertitur, & hic vel ille musculus antagonistam suum superat eidemque præpollet, eo ipso, dum oculum nimis in suas trahit partes, visionem distortam efficit, ac, si in utroque oculo id eveniat, strabismum inducit. Enim verò si strabismus à vitioso musculorum in oculis motu originem trahit, ut quæ diximus, fidem faciunt, in aprico est, quod per pravam consuetudinem infantes in strabismum incidere queant, dum nimirum vitiosè oculos movere assuescunt. Illustre est apud Sennertum exemplum de puellâ, quæ metu novercæ malignæ post fornacem sedens limis oculis adventum ejus observans, strabismum contraxit. Non immeritò itaque parentes strabismum metuere possunt,

quando infantes in cunis jacentes oculos vel ad hunc, vel ad illum loci situm continuè movent, & quasi fixos habent, dum enim, ut jam innuimus, perpetuò vel sursum, vel deorsum, vel ad dextram, aut sinistram partem flectunt, sensim oculi illi situi assuescunt, & eodem nisi valde in contrarium nitaris, permanent, ac strabones evadunt, & quidem brevi temporis spatio; nec enim fides abroganda clariss. Boneto qui testatur se vidisse strabismum ortum in puero ex illustri familiâ oriundo citra ullum morbum præcedentem, & strabismum quidem spatio unius hebdomadis consummatum. Aliàs & hoc compertum est, strabismum suo modo esse hæreditarium. Novimus parente strabone ortos liberos cum eodem oculorum vitio. Ex omnibus hisce liquet, humani quippiam passos esse nostros antecessores, ex quorum mente omnis strabismus vel à spasmo, vel à paralyfi proficiscitur. Et tametsi omninò sit vero consonum, à convulsione & resolutione nervorum ac musculorum oculos distorqueri atque exinde obliquum aspectum oriri, facillimum tamen ipsis fuisset strabones notare, quibus liber esset motus musculorum in oculis, hoc est, quorum oculares muscoli neque paralyfi, neque spasmo laborarent. Strabismus congenitus nulli subjacet curæ, ille verò per pravam consuetudinem contractus non adeò facilem admittit medelam. Novi applicatam larvam faciei puerulorum foraminibus ad locum oculorum perforatam, & lucernam directè oppositam fuisse, ut hoc pacto visui directo assuefacerent oculos, quod remedium ex antiquis *Paulus* commendavit *lib. 3. c. 22.* & post Paulum ex recentioribus *Jonstonus* noster in *Ideâ univers. Med. lib. 8. c. 8. p. m. 433.*; sed omnis ille labor frustra impenditur, nisi per aliquot menses continuetur.

Hæmoptysis.

Porro fidei nostræ etiam sese commiserunt hæmoptoici, inter quos fuere, qui ante eruptionem sanguinis conquererentur de dolore sub costis nothis in hypochondrio sinistro, eoque satis exquisito, ut etiam medentes redderent dubios & perplexos, an rejectio sanguinis dolorem brevi secuta per stomachum fieret, vase brevi scilicet aperto, ac in ventriculum hianti & sanguinem effundenti, ita ut lien fons sanguineæ scaturiginis hujus esset, an verò ex pulmonibus per arteriam asperam latex vitalis prorumperet? Nam ita describunt hunc suum dolorem, & locum adeò aperte designant, ut dubium nullum superesse possit, sedem exquisiti sensûs in liene esse, eumque & à stagnatione sanguinis, & compressione, contractione, stricturâque visceris ac vasorum sanguiferorum illius oriri. Nihilominus omnes circumstantiæ aliæ nos convincebant, sanguinem ex pulmonibus ferri, ut vel hinc videre liceat, quantum stricturæ & coarctationes viscerum ac vasorum abdominis conferant ad hæmoptysin. Communicata fuit ab amico methodus nova effrænam etiam coercendi, ut ajebat, hæmoptysin. Vocata ea in usum, & eximiè profuisse deprehensa est. Eam cum Practicis communicare haud gravabimur. Mistura sequens horâ septimâ matutinâ & tertiâ pomeridianâ exhibita est dosi 40 gutt.

R.

℞. Eff. millefol.
 mum. exot. aa. 3ß.
 scordii.
 Tinct. bezoard. aa. 3j.
 Tinct. myilde cynogloss. gt. XX.
 M.

Horâ verò 10. matutinâ & horâ 6. pomeridianâ hæc :

℞. Tinct. ʒij.
 ~ CC. aa. 3jß.
 M. eadem dosi.

Vesperî data fuit ex pulv. seq. 3j.

℞. bol. armen. pp.
 Terr. sigillat.
 mum. veræ.
 sang. Drac.
 spermat. cet. aa. 3ij.
 spec. Diatragac. frigid. 3j.
 spec. myil. de cynogl. ʒj.
 M. f. pulv. subtiliss.

In eruptione violentiori ex spec. de hyacinth. ʒß. quocunque tempore oblatus est ; si verò hoc medicamento ferocia effusionis non mitigaretur , ut subinde mitigata non fuit , mox hoc pulvere domita est :

℞. spec. myil. de cynogl.
 ocul. ʒ pp. aa. ʒj.
 M.

Præterea pulvis bufonum sacco inclusus sub axillarum alterâ gestabatur. Vitriolum album sole calcinatum aquæ calidæ immissum , ac sanguis erumpens in illud vas effusus est. Hæc cura non vulgaris ingenium inventoris , quisquis ille fuerit , acutum abundè declarans , ex voto bis terve successit.

Vernali hoc tempore suscepimus curam multarum foeminarum , partim earum , quibus menstrua nondum fluxerant , etiamsi 14 ætatis annum jam excessissent , si , ut frequenter usu venire solet , propter retardatum hunc fluxum valetudo earum læderetur ; (eas enim , quæ illibata fruuntur sanitate , etiamsi ad 20 ætatis annum ac diutius , imò per totam vitam lunare tributum non persolverint , nullis torquendas esse remediis , certi sumus , ac rem hîc acu tetigisse censemus Helmontium , qui credit , has foeminas tantum saltem sanguinis producere , quantum ipsis pro conservando corpore necessarium est) partim etiam istarum , quibus ex voto antea menses successerant , sed iterum substituerant. Plures sunt hîc locorum virgines , quibus justo tardius non sine gravi earum incommodo menstrua purgatio erumpit. Causas si scisciteris , variæ sese offerunt. Plebeix crassis ac viscidis saturantur alimentis , frigidam ingurgitant , & quod caput rei est , in locis frigidis & humidis ac uliginosis educantur , (rem norunt ,

Menses
tarde
erum-
pentes.

qui

qui egenæ plebis habitacula apud nos viderunt) & aliquantò adultiores linteorum extersione aut aliâ manuariâ operâ vitam tolerant, in iisdem domiciliis, in quibus nati sunt, commorantes. Fortunatiores, quibus liberalior contingit educatio, maturè vitæ sedentariæ affuescunt, dum iis imbuuntur artibus, quæ hunc sexum ornant, id est, vel filum acu ducunt, vel dulcedine musices captæ instrumenta musica animant, aut etiam in linguis exoticis Polonicâ, Gallicâ, Italicâ discendis occupantur. Quantilla est etiam illa exercitatio corporis, quam culinaria negotiola mediocribus (nam nobiliores hæ etiam curæ non exercent) nuptias anhelantibus imperant. Mensa verò, quæ his nostris apponitur, irritat famem & saturas etiam ad edendum cogit. Farinaceo butyro frixa unicæ multarum deliciæ sunt. Quando autem per tempus palato suo obtemperarunt, iuscula & calidos cibos fastidiunt, & deinceps non nisi frigidis ac crudis ventrem implent. Aliæ, quæ ad hos scopulos non allidunt, parum admodum bibunt. Somno etiam nimium temporis tribuitur à plerisque. Nonnullæ non noctem tantum, sed & optimam diei partem, horas scilicet matutinas ad octavam, imo nonam usque somno dicant. Non est exiguus numerus eorum ex utroque sexu apud nos, qui alium sibi diem, aliam à naturâ noctem faciunt, qui ad faces & cereos vivunt, qui tædas solem sibi statuunt, ut ingeniosè Carolus Scribanus S. J. in *Antverpiâ* p. 6. Nimium sordida res est, ut pergit *ibidem* & pag. seq. *vulgari viâ vivere, facereque, quod facit populus: quare publicus dies relinquendus, deligendus proprius ordoque rerum mutandus; tanquam aut natura, aut conditor Deus à ratione aberraverit.* Hæc autem vivendi licentiâ non tantum sanguis lentus & crassus evadit, sed & serum ac lymphæ mucefcit, ac ad stagnationem disponitur. Atque hinc lerna malorum, præcipuè autem lumborum, scapularum, capitis totiusque corporis gravitas & dolor tensivæ lassitudinis, cibi fastidium ac mensium retardatio. Rursus reperire licet, quas propter diætæ leges temerè violatas immeritò accusaveris, quibus tamen nihilominus non licet adeò esse felicibus, ut tempore à naturâ destinato manent menses, licet sint plethoricæ, ut exinde suspicio suboriatur, etiam sanguinis abundantiam nimiam in quibusdam mensium fluxum remorari. Non defuerunt, quibus sanguinis immoderata ex naribus & pectore profusio sæpius repetens impedimento fuit, quo minus ordinario tempore iis menses fluere. Non licuit nobis hætenus perspicuè & clarè per experientiam cernere, quod viarum angustię in juvenculis exitum menstrui sanguinis impediverint, nam tametsi captu facillimum, quomodo unus alterve ramulus arteriarum tumoribus, cicatrice &c. arctari queat: difficillimè tamen assequi datur, quomodo tam numerosæ arteriæ tum in uterum, tum in cervicem ejus desinentes hōc modo stringi & comprimi possint, quò minus sanguis ex osculis in uteri & vaginæ cavitatem stillet? Multò autem minus patet, quomodo vaginæ & colli uterini tanta possit esse angustia, ut exeunti sanguini repagulum objicere valeat, imperforatas si excipias.

Cæte-

Cæteroquin in vulgus usque notum est, quod hæmorrhagiis sæpè obnoxie vivant, qui exilibus admodum vasis præditæ sunt. Facilius deprehendere licet, in quibus haud sufficientem sanguinis motum internum arguas, cum ubique obviæ sint, quæ præ moeroribus ferè contabescant. Variæ etiam causæ reperiuntur, cur jam consuetus mensium fluxus supprimatur, sed ferè communes magisque vulgares sunt enormiores in diætâ errores, crudorum alimentorum ingurgitationes, his enim, dum sanguinis tenuitas & fluiditas sensim labefactatur, pedetentim fluxus mensium imminuitur ac tandem prorsus supprimitur. Pedum ac inferiorum partium refrigerationes, vel jam fluentes vel instantes menses simul & semel cohibent. Non disparis efficacisë est terror vehemens ac improvisus in obstruendo fluxu mensium. Novi duas nobiles præcipuo apud nos loco natas, quarum alteri, cum apoplexia matrem, alteri verò idem morbus patrem ex improvise mensium tempore eripuisset, ambæ ex panico hoc terrore in pertinacissimam mensium obstructionem inciderunt, & prior quidem à Collegâ nostro non confcio menstruæ hujus purgationis eodem die pilulas purgantes acceperat, quarum efficaciam idem terror ita retudit, ut nullæ sequerentur sedes. Post fata illustrissimæ matris menses satis largiter fluere soliti, non amplius comparuere, & post non adeò longi temporis intervallum hæc nostra febris malignâ petechiali correpta Deo piam reddidit animam, nihil proficientibus medicamentis, quæ ultimis morbi diebus cum ordinario exhibebam. Posterior priori felicior aliquot mensium labore tandem ab obstructione hâc, quam per terrorem incurrerat, liberata fuit. Ex solerti observatione constat, quod succulentis & sanguineis haud rarò menses satis parcè fluant. Hæc res, ut subinde fit, ad medicos defertur. Hi, si minus provido consilio, ut aliquando contigisse recordamur, fortiora emmenagoga, jam jam exitum molientibus mensibus exhibeant, tantum abest, ut copiosiores inde profluant, ut potius omnimode cohibeantur. His præmissis de curâ aliqua addamus. Quantum ergo concernit istas, quæ ætate maturâ evacuatione menstrua justò diutius carent, atque hinc malè habent. In iis si sint plethoricæ, curam ferè auspicati sumus à V. S., quam in pedibus circa novilunium celebravimus. Pridie verò novilunii exhibuimus laxans, ubi plerumque pilulas nostras cephalico-hystericas cum obsoleta, sed efficaci tamen mass. pilul. Ruffi in admodum moderatâ dosi mixtas præscripsimus, & multoties vidimus non sine lætitiâ ex voto hâc ratione fuisse menses provocatos. Egenis & minus nauseabundis species hieræ simpl. Gal. ordinavimus, ac re ipsâ comperimus verissima esse illa Roderici à Fonscâ in *Consult. Med. c. 18. p. m. 136.* *Nullum medicamentum est præstantius ad ciendos menses ipsâ hierâ simpl. Galeni.* Pediluvia etiam seriò commendavimus. Quodsi hâc viâ resistentes non prolicerentur menses, ad emmenagoga ac sanguinem attenuantia nos convertimus, sed ad illa quidem non nisi circa novilunium progressi sumus, & vel Eff. myrrh. Tartarifat. vel Elix. Propr. f. acid. vel Elix. balsam. Langii in vino ad 20 vel 25 vel 30 guttas alvô non obstructâ

in vino vel aquâ pulegii vel artemis. obtulimus. *myl.* Beccheri efficaciam jam anno hist. nostræ primo laudavimus. Volatilia, *Q*rinosa in sanguine attenuando plurimum valent, si prudenter iis fueris usus. Martialia aperiencia etiam laudem merentur, e. g.

℞. Croc. ♂t. aper. gr. vj.

Tart. ♂lat.

⊖ artemis. aa. gr. xv.

M. f. pulv.

Qui per aliquot dies non sine utilitate sumitur. Amavimus per tot annos contra communem sententiam exiguas martialium doses, si quando necessitas voluit, ut ad illa confugeremus. Ac parciori adhuc manu limaturam martis dedimus, quam crocum, ferè tribus aut quatuor alcohol chalybis granis contenti, cum etiam ex collegis quidam j. ingerere non vereantur. Bonum factum! abundamus suo quisque sensu. Pulveri cachectico Quercetani more Wedeliano *o. o.* cinam guttam adjecimus, alias nunquam ferè imitati eos, qui *— ⊖ X*ci vinos. cum *o. o.* succin. rutæ, fabinæ conubium tantoperè amant. Plusculum, ut ingenuè fateamur, tribuimus nodulis ex *herbis uterinis* artemis. rorismar. meliss. matricar. major. organ. calamenth. : *ex floribus* chamæmeli, matricariæ, Keyri, calendulæ, summit. aneth. *radicibus* pimpinell. levistici, galang. mei, acori veri, cichor : *aromatibus* cinamo. cassiâ lig. croco, mac. ac *laxantibus* helleb. nig. fol. fenn. &c. Nemo, quantam offerant noduli hujuscemodi utilitatem apud nos credere potest, nisi qui multoties fuerit expertus, tum in iis, quibus menses statò tempore non comparent, tum in illis etiam, quibus, postquam fluxerunt, iterum per incongrua alimenta, suppressi fuerunt. Emeticis, quorum abusus etiam alias detestamur, ferè non eguimus. Pediluviiis verò ac balneis aquæ dulcis tantò crebrius usi sumus, quæ etiam ipsis medicamentis palmam dubiam faciunt apud eas, quæ per refrigerationem ac moram in locis humidis aut retardatos menses expertæ, aut horum suppressionem incautè, ut diximus per sæpè ita fieri, incurrerunt. Paulò ante commemoravimus, menses statò ordine fluere solitos aut abrupte & impetuosius sisti; aut paulatim minui, ac tandem penitus aboleri. Sicubi prius hoc contigerit, sanguinei temperamenti foeminae febrilibus exæstuationibus, & spasmodicis agitantur motibus, simulac menses fluere desierint. Quæ verò paulatim fluxum amittunt, prouiores sunt ad catharos suffocativos, asthmata, cardialgias, tumores pedum, ventriculi ataxias ac inflationes, hypochondriorum tensiones, pertinacissimos capitis dolores, hemicraniam, vomitus, tusses siccas, artuum dolores ac viscerum obstructions &c. Ad priores illas vocati sine morâ enemata suavisimus, & quidem blanda, sine stimulo ex emollientibus & carminantibus; hisce junximus illicò Ess. pimpinell. cum guttâ unâ alterâve Tincturæ croci, & decantatas Beccheri ex selectioribus extractis pilulas, quibus factis, sæpissimè febrilis alteratio cum

con-

convulsivis commotionibus conquievit, tametsi non illicò menses iterum manaverint, quod tamen interdum fit, modò terror non illicò post assumpta alimenta mensium successum turbaverit, uti omnia majoribus involuta sunt difficultatibus, nisi vomitus spontè sequatur, aut arte excitetur & moderatè pellentia exhibeantur. At res aliter comparata est cum iis quibus sensim menses subsistunt ex erroribus in diætâ commissis. In illis utramque paginam, quantum nobis per experientiam constat absolvunt purgantia sæpius repetita, unde quidem fit, ut instantibus mensibus augeantur symptomata, sed & sæpiissimè menses revocentur, quos sperare non licet illà vice, ubi ad medicamenta idonea symptomatum malacia consequitur. Purgantibus interpolavimus in minus sanguineis Ess. aromat. DK. Elix. bals. Lang. Elix. vit. D. Tralles amici quondam nostri & Collegæ, & tandem moderatis pellentibus naturam sui admonuimus officii tempore illo instante, quò aliàs menses manare consueverant. Eludit tamen pertinacia mali sæpè artem, & optimorum remediorum vim enervat, quod potissimum, fit quando lumbrici in intestinis oberrant, ac tum frustra quidem omnis impenditur labor nisi cum uternis & emmenagogis anthelmintica sociantur.

Quibusdam gravidis per muliebria sanguinem fluere solere pervulgatæ res ^{Fluxus} est notitiæ. Non unius verò generis est fluxus ille sanguinis; interest ^{sanguinis} verò prægnantium, ut cujuslibet indolem Medicus accurate habeat cogni- ^{in gravi-} tam perspectamque. Cum verò hos disparis conditionis fluxus tum hisce ^{dis.} diebus, tum alio tempore sæpiissimè observaverimus, operæ erit pretium, eosdem breviter percurrere. Et initio quidem notum est, nonnullis ac potissimum plethoricis menses fluere, aliis usque ad quintum mensem, aliis verò toto gestationis tempore, & quidem absque omni & foetus & matris noxâ ac damno, quâ de re consuli meretur Columbus *lib. 12. de formatione fœtus p. 250.* Et his quidem absque doloribus ac torminibus placido cursu manat rivus sanguinis ex genitalibus, non cum impetu exundat, nec grumos facile vehit. Tantum abest, ut ullis artis præsi- diis ad inhibendum hunc sanguinis effluxum, opus sit, ut potius per adstringentia quævis in abortûs periculum mulier conjiciatur. Neque enim ullo modo negari potest, quod sanguinis nimia moles in utero foetum sæpè obruat, illumque vasis umbilicalibus disruptis foras propellat, quod contigisse illustri Matronæ Clariss. Verzascha *Observ. 82.* non immerito suspicatur. Neque etiam ullum minatur vel matri, vel foetui periculum, quod non rarò brevi post conceptionem statò mensium tempore per horarum paucarum intervallum emicat sanguinis stillicidium, ac altero etiam mense interdum recurrit. Enim verò aliud judicium ferendum est, de fluxu illo sanguinis, qui vel sub finem secundi, vel etiam tertii quarti- ve mensis gestati uteri prodit. Tametsi enim primum à typo evacuationis menstruæ neque quantitate, neque exeundi modo abeat, quinimò sub hoc schemate duobus aut pluribus mensibus sese sistat, grave abortûs periculum portendit. Et abortus quidem tum instare censendus est, cum

fluxus ex tranquillo (præterlapsis nonnunquam aliquot diebus) in vehementem præcipitemque laticis vitalis mutatur profusionem , quæ non raro adeò invalescit , ut ægræ animo linquantur , & extremis frigentibus jam jam expiraturæ videantur , quod etiam certò eveniret , nisi plerumque post aliquot horas immaturus foetus excluderetur. Attentam verò considerationem illa insolita animi dejectio , quæ ante vehementem istam hæmorrhagiam sese exerere solet , meretur , ex quâ solâ instantem abortum & graviora ymptomata tutò prædixeris , etiamsi tibi cognitum non sit , an mammæ sint extenuatæ , aut cujus generis lac ex his fluxerit , an latera cum ventre superiori arctari fuerint visa &c. Eo autem majori dignæ sunt commiseratione , quod impostherum , nisi uterus quam optimè expurgetur , iterum eodem , quo prius mense , iisdemque mensis diebus eadem fata experiantur , quod etiam erumpente sanguine , prægressâ lumbi coxæque insolitâ gravitate sibi ominantur , licet spasmi uteri admodum sint leves. Quando itaque confertim erumpit sanguis , metusque abortûs non vanus est , ut rarissimè tum esse solet , Medico sit religio impetui sanguinis exundantis adstringentia , tanquam aggerem objicere. Nos analeptics ac emulsionibus gratioribus & minus flatulentis vires conservavimus , orgasmum repressimus , & elisâ uteri sarcinâ (sæpè enim post primum abortum cum gravidas sese esse arbitrantur , informem gestant quandam moleculam) hujus catharsi viribus debite reparatis , sedulò vacavimus. Tandem sub finem etiam gestationis , nonnunquam usu venire consuevit , ut sanguis ex genitalibus feratur , ac maturè fluxus illius insolescat. Ne hîc cum periculo gravidæ erraremus , sollicitè attendimus , an hic sanguinis rivus ex utero , an verò vaginâ tantum & uteri collo oriretur , (ex utroque enim locò hîc ipsos etiam menses scaturire posse , cum illustri Dn. Schroëckio in *Schol. ad Observ. 91 Helwigii* persuasi sumus , non obstantibus & rationibus & experimentis Clariss. Regneri Graaf tract. de organis mulier. generationi inservientibus c. 9 p. 124) si ex vagina stillaverit sanguis , salva res , nec opus fuit magna festinatione. At longè aliter judicavimus , si ex ipso uteri fundo sanguis manaverit. Tum enim fluxus certissimum est indicium separationis placentæ ab utero , quæ simulac hinc fuerit avulsa , nunquam amplius cum eo coalescit , nec ullo modo sperare licet , fore , ut ante editum foetum fluxus sanguinis sistatur. Ne ergo falleremur ministerio manuum obstetricis usi sumus ac exploravimus , essetne internum uteri orificium apertum ? Ubi nunciatum nobis fuit , istud orificium hiare , non amplius duximus esse dubitandum , quin sanguis ex utero ipso erumperet , & tum quantocius partum promovimus , veriti , ne per inanem expectationem ex nimia hæmorrhagiâ vires fatiscerent , ac mulier sub partûs laboribus exspiraret , quod in hæmorrhagiâ continuâ & magnâ facîle evenire potest. Quod si verò illa per intervalla in exiguâ quantitate recurreret , nec gravidæ vires valdè dejiceret , expectavimus , donec natura partionem moliretur , quod in Mercatoris Itali conjuge aliasque sæpè à nobis observatum fuit.

Inci-

Incidere, fatemur, casus, ubi effluxus sanguinis admodum fuit insolens, & jure metui poterat, ne non esset ferendo ægra, tum ob eam, quæ præcessit evacuationem, tum ob eam, quæ edito foetu, referatis uberius viis., sequi posset, non tamen deseruimus ægras, sed in ancipiti hoc casu aliquid ausi sumus & circumstantibus explicavimus, quod sine acceleratione partus & matri & foetui necessario sit pereundum, ac vidimus sæpè matrem, postquam enixa fuit, servatam, nec meminimus, gravem hæmorrhagiam facile secutam fuisse. Et profectò, si post partum per aliquot horas analeptici circulatio sanguinis conservari potest, periculum mortis ex hæmorrhagiâ uteri cessat. Conf. Mauriceau *dans ses Observations sur la grossesse & l'accouchement des femmes.*

A multis hoc tempore vernali propter frequentem feminis excretionem ^{Seminis excretio.} consulti sumus. Alii conscientiæ suæ hinc metuebant, alii sanitati. Illos ad Theologos remisimus, ac præsertim ad lectu dignam St. Athanasii *Epistolam ad Ammum Monachum*, quæ habetur in *Synodico Beveregii Tom. 2. p. m. 36.* in quâ inter alia hæc etiam habentur verba: *Quod enim o dilecte & religiosissime, habet peccatum, vel immundum naturalis excretio, ut si quis vellet etiam crimen facere eos, qui per nares emittuntur mucres, & quæ per os, sputa &c.* iussimus etiam eruditos legere *Canonem quartum Petri Archi-Episcopi Alexandrini in eodem opere p. 13.* Cum iis vero, quos sanitatis cura hac de re sollicitos esse cogit, ita egimus, ut ante omnia erueremus, an tabes dorsalis metui posset, an fortè hæmorrhoides essent suppressæ, an hypochondriaco malo laborarent, an unquam calculo vel podagrâ fuissent correpti &c. nam his morbis detentos frequenter pollui, tum à nobis ipsis observatum, tum ab aliis est annotatum. De homine, qui tabe dorsali affectus ita scribit Hippocrates *lib. 2. de morbis: Inter dormiendum, sive cum uxore dormiat, sive non, veneris ludibria experitur.* Hypochondriacos præ cæteris turbari hac excretionem, exemplis à Mercuriali & aliis fuit comprobatum. Obscœnis somniis vexari, quibus hæmorrhoides suppressæ sunt, scribit Hollerius *lib. 1. de morbis internis cap. 55. in scholio.* De nephriticis & arthriticis Schenckii *observatio* prostat. Pro diversitate horum affectuum diversa etiam suggestimus consilia, omnibus verò suasimus, ut à cibis calidis, acribus, salinis, vino generoso, cerevisiis nitrosis, fœculentis abstinerent. Meminimus adhuc probè, quod quoties seni cuidam in catarrhis, quibus crebrò infestabatur, exhiberemus pilulam de styrace D. Sylvii pondere gr. j. toties in nocturna phantasmata ac pollutiones inciderit, ut vel hinc colligere licuerit, opium symbolam suam ad stimulandam feminalem excretionem conferre. Turcæ, teste Alpino *de medic. Indorum*, opium adhibent, *ut habeant de nocte impudica somnia.* Compertum quoque habemus mentham semen ita colliquare, ut fluat, quod insinuavit Martialis *lib. 10. epigramm. 48,* dum mentham vocat destupratricem, & herbam falacem:

*In quibus est lactuca sedens & sessile porrum ,
Et destupratrix mentha & herba salax.*

Non obscure eò ipsò innuens menthæ inesse vim accendendi Venerem , & excitandi spontaneum seminis profluvium. Hinc Aristoteles *sect. 20. problem. 2. mentham* , ait , *in bello ne comedas , nec seras* , cujus dicti occasione Gabriel Naudæus Vir clarissimus eleganter de usu menthæ disquirat in eruditissimo *de studio militari opere lib. 1. p. m. 296. & seq.* Vitandus est etiam decubitus supinus , quem adeò multum conferre ad pollutionem *sect. 10. problem.* credidit Aristoteles , ut concluderet etiam , bruta animantia pollutionibus non infestari , eò , quod nunquam supra dorsum & renes jaceant. Quâ in re ab eo dissentire novimus Johannem Benedict. Sinibaldum *lib. 5. Geneanthropeia tract. 2. c. 2. probl. 4. p. m. 669* ; huic enim probabile videtur , quod bruta in somno ejiciant genitiram , rarius tamen hoc contingere autumat , tum ob corporis raritatem , tum etiam ob simplicem frigidumque victum , nec non durum ac nullis stratis munitum accubitus &c. Internorum usum e. g. notas passim castitatis essentias , & syrupum ab Altomari , quem Sinibaldus *l. c. c. 3. p. 677.* describit , ac omnium validissimum vocat , nitrosa &c. commendavimus , sed experti sumus frustra adhiberi , nisi animus ab omnibus libidinosi cogitationibus avocetur , & perpetuis laboribus corpus refrænnetur & subigatur. Levissimum etiam est subsidium , quod ab externis quibusdam e. g. unguento Comitissæ , de Alabaastro , Cerussâ , refrigerante Galeni , laminis plumbi super renes gestatis vulgò expectatur. Enim verò etiam si hic æstus in regione renum parum temperaveris , vanus tamen fuerit labor , nisi occultum libidinis ignem in intimis cordis penetralibus flammantem extinxeris.

Incubus seu Ephialtes. Inter plebejos & melioris etiam censûs homines non defuerunt , qui de incubo seu ephialte conquererentur. *Es hätte sie der Alp oder das Nacht-Männlein gedruckt.* Et non minus apud nos quam apud Anglos superstitio inolevit , passionem hanc reverà à Dæmone induci atque à malo spiritu incumbente istam in præcordiis oppressionem & gravamen inferri , ut loquitur *de animâ brutor. parte patholog. c. 6.* Willisius. Quantum nobis per experientiam hujus anni constitit , gravi admodum molestiæ sensui obnoxii sunt adolescentes & juvenes in cœnâ mirum in modum crassis cibis ventriculum refercientes ac onerantes , inter provectioris autem ætatis homines , vel cacochymiâ , vel cachexiâ aut malo hypochondriaco laborantes. Una alteraque puella admodum plethorica ante liberum mensium fluxum prægravantem quandam in præcordiis molem tempore somni in decubitu supino sibi molestam fuisse itidem affirmavit. Quotquot unquam de pondere ejusmodi thoraci inter dormiendum incumbenti nam nullo modo iis hanc phantasiâ excusseris locutos audivimus , unanimi consensu

sensu narrarunt, se, postquam evigilarunt, cordis tremorem & diaphragmatis vibrationem eamque celerrimam percepisse; in eo verò nequaquam convenerunt, quòd modò sub hac, modò sub illà specie, id quod sibi incubuisse credunt, apparuerit. Tametsi verò in ultimo *hist. nostræ anno* sensum ponderis ab aère in pulmonibus retento derivaverimus, nec hodiè adhuc nos hujus sententiæ poeniteat, ac cur supino corporis situ id fiat, explicare conati fuerimus, addendum tamen censemus, sanguinem stagnantem à consortio aeris in formandâ hâc thoracis pressione non esse excludendum. Credibile verò est, sanguinem hoc in casu intra ipsos pulmones stagnare, ejusque refluxum per venam pneumonicam ex parte impediri, tametsi nihil vetet etiam concedere, quod ex dextro ventriculo cordis non satis vegetè interdum ille propellatur, ac in eo moram aliquam trahat, quod contingere tum variis aliis de causis potest, tum potissimum, quando spatium omne pulmonum latice hoc vitali nimis repletum, & ad excipiendum eum, qui affluit, incapax est, id quod plethoricis quibusdam puellis contigisse arbitramur, quæ incubo mensibus nondum fluentibus vexatæ fuerunt. Sentitur itaque ejusmodi moles pectori incumbens tempore somni in situ corporis supino, quando cor motum suum cum difficultate insigni absolvit, sanguis in ventriculis cordis & vasis pulmonum sanguiferis stagnat vel remoram patitur, ac aër pulmonum vesiculis inclusus per expirationem non redditur. Sentitur verò tantò gravius illa moles, quò magis cor, diaphragma situ supino nimis versus vertebrae lumborum extensum, ac muscoli intercostales (nam respiratio manet, si credimus Pecqueto, etiamsi omnes muscoli, in pectore & abdomine penitus abscindantur) laborant & vim movendi exerecere conantur. Attenta consideratio experimenti Vesalii *lib. 7. de human. corporis Fabric. p. 827.* De nervorum phrenicorum ac recurrentium ligatorum, vel abscissorum efficaciam ad vocem brutis vel intercipiendam, vel adimendam ac abolendam affatim docere potest quantum incommodi læsiones nervorum istorum partibus spiritalibus afferre queant. Voracioribus ac ingluviei deditis evacuantia profuerunt. Robustioribus, nisi quicquam obstaret, emetica dedimus, paulò debilioribus verò purgantia. Plethoricis puellis venæ sectio debito tempore in pede celebrata summam attulit utilitatem. Et quoniam Ephialtes in junioribus sæpè recurrens epilepsiæ, in senioribus autem apoplexiæ metum incutit, prudentiæ leges requirunt à medente, ut venientibus pro virili occurrat malis & tum omnimò suspicio est, genus nervosum pati, quamvis dolendum, quod modus læsionis ferè notitiam nostram effugiat.

Scorbutici verè tales (Scorbuti enim vocabulum à recentioribus scholis Scorbutus. nimis latè extenditur, & ferè sicut apud Aristotelicos justitia universalis complexus est omnium virtutum; ita scorbuti nomen apud multos neotericos tantum non omnes morbos suo ambitu comprehendit) multi per

per integros decem annos, quibus inclytæ foundationi Tharullianæ olim præfuimus, & incredibili ægrorum numero pro virili succurrimus, nostrum auxilium implorarunt. Scorbuticis verè autem talibus accensuimus 1. illos, in quorum gingivis indicia putredinis, exulcerationis ac foetoris præsto erant: 2. quorum artus maculis vel parvis subnigris, vel majoribus purpureis, violaceis, sublividis &c. foedabantur. Ac nusquam profectò vivam magis scorbuti imaginem spectare nobis licuit, quam in militibus, ut anceps belli alea fert, vulneratis ac mutilatis, quos dura egestas ad bellum inidoneos non sine nationis Germanicæ opprobrium ostiatim stipem petere cogit. Hi quemadmodum in castris quondam infalubribus ac interdum putridis cibis ac aquis corruptis in aère uliginoso vitam sustentarunt; ita cum truncati castra amplius sequi non valent, passim in pagis & oppidis palabundi latrantem stomachum vili pane, lardo rancido, piscibus lacustribus, lentibus, pisces, fabis, coëpis, brassica muriatâ, halecibus &c. placant. Dum autem ita passim oberrant, pristinarum sanguinis evacuationum, si non ex venâ phlebotomo aperta, certè tamen ex vulneribus illatis immemores ac securi sensim scorbutum contrahunt, pessimam, ut monuimus, diætam observandò. Dictu autem arduum est, quot scorbuto invalescente, fatigentur symptomatibus miseri. Vidimus alios, quibus vomitus & conatus vomendi ex improvisò recurrebant; rursus alios, qui crebris exercebantur diarrhœis ingesti cibi quantitatem multum excedentibus. Falleris, si illis ex efficacissimis stomachicis, his verò ex theriacalibus & adstringentibus aliquod promiseris auxilium. Lac calidum præmissis per aliquot dies absorbentibus, mirum, quam egregium sit in vomitu & diarrhœâ scorbuticorum remedium. Initio saburrham vitiosorum humorum ex pravis assumptis, in primis viis suspicabamur, ac emetica & purgantia indicari credebamus; at hypercatharses etiam lenissima pharmaca excipientes, nos docuere, quanto cum periculo à vulgo medicorum drastica illis obtrudantur. Ex adstringentium usu in leipothymiam, ad quam mirè proni sunt, incidunt. Efferas vernali, aut annuo illo, quo vulnerati quondam fuerunt, ac multum sanguinis profuderunt, tempore in orbem redeunti patiuntur hæmorrhagias, quas si cohibere satagas, in angustias inexplicabiles eos conjicies. Erysipelas vagum crebro experiuntur. Artus, imo totum aliquando corpus varii generis maculis est conspersum. Maculam nigram majorem in tumorem elevatam per tibias diffusam plus simplici vice cum chirurgo conspeximus. Pustulæ prurigine molestæ colore vario lecti calore provocatæ iis sunt perquam familiares. Tubercula dura ac varicosa, de quibus alibi, nisi fallimur, diximus, sese nobis obtulerunt. Pedes obsessos foetidis ulceribus meminimus, inter quæ periculosissimum est crustosum, quod post maculam nigram erosâ cute foetido pure initio sordidum, deinceps verò

rò celeriter in sphacelum abit, ita ut ægri non sentiant immissa chirurgi instrumenta. Ulcera reliqua manantia in feram durant ætatem, & emplastris siccantibus tractata, aut gravioris morbi, aut mortis occasio evadunt, materiâ ad nobiliora viscera regurgitante. Pustulam citrini coloris in ulcus gangrænosum siccum, quod neque pus, neque saniem redderet, & latius cum exitio militis serperet, quondam advertimus. Enimverò si non ad peripheriam corporis motus vergat, & maculæ illæ, quod interdum fit, evanescant, gravissima alia mala Scorbutici incurrunt. Quidam anguntur asthmate convulsivo, difficulter respirant nullâ præsentis pectoris angustia, nullâ præsentis tussi, sibilo, stertore &c. Convulsiones totius corporis his in locis paulò rarius scorbuticis molestæ sunt, nihilominus viro juveni medicinam fecimus, cui variis intestinorum cruciatibus ac lancinationibus noctu diuque per multos menses torto convulsiones supervenerunt, comitanti & convulsiones & colicos intestinorum dolores, febris. Nec reperiuntur adeò multi, qui ex scorbutico paralytici sint: maxima verò turba est eorum, quibus non tantum obtusus crurum dolor, sed & tensivus ac mordax cum punctorio & erodenti gressum reddit impeditum ac difficilem, cujus generis molestiæ in nonnullis manuum & digitorum extrema etiam occupant. Nihil crebrius audias, quam flebiles de contusoriâ crurum lassitudine, & manuum etiam ad motum quemvis ineptitudine, ac arthriticis simillimo in articulis cruciatu cum levi partium resolutione conjuncto. Omnium maximè adversa hæc premunt miseros, cum principium agens in expellendis heterogeneis ad peripheriam corporis est occupatum, quando autem labor hic non ex voto succedit, pertinacissimæ cephalalgicæ, vertigines tenebricosæ, exquisitissimi dentium dolores, pleuritis notha & sexcenta alia mala, quibus etiam præsentibus maculis non vacant, noctu diuque illos exagitant. Ineffabiles angustias & sævam cardialgiam observavimus aliquoties, antequam hydatides seu vesiculæ sero impuro turgidæ in cute prorumperent; his verò efflorescentibus protinus symptomata omnia evanuerunt. Cum scorbutici in febrem incidunt ardentem, horrendis ac insuetis symptomatibus exagitantur. Præter spem enim & expectationem typumque febris non tantum præcordialibus anxietatibus opprimuntur, sed in aphoniam, convulsiones, asthma, sæva deliria incidunt, ut de animi deliquiis, cardialgiâ &c. jam nullam injiciamus mentionem. Cessant verò symptomata, postquam purpura scorbutica in cute apparuit. Non adeò pridem antequam erumperent hæc scorbutica exanthemata in horribiles convulsiones lapsus est vir in consistente ætate constitutus. Alius, sed multò intemperantior febris correptus cum diarrhœâ, tertio quartoque morbi die deliravit, importunâ suâ loquacitate aliis molestus, at duabus ante eruptionem noctibus mentis alienatio tanta fuit, ut crederetur furere. Portentosa certè & sensibus & menti ejus sese objectare ex sermonibus

feris innotescebat. Accedebat nervorum subsultus, quo non nervi modo ipsi, sed & artus, praesertim manus & brachia jactabantur, tandem toto corpore vehementer contremuit, jam jam epilepsiam instare credidisses. Postquam inhorruisset, protrusae fuerunt ad ambitum corporis maculae scorbuticae, brevi post, represso delirio somnus obrepit, & aeger iterum convaluit. Illud scorbuticis affectibus est quasi peculiare, quod levibus profecto ex causis & occasionibus invalescant, ac vehementia symptomatum usque ad summum vigorem cito perveniat. Cum vero terroris omnia sunt plena, & extrema quaeque ab omnibus metuuntur, non tantum symptomatum vehementia subito remittit, sed & prorsus desinit. Praeterea in eo à cæteris morbis differunt affectus scorbutici, quod illi statim quasi & fixa durationis, decursus & reditus tempora servant, hi vagi propemodum sint, inconstantes & ad nullas temporum leges adstricti, quamvis tempore æstivo magis ferociant. In sanguinis motu ac vitiata ejus texturâ, dyscrasiâ humorum causam scorbuti quaerendam esse, facile patet. Alii aciditatem stypticam, tanquam fontem viscerum ac viscosi sanguinis, alii acrimoniam causticam, & colliquantem, alii salinas corruptiones accusant. Juxta Willisium *tract. de scorbut. p. m. 99. & seq.* sanguis in affectione scorbutica ita alteratur, ut vinum, quando nimium fervens degenerat in rancidum spiritu ejus depresso, sulphure vero ac sale exaltato, ac persuasus est vel à fervore sanguinis, ob exaltatum ejus sulphur, vel à falsedine & tardâ circulatione, qua fit, ut foeculentiae visceribus affricentur, varia scorbuti symptomata derivari posse. Qui Helmontium in oculis ferunt hoc in passu, ut Gremsius ac Horstius alique, lienem accusant, frivolâ quidem ratione, ut cognitum est iis, quibus doctrina de fermento ventriculi ex lie-ne oriundo penitus est perspecta, sed antiquâ traditione nixi, cum jam in Celso *lib. 2. c. 7.* legamus: *Quibus magni sunt lienes, his gingivæ male sunt & os olet, aut sanguis aliqua parte prorumpit. Quorum si nihil evenit, necesse est in cruribus mala ulcera & ex his nigra cicatrices fiant,* quibus verbis scorbutum delineasse videri posset Celsus. Nobis non vacat prolixè ad examen aliorum revocare opiniones, ac profiteamur nos cum iis facere, qui in explicanda scorbuti naturâ ad impeditiorem abundantis sanguinis motum, ac hinc dependentia humorum vitia utroque oculo in curâ respiciunt. V. S. in scorbuto non commendat Barbette *lib. 4. c. 3,* sed jam ostenderunt Willis & Conringius eam non posse simpliciter in scorbuto damnari. Nos sanè pereximiam ex illa utilitatem ægros malo non inveterato percepisse vidimus. Certè illud tempestiva V. S. debito tempore celebratâ consecuti sumus, ut symptomata multum de ferocia pristina remitterent, nihilominus ingenuè fatemur, nos nunquam in corporibus exsuccis, & ad sceleti formam ferè reductis eâ fuisse usos. Abstinuimus etiam ab illâ, qui nocturnis sudoribus

bus diffuunt, nam ferè exciderat, scorbuticos sub levissimis tegumentis etiam hyeme sæviente immodico sudore fatigari, ut jam ante nos observarunt alii, & disertè quidem Eugalenus *p. m.* 200. Nec præsentibus maculis scorbuticis sanguinis missionem facilè alicui suasimus. Drasticis purgantibus ac emeticis res scorbuticorum in deterius labuntur, vernali tamen & autumnali tempore alvum nodulis ex laxantibus & antiscorbuticis compositis, blandè subduximus. Succus fumarie cum fero lactis mistus egregiè multis contulit. Rhabarb. orient. itidem subindè usi sumus. Sudorifera validiora ægris lecto obrutis nunquam imperavimus metastases & exacerbationes mali, imo etiam paralyfin veriti. Neque unquam credimus, solidam fuisse causam Guil. Romano, Medico Naumburgensi, cur adeò propter virtutem sudoriferam Lap. bezoar extolleret, & cum Decocto lignorum in sudore expellendo æquipararet. Ad hæc pretium lapidis bezoar tantum est apud nos, ut egenorum, qui scorbuto maximè laborant, facultates ei emendo non sufficiant. Nec decoctis lignorum abusi sumus, nisi quod exiguum radicum & lignorum portionem interdum reliquis antiscorbuticis adjecerimus, & cum fero lactis decoqui curaverimus. Cæterum tametsi subinde locum apud nos habuerint ista medicamenta, quæ sanguinem crassum ac viscidum attenuant ac grumescentem resolvunt, quæque lympham spissam in motum cient, quo nomine alibi volatilia & urinosa in moderatâ dosi commendavimus, nec radices helenii, pimpinellæ, ari, in attenuanda lymphâ spissescenti debitâ laude fraudari queunt; nos tamen omnium maximè antiscorbuticis inhærendum esse putavimus. Vulgata antiscorbutica non promiscuè applicavimus, salino-amara & volatilia frigidioribus & pituitosis scorbuticis præscripsimus, gnari, quod biliosæ complexionis homines ~tu cochlear. nasturt. Ess. strobil. pini &c. offendantur, ac usu edocti amara acidiusculis mixta palmam reliquis præripere ac excedentem simul calorem moderari. Conf. Sylvium *p. m.* 869. Cum autem sæpe contigerit, ut ignoti, nec unquam nobis visi remedia antiscorbutica requirerent, iis quidem accipiendam in diffusioribus vehiculis e. g. potu Thèe, lacte vel fero caprino, decocto leniori ferè commendavimus Mixturem celebris quondam Practici D. Konerding:

R. ~ cochlear.

Mixt. f. aa. p. iiij.

Ess. nasturt.

chamædr. aa. p. j.

succ. cochlear. p. ij.

Solas autem guttas, quam immensis etiam præconiis divulgantur à Chymicis non multum prodesse posse hoc facilius cum doctiss. Pechlin. in *Observ.* *p.* 179. credidimus, quod in ventriculi phlegmate magnâ sui parte attritæ halitum duntaxat aliquem in sanguinem transmittant, cujus vires jam

ante debilitatæ corrigendæ falsugini (aut sanguinis texturæ vitiatæ) non sufficient, aut protinus in illa fluidi peccantis copia opprimantur. Cæterum potionibus istis, cum quibus misturam prædictam D. Konderding. aut aliam quamvis adhibendam esse diximus, nullis syrupis saccharo coctis blandum conciliavimus saporem, memores prudentis moniti Horstiani, scorbuticos hisce curandos non esse. Invaluit apud nos usus infusi trifolii fibrini, quod sine additione sacchari, instar infusi Théé calidè à multis optato cum successu bibitur. Nasturtium aut cum beccabunga in lacte coctum & per aliquot septimanas absorbentibus præmissis haustum in muliere quâdam reliquis omnibus remediis factum fecisse scimus: Lac ebutyratum aliquis Sacerdos sumptis 20 aut 30 guttis ~ cochlear. copiosè superingestum magnis quondam efferebat laudibus. Martialia, cum scorbutici ferè semper sint hypochondriaci, etiam locum in nonnullis ægris habent. His, si quando indiguimus, ferè solo pulvere Wedeliano antiscorbutico sine laudano opiato contenti viximus, iste verò ex bezoard. ♂ tial. & succino componitur. Luculenta ex diætâ humectante & refrigerante commoda plus simplici vice observavimus, & ortas inde inducias paulò longiores, cum nullis remediis hunc morbum ita expugnare licet, ut nunquam redeat. In curâ ulcerum & affectuum scorbuticorum, simplicia, quæ hinc inde Eugalenus, Reusnerus, Wierus, Joel &c. commendant, teste repetita experientiâ, optima sunt. Ad gingivarum putrilaginem & exesionem præcavendam maturè vacandum est, *emendandis exprimendisque* gingivarum tumoribus; & hi, ut verè Pechlinus, *salis corrosivi stagnantisque sanguinis pleni non ante subsidunt, quam elutriato sanguine putrido & feroso acri, quo facto gingivis firmitas per amara adstringentia & balsamica, quæ tum ab aliis, tum Sebizio in Spec. med. p. 483. & seq. recensentur concilianda est.* Decoctum scordii cum alumine usto, ☉ fixo & melle rosato, quod Pechlinus laudat, multis profuisse certum est.

Ejectio
medica-
mentorum
non alte-
ratorum.

Hoc tempore ac deinde sæpius feci Medicinam infantibus, qui non tantum liquida & potulenta, sed & pulveres absque ullâ mutationis notâ intra horæ spatium rejecerunt. Nuperrimè adhuc spectavimus illud in Patritii cujusdam filiolo, à quo pulvis antispasmodicus cum specifico cephalico mixtus ad præcavendum Epilepsiæ, quam ante biduum passus fuerat, novum insultum datus, vix elapsa horâ secessit prorsus non mutatus, id quod satis mirari non poterit, qui intestinorum longitudinem & flexum seriò perpenderit. Perplexos ea res nos tenuit hætenus. Quod modò allatum est exemplum, videtur suadere, quod internarum partium convulsionem transitus hic assumptorum absque minimo immutationis indicio præsupponat. Enimvero puerulum quendam, qui ex atrophia totus contabuerat, ac pulchrè paucis remediis cum ingenti parentum gaudio restitutus videbatur, præter votum, ut incerta hominum spes esse solet, in æstum cum

cum diarrhoeâ conjunctum post aliquot à recuperatâ sanitate septimanas incidentem tractavi, qui absque omni convulsionum internarum signo assumpta quævis & medicamenta per sedes eliminabat, penitus non alterata. An hic atoniam fibrarum & colliquationem accusabimus? Apud Cælium Aurelianum *lib. 2. tardar. passion. cap. 1. (p. 316. Ed. Lugd.) leguntur seq.*

Perulo paralyfi vitiatò cibus nulla digestione mutatur, sed tanquam per infundibulum ad inferiora descendit & circum ventrem laxior locus efficitur inferius inflatiorque : quæ per ventrem egeruntur, aspera atque plurima erunt & neque fluida. Cornarius ut perulum Cælii exprimeret, margini adscripsit *πύλωσις*, & ut rectè monuit æternum eruditæ Germaniæ decus Thom. Reinesius *lib. 3. variar. lect. c. 18. p. m. 662.* scribendum est *πύλωσις* & hanc lectionem Clariss. Amman in nuperâ editione *p. 346.* secutus est: *pyloro paralyfi vitiatò &c.* Itaque quando dextrum ventriculi os, quod in ventriculo conclusa, tantisper dum cocta sint, custodire debet, paralyfi correptum est, ex mente Aureliani recepti cibi & medicamenta protenus sine ullo alterationis vestigio ab alvo deturbantur, quod fortè sæpius fit, quam vulgo creditur, aut à Medicis hætenus observatum.

Paralyfis
Pylori.

Paralyfis, quæ fauces & oesophagum occupat, paulò lest frequentior, quam in non paucis moribundis observavimus, de quâ Aurelianus *l. c.* legi potest. Triste, & cujus simile nec videre amplius optamus, præbuit nobis exemplum vir circiter quinquagenarius melancholici temperamenti, quod hac occasione recensere liceat, tametsi casus hóc anno, cujus historiam damus, non contigerit. Is juventutem in aulâ egerat, postquam autem virilem ætatem attigisset, officio admotus est, quod eum toto die in scribendo occupavit, hinc verò solitudinis amor in eo crevit. Id vitæ genus cum per aliquot annos esset sectatus, subito apoplexiâ obruitur. Adhibitis idoneis remediis nihilominus *παράπληξία* lateris dextri successit, sed & ab hac feliciter liberatus est, ita, ut ferè ad pristinum statum reverteretur. Præterlapsis aliquot annis membrorum stupor resolutionem denuò instare nunciabat. Et verò ita planè evenit. Improviso enim obmutuit, usumque pedis utriusque amisit. Ad ipsum vocatus sine mora advolo. Sensus utcunque erant integri, ratio etiam sibi quodammodo constabat, & innuebat sese me agnoscere. Maximopere etiam conabatur loqui, sed verbum nullum distinctè aut integrè proferre poterat, quam operosè etiam illud moliretur, inconditus & confusus tantùm clamor erat. Linguam movebat, nec in eâ ullam coloris mutationem aut aliam quamvis differentiam deprehendere potui. Dum præscriptæ potioni avidè inhiat, ejusque *ζij* circiter ori infundit, miser experitur, se illam deglutire non posse, ac ita circumstantibus nobis patefecit, musculos laryngi & pharyngi communes à paralyfi non esse immunes. Post injectos clysteres, apertas

Paralyfis
faucium &
oesophagi.

raninas & medianam, ut vocant, perfusam spirituosus linimentis diu multumque nucham, dorſique regionem, poſt immiſſam per ſyringam varia morbo debellando idonea remedia, poſt fauces tum aliis, tum oleo cinamomi imbutas, veſicatoria applicata, aliaque molimina potum aliquanto diutius retinebat, ſed ſenſuum torpor major erat, manus quoque intumeſcebant; nihilominus liquida injecta non immutata reddere cogebatur. Id quod argumento erat, ipſum oſophagum graviffimâ paralyſi eſſe affectum, atque virtutem medicamentorum ad eum non fuiſſe diffuſam, quæ tamen quadantenus in faucibus, ut ex deglutitionis rudimentis apparebat, ſeſe exeruerat. Lugubris illa ſors afflictiffimum virum per octo dies preſſit. Nullis verbis exprimi poteſt, quantis cum lacrymis & ejulatu, quam flebili geſtu potum deſideraverit. Altero morbi die juſſus breviter in charta adſcribere, quamnam re poſſimum affligeretur, inextinguibili ſe ſiti urgeri calamo interprete ſignificavit. Truculentia affectus tandem hominem occidit. Neque apparet, quomodo huic morbo occurrere debeat. At alia res eſt, cum fibræ ſpirales in media ventriculi tunica ſpafmo conſtrictæ ſunt, ac muneri deglutitionis inſervire nequeunt. Pertinax quidem & hoc malum eſt, & per multas, ut aliquoties experti ſumus, ſeptimanas recurrit, tandem tamen antſpafmodicis ſelectioribus expugnari poteſt. Non tantum vulgus, ſed & ipſi Medici de Paralyſi muſſitant, cum ſpafmodica oſophagi ſtrictura alimenterum tranſmiſſioni obicem ponit, qui tamen audiendi non ſunt, ac eos ipſos poſt intervallum aliquot horarum liberum relaxata iſta conſtrictione potulentorum & eſculentorum ad ventriculum iter, ac ſermonis uſus non adeò quidem expeditus, non tamen planè ſublatus redarguit & erroris convincit. Tum verò neque de paralyſi, neque de ſpafmo cogitandum eſt, cum, quod etiam meminimus aliquoties à nobis obſervatum, cibus ſolidus abſque difficultate, juſcula verò ac liquida omnia non ſine præſenti ſuffocationis metu deglutiuntur. Diſcuſſis enim omnibus nihil vero ſimilius occurrit, quam vitium aliquod in epiglottide hæſere, quod impediât, quò minus rectè & accuratè tegat arteriam aſperam. Dum itaque cibi ſolidiores epiglottidem validiùs comprimunt, abſque ſuffocationis periculo in ventriculum demittuntur, liquida verò cum huic compreſſioni non adeò apta ſint, fit, ut in arteriam aſperam non ritè clauſam delabantur, ac eò ipſo ſpiritum præcludant ac ſuffocationis metum afferant.

Venæ ſectio in Raucedine.

Venæſectionis efficaciam in Raucedine notabilem hoc anno obſervavimus. Virgo religioſam vitam profeſſa ſanguinei temperamenti & floridi corporis habitus, cui menſes ritè ſemper fluxerant, bis terve in anno raucedine corripitur. Illa nulli ceſſit remedio niſi ſoli V. S. & quod me, ac nuper etiam meum in cura illarum Religioſarum ſucceſſorem D. Klaunig in admirationem rapuit, hoc eſt, quod, ſimulac ſanguis ex pertuſa

pertusa vena effluere incipit, vox clarescat, & absoluta V. Sectione nullum raucedinis vestigium remaneat. Expertus sum etiam in duabus aliis virginibus, quantum V. S. in raucedine valeat, sed effectu non æquè prompto ac in sensus incurrenti. Impensè verò dolemus, quod V. S. successum in quinquagenario illo, cuius mentionem fecimus in Hist. M. A. 1699. p. 42. non fuerimus periclitati, sed potius nos strigosi corporis siccitate à generoso hoc remedio deterreri passi fuerimus.

Vidimus hoc anno in viro hernioso scrotum magnitudine vasta, illudque referebat figuram cucurbitæ oblongæ majoris. Sine dubio in Hernia. illud sine fascia convenienti pendulum magna defluxerat intestinorum pars. Sed hoc peculiare & admiratione dignum censuimus, quod ob hanc Scroti portentosam magnitudinem & distensionem penis planè intrò retractus esset, ut in hypochastrio, seu superiori scroti parte nullum ejus vestigium appareret, præter foveam, quæ ad glandem intus latitantem pertingebat. Ex foveâ hac urina effluebat, sed necesse erat, ut quotiescunque urinam reddere vellet, manu tumorem reprimeret & ita foveam dilataret. Hoc officio, nisi manus fuisset defuncta, urina in scrotum decidebat, & per ejus longitudinem destillabat. Ad hæc eum corpore incurvato mingere oportebat, nam si erectus urinam reddere vellet, lotium non recta procedebat, sed propter urethram distortam versus abdomen effundebatur, quod olim non tantum Imperatori Heraclio, teste Zonara, contigit, verum etiam aliis. Certè alicubi huic per omnia simile exemplum ante multos annos nos legisse recordamur. Verba Zonaræ de Heraclio hæc sunt: *Ferunt etiam pudendum ejus universum sursum urinam emisisse, eumque nisi tabula apponeretur, faciem suam comminxisse.* Non obscure totum hoc & vulgus, & ipse Zonaras ad vindictam divinam ob Monotheletarum hæresin & ductam in uxorem fratris filiam referebat. Hoc anno ac sequenti etiam famosus agyrta multos herniosos, quo fato etiam mihi vir ille, de quo jam jam locuti sumus, innotuit, cum castratione alterutrius testiculi secuit. Tametsi verò non in omnibus feliciter hæc temeritas ei cesserit, sed vel in ipsa crudeli operatione pueri quidam convulsi exspirarent, vel eadem peracta vomitibus & epilepsia fatigati charis parentibus tandem per mortem eriperentur; ea tamen multorum dementia fuit, ut vel semetipsos, vel suos imperito artificis cultro certatim subjicerent. Opposui huic nos torrenti pro virili, & ostendimus tum quidem temporis nobis præeunte Schradero in Dec. I. Observ. 6, quâ anatomen cadaveris virilis ab Hornio 1669. instituti describit, & Decad. 2. Observat. I. quæ dissectionem herniosæ sistit, ac Bidloo Anatom. tab. 32, quantoperè principiis anatomicis tralatitia herniotomorum de ramice opinio repugnet. Confirmati sumus postmodum in hac nostra sententia per suffragium Domini D. Bohnii summi anatomici in lectu dignissimo de officio Medici opere c. 22. p. 523.

p. 523. & seq. Accenderunt nuper nobis adhuc clarius lumen ingenio-
sæ observationes de herniis celeberr. Domini Mery dans les *Memoires de
l'Academie Royale des sciences pour l'année 1701. p. 356. & seqq.* ut jam
nulli ambigamus, herniotomiam vulgarem ignorantiae veræ ramicum ætio-
logiae ac conformationis processuum peritonæi & vasorum spermaticorum,
originem progressumque unice debere. Parum verò dissuasiones nostræ
apud multos valuerunt, ac ferenda fuit, perinde ut in aliis usu venire
suevit, vulgarium hominum temeritas. Hæc in re secuti sumus pru-
dens monitum Fortunati Fidelis: *Si acriter illorum insaniam reprehendas,
ad jurgia profecto, quod gravis Medici non est, devenias tandem oportet:
si differendo falsas velis illorum opiniones studiosè nimis & accuratè de-
primere, frustra id atque indecorè cum imperito homine ac rerum medicarum
ignaro laborabis.* Hæc ille in *Medic. Patrocinio lib. 4. c. 5. p. 24.* Nos
profecto quamdiu medicinam fecimus, nulli fuimus auctores, ut circum-
foraneorum crudelitati sese permetteret, sed quantum in nobis fuit, la-
boravimus, ut herniosis per bracheria & debita remedia opitularemur.
Pressimus in curâ vestigia celebrium Medicorum & Chirurgorum. Fa-
cilis est methodus, quam post tot alios nuper commendavit Dionis dans
le *Cours d'operations de Chirurgie démontrées au Jardin royal p. m. 288.*
& seqq. Novum illud herniarum genus, quod detexit Monf. Littre in
Memoires de l'academie des sciences pour l'année 1700. p. 384. & seqq.
nostram in observando diligentiam hactenus effugit. Mirabile illud est
& aliorum quoque industriæ commendandum. Describitur verò in mo-
dò laudata *Academie Regiæ Scientiarum Historia* his verbis: *Une portion
d'intestin s'engage dans un anneau, mais non pas entiere. Il n'y a qu'un
des côtés du canal de l'intestin, dont la membrane, quelque cause que ce
soit, s'enfonce dans l'anneau, s'y allonge peu à peu, & forme à la fin un
tuyau sans issue, droit & simple, semblable à une branche, qui se jette à
côté de son tronc &c.*

Curæ Ver-
nales.

Curæ Vernales, de quibus aliquid dicendum restat, apud Vratis-
lavienses in magno habentur pretio, & quondam Medicis non ingratae
erant. Nostri certè antecessores studiosè videntur inculcasse utilitatem,
imò & opinionem de necessitate earum fovisse, nam florentibus tum in-
colarum rebus, ut fando accepimus, & hodiè adhuc quidam, quamvis
oppido rari, veteris consuetudinis, ut ipsimet prædicant, retinentiores
munusculo testantur, Medici V. S. celebratâ unctiores domum redibant.
Brevi autem ambitu ferè apud nos cura, quam vocant, Majalis cir-
cumscribitur, nempe purgatione & V. S. absolvitur, & illa quidem non
omnibus æquè necessaria judicatur, hæc verò ab iis præcipuè, qui pris-
tini in ornandò Medicò moris sunt servantiores, sine piaculo & periculo ma-
ximorum morborum omitti non potest. Nos, qui nunquam, absit arrogan-
tia dicto, aliorum commodis insidiam struximus, quique res Medicorum hisce
tempori-

temporibus ferreis nullatenus reddere cupimus deteriores, conscientiae nostrae dictamen secuti etiam cum damno nostro pro re nata ostendere coacti sumus, curationes illas vernaes nequaquam omnibus, qui olim illis usi, esse necessarias aut utiles. Neque hic substitimus, quinimò hallucinari demonstravimus eos, qui purgatione semper opus esse contendunt, cum evidens sit, noxios humores, non solâ purgatione, sed & per urinam ac sudorem è corpore eliminari posse. Sed nonne etiam abunde constat, quod multi non evacuationibus, sed correctione humorum indigeant? His annon praescribenda ea sunt, quae humores corrigunt ac temperant? Hinc non pauci evidentiam rerum convicti sententiam mutarunt, ac ferè in oppositam lapsi sunt, quasi V. S. ac purgatione nunquam, sed solâ sanguinis depuratione, ut loquuntur, esset opus. Enarrabimus breviter, quomodo ad multorum votum curas has administraverimus. Quando & Venae sectione & purgatione opus esse agnovimus, hanc contra multorum sententiam illi postposuimus, & à V. S. initium fecimus. Venae sectionem autem necessariam esse judicavimus 1. Plethoricis. Nam quantum plethora periculum minuetur, nemini in medicinâ versato ignotum esse potest. 2. Quibus consuetæ sanguinis evacuationes v. g. menses in foeminis, haemorrhoides in viris suppressæ fuerunt, ac in utroque hoc casu V. S. in pedibus suasinus. 3. Iis, qui hæmorrhagiis enormioribus obnoxii sunt, ad præoccupandas violentiores sanguinis effusiones, quod multis ex voto successit. 4. Quorum sanguis viscidus & crassus est, multoties experti, quod, quando sanguis à naturali suâ fluiditate abit, ac in vasis stagnat, si accedant frictions & medicamenta resolventia, insigni usu sese commendat V. S. imprimis si in hypochondriis & abdomine tensiones variæ sentiantur, ubi iterum V. S. in partibus inferioribus magis è re esse, quam in superioribus, compertum est. Tandem 5. ex cacochymis etiam illis, qui biliosæ calidæque sunt complexionis, sed fere tum demum, si per multos annos sanguinis depletioni fuerint adfueti. Tribuendum hic multum est consuetudini, præterquam enim, quod verè nocere queat, teste experientia, in assuetis omissio V. S. id etiam damni in medicum redundat, quod pravo ejus consilio, si quando in ægritudinem deinceps ejusmodi cacochymus incidat, morbus unice adscribatur. Itaque in hujusmodi circumstantiis V. S. haud illibenter admisimus. Quamvis enim negari nequeat, quod cum vena fuerit aperta, sanguis bonus malusque nullo delectu fluat, certum tamen est, & experientiae fide comprobatum, à boni etiam sanguinis jactura in quantitate non adeò magnâ, nullum imminere corpori periculum, dempto autem ex parte vitioso sanguine, id quod ex eo reliquum est, melius corrigi ac superari posse. Contra receptum verò morem, non in Majo, sed in Martio, ubi dicto fuerunt, qui consilium implorarunt, audientes, vernaes has V. S. instituimus. Nec dubitavimus,

V. S. floridis senibus, etiam septuagenariis, ubi nostris consiliis locus datus est, suadere. Enimverò dici non potest, quantopere non tantum hi, sed iis ætate minores, puta sexagenarii, imò & quinquagenarii à V. S. falsis excœcati præjudiciis abhorreant. V. S. præmissâ, ubi opus fuit, purgantia fuere exhibita, non tamen omnibus eadem. Utut enim electivè, quæ vocant, purgantia non admittamus, usu rerum edocti, quod e. g. rhabarbarum non tantum bilem, sed & ferum, jalappa non ferum modò, sed & bilem, ac helleborus non tantum fæces adustas, sed etiam bilem ac pituitam, ac denique catharticum quodvis justâ dosi omnis generis humores ex corpore faciat exire: negari tamen non potest, alia aliis evacuantia magis conducere. Mirè Vratislaviensibus placet formula pilularis, unde etiam celebri Poëtæ ac inclyti senatûs Præsidi de Hoffmanswaldau elegantissimi versus nati sunt. Primum autem obtinent locum apud nos pilulæ cephalico-hystericæ, quarum compositio hæc est:

℞. Extr. colocynth.

res. jalap. aa. ℥℔.

℥ dul. ℥ij.

Extr. helleb. nig. ℥iiij.

castor. (quod communiter omittitur, nisi expresse additio præcipiatur) ℥ij.

Sufficiunt validioribus gr. xij. xv. ad summum xvij. vel xx, quamvis etiam vij. viij. grana quosdam satis commoveant. Non semper tamen eadem chorda oberravimus. Tum temporis in creberrimo nobis usu erant etiam sequ. formulæ.

℞. ℥. de hier. c. agar. vel Extr. panchym. Croll. gr. xv. gumm.)-(ci in aceto solut. ℥℔.

Extr. trochisc. alhand. gr. j. vel ij.

c. f. q. Elix. propr. f. l. a. pilulæ.

℞. Extr. agar. vel resm. agar. gr. xij. vel xv.

Magist. gum. de Peru gr. vj.

℥ tartari. gr. ij.

c. fyr. de stoech. f. l. a. pilul. consperg. pulv. liquir.

℞. ℥. de lapide Lazul. ℥j.

Magist. gum. de Peru gr. v. vel vij.

tartar. vitriol. gr. iiij.

c. f. q. Tinct. & tartaric. aut fyr. de epithym. f. l. a. pilulæ.

Nemo nisi expertus credere potest, quantoperè ultimæ hæ strigosæ corporibus, ac ita dictis melancholicis profint. Cave itaque propter antiquam massam, quæ multis modò non est ad palatum, eas despiciatui habeas.

℞. Extract. rhabarb. ʒj.

Ref. scam. gr. vj.

q. s. q. fyr. de cich. c. rhab. f. Pilul.

Olea destillata nec pilulis nec reliquis purgantibus per decem fere annos addidimus, tùm quòd purgantium vim retundant, tùm quòd secus ac multi alii crediderunt, evacuantibus fociata, tormina excitent, Pulveres nostri purgantes ex diagryd. aut rad. jalapp. pulveris. cum tartar. vitriol. & diaph. &c. componuntur. Ultra 12. grana diagryd. vix dedimus. Sæpius adjecimus pulveribus purgantibus duo aut tria grana ☉ fulminantis, neque enim negari potest, quòd hæc viâ & virtus purgantium extollatur, ut in minori dosi operentur, & tormina egregiè præcaveantur. Convicti sumus de veritate nostræ sententiæ ex eò potissimum, quod idem purgans in majori dosi exhibitum absque ☉ fulminante segniter, & cum multâ intestinorum torsione sedes excitârit, ipsissimum autem illud præscriptum uni eidemque Sacerdoti in minori dosi, sed duobus croci ☉is granis mixtum absque ullo molesto in intestinis sensu pluries alvum laxârit. Coepit ante annos aliquot calx illa ☉is nonnullis Practicis esse suspecta, quòd infanti cuidam fatum accelerâsse crederetur. Vocatus Medicus ad infantem diris torminibus exagitatum, cum ex lactis acescentis cum bile ac succo pancreatico in intestino duodeno congressu, vel fortassis ex solo lacte congrumato sensum ardoris & doloris derivaret ac epilepsiam metueret, ad imitationem Cl. Lentilii pulverem, nisi fallimur ex ☉ro & ☉ fulmin. præscribit. Sumpto medicamento tanta fibrarum atonia ac motuum in intestinis ferocia secuta est, ut omnia, quæ infanti infunderentur citius ab alvo (ita mihi narrarunt, qui infanti adstiterunt) deturbarentur, quam fundum ventriculi attigisse adstantes conjicerent. Ictu oculis citius omnia secessisse matris vox erat. Hæc diarrhœa exhaustus infans interiit. In Medicum culpa conjicitur mortis, ac fama ejus vehementer, ut fieri solet, oneratur. Indubium est, quòd infantes absque ullò pharmacò sumptò ejusmodi diarrhœâ colliquativâ non rarò conficiantur. Nec esset, cur causæ suæ, si coram tribunali medico disceptaretur, anxie metueret medicus, cum vitiosa ista materia, quæ torminibus ansam præbebat, sive in ventriculo, sive in intestinis hæreret, proscriptionem ac eliminationem ex corpore indicaverit. Hanc verò etiam Lentiliano pulvere exterminari potuisse non adeò multi fortè inficiarentur medici. Ille, qui curæ præfuerat, à Pharmacopœo peccatum fuisse, aut alium quempiam offerendo pulverem, aut commisso in præparando ☉ro fulmin. errore, contendebat,

quâ de re nostrum non est judicare. Quicquid tandem de hoc casu dicatur, nos ferè affirmare possumus, nullum ex usu calcis hujus cuidam, quantum nobis quidem constat, ægro natum incommodum, & audemus spondere, nec ex usu istius in posterum noxam esse metuendam, modò & is tantillum, quod ducato fuerit admixtum providè amoveatur (ne particulæ & eæ cum croco ☉ is commisceantur) & deinceps cum ☉ aut alio salino in mortario orichalceo ☉ fulmin. non subigatur, ac tandem à medico debito tempore & loco adhibeatur. Verum hæc obiter. Prætereà nobis familiarissimo in usu est potio ex ∇ laxat. Viennens. ☉ eff. tartari, speciebus diatartari ac syr. quodam e. g. regio, domestico, de cichor. c. rhab. diafer. Andernac &c. ut quondam fuit Sydenhamii. Ex speciebus diatartari Myns. ☉ sufficit, raroque ad 3ß ascendimus. Grana 8. vel 10. Resinæ jalapp. vel scammon. in vitell. ov. soluta & cum ∇ viol. fl. acac. &c. ac julep. ros. borrag. &c. mixta sufficienter evacuant. Emulsio hæc grata est, nec nostratum delicatius istam respuit palatum. Noduli quoque ex radicibus, herbis ac laxantibus à quibusdam expetuntur. Addidimus hisce ut plurimum semina anisi, carvi & aromatum quiddam, ut tranquillius agerent & sine stomachi injuria. Infusorum horum vires faciliè & innoxie intenduntur, si singulis dosibus liquor. tartar. tartarizat. gt. 30. adjeceris, quò ipso etiam tormina præcaventur. Bolos & Electuaria plurimi inter nostros fastidiunt. Pridiè purgationis quidam digestivis, ut vocare mos est, non malo utique consilio & successu utuntur, quorum loco sicciores, quibus frustra interdum opinionem de necessitate purgantis excutere fategeris, ad lubricandas vias, liberalius haurire jussi sunt jusculum, cui rad. alth. incocta, id quod ab ipsis cum maximâ eorum utilitate factum est. Non tamen nostro nos defunctos credidimus officio, nisi etiam pro virili correctioni humorum incumberemus. In hac autem humorum correctione non habuimus ante oculos nostros multiplicia illa craseos humorum vitia, quæ nimis sollicito studio veteres, quos alias tam libenter defendimus, quam alii impetunt, in scriptis suis explicant, multò minus sexcentos illos salinos recentium sapes, acidum, falsum, ponticum, austerum, causticum, colliquativum, amarum &c. ac horum omnium innumerabiles inexplicabilesque misturas & gradus; sed 1. visciditatem & crassitiem, 2. autem istam falsedinem, quæ ad salis culinæ acrioris, aut acetositatis indolem propius accedit, fere unice respeximus. Præter medicamenta nostra commendavimus ægris placidos corporis motus ac sufficientem per potum dilutionem, unde uberiores, quam ex remediis ipsis perceperunt utilitates. Nuper hic locorum, ut illud obiter addamus, cæpit innotescere cura quædam sordida per lotium vaccæ vernali tempore in floriferis pratis pastæ sub ortum solis affatim haustum, quam Galli, quibus initia debet, rem turpem pulchro velaturi nomine vocant *la cure de mille fleurs*, occasione, nisi fallimur, sumpta

ab aquâ omnium florum. Fœminam 50. annorum ascite laborantem, remediis aliis parum proficientibus hâc curâ fuisse restitutam D. Klaunig compertum habet. Cæteroquin nobis hætenus adeò felicibus esse non licuit, ut totam sanguinis massam jam vapescentem in integrum restituere licuerit. Novimus, qui sesquipedalibus verbis per arcana sua hoc pollicentur. *Miramur & istos, & nostri nos pœnitet.* His enim mysteriorum plus quam eleusynis initiati non sumus. Sicut enim lac acescens, vinum rancidum &c. arte in pristinam naturam restitui non potest, ita forte nec sanguis illis analogia respondens, ubi semel mistura & compages ejus vel soluta fuerit prædominante quâdam ejus parte, vel per interpositionem materiarum noxiarum graviolem subiit mutationem, notis medicamentis in antiquum reducitur statum. Non ignoramus Paracelsum olim jactasse, à se inventum tale medicamentum, quod omnia vitia sanguinis mutet, & illum in optimam convertat temperiem, sed dolemus, quòd si unquam tanti arcani conscius fuit, humanum genus ejus cognitione privarit. Quantum sibi mortales obstrinxisset Helmontius, si eos docuisset, quodnam illud sit, cujus subtilissimo ac penetrantissimo impulsu fermentativo, quodvis heterogeneum & excedens promptè è sanguine separaretur. Neque enim iis pollicem premimus, qui dictatoria auctoritate decernunt, ejusmodi medicamentum his dotibus ex parte præditum nullum inveniri posse. Palma in medio posita est. Hoc tamen asserimus; nullum ad hunc usque diem remedium nobis innotuisse hisce facultatibus instructum, omniaque illa, quæ hic & alibi vendita fuerunt, licet vires eorum magnificis verbis deprædicarentur, tanti nominis mensuram non implevisse.

Per omnes ferè Mensis Julii dies aut venti spiraverunt, aut pluviae, imò imbres impetuosæ deciderunt; & ut non de tonitru, fulgure &c. quicquam dicamus, 15, 16, 17, 18, 19, 26. magna ælii, Augusti erat inclementia. Nec Augusti initia erant blandiora partim propter pluvias, partim propter auram frigidioram. Et cum dies ab 11. usque ad 14. nobis illuxissent fereni, reliqui ad 21. usque ventis molesti, ac pluviam turbidi erant. Tandem post nubila phœbus nos respexit; quippe aere gratissimo ferè in finem usque mensis usi sumus. Cum Septembris ingressu ventorum ac pluviarum injurias iterum experiebamur, at tædium nostrum per aëris serenitatem iterum fuit abstersum, usque in 12. Hunc qui excipiebant 13, 14, 15. & 16. iterum propter pluvias decedentes non adeò grati fuerunt. Secuti deinde iterum sunt quinque dies admodum fereni, quibus, ut mortalium res vicissitudinibus obnoxiae, successerunt unus ventorum tumultu, alii pluviis infesti. In ultimis duobus aer satis temperatus.

Multi hoc tempore longis ac tædiosis fatigabantur febribus, sine dubio, quòd per pluviosam tempestatem plurimæ aquosæ superfluitates in corpore cumularentur. Infantes ac pueros Epilepsia premebat, quod

Constitu-
tio aëris in
Mense Ju-
lio, Augu-
sto, Sep-
tembri.

Febres
diurnæ
& alii mor-
bi.

quod argumento est, ex imbribus cerebrum graviter affici, ac pravis gravari humoribus. Gutturis ac faucium tumores adolescentibus ac juvenibus erant familiares. Cacochymici ulceribus fordidis ac mali moris cruciabantur. Ita etiam in his plagis septentrionalibus locum obtinet *Aphorismus Hippocratis 16. lib. 3*, qui ita habet: *morbi in pluviarum multitudine magnâ ex parte fiunt febres longæ, alvi profluvia, putredines, morbi comitiales, & apoplexiæ & anginae*, quamvis hoc tempore apoplexias & anginas non tractaverimus, imò nec putredines, si per eas cum aliquibus interpretibus intelligas partium solidarum corruptiones, gangrænam & sphacelum.

Vomitus.

Prætereà verò morbis hoc tempore grassantibus jungebantur vomitus, imò sine complicatione aliorum morborum, etiam multi assumpta vel quantitate nimia, vel qualitate ventriculo molesta per vomitum rejiciebant. In ultimis hisce vomitibus compescendis non properabamus, modò ii, qui vomerent, facile tolerarent, & non vehementer angerentur, non essent herniosi, phthisi vel tabe affecti, hæmoptoici aut hæmorrhagiis aliis obnoxii, asthmatici vel angusti admodum pectoris, aut tandem morbis aliis exhausti. Omnium minimè verò moras traximus, quando singultuosæ præcordiorum & hypochondriorum concussiones cum vertigine & deliquiis, ut & deliriis conjungebantur, horum vomitus compescendos illicò esse putavimus. His parum præsidii erat in roburantibus ventriculum, aut stomachicis, sed plurimùm in theriacalibus. Ultimi hi vomitus cum semper nobis essent suspecti, ægris quietem imperavimus, & usum alexipharmacorum cum regimine sudorifero. Eandem ferè methodum servavimus in nimis febricitantium vomitibus, quibus multi torquebantur non secus ac febricitantes in anno proximè elapso. Cum enim ab hinc tribus ferè lustris in acutarum malignarumque febrium vomitibus eandem, quam in pestilentibus spondet Sydenhamius, ex alexipharmacis & sudoriferis percepissemus utilitatem, huic viæ constanter posthac institimus etiam in aliarum febrium vomitoriis defatigationibus, imò in nauseâ paulò graviore: ac spes nostra minimè nos fefellit. Subjunximus rebus jam tranquillis ad exemplum Riverii in malignis acetositatem citri, tum ad temperandum sanguinis æstum, tum virulentiam miasmatis expugnandam. Ab aromaticis omnibus & præcipuè ab oleis destillatis cinamom. menthæ & opio sedulò cavimus. Externè Theriacam in formâ emplastri non rarò ordinavimus, consilium D. Ludovici sequentes. Ex eò solò in Pictore hypochondriaco internorum usum abhorrenti in febris acutâ ita invalescentibus vomitibus, ut non vanus esset metus morbi iliaci, stupendum vidit ac deprædicat effectum D. Klaunig. Non rarò etiam imposuimus emplastrum de crustâ panis, mastichinum & oleo menthæ, (cum jam Hippocrat. *lib. 2. de diæta, textu 26.* testetur, mentham vomitum sistere) aut caryophyllorum malaxatum. Præsenti ope sese etiam

commendat ~ vini camphoratus cum ✕ fl. tunicæ mistus. Nec emplastrum de galbano cum camphorâ prorsus rejiciendum est. Usus mulsi cum ruta in vomitu singultuoso in Polono mulsi amantissimo absque effectu præscripsimus, commendatum olim ab Heurnio *lib. 2. method. ad Praxin. c. 21.* Porro etiam multi ex tussientibus, quorum non paucos hisce diebus reperire licebat, faciliè ea, quæ in capacitate ventriculi hærebant, per vomitum expurgabant, sive id contingeret propter viscerum abdominis compressionem in tussi violentiori, sive propter nervorum communionem, (in aprico est, pulmones à pari vago antequam ventriculo inferatur furculos conspectiores recipere) sive tandem propter nexum arteriæ asperæ per tussim irritatæ, cum œsophago, cujus superior pars pharynx digito, aut alio quovis modo sollicitata vomitum, aut vomendi conatum provocat. Tussis, & per consequens etiam vomitus à tussi dependens, laxantibus lenioribus bis terve repetitis sedabatur. Prægnantes multò gravius quam alio tempore, etiam post medium gestationis tempus vomitibus delassabantur. Pilulis Beccheri potissimum sublevabantur; Ess. etiam rorismarini quibusdam cum utilitate fuit propinata; nec destituit spem Mistura ex

Ess. millefol.

cort. Cot. aa. p. ij.

Elix. vitriol. Myns. p. j.

in vino, cui summitates rorismar. fuerunt immissæ, exhibita.

Varia depravati appetitus paradigmata & in virginibus ante mensium fluxum, vel in eorundem suppressione, ac in gravidis, quin etiam in illis foeminis, quibus menses ritè fluebant, itidem his mensibus spectavimus. Cura ardua, quòd proxima mali causa non adeò sit cognita. Menstruorum suppressio picam inducere non potuit, quòd, ut jam diximus, etiam mulieres ab illâ immunes, res absurdas, una e. g. vivum Lucium, altera carbones, tertia corium cordubense &c. impensè appetierint. Et quot quæso non deprehendere licet foeminas mensium suppressione per semestre spatium laborantes, inter quas tamen alio tempore vix una insuetis his, ac hominis alimento non destinatis rebus unicè delectetur? Humor corruptionis vulgò accusatur, sed modus & species corruptionis non explicatur. Hysterica pathemata, utut in excludendo hóc malò partes aliquas sibi vindicare queant; sola tamen malaciam parere vix admiserit Hildanus *Cent. 1. Obs. 37.* non obscure innuens ex ulcere circa fauces in muliere appetitum vitiosum esse ortum. Nos ex diversitate appetitus diversitatem humorum peccantium pravo appetitui ansam suppeditantium conjectando assequi conati sumus. Cum verò affatim conjecturarum, quæ potius turbant, quam erudiunt, in medicina sit, nos hâc vice subticemus, donec dies nos meliora edoceat. Debile etiam fuit lumen, quod ab opposito certorum ciborum fastidio aut nativo aut adventitio petere licuit. Nam

Appetitus
deprava-
tus.

quan-

quantum ad congenitum fastidium pertinet, ejus causa ad matris gravidæ imaginationem refertur, sed teneras contigit nobis tractare puellas pulvere laterum, cretâ, filamentis linteorum avidissimè vescientes, quorum desiderio matres gravidæ non tenebantur, quamvis non nesciamus contrarium exemplum legi apud Tulpium *lib. 2. Observ. 24*, scilicet quod vitiosus halecum matris gravidæ appetitus in infantem ita transferit, ut ejulatu, quos nondum poterat verbis, haleces appeteret. Ascititiam autem averfationem quod concernit, negari nequit, quod sæpe solum erroneum de pravitate hujus vel illius cibi judicium per consuetudinem confirmatum pariat nauseam; sed ejusmodi præjudicium multis annis radices agens in stolido illo appetitu rerum noxiarum non cernitur. Deinde pendet illa constans certorum alimentorum nausea aliquando inde, quod eadem ipsa alimenta aut minus mundè præparata, aut in nimia quantitate ad repletionem nauseabundam avidè ingesta fuerint, cujus rei memoria perpetuò præsens averfationem istam constantem fovet. Sed quid hinc eruas, quod faciat ad illustrandam appetitus istius noxii causam? An absurda olim nitidè eleganterque cum multo palati lenocinio præparata, eademque ante annos aliquot cum voluptate assumpta faciunt, ut ex solâ perceptæ voluptatis jucunda recordatione desiderium fruendi iis denuò reviviscat? Sed quicquid tandem de curâ picæ sit, bene est, quod gravidæ nostræ innoxie peregrina ac prorsus aliena comederint? Non datum est, nosse, quos syrupus de agrestâ ceras. acid. ribium, berber. &c. à vitioso isto appetitu revocaverit. Nec majora incommoda ex sunt perpessæ, quæ ab omnibus remediis abstinebant, quam illæ, quæ studiosissimè & syrupis istis & tragæis stomachicis ex speciebus aromat. rosat. & caryophyll. diaxyloaloe, rosat. novell. &c. utebantur. Enimverò puellæ & fœminæ non gravidæ petulantiam hanc suam gravidè luebant, præcipientes enim in cachexiam, obstructionem mensium &c. devolvebantur. Ab his corporis malis non nisi laxantibus sæpius repetitis, abstergentibus, vomitoriis levioribus, absorbentibus, anticachecticis, stomachicis &c. sublevabantur. Relabuntur autem facillimè in pristinos mores ac morbos restitutæ, nec nisi expertus crediderit, quanti sit laboris efferum hunc cicurare appetitum. Notum est non Medicis solum, sed & præcipuis quibusvis, quænam sint acta hic locorum ad avocandam supremi subsellii heram ab immoderatâ prorsus ceræ ac cereorum ingluvie. Cerei primùm manibus mortuorum inserti, ac deinde ori etiam in præsentia ejus, nisi fallimur, immissi, succo colocynth. imbuti fuerunt, non desinere tamen esse unicæ ejus deliciæ, quibus avidissimè, modò nancisci posset, & cum summo jucunditatis sensu frueretur.

Cholera.

Homo cæteroquin satis robustus cholericæ temperamenti incidebat in ferocem affectum Cholericum. Cucumeribus, ut non paucorum mos apud nos est, ventriculum distenderat, ac turbidam cerevisiam ingurgitarat ad lb. vj. circiter. Post prandium abjectâ tunicâ ad labores sese accin-

accincturus, à suorum quodam irritatus vehementer excandescit, sed iracundiam diffimulat. Post duarum horarum intervalla gravitatem maximam & angustiam immanem cum dolore in ventriculo percipit. Turbatur etiam caput, mens percellitur. Brevi post præterlapsis quinque circiter à prandio horis nauseat, ac animi defectionem sibi imminere narrans frigore percellitur, succedit æstus, ita tamen ut horripilatio quanquam non adeò frequens intercurrat. Supernè ac infernè magno cum impetu ac summis cum anxietatibus humores erumpebant. Tametsi verò stomachus & intestina mirè torquerentur, immanior tamen cruciatus, prænuncians instantes vomitus & sedes ab eo sentiebatur in regione lumbari dextrâ, ubi intestini duodeni situs, idque documento est, istud præcipuam hujus morbi esse sedem, ac malo invalescente inflammari. Ferè convicti sumus præsentis hujus tragoediæ spectatores, vomitus in cholera à motu intestinorum peristaltico inverso nequaquam pendere, cum ea, quæ nobis præsentibus in magnâ quantitate supernè dejiciebantur, nulla excrementorum indicia ac stercoreis notas præ se ferrent, omnique foetore carerent. Probabile est choleram ex duobus morbis componi, vomitu & fluxu alvi. Cum humorum verò copia, quæ utrâque viâ expurgatur per oesophagum, inquam & per intestina, sæpè tanta sit, ut incredibile videri queat, eam omnem in primis hisce viis hæerere, suspicio nascitur ex massâ sanguinea non minimam sentinæ hujus partem per arteriæ celiacæ ramos ad ventriculum, per mesentericam, tum superiorem tum inferiorem ad intestina confluere, & per vomitus ac sedes ex corpore sursum deorsum exturbari. Huic ægro præscriptus illico fuit Pulv. seq.

℞. Crystall. mont. ppt.
 Corall. rub. ppt. aa. ʒij.
 ☉ depur. ʒß.
 Cinn. nat. gr. vjjj.
 Camphor. gr. jj.
 M. f. pulv. div. in 4. pt. æqu.

Pulverem hunc ad corrigendam materiam acriorem in ventriculo ac intestinis, ex cucumeribus corruptis & cerevisiâ fœculenta & ferum, si ita vis, acidum, aut alia acrimoniæ specie imbutum, nec non ad bilem temperandam, sique eam cum veteribus tenuem in hoc morbo accusare placet, incrassandam, ac quasi coagulandam, & ad præcavendam inflammationem utilem esse multoties experti sumus: Crystallum montanam & Corall. ferè semper in hoc casu prætulimus alabastro, ebor. usto, lap. 69. mat. perlar. &c. tametsi nec illa rejiciamus. Potum tenuem non minus bilem, quam humores acres cæteros diluentem commendavimus. Veteres sollicitè aquas lactucæ & nymphææ extollunt, Aretæus etiam aquæ frigidæ cyathos duos aut tres

non abhorret; nos posthabito etiam jusculo ex pullis gallinaceis Sydenhamii, decoctum hordei elegimus, satis certi, hoc ipso & acrimoniam biliosam involvi, ejusque muciditate intestina adversus acrium injuriam præmuniri. Non tamen permisimus, ut sumpto pulvere statim decoctum hoc superinfunderet æger, ne ventriculus irritatus illicò medicinam excuteret. Sub noctem Theriacæ Androm. 3ß. in aqua cinamomi dissolutam accepit. Externè ~ Vini camphoratus fuit adhibitus. Cum per intervalla 18. horarum ter pulverem ac semel theriacam sumpsisset, multum de ferociâ suâ remiserant ejectiones, itaque Essent. Theriacal. usui pulveris denuo repetiti intercalavimus, ut & , vomitu magis ac magis cessante, haustulum vini Canariensis. His paucis medicamentis malum fuit debellatum. Usus deinde per biduum est gelatinosis jusculis, ac ex voto convaluit. Anodyna in largiori dosi more Sydenhamii non propinavimus, etiam in aliis casibus, & , si remedia, quod multoties factum est, ab ægris rejicerentur, ea denuo ac iterato iis obtulimus, sed ad dimidiæ fere horæ spatium à sumptis remediis potum illis interdiximus. Ex adstringentibus, scilicet pulv. compos. ex terr. sigill. Goldberg. bol. armen. croc. ʒt. adstring. gum. Arab. & ras. N. M. ac parum theriac. coelest. in ∇torment. bistort. cum syr. Myrtin. præcordiorum anxietates cum puncturis acutissimis in hypochondriis usque ad animi defectionem auctas fuisse, meminimus. Nec Cydonites, seu ut vulgò vocant, vinum Cydoniorum multò melius se gerit, si sub morbi initio exhibeatur, at morbo jam debellato ventriculum egregiè roborat, ob hanc profectò virtutem Cydonia à Sebizio *de alimentorum facultatibus* eximiè celebrantur. Cæterum Vratislaviæ quò fervidiores sunt tempore æstivo solis ardores, eo frequentiora Cholerae exempla cernere licet.

Fluxus
Coeliacus

Fluxus alvi coeliacus cum diarrhœâ hoc tempore erat morbus prædominans, quo infantes, pueri ac adulti passim imò & senes infestabantur. Fæces, quas reddebant, cremore seu chymo permixtæ erant, haud multum albicabant, id quod indicium præbebat, bilem in duodeno cum chylo fuisse permixtam. Hoc alvi profluvium tormina non comitabantur; nec æstuabant, aut adeò sitiebant a gri, mirè tamen enervabantur ac contabescebant. Pulsus tantum in paucis quibusdam celer & frequens existeret, tanquam febris affligeret. Ante defectionem sedium abdomen distendebatur, ac venter inflabatur. Non meminimus, quod hoc tempore dejecturis leviusculæ lipothymia seu animi defectiones obrepserint cum frontis sudore, quod alias factum esse novimus. Non uno alterove die durabat hoc malum, sed post duas aut tres septimanas demum adhibitis idoneis remediis conquiescebat. At tamen non nimis erant frequentes sedes per diem, sexies, ad summum octies vel decies alvum exonerabant. Appetitus non prorsus erat prostratus, nec tamen per omnia salvus, sicut istius mulieris, de qua Forestus *lib. 22. Obs. 26.* Ex residuo autem appeti-

appetitu, ut & chylo cocto colligitur, ventriculum suo fungi officio, nec ei culpam omnem imputari posse. Re attentè considerata patuit vitium hæerere in crustâ intestinorum villosa (quam velamentum bombycinum Hornius appellat:) per quam tanquam filtrum cribratur & transcolatur chylus. Vitium autem illud aliud esse non potest, quam quod pori istius peristromatis humoribus lentis ac pituitosis sint obducti. Dùm itaque blenna viscida ac tenaci velamentum bombycinum est incrustatum, chylus non admittitur, sed cum fæcibus alvinis exturbatur. Præterea affectus hic noster abundantiam pituitosorum humorum in massa sanguinea præsupponere videtur, nam frequentia sedium per tot dies durantium, satis innuit, causam non soli pituitæ in intestinis stabulanti adscribendam esse, tametsi alias faciliè largiamur, largam in intestinis reperiri humiditatem excrementitiam, qua, ut veteres efferebant, *eorum tunicis imbibita laxitatem efficiat*. Persuasi igitur eramus, pituitam aliosque noxios humores ex massa sanguinis per arterias mesaraicas in intestina effundi, ac deinde cum chylo & fæcibus per sedes eliminari. Non exclusimus etiam glandulas, quas Wepferus tunicae tendineæ, Bayerus vero & Bechlinus carneæ intertexi notarunt, quamvis Wepferus potissimum de glandulis ventriculi loquatur. Nec enim negari potest, ex ductibus illorum lympham subindè viscidam in tubulum intestinorum illabi. Maximi usus erant in curando hoc affectu pulveres digestivi ex ocul. 69. tartar. vitriol. arcan. dupl. sale absynth. ad mucum viscidum incidendum. In infantibus ac pueris absque omnibus aliis satisfaciebat pulvis laxans Ludovicianus ex pulvere jalapp. & ꝑ dulci ea dosi, qua grana hujus seriei annorum usque ad quintum respondebant, illius enim (scilicet jalappæ) grana vjij. infanti quatuor annorum tuto, si iste non adeò debilis sit, exhiberi queunt. Subjuximus ejusmodi laxanti in hoc casu medicamentum sine pari Tinct. Vitriol. ꝑt. tartarifat. D. Ludovici, ac ferè nullis aliis indiguimus. In adultioribus, præmissis salibus aperientibus, rhabarbarum bis ferè præscripsimus, deinde in usum traximus ea, quæ emollitas per pituitosos humores fibras roborare possunt. Eminent præ reliquis ꝑtialia cautè cum aromaticis mista v. g. limat. ꝑt. cum tragea quadam gratiori. Nec enim vidimus ullam causam, cur limatura hæc cum lumbricis terrestribus exsiccatis aliisque, prout quidem Ravellio placuit, miscenda esset, quamvis lumbricos in usum adversus puerorum vermes duxisse videatur, falsa utique innixus hypothesi. Egregiè etiam prosunt Elix. menthæ, Ess. acori, absynth. comp. si rectè fuerit parata, & rad. cichorei condita in delicatioribus. Adversus febrim non erat peculiaribus medicamentis opus, nam ut jam diximus, illa non erat notabilis, aberant etiam animi deliquia. Externa pauca adhibebantur, & illa ex adstringentibus minimè composita. Convaluerunt quantum scimus, omnes nostra hac methodo curati. Ast etiam alius generis fluxus coeliacus datur, qui tantum non omnes in mortem præcipitat. Nimirum contingit, ut

chylus etiam ritè percolatus per poros velamenti bombycini in glandulis mesenterii subsistat ac in casei formam coaguletur. Prædictæ glandulæ à copioso chyli fluxu intumescunt, quò ipso subsequenti transitus præcluditur. Non autem solum in tumorem perexiguæ istæ glandulæ extolluntur, sed diuturniori morâ liquoris mucilaginosi emolliuntur & vim tonicam propellendi receptum chylosum liquamen amittunt. Hoc ubi contingit, quemadmodum in tenerâ ætate, dum frigidus potus noctu ingurgitatur, crebrò solet usu venire quovis anni tempore, chylus inspissatur, in cremam aut in caseosam substantiam induratur. Fieri tum aliter nequit, quam ut coeliacus fluxus ob iter chyli impeditum excitetur cum ventris torminibus & atrophîa totius corporis ob denegatum humoris nutritii ad ductum thoracicum per pancreas mesenterii liberum com meatum. Exinde ægri ejusmodi atrophîa consueti in sceleti formam rediguntur, & emaciati prorsus expirant. Post mortem, ut notum est Professoribus, innumeræ glandulæ, quas vel lynceus oculus vix in sanis detegere potuisset, in conspectum veniunt turgidæ & duræ, quarum aliæ fabæ, aliæ nucis avellanæ, aliæ tandem nucis moscatæ magnitudinem æquant, in quo casu laudata antea medicamenta eam, quam prædicavimus efficaciam in priori illâ coeliaci affectus specie minimè exerunt. Pauperes, qui fructus fugaces crudos ingurgitabant, passim in lenteriam incidebant.

Lienteria.

Adeò hisce mensibus alvi profluvia quæcunque, excepto ita dicto hepatico fluxu, quem non vidimus, præ reliquis morbis erant communes. Lienteria hoc tempore maximè omnium dependere videbatur à lubricitate ventriculi, seu laxitate fibrarum ex pituitosorum humorum flacciscentium admistione. Maximè verò omnium atonia pylori accusari meretur. Ille enim ex diuturniori morâ & commercio cum phlegmate enervatus, alimenta non retinet, sed potius ante debitum concoctionis tempus eadem elabi sinit. Hoc verò quando contingit, cibus non valdè mutatus (aliquam certè mutationem commistio salivæ cum alimentis in masticatione parit) per alvum celeriter egeritur. Neque necessarium esse videtur ad producendum hunc lentericum fluxum, ut *particulæ pituitosæ ventriculo & intestinis adherentes valdè levem & glabram faciant eorum tunicam internam*, ut credidit Craanen *Prax. Med. reform. c. 75.* sed transversarum fibrarum in ventriculo debilitas ab emollitione enata sufficit, quo minus assumpta in ventriculo servantur, donec in chymum fuerint dissoluta. Et fortassis Galenus non adeò malè taxavit veteres, quod lenterix tale nomen indiderint ἀπὸ τῆς τῶν λειότητος, cum vitium non intestinorum sit, sed ventriculi; itaque non necesse est, lævitatem cum Doctissimo Viro D. Craanen non solum in ventriculo, sed & in intestinis comminisci. Cæterum palpabile videtur, quod ita constituto ventriculo, prout eum in Lienteriâ comparatum esse diximus, salivæ humor (menstruum vulgò vocant) iners ac ad dissolvendos cibos ineptus

ineptus esse debeat. Festinavimus curam, quæ non magis ardua est, quam in coeliacâ, nec periculum præsentius, quam hæc minuitur. Omnino enim hic subscribimus Doctiff. Medico Ludovico Mercato in lib. *Consultat. XII. p. m. 66.* eos decipi, qui arbitrantur, longè minus esse periculum in coeliacâ, quam in lenteria. Nec nos movet speciosa, quam allegant, ratio, quòd in hac omnimoda sit coctionis privatio, in illa verò diminuta, privatio autem semper deterior sit diminutione, nam rectè iis respondit vir prælaudatus, eos ignorare, privationem coctionis in lenteria adesse hac præcipuè de causa, *quòd alimenta non retineantur*, at in coeliaca, ea præsertim, quam vulgò describunt, sed tamen à nostra illa, quæ hoc anno, ut diximus, grassata est, in non paucis discrepat, graviora coctionis vitia deprehendi, nam alimenta, etiam si detineantur, cruda tamen excerni & magis putrida, quò diutius detinentur. Non attigissemus hæc, nisi quosdam ex nostris in aliâ versari opinione nobis innotuisset. Medelam hujus temporis Lientericis rhabarbarum in justa dosi bis exhibitum, & stomachica tonum ventriculi restituentia attulerunt. Inter stomachica illa præcipuum locum obtinuerunt ex mastich. absynthio menthâ ac ligno aloes præparata, quæ & moris immaturis siccisque, ac eo ipso acerbis ab Altimaro, & gallinarum ventriculis à Foresto tantoperè commendatis prætulimus. Nec minus utilia deprehendimus Zingiber & N. Mosch condita. Egregiè etiam profuit ipsa Theriaca in vino dissoluta. His exhibitis non indiguimus alumine, cujus dextro usu nihil esse præstantius in lenteria Frid. Hofmannus arbitratur, præsertim si diæteticae leges ritè observentur. Decoctum radic. chinæ dilutum loco potûs ordinarii haustum reliquorum remediorum usum, mirum dictu, quam efficacem reddat. Colophonem curæ imponere licet per prudentem martialium usum.

Unus & alter puer ab insultibus arthriticis hoc tempore non erat Arthritis immunis. Succi lumbricorum efficacia alibi à nobis debite fuit celebrata in articulari morbo, sed prorsus mirandam esse in arthritide puerili, aliquoties posthac deprehensum fuit. D. Pezoldo occurrit puer nobilis 10 annorum, patre natus arthritide frequenter exercito. Hunc ipsum arthritide vagâ misere tortum post frustra ferè propinata diapnoica, diluentia, præcipitantia, cinnabarina & nitrosa feliciter ac brevi restituit remedio à Clariss. Ludovici indicato, scilicet succo lumbricorum in calido infuso trifol. fibrin. beton. salviæ & sabinæ exhibitio. Inde sudores largos acidum olentes cum subita ac insperatâ euphoria fluxisse vidit. Et nos ferè etiam ex pulvere lumbricorum non multò minorem utilitatem percepisse arthriticos, in hac tenera ætate, quibus succum lumbricorum in paulò amarioribus infusis nullâ arte obtruseris, multoties experti sumus. Quamvis nulli dubitemus, alias palmam succo præ pulvere offerre, si ægri non fuerint nauseabundi, & occasio utendi superpetit in aliis quoque morbis. Insignissimum effectum certè eidem

D. P. notare licuit in Juvene ex Ducatu Wurtembergico 22. annorum, qui ex variis duram militiam stipantibus laboribus, pessimâ diætâ, ac ultimò ex potu frigido post iram suppressam in gravia symptomata, atrophiam insignem, vertiginem, arthritidem, impotentiam artuum, tubercula glandulosa variarum corporis partium delapsus; iste verò præmissis universalibus, præcipitantibus, resolventibus &c. ex continuato usu succi lumbric. cum memorato brevi ante infuso eminens levamen sensit, & post aliquod interjectum tempus cum sanitate ex integro reconciliatus est, ita ut post duos menses succulentus & carnosus evaderet ac *ῥαπὶδὸν ἀνέθε* recuperaret. Proficius admodum huic eidemque juveni fuit non sine merito à Celeberr. D. Schlevogtio doctrinæ & experientiæ rarioris medico commendatus ex sabina & filice suffitus.

Febres intermittentes mali moris.

In scenam etiam prodibant febres quædam intermittentes admodum similes iis, quæ anno proximè præterlapso à nobis fuerunt tractatæ. Disputatum fuit, ut alibi innuimus, inter doctissimos medicos, an ex verè intermittentibus quædam malignæ sint, & videas alios hoc affirmare, alios verò negare. Malignas ejus generis febres multis præclaris medicis videre licuit, Petro Salio Diverfo, Sennerto, Paulo Neucranzio, Johanni Rhodio, Simoni Pauli, Henrico Meibomio, aliisque pluribus. Agnovit etiam eas Galenus, indicavit Mercatus Claudinus & Minadous. Et hoc anno nobis quoque hic intermittentes malignas aliquoties observare contigit, sed non adeò frequentes, quam anno nono hujus seculi tempore æstivo. Quin imò annotatum est à Medicis in illis locis, ubi pestis in vicinia nostra hodiè grassatur, ante luis pestiferæ ingressum intermittentes mali moris fuisse grassatas. Illarum quas tractavimus & hoc anno 1702. & jamjam præterlapso, 1709. ferè typus hic fuit. Initio ægri meridiano tempore levem sensere horrorem, quem calor illicò excepit non adeò magnus, sed cum summa lassitudine & debilitate virium conjunctus & in sequentem diem usque ad quintam & sextam matutinam protractus. Pulsus summè languidus erat. Altero die non tantum remissio, sed vera intermissio observabatur, nihilominus de maximâ virium prostratione conquerebantur, & artus sibi omnes quasi confractos esse ingeminabant. Tertio die ferè circa vespertinum tempus sensum frigoris per dorsum, ut ajunt, decurrentis percipiebant, & statim in magnum incidebant æstum, qui per noctem usque ad octavam, imò nonam & decimam durabat. Et hoc die tertio verè adhuc intermissionem aliquam observare licebat. Sequentibus autem tribus aut quatuor diebus crescebat calor ac debilitas cum maximâ virium dejectione & reliquis symptomatibus mox describendis, ut facilius exacerbationem caloris statis temporibus, quam intermissionem veram notare posses. Sed quod notatu quàm dignissimum esse arbitramur, his, quos diximus, transactis diebus juxta nostram curandi methodum post septimum, modò citius, modò tardius rursus intermissiones apparebant, & quotidie quasi luculentiores, donec vel in

tertia-

tertianas, vel quod tribus evenisse memini ultimo hoc anno, in quartanas manifestè degenerarent. Lingua toto morbi decursu mucô viscido (albo plerumque) erat obducta. Gravissimè urgebat nausea. In quibusdam ventriculus ad vomitus concitabatur, alios verò inanes vomendi conatus maximoperè torquebant. In his cardialgia major quam in illis, ac priores facilè animo linquebantur, cum leviter commoverentur. Inappetentia & nausea ciborum erat longè maxima, sed quod mireris, sitis minimè clamosa. Limpidam ferè desiderabant, reliqua potuum genera fastidiebant. Tribus aut quatuor prioribus diebus immanis capitis dolor iis infestus erat, qui utut sequenti tempore non cessare videretur, quia morbus de vehementia non remittebat, nihilominus veteres de ejus cruciatu querelæ parcius audiebantur. Vigiliæ ferè perpetuæ & inexpugnabiles. Urina sub initium propemodum naturalis, crescente morbo saturatè rubra, eò autem adulto plerumque turbida erat. Alvus ferè adstrictior. Tantum in uno diarrhoea, quantum memini, animadversa. Purpuram, post incredibiles anxietates & jectigationes erupisse itidem recordamur. In quinquagenariæ viduæ, quæ in sterili matrimonio vixerat, corpore post summam pectoris oppressionem E. sere effloruit. Superato etiam morbo tardè ægri pristinas recuperarunt vires. Hisce nostris febribus admodum noxia fuerunt emetica & purgantia drastica, quorum usus, ut fama fert, nonnullis fuit lethalis. Ad imitationem Neucranzii de *purpure curatione* p. 413. quando necessitas illud exigebat, ab initio leni sumus usi pharmaco, curiosè vitatis fortioribus. Alexipharmaca & bezoardica cum Oetro mista, sacra ægrorum nostrorum anchora fuerunt, non tamen neglecta humectantia & analeptica. Quoad intermissio aliqua observari potuit, sub declinationem paroxysmi exhibita fuit E. sentia ex scordio & radicibus alexipharmacis, ægrisque inculcatum, sudorem spontè manaturum continentia corporis & quiete calidoque potu esse fovendum. Horâ unâ aut altera ante paroxysmum datus est pulvis ex bezoardicis & Oetro. Cum verò deinceps intermissio aut nulla esset, aut certè obscurissima, E. sentiam quidem horâ 5 & II matutina dedimus, pulvis vero horâ quartâ & nonâ vespertina in usum fuit vocatus. Quibus sudores absque omni violentia horis matutinis placidè fluebant, iis nausea, vomitus, imò & deliquia multò citius cessarunt, quam aliis, qui jectigationibus quamvis lecto sepulti jacerent sudoris fluxum impediiverunt. Irregularis etiam erat febris cujusdam præsidarii militis, cujus curæ præfuit D. Pezold. Ejus paroxysmi modo tertianæ, modò quartanæ typum fervare videbantur. Quartus accessus conjunctus erat cum *ἐκλυσι* & *ἐνιδρωσι*, sed mox comparebant ubivis in toto corpore & artubus confertissima tubercula satis dura, albida & prurientia cum summo levamine. Quia verò post triiduum Medico inconsulto in aere libero ac horridiori commorabatur, de novo ob despumationem turbatam incidit in grandes præcordiorum anxietates &

& dispnoeam, quibus liberabatur, cum iterum tubercula pruriginosa coloris rubicundi ac brunni erumperent. Post usum Mixturæ simpl. non camphoratæ ista exanthemata evanescere, sed foedus cutis color cum pruritu pedumque tumore oedematoso per aliquot dies restabat. Cæteroquin ejus generis febres minimè raræ sunt, ut alibi inuimus, & visi sunt interdum ferè omnes domestici laborare ejusmodi febribus scorbuticis. Ita Patrifamilias ædes declives & stillicidio adeo madentes, ut fungi in hypocausto nascerentur, inhabitanti, ut & consalinis ejus sub quolibet paroxysmo similia tubercula albida, prurientia & æstuosa efflorescebant. Quondam doctissimus Reinesius in tertianis epidemiis mali moris, pertinacibus, & miris symptomatibus comitatis ejusmodi tubercula pruriginosa, alba per totum corpus instar monticulorum subito prorumpentia, subitoque disparentia conspexit *Epist. 2. ad Nesteros*. Febrium harum scorbuticarum cura requirit omninò antiscorbutica, quibus ex voto debellantur. Id quod prælaudatus Reinesius expertus est, l. c. scribens: *Felicitè mihi cessit habita ratione febris ejusque causæ antiscorbutica alterantia exhibere, quod, quia non attenderunt alii, ludere scilicet & latere scorbutum sub typis febrium, etiam veteranos & exercitatos Medicos nihil se profecisse (& pertæsos agros reliquisse) conqueri memini*. Quæ longè verissima esse quotidianæ ferè experientiæ testimonio confirmamur. Hæsitavimus autem hactenus & ad hodiernum usque diem ambigimus, an fides adhibenda sit iis, quæ p. 4. idem Reinesius addit: *Universim autem verum est, scorbuticos etiam calidiora facillimè tolerare: nam & humor morbosus frigidus & viscus, quod plerumque hunc morbum fovet, ipsum frigidum est, & atonia flaccorque ventriculi, qui semper comitatur, calidis potius, quam frigidis corrigetur*. Si fidem rerum magistræ consulueris, facile comperies, multos scorbuticos calidiora ægerrimè ferre quando febricitant, & succo citri aliisque subacidis maximè refocillari. Sed hæc obiter.

Crisis per
abscessum
cuticulæ.

Mulier quadragenaria cholero-scorbutica in febrim continuam periodicam lapsa est, ac demum feliciter, observante D. Preus, per cuticulæ universi corporis secessum judicata. Adeo non soli serpentes exuvias suas deponunt. Frequenter autem cuticula abscedit in morbo, quem vulgò vocant Rosalia, antehac à nobis descripto, prout multoties vidimus.

Alphus.

Paulò rarior apud nos affectus, Alphus, quo summa cutis colore punctis seu maculis albis, sed non continuis, nec invicem cohærentibus distinguitur. Vitilagine hac cutis subaspera & inæqualis redditur. Maculosâ hac corporis defœdatione non tantum quendam Medicum alibi jam viventem, sed nonnullos etiam alios dehonestatos conspeximus. Ab ista morphea nec membrum virile fuit immune. Sed benè est, quod superficietenus duntaxat cutim quasi guttis quibusdam superaspergat, nec musculos corripit, quod in Leuce fit. Nulla verò cæteroquin molestia premit hominem. Vegetus fanè erat Medicus, vegeti & pauci

pauci illi alii à nobis conspecti. Ab his maculis non nisi colore distinctæ videntur illæ obscure rubescentes, quæ multò frequentiores & paulò, quantum ad spatium, diffusiores, his, religiosus quidam collum & brachia notatus, à D. Klaunig consilium opemque petiit. Vitium in humoribus latens corrigendum esse facile patet, ne si altiores radices agat, in deterius vergat, & gravem aliquem affectum inducat. Lepram quod minentur maculæ albæ, quorundam sententia est. Ex votò cessit Doctori prælaudato cura per trag. aromat. ℥j & limat. ℥t. subtiliss. ʒj. Illâ manè ad 3 cuspides cultri sumptâ, Religioso ad sudorem usque corpus commovendum fuit. Post prandium ol. tartar. per deliq. Monachus iste non solum usus est, sed & maculas sudore adhuc madidas eo ipso perfudit, hoc eventu, ut brevi pristinus cuti, absterfis his maculis, redderetur nitor. Quæ cura etiam in aliis, omisso externo & interno ol. tartar. per deliq. aliorumque euporistorum usu per solam ʒtis limaturam cum pulv. cinamom. & sacchari f. q. in rotulas redactam fausta ac secunda fuit.

Non tantum infantibus propter tormina clamoris, sed & aliis nec Procidentia ani. non adultis familiare erat vitium Procidentia ani, sive propter diarrhoeam epidemium hujus temporis morbum; sive quod acria quædam, ac in nonnullis etiam ascarides in intestino hærent, ac vellicando, stimulando, morficando, illud protruderent; sive quod musculorum tonus nimia humiditate esset quodammodo relaxatus. Notum enim satis est, quod, quando, aut robur musculi sphincteris, aut levatorum humiditate & mollitie remissum est ac elanguit, podex hiet, & non rite constringatur, vel anus aliquantisper protrusus (quod in omni excretionis contingit) non sursum retrahatur. Ex ultimâ hâc causâ multis fuisse his diebus prolapsum intestinum non licet dubitare. Tametsi autem prolaxis quæstionibus in affectu in oculos incurrenti minimè opus sit, ut tamen in nostrâ sententiâ magis confirmaremur, non negleximus indagare, an magnus egerendi conatus ob fæces exsiccatas & induratas adesset, an calculo vesicæ premerentur, num aliqua paralysios vestigia obvia forent? Nihil autem horum in ægris nostris tum deprehendere potuimus. Non tantum tollendæ hujus prolapsus causæ incubuimus, sed ante omnia eò laboravimus, ut quam primum anus in suum reponeretur locum. In adultis negotium repositionis non adeò difficile fuit, antequam intestinum inflammaretur ac intumesceret; nam facile vel ab ægro ipso, vel à Chirurgo linteó calidò blandè retrudebatur. Præsenti autem inflammatione usi fumus aut fotu, aut sacculis ex flor. sambuc. meliloti, chamomill. Verbasc. hyperic. summit. anethi ac sem. cumini in vino coctis optimo semper cum successu: sublato repositionis impedimento levi manûs operâ prolapsum intestinum in pristinum redit locum, sed ut diximus, illud ita facile expeditur in adultis. In infantibus paulò aliter se res habet: dum continuò suò ploratu ac ejulatu intestinum protrudunt, frustra in

repositione laboratur, nisi punctum illud temporis accuratè observaveris, quo intestinum motu suo vermiculari artis & manûs subsidium adjuvat. Difficilius opus est, anum in locum debitè repositum ita firmare, ne denuò procidat. Variis modis, quos omnes hîc commemorare non attinet, hoc assequi tentarunt hætenus Medici. Inter remedia externa maxime extollit D. Klaunig unguentum Foresti, quod in foemina 30. annorum, quæ per multos annos hoc incommodi perpeffa fuerat, ut etiam illo tempore, quo alvum non deponebat, intestinum prolaberetur, mira, aliis omnibus irritis, præstitit. Unguentum verò illud sequens est:

℞. Gallar. immatur.

Nuc. cupress.

bacc. myrt.

balaustr.

Mali corii.

Cort. glandium.

Acaciæ.

Thur.

Mastich. aa. ʒij.

Omnia exquisitissimè trita macerantur dies circiter quatuor in succis mespilorum & sorborum immaturorum, deinde siccantur igne & cum ol. rosat. sæpius in aquâ aluminosâ loti ʒijijß ac ceræ albæ ʒj. f. Unguentum. Nos, ut nihil dissimulemus, unguentis omnibus ferè semper prætulimus vinum, in quo summitates absynth. cortex granat. acaciæ & alia simplicia à Foresto in unguenti formam redacta fuerunt cocta, eò, quòd non tantum fibras intestini constringat, sed una eademque opera musculis relevatoribus robur addat. Nec rejicienda censemus illa topica, quæ lumbis & præcipue offi sacro imponuntur. Ac laude suâ defraudandum non est celeberr. Ettmulleri Emplastrum ex Gumm. sagapeno, oppoponace aa. q. f. liquefacto præparatum & calidè offi sacro impositum; quod amplius delucescet & ab unoquoque facilius concedetur, si in memoriam nobis revocaverimus, quod levatores ab ossium coxendicis sacrique ligamentis oriantur & sphincteri musculo, ad quem distincti descendunt, insertiones suas commisceant.

Calculus
in uretere
hærens.

Torferat dolor fixus in iliò, nisi fallimur, dextro Virum quadragenarium per aliquot dies cum morsûs & ponderis in regione umbilici, tractionis verò ac tensionis sensu in testiculis, collo vesicæ ac pene. Per intervalla, dolore increbescente vomuerat. Petitur consilium. Medici in diversa abeunt. Colicum dolorem hic esse causatur, alter à solâ obstructione alvi, (nam jam aliquò tempore illa fuerat segnior) & flatibus in abdomine oberrantibus originem mali accersit. Nos, qui illud doloris genus in aliis aliquoties

quoties jam tractaveramus, à calculo in uretere hærenti natales omnis molestiæ deducebamus. Injecta fuere enemata varia, Balneum ex sapone veneto Uratislaviæ usitatissimum æger ingressus, sumpsit oleum amygdal. dulcium; Decoctum emolliens, juscula cum rad. alth. parata, emulsionem ex semine violarum, milii ☉lis, aquis appropriatis, pulv. Volkammer. ac alia. Cataplasinata ex emollientibus externè dolentibus partibus applicata &c. At his omnibus studiosissimè per 8. dies exhibitis nihil profecimus. Postea valere jussis remediis post biduum derepente ab omni dolore noster liberatus fuit. Dum adhuc anceps hæreret, à quo morbo fuisset afflictus, & nostram de calculi præsentia opinionem datâ occasione falsè irrideret, post aliquot iterum dies subito ad urinam reddendam stimulatus duos calculos pisi magnitudinem superantes cum aliquò dolore exclusit, desinitque nobis insultare. Cum iisdem phænomenis, sed majori cum impetu, elapsis post abortum aliquot diebus, idem dolor ilium sinistrum in illustri fœmina occupavit, sed non eodem cum eventu. Nam antecedentibus partûs laboribus exhausta, dum intensissimè ac pertinacissimè calculorum exclusionem, quæ antehac bis vel ter cum atrocibus symptomatibus, frigore, cui simile nunquam in hoc morbo vidimus, & æstu summo ac jectigationibus anxiiis, vomitu horrendo &c. ei contigerat, natura molitur, exquisitissimis doloribus ferendis non suffecit, sed in convulsiones iteratò incidit ac vitam cum morte commutavit.

Sæpius de ἀπρᾶξία Genitalium Viri illibatâ fruente valetudine ac satis robusti & torosi querelas ad nos detulerunt, hisque mensibus desiderio prolis fervens uxor nonneminis marito tergiversanti aut verecundanti consilium & opem petit. Causam hujus ἀδυναμίας tum in hoc casu, tum in aliis similibus quæsimus antehac semper vel in pene patratore, vel in inopiâ, aut inertia liquoris genitalis, & hanc quidem per alimenta comoda sublevare & corrigere, membro autem naturale robur ac tonum per tonica, nonnunquam etiam externa irritantia acriora restituere conati sumus. Et certe utrumque hoc sæpiusculè non sine successu tentavimus & perfecimus, cum revera vitium aliquod vel in verpo hæreret, isque spasmo aut alio morbo correptus esset, vel feminis penuriâ laboraret. At verò in his nostris feminis defectus prætexi non posse videtur, in tanta scilicet abundantia feri laudabilis ac sanguinis spirituosus, quæ in hominibus ejusmodi athleticâ corporis sanitate fruente, & lautè & opiparè viventibus in oculos incurrit. Nec vitium reperitur evidens in nervo, imò, quod magis est, ne in juventute quidem illum libidine ineptum redderunt, nunquam partes illas doluerunt, multò minus Gonorrhoeâ laborarunt, & in rei hujus fidem ipsum Deum testem invocaverunt; & tamen lorum in aquâ, quando munus mariti obeundum. Res illa multoties nos habuit sollicitos. Curiosè itaque investigavimus, an esset quippiam in Conjugibus, quod averfarentur eosque à coitu alienos redderet. Nam notum est, ex confessione quotidianâ quorundam maritorum, quam ingrata iis sit cohabitatio

Impotentia in quibusdam viris robustis.

cum uxoribus, quæ munditiei non student, quarumque anima olet. At in uxoribus Virorum, quos nostris, dum hæc scribimus, oculis obversantes habemus, profectò satis formosis, nihil est, quod fastidii quippiam parere possit. Placuit etiam indagare, an rixosæ essent, an aliquid contingeret eorum in thoro, quæ Alex. Benedictus *lib. 24. Pract. s. c. 26.* his verbis subiudicat: *Scimus quosdam, cum in venere conjugali essent promptiores, facta inter eos de re tristi mentione, ita ab opere imperfecto sollicitos desurgere, ut velut intermortuum langueret membrum genitale. Quosdam in coitu sordidum auditum verbum de venereo diverticulo deturbat, alios verecundia tenet, nonnullos metus ipse.* Excussimus etiam ad minimum usque pulvisculum reliquas circumstantias, sed nihil quicquam colligere ex omnibus illis potuimus, quod faceret ad validorum ac sanorum virorum in ætate virili constitutorum segnitiam nisi mavis impotentiam in opere maritali illustrandam. Itaque admiratione profectò dignum est, & aliquibus vix verosimile videbitur, reperiri tales viros, qui præsentī femine à quo totum corpus & partes genitales primos ad erectionem stimulos persentiunt, qui præsentī fluido illo nerveo cujuscunque demum indolis sit, qui liberè affluentī ad penem sanguine arterioso, illæsis membri musculis & rectè constitutis omnibus inepti sint ad formosarum blandientium ac oculos irritantium uxorū desideriis satisfaciendum! Si dixeris naturam in hujusmodi corporibus nimium esse intentam nutritionis œconomix, functionibus autem individui propagationi inservientibus minorem impendere curam easque quasi negligere; redargueris inde, quod genitali latice, teste experientiâ, non hi viri destituantur, hinc verò necessariò fuit, quòd alimenta euchyma & ad multiplicandum semen aptissima, non omnia in nutrimentum convertantur, sed omninò etiam ex substantiâ sanguineâ purior & selecta ejus pars glutinosa ac spirituosa separetur & à vasorum feminalium poris excipiatur, ac exaltetur. Consideravimus etiam ea, quæ de amplitudine & angustia arteriarum spermaticarum vulgò docentur, quorum summa hæc est, quod nimirum illi, quibus arteriæ spermaticæ ampliores, aut plures quàm ordinariò fit, obtigerunt (nam notum est, quod triplo majores aliquando in mortuis repertæ sint, & quatuor ejusmodi arterias in virgine observârit Kerkring *spicileg. Anat. obs. 32.*) ad venerea sint aptiores, ineptiores verò, qui hæc vasa angusta habent, ex quibus inferri non nullis posse videtur, in angustia horum vasorum, aut certè in arctiori textura pororum & meatuum testiculi latere causam hujus impotentix. At verò jam ante diximus, nostros, de quibus nobis sermo est, non laborare seminis penuriâ, adeoque necessarium est, ut materia seminis per hæc vasa insufficienti copiâ adducatur, ac etiam in poris memoratis separetur, quamvis cæteroquin non inficiemur, amplitudinem ac pluralitatem arteriarum spermaticarum falacitatem augere posse. Ferè coincidit cum dictis, quod nuper à non nemine nobis responsum fuit, in illis viris præ mole corporis & pinguedine vasa omnia fieri angustiora, ac semen

semen supprimi, prout in succulentis nutricibus lac, observante jam tum Hippocrate, supprimi solet; enimverò refragatur quotidiana experientia; nos abundè convincens, quòd alii obesi strenuè apud uxores suas mereri possint, ac in ejaculatione seminis cum aliis paria faciant. Henricus VIII. Angliæ Rex multi succi abdomine adeò gravis ac segnis evaserat sanguine in pinguedinem verso, ut vix per ostia ingredi, ac neque scalas posset conscendere, sed in cathedrâ positus machinis in superiora ædium subveheretur, ut scribit Thuanus lib. 3. Historiar. ad ann. 1547. p. m. 84. & 85. Verùm omnes historici contemporanei uno ore fatentur, quòd in voluptates solutior fuerit, sexies nuptias celebrârit, prolem suscepit &c. Liberè itaque profiteamur, nos ignorare quidnam illud sit, quod principium corporis movens in istiusmodi viris avertat, quò minus semen jam à sanguine separatum ad generationis opus debite applicetur. Uxores ad fascinationem recurrunt, in quo confanguineas suas facile habent consentientes. Nos utut cum Borello pro imaginario malo ligaturas illas minimè habeamus, non tamen ad illas recurrimus, quando nullum veneficii ejusmodi vestigium cernitur, ut hîc sit, quoniam nec muscoli, nec quicquam, quod ad erectionem virgæ requiritur, ullò modo debilitatum, aut immutatum in nostris deprehenditur. Viguit, vigetque adhuc hodiè tum alibi, tum apud nos opinio, quòd sectio venarum post aures, applicatio hirudinum frequens in odontalgîis abhinc aliquot annis Vratislaviæ remedium, faciat steriles & ad venerem ignavos, traditione ab Hippocrate ad nostra usque tempora hâc de re fideliter propagata. Nicolaus Henelius, qui superiori seculo inter eruditos Silesiæ primum facile obtinuit locum, in docto variarum observationum opere, quod *otium Vratislaviense* inscribit c. 17. p. 133. laudat specialem illam rationem, quæ à non nemine reddita est, cur furibus ac aliis auricula altera vel utraque præsecetur, ratio verò ista hæc est, quod auribus vena quædam promineat, quæ περιποιον contineat sperma, cujus venæ abscissione procreationis vis seu semen prolificum submoveatur, ne ejusmodi pessimorum hominum posteritas ulla relinquatur, quod fieret, si liberos generarent. Hanc rationem confirmare nititur, ita scribens: idque non de nihilo esse, exinde apparet, quod Medicorum etiam filii Hippocrat. autoritate confirmant, venis post aurem sectis homines fieri infecundos, ad venerem ignavos, & impotentes: ideò nimirum, quòd vel hujusmodi venarum sectio principem illam partem, ac seminis primum opificem promptissimè & insigniter refrigeret, vel quòd plurima genituræ pars à capite juxta aures in spinalem medullam procedat, cicatrice autem per sectionem inductâ meatus iste sive transitus dure scat claudaturque: quæ ex Zachîâ & Langio mutuatus est. Huic doctissimorum Virorum asserto multiplicem & ferè quotidianam nostram experientiam opponere possumus, quæ & milites aure privatos, ac fures sceleratosque alios eò supplicii genere ac hâc deformitate corporis sceleris atrocitatem denunciantes, nec non eos, quibus à balneatore quodam vena post aures aperta, aut

ab hirudinibus admorsa fuit, minimè propterea fuisse factos infœcundos, docet. Ut nihil jam dicamus de pervulgato illo in atrophîâ remedio, quod plebs nostra vocat *den Ræthe-Kuchen schneiden*: Unde tamen nulli familiæ adhuc invisa fuit inducta sterilitas. Juveni Coptho apud Prosper. Alpin. lib. 2, de Medicin. Ægyptior. c. 10. maxima sanguinis copia per eas venas fuit detracta, unde in somnum per tres dies delapsus est, sed ab eò expergefactus ac convalescens, uxore ductâ, liberos procreavit.

Cardial-
gia.

Inter magnates ac plebejos quidam ex abusu lactucæ, cucumerum, melonum, fructuum horræorum &c. incautâ refrigeratione opprimebantur dolore orificiorum ventriculi. Sedes atrocissimi cruciatûs erat vel in fine pectoris, ubi sterni adhæret mucronata cartilago, vel in spina dorsi circa undecimam vel duodecimam thoracis vertebra. Jam notum est, quod dextrum orificium, seu pylorus medio hypochondriorum spatio assurgens sub mucronatâ cartilagine situm suum adipiscatur eâ ipsâ in parte, ubi vulgò dicimus esse scrobiculum cordis, sinistrum verò in eâ quam designavimus thoracis regione, diaphragma penetret ac spinæ adsitum sit! Describebant verò hunc suum dolorem tanquam tensivum & compressivum, nonnulli quasi cingulò sese constringi ajebant, quibus paraphrasibus sine omni dubio spasmodicum orificiorum motum exprimere satagunt. Nam spasmodorum in œsophago & ventriculo præsentiam satis arguebant & impedita inter dolorum faces, deglutitio, & tanta constrictio, ut post pauca quædam assumpta ventriculus nihil admitteret, quæque ingesta fuerant, cum ineffabili anxietate, angustîâ ac pressiois sensu ferret. Ructus dolorem leniebant. Idem malum à bile ortum, prout jam Hippocrates Cardiogmum ejusmodi descripsit, sæpius alio tempore tractavimus. Post injecta enemata & sacculos, antispasmodica cum stomachicis sociata egregiè profuerunt. Propter insignem efficaciam laudare possumus Tinct. rubram, quæ autorem habet notum Medicis nomen C. Bontekoe. Constat illa ex \ominus tartari & \oplus fl. \triangle pulveris. & deton. in crucibulo; huic \ominus affunduntur ∇ menth. vel aliæ pro lubitu, post solutionem & filtrationem adduntur nonnulla aromata atque semina carminativa. Superatis aut mitigatis doloribus exhibuimus, quæ materiam morbificam lentore suo orificiis ventriculi adhærentem inciderent ac attenuarent, ut evacuatio cum euphorîâ tantò facilius suscipi posset. His factis ventriculum roboravimus, inter roborantia autem præcipuò locò commendavimus Tinct. vitriol. σ t. tartaris. D. Ludovic. ritè paratam, eamque in aqua Cinnamon. propinavimus. Nec utilitate caruerunt stomachica amara e. g. Ess. absynth. c. D. Wed. Ess. anticachect. Pont. &c. Vinum, cui chamomilla fuit infusa, cum insigni fructu quidam hauserunt. Non paucos reperias, qui commissô quòdam errore in cibis ante commemoratis aut aliis viscidis ac duræ digestionis, nec non cerevisiâ fœculentâ in immanes hosce cruciatûs relabuntur; quod ne fieret, auctores eis fuimus,

ut

ut ad avertendum malum subito post ejusmodi erratum gr. X. piperis deglutirent. Nec sinapi laude sua defraudandum est, rectè hoc etiam nomine à Paracelso commendatum; ac negari nequit, quin & egregiè fermentationem promoveat viscidumque resolvat. In his simplicibus non pauci, qui nostris consiliis obtemperaverunt, majorem esse efficaciam deprehenderunt, quàm in Essentiis carminativis, vulgò cognitis, in Ess. castorei, aut misturâ, quæ per aliquot annos strepitum excitavit, ex Elix. Propr. P. f. acid. Ess. jamjam nominatâ castor. & ~ Exci anis. quam sævitiam Cardialgiæ experti quotidie bis integro ferè lustro usurparunt.

Paulò infrequentior est affectus, Urinæ suppressio; non defuerunt tamen exempla, ac hoc ipso anno alicui illustri matronæ eadem lethalis fuit. Quotiescunque verò ad ægrum suppressione urinæ laborantem vocati fuimus, prima semper fuit cura, indagare, an urina verè à sanguine & sero separata sit, & ubi nobis eà de re ex certis signis constitit, sedulò inquisivimus, an in renibus, an in ureteribus, aut tandem in vesicâ vel urethrâ causa suppressionis lateret? Aliquantò rarius contingit, ut partes heterogeneæ in sanguine ac sero ita implicitæ & permixtæ sint, quò minus urina inde per poros & canaliculos renum, pelvis cavitatem spectantes, secerni queat, quâ de re Willisius in *pharmac. ration.* consulendus, aut serum solito copiosius per alia corporis loca effluat. Illud autem crebrius usu venit, ut pori, per quos urina transcolari debet in renibus, reddantur angustiores modò *ab obstructibus*, sanguine scilicet coagulato, pure, pituitâ, calculis, modò *à compressantibus*, inflammatione, tumoribus scirrhis ac aliis &c. modò autem *à constringentibus* in refrigeratione *regionis lumbaris* &c. In his casibus propemodum unicè ægri conqueruntur de dolore fixo & gravatico circa renes, spinamque dorso summâ cum difficultate flectunt, urget etiam interdum vomitus. Acutissimi verò & pungentes dolores premunt cum vomitu & stupore cruris, quando vitium ac præsertim calculus in ureteribus deprehenditur. Non minoribus molestiis miseri exagitantur, quando suppressio urinæ nascitur ex tumore circa ureterum in vesicam ingressum. Convulsis verò & spasmodicè constrictis ureterum fibris musculosis propulsioni urinæ sine dubio inservientibus, urinæ suppressio ubique sequitur, sed non tot stipata symptomatibus. Vesicæ tunicâ exteriori seu musculosâ paralyti affectâ fibræ sese contrahere, expulsionemque urinæ moliri nequeunt, & tùm vesica sine dolore ullò tumet. Paralytis videtur esse, cur in morituris quibusdam, aliis longius, aliis autem brevius ante mortem urinæ fluxus inhibeat. Tycho de Brahe, quem Rudolphus Imperator maximis præmiis ex Daniâ in Bohemiam invitârat, & copiosè lauteque habuerat, teste Balbino *lib. 7. sect. 6. c. 3. Miscell. histor. p. 255.* Urinæ suppressione è retentione illius in convivio Rosenberghiano verecunda ac justo diuturniori orta, febrique & delirio comitata die 24. Oct. A. 1601. ætatis 55. cum bonorum

Urinæ suppressio.

omnium

omnium luctu obiit: ut scribit Clariss. Vir Johannes Mollerus *in hypomnemat. ad Alb. Bartholini librum de scriptis Danorum p. 453. seq.* Credibile est, per detentionem urinæ longiorem non saltem vesicam ita distendi, ut amplius ea contrahi nequeat, sed & figuram ejus in rotundam mutari, ac majorem versus orificium constrictionem oriri, quod genus suppressionis urinæ periculô non caret, ut rectè judicat Hildanus *de lithotom. vesic. c. 3.* & Panarolus *Pentecost. I. obs. 25.* Manifestior est Ischuriæ causa, quando vesicæ cervix aut urethra huic continua calculo in adultis, in recens verò natis concretâ pituitâ obstruitur, quo pacto iterum urinæ fluxus intercipitur. Cicatrices urethræ à gonorrhoeâ virulentâ erosæ ac exulceratæ (quas vulgus Chirurgorum pro carunculis habet) urinæ fluxum remorantur. Malum hoc apud nos est, proh dolor! vulgatissimum. Per DEI gratiam verò Ischuriæ à venenis nobis prorsus sunt incognitæ. Nec visi nobis, qui culpâ vermium in urinæ detentionem inciderint. Quantamcunque verò adhibuerimus diligentiam, nondum tamen nobis innotuit, utrum musculi abdominis, quorum efficaciam in promovendis excrementis infimi ventris minimè in dubium vocamus, quomodocunque læsi suppressionis urinæ auctores esse possint, cæteroquin non ignari, quod ex tumoribus eorundem urinæ suppressionem consequi posse suspicatus sit Hildanus. In curâ nos ita gessimus. Postquam immisso cereô aut cathetere constitit, in urethrâ aut orificio vesicæ impedimentum esse, quò minus urina effluere posset, ejus remotioni studuimus. In cicatricibus, aut vulgò ita dictis excrescentiis prorsus catheterum usus est eximius. Novimus, qui in summis angustiis constituti, immisso cathetere, illicò à metu convulsionum & mortis liberati fuerunt, apertâ scilicet urinæ viâ instrumenti hujus beneficio. Remotio verò cicatricum istarum aliam ac operosiores requirit curam. In tenellulis, quibus pituitæ culpâ in vesicæ orificio aut urethrâ lotium detinetur, vel sola optimè sese gerunt cataplasmata ex radice alth. fol. malv. fl. chamom. sem. lini, fœnugr. bacc. laur. &c. composita, ut & sacculi in adultioribus, quorum unus pectini, alter perinæo imponitur. Sæpè voto respondit parietaria oleo frixa, calideque apposita, vel cum cepis in formam cataplasmatidis redacta. Sulphur lycopodii cum ocul. 69. percar. ac cinnab. nat. egregiè, quomodocunque tandem illud fiat, conducit. Profunt etiam sacculi in suppressione urinæ à diuturniori ejus retentione, sed manûs calidæ ministerium accedat necesse ad lenissimè comprimendam vesicam. Summa Balneorum utilitas hoc in casu est. In Ischuriâ à calculo majori in vesicâ hærente, exiguus est, quem medicamenta resolventia præstant, effectus. Chirurgico auxilio opus; & reverà non pauci ante biennium calculo vesicæ per cystotomiam ab operatore peregrino celebratam liberati fuerunt. Modus operandi ejus per omnia, ut obiter hoc addamus, convenit cum illo, quem famosus frater Jacobus sub finem præterlapsi seculi in Gallia exercuit, nimirum, teste Dionis *p. 169.* (verba ejus adscribimus, quod modum circumcellionis istius describere sit nostri

nostri operatoris rationem ac methodum adumbrare) Il introduit dans la verge une sonde graissée, qui n'est point canelée, dont le bout luy sert à pousser de la main gauche en dehors l'endroit de la vessie où il doit faire son ouverture; puis prenant de sa main droite un bistouri long fait en forme de poignard, il le plonge proche la pointe de la fesse gauche deux doigts loin du perinée, & le poussant droit vers la region de la vessie, il l'ouvre dans son corps le plus près de son col qu'il le peut: il ne retire point le bistouri, qu'il ne l'ait ouverte autant que le demande la grosseur de la pierre. Il se sert d'un conducteur pour conduire la tenette, qui est à peu près semblable aux nôtres; & souvent, avant que d'introduire cet instrument, il examine avec son doigt fourré dans la playe, l'endroit où peut être la pierre. Quand elle est chargée, il la tire promptement & rudement, ne réfléchissant nullement sur les mauvaises suites que peuvent avoir les violences qu'il fait pour l'extraire. &c. Confer. celeberr. Mery Observations sur la maniere de tailler dans les deux sexes pour l'extraction de la pierre, pratiquée par Frere Jacques. Dolendum verò est, quod non semper idonei adsint lithotomi, imò apud nos tanta eorum raritas, quanta fuit sub initium seculi 16. Lutetiæ Paris. ubi ne unus quidem inveniebatur, qui hanc operationem aggredi ausus esset, quæ res Facultati Medicæ ansam dedit, ut ad Senatum supremum (Parlamentum vocant) recurrerent, & ab illo hominem calculo vesicæ laborantem ac propter crimina morti adjudicatum in id expeterent, ut in eo cystotomia tentari posset. Indulgentem Facultas habuit senatum, miserque ille fortunam propitiam, nam & à morte & calculo feliciter est liberatus ex relatione Mery lib. citat. p. 3. Si nostri illi, qui pro more ante tot secula recepto, munus externas administrandi operationes sibi solis vendicant, Hippocratem evolvisent, crederemus religione juramenti illos prohiberi, quò minus manus suas huic nostro operi admoveant, nam suos Hippocrates voluit dicere sacramentum, quod lithotomiam manibus suis celebrare nollent. Non approbavit sese nobis per omnia modus operandi hujus Empyrici; nihilominus fatendum est, quòd non pauci ab intolerabili cruciatu fuerint ita sublevati, ut per biennium integrum negotiis suis vacare potuerint, sicut quondam doctissimus Hippocratis interpres Johannes Martin, Medicus Parisiensis ferri beneficio à tortore calculo liberatus, pristinum ægros visendi vitæ institutum repetiit, quemadmodum in elogio Martini narrat Petrus Seguin. Memori autem in pectore semper habuimus egregium monitum Celsi lib. 7. de Medic. c. 26. p. m. 475. de hac vesicæ incisione agentis: *Ad hanc curationem festinare, inquit, cum præceptum sit, nullo modo convenit. Ac neque omni tempore, neque in omni ætate, neque in omni vitio id experiendum est: sed solo vere, in eo corpore, quod jam novem annos, nondum quatuordecim excessit, & si tantum mali subest, ut neque medicamentis vinci possit, neque etiam trahi posse videatur, quo minus interposito aliquo spatio interimat &c. & rursus: Ubi ultima experiri statutum est, ante aliquot diebus victu corpus præ-*

parandum est, ut modicos, ut salubres cibos, ut minimè glutinosos assumat. Ambulandi vero inter hæc exercitatione utatur, quo magis calculus ad vesicæ cervicem descendat, &c. Hæc omnia, si ea quæ de ætate habet, exceperis, ut & utilissima præcepta Hildani in egregio libro *de Lythotom.* observavimus. In paralyfi vesicæ, præsertim si illa comitata sit resolutione inferiorum corporis partium, quicquid etiam susceperis, frustra te laborasse comperies. Cum calculus in ureteribus hærens Ischuriæ causa fuit, initio quidem membranaceas partes spasmodicè constrictas, exhibito oleo amygd. dul. aliisque relaxare ac emollire conati sumus, ac sopito dolore deinde subjunximus ea, quæ calculum modeste pellunt, id quod etiam factum, ubi concretum sabulosum adhuc renibus impactum est. A calidis pellentibus ol. succin. juniper. balsamo Sulphuris terebinthinato, ~ terebinth. abstinuimus. Nec impetrare à nobis potuimus, ut Tinct. cantharidum, quæ ab empyricis quibusdam clanculum his, illis obtrudi, tanquam divinum aliquod remedium ab aliquo tempore coepit, præscriberemus. Non major apud nos honos est Tincturæ calcis vivæ aliisque causticis pellentibus. Cum circumspecta sollicitudine ~ minerales acidos ægris dedimus, usu edocti, quod exulceratis renibus noxii sint; quinimò etiam in periculo ejusmodi corruptionis renum ne quidem pulveres salinos ex arcan. dupl. Ⓢ depur. terr. fol. tartari &c. quibus alias frequenter utimur, offerre ausi sumus. Spiritus acidus, si quando adhibuimus, in refracta dosi id fecimus. Erat hocce tempore nobis in usu ferè ejusmodi formula:

℞ ∇ heder. terrest.
 asparag.
 fragor.
 petrosel. aa. ℥ijj.
 Doering. c. calcul. ℥jß.
 syr. de alth. Fern. 3x.
 ~ fragor. 3jß
 Ⓢ dul. ʒß M. f. Pot.

ut & pulvis sequens:

℞. sem. alth.
 violar.
 lithosper.
 rad. glycyrrh.
 lap. judaic.
 spong. recent. quæ rosis adnascitur.
 off. dactylor.
 mespil. aa. q. v.

Quem

Quem in pellendo calculo & urina non inefficacem aliquoties experti sumus. Verum de his agere non est hujus loci. Illud in Ephemeridibus meis annotatum invenio, quod artifici cuidam pulvis ex fol. genistæ 3j. nucleor. ceras. persic. aa. No. vj. in vino austriaco exhibitus in Ischuriâ à calculo sæpe recurrente unice profuerit. Egenos jussimus tunicar. ex coëpis Mß in cerevisia tenui coquere & fuccin. albi pulverisati 3j. addere ac calidè bibere, quod multoties cum præsentaneo ab eis factum est effectum. Meminimus laudibus in cælum usque elatum fuisse hisce diebus pulverem Cardiluccii contra calculum & Ischuriam. Ille verò sequens est, ut ille, qui multa ejus notitiam redemit pecunia, nobis communicavit:

℞. sem. 4. frigid. maj. excort.

papav. alb.

mili \odot is aa. 3j.

c. ∇ saxifrag. & petrosel. fiat Emulsio,

cui exsiccatae adde:

spec. diatragac. frig.

sem. mespil.

cynosbat. tro-

chisc. halicacab. ca-

rab. aa. 3j.

millep. c. liqu. alcahest. Glaub. conspers. ʒjj.

rad. pimpinell. pp.

tartar. vegetab. sive sem. lycopod.

\ominus ononid. aa. 3ß.

facch. albiss. 3jj. M. f. pulv. subtiliss.

cujus dosis est 3j.

Ecce secretum hecatombe dignum. In Ischuriâ ab inflammatione eximiam affert utilitatem V. S. mature celebrata & emulsiones, quibus ocul. 69. ppt. lap. percarum adduntur. Cæterum in omni urinæ suppressione expedit, ut alvus sit libera, atque hinc nemini non nota commendatio clysterum, quæ non tantum fæces educunt, sed & propter situm intestini recti vices fomenti subeunt. Quæritur verò, num etiam purgationes convenient? Celeberrimus aliquis Medicus eas non ita simpliciter admittendas esse censet. *Quidam*, pergit, *Cassiam* hoc in affectu valde commendant, & animam quoque renum vocant, & pro singulari remedio extollunt, alii verò eam urinam ciere & acrem quoque reddere re ipsa se comperisse putant, ideoque haud commodè in Ischuria imprimis legitima adhiberi arbitrantur, qua de re videri potest Clariss. Petrus Pigræus lib. 7. c. 4. it. Fabr. Hildanus Cent. I. Epist. 34. & 35. & tandem doctissimus vir ita concludit: *Loco itaque purgationis tutius & commodius clysteres, quoties opus erit, adhiberi poterunt.* Enim verò Collega

noster D. Pauli observavit, quòd in obstructione urinæ diuturniori, & tantâ quidem, ut musculosus corporis habitus in tumorem œdematosum jam elevaretur, nephritica cum laxantibus maritata, ac copiosè per aliquot dies ingesta, opem unicè tulerint: Et certè experienciâ convicti sumus, quòd laxantia tùm quidem profint, quando vel massa humorum heterogeneis partibus ita abundat, ut secretio urinæ nulla fieri possit, vel ferum ad alia corporis emunctoria copiosius affluit, ac ibidem stagnat. In aliis verò casibus purgantia potius damno esse, quam emolumento, sumus quam persuasissimi. Eorum tamen morem laudamus, qui sublata urinæ suppressione laxans accipiunt, quod illustri cuidam Polono, crebrius urinæ detentione afflicto, in usu erat. Ferè exciderat, quòd in egenis post lapsum urinæ suppressionem viderimus; hanc verò à thrombo seu grumo sanguinis derivavimus. Multum solatii sunt experti miseri ex pulv. ad casum D. Ludov. ocul. 69 & diaph. & sperm. ceti, ut & mistura ex essent. pimpinell. hyper. agrimon. unguento carminativ. August. externè illito, quod in casu ab alto planè egregium est. Cæterum, quando in renibus calculus grandior, quam ut per ureteres in vesicam descendere possit, urinam supprimit, antiquis etiam in usu fuit alia manualis operatio ac incisio, nobis hodie ignota, quâ lapidem hunc, ad quem urinæ fluxus allidebatur, removerunt. Meminit ejus Hippocrates, sed quia locus ille nobis non incidit, sistimus testem prælaudatum jam ante Anatomicum & Chirurgum J. Mery in libro citato ita scribentem: *On trouve aussi dans le même Hippocrate, que l'on pratiquoit encore une autre operation de la taille, par laquelle on tiroit la pierre du rein. Mais soit qu'Hippocrate n'ait point décrit ces operations, soit que les ayant décrites, elles ne soient pas venues jusques à nous, non plus, que plusieurs autres de ses ouvrages, nous n'avons aucune connoissance de la méthode, dont on se servoit de son temps &c.*

Volvulus.

Per trimestre hoc spatium volvuli exemplum in foemina, quæ per totam vitam, quantum meminerat, alvo fuerat tardiori, conspeximus. De vago, sed exquisitissimo dolore circa umbilicum conquerebatur, & ob cruciatus acerbitem mortem crebrò expetebat, quod de aliis Iliacis jam olim notavit Aretæus lib. 2. de curatione acut. c. 5. Præterea fixum eumque acutissimum dolorem in inguine dextro sensit, de quo acerbissimè etiam olim querebatur juvenis, qui post lac & vinum copiosè haustum, ac lactucam exæstuante corpore eodem die ingestam in passionem iliacam inciderat. Hæc verò doloris sedes confirmare videtur eorum sententiam, qui partem affectam statuunt esse ileon, aut potius finem ilei. Et certè ileon ita conformatum est, ut in ejus anfractibus excrementa crassa immorari queant, meatus quoque in fine angustior, quam in aliis locis, & si Hildanum audiamus Cent. 1. observ. 61. facile in consensum trahit valvulam coli, eamque constringit, quo ipso transitus excrementorum omnino prohibetur. Itaque in ea sumus sententia, quod, quotiescunque à fecibus indu-

induratis ab assumptis aut deglutitis chordapsus oritur, ileon, aut potius ilei finis maximè omnium afficiatur, ac *πρώτον δελιόν* sit hujus mali. Si verò aliundè volvulus oriatur v. g. à compressione & strangulatione intestinorum in herniis, quamvis & tum potissimum ileon affici notum sit, à vicinarum partium tumoribus, e. g. à pancreate scirrhuso apud Kerkring. *obs.* 42. à tumore mesenterii apud Hildanum *Cent.* I. *obs.* 51. & ani apud Tulpium *lib.* 3. *obs.* 10. à coalescentia intestinorum post eorundem exulcerationes & erosiones apud Barthol. *Cent.* 6. *H. A. obs.* 38. non ibimus inficias, quòd primus mali fomes etiam in aliis intestinis delitescere sæpè soleat. Hinc fortè motus Hippocrates intestinum expresse non determinavit, & si ad descriptionem ejus attendere voluerimus, sufficienter liquebit, illum in ea fuisse sententia versatum, quod præcipuè colon in nostro morbo afficiatur. In historia mulieris iliocæ *lib.* 3. *epid. æg.* 9. labores seu dolores, inquit, circa hypochondria aderant, qui in inferioribus secundum ventrem locis cum torminibus assiduis urgebant. Notum verò satis est, quòd sub nomine hypochondriorum regionem epigastrii pariter comprehendat Hippocrates, adeoque hac sua descriptione indicet, maximè omnium pati colon, utpotè quod hypochondriorum & epigastrii regionem non exiguam occupat. Conf. Hippocrat. *lib.* 3. *de morb. sect.* 5. Sed nos ad nostram ægram revertamur. Admodum inquieta erat & crebrò sese jactabat, quod etiam aliis iliacis familiare, adeò, ut Cœlius Aurelianus hoc malum arbitretur dici volvulum, quòd, quos istud exagitat, præ doloris vehementia convolvantur, nec quiescere possint. Manifesta quarto morbi die inflammatoriæ febris aderant indicia. Nos præmissis sine effectu clysteribus, fomentis, linimentis & cataplasmatibus venæ sectionem urgebamus, sed ad illam planè ægra sese persuaderi non patiebatur. Ad inflammationem itaque tollendam, & dolores leniendos conversi sumus; sed frustra laboravimus; cum per biduum artis præsidia nullum ei levamen attulissent, ab iis abstinere decrevit. Circa vesperam diei sexti vomitus enormes superveniebant, ac negato per tot dies per inferiora fœcibus exitu, per os stercora ejiciebantur, motu peristaltico intestinorum inverso. Inter mille tormenta ferè deficienti ac per tres dies variis vomitibus fatigatæ singultus accedens, cum incredibili æstu ventriculi spem faciebat, brevi adfuturam mortem tot votis desideratam, quam imperterriti animo exspectavit, fortior Calano Philosopho ex Gymnosophistis Indis, qui vel ex fastu, vel præ doloris colici vehementia in pyram sese conjecit & combussit, ut narratur, non tamen sine notabili circumstantiarum differentia à Diodoro Siculo, Curtio *lib.* 10. Arriano *lib.* 7. Valerio Maximo *lib.* 1. & Strabone aliisque. Ante mortem alvus soluta quidem est, sed sudor gelidus, frigus extremorum ultimam instare horam nunciabant, quæ etiam brevi post secuta est. In alia notavimus foeminâ iliacâ biduo ante mortem sedes nigras spontè erupisse, quod nobis signo fuit intestini sphacelati, nam inflammationem intestinorum in gangræ-

nam & sphacelum subindè in hoc morbo abire, non tantum Sylvius, sed & alii testantur, & experientia convincit, nisi forte volueris ejusmodi dejectiones à suppuratione intestinorum deducere, quò quidem respexisse videtur Aretæus, scribens: *lib. 2. acut. c. 6. Multi quidem vi tormentorum repente intereunt: aliis intestinum suppurat, deinde nigricans, tunc & putrefactum excidit, atque ita deficiunt.* Pauperibus quibusdam pulverem Joelis magnæ fidei ac experientiæ practici, sæpè iterumque justo tempore datum Iliacis profuisse scimus; iste mirâ simplicitate sese commendat, & componitur ex *flor. luteor. chamæmel. sem. malvæ aa. 3j.* exhibetur cum tepido *flor. anethi* decocto. Nec minus nobis notum, quod ex usu jusculi carnis vitulinæ, in quo malva fuerat cum *flor. chamom.* decocta, aliquoties repetito, Vir iliacus pristinam recuperavit sanitatem.

Caloris &
frigoris
subitanea
vicissitu-
do.

Nunquam patuit nobis melius, quàm per trimestre hoc spatium, quantum improvisa ac subita mutatio aeris calidi aut tepidi in frigidiusculum aut quodammodo horridiorem, aut siccioris in humidum valeat in concitandis catarrhis, flatibus, dolore ventriculi, diarrhoeis, &c. Nam multi molestias hæcè passim experiebantur, tametsi vix unus & alter statim Medicorum subsidium imploraret. Inter illos, qui damna perpessi sunt, numerandi opifices, quibus in more positum est cœlo paulò fervidiori abjecta tunica etiam sub dio, si occasio ferat, & opificii genius requirat, exantlare labores; hi enim, si paulò sint teneriores, aut honestius educati, in molestias ante memoratas incidunt, quas tamen diuturna consuetudo satis tolerabiles illis reddit. Hanc aeris vim alii paulò lautioris fortis in vere evidentius experiuntur, quando justo citius pelliceas vestes abjiciunt, & cum aliis levioribus commutant. Profectò non semel hac occasione in febres lapsi sunt. Omnium maximè *improvisa frigiditate valetudinarii plectuntur, ob organa quædam perspirationi dicata valde imbecilla, tenuemque corporis habitum, ut ponderi supervacaneo ferendo non sufficiant, quin aliqua sensibilis humorum eruptio vel statim hominem opprimat, vel parti minus sanæ impacti (scilicet humores) diu excrucient, &c.* ut observavit Listerus in *Comment. in Sanct. static. sect. 2. aphorif. 10.* Tanto magis mirandi sunt Mosci, de quibus hæc notatu digna leguntur *dans la relation de trois ambassades de Carlisle p. m. 47. qu'ils sont tellement accoutumés au froid & au chaud, qu'ils entrent de l'extrémité de l'un dans l'extrémité de l'autre, sans que ce changement incommode leur santé. On y voit de petits enfans sortir en chemise de leurs chambres chaudes l'hiver, & après s'être vautreés quelque temps sur la neige dans l'extrémité du froid, retourner à un excès de chaleur, sans que ce changement de qualités contraires leur cause de l'alteration, &c.* Plebs in Curlandia aliquâ ex parte ad indolem Moscorum hac in re accedit, nam postquam & hæc in tuguriolis suis immodico calore, frictione, ac vapore ex aqua candentibus filicibus, ex quibus fornaces eorum parantur, affusa, sudores largissimos provocavit, illicò frigidissima aqua corpus suum perfundit

fundit, ac ad labores consuetos redit. Lepidè describit hunc eorum morem J. A. de Brand in *Itinerario germanicè per Henninium sub initium seculi hujus edito p. 76. seq.* Plebs, inquit, in Curlandia hæc citra damnum sanitatis facit. Alia est ratio aliorum; nam quod subitaneam aëris calidioris cum frigidiori commutationem non omnes impunè ferant, docet exemplum Nobilis apud Clariss. Lentilium in *Miscell. Med. pract. part. I. p. 213.* Is media hyeme, cum hypocauftum vehementius incaluisse, *tunica soluta, pectoreque nudato subito frigidum aërem subiit, ab eoque tempore dolorem sentire cepit, adeo debilitato pectore, ut etiam æstate ardentissima opus habuerit illud pulvinari fovere, quod ni fecisset, statim lancinans dolor omne spatium, quo sternum exporrigitur, occupabat. Nunquam plane dolor cessavit, quodsi tamen pectore non probe munito in publicum prodiiisset, exacerbatur,* referente eodem Lentilio.

Dysenteria oppidò erat rara, nisi quod eam in aliquibus ex mor-
billis ægrotanti sub morbi declinationem observaverimus, sed non nisi
faustam ac salutarem.

Primo Octobris die cœlum nubibus obductum erat, spirabant venti, ac pluebat. Uno alterove die gratior aër, sed in septimum usque tum
ventis, tum pluviis turbidus erat, ab 8. usque ad 23. ferè semper amœ-
na autumnalis aura nos fovebat. Per residuos Mensis dies plerosque ne-
bulæ, venti, pluviae, aëris serenitatem modo magis, modò minus tur-
babant. In Novembris initio post ventum frigidum & pluviam terra
pruina & frigore rigeat, at vis frigoris per pluvias & nives usque ad
9. obtundebatur, quo aura cœpit esse verè brumalis. Nondum elapso
octiduo frigus remittebat. Horridior tempestas ac ingrator fuit propter
continuas nebularum, ventorum, pluviarum, nivium frigoris &c. vicissi-
tudines, propemodum usque ad mensis finem. Nec lætiores nobis per
Decembrem ferè totum illuxerunt dies, imò venti subindè magis tumultu-
abantur, ac frigus modò levius, ut die 10 & 20, modò verò inten-
sius, ut 17. corpora nostra continuis aëris mutationibus obnoxia gravi-
ter afficiebat.

Hoc tempore rursus catarrhales morbi omnis generis longè frequentif-
simi erant, capitis dolores & odontalgiae non paucos fatigabant. Hypo-
chondriaci ac splenetici à magno symptomatum circumagebantur turbine;
nonnulli etiam in melancholiam incidebant. Præterea illa, quam descrip-
simus, aëris intemperies peperit cachexias, hydropes, ulcera maligni mo-
ris in pedibus, & non paucis, etiam phthisicis fuit lethalis. Senes,
qui alias autumnò non malè agunt, vomitibus, diarrhoeis, stran-
guriis ac dysuriis infestabantur. Asthma humorale his illis molef-
tum erat. Ischiades & alii morbi podagrici malè mulctabant alu-
mnos suos. Dolores circa scapulas molestè ac diuturnè exagitabant
illos, qui nondum in castris Arthriticorum militabant. Ejus generis
ægritu-

Constitu-
tio aëris in
Octobr.
Novembr.
Decembr.

Morbi hu-
jus tempo-
ris.

ægritudinem aliis remediis nihil proficientibus hac via sustulit D. Preus: manè laxantia exhibuit, circa noctem verò anodyna propinavit, ac loco dolenti Emplast. de melilot. & spermat. ranar. mixtum tam felici eventu imposuit, ut mox halcyonia sequerentur. Scorbuticorum corpus variis notabatur maculis.

Maculæ
Scorbuti-
cæ.

Visa fuit valetudinaria sex annorum puella in nosocomio ad S. Sepulchrum à D. Preus, cujus exhaustum corpusculum creberrimè punctis atris tanquam stigmatibus quibusdam distinctum fuit. Hæ maculæ evanuerunt multoties, secutâ oris hæmorrhagiâ. Narium hæmorrhagiam in lepida puella parentibus hypochondriacis nata febris cum scorbuticis maculis laboranti admodum salutarem observavit D. Pezoldus. Illa, postquam sub vario cœlo, pluvia, nebulis aliquando foetentibus &c. quotidie in suburbio per lutum non raro ad crura usquè pertingens scholam quamvis mephitim olentem frequentasset, à meridiè inhorruit, subsequente summo æstu citra sitim, cum somnolentia ac sudore copioso vires admodum dejicienti. Cum morbus per aliquot dies hac ratione processisset, grandes in facie maculæ viridi colore eruperunt; die autem morbi decimo quarto pustula ex virore livida in medio manus digito cum tumore magno, rubro radiosque in brachium diffundenti effloruit. Comitabantur lancinans capitis & membrorum dolor, acutissimæ in hypochondriis puncturæ, agrypnia, deliria, pavores & respiratio anxiosa. Recurritur die sequenti demum ad Medicum. Iste exhibet pulv. bezoard. D. W. c. nitro & tantillo camphoræ, & potionem ex Decocto. citri, gelatin. C. C. syr. rub. id. & acetosit. citri, ut & ol. amygd. dul. cum camphor. pro leni deglutitione, externè ex mandato ejus maculis adpersus est pulvis ex farina fabar. flor. sambuc. myrrh. ceruss. & camphora. Nocte, quæ diem hunc excepit, sudor non adeò effusus fuit, naturâ moliente narium hæmorrhagiam, quæ etiam secuta est cum summo levamine, nam mox dolores capitis, hypochondriorum punctiones, anxietates & dyspnœa multum de ferocia remiserunt, inflammatio pariter in gangrænam tendens fuit discussa. Effloruere aliæ pustulæ virides, quæ sponte sua apertæ faniem spissam fuderunt, successit etiam ophthalmia, fortè quod non satis sanguinis ex naribus stillasset, quæ tamen & ipsa profligata fuit pulvere ex ð diaphor. C. C. ppt. Nitro &c. & collyrio ex ∇ chelidon. maj. rosar. sacch. saturn. & nihil. alb. Tardè puella recuperavit vires, nam sex ab exantlato morbo septimanæ præterlapsæ sunt, antequam illæ redirent. Hoc præterea notatu dignum est, quod virulentia materiæ in pustulis frontis tanta fuerit, ut supercilia inde eroderentur. Penetrantissima camphoræ etiam virtus inde colligi potest, quòd sudor post usum camphoratorum exquisitè camphoram redoluerit.

Exulcera-
tio renum.

Abscessus seu ulcera renum, unde scaturire solet mictus mucoso-purulentus, lentus, gravissimum est malum, in uno alterove his mensibus, præcipuè verò

verò posthac in adolescente illustrissimis progenitoribus fato, nobis multum peperit laboris ac tædii, sed parum præmii. Is ab infantia valetudine usus fuerat caufariâ, & inter crebros morborum insultus pueritiâ excefferat. Habitus corporis, cum ad eum vocaremur, talis erat, ut credere posses, eum esse phlegmaticæ constitutionis, quamvis ab ortu sanguinei fuisse temperamenti, nobis admodum videretur verosimile. Laboraverat iste tum jam per biduum febris vehementissimâ, quam ex censu inflammatoriarum aut suppuratoriarum esse, ex pulsu & aliis circumstantiis augurabamur; ista, post exhibitam cum præcipitantibus emulsionem spe citius desiit, & nos abundè convicit, quòd utiquè suppuratio, quam febris satis intensa nonnunquam comitatur, facta fuerit. Itaque ad sollicitum excretorum examen conversi sumus. Meruit omnium maximè attentionem urina, quam industriè per aliquot dies, imò & septimanas cum aliis phænomenis consideravimus. Illa simulac reddita fuerat, crassa ac turbida existerat, lactis fero non absimilis, & deterrimo odore nares feriebat, tandemque quiete aliquot horarum deponebat sedimentum viscidum & cohærens, narium muco non dispar. Hujus crassamenti viscidum ac glutinosum, quod urinæ permixtum cum eâ defluebat, magna erat quantitas, & minimè vani fuimus, si aliquot uncias per diem unum fuisse excretas, dixerimus. Tametsi verò intra quinque aut sex horarum spatium ad fundum matulæ materia ista subsideret, reliquum tamen urinæ per istam separationem non reddebatur clarum, sed turbida jumentorum lotia imitabatur. Crebrò ad emittendam urinam stimulabatur, quò ipso cum somnus ejus interromperetur, admodum languere cœpit adolescens. Cum crebrò illò mictû conjunctus erat lumborum ardor, & dolor ad collum vesicæ. Ante effluxum urinæ de distensione, inflatione ac tumore vesicæ conquerebatur, qui molestiæ sensus, redditâ urinâ multum minuebatur. Sed hoc permolestum ac grave ei accidebat, quòd ubi tantillum urinæ ei esset reddendum, simul quoque stimulum in intestino recto sentiret, & odiosa ejiciendi cupiditate urgere-tur. Sensum ardoris quoque in urethrâ & in collo vesicæ percipiebat, quando urina erat excernenda, quamvis non planè ipsam vesicam & ureteres excluderemus, eò quòd continuò mingere æger conaretur, quod nobis indicio erat, per defluxum aliquot saltem guttularum urinæ per ureteres, stimulum continuum ad excretionem induci. Nos quidem certi satis eramus de abscessu, nam materiam illam, quæ in urinâ post aliquot horas fundum matulæ petebat, esse pus, non tantum ex fœtore gravi, sed & ex eo, quod vitro urinario aquæ tepidæ immisso, sedimentum non solveretur, & urina clara non redderetur, quod fieri solet, ubi pituita sola urinæ permixta est. Suspicio gonorrhœæ virulentæ in adolescente valetudine adversâ per totam vitam pressa, & sollicita Ephorum inspectione educato, locum nullum habebat. Si dixeris, juxta Horatium Augenium, purulentam materiam non ima-

petere, sed per urinam fluctuare, respondebimus, eam vero consonam non deprehendi, nisi illud Augenius velit, pus non statim subsidere, sed per urinæ corpus per aliquot horas esse dispersum. Quantitas autem puris nos facile convincebat, non vesicam, aut ureteres, sed renes abscessu, aut si illud magis placet, ulcere obsideri. Sed verò illud nobis obscurum erat, & adhuc est, an renum abscessus, quò purulenta materia coërebatur, ex phlegmone oriretur, aut à calculo, qui renem vel suo pondere contunderet, vel attritu comminueret ac exederet? In priorem sententiam, ut verum fateamur, magis propendebamus, tum propter febrim, de quâ ante diximus, tum quòd nunquam hactenus calculum exclusisset. Accedit, quod ipsa genesis calculi renum cum Celeberr. Stahlio in *pathologiâ membr. 6. artic. 2. à stasi inflammatoriâ ac apostematis hinc orientis ulceroso escharotico muco probabilissimè deducatur*. Sensum ardoris pus foetidum cum urinâ transiens per vias urinarias mordendo excitare tantò verisimilius nobis erat, quòd urina falsior & tenuis eam molestiam nonnunquam inferat. Non dubitamus, quin procedente tempore excoriatio vesicæ secutura esset, quam tum maximè metuebamus, ubi importuna ad deponendam alvum irritatio in intestino sese magis ac magis exerebat. Hanc de morbo fovebamus sententiam. Nam nullum indicium nos coge-
bat in hoc subjecto ex urinâ mucosa cum doctissimo Listero in *exercitat. de calc. human. quam exercitat. anatom. tertiæ conchyliorum bivalvium* addidit, suspicari, vesicæ corpus esse cancrum. Securi etiam eramus, exploratione & per digitum Chirurgi in anum, & per catheterem in ipsam vesicam immissum, factâ, de absentia calculi in vesicâ, ex cuius magnitudine, figurâ & motu, &c. de jiciendi cupiditatem idem Vir. Clariss. derivat. In curâ, cum egregiè sese gessissent emulsiones, placuit earum usui porro insistere, imò suaferamus usum ipsius lactis, aut feri caprilli, cui infudissemus, nisi æger reluctatus fuisset, modò unam, modò alteram ex sequentibus *radicibus*: Sassa-parill. chin. alth. cyperi, petrosel. & schoenanth. ; *herbis*: Veron. heder. terrest. musc. saxat. flav. auricul. mur. equiset. ; *floribus*: malv. hyper. ; *ex lignis*: Lentisc. nephrit. ; *ex fructibus*: jujub. & sebest. sed ad ejusmodi infusa ac decocta adhibenda nec persuasionibus nec precibus, aut comminationibus impelli poterat. Jusculum ex radicibus alth. & malv. cum summâ nausæâ bis terve adhibuit. Proponebatur ergò mulsus, & cum illud pariter brevi fastidiret, mellita & saccharata alia ob conspicuam in iis vim abstergendi commendabantur, quæ tamen & ipsa non diu ei erant ad palatum. Deinde ab Ephoro adigebatur ad adhibendum pulverem ex ocul. 69. bolo armen. gum. arabico & aliquot guttulas bals. peruviani vel saccharo permistas, vel vitell. ovor. dissolutas &c. Præter clysteres etiam in vesicam injiciebantur à Chirurgo ea, quæ ad dolorem & ardorem leniendum ac abrasionem præcavendam accommodata judicabantur. His remediis cum contra pertinacissimum & molestissimum affectum per tres circiter

circiter septimanas esset pugnatum, symptomata quidem multum remittebant, magna tamen purulentæ materiæ quantitas semper adhuc in urina conspiciebatur. Fatigatus à nobis æger, vicissim nos non parum fatigaverat, ac pertæsus moræ Medicum, qui cum Collegâ quodam nostro ante nostrum accessum curationi præfuerat, ex itinere reducem denuò advocat. Ego breviter exposui, quidnam de morbo sentirem, quænam in absentia illius cum Collegâ altero communi consensu facta essent, quæque porro molienda esse, crederem; ignarus, quænam ei de morbo federet sententia? Multoties expertus sum, in consultationibus Medicorum idem fieri, quod in curiis & judiciis fieri scribit Vir Clariss. Hubertus Loyens in tract. *de Curia Brabantie c. 16. p. m. 127.*: *Reperiuntur nonnulli, qui in sententiis dicendis, quum id, quod dicturi erant, videant ab aliis, qui priores dixerunt, quasi præoccupatum, eosque pudeat, vel idem repetere, vel palam in sententiam priorum ire, correctiunculas quasdam addunt, quærentes in scirpò nodum, aut sophisticis subtilitatibus aliorum sententias enervant, ne cuiquam succubuisse, aut quicquam concessisse videantur. Alii præterea sunt, qui nihil explicatè, clarè & apertè dicunt, sed compositis verborum involucribus iudicium ita concipiunt, ut ad utramque partem accommodari possit, more carminum Sybillinorum, idque eo studio faciunt, ne à majorum gentium diis dissentire videantur. Alii prolixitate, & longis verborum ambagibus ita se intricant & involvunt, ut nodum causæ reperire non valeant, & filo Ariadnis opus habeant, quò ex istis Mæandris sese explicent.* H. J. Quid multa? Post longam disputationem novum proponebatur remedium, cuius laudes mirificè celebrabantur, illud erat balsamus sulphuris terebinthinatus, de quo bis singulis diebus 14. guttæ essent capiendæ. Modestè respondebam, notam mihi huius medicamenti virtutem, nec ignorari à me, quantoperè illud à Sylvio ad ulceris mundationem ac consolidationem, si ejus nimirum aliquid ulceri instilletur, *lib. 1. prax. medic. cap. 40.* efferatur, interim tamen cautelam Celeberr. Wedelii de balsamo hoc aliis terebinthinatis præsertim in tantâ dosi teneris ac delicatis ægris non exhibendis, videri tantò magis observandam, quòd Illustrissimus adolescens etiam gratissima remedia nonnisi cum summâ nausæa caperet. Excanduit his auditis vehementissimè, ac discessit. Quid fit? Persuasus ab Ephoro suo æger sumit 7. guttas, sed incredibile dictu est, in quantas inciderit anxietates, quantos dolores in renibus, quantum ardorem in reddendâ urinâ hinc perpeffus fuerit. Itaque non nisi blandiora remedia, cum in nos curæ onus esset devolutum, habuere locum, ac inter ea conservam rosarum cum pulveribus quibusdam remissam laudare possumus. Profecimus mensis spatio tantum, ut & materia purulenta multum minueretur, & symptomata reliqua cessarent. Enim verò brevi tempore illa halcyonia durarunt. Nam postquam denuò triduanâ, sed valdè æstuosâ feбри correptus fuisset, rursus purulentam ac mucosam urinam cum symptomatibus solitis excernere cœpit. Irriti fuerunt

labores nostri per tres menses, quandoquidem præfractè usum omnium remediorum adolescens respueret. Chirurgus post tot hebdomadas fluxum purulentæ materiæ imminui cernens, plenariam solius injectionis, quæ ex radice aristoloch. rotundæ parabatur, beneficio, restitutionem pollicetur; Pactus sibi ducentorum Imperialium præmium, quod etiam consecutus, cum purgato diuturnitate temporis abscessu, purulentia amplius in urina non cerneretur. Nec verò habuit, cur diu Chirurgus cristas erigeret, nam adolescens præterlapsis aliquot mensibus in pristinum relapsus est statum, metuendumque est, ne eadem illum fata, quæ puellam quandam septem annorum pessunderunt, maneant. Hæc cum per septem menses lotium purulentum minxisset, febre contabuit, ac mortua est. Placuit D. Klaunig cultro anatomico in constitutionem renum hæc in puellâ inquirere. Quod ubi factum, renem sinistram justo majorem deprehendit, tubuli istius interni partim scirrhusi erant, partim pus plorabant. Ren dexter ita exesus apparebat, ut externa ejus tantum tunica superesset, quâ tanquam bursâ collapsâ puris aliquæ reliquæ includebantur. Corruptio jam serpsit ad musculum psoas, qui viridi infectus colore inter digitos ejus præ nimia mollitie defluxit. Interior vesicæ urinariæ tunica pure erat obducta; prope cervicem vesicæ latitabat calculus instar spongiæ porosus, albicans, magnitudine ovo gallinæ respondens, sed quod mireris, pondere tantum dimidiam æquans unciam, qui urinæ fluxum ultimis vitæ diebus fuerat remoratus, ac fata miseræ accelerarat. Pudenda ob materiam purulentam valdè acrem excoriata erant. Cætera viscera immunia à labe inventa sunt, nisi quod lien æquo minor, hepar autem tantò grandius foret. Folliculus fellis bile turgescibat. Aliàs notatu digna sunt Fernellii *de part. morbis & symptom. lib. 6. c. 12. p. 316. sæpe vidimus totâ renis carne ac substantiâ peresâ, ambiente tanquam marsupio membranâ pus calculosque multos obvolvi.*

Febris

Quartana.

Quartanæ febres multos omnis ætatis homines excruciant. Cura, nec in senibus quidem usque adeò ardua erat, quam hoc ferè modo instituimus: per aliquot dies salia digestiva bis etiam in die pro indole ægrorum exhibuimus. Horum virtus magna est, ac meminimus solum tartar. vitriol. in jusculo quotidie exhibitum Illustrissimæ matronæ sexagenariæ, quævis medicamenta nauseanti, ante aliquot annos egregiè profuisse, vimque febris insigniter enervasse. Certè hujus, ac mixturæ cujusdam antifebrilis beneficio febrim pertinacem feliciter superavit. Digestivis subjunximus evacuantia mitiora, & quidem, ubi ex nostro arbitrio res geri poterat, in formâ infusorum ex rad. gentian. helen. polypod. fibr. helleb. nig. fol. trifol. fibr. card. bened. summit. cent. min. comar. absynth. cort. citr. tartar. tartarifat. fol. senn. f. stip. ubi verò precibus & palato ægrorum indulgendum fuit, in aliâ quævis. Pilulas quando præscripsimus, consue-

consuetas apud nos massas cum extract. scord. gentian. cent. min. helleb. nig. ferè semper miscuimus, in potionibus species diatartari Mins. aliis prætulimus. Sæpè intra sedecim dies alvum quater blandè absque omni violentiâ subduximus. Diebus à laxatione vacuis ter quaterve gutt. ex Elix. antifeb. D. M. stomachic. ejusd. Eff. alexiph. &c. in vino exhibuimus. Rarò integer effluxit inter horum remediorum usum mensis absque memorabili febris remissione, quæ hâc ratione fracta vel chinatis, vel theriacâ, vel croco & tis debito tempore cum prudentia exhibitis facilè debellari potuit. Post febrim profligatam amara per 14. ac plures dies continuavimus, ac ita plenissimè citra ullum restans symptoma atque subsecutam recidivam Quartanarii à nobis curati convaluerunt. Aliam sortem expertus est Juvenis 20. annorum aliò modò, id est imperitissimè tractatus. Ille Octobri ineunte febris quartanâ inordinate paroxysmanti correptus, empyricum, narrante D. Pezold, consulit. Hic Agyrta more suo intra triduum bis violentissimè *ἀνω καὶ κάτω* evacuat. Commota hinc fuit acriter camarina, vehementissimè agitati succi vitales, & calculus in renibus sine dolore delitescens, sede suâ expulsus est. Hinc Dysuria secuta, cui obviam iturus egregius noster ex equisone Æsculapius ol. terebinth. propinat pessimis ægri rebus, siquidem non tantum hæmorrhagia narium planè enormis inde excitata, sed & omnimoda urinæ suppressio. Ad ægrum pridie mortis ejus vocatus D. Pezold, tum alia, tum emulsionem ex sem. viol. cum millepedibus, facto prognostico, frustra exhibuit, nam viribus exhaustus quaternarius in flore ætatis, culpa ac severè plectendâ ignorantia stolidissimi medicastri misere periit. Quartanis febribus, si quando aut ægrorum, aut Medici, aut viscerum infimi ventris (nam & ab horum vitiis easdem foveri certum est) culpa justo diutius durant, interdum succedunt post annos etiam febres continuæ, mali moris ac periculosissimæ, quæ nec abscessibus quibuslibet, etiam iis, qui verbo Hippocratis *infra morbum sunt*, solvuntur, ut experti sumus in foemina quadragenaria. Hanc febris quartana ultra annum protracta malè multaverat, quâ cum liberata esset, non tam medicamentis, quæ cholericæ suoque abundans sensu mulier semper adversata fuerat, sed temporis longinquitate, coelique clementia utcunque cum sanitate pristina redierat in gratiam. Diximus, utcunque; nam plenariam non crediderimus illam reconciliationem, quia spiritûs foetorem, labiorum livorem, ac defœdationem, fuscum faciei colorem post se febris ista reliquerat. Dubiâ hac valetudine ei frui contigit per notabile temporis spatium, quò elapsò in continuam incidit febrim, eamque lethalem, secus ac alius quidam Vir Illustris, qui à quartana planè exhaustus, cum præter spem omnem optimè intra mensis spatium convaluisset, intra paucas septimanas, postquam vino & ira incaluisse, febris acuta cum pessimis symptomatibus correptus est. Et certè ne ipse quidem Hippocrates de subsecutura morte dubitasset, consideratis, provectori

ætate viri, viribus admodum præcedenti morbo debilitatis, perpenſis deliriis, ſingultu, typhomaniâ, involuntario urinæ & excrementorum efflu-
 xu, floccorum collectione, &c. evaſit tamen feliciter & ad hanc horam
 ſanus & ſalvus ſupereſt. In noſtrâ ægrotante æſtus vehementer erat in-
 tenſus, interdum, ſed noctu omnium maximè cum incredibili anxietate,
 inquietudine vigiliſque perpetuis; quaſi præſcia mortis ſuæ eſſet, nullâ
 ſuarum rerum curâ tangi videbatur. Urina multo eoque copioſiſſimo ſe-
 dimento abundabat. Credidiſſes naturam velle omnia excrementa in vias
 urinarias deponere. Miſtio erat frequens, ſed pauca. Latens etiam ali-
 qua phlogoſis in ductibus urinariis obſervabatur. Poſtquam ultra 5. ſepti-
 manas his malorum fluctibus jactata eſſet, de dolore inguinis in dextra
 regione conqueri coepit, brevique poſt tumor, abſceſſus rationem utique
 ſubiens, ibidem exortus eſt. Vitium non eſſe cutaneum, ſed ſcaturi-
 ginem habere internam, facile apparebat. Et niſi nos omnia fallunt,
 morbus prægreſſus corporis conſtitutio & omnia pathemata ante memorata,
 non vanam movebant ſuſpicionem de affectione aut meſenterii, aut lienis, aut
 fortè utriuſque. Tametiſi verò Oraculo Hippocratis illi *abſceſſus boni
 ſunt, qui infra morbum ſunt*; quò minus tamen in bonorum claſſem noſter
 referri poſſet, duplex obſtabat cauſa. Prior erat, quòd non ſatis diſtaret
 à morbo; ex infernis enim optimi illi ſunt, qui longiſſimè infra ventrem
 & remotiſſimi à morbo ſe ſiſtunt: Altera verò, quòd non eſſet κατ' ἴξιν,
 ſed in latere dextro, cum vitium lienis & meſenterii palpabile eſſet. Ve-
 rè enim, quod Hippocrates de hæmorrhagiâ docet, abſceſſibus illis ap-
 plicari poteſt, & niſi fallimur à Dureto applicatum fuit iſtud Senis Coi:
*Quæ fit è diverſo hæmorrhagia, prava eſt, ut in liene magno è dextris,
 atque ſimiliter in hypochondriis.* Unde exigua apud nos quidem de ſanitate
 ſpes, quæ apud Chirurgum erat maxima. Nec ipſi quidem ſpem omnem
 exuiſſemus, niſi in ſiniſtro latere apparuiſſet tumor ille, memores Hero-
 phontis apud Hippocratem: *Huic lien intumuit, inde bubo ſiniſter, mox in-
 crure κατ' ἴξιν factò abſceſſu præter ſpem convaluit.* Præcedenti hyeme cum
 febris peſſimi moris cum ſymptomatibus variis, aphoniâ, epileſiâ in *puero
 ſexenni*, cum deliriis, ſummo capitis dolore & viſus obtenebratione in *virgine
 adultâ*, cum cardialgiâ, tremore partium in *ſamulis duobus* in unâ eademque
 domo ſæviſſet, omneſque ex ſingulari DEI gratiâ convaluiſſent, ultimo
 illuſtre familiæ caput morbus eſt aggreſſus. Tanta vehementia erat ſymp-
 tomatum, præſertim verò ſingultûs, ut omnes de vitâ ejus actum eſſe crede-
 rent. Nos optima alebat ſpes, eum ex gravi morbo eluctaturum, cum
 dextro femore acerbiffimus dolor oboriretur, eumque brevi poſt tumor exci-
 peret, eò quod Vir & generis ſplendore & officii dignitate nobiliſſimus he-
 patis obſtructione, ac ex immoderatori uſu meri ac irâ impetuoſâ ejusdem
 inflammatione laborare nobis videretur. Et planè ita evenit. Adeò dex-
 tra dextris & ſiniſtra ſiniſtris ὁμόφυλα καὶ ἐντροφεύα. Abſceſſus in ægrâ
 noſtrâ

nostrâ apertus ingentem puris quantitatem effudit. Evidenter respiratio & tussis docebat, ex abdominis cavitate purulentam hanc scaturire materiam. Quarto ab aperto abscessu die extincta est, nec impetrare ullô modô à marito licuit, ut cultro anatomico indice in fontem ac principium mâli inquireretur, quamvis nullo modô dubitemus, extispicium hoc confirmaturum fuisse, nostram de origine morbi sententiam. Hi tamen abscessus distingui debent à tumore in pube apparente, cujus origo in meatu urinario vel in collo vesicæ hæere potest. Ad illustrandam nostram observationem nobis addere novam liceat. Nobiliss. Matrona gonorrhœâ olim & periodico calculi renum tormento fatigata per aliquot annos de summo urinæ ardore ac laciniatione conquesta in autumno febris corripitur symptomatice. Pristini cruciatus in immensum augentur. Inter dolorum faces febrisque ignes contabescit. Sumptis gelatinosis ac emulsionibus, continuatoque usu pulveris nephritici Volckhamm. sulphuris lycopodii aliorumque appropriatorum, mitescunt dolores & febris minuitur. Moderatissimè Ess. bals. peruv. & lig. sanct. ut & leni Decocto lign. calidè usa refumit vires. Ex improvîso stimulum sentit ad reddendam urinam, & magnam puris foetidissimi quantitatem excernit magno cum levamine; quæ excretio ubi per unam alteramve septimanam continuasset, clanculum Chirurgorum & Medicastrorum opem implorat. Res suas in deterius labi animadvertens, rursus ad Medicos revertitur. Porrigitur Decoctum ex abstersivis in aqua calc. viv. cui solutio myrrhæ, nisi fallimur, admixta erat, exhibentur etiam multa alia, sed sine fructu. Tandem in pube tumor oritur, ex quo aperto, non nisi olidissimus primùm eructat halitus, deinde etiam purulenta materia in memorabili copia effluit. Exhausta viribus tandem vita excedit. Indagine cultri patuit ad oculum in meatu urinario & collo vesicæ vitium ac origo tumoris in pube.

Hisce diebus passim infantes ac pueri febris purpurata miliari infesta-
bantur. Corpus conspersum erat stigmatibus multis, parvis, rubris, mag-
nam cum moribus pulicum similitudinem habentibus. Macularum flo-
ridarum centrô insidebant pustulæ ichorosæ. His efflorescentiis cutis qui-
dem tota, præcipuè tamen in dorso, collo, pectore obsita erat, quasi
milio vel ovis piscium conspersa esset. Non erant immunes ab hoc ma-
lo quidam eorum, qui morbillis vere præcedenti laboraverant, sed hæc
exanthematica febris hâc vice non tot symptomatibus stipabatur, quàm illa,
quæ comitabatur morbillos. Ægri non vomebant, quod pueris ἀδδ'ηρ'ος
efflorescentibus morbilis admodum fuerat familiare, nec debilitabantur copio-
sis sedibus, quæ morbillos in plerisque stipabant. Non vidimus in nostrâ hâc
febris exclusos lumbricos vel ascarides, sicuti in morbillis contigerat. Tussie-
bant quidem nostri, sed non tam impetuosè, multò minus cum metu suffo-
cationis, sibilo arteriæ asperæ, venarum colli inflatione, constrictione
pectoris anxiâ, &c. indivulsis morbillorum in haud paucis inter nostra-
tes

Febris
purpurata
miliaris.

tes comitibus. Præcipitantibus, diapnoicis ac diluentibus adjuti morbum intra septem dies superabant.

Paralysis.

Tantum in uno puerulo restitabant indicia paralysis manuum, quæ solo specifico cephalico, & potione ex aquâ cerasorum nig. fl. til. pœon. & syr. fl. tunic. ac stœch. tollebatur. Aliquantò difficilius successit negotium in infante unius anni ablactato, qui absque omni febris ac excretionis post fluxum alvi cessantem paralyfin manuum & pedum cum inflatione tumidâ harum partium conjunctam incurrit. D. Preus pulveribus præcipitantibus & liqu. C. C. succinato contra hoc malum certavit. Liqueoris guttas 6. aliquoties in aqua fl. pœon. & cinam. buglossata exhibuit. Tandem tamen post usum enematum ad externa ei deveniendum fuit, quæ inter deprædicat seq.

℞. Ungu. nervini 3vj.

Ol. Nucist. express. 3jj.

dest. mac.

anth. aa. ʒß.

succin. gtt. V. Misc.

Hoc ipso nucham, spinam dorso ac lumbos cum articulationibus inungi curavit, unde brevi pristinæ sanitati fuit restitutus, quæ cura etiam in aliis puerulis felicem est sortita eventum, sicubi, quod non adeò rarò apud nos evenit, tumores ejusmodi paralytici ac flatulenti artus occuparent, nisi quòd interdum loco unguenti usurparetur linimentum spirituosum ex — lil. convall. lavendul. & salis *ci, id quod valde profuit puellæ, quæ simul dolorem colli cum conatu sæpius mingendi, & incontinentiâ urinæ patiebatur. Egregium certè est medicamentum liqu. C. C. succinat. in epilepticis & paralyticis infantum morbis, modò non adeò foret nauseabundum. Virtutem sanè maximam exeruit in filiola tertium ætatis annum egressa, quæ, durantibus aliquamdiu post variolarum cohærentium copiosam eruptionem, epilepticis motibus non sine magnâ difficultate liberata in gravissimum malum, aphoniam ac paralyfin totius corporis incidit. Illa sanè ex assiduo liqueoris hujus per multas septimanas usu, tantum est consequuta beneficii, ut cum sanitate rediret in gratiam.

Fluor albus.

Admodum insolens erat his diebus fluor albus, non tantum venereus, quem virulentum vocamus, quique, ubi parum invaluit, semper cum exulceratione quâdam conjunctus esse videtur; sed benignior etiam, in quo per vasa uteri impuritates corporis absque ulla venerei mali suspitione quasi criticè deponebantur. Eò minus autem remediis auscultabat, quò diutius duraverat, id quod magno est argumento, assuetudinem motus excretorii fluxum hunc admodum reddere rebellem. Maximè profuerunt noduli laxantes & alterantes ex radic. Zedoar. caryophyll. galang. fol. rorismar. menth. meliss. millefol. fl. hormin. galeops. ac rhabarb. In abrotano nota-

notabilis uterum purgandi & roborandi virtus nobis deprehensa fuit. Cæteris parum proficientibus ab inveterato malo liberata fuit matrona a-
pozemate *Loffii lib. 4. observ. medicinal. c. 8. p. 344.*

℞. ras. ligni lentiscin. ℥vj.

rorifinar. ℥ij.

fuccin. flav. crassi contus. ℥vj.

rasur. stanni ℥j.

ebor. ℥j.

macer. in ℥vjij ∇ font. per 24. horas,
deinde adde:

rad. eryng. ℥ij.

uvar. passar. ℥ij. coqu.

Finem curæ aut martialia, aut ossa sepia optatum sæpiuscule imposuerunt.

Non minus operosam diligentiam requirit mulierum gonorrhœa, quo Gonor-
nomine comprehendimus effluxum materiæ, quæ ex prostaticarum mulie- rhœa mu-
brium porulis non sine molestia gravi exstillat. Non more quorundam lierum.
hæc genera fluxuum confudimus, quorum alter ex vasis uteri, ut jam jam
memoratum, alter verò ex ductibus prope meatus urinarii exitum scatu-
rit, sed illi quidem præstantissimos auctores secuti fluxus albi appellatio-
nem; huic verò, tametsi propriè dicto semine foeminæ destituantur, go-
norrhœæ nomen tribuimus. Et sanè cum in viris prostaticarum fluxus go-
norrhœa vocetur, cur non etiam in mulieribus eodem nomine nuncuparetur,
cum in utroque sexu partium & ductuum eadem ferè sit substantia, ut lo-
quitur Regn. de Graaf de organis mulier. c. 6. p. m. 213. Nec ullo
modo dubitandum est, in gonorrhœa mulierum prostaticas affici, cum in
muliere gonorrhœa laborante post mortem prostaticas exulceratas idem Graafius
invenerit. Accedit, quod in gonorrhœa non totus vaginæ tractus; ut in
fluore albo obsitus sit mucosa & acri materia, sed reliquis omnibus illæ-
sis pars illa circa meatus urinarii insertionem ejusmodi liquamine imbu-
ta, ac interdum etiam exulcerata inveniat. Facilis autem labor fuerit,
gonorrhœam à fluore albo distinguere, si quantitatem & doloris locum
respexeris, nam longè major exundat materiæ copia in fluore albo, quam
in gonorrhœa, & in hac dolores sentiunt circa uteri collum ac orificium
externum, cum in illo de intenso molestiæ sensu circa lumbos conque-
rantur. Cura ferè eadem est, quæ gonorrhœæ virorum, præmissis enim
ex cassia, diagrydio & ꝥ dulc. evacuantibus non admodum drasticis,
hausto dilutiori per aliquod tempus lignorum decocto, pilulis ex terebin-
thina inspissata lotaque & ex extracto guajaci, multum profuerunt aliqua
medicamenta Wedeliana, e. g.

℞. Eff. lignor. ʒij.
 succin.
 bezoard. aa. ʒj.
 anodyn. ʒß.
 ol. fassafr.
 rutæ aa. gt. ij.
 it. ℞. succin. alb. ppt.
 magist. ʒ diaph.
 off. sepiaæ.
 ocul. 69. ppt. aa. q. v.
 ol. lign. fassafr. gt. j. M.

Sumptis his remediis ferè plerumque dolor remisit, in quo demulcendo etiam sese egregiè gerit Decoctum ex rad. glycirrh. summit. rorismar. herb. petrosel. agrimon. &c. his adhibitis deposuit materia effluens prævum suum colorem, ac coepit albescere, licet aquosior, ut narrabant, esset, ardor quoque in mejendo abscessit. Hoc, ubi ab ægris resciveramus, de sistenda gonorrhœa cogitavimus. Jactabat quondam aliquis apud nos, se rerum usu comperisse, Crocum ʒtis adstringentem omnibus aliis longè præstare. Utebatur verò ʒß cum conserva rosarum, aut baccar. recent. heder. Illustris matrona deprædicabat sequ. Electuarium Vienna, ut dicebat, sibi transmissum, quod tamen à Chirurgo quodam concinnatum esse credebamus:

℞. Pulv. Cinam.
 N. Mosch.
 Cremor. tartar. aa. ʒj.
 off. sepiaæ. ʒjß.
 sangu. dracon. ʒij.
 bol. armen. ʒijß.
 mell. rosat. q. s. f. Elect. molle.

Multo efficacius est Decoctum aliquod ex sassaparill. ʒ crud. in petiâ ligato, putaminibus nucis, cortic. granat. rad. polypod. Laudavimus in Historia nostra alibi balsamicum quendam liquorem pro injectione, quem miscendum esse cum Decocto appropriato quivis facile intelligit; at istæ apud plurimas fœminas locum vix inveniunt, cum quibus etiam de affectu ipso, non nisi suppresso vero ejus nomine differendum est. Fuerunt tamen aliquæ, quibus liquamen acrimonia ulcerosa imbutum inflammaverat ac eroserat fibrillas vaginæ, etiam ad hanc necessitatem enormitate doloris adactæ. In vaginam uteri cum summo levamine sequens injectio calidè fuit facta:

℞. lact.

R. lact. recenter mulctæ ℥iij.

▽ rofar. ℥ij.

album ov. ℥j.

Croc. ʒß. M.

In meatum verò urinarium mistura ex ▽ calc. vivæ, sacchar. saturn. ac melle rosato.

Sine dolore vix meminisse licet, quam numerosa nullo non tempore re inveniatur multitudo eorum, qui bubonibus venereis in inguine de-
foedentur. Luerunt aliqui satis graves hisce mensibus impuritatis suæ poenas. Afficiuntur, ut cuius notum est, circa inguina glandulæ, quæ vasis spermaticis tum præparantibus, tum deferentibus sunt viciniore, atque, hinc sine difficultate bubones ab hernia inguinali distinguuntur à peritis. Absentia etiam febris malignæ in nostris ægris eos à pestilentibus separat. Prima mali origo ab impuro cum prostibulis infectis concubitu; nam hætenus à nullo, quantum scimus, est compertum, quòd alia via sit ad bubones, quàm diversio ad impudicas mulieres, adeoque optimè dans le Dictionnaire des arts & des sciences de l'Academie Française, in descriptione hujus tumoris maligni mentio fit commercii avec une femme, qui avoit du mal. Duplici verò ratione messem hanc metuat, qui venereis libidinibus ætatem corrumpunt; nam in aliis quidem præcedunt colis pustulæ, tubercula & ulcera, ac viridis, subcitrini exurentisque, &c. feminis excretio; in aliis verò sine præludiis hisce miasmata à pure ulcusculorum in foemineis pudendis latentium, à pene in æstu coitus excipiuntur & ad massam sanguinis illicò transferuntur. Dolæus in Encyclopædia chirurg. p. m. 1061. miasma hoc vocat acidum acre, illudque juxta nostrum Auctorem vasorum sanguinis tunicas penetrans illius massæ immiscetur, quædam ex illius alcalicis saturat, & quædam sulphura coagulat, quæ in inguinum & axillarum glandulas cum sanguine circulante advecta, in illarum angustioribus tubulis commorantur, sanguinique affluenti & materie æthereæ adveniēti sunt impedimento. Tametsi verò hæc ita placuerint Carolo Musitano Tom. 4. Trutin. Chir. p. m. 75. ut retentis etiam verbis quibusdam illa Dolæi adoptarit, quemadmodum passim alibi Germanorum vitulo aravit; nobis tamen non est verisimile, ab eo rem rectè fuisse trutinatam. Ambabus largimur manibus in corporibus gonorrhœa ac ulceribus affectis, acres observari humores, aut interdum quoque acidos, non tamen hinc cum multis Sylvii hac in parte affectis illico inferendum est, ipsum fermentum, seu miasma acido-acre esse; cum negari nequeat, quod intret, ac interdum latitet aliquandiu in corporibus eorum, qui inficiuntur absque minimo doloris sensu, quod est contra naturam acidi, quod ex sententia ipsorum tam forte est, ut etiam vim ejus corrosivam ipsa ossa non evadant. Ingenuè profiteamur, nos ignorare naturam fermenti hujus venerei, ac non nisi illud novimus, quod in quibusdam subjectis membrum virile non afficiat,

Bubones
venerei.

sed illicò in massam sanguinis translatum à principio corporis agente in glandulas inguinales deponatur, & hoc factò ibidem bubones excitentur. In aliis verò, ut evidens est, in ipsum pudendum agit, illud lædit, prostates etiam exulcerat, ut deindè virus noctu æque ac interdiu ex pene elabatur. Hujus virulentæ materiæ effluxus, si repentè à barbitonforibus & aliis Medicorum similiis cohibeatur, bubones exspectandi sunt. Nimirum admodum credibile est, suppressa repentè gonorrhœa, semen corruptum ex vesiculis seminalibus per vasa deferentia regurgitare, ac enatum inde fermentum partibus vicinis & potissimùm glandulis sese insinuare eo ferè modo, quo impedita gonorrhœa materia venenata per eadem vasa deferentia ad testiculos refluit, ac dolorificum in iis dolorem excitat. In priori casu, protruso ex massa humorum ad glandulas misimate, totum corpus glandulosum in eximiam magnitudinem & duritiem excrescit; in posteriori vero tantum tunicæ glandulam investientes inflammantur ac intumescunt. Utrobique motus sanguinis remoram patitur. Clariss. Whartonijs in *Adenographia* c. 27. p. m. 175. credit, tumorem oboriri ob continuum & impetuosum sanguinis à corde per arterias affluxum, & ob recursum ejus per venas diminutum. Hoc assertum satis commodè explicari potest; nam profecto haud ambigendum, majorem fieri sanguinis ad glandulosas partes congestionem in hoc statu, dilatatis nimirum arteriis ac constrictis tonicè venis, sed illud, quod ibidem addit de superfluis nervorum humiditatibus, quas vel quantitate, vel qualitate vitiosas nervi in glandulas exspuant, dubium, imò prorsus falsum est, cum succus nerveus tantoperè jactatus, ne in exigua quidem quantitate ostendi ab inventoribus ejus potuerit in nervis, immediatè à spinali medulla erumpentibus, non obscure fatente ipso Malpighio in *operibus posthumis* p. m. 39. Unde ei etiam recurrendum fuit, pro probanda hujus succi veritate, ad extremos nervorum tubulos e. g. ad illum, qui in cauda bovis tribus, vel quatuor fistulis coagmentatus est, unde per foramen excitatum terebinthinæ instar exeat succus ille decantatus. Hæc, si vera sunt, tanta ejus succi copia ad glandulas inguinis confluere non potest, ut glandulæ inferciri, & in tumorem elevari queant. Curatio bubonum fastidii plena nobis semper ferè fuit; nam hoc illi habent proprium præ reliquis præter naturam bubonibus, ut suppuratione eorum, corpori melius sit consultum, quam resolutione. Enimverò maturationem ægerrimè admittunt ii potissimum, qui glandulas secundum omnes suas dimensiones augent, & in earum sinu excitantur. Annisi tamen, quantum in nobis fuit, ut maturationem acceleraremus, & ita circa bubones versati sumus, si magno cum dolore, ut fit, conjuncti essent, dolorem mitigare conati sumus fomentis, & cataplasmatibus ex rad. alth. lil. alb. fol. malv. flor. violar. sem. lini, foenugr. Inungi etiam eos fecimus mucilaginis ex sem. psyll. cydon. & ol. amygd. dul. lil. alb. lumbric. hyoscyami & pinguedinibus. His factis non illico dolor remittit, imò subindè

subindè auctus ac intensus, & tum ad emollientia deveniendum fuit validiora, scilicet addidimus prioribus cataplasmatibus speciebus parietar. verbasc. caric. far. fabar. hordei, coepas, crocum &c. Noctu ferè semper Emplastrum ex gum. *co, fermento acri &c. imposuimus. Postmodum ad auxilia maturatoria nos contulimus, inter ea, si cum prudentia adhibeantur, unguent. basilic. galban. gumm. *c. egregiè profunt, quorum virtutem hermodactyli, si nostræ licet fidere experientiæ, exaltant. Diachylon magnum, quod Sylvio scimus, fuisse in usu, non est contemnendum, ac semper ferè à nostris Chirurgis adhibetur, quamvis virtute prædictis par non sit. Interdum tamen, quicquid egeris, frustra fueris, adeò *ineluctabilis duritiei* sunt, loquimur cum Barbeyrac, & tum omninò opus est *hydrargyrosi*. Ubi non æquè rebelles fuerunt, signis maturationis præsentibus, quamvis omnimodam rarò exspectaverimus, si ne mora eos aperuimus, experti, ex pure diutius in tumore hærenti, sinuosa & cacoethica ulcera fuisse orta. Nunquam nobis excidere passus sumus egregium monitum Mons. le Clerc *dans la Chirurgie complete* loquentis de bubonibus p. m. 220. *On les fera long temps supurer*, quod, cum non observatur, ægri certissimè in litem veneream incidunt. Semper tamen habenda ratio ulceris est, cujus consolidatio balsamica nostra mixturâ & Oppodeltoch. Paracelsi egregiè promovetur. Quantum ad interna attinet, dum in emolliendo ac suppurando bubone desudamus, ferè sola lignorum decocta, eaque minimè saturata absque regimine sudorifero suffecerunt. Purgantia iussimus esse procul; abstinuimus etiam à Venæsectione, quod his mediis suppuratio non promoveatur, sed impediat.

In vulgus usque nota sunt varia tumorum pustularumque, quibus Pustulæ ii, qui in turpi libidinum luto volutantur, conspurcari solent, genera, venereæ, iisque enarrandis minimè modò nos occupabimus. Hoc verò, cujus aliquod facere indicium animus est, sive modum eruptionis, sive figuram spectes, paulò rarius, ac quantum meminimus, non nisi semel à nobis visum, aptumque adeò, quod etiam solertem Medicum in errorem inducat. Fœmina, quam lue gallicâ infectam esse, aliundè constabat, non multò quadragenaria minor, temperamenti sanguinei ac cholericæ, ingenii fervidioris, iracundiæ dedita, duarum prolium in conjugio mater, passionibus hysteris obnoxia, quòd menses satis parcè fluèrent, autumnò jam adulto de graviore capitis dolore per aliquot dies conquesta, in Novembri circa quartam pomeridianam, post insignem rigorem ac horrorem in vehementem incidit æstum, qui dorsi ac capitis dolorem longè graviolem eo, qui aliquot jam abhinc diebus afflixerat, comitem habebat. Circa matutinum tempus ingenti sudore profuso & calor, & capitis cruciatus minui videbatur. Fluxit etiam dies ita, ut non haberet, de quo adeò conquereretur; sed circa vesperam, quæ pridie afflixerant, mala, recurrebant omnia, id quod & quatuor sequentibus diebus ita contigit.

Septimo die manè per faciem ac totum corpus copiosissimæ erumpebant pustulæ, hæ referebant figuram variolarum latiorum, & sanè non potest ovum ovo esse similius, quam maculæ istæ protuberantes prædictis variolis, modum eruptionis & maturationis si excipias. Neque enim, quod in variolis fit, pustulæ primò rubræ tenuissimarum acicularum puncturas æquantes prodibant, ac deinde in fastigium elevabantur; sed à primo eruptionis momento pustulæ nostræ eam, quam citra augmentum deinceps servarunt, magnitudinem nactæ sunt, nec instar variolarum ad maturationem & suppurationem pervenientes pus fuderunt, sed ultra tres septimanas absque ulla formæ externæ permutatione sibi semper similes perstiterunt. In circuitu suo rubebant, in medio verò albescebant. Postquam una alterave ex his esset aperta, non purulenta materia, sed substantia quædam pinguedini porcinae simillima deprehensa in iis fuit, absque ullo ægræ dolore etiam asperius contrectari poterant; quæ organa obsidebant, motui dicata ingressui brachiorumque extensioni impedimentum objiciebant. Febris interea, sicut à primo initio fieri suevit, circa vespertinum tempus ingravescebat. Quicquid remediorum ordinariorum per tres & ultra hebdomadas tentaretur, quemadmodum tentata fuerunt multa, id frustra fuit, ac minimè sufficiens vel ad febrim expugnandam, vel ad pustulas abigendas, donec continuato *Qui* dulcis cum absorbentibus & bezoardicis misti usu, ptyalismus excitaretur. Cum salivatio per 14 circiter dies debite fuisset administrata, & febris remittebat, & pustulæ sensim evanescebant, ut præterlapso mense nulla amplius in corpore reperiretur. At, quod ægra dolet, notabilia vestigia ac deformes (dilutè scilicet rubentes) maculas post se reliquerunt. Sparsim hisce nostris maculis pustulæ quædam squamosæ, quæ sub crustâ suâ putrilaginem quandam continebant, interjectæ erant, quibus etiam externa fuerunt applicata remedia eo eventu, ut absoluta salivatione & illæ disparuerint.

Febris
quintana
& septima-
na.

Nisi nos fallunt omnia, hoc autumno jam ad finem properanti vidimus in virò ferè quinquagenario exemplum febris quintanæ, in juvene autem paradigma septimanæ. Uterque laboraverat ineunte autumno febri quartana, & uterque etiam corpore non debite præparato præproperè per corticis peruviani usum ab eadem fuerat liberatus, si licet vocare à quartanâ febri liberum, qui quarto non tantum die adhuc vehementer languet, sed etiam reliquis insignem sentit debilitatem, & cibos fastidit. Luculentè post 12 circiter dies in uno, in altero verò post 21 rediit paroxysmus; uterque, cum non die 4 febris horis consuetis rediret, se immunem fore arbitrabatur, at cum quinquagenario bis die quinto, juveni verò septimo paroxysmus rediisset, nostrum etiam consilium implorarunt. Et quantum quidem ad primum, diu luctatus mecum sum, an non sit consultius cum Vallesio in *Comment. lib. 1. Epidem. p. m. 55. quartanam tardantem* appellare; in altero autem nulla erat

tergi-

tergiverfationis caufa. Neuter à nobis fuit fublevatus, fed uterque tabidus obiit, citius verò juvenis, qui feptimo quoque die febricitabat, quam alter. Præmunieramus nos, quantum ad primum, Hippocratis Oraculo lib. 1. Epidem. feët. 3. quinta omnium peffima, eft; nam & ante tabem (ut in noftro contigit) & tabidis fupervenienſ, occidit. At, quod alterum concernit effatum Hippocratis, in illo non adimpebatur, quod loco citato ita fonat: *Septimana longa eft, verum non lethalis*. Multò minus iſtud Valeſii: l. c.: *Sextana verò aut Septimana, aut etiam variores febres affigunt ut vitia potius naturalia, quam ut morbi, atque adeò, qui illis laborant, videntur eſſe homines alioquin ſani*. H. J. Sed tum Hippocratis, tum Valeſii verba intelligenda ſunt de febribus ſeptimanis, quæ à principio hominem ſanum invadunt; non de iis, quæ jam ægris & vel *tertiana*, vel ut hic accidit, *quartana* debilitatis fuperveniunt, quo in caſu vera eſt ſententia Ballonii lib. 2. Conſilior. annotat. ad Conſil. 51. p. 317. quam his verbis effert: *Febres quintana & ſeptimana tabeſcentium ferè ſunt*. Ita intermiſſiones paroxyſmorum conſuetis diebus ſine ſolutione febris monſtri aliquid alunt; certè in quotidianis veterum, ac in catarrhalibus recentiorum, niſi febris quotidie recurrat, fed hoc illo die remaneat, non ſine ratione contabeſcentia heëtica metuitur.

Obſervatæ etiam ſunt febres octanæ, quarum focus ac nidus in hepate eſt, & ferè icterum parturiunt. Vir profeſſione, ſenio & dignitate Venerabilis Dominus Henricus Klos, Prior Canon. Regul. Lat. S. Auguſtini, amicus noſter, dum viveret, poſt tres Octanæ febris paroxyſmos in icterum incidit. Summam patiebatur compreſſionem ſub ſcrobi- culo cordis, & in ipſo febris ingreſſu anxietates maximas, ex apparente deinde ictero facilè patebat, immanem dolorem, cui vix deſcribendo par erat, à conſtipatoria ac contractoria partis ſimæ hepatis ſtrictura fuiſſe proſectum, à qua hepatis compreſſione etiam derivandus icterus, cum facilè intelligi queat, quomodo per ejusmodi coarctationem ſeparatio humoris fellei impediatur. Acceſſit ex eadem caufa febris inflammatoria vehemens cum ſiti, dolore capitis, vigiliis, ſingultu, fed non adeò frequenti, rubore faciei, ac duritie præcordiorum dextra parte, quæ omnia viro ſeptuagenario ſuprema imminere ſignificabant. Et proſecto in morbo arquato, *durum fieri jecur, pernicioſiſſimum eſſe*, jure optimo ſcribit Celfus lib. 2. c. 8. p. m. 74. Biduo ante mortem vehementer efflabat, quaſi ſuffocationem metueret, dormituriens palpebras committere non poterat, quæ nobis in memoriam revocabant ex Coacis illud Hippocratis: *Qui vehementer efflant & reflexis ſunt palpebris, ac per ſomnum leviter ſuſpiciunt, aurigine admodum ſædati & largius colorati, moriuntur*.

Occaſione febrium paulò rariorum, memoranda etiam hæmorrhoidalis, quam ſibi obſervaffe viſus eſt D. Graſſius; eam his verbis deſcribit: Quosdam infeſtabant febres hæmorrhoidales, quæ levi frigore, ſubſequo blando calore ægros, (ut plurimum fœminas) feroci abdominis, circa

Febris
octana.

Febris hæ-
morrhoi-
dalis.

circa hepatis regionem, umbilicum, os sacrum, & in cruribus, dolore, cum constrictione diaphragmatis circa orificium superius stomachi, cum vel sine obstructione alvi, excruciant. Pulsus erat durus & plenus, dolor capitis in plerisque vel planè nullus, vel admodum levis. Non cedebat his dolor alvo aperta, nec laxantibus (clysteribus tamen aliquantisper) obediebat, sed obstinata duratione ad aliquot dies ejulantes ægros torquebat, singulis diebus vagos paroxysmos procreans. Victas tamen manus porrigebat, præmissis malignitati resistantibus medicamentis, venæ sectioni in pedibus, & tinct. Et. tartarifatæ Ludov. ritè præparatæ, intermixtis resolventibus, absorbentibus & Osis. Quibus autem hæmorrhoidales fluebant venæ, breviori via morbus absolvebatur. H. J. Nos etiam cum hæmorrhoidibus tumentibus & dolentibus luctati sumus. Flores sulphuris internè adhibiti, sed in dosi paulò majori, in iis resolvendis egregiè sese gerunt. Externè discussionem adjuvat, ac dolores sopit Cataplasma ex coëpis sub cineribus assatis, ac oleo ovorum recenti. In doloribus atrocibus mitigandis spem nostram non fefellit linimentum ex mucilagine sem. psyll. [ac cydon. c. ▽ verbasco. extracta, ol. hyosc. & vitell. ovi, quamvis folia verbasco in lacte cocta & calidè applicata sæpè sola nobis suffecerint. Interdum sumus etiam usi sequenti unguento :

R. Unguent. ad hæmorrh.

rosat. an. ℥jjj.

alb. camphor. ℥jj.

Sacch. satur. in ol. lil. alb. solut. ℥ss.

ol. hyosc. ℥ss.

Verbasco.

momord. aa. ℥jj. M. D. ad fict.

Sterilitas
mulierum.

Invisum familiis malum sterilitas est, ac fervens prolis desiderium coëgit nonnunquam uxores, abjecto, qui sexum foemineum vehementer ornat, pudore, ad Medicos recurrere, ac ea permittere, quæ verecundia vetat, ut nimirum edoceantur à Medico, utrum in sinu pudoris quippiam lateat, quod conceptionem impediat. Atque hinc natæ variæ Medicorum observationes, & una etiam D. Pauli, quam his concepit verbis : *In duabus infæcundis mulieribus, citra ullum delectationis sensum, juxta propriam ipsarum confessionem congressum patientibus, manus meæ examini commissis, internum uteri orificium coalitum, defectumque rugarum in collo deprehendi.* H. I. Et certè jam à multis annotatum auctoribus, conceptui obicem poni, si internum uteri orificium quacunque de causa fuerit arctius, quorsum referenda sunt duo sterilitatis exempla à scirrho circa uteri orificium enato, ab Hildano *Cent. I. observ. 65. & 66.* enarrata. Nihilominus graves patitur difficultates hæc sententia, eò quod à præclarissimis Medicis observatum, per solum penis ad muliebria clausa affricum, ac externam seminis adspersionem mulieres nonnunquam concepisse, & hodie communi eruditorum suffra-

suffragio comprobatum sit, non opus esse, ut crassior feminis pars ad ipsam uteri cavitatem pertingat, sed sufficere, si genitales spiritus, qui per exiguum etiam porum facile possunt penetrare, ad illum diffundantur, prout nuperrimè quoque inculcatum à Celeberr. Joh. Wilh. Pauli Professore Lipsiensi, inter præcipuos Germaniæ Anatomicos non immerito numerando, in doctissimâ Dissertatione *de nutritione naturali, ac præternaturali, potissimum auctâ & abolitâ*. Absentia plicarum, si quicquam ad frustrationem conceptus confert, non aliô modô concurrere potest, quam hîc, quòd vagina plicis his destituta, non tam arctè penem virilem complectatur, & semen effusum non benè suscipiat, sed facilius elabi sinat, cum strictior vaginæ uteri ad membrum virile applicatio, iudice Graafio *de Organ. mulier.* feminis susceptionem ac retentionem multum adjuvet. Cæterum multò frequentiores apud nos sterilitatis causæ sunt plethora in otiosis lauteque viventibus foeminis, & morbi uterini varii, præcipuè vero fluxus albus, commune multarum flagellum, quandò recrementitii corporis humores per vasa in uterum hiantia in cavitatem ejus, non in vaginam depluunt.

Vidimus hoc tempore, quemadmodum etiam alias subinde contigit, Pneumatosi. foeminam in secundo senis thoro viventem, pneumatosi laborantem. Huic menstrua substituerant, venter circa uteri regionem in tumorem fuerat elevatus, mammæ turgescabant, & alia aderant, quæ falsam veræ imprægnationis speciem ei imprefferant, sed se delusam cognovit, ubi loco foetus flatus, subsidente mox ventris mole, sine ullis adhibitis remediis exclusit. Sicubi medicamentis opus fuit, contra illud malum certavimus pilulis ex massa pilul. foetid. Gumm. Galban. c. ✕ solut. & paucis gr. scammonii cum Elix. bals. Lang. par. Tragæâ ex speciebus diagalang. diaspolit. Galen. & saccharo, ut & fotu ex herb. thym. calamenth. abrotan. rut. puleg. flor. chamom. sem. lini, foenugr. aneth. cumin. bacc. laur. &c. tartarea verò remedia prudenter adhibita omnium optima fuere deprehensa.

Rarius uteri verus hydrops vanâ graviditatis spe decipit mulieres, Hydrops uteri. nisi prorsus simplices, nam paulò sagaciores, & quæ vel semel tantum gestarunt uterum, ex sonitu fluctuantis aquæ, cum de latere in latus volvuntur, insolito versus pubem pondere, dyspnœâ, gravitate in ambulando &c. convincuntur, minimè sese esse prægnantes. At iudicium multò est difficilius, quandò hydrops uteri cum foetu conjungitur; quamvis id solatio miseris esse debet, quod per partum uterus & à foetu & diluviò aquarum, sive in uteri cavitatem, sive in vasis illius contineantur, feliciter liberetur. Enim verò hic labor, hoc opus est, exactè definire, ubi vitium hæret, si post partum tumor abdominis remanserit. Tractavimus ingentem ejusmodi tumorem circularem, qui copiosissimis sudoribus in laconico fuit ex voto discussus. Credebamus esse hydropem peritonæi, nam cum in sensus incurrat, tempore graviditatis & musculos abdominis, & peritonæum, mirum in modum ab utero dilatato distendi, admodum

probabile est, eò ipsò lymphatica peritonæi vasa vehementer interdum comprimi, ac hâc coarctatione motui lymphæ remoram injici, quod, cum contingit, necesse esse videtur, ut hydatides formentur, sed dum partium ambientium renitentia debitum illis spatium non indulget, quid mirum est, si illæ ruptæ intra peritonæi duplicaturam lymphaticum latitem exonerent, atque hanc hydropis speciem excitent? Si quando verò post partum inæqualis abdominis tumor sese conspiciendum ac contrectandum præbeat, uti evenit nobilissimæ matronæ, postquam ultimum filium esset enixa, quæ in dextro latere grandi onerabatur distensione, de origine ejus medentes in diversas abeunt partes, quemadmodum hîc etiam factum. Alii molam in utero retentam accusabant, alii hydropem ovarii, alii tubæ Fallopiianæ subesse suspicabantur; nos, quibus vix spiritum ducebat mater ad lectum puerperæ filiae ærumnosum statum exposuerat, vitio viscerum in abdomine, & præcipuè ab hepate non rectè constituto hydropem ortum esse credebamus. Falsitatem sententiæ de præsentia molæ spontanea ex pedibus aquarum effusio, ac hinc secuta detumescencia abdominis facillè probabat, ut & insignis utilitas ex usu Electuarii hydragogi, notum illud Sylvii ejusdem nominis, efficaciam multum superantis, ad illam post copiosas dejectiones aquosas rediens. Aliorum lites de parte affectâ diremit post mortem iudex culter anatomicus; nam ut testatur D. Pauli, *prægrandis vesicula fellis aliquot lapillis gravida, hepatisque lobum protrudens oculis subjecta*, uti sonant ipsissima ejus verba.

Prima
species
morbi ab
Hippocra-
te Craffi
appellat.

Vivit apud nos quinquagenario major, cholericæ constitutionis, qui & hoc autumno, & posthâc aliquoties, ac nuper admodum sequenti morbo oppressus est. Primò quidem queritur de obtuso in abdomine dolore, postmodum dolores sursum deorsumque lati obmurmurant, crederes solos esse flatu. His molestiis, ubi per aliquot dies exagitatus est, corripit eum rigor & febris, quæ cum vehementi ac continenti dolore capitis conjuncta est. Illa quando parumper remittit, exsurgunt dolores circa hypochondria, succedit vomitus, aut conatus vomendi, quasi ventriculus cruditate laboraret. Os falso aut amarò sapore est infectum; deinceps affligit aliqua respirationis difficultas, tracto ab hypochondriis in sympathiam diaphragmate. Brevi post exoritur dolor circa costas tam acerbus, ut tactum digiti ferre nequeat; describit illum verò ut morsus sensum partibus inferentem, interdum etiam ut ulcerosum. Dolori jungitur rubedo erysipelacea circa costas; sed dubium non est, quin spinales nervi quodammodo compatiantur, eò quod doloris sensus usque ad dorsi spinam diffundatur. Enim verò nec his circumscribitur limitibus; nam ardor ac dolor ad anum, quasi æger hæmorrhoidibus cæcis, & ad vesicam, quasi calculo laboraret, pertingit. Interea frigent pedes & extima. Evanescente rubore & dolore circa costas cutis capitis durior erat instar corticis intenseque in cervice rubescebat. Morbus à nobis descriptus modò remissior, modò verò

vehe-

vehementior erat, nec bezoardicis, diapnoicis, diluentibus ferè per mensem superari potuit. A purgantibus lenioribus iterato exhibitis, gelatinosis ac lacte mitescere nobis visus est, non penitus verò tolli. Nisi nos omnia fallunt, cum symptomata ex amussim respondeant, ægritudinem hanc jam olim accuratè descripsit Hippocrates libro magno de morb. intern. text. 48, ejusque originem petiit à bile & pituitâ mistâ per corpus diffuenti in ventrem, ac à solis calore & aquæ potu; quæ tamen causa an in nostro locum habeat, dubii hæremus, quamvis corpus ægri nostri sensu Hippocratico biliosum vocari posse, minimè ambigamus, & cuivis in civitate notum, quòd ab æstu solis sæpè incaluerit. Refert Hippocrates hunc morbum inter *παχέαι νοσήματα*, hoc est: Crassos morbos, quorum quatuor enumerat, complexus verò hoc nomine, ut evidens est ex contextu, incrementum totius corporis, vel partis in molem ex multa humorum pravitate impactorum parti, vel diffusorum per universum corpus, ac non meminimus, ab ullo recentiorum primam hanc ejus speciem, cuius symptomata ab Hippocrate memorata in corpore suo spectanda æger noster nobis exhibuit, fuisse descriptam. Faxint autem superi, ne in illo eventum fortiatur istud Hippocratis, quò descriptioni *νοσήματος* colophonem imponit: *Hic si curetur sex annorum spatium, satis est, sin minus, remanet usque ad decem annos, multis etiam & commoritur.* H. J. Jam sunt septem præterlapsi anni, nec tamen ad hoc usque momentum ab illa ex toto sublevari potuit afflictione, ac in ultimâ morbi exacerbatione fudor multus & foetidus, quò dormiens diffuebat, quemque Hippocrates signis sinistri ominis annumerare videtur, nos vehementer terrebat; nihilominus tamen, utcunque refocillatus muneribus suis denuò incumbit. Miraberis forsan, nos purgantia ausos esse propinare huic, dum erysipelaceo rubore corpus esset tinctum, ac ipsimet novimus, ea cum exitio ægrorum in erysipelate fuisse data. Scias tamen velim, nos filum doctrinæ Hippocraticæ præsentī inflammatione externâ, quantum ad purgantia, semper fuisse secutos tanquam cynosuram & regulam, atque à purgantibus non abhorruisse, quando urinæ crassæ ac nebulosæ fuerunt, ut hic contigit, si verò tenues & crudæ essent, ista cane pejus & angue à nobis esse vitata. Didicimus hoc jam olim ex optimo Hippocratis Interprete Prospero Martiano in sect. 4. de ratione victus acutor. p. m. 387. nec in erysipelate capitis infelicitè cessit. Certè D. Preus viduæ erysipelate capitis vesiculoso cum æstu febrili laboranti, præmissis præcipitantibus, nitratis potiunculam blandè laxantem, & noctu anodynum porrexit, unde non solum caput detumuit, sed mulier etiam ex voto convaluit. Non aliter cum V. S. comparatum est, nos ferè semper in erysipelate quovis, præcipuè verò capitis omittendam esse censuimus, nec animus est, ejus utilitatem in illo aliis commendare, & tamen diffiteri non audemus, etiam serenissimo cuidam Principi, quem nostris consiliis pro virili in hoc morbo

morbo adjuvimus, sine ullo damno sanguinem fuisse detractum. Pariter solutione lithargyrii argent. ceruss. & camphor. in ∇ solan. nymph. lactuc. & acet. erysipelas illinere multi trepidarent. Et tamen prælaudatus ante Collega noster erysipelati femoris dextri optimo cum successu solutionem hanc, quam vulgò lac Virgin. dicimus, calidè aliquoties in juveniculâ applicavit. Sed hæc obiter.

Chlorosis
& Cachexia mulierum.

Ingluvie fructuum foeminae & puellae quædam in Cachexiam & Chlorosin inciderant. Præmissis salibus digestivis, evacuantibus mitioribus, infusis laxantibus, interpositis sudoriferis, medelam inveniebant in iis, quibus lymphæ antea in poris stagnanti, jam verò liberiores motum adeptæ, balsamus restituebatur, hoc est, in *sulphureis* & *aromaticis*, e. g. pulv. stomach. Birckmann. Tinct. corall. Elix. propriet. balsam. Elix. vit. &c. & *tonicis* v. g. pulv. cachect. Querc. cum stomachico ejusd. additis oleosis & aromaticis ac martialibus, scilicet Tinct. Martis variis cydoniatâ, pomatâ, tartarifatâ, ac limatura martis. Ab anticachecticorum usu, ne præsentem quidem febri destitimus, edocti, cachexiæ magis, quæ febrim fovet, quam ipsi febri tali in casu esse occurrendum. Præclara sunt celeberrimi Brunneri medicamenta, quæ paucis quibusdam eximie profuisse novimus.

℞. Extract. cathol. vel
Mass. pilul. tartar. Schroed.
de gumm. Hco aaq. f.
℥ dul. ritè parat. gr. vj.
Trochisc. alhand. gr. j. c. f. q. Elix.
Prop. f. pil.

His præmissis tertio & seqq. diebus adhibetur pulvis viperarum in iusculo caponum. Postmodum pilulæ sequ. ordinatæ sunt:

℞. Extract. cardui bened.
absynth.
cent. min.
croc. or.
Gumm. Hci aa. ʒß
Croc. ʒi. aperit. usque ad ʒß

c. f. q. Elix. Prop. P. f. ac. vel. aperitiv. Glauber. f. l. a. pilul. ex ʒj. no. XXX. Ex his quinque primo, secundo 7. tertio autem die 9. duabus ante prandium & coenam horis in vino accipiuntur, id quod per integros 40 dies adhuc faciendum. Beccheri pilulas multi credunt his efficaciores, hoc tamen certum est, quòd continuatio per tantum temporis intervallum non sit necessaria. Post prandium cochlear unum essentiae amaræ capiendum est:

℞.

℞. rad. galang.

Zedoar.

calam. arom.

croc. orient. an. ℥j.

cinam. acut. ℥jj.

myrrh. rub. ℥j.

aloës succotr. ℥vj.

Theriac. Andr. ℥jjj.

Incis. & contusis affunde ℥ juniperi ad trium vel 4 digitorum eminentiam, diger. per octid. Colat. serv. Curæ coronis imponitur per alcohol. limat. ♂t. At dolendum, quod à plerisque nostrarum frustra tam longam sibi quisquam in adhibendis medicamentis patientiam possit polliceri. Paucissimæ sunt, & vix totidem, quot divitis ostia Nili, quæ non curam tanto temporis intervallo demum absolvendam horreant.

Sub finem hujus anni pessimè valebant senes. Quamvis verò omnia illa senectutis incommoda, quæ Celsus lib. 2. c. 1. facundè recenset, *nocturnæ, inquam, vigiliæ, vitia longiora aurium, oculorum, etiam narium, præcipueque soluta alvus, & quæ sequuntur hanc, tormina, vel levitas intestinorum, ceteraque fusi ventris mala hos illos premerent.*

Plures tamen spirandi difficultas, stranguriæ ac dysuriæ doloresque articulorum aut gravissimis exercebant molestiis, aut iis lethales erant. Quantum attinet difficiliorem spiritum senum, haud inficiari possumus, quod in quibusdam non ab affecto pulmone, atque ibidem hærentibus crassis succis proficiscatur, sed potius ab impotentiâ thoracis, diaphragmatis & musculorum intercostalium pendeat, quod pro sagacitate ingenii sui jam Plato in Timæo agnovit. Notum enim est ex Physiologiâ, quòd pulmones motum thoracis sequantur, ac cum eo dilatati aëri pondere suo irruenti spatium & aditum concedant, à lateribus vero prædicti thoracis compressi, aërem expellant. Notum & illud est, quòd motus thoracis à motu musculorum & diaphragmatis pendeat, quâ de re legi meretur Progymnasma quintum Celeberr. Bohnii in *Circulo Anatomico - Physiolog.* Hinc verò fluit, quòd, quando fibrarum muscularium, ut in senibus fit robur elanguit, externi aëris pectori & abdomini incumbens pressioni vires suas muscoli jungere nequeant; hoc verò dum fit, respirationis negotium in iis sufflaminari necesse est, quòd pulmones nec debite explicentur, nec comprimantur, ut par est. Enim verò in plerisque senibus hoc tempore respirationis difficultas ex infarctu pulmonum ac lento viscosoque phlegmate in bronchiis stagnante ortum trahebat, nam ad humidum inclinans per æstatem & autumnum aëris constitutio multis supervacuis humoribus in partibus laxioribus onerarat senio debilitatos, quos frigidior aura insensibilem per poros transpirationem, ac noxiorum humorum exclusionem turbans auxerat. Apud plerosque istos senes etiam fre-

Senum
asthma.

quentia, vicesque insensibilis per pulmones transpirationis diminutæ ex-
 plentia sputamina, ob quæ, iudice Sanctorio in *Med. static.* vitam illi
 protrahunt, desierant. Profuit egregiè Decoctum ex rad. helenii condita
 & aquis pectoralibus paratum, calideque in magna quantitate haustum.
 Tinctura asthmaticâ, quæ in Pharmac. Bateanâ describitur, cum emolumento
 utebatur non nemo, sed cochleatim mane & vesperi. Inter ingredientia rad.
 helenii, iridis, fol. fenn. el. non postrema sunt Gummi H cum ac ex eò parata
 e. g. ~ asthmat. seu viridis æris composit. D. M. ☉ Al. oleos. Hcale &c. ex
 parte miseros sublevârunt. Nec essentia Tabaci cum iudicio adhibita spernen-
 dæ est utilitatis. Usi verò fumus sequenti:

Rx. fol. peti parum siccati q. v.
 probe irrig. cum — . ☉ Hci vinos.

stent in locò calidò per aliquot dies, postea fortiter expressis affunditur spi-
 ritus pectoralis vel aromatici pro lubitu q. s. servaturque in digestionem per
 octiduum &c. Sed tamen fatendum est, omnia hæc non sufficere, nisi horis
 matutinis lenis expectetur sudor. Itaque alte memoriæ impressum esse debet
 illud clariss. Listeri: senex unicè *perspirabili promovendo incumbat, si vitam diu
 prolongare sanus velit.*

Senum
 stranguria
 &c.

In aliis senibus cum perspiratio eadem non expeditum haberet exitum,
 superflui humores ad vias urinarias declinabant; hinc in quibusdam uri-
 næ exitus ob ductus viscosos humoribus obstructos præcludebatur; in aliis
 serum urinarium acrius admistione septicorum humorum redditum, mic-
 tui non levem adferebat molestiam; in aliis calculi & arenæ gravando,
 ac vellicando sphincterem musculum excruciant. His incommodis tan-
 tò gravius exagitabantur, quò ob maiorem senilis ætatis imbecillitatem ve-
 sicæ corpus ad propulsionem contentorum minus erat aptum. Multò
 minorem hi ex remediis consequantur utilitatem, quam priores, nisi
 amplecterentur eum vivendi morem, qui transpirationi promovendæ ma-
 gis favet. Opobalsami genuini virtus præ cæteris omnibus remediis lau-
 dem meretur.

Senum do-
 lores ar-
 thritici.

Inexorabile fatum urgebat quosdam arthriticos senes, quos inter fuê-
 re, qui verba illa sancti Gregorii, qui non tantum dignitate, sed eru-
 ditione ac pietate Magni nomen adeptus est, sibi antehac ex lib. 7. *Epist.*
 129. col. 311. applicare potuerant: *Ecce, jam undecim menses sunt, quòd
 valde rarum est, si de lecto surgere aliquando potuero. Tantis enim podagræ,
 tantisque molestiarum doloribus premor, ut vita mea mihi gravissima pena sit.
 Quotidiè enim dolore deficio, & mortis remedium expectando suspiro: tum
 ista ex lib. 8. Epist. 35. col. 329. jam biennium penè expletur, quo lectu-
 lo teneor, tantisque podagræ doloribus affligor, ut vix in diebus festis usque
 ad horarum trium spatium surgere valeam, missarumque solennia celebrare.
 Mox autem cum gravi compellor dolore decumbere, ut cruciatum meum possim
 inter-*

*interrumpente gemitu tolerare. Qui dolor interdum mihi lentus est, interdum nimius, sed neque ita lentus, ut recedat, neque ita nimius, ut interficiat. Unde fit, ut qui quotidie in morte sum, quotidie repellar à morte. Hæc, inquam, verba per aliquot annos adhiberi ab iis potuissent, sed hoc auctumno immanes dolores ita crevere, ut cruciatibus confecti placide exspirarint. Dico placide: nam plerisque aliquo ante mortem tempore dolores deferunt, languore solo, eoque summò superstitè. Itaque hoc anno apud nos Hippocratis *Aphorismus* 18. ex *sect.* 3. *Æstate & autumno aliquantisper senes optimè degunt*: locum non habuit, sed potius 39. ex *sect.* 2. *Senes magnà ex parte minus, quam juvenes agrotant, quicumque autem ipsis longi morbi acciderint, sæpè ad mortem comitantur.* Ferè autem pollicem premimus Celeberr. Tozzio, persuaso, eosdem humores, qui in senibus in viis urinariis ægritudines excitant, parere arthritides si in artus deferantur, neque in eo recedimus ab ipso, quòd iisdem penè medicamentorum generibus pathemata hæc arthritica curari debere arbitretur, quibus succurrimus senibus in læsa ac depravatâ urinæ excretionè.*

Constitutum nobis erat huic nostræ Historiæ intexere specialissimas de morbis ex cerevisiâ & vino ortis observationes. Communis enim querela est, apud nos cerevisiæ vegetabilia quædam addi & in dolium suspendi, quæ non omnibus convenient, sed potius has illas ægritudines excitent. Origanum vulgare jam olim recenti cerevisiæ, ne acresceret, fuisse infusum, ex *Clariss. Schwenckfeld Catalog. stirpium & fossilium Silesiæ* intelligere licet. De rore marino sylvestri res est longè notissima. Alia accusationum capita hæc jam vice non attingam; ne illud quidem, quod nimis exigua lupuli pars cerevisiæ nostræ, si plebejos audias, incoquatur. Conringius nostram cerevisiam laudandam potius fuisse credidisset, nam eò autore lib. *de habit. corporum German.* causis, recentiore demum invento lupulus *accessit accelerandæ ebrietati, acuendo saporis & in diuturnitatem quidem cum nutritionis tamen detrimento haud exiguo. Et verò cerevisiam, quæ à lupulo amaricat, minus dulcioribus nutrire, docet usus.* H. I. p. m. 79. Multi etiam vehementer declamant in Oenopolas, ac sunt, qui in hos quadrare ajunt, quod legitur in aureo libello Adriani Turnebi *de vino*, sub finem: *alius gypso, alius calce, alius sulphure, alius marmore, alius aquâ marinâ, alius jumentorum stercore, ut honos præfandus sit, saporem vini non tam excitat, quam vitiat, alius resinâ corrumpit ad capitis vertigines efficaci, ut ex eo nomen crapula ipsa meruerit, alius aliis mangoniis, quæ recensere longum foret. Quò ipsò sine dubio gravissimè peccant, & iudice Erasmo in exornologesi Tom. 5. oper. p. 137. non solum suffurantur rem hominis, verum etiam vehementer lædunt valetudinem, nec multum absunt à veneficio. Quot enim morbos, quot mortes experimur ex vitiatissimis vinis inter homines nasci?* In his recensendis non occupabimur, nam, ut verum fateamur, illa, quæ visi nobis sumus observasse, nondum animo sufficiunt nostro, eaque uberioris experientiæ fide confirmanda esse credimus.

Quid

Quid de foedo vini etiam non corrupti abusu dicemus? Certè quasi ex tripode profecta sunt aurea illa Patini verba in quæstione medicâ *de sobrietate*: *Qui paucò vino utitur, eoque dilutissimo, ille vitam suam amat, & infinitis se ipsum beat commodis, ex ejus abusu maximorum morborum ilias profuit.* --- *Vinum dubius est amicus & anceps Proteus, bonum præsens exiguum, malum emergens gravissimum; Vitam facit alacriorem ac vegetiorem, sed brevior, idemque præstat corpori, quod calx ad arboris radicem conspersa, fructum quidem accelerat, arborem autem perimit, ita vinum suscitato calore spiritus facultatesque erigit, mortem verò maturat, dum infinitos affectus invenit, nullâ ferè Herculis clava debellandos: Apoplexiam &c.* Alius etiam seu otii, seu laboris res erit designare statum Medicinæ, qualis apud nos est, & passim tritas ad Medicæ felicitatis apicem numerosam, inquam, Praxin grassandi vias. DEUS modò à celeberrimâ hac Civitate jubeat in perpetuum abesse, qui cum Medicis Hibernis, teste Richardo Stanihursto Dublinensi *de reb. in Hiberniâ gestis lib. 1. p. m. 44. inanes esse confirmant hominum conatus in hoc exiguo vitæ curriculo Medicorum sese libris involvere, quorum lectio est adeò infinita, ut prius moriendo naturæ, quam curatione ægrotis Medicinæ studiosus satisfaciat.* Colophonem imponimus opusculo toties interrupto, duplici Anatome, quarum unam in infante absque membris sexum distinguentibus nato celebravimus ipsimet, alteram verò Georgius Tompsonus, in adolescente ex peste mortuo, & hanc tanto quidem magis, quòd periculum ex Peste nondum cessaverit apud nos, & *experimenta admiranda*, in quibus *p. 21. seqq.* continetur, in paucissimorum Doctorum armariis contineantur. Priorem huc transferemus ex *Novis Literariis German. A. 1704. p. 48. & seqq.* quamvis integro anno posteriorem.

In pago Gabiz vix paucis stadiis à Uratislaviâ distante, (qui plurimum Reverend. Dnn. Canonicis Regular. Lateran. Ord. St. August. paret] *A. 1703. d. 25. Novemb.* natus est plebejis parentibus infans, de quò adhibere posses illa Haly alicujus verba apud Schenck. *l. 4. Obs. p. 573. Vidi, qui natus est, & non habebat neque vulvam, neque priapum, neque testiculos &c.* de cujus sexu, utpote qui, ut diximus, membris genitalibus destitueretur, meritò dubitatum. Ut itaque ei nomen in baptismo conveniens imponi posset, ex voluntate Reverendissimi Domini Prælati Johannis mea hac de re sententia fuit perquisita. Suasit casus raritas, ut DDos Collegas meos, ad inspectionem invitarem, qui etiam pro suâ in me benevolentia in ædibus meis comparuere. Solicite contemplati sumus infantem, & deprehendimus, quòd, quantum ad magnitudinem, figuram, nitoremque membrorum supremæ regionis ac thoracis, nihil quicquam ei deesset, nisi quòd in hac nulum papularum vestigium inveniretur. In abdomine protuberabat umbilicus ad ovi ferè magnitudinem, ut etiam nobis de herniâ umbilicali suspicio nasceretur. In prominentiâ illâ conspicuus erat livor, qui gangrænam mini-

minitari videbatur. Supra os pubis cernebantur orificia duorum ductuum, ex quibus, ejulante aut etiam vehementius respirante infante, quando necessitas urgebat, feces excidebant, & urina effluebat. Ex dextro illo hiatu magis urinam, ex sinistro verò feces alvinas prodiisse obstetrix cum domesticis narrabat. Sinister ille ductus stilo exploratus est, eumque promptè ferè ad longitudinem indicis digiti admittebat, dexter autem brevior erat. Foramina hæc duo musculofo integumento vestiebantur, & ab uno ad alterum è transverso patebat stilo aditus. Si unquam, certè in hoc exemplo patuit, quantum respiratio momentum ad promovendas feces conferat. In infimo ventre, intra ossis pubis & ani regionem, ex quâ aliàs in viris extra abdomen scrotum propendere solet, bursa quædam ad modum scroti conformata prominebat. Anus planè aberat; sive, ut cum Horatio loquamur, *non hiabat turpis inter aridas nates podex*. Præterea torto erat pede altero, similis, si vixisset, futurus Democidi, de quo Plutarchus in Laconicis. In dubiâ hâc de sexus hujus infantis quæstione, quæ inspectione prorsus decidi non poterat, placuit, ut nomen Germanicum Gottlieb ei inderetur. Post octiduum, die dominicâ, iterum hic infans, qui nunquam ubera sollicitavit, (solo pane aquâ macerato, & linteo involuto, vitam ei sustentante) denatus est, & sequente die Martis d. 4. Decembr. cadaver anatomicæ Collegii nostri inspectioni, præsentibus Plur. Reverendo Dn. Job. Cramer, Canon. Regul., & illustri Viro Domino à Conrad, Canonorum Regul. Cancellario & Consiliario &c. aliisque patuit. Sacculus ille extra abdomen propendens, humorem urinæ similem ad 4. vel 5. circiter cochlearia, coecis ductibus in illam cavitatem effusum continebat; aliàs nulum planè signum testiculorum præstò erat. Nec minus cautè fuit secta illa protuberantia umbilicalis, in quâ portio intestini coli latebat. In hoc ipso, præter eum, quem in nominatâ modò bursâ scroto analogâ humorem offendimus, etiam excrementa ejus generis, qualia deinceps in intestinis, spectabantur. Huic prominentiæ subtensum erat peritonæum, nec ullo vase, aut ductu, aut processu pertusum. Aperto abdomine admirati sumus raram intestini coli constitutionem. Notum est, quod intestinum hoc principium habeat à cæco, ac primo quidem reni dextro *membranea connexion*e appendatur, deinde verò *anfractuoso ductu sub fimbria hepatis*, & *sub vesiculâ felleâ ventriculi fundum perreptet*, ac *inferiorem lienis marginem contingat*, eidemque annectatur, istinc verò descendat ad os ilii, à quo per sinistrum inguen pelvim petit. Nec secus hætenus res erat in hoc infante comparata: at quia vesica nulla prorsus aderat, hinc fundum ejus, quod ordinariò fit, utrinque amplecti non poterat. Tametsi verò sursum denuò per inguen dextrum ascenderet, non sinistrorsum tamen recurrebat, neque inter ileon & spinam dorsi sese immergebat, multò minus supremam ossis sacri partem attingebat, sed validè offi pubis alligabatur, ac ex eo propendebat, ac hinc versus umbilicalem illam promi-

mentiam revolvebatur, quam ubi attigisset, rupturam fuerat passum. Hinc autem per ductum sinistrum, sub integumentis excurrentem usque ad foramina superius descripta, cujus cum prominentiâ illâ umbilicali connectionem autopfia demonstravit, feces viâ satis angustâ amandabantur. Intestinum rectum prorsus aberat. Cum curâ etiam indagavimus, an vel uterus, vel aliquod ei proportionem respondens alicubi lateret, sed frustra eramus. Præterea in infima abdominis cavitate, ut diximus, vesica desiderabatur. Et hæc vesicæ absentia causa erat, cur oculos converteremus ad renes, in quibus tamen nihil præter naturam constitutum inveniebamus. Ureteres è concavâ renum parte protendebantur, & in appendices cartilagineas utrinque desinebant. Atque ita satis manifestum est, quòd ordinariò urinam excipiendi ac ad pyriforme vesicæ vas deferendi ministerio in hoc subiecto non fuerint defuncti. Hæc via, cum naturæ quasi præclusa esset, illa sibi invigilans, serum excrementitium ad intestina derivavit, in quibus humor urinæ formis fecibus mistus fuit deprehensus. Cæteræ abdominis ac thoracis partes optimè erant constitutæ. Lustratis infantis extis, matrem adire placuit: sed nihil quicquam ex ejus ad interrogata responsis extundi potuit, unde causa vitiosæ conformationis cum aliqua verisimilitudine colligeretur.

Tompsoni Anatomia Adolescentis ex peste mortui Anno Domini 1665. Urbis Londini usque adeò luctuosissimo multa millia capitum singula quaque hebdomada demetente furibunda Epidemia, Augusti circiter nonas, Dnum *Guilielmum Pick*, Cornufabrum vici *Pettecaot* Incolam, ad *Adami & Evæ* insigne, habitu Athletico dotatum, ab infectionis sagitta permiserè fauciatum invisi. Iste post fastidiosæ Pharmacorum farraginis sumptionem à Dogmatico pro deplorato depositus, artis chymicæ præpollenti virtute adspirante divino Numine, restitutus fuit. Per idem tempus famulus ejus annos 15. natus malo epidemico cum maculis nigris (indubio mortis indicio) per universam cutim diffusis aliisque horridis phœnomenis stipato laborabat, quæ adolescentis vitam citò finiebant. Hæc data eucæria, patientem jam convalescentem rogabam, ut servi defuncti interiora detegendi licentiam in scientiæ Jatricæ provectum, generis humani charitatem, scepticorumque satisfactionem mihi concederet. Cum rationibus convictus annuit, non sine benigna zelotypiâ, ne hac curiositate insolita vitæ meæ damnum incurrerem. Demum impetrato, quod ab aliis crebro negatum fuit; operi meipsum accingo, \triangle in catino tusco sub cadavere in Areola sub dio locato, accenso, nonnulla dissectioni accommodata, suppeditante patris familias conductitio, sublato loculi operimento, ac linteo cadaverali amoto; Maculas atras instar lyncis ubique in superficie dispersas solito numerosiores, ac graviores maximo cum suspectu contemplantur. Quorum aliquot apertis materia congelata sese ostendebat. In Peritonæo perforato Ichoris, lutei, virulenti, viridisque pallescentis portiuncula fluctuabat. Intestinis flatu

flatu venenoso distentis scorix olidæ copia continebatur; ast præter vulgarem sententiam in convexo à notis nigris immunia, in concavo vero stigmata obscura prægrandia à liquamine tabido inusto comparebant. A Vena Porta, nec non Arteria Coeliaca, separatis, serofus solus liquor effluebat, nequicquam rubicundus, sed intus residebat substantia opaca valde concreta. Jecoris Parenchyma scissum pallecebat, excrementum subflavum plorans. Lien divisum serum liquidum inusitatum emisit. Renes aqua citrina scatebant exfangui, prout cætera viscera. Deinceps in stomacho patefacto succus veluti atramentum scriptorium, tenax, niger, usque ad Oinopintæ modum comprehendebatur. Hujus membrana erat decolor sed non pertusa, ceu Helmontius in re tali tradit, ac si causticum potentiale applicatum fuisset. Postea à regione infima ad mediam ascendimus, ubi sterno à Mediastino divulso, Pulmonis, in partes extimas, squalidè stigmata tumefacta conspiciuntur, alicujus continuitate partium soluta, sanies putida, luridusque Ichor *ΕορΕορῶδης, ἄναιμος* emanabant, vasis magnis perfectis sanguinis aliquantulum fluxum expectavi; sed aliter res habuit, nil certe nisi liquoris tenuis depravati paucula cochlearia ab exiguo sudario expeditè absorbenda evadebant, ubi intus Thrombi secundum longitudinem extrahendi reperiiebantur; Post Pericardii aqua fulva repleti disjunctionem dextrum cordis sinum scalpello penetravi: unde digitis apprehendens materiam candidam coactam, leniter eduxi; pertractans, animoque strictè revolvens cui assimularetur, in momento, ne quidvis Parilius eidem respondere videbatur, quam testiculus agni bipartitus, servi spectatoris arbitrio assentiente. Cæterum hujus substantiæ albæ (obscurè rubentis vice) in hoc loco rarissime repertæ, rationem (sub emunctioris judicii pace) à temeraria imprudentique nutrice Adolescenti haud pridem ante obitum illius meri lactis haustum obtrudente, deducendi licet; quod è Stomacho raptum in hac extrema exigentia; per vasa lactea, vel alios ductus pro vitæ sustentatione, aliquantilla in cordis cavitatem transmittitur, ubi nullam vel pauxillam alterationem *τῆς ἀρµατῆς ποικιλῆς* in defectu, subjiciens, in hoc ens glandulosum, fermenti materialis transsumatur. Succum fuliginosum atrum, cerbero dignum, pro candido in ventriculo protopeptico, agninanque albam materiam pro cruore subnigro in cordis sinu reponi vix auditum est. Hoc hysteron proteron fermentum deleterium, quod in tubis Hæmatis mirifice contextis, Nectar solare penè totum, vel coagulaverit, vel colliquaverit, ita ut ne sanguinis cochleare, sine labe in hac carne morticina reperiri possit. Finita evisceratione, mox rigiditatem, quasi topo rem quandam in manu sinistra, cadaveris Tabe 10 vel 12 horas vita orbatu tepido, madefacta sensi; quam emundatam, supra Δ ris igniti vas aliquantisper detinui, sed incassum: nam seriùs ejicitur, quam non admittitur hospes. Quippe corpuscula illa subtilia vafra, in manum cutis poris ab ambiente tepore apertis, Archeo tergiversante, deinde morbo

succumbente, ac quidem ad animæ regiam conducente prompte erepserant. Qui Spiritus Ideâ Morbi informatus, ut primum se eodem vestivisset, venenum pestilentielle, in suam perniciem, Tragoediam acturus erat. Jamjam Pestem circumfero, aliquandiu silentem malignitatem, per omnia membra dispendentem: dum interim visito, ab aliisque visitor. Opem, quâ ipse indigeo, aliis administrans, plus de aliorum quàm propriâ vitâ sollicitus. Sic huc æquè illuc obambulo, dum hoc virus membra depascitur. Bene edi, bibi, fermocinatus sum, dormivi usque ad horam secundam diei subsequenti Saturni matutinam. Quando expergefactus, recolligensque quid postridie fecissem, parem in femoribus ac tibiis stuporem, quem antea in manu percepi, mihi invito ante oculos stigmatibus nigris assidue obversantibus: sine mora servum inclamitavi, jussique, ut Pharmaca præstantiora, juxta Epigraphen confestim porrigeret, interminatus illi, ne à nostra mistura deviares, nec angusta quantitate eadem mihi propinquaret, quibus sedulo observatis, quintuplam supra quosvis sub tutela nostra positos mensuram absorpsi: abunde nempe cognovi quod Hippocrates suggerit ἐς καὶ τὰ ἑσχάτα νοσήματα αἱ ἔρχα δὲ θεραπεῖαι ἐς ἀκριβείην πράττειν. Analogia inter morbum & remedium ab Auxiliatore fido sollicitè, ac mature attendi debet. Quem ritum si per duas horulas neglexissem in dubium vocatur, utrum à quovis in rerum natura sanabilis essem? tanta erat hujus luis magnitudo, atrocitas, actionique celeritas, nullas inducias admittentes.

Etenim somno solutus in ventriculi ore intolerabilem prægravationem, angustiam, conquassationem, in capite vertiginem, tamque repentinam defectionem sustinui; ut robur mihi vix suppetere, ad tyronem faciendis admonendum. Quin etiam ubi ante hæc à 3 vel 4 unciarum spirituosi liquoris sumptione, sudor actutum eruperit, jam plus quam de eo ad calorem in inferioribus conciliandum sufficeret. Adde quod maculæ per cutim dispersæ, plane denotabant sanguinem ad πῆξιν festinare, inter quas una colore livido pisi grandioris dimidiati planitiem æquans, in cubiti flexura eminebat, circa quam obstantibus amicis non parum intentus fui: Jam tandem post inquietudines, luctamina, multivariasque agonias, mador universus emerfit, quo statim refectus fui &c. Merentur etiam cætera lectionem, sed quæ nimia Typographi festinatio addere non permittit.

DEO sit laus & gloria!

A P P E N -

APPENDICES DUO.

I.

TRACTATUS
PHILOSOPHICO-MEDICUS
DE EXPERIENTIA,

In quo natura Experientiæ describitur, & quam
cauté comparanda ea sit, explicatur.

II.

OBSERVATIONES PRACTICÆ
DE HYDROPE PECTORIS,

In quibus de signis & causis occultioris hujus morbi, ac
curandi ratione differitur.

A

LEOPOLDIN. ACADEM. NATUR. CURIOS.
COLLEGIS VRATISLAVIENSIBUS

editi, atque

HISTORIÆ MORBORUM VRATISLAVIENSIIUM
subjuncti.

D d d

APPENDICES DUO

I

TRACTATUS

PHILOSOPHICO-MEDICUS

DE EXPERIENTIA

in quo natura experientie descriptitur, & quomodo

experientia comparatur ad hanc, explicatur.

II

OBSERVATIONES PRACTICAE

DE HYDROPE PECTORIS

In quibus de signis & causis observationes huius morbi, &

curandi ratio, delineantur.

LEOPOLDINAE ACADEMIAE NATURAE CURIOSAE

COLLEGII VRATISLAVIENSIS

editi, typis

HISTORIAE MORBORUM VRATISLAVIENSIS

typis

MDCCCLXXX



TRACTATUS DE EXPERIENTIA.

PRÆFATIO AD LECTOREM.



Experientiam uno ore extollunt omnes. PLATONI magnum quid & ubique optimum, GALENO omnium judicatrix, PROCOPIO rerum omnium magistra est experientia. Experientia Artes ortum, incrementa & perfectionem debent. Præcipuè Medicina absque experientia cadaver est, & maxime professos nobilissimam istam Artem nobilitat. In experientia fide thesauro colligendo hinc totus literatus Orbis desudat. Et spes est, si cultissima nationes, Germanica, Italica, Gallica, Anglica &c. ita pergant in communicandis experimentis, fore, ut posteritatem, si quæ speranda est, bonis invidendis cumulent. Quæ tamen rerum humanarum est infelicitas, videmus & dolemus, quod non omnibus in hoc occupatis labore res ex voto succedant. Cujus rei causas scrutati comperimus ab eruditis etiam hanc assignari, quod

*præcepta condendi experientiam non sufficienter à quoquam sint enarrata, & nexu scientifico inter se conjuncta. Et illa quidem vix uni homini, etiamsi is à nullâ eruditionis parte imparatus ad hanc spartam exornandam veniat, facile incident. Dum verò cogitamus subinde de defectu hoc supplendo, nulla via nobis occurrit alia, quàm ut ab eruditis in hoc stadio cum laude & gloriâ nominis sui summa currentibus cautela in unoquoque genere rerum naturalium experimenta facturo necessaria liberaliter communicentur, ut integer de experientiâ tractatus suo tempore construi possit. Interea lineas aliquas duximus, quæ suo tempore emendari ac refingi possunt. Quod vero deinde de construendis universalibus propositionibus ex iis, quæ experientia sunt cognita, adjecimus, eò afferuntur, ut Viri eruditi ansam hinc sumant cogitandi de systemate quodam construendo, in quo propositiones tantùm invenirentur tales, quæ ex experimentis ritè institutis accuratè essent deductæ. Hâc vice vero tantùm propterea hunc tractatum *Historia Morborum* succenturiavimus, ut benevolis Lectoribus innotesceret, quibus subnixi fundamentis has illasve cautelas & judicia intermiscuerimus, dum historiam morborum texeremus. Quodsi, benevole Lector, conatus nostri Tibi non displicuerint, de aliis materiis Clinicam illustrantibus cogitare non intermittemus. Vale !*



CAPUT PRIMUM.

De Experientiâ in genere, & eâ, qua alienâ nititur fide.

§. I.

CUM propositum nostrum ferat, paulo accuratius inquirere in naturam Experientiæ, methodi leges observare non fortassis abs re fuerit. Hoc ut fiat, necessarium ante omnia est, breviter annotare, quòd experientia duobus modis accipiatur. *Primò* enim experientia nihil aliud est, quàm *notitia sive cognitio singularium unius ejusdem speciei*; sive ut Alexander Aphrodisiensis extulit in 1. *Metaphys.* *unius singularis sæpè repetiti*; ita, cum novimus, quòd sal centaur. min., absinthii, card. bened. &c. feбри tertiana liberarit Petrum, Paulum, Johannem &c. dicimus, nos id experientiâ habere cognitum, quòd salinis hisce febris tertiana expugnetur. Conf. l. 1. *Metaph.* Aristot. c. 1. Deinde *secundò* experientia, præter illam cognitionem singularium significat etiam collectionem, ita ut cognita singularia habeant in isto discursu rationem antecedentis, ex quibus deinde elicitur consequens, v. g. cum essentia violarum — us & l. remixtus stiterit hæmorrhagiam narium in Platone, Aristotele, Georgio, &c. ergò etiam sistet effluxum sanguinis in Andrea; quæ collectio itidem experientia appellatur.

§. 2. Quòd experientia notet cognitionem quandam & notitiam singularium in uno convenientium, nemo dubitat: Inde Acorambonus Nobilis Philosophus Italus in *annotat. ad Aristot.* p. 755. ait, *esse recollectionem & rememorationem plurimorum particularium in uno convenientium, quorum habemus memoriam.* Et hoc modo accepta differt experientia ab actu sentiendi, qui consistit in hoc, quòd *sensus recipiat speciem quandam sensilem, quæ ei à re objectâ imprimitur, per quam imaginem percipitur & cognoscitur res objectâ*: Nam actus sentiendi nec est recollectio quædam, nec convenientiam plurium in unâ quâdam re agnoscit pro objecto; ut taceamus, quòd experientia esse possit, more cæterorum habituum, in dormientibus: in quibus actus sentiendi nullus animadvertitur. Non negatur tamen, quòd actus sentiendi sit causa ipsius experientiæ, vel occasio; quâ de re postea. 2. Differt ab habitu, quem Philosophi vocant *intelligentiam, nec non à scientia & opinione*; intelligentia enim *principiorum, seu primarum propositionum* l. *Top.* c. 1. scientia verò & opinio sunt notitiæ *conclusionum*, & scire quidem tum dicimur conclusiones, cum rerum in conclusione significatarum causas novimus, & causarum cum rebus illis tam arctum nexum, ut certissimi simus, has causas esse ipsarum rerum causas, l. *Post.* c. 2. opinionem verò de conclusione concepimus,

cepimus, cum notitiâ, cum formidine oppositi conjuncta, animus noster de iis imbutus est; lib. 1. Post. c. 33. Quia verò experientia differt à scientia & intelligentia, utique differet etiam à sapientiâ, quæ est habitus compositus ex intelligentiâ & scientiâ, 7. Eth. ad Nicomach. c. 7. Porro differt etiam ab arte, nam & ars quodammodo est universalium, experientia singularium, 1. Metaph. c. 1. ut non dicamus, quod per experientiam etiam ars generetur, docente Aristot. l. c. Idem dicendum de prudentiâ, de cujus differentiâ ab experientiâ præclare differuit Conring. lib. de Civil. Prudent.

§. 3. Verum his missis, digrediamur ad paulò penitiùs scrutandam experientiæ naturam. Innuimus ejus fundamentum esse positum in singularium cognitione; quod cum ita sit, in propatulo est, singularia certò nobis debere esse cognita: Innotescunt verò nobis tum aliorum relatione, tum propriis sensibus. Sæpius verò contingit, ut fabulosa Auctorum decipiamur relatione. Id quod innumera comprobant documenta. Pauca in rei fidem annotemus, exorfi ab elementis. Plinius in Hist. Nat. refert, nullum esse suavius odorem, quam terræ alicujus simplicis; & Franciscus Verulamius, de vitâ & morte, testis est, glebam terræ, horis matutinis, tempore æstivali, optimè olere. Non dubitamus, quin uterque sibi, tanquam propriis sensibus rem experto, credi velit: At verò falsa narrant, nisi forte fuerint decepti, & existimarint esse terram simplicem, quæ vel exhalatione quâdam vel rore fuit imbuta; conf. Aristot. in problem. sect. 12. problem. 3. Circa aquam, etsi fortè alicui id videri posset incredibile, quod Anselmus Boeth. de Bood lib. 2. de Gemm. c. 300. memorat, in avernis propè Hergobiam, non procul etiam Vienna Allobrogum, nec non mœnia oppidi Veronii in Galliâ, fontes esse limpidissimos, qui statim in lapides concrecant, quod & ex Thomâ Moresino de simili in Moraviâ Scotiæ provincia fatagit reddere credibile; hoc, inquam, ut non notemus, solus Plinius plurima suppeditat exempla l. 31. histor. Nat. c. 2. Ita in Indiæ terris narrat esse fontem, cujus aquæ lucernæ instar ardeant; Cranone esse fontem calidum citra summum fervorem, qui in vinum additus, triduo calorem potionis custodit in vasis; in Africæ lacu, Apuscidamo, omnia fluitare; fontem linguæ transire solere in loca vicina, cum portendit aliquid, & incolæ à piscibus responsa petere cibo, quem rapiant annuentes, caudis abigant, si eventum negent, & alia hujus generis plura. Mirum verò est, quod in eodem capite addat: Quod si quis fide carere ex his aliqua arbitratur, discat in nulla parte naturæ majora esse miracula. Putavimus Plinium scribere Historias naturales, cum audiamus eum miracula pangere. Conf. Solin. p. 339. nec non Bootium p. 534. Verum adeò frigidæ sunt narrationes, ut ab aqua ad ignem lubentes properemus. Mirabilem verò etiam illum per multa secula sine alimento viventem memorat Hermolaus Barbarus in agro Patavino juxta oppidulum Atestæ, sua ætate inventum. Petrus quoque Appianus in inscript. antiq. p. 337. urnæ utriusque, cui inclusa fuerat flamma, figuram exhibuit. Id verò doctissimo alicui viro, si ipsum audias, fabulosum videtur:

videtur : Duo enim naturaliter tantum excogitari possunt modi, quibus sine novi pabuli accessione ignis maneat inextinctus, 1. ut *omne contrarium amoveatur*, 2. ut *flamma in halitum abeat*, qui denuò in oleum concreseat, quod deinde in lucernam redeat; verum posterius arte fieri nequit, etiamsi enim vel maximè oleum ex halitu educas, oleum tamen illud accensum abibit in fuliginem; nec primum fieri potest, quia ignis purus non existit, & id, quod cum igne conjunctum est, partes ignis una abripit, aut si exitus fuerit obstructus, quasi percussus partes ignis dirimit, eundemque extinguit. P. Magnus in aère quorundam mineralium & plantarum ut & animalium femina, aut spiritus halituum specie inclusos delitescere profitetur, jactatque experientiam, sed, ut multorum opinio, frustra est.

§. 4. In meteoris eodem modo res se habet. Plinius l. 2. H. N. c. 37. agens de Castore, Polluce, Helenâ, *Vidi*, inquit, *nocturnis militum vigiliis, inherere pilis pro vallo fulgorem effigie eâ: & antennis navigantium, aliisque navium partibus ceu vocali quodam sono insistant, ut volucres sedem ex sede mutant: graves cum solitarie venere, mergentesque navigia: & si in carinâ ima deciderint, exurentes; geminae autem salutes & prosperi cursus prænunciæ, quarum adventu fugari diram illam & minacem appellatamque Helenam ferunt.* Cardanus, quod de Helenæ sidere scripsit Plinius, l. 2. de subtilit. vehementer auget, dicens, *illud apparere circa malum navis, & cadens etiam aenea vasa colliquare*; sed si quis Plinii verba attentè, ut par est, legit, facile videt, quod forex suo pereat indicio. Verum id nos jam non agimus. Vix à nobis impetramus, ut credamus, quod Rob. Fluth Anglus de seipso narrat, quod ignem fatuum noctu secutus & affecutus, materiam invenerit viscosam & lubricam compactam in modum spermatis ranarum distinguentibus nigris & exiguis maculis subalbidam. Primò enim, quâ ratione assequi potuerit, non capimus; consentiunt enim omnes Physici, quod, quò magis persequaris ignem hunc, magis fugiat, eò quod aër à corrente motus, moveat ignem, eundemque propellat. Secundò, qui materiam deflagrationi aptissimam jam accensam extinxerit, non videmus. Ignis quoque lambens præbuit occasionem multis fabulis. De Doctore Creone Anglo optimè de re literaria meriti Actorum Collectores referunt, quod, cum corpus indusio albo & calido fricet, relucere faciat corpus & indusium scintillis compluribus; item de Nobili quodam narratur, quod deambulando pedes similiter relucens reddere noverit; cujus generis Historiæ in Borelli *observationibus* obviæ sunt, quas omnes in dubium vocare quidem non audemus, nihilominus vera falsis esse mixta iusta suspicio est. In antiquitate passim reperire est, qui lucem quandam finxerint tacentibus reliquis; conf. Heliodor. l. 2. *Æthiop.* & Symmach. lib. 2. epist. 13. Poëtæ quoque demulcentes Magnates, illis passim tribuunt lucem; exemplo sit Martialis lib. 10. epist. 6. de adventu Cæsaris Trajani p. 292. *Felices, quibus urna dedit spectare coruscum Solibus arctois sideribusque Ducem: Quando erit ille dies, quo campus & arbor & omnis lucebit Latia culta*

culta fenestra nuru. Et sanè malè fecissent Poëtæ, nisi tribuissent lucem corpori illorum, qui obscuros poetarum focos ardenter lucere fecerunt. Non operæ est pretium, ut in his nos detineamus; annon multæ satis fabulæ repariantur in Thomæ Bartholini Viri Doctissimi tribus *de luce animalium* libris, penes alios iudicium esto.

§. 5. Multis fabulis etiam contaminata est doctrina de pluviis. Sanguineas pluvias memorat Livius *Dec. 3. lib. 4. Decad. 5. lib. 2.* aliisque locis pluribus, & quidem in tanta sæpè copiâ, ut *lacus sanguine manarint Dec. 3. lib. 7.* è foco Valerii Civis Romani *sanguis per triduum & duas noctes manarit Dec. 5. lib. 5. flumina cruenta visa sint Dec. 3. lib. 4. & lib. 6. in agro Sudertino sanguinis rivus per totum diem fluxerint.* Polydorus Vergilius *lib. 2. oceanum sanguineum fuisse testis est.* Conf. etiam Paul. Orosius *lib. 4. cap. 5. fascic. tempor. f. 28.* Cornelius Gemma *lib. 2. Cosmogr. c. 2. f. 105.* Qui his aliisque credit, experientia dicet esse cognitum, sanguine pluere: præprimis cum alii audaces adeò sint, doceantque hanc sanguineam pluviam ex terrâ sanguine cæforum cruenta per radios solares posse extrahi. Enim verò posterius illud falsum est, quia per calorem solis ex lacte & sanguine non nisi vapor vel halitus ascendit *lib. 2. Meteorol. c. 3.* hic vero nec sanguis nec lac est, imò neque in sanguinem vec lac abit, sed in aquam mutatur. Et si tanta solis efficacia est, ut radiis suis sanguinem ex terra attrahat, cur vires suas non exercet in attrahendis succis aliis, etiam vinosis, ubi ex uvis ad solem uvæ fiunt passæ, & si exerit, cur non vino sæpissimè pluit? Nisi fallimur, boni illi passi sunt se decipi fallacia consequentis, ita argumentantes: Sanguis est rubicundus, pluvia hæc est rubicunda, ergò sanguis est. Ii quoque fallentur, qui ejusmodi dictis temere fidem adhibebunt. Nec dubium est in errorem abreptos, qui prodiderunt, pluuisse lapidibus, ut Plutarch. in *vitâ Lysandri.* Laërt. *l. 2. de vit. Philosoph.* & Plinius *l. 2. H. N. c. 5.* narrant, in *Thraciâ anno secundo Olympiadis 78.* lapsum esse ex nubibus lapidem vastum magnitudine vehiculi, colore adusto; & Livius *vel viginti locis* de pluvîâ lapidum testis est. Tantundem dicendum de eo, quod alii aiunt, cœlitus delapsam esse lanam, ut Orosius *lib. 7. c. 19.* & Abbas Ursbergensis *part. 2. f. 172.* ne jam testes advocemus alios. Nec hîc fingendi licentia stetit. Dionys. Halicarnasseus, Auctor alias gravis *lib. 10. Antiq. Rom.* & Livius *Dec. 1. lib. 3.* vult carne pluuisse, quam devorarint aves; imò sunt, qui vitulos cum pluvîâ decidisse ex Avicennâ & Alberto M. nobis persuadere satagunt, ex ratione, quam planè ridiculam adducit Titelmannus, quod *hujusmodi terrestribus vaporibus sursum levatis, virtute adsint quatuor elementa, ad cujuslibet misti generationem requisita, & corpora celestia agentia, cum primæ causæ concursu ad hæc sufficientia.* Imò verò hæc non sufficiunt; omne siquidem animal in putaminibus seu involucrio quodam generatur, ne generatio, quæ per calorem fit, vel frigore, vel calore externo impediatur, sed continuò peragatur. Fit enim generatio vel in utero, vel in ovo, vel in aliquo, quod secundum figuram simile est ovo, quod dicitur *σπῶληξ*, qualia

qualia sunt insectorum femina multorum, &c. & semper illud, ex quo fit animalis corpus, pellicula ad minimum est obductum; jam verò in nubibus nullus est locus talis. In Scythiâ rubras esse nives, Auctores tradunt, ut Alex. ab Alexandr. *Tom. I. genial. dier. lib. 4. p. 962.* itidem fabulose.

§. 6. In regno minerali etiam Auctores subleſtâ ſæpè fide agunt & lectorum credulitati imponunt. Specimina multa de ſolò aurò dari poſſent. Nonnullis, quantum auri ortum concernit, fabulam ſapit, quod legimus apud Alex. ab Alex. *Gen. dier. l. 4. c. 9. p. 961.* edit. Lugd. in citeriori Germaniâ, intra Danubium loca eſſe, in quibus, niſi contra frigora & gelu ac feram ſævamque hyemem vites maximâ parte anni ſub nivibus humo contectæ jaceant --- eas demum liquatis nivibus, æſtate anni ingruente, & calore cæli mirificè germinare & frondes geniculatas emittere, ſed vini parùm effundere, interque eas nonnullas, incertum, quâ cæli temperie, ſeu occulta & cæca origine vites exiſtere peculiari miraculo & admirationis præcipuæ, quæ claviculis & plerumque candicantia folia ex puro auro germinent & ſimul coaleſcant, --- idque apud incolas pro oſtento minimè haberi, ſed quia in locis pluribus id accidere ſoleat, quaſi inter quotidiana & frequentia reputari. Hæc Alexander ex amici ſummi, ut addit, narratione, quam ipſe dubitaſſet (ita videtur eſſe rara dictu & ſuper omnem impudentiam, prorſusque ridiculæ vanitatis) commentationibus ſuis adjicere, niſi hoc pro comperto & explorato multorum teſtimonio comprobaſſet, qui ſe non audiſſe, vel legiſſe, ſed oculis viſiſſe, & manibus attrectaſſe aſſerebant. Male, inquam, in numerum fabularum referatur, quod graviffimi Auctores, Balbinus, Sachſius noſter, Tenzelius de aureis argenteiſque virgis, culmis, ſpicis, filis &c. narrant. In Auguſtiſſimi noſtri Imperatoris gazophylacio virga aurea Tokajo miſſa viti circumſcripta aſſervatur. In Muſeo Speneriano pag. 123. & ſeq. mentio fit fruſtuli ligni vitis cum auro adnato ex vinetis Hungariæ. Hinc etiam Tackio data occasio ſcribendi librum, de conſanguinitate vini, auri & ſacchari. Sed cum vitibus illis auriferis malè contenditur futura cranii humani ſepulti, in quo aurum concreviſſe ferunt, benè verò eſt, quòd addant, ſepulti, nam alias maſſam furfurum inveniffent loco aureorum granorum. De dente aureo pudet vel mentionem facere. Fruſtra etiam ſimus, ſi multis narremus fictitias auri virtutes à Plinio contra maleficia, à Lemnio contra tabem ex venereo foedoque contactu, contra elephantiaſin &c. deprædicatas. Piget fermè addere ejus furfuris historias plures: ita non abeſt à fabulâ, quod refert Porta, plumbum per frequentem lotionem in ſtannum mutari. Ulterius quicquid Græcia mendax audet in historiâ, ut habet Juvenalis l. 4. ſat. 1. id ſibi permiſere ſcriptores in tractatione de lapidibus. Non expilabimus jam ſcrinia Anſelmi Boëtii de gemmar. & lapid. historiâ, quam commentariis auxit Adrianus Toll. Non poſſumus, quin adſcribamus notatu dignam de lapidibus nonnullis à tribus Franciſcanis ex India orientali allatis, ibidemque ut ajebant, in capite certorum ſerpentum à Garziâ ab Horto deſcriptorum, & à Luſitanis Cobras de

Cabelo dictorum, inventis, quos referebant securissimi antidoti loco infervire, si imponantur morfui viperarum, aspidum, ceraſtum & quorumcunque aliorum animalium, nec non ſi imponantur quibuſcunque vulneribus à ſagittis, vel alio aliquo armorum veneno infectorum genere recens inflictis, ut patet ex Franciſc. Redi *Experiment. natur. p. 4. 5.* ſed quàm parum fidei hæc aſſerta mereantur, ſolenter oſtendit prælaudatus Redi.

§. 7. Non aliter res habet in doctrina de vegetabilibus: Ecquis ſibi perſuaderi patietur, quòd ceraſi ſpecies impreſſa in embryonem per imaginationem maternam virideſcat, flaveſcat & rubeſcat cum ceraſis in arboribus? Allata tamen narrat Sylveſter Rattray Med. D. qui primus comparet in *theatro Sympath.* curâ Joh. Andr. Endteri Norib. 1662. edito. Abuteremur Lectoris patientia, ſi vel unum adderemus exemplum, obvia enim ſunt in Plinio, Dioſcoride, ipſo Galeno, Avicennâ, Petr. Andr. Matthiolo, Hieronymo Trago, Jacob. Theod. Tabernæmontano, Bauhino, ut Nicolaum Monardem, qui de Americanis, & Garziam ab Horto, & Chriſtophor. à Coſtâ, qui de orientalis Indiæ plantis ſcripſerunt, non memoremus, certè hi libri fidem dictis abundè conciliabunt. Imò nec ab hac labe omni ex parte immunis eſt Clariffimus Vir Simon Pauli, in *quadripartito de ſimplicium medicamentorum facultatibus*. Unum addimus exemplum ex claſſe tertia: Notiſſima eſt Angelica, de hac ita candidus ille Vir ſcribit: *Alias promiſcue omni ſexui, quâcunque formâ uſurpata, aſthmate & veteri tuſſi laboranti, oppido prodeſt.* Spem noſtram in praxi feſellit egregium hoc aſſertum. Certè ſæpiſſimè nobiſcum cogitavimus, prudentiſſimè Cæſalpinum in *incomparabili de plantis ſedecim librorum opere* egiſſe, quòd facultates vegetabilium, utpote quas deprehendebat experientiæ contrarias, aut prorſus emiſerit, aut aliorum Auctorum de iis ſententias recitarit: In dedicatione operis ſub finem: *Facultates*, ait, *addere ſuperfluum duxi, cum enim hæ apud multos Auctores præcipue Dioſcoridem & Galenum admodum copioſè legantur, ſatis ſuperque viſum eſt, ſi plantas, quarum vires illi prædicarunt, oſtenderemus. Obiter tamen quarundam meminimus, vel quia ad fidem faciendam aliquid præſtent, vel quia apud antiquos non reperiantur: quibus ulcus hoc extremis tantum digitis tangit.*

§. 8. Non majori fide agunt multi ſcriptores hiſtoriæ animalium. Inter Conditores Hiſtoriæ animalium optimo ſuo merito primas ducit Ariſtoteles, cui aliquot millia hominum in totius Aſiæ Græciæque tractu ab Alexandro inflammato cupidine animalium naturas noſcendi parere juſſa; omnes inquam, qui venatus, aucupia piſcatuſque alebant, omnes quibus vivaria, armenta, alvearia, piſcinæ, aviaria in cura erant, ne quid uſquam gentium ignoraretur ab eo, quos percontando 50 fermè volumina illa præclara de animalibus condidit teſte Plinio *lib. 8. c. 16.* In hoc verò tam præclaro opere quædam, quæ fabulam ſapiunt, non deſunt. *Grues ex Scythicis campis ad paludes Ægypto ſuperiores, unde Nilus profluit, veniunt, quo in loco pugnare cum pigmæis dicuntur.*

dicuntur. Non enim id fabula est, & γὰρ ἐστὶ τὸ το μύθος, ἀλλ' ἐστὶ κατὰ τὰν ἀλήθειαν genus tūm hominum, tūm etiam equorum pusillum, deguntque in cavernis, unde nomen Troglodyta à subeundis cavernis accepere. At verò compertum est nullas vel grues vel pigmæos in totâ Africa inveniri. Attamen fabulæ plerumque solent aliquid veri continere, sicuti & hic factum est. Certum quippe est, ultra Nili fontes multos reperiri nanos, qui tamen non cum gruibus, sed cum elephantis perpetuum gerant bellum. Præcipuè quippe eboris commercium in Regno Magni Maroci per istos transigitur homunciones. Habitant in sylvis, & mira dexteritate elephantis sagittis conficiunt. Carnibus vescuntur, dentes verò Lagis divendunt, illi autem Congensibus & Lusitanis. Proprio vocabulo appellant mimos, aut etiam Barekebacke, teste Isaaco Vossio de Nili & alior. flumin. origin. c. 19. p. 66. De foetu ursæ idem Philosophus lib. 6. Histor. c. 30. p. m. 358. foetum minimum pro sui corporis magnitudine edit, quippe qui minorem catta, majorem mure parere soleat; nudum item & cæcum & cruribus propemodum membrisque aliis plurimis indiscretum & rudem. Quod Aristoteles de foetu rudi & indiscreto retulit, præter eum habent & alii. Horus in hieroglyph. l. 2. c. 79. Virgil. ap. Gell. l. 17. c. 10. Ovid. metamorph. l. 15. fab. 33. Plinius l. 8. c. 36. & l. 16. c. 53. Pollux. lib. 5. onom. c. 12. Ælian. hist. l. 2. c. 19. Solinus c. 29. Oppian. l. 3. cyneg. Galenus ad Pisonem aliique referunt. Eo enim redeunt eorum dicta, quod ursæ pariant massam informem, quæ lambendo paulatim formetur & figuretur; & tamen non nisi fabula est, cujus occasionem Camerarius, Dalechampius, Vossius aliique referunt. Errores ejus in historia leonis, aquilæ, crocodili acrius, quam par erat, perstringit Vir Clariss. Olaus Borrichius in Hermetis Ægyptiorum & Chemicorum sapientia à Conringii animadversionibus vindicata a pag. 245. usque ad pag. 277. Multò plura figmenta Plinius, Ælianus, Solinus aliique habent, nec ab hac classe excipi possunt in satis multis Ulysses Aldrovandus, ejusque epitomator, Jonstonus, P. Casp. Schottus in Physic. curios., Johann. Gœdartius de insectis, in methodum operâ Clariss. Listeri è Regiâ Londinensi societate redactus, qui etiam in præfatione ad lectorem non dissimulat, profectum Gœdartii quoad peritiam circa insectorum indolem plus satis esse tenuem, ejusque errores subinde detegit. Nihil facilius, quàm grande quoddam conscribere volumen, si ex Paulo Veneto, Jovio, Olao Magno, Hieronymo Cardano, Joh. Bapt. Porta, Lemnio de occultis Natur. Miraculis, Bodino, Cornel. Agrippâ, Paracelso, Paulo Scalichio, Thomâ Campanellâ, Rob. Flutdio & qui cæteroquin de magnetismis, sympathiis & antipathiis scripserunt, quorum aliquos recitat Celeberr. Morhof in Polyhist. l. 1. c. XI. p. 100. omnia congerere placeret. Non ineruditè Thomas Browner in Pseudodoxiâ epidemicâ errores tales enumerat, & ex eo notatu digniores de re literaria immortaliter meriti Actorum Collectores Lipsienses in supplement. I. sect. VI. p. 279. libro, inquit, III. exploduntur veterum errores circa animalia bruta, e. g. equum & columbam felle carere, dari amphibænam, Gryphum aut

Phoenicem, viperas, dum eduntur partu, perrumpere matris intestina, Struthio-camelum ferro vesci. Instar omnium est exemplum Castoris, qui se, Juvenali dicente, *Eunuchum ipse facit, cupiens evadere damnum testiculorum, adeo medicatum intelligit inguen*, ex lib. II. etiam notabilia sunt exempla de pulvere pyrio albo, qui absque sonitu displodatur, & plagam lethalem inferre queat; non tamen facimus cum Browne in eo, quod scribit de Corallio, nam satis hodie constat, ex observatione Boconi, quod sub aquis molle, & in liberum aërem protractum obdurescat. Quod si ex chymicis, therapeuticis &c. addere exempla vellemus, nunquam perveniremus ad finem.

§. 9. Ne igitur aliorum narrationibus fidentes loco thesauri experientiae colligamus carbones, perquam necessarium est ac utile, cum primis scire, quibus tuto credere possis. Nec enim temere erit asserendum, quod Vopiscus in Aureliano, Junio Tiberiano se dixisse memorat; *neminem historicorum quantum ad historiam pertinet, non aliquid esse mentitum*. Is vero fidere poteris, qui potuerunt ac voluerunt vera narrare. Pulchrè Aristotel. l. 2. *Rhetor. c. 19. text. 24. juxta distinctionem Schraderi: si potuit ac voluit, fecit: omnes enim, qui & possunt & volunt, agunt, nihil enim obstat*. Is vero posse censendus est, 1°. qui a sufficienti & ad unamquamque rem dijudicandam necessaria eruditione instructus est: fac enim unam eandemque rem naturalem e. g. corallia arbitrari oculis & rudem quendam hominem & Virum eruditum, aliter certè ille, aliter hic coralliorum historiam describet. Qui legerit pleraque itineraria à rerum naturalium imperitis ut plurimum edita, facile deprehendet, nos vera scripsisse. Olearium tamen huic classi non annumeramus. De sensuum munere infra agitur. Modò Benevolum Lectorem cupimus rogatum, ut legat Robert. Knox. l. I. c. 4. & seqq. 2°. Qui instructus est reliquis adminiculis omnibus: Quis enim credat Anatomico necessariis instrumentis destituto? Et hinc credimus Anatomicos Veteres lapsos esse, tametsi nos non fugiat, quod Galenus variorum instrumentorum mentionem faciat, e. g. stilorum lib. 9. *Adm. Anat.* laminarum variarum l. 6. hamulorum l. I. *Adm. Anat.* nec non lib. 8. tubulorum & folium lib. 9. Præ reliquis Malpighius microscopiis adjutus multa antiquitati incognita cum erudito Orbe communicavit, quanquam non ignoremus, Celeb. Francisc. Redi ex chronico & aliis documentis MS. fategisse probare, quod sub finem seculi XIII. & initium XIV. fuerint inventa. Crediderimus tamen jam innotuisse Seculo XI. ita persuasi verbis Alhazan Arabis ex lib. 7. *Opt. c. 7. prop. 43. & 47*. Sed hæc obiter. Nobis duo illa nondum sufficiunt, nisi fuerit in illo ipso loco, in quo res est describenda. Ponamus enim exercitatissimum in doctrinâ de animalibus virum descripsisse nobis beluas marinas, qui nunquam ex his viderit unam, nec oceano se per totam vitam commiserit, aut qui Indiam nunquam viderit, an ejusmodi hominem plantarum phænomena enarrare potuisse dicemus? Et si tentaret quisquam, meritò eodem modo omnes riderent hominem, quo Lucianus, lib. *quomodo scribenda sit historia*, p. m. 622. edit. *Amstelod. tom. I.* ridet

ridet hominem describentem insulsè bellum in Syriâ & Armeniâ gestum, nec tamen Syriam & Armeniam viderat. *Atque hæc*, ait Lucianus p. seq. *Corinthiis audientibus recitabat, qui probè sciebant, ipsum ne in pariete quidem vidisse depictum bellum, ac neque arma movisse, neque quales sunt machinæ, neque qualia aut acierum, aut ordinum nomina.* Præclarè Excellentiss. Dn. D. Hartmann rectissimi Vir Judicii in *disq. de Phocâ cap. IV. §. I.* agnoscit, non esse, unde hunc defectum sarciant studiosi, *licet domi nonnulla animantia educant, cum suspicio sit, transisse consuetudinem in alteram naturam.* Prudentissimè hinc *Illustris Societas Regia in Angliâ*, non à quibusvis, sed eruditis, neque qualiumcunque, sed quorum major est ipsis intuendi opportunitas eorum, quæ patria offert, fidelem expetit historiam, ut iterum Hartmann l. c. Is itaque posse 3°. censendus est, qui præter dicta in eodem loco cum re describendâ, aut est, aut fuit. Porro, qui cum M. Antonino, cujus aureis *de eis, quæ ad se pertinere putabat*, frequenter utimur, cogitat, *quantâ cum celeritate abripiantur & subtrahantur, quæ sunt fiuntque universa, & quòd rerum natura instar fluvii cujusdam sit, qui in jugi sit fluxu, effectiones verò mutationibus continuis & causæ ipsæ conversionibus innumeris subjaceant*, ut idem Anton. habet l. 5. §. 23. p. 42. edit. Gattak. nullo negotio videt, ad omnia enarranda singularia & temporis opportunitatem esse necessariam. Quodsi enim præstantissimus Botanicus sævienti brumâ in Galliam appellat, nec expectet verum tempus, quid in describendis plantis Gallicis sit præstiturus, cuius est judicare. 4. Ergò, ut possit debite enumerare singularem historiam, temporis opportunitatem requirimus.

§ 10. Eum autem, qui potest, etiam velle colliges, si Vir fuerit bonus & honestus; cum enim *Veritas divina res sit*, ut ex Platone & Plutarcho *de adulator. & amicor. discrim. p. 49.* constat; conf. etiam Plato in *Cratylo p. 289.* Vir bonus non potest non ejus amore capi, sciens, quòd *impietatis sit reus, falsa quisquis loquitur*, ut iterum Imperator lib. 9. §. 1. p. 82. Quia verò larvâ honestatis indutus nemo non in proscenium prodit, hisce regulis hætenus usi sumus ad explorandas hominum hæc in re voluntates. Primò, si vel ex scripto vel aliunde nobis constiterit, Auctorem famæ & gloriæ immodicum aucupem fuisse, & recenseat historias, quæ alibi non occurrunt, de ejus voluntate vera referendi dubitavimus, suspicio enim nobis est, quòd ex desiderio inclarescendi admirabilia finxerit. Pertinet huc ille Senecæ ex lib. 7. *Nat. quest. c. 15. locus: Quidam incredibilium relatu commendationem parant, gnari, Lectores admirabilibus hisce delectari, unde licentiam sumunt; non vanè Lucret. l. 4. Cetera de genere hoc monstra ac portenta loquuntur, ne loca deserta ab Divis quoque fortè putentur sola tenere; ideo jactant miracula dictis, aut aliquâ ratione aliâ ducuntur, ut omne humanum genus est avidum nimis auricularum.* Arguit verò latentem illam cupiditatem horum hominum fastus interdum intolerabilis, quibus secreti symboli loco est istud Horat. Satyr. l. I. Serm. Satyr. 9. inquentis: *Noris, nos docti sumus, nos legiones diffiamus*

diffamatus spiritu, quasi ventus folia. Intolerabilis certe fuit thraſonismus Paracelsi, qui teste Hormbeck de Weigelian. p. 6. dicere non erubuit, *stultissimum capillitii sui pilum plus scire quam omnes Galeni sectatores.* Imò *barbam suam plus habere experimentorum, quam omnes Academias.* Conf. *Introd. Conring. p. 66.* Ejusdem furfuris fuit etiam Joh. Baptist. Helmontius ille, qui sese, insolenti titulo, Philosophum per ignem vocat, cujus jactantiam incomparabilis Vir Herm. Conring. describit in *Introd. in art. Med. c. 2. §. XXIII.* & veterum ac recentiorum doctrinâ subactus Philosophus & Medicus, Schelhammerus in *annotat. De Bilsii fastu* loquitur Celeberr. Franc. de le Boë Sylvius in *Prefat. Disp. Med. Decadi præmissa §. 22. & 23.* Ex hoc aliqua excerpimus: *Intolerabilis, ait Sylvius, meritò videtur bonis viris & gravibus Bilsii fastus, quoniam cum injurioso & contumelioso egregiorum, & ipsi, quoad industriam & dexteritatem planè ignotorum Anatomicorum contemptu passim conjunctus. --- Quibus pondus addidit quorundam aut ipsi impensius addictorum, aut ceterorum Anatomicorum uni, vel pluribus insensorum Medicorum, laudatio immodica, ut metus sit, ne brevi crepet. Et cui non intolerabilis, (adeò in omnes Anatomicos debacchatur,) ut, cum ad renes pervenisset, illos à multis Professoribus in Academiis ne inveniri quidem posse diceret?*

§. II. Nec plenam apud nos meriti sunt unquam fidem, ut iterum Sylvius in §. 22. *innovatores aliqui, qui semper refingunt, retractant etiam à se non intellecta, & in nullâ re, nisi in novis hypothesebus fingendis sibi placent, credimus enim etiam eos vanissimos famæ aucupes.* Nam gnari satis sunt, esse verissimum illud Homeri *Odyss. I. Cantio hæc hominum longè est celeberrima vulgo, ac gratissima, quæ nuperrima venit in aures.* Novitatis studium in Cartesio culpat Huetius in *Cens. c. 8. §. 7.* *Laudem, inquit, præcipuè captat ex doctrinæ suæ novitate, etsi fere nihil novi attulit. Hinc Philosophorum aliorum scriptiones sibi parum versatas esse simulat; quamvis in dissert. de methodo oblitus sui fateatur, diligenter tritum fuisse ab adolescentiâ, & versatum veterum in libris, aliisque, in quibus reconditum aliquid inesset & à vulgi notitiâ semotum.* Ne nomen Schockium Philosophiæ Professore, cujus libellus extat *de admirandâ novæ Philosophiæ methodo*, in quo opusculo Cartesii opiniones strictè & ipsum Auctorem multo defricat sale. Nolumus tamen hæc ita à quoquam accipi, quasi nos omnia nova aspernaremur, utpote qui optamus, ne sint, qui ineptis suis scriptis, quibus pecunia Lectores emungunt, cum irreparabilique temporis jactura propugnent, si, ut cum Prudentio loquamur, *observatio crevit, ex atavis, quondam malè cæpta, deinde secutis tradita temporibus serisque nepotibus aucta; & seriò exosculamur nova, non nomine, sed re talia, artificii manu absque contemptu aliorum in usum humanum detecta.* Nobis dictum semper putavimus illud Nazianzeni *Orat. 26. Ne spernas usitata, nova ne secteris, ut nominis splendorem apud vulgus Tibi concilies.* Cæteroquin novitatis amor insanus apud multos, nova semper experimenta jactantes facit, ut boni viri subinde repetant illud Isaac.

Vossii in *append. de nat. lucis* c. 3. p. 102. *Eo vivimus seculo, quo etiam stultorum sensus latius pateant, quam patuere olim sensus omnium Græciæ sapientum. Virtus illa, quâ videmus, adeo adaucta est, ut non nimium dixerò, si dixerò, nos plus quam centies millies acutius videre, quam viderint illi, qui ante nos fuere.*

3. Decoxere etiam fidem, qui calamum modo adversus hunc, modò illum stringunt. Suspicionem enim meritò præbent, quòd sint inter eos, qui destinatis sententiis quasi addicti, & consecrati, atque adeo necessitate quâdam constricti veluti, *ut etiam, quæ non probare soleant, cogantur constantiæ causa defendere*, ut loquitur Cicero, vel inter eos, qui irascuntur immortalī odio contra omnes, quos viderint, vel audierint, non dicamus adversari sibi, sed non plenis viribus & totis suis assentiri sententiis. Talium virorum exempla præbent ii, qui circulationem sanguinis Aristoteli & Hippocrati obscurè cognitam, deinde longâ multorum seculorum ignorantia sepultam, iterum post Cæsalpinum ab Harveo clarissimè assertam, oppugnarunt. Et hinc cum Celeberrimo Wedelio meritò statuimus; *secundum philosophandi gradum esse, non occupari in commentando vel refutando*; in præfat. præmissa *Amoenit. Mat. Med.*

4. Illi æris coruscatores semper nobis visi sunt sublestæ fidei testes, quando jactant encheireses, novos processus, arcana toties totiesque felicissimo successu comprobata: Ea enim auri fames facit, ut splendidè mentiantur, quod mirum non est, quia *nullum in humanâ vitâ scelus reperitur, quod non ob pecuniarum amorem perpetretur*, ut Isidorus Pelusiota habet *lib. 2 ep. 146*. Similes hi veteribus Sophistis, quorum jactantiam & nummorum amorem exagitant Plato, Aristoteles, Xenophon alique. Inde etiam Aristoteles Sophistam ajebat esse eum, qui *ex apparente sapientia quæstum facit*, *lib. Sophist. Elenchor.* Sæpè ipsa res diligentissime considerata, quam aliqui narrant, ac ordo & series narrationis argumenta præbeant falsitatis.

Optandum verò esset, ut viri aliqui in commodum studiosæ juventutis, tam in physicis, quam anatomicis, chymicis & medicis candidè procul studio partium, proximè præterlapsi seculi Auctores nobis indicarent, in quibus voluntas cum facultate narrandi vera experimenta fuit conjuncta. Et de multis quidem sincere mentem suam aperuit Vir nostrâ laude major D. Schellhammerus in eruditissimis suis annotatis ad Conringii Introductionem. Verum neque illi omnes obvenere Auctores; certè ex omnibus Europæ nationibus nobis visi & lecti, quos ei ad manus non fuisse opinamur. Utinam id laboris Viri Clarissimi sibi fumerent. Non dubitamus, quin post examen, locum inter hos sint inventuri inter Germanos Guernerus Rolfincius, Dan. Ludovici, Michaël, Bohnius, Wedelius, Rivinus, Hoffmannus uterque, Ettmüllerus, Major, Sachsus, Pechlinus, etiam Illustris ac Magnificus Noster Academ. Leopold. Nat. Curios. Præses, L. Schroëckius. Certè laudibus Auctorum plurium non multum tribuimus, quamvis bene multæ in eum effundantur,

dantur, *etsi solemne sit, ex testium approbantiumque numero sententias aestimare*, ut annotavit etiam Auctor Libri *artis cogitandi* p. m. 287. Sed potius hic confidenter dicimus cum P. Petito in *dissertat. de princip. nov. philosoph. Renat. Cartes. p. 2.* Quid igitur? Quia Cartesius famam, quia multos sibi deditos habet, continuo hunc extra omnem ingenii aleam credemus? Eius opiniones pro certis dogmatibus atque oraculis amplectemur? Libros velut sacra monumenta non nisi cum summa religione adibimus? tanquam delapsa cælo ancilia aut paladium quoddam venerabimur ac custodiemus?

CAPUT II.

De Experientia ex propriis observationibus.

§. I.

Satis de experientia, quam haurimus ex cognitione singularium ab aliis relatorum. Nunc de ea, quæ paratur ex singularibus à nobis officio & munere sensuum nostrorum cognitis, agamus. Singularia ea, quæ sensibus percipi possunt, alia ita comparata sunt, ut uno tantum sensu percipi queant, e. g. color tantum visu, sonus tantum auditu cognoscitur, odor tantum odoratu percipitur, & vocantur propria objecta sensuum: alia pluribus sensibus patent, ut motus, quies, numerus, magnitudo, figura, & hæc vocantur objecta communia, ut docet Aristot. lib. 2. de an. c. 6. De iis enim, quæ per accidens sensibilia sunt, ut substantiæ materiales, in quibus sensibilia per se existunt, modò non loquimur. Jam sæpè fit, ut existimemus, nobis aliqua esse sensu cognita, quæ tamen cognita non sunt. Non desunt, qui hic fallaciam sensuum accusant, prout olim Pyrrho cum discipulis teste Diogen. Laërtio l. 9. de vit. Philosoph. de eo enim & sequacibus ejus Aulus Gellius l. XI. Noct. Attic. c. V. nec videre planè quicquam neque audire se putant. Quod & de Academicis testatur Cicero l. I. quest. Academic. num. 8. Prout etiam nostro hoc seculo eadem doctrina propalari cœpit à Cartesio, aliisque. Etsi verò non cum Epicuræo dixerimus, omnes sensus veri nuncios esse apud Ciceron l. I. de Nat. Deor. quibus gemina habet etiam de eo Plutarch. l. 4. de placit. Philosophor. c. 8. & Laërt. l. 10. in vitâ Epicuri; persuasi tamen sumus, vera esse, quæ habet Aristoteles l. 4. Metaph. c. 4. in fine: *Sensus propriorum semper verus est*, quod & repetitur l. 3. de anim. c. 3. alibique passim, modò adsint omnia requisita; sc. 1. organum recte affectum. 2. Objectum idoneum. 3. Medium naturaliter se habens. 4. Intervallum debitum. Si unum ex his defuerit, necessum est, judicium sensuum esse fallax, quorum explicationem uberiores legere licet apud Zeidlerum in *Analysi posteriori* p. 24. & seqq.

Quicumque

Quicumque ergò rectâ via tendunt ad experientiam, considerent, an cum hoc vel illud singulare sensibus usurparunt, quæ enumeravimus, requisita omnia adfuerint. Quodsi vel unum horum defuerit, nunquam recte cognitum fuerit singulare, & experientia, quæ tali innitur cognitioni, nulla est. Id verò per sæpè contingit, ut exemplis aliquibus patebit. Organum certe Anaxagoræ minùs rectè fuerit constitutum, cum dixit, *nivem nigram* esse, teste Cicerone *l. 4. Question. Academic. num. 23.* Frustra etiam fuit Epicurus, qui atomos dixit esse *sphaericas, cylindricas, conicas & conoidicas, item cubicas, prismaticas, parallelepipedas & polyedras, item hamatas, striatas, uncinatas &c.* Nam teste Diog. Laert. *l. X. in vit. Epicur. p. 33. inf. & init. seqq.* dixit ἀπειλήντα ἐς τὰς διαφορὰς τῶν σχημάτων, h. e. incomprehensibilia, differentiis seu varietate figurarum. Lucret. *l. 2.* Nunc age: jam deinceps cunctarum exordia rerum qualia sint, & quàm longè distantia formis percipe multigenis, quam sint variata figuris. Cujus mentem uberius explicat Gassendus *p. 203.* ut & Joh. Bapt. du Hamel. *lib. I. de consens. vet. & nov. Philos. c. 8. p. 179. & seqq.* Frustra fuit etiam Democritus atomorum variarum defensor, de cujus consensu & dissensu cum Epicureis indicium præbet locus apud Aristotel. *l. de gener. c. 1. & 8.* & Alexander apud Philoponum, colligiturque etiam quadantenus ex Diog. Laërtio *l. 9. in vit. Democr. p. 248. edit. Lond. in fol.* si conferatur cum Sexto Empirico *adversus Mathemat. p. 163. & lib. I. hypotypos. c. 30.* & Plutarch. *contra Colotem*, imò etiam Anaxagoras, qui multas fecit atomorum distinctas species, qua de ejus opinione legi potest Claudius Berigardius *in Circulo Pisano p. 419.* Nam unde hoc iis constat? Visu enim figuras illas discerni non posse largitur Gassendus *l. c.* addimus, nec tactu. Quomodo ergò? ratione & mente; hinc Democritus apud Plutarchum, ἰδίαν ἔχειν σχήματα λόγῳ θεωρεῖται. At nobis non sine causa, hoc absurdum esse, evincemus alibi. Unaquæque enim facultas cognoscens suis circumscribitur limitibus & de quo judicare debet sensus, e. g. visus & tactus, ut de figurâ (est enim objectum commune) de eo non est audiendum judicium rationis, præprimis si sensus munere suo circa ejusmodi res fungi non possit. Quod diximus de sententiis horum, multi etiam, ut opinamur, dicturi sunt de placitis Cartesii, cujus scita non multum distare à decretis horum dubitaverit nemo, qui paulo peritior est veterum hujusque novæ Philosophiæ, aut qui legerit eruditissimam Petiti disputationem *de Principiis Cartesii.* Nolumus tamen quenquam hæc eò trahere, quasi negemus atomos, non enim sine jucunditatis sensu eæ oculis cerni possunt, si in vase vitreo purissimus aër inclusus, nec à vento aut alio quodam impulsus ad solem ita sit expositus, ut radii non tantum collustrent, sed per foramen clausæ fenestræ medium pertranseat, observare videntur, & ultro citroque concurrere multa corpuscula; nec est, ut suspiceris pulverem, is enim jam pridem petiisset fundum, si quis adfuisset. Et propter nimiam distantiam solis lapsus est Epicurus in determinandâ ejus magnitudine, de quo Diog. Laërtius *l. X.* refert, ei familiare fuisse dicere:

Solis ceterorumque siderum magnitudo, quantum ipsi judicamus, ea est, quæ videtur. Et licet multum, frustra tamen, iudice etiam Ægidio Menagio p. 271. in *eruditissimo comment. in Diogen. Laërt.* fudat Gassendus, ut Epicurum suum inscitæ culpa in Astronomicis absolvat. Nam etiam Cicero l. 4. *quæst. Acad.* testatur, quod putarit, *etiam solem posse esse minorem, quam videatur, sed non multo.* Non dubium est, quin Epicureos respexerit Seneca lib. 1. *Quæst. natur. c. 3. tom. 1. p. 640. Edit. Amstel. noviss.* cum ait, *sapientes viros contendisse solem pedalem esse.*

§. 2. Verum ad Medica digrediemur exempla, præprimis verò Anatomica. Deprehendemus verò maximos quoque Viros humani hinc aliquid passos esse, putantes, se hoc vel illud sensu habere cognitum, quod tamen nunquam sensibus eorum fuit subiectum, quamvis non facile sit, designare causam, unde lapsi fuerint. En exempla quantum ad sensum visus. Immortale nomen scriptis suis obtinuit Willisius & multis deprædicantur ejus opera laude quavis dignissima in *Ephem. Gallic. Erudit. an. 1676. Mens. Julio*; commendat etiam de cerebri anatome librum Celeberrimus Carol. Fracassat. *dissert. epistol. de Cerebr. ad Marcell. Malpighium*; at verò qui expenderit ea, quæ affert Nicol. Steno de *Anatom. Cerebri* & ipse interfuerit sectioni, animadvertet, non finxisse sed invenisse causam optimum illum Stenonem de veritate totius ingeniosi istius Systematis Willisiani meritò dubitandi & errores non paucos in figuris indicandi. Ex quo apparet, in singularibus observationibus Willisium fuisse deceptum. Multò magis verò id dicendum videtur de structura ea, quam commentus est Cartesius, quamque explicare satagit *parte 5. tract. de Homine p. 100. & seqq.* Nam cum totus Cartesii homo alius sit ab aliis hominibus, alius eum cerebri etiam esse conveniebat Bene verò est, quòd Ludovic. de la Forge in *notis p. 103.* fateatur, *quòd visus maximam eorum, quæ profert, partem non detegat, & prorsus inficete addit: Veruntamen dummodò se quis parumper præbuerit attentum, volueritque oculis figuras meas utcunque contemplari, spero eam (structuram cerebri) cuilibet intellectum iri.* Res mira est figuras partium corporis humani, quas visus maximam partem non detegit, tam audaciter appingere, audacius verò facinus est, polliceri notitiam structuræ partium ex figuris non visarum partium. Prudentissime judicat doctissimus Veslingius in *præfatione prima Syntagmat. Anatom. ad Lectorem de figuris: Etenim licet optimorum Artificum ingenium ac manus spirarent, frustra tamen est, quisquis ex illis naturalem partium positum, magnitudinem, ordinem, duritiem, mollitiem, atque, ut cum Celso loquar, levorem, contactum, processus deinde singularum & recessus, tum si quid alteri inseritur, aut portionem alterius recipit, accuratius cognoscere volet.* Quid sentiret de figuris rerum visu non detectarum, credidissetne, si quis tales figuras oculis utcunque contemplatus esset, structuram sensibus non patentem ab eo intellectum iri? Præprimis verò præconcepta de glandula pineali opinio fefellit oculos Cartesii, ut alio sitam modo videret glandulam hanc *tract. de passion. anim.*

anim. part. I. art. 31. quam alii peritissimi Profectores, quos inter est Steno jam laudatus. Sed his immorari necesse non est, cum Clariss. Nuckius ingeniosa inscriptione non tam situm quidem, quam usum ejus proscripserit & exequias ei cecinerit *in epistol. Anatomica Adenographia ejus adjuncta.* Quamquam non malè Clariss. Diemerbroeck existimavit *l. 3. Anatom.* demonstrationem etiam nerveorum funiculorum, quos Sylvius ei tribuit, fore difficilem, certè nec nos, nec præceptorum, nec amicorum quisquam observavit eos unquam.

§. 3. Ludovicus Bilsius, de cujus arrogantia & tumido fastu supra querentem audiebamus Sylvium, propalavit, sæpè suis sensibus cognitum, quòd vasa lymphatica *duas habeant tunicas, & inter eas inveniantur innumerabilia exigua & subtilia roris sive lymphæ vascula ad instar fibrillarum, (quarum, constitutio valde similis sit musco arborum) continentia liquorem aliquem nutritium pro omnibus corporis partibus, qui nullis valvulis in suo cursu impediatur, moveaturque à centro corporis ad illius circumferentiam, & revertens liquor per canalem interiorem horum vasorum roriferorum, in quo ferè ubique valvule reperiuntur* (antea verò negaverat istud Bilsius, donec eum convinceret Fridr. Ruysch Anatomicus dexterrimus, cujus libellus, hâc de re, editus prostat) *nullo modo ros vel lymphæ vocari debeat, sed potius fermentum.* At vero incertum, quâ de causâ hæc protruserit in orbem, neque enim, si vir bonus fuit, veteratoriè finxit, lapsus ergò est Bilsius, neque oculatissimi Anatomici Bilsonianos tubulos, quantumvis enixe id cuperent, deprehendere potuerunt. Conf. Nuckium *in Adenograph. p. 43.*

Immortalis memoriæ Anatomicus Andr. Vesalius *l. 6. præclarissimi operis de human. corpor. fabric. p. 732. c. 10.* splendidæ edit. per Oporinum: Porro, inquit, cordis dilatationem, quæ mucronis ipsius ad basis centrum est attractio, & omnium laterum cordis distentio, restæ efficiunt fibræ mucronem, versus basin contrahentes: quod sanè ita perficitur, ac si vimineo circulo orbiculatim eademque serie complurimas juncorum scirporumque radices connexeres & mucronibus illorum simul collectis, velut pyramidem quandam efformares, ac demum funiculum ex illius verticis medio per circuli centrum dimitteres, quo deorsum tracto pyramis brevior intusque multo capacior, juncis nimirum in exteriora ac in latera ab invicem diremptis ac secedentibus, redderetur. Sed verò ne jam de dilatatione cordis agamus, fallitur in declarandâ ejus texturâ, quam toties oculis suis usurpavit Vir sine exemplo, nisi Haroejum excipias, in sectione corporum occupatus: multo enim mirabiliori modo fibræ illæ sunt dispositæ; immediate enim sub externâ cordis membranâ à basi cordis & ab orificiis circularibus tendinosi, in quibus desinunt venæ cavæ & pulmonaris auricula, nec non à principiis arteriarum aortæ & pulmonaris propagatur stratum fibrarum carnosarum, quæ ferè æquidistantes sunt inter se & directè à basi versus cordis mucronem tendentes, ubi variè inflexæ & contextæ reflectuntur versus internas cavitates ventriculorum, ut

egregiè declarat Joh. Alphons. Borell. *part. 2. oper. de motu animal. c. 5. propos. 37. p. m. 65.* cum quo omninò conferri potest Lowerus in *tract. de cord. c. I. p. 16. 17. seq.* Plura hanc in rem exempla adduci possent, sed unum in præsens sufficiat. Ut aliorum labores in sectione hepatis non memoremus, diligentia & dexteritate antevertit omnes Glissonius, qui de seipso, in præfatione ad Lectorem, *profecto, inquit, id vere testari possum, me haud leves quasque verisimilitudinum umbras hic temere sectatum esse, verum omnia, quantum licuit, ad rei ipsius trutinam fideliter exegisse.* Is autem recenset hepar inter parenchymata, ita, ut *parenchyma hepatis videatur ei pars principalis, quoniam reliquæ omnes illius partes eidem inserviunt: Ligamenta nempe situm ejus stabiliunt, tunica circumvestit, porta illi sanguinem apportat, huic capsula communis ministrat; arteria & nervus hepatici operas dant partim portæ, partim capsulæ communi, partimque poro biliario; ramuli venæ cavæ & pori biliarii soli inde auferunt, ut manifestum sit, alias omnes hepatis partes parenchymati ejus aliquatenus ancillari.* Verùm Marcellus Malpighius in seculi gloriam natus, & ex crebris sectionibus magnâ prudentiâ institutis, & ope microscopiorum adjutus, deprehendit hepar *conglomeratum esse glandulam, cum in diversa frustula & acinos dividatur, unico excretorio polleat vase, & determinatum separet succum, in cavitatem intestinorum eructandum.* Malpigh. *de hepat. c. 3. in fine p. m. 257. in op. edit. Amstelod. tom. 2.* Idem de pulmone, renibus &c. dici posset, in quibus lynceus ille Anatomicus alios cœcutiisse fecit manifestum. Nihilominus nec ipse licet oculatissimus omnia vidisse censendus est. Clariss. Nuckius in *Adenograph. c. I. p. 3.* Clarissimus, inquit, *Malpighius structuram glandularum conglobatarum curiosè quidem proposuit, sed, ut pace tanti Viri hoc dicam, longè aliter earum fabrica nobis fuit oblata; sive enim vasorum lymphaticorum introitum exitumve examinemus, sive glandulæ interiora perscrutemur, passim quadam occurrunt, quæ Anatomicorum filii nondum viderunt &c.* Ita ex defectu alicujus requisiti visus nos fascinat; quæ omnia experturis quicquam suis oculis documento sint, ut attendant ad omnia requisita sensus, nec vanè credant omnia bene vidisse, ne quod de tantis viris multi modò, de illis posteri & fortè deterius longè (jure optimo) sentiant & loquantur.

§. 4. Talis deceptio in reliquis sensibus etiam locum habet ob aliquem requisiti alicujus defectum. In sensu Gustûs illustre exemplum præbet succus pancreaticus non sine labore inventus; orta enim de sapore ejus quæstio est. Regnerus de Graaf, Sylvii discipulus *de succo pancr. c. 4. p. 551. in Oper. edit. Lugd. Bat. naturaliter acido-temperatum esse contendit, unde, inquit, contingit, quod succus pancreaticus naturaliter acido-temperatus existat.* Quod & ante discipulum docuerat Præceptor ejus in *disq. Med. X. p. m. 50. in Oper. Amst. Edit. num. 39. acidus vel potius subacidus censendus erit ex sui natura idem succus pancreaticus, sed temperatus: fallimur aut præconcepta opinio de succi hujus cum bile effervescentia talem impressit ei gustum, præpri-*
mis

mis cùm ipse agnoscat Graaf *sub init. cap. citat. p. 540. ipsum offendisse acidum gratissimum, aliquando penè insipidum, nonnunquam austerum, sæpius salsum, sæpiissimè verò acido-salsum*; aut lapsus est, existimans, eum esse saporem naturalem in subiecto morbofo, qui naturalis non fuit, aut organum gustus acidâ qualitate fuit inbutum, cum gustaret hunc naturaliter se habentem. Postremum certè accidisse cuidam Bontekœe discipulo adstanti Anatomix cuidam recenter mortui, recordamur, cum bonâ enim fortunâ & secandi dexteritate liquorem deprehensum circumstantibus gustandum porrigeret professor, qui jejuno ore gustaverat & nullum acidum deprehenderat saporem, eundem delibandum præbet Bontekœano, præprimis cum nulla adesset suspicio succum præternaturaliter in eo subiecto se habere. Is continuo *acidus, inquit, est*, & vides Bontekœe rectè sensisse. Medicus gnarus eum hausisse vinum aliquantò largius, jubet eum eluere limpidâ os; quo facto denuò gustandum præbet succum, præbet & aliis, ubi coactus est fateri homo, Medicum rectè negasse acorem succi. Ex quo aliisque huic similibus exemplis colligere licet, eum, qui sensu gustus dijudicaturus est saporem quendam, teneri dare operam, ne organon gustus adventitiô sapore sit infectum.

§. 5. Interdum id, quod objectum visus est, tam exiguæ est quantitatis, quod jam ex antecedentibus constat, ut oculos subterfugiat. Ponamus jam vera esse, quæ de erudito quodam Viro referuntur in Bataviâ, qui *in guttulâ aquæ, cui piper triduo fuit infusum, sponte in tubulum vitreum ascendendi 30. animalcula fertur conspexisse*; ponamus, inquam, rem ita se habere, quomodo visus in unoquoque animali illam organorum infinitam varietatem deprehendet? Quid de ductibus nervorum dicturi sumus? Num cavi? oculi nostri prorsus cœcutiunt, & *compages illorum stilo cuius impervia est*, fatente Willisio in *Anatom. Cerebr. c. 19. p. m. 64. in Op. Edit. Amstelod.* Sed vitreis oculis nihil non se videre, multi nobis persuadent (ita jam ad considerandum medium descendimus, prætermisso aëre illuminato, tanquam satis noto) Enimverò, nec hoc accommodatum est medium ad omnia videnda; nam, ut Willisius *l. c. etiam perspicilli sive microscopii applicatio cavitatem nullam his adesse confirmat.* Et hætenus nemo, opinamur, inventus est, qui vias, quibus vena portæ liquoris sui alias partes in poros ac vesiculam bilis, alias in cavam dimittit, commonstrarit, ut non sine ratione Peyerus *Exerc. 2. de gland. intestin. p. 28. dicat, hoc magis optandum, quam sperandum.* Nullus etiam prodit in lucem, qui, quâ mechanica meatus ex arteriis emulgentibus in ductus uretericos serum transcolent, etiam exquisitissimo edocuerit microscopio. Excell. D. Bohnius, Lipsiæ decus, expresse sese, scribit, *ignorare, quâ mechanicâ Lien suo munere defungatur?* An speramus etiam id consecuturos ope microscopiorum, ut posteritati constet, quibus canalibus in cerebri ventriculos, aut in pericardii cavitatem sese effundat lymphæ? Non verò hæc pertinent ad damnandum usum microscopiorum, quibus Malpighius, Hoockius & Löwenhœck, tot egregia, scituque dignissima protraxere in lucem; ut illu-

Itres Italos, Gallos, Anglos, Batavos, nostros quoque Germanos, nullis ex his ingenio, eruditione & experiētiā minores, taceamus, multum nos affecerunt ea, quæ Celeberrimus Mathematicus & Physicus Sturmīus in *Collegio Curioso part. I. tentam. 15. p. 138. & seqq.* affert, quæ non tantum de effectu causisque, sed & modo prudenter adhibendo microscopia Lectores commonefacient. Cumque notum sit, microscopia constare, vel unâ lente, eaque acutissima & minimæ sphaeræ; alia duabus lentibus, alterâ scilicet, quæ ad objectum spectat, acutissimâ, & aliâ, cui oculus admovetur, molliore & majoris sphaeræ; alia tandem tribus lentibus, ut alias jam differentias non persequamur, posterioribus objectum averso situ cernitur, quod an semper observarint, qui vitreos hos sibi applicarunt oculos, experimenta loquantur. De cætero in Anatomicis utile cumprimis est, nosse canalium principium & finem, hinc enim de origine liquoris & usu ejus conjectare licet. Enim verò etiam hîc lapsus facilis est. Bartholom. Eustachius, Anatomicus superiori seculo famigeratissimus in tract. de venâ sine pari antegramm. 13. de eo nos non finit fluctuare, nam finem ductus thoracici constituit receptaculum, quod ejus principium est. Verba Viri hæc sunt: *Ab hoc insigni trunco sinistro juguli, qua posterior sedes radicis venæ internæ jugularis spectat, magna quædam propago germinat, quæ, præterquam quod in ejus origine ostiolum semicirculare habet; est exim alba & aquei humoris plena, nec longè ab ortu in duas partes scinditur; paulò post rursus coeunt in unam; quæ nullos ramos diffundens juxta sinistrum, vertebrarum latus penetrato septo transverso deorsum ad medium usque lumborum fertur, quo loco latior affecta, magnamque arteriam complexa obscurissimum finem, mihiq; adhuc non benè perceptum, obtinet.*

§. 6. Utinam verò omnes, qui de facultatibus medicamentorum scripta ad nos transemiserunt, iniissent eam viam, & sensibus, gustu, inquam, & odoratu circa singula rectè usi fuissent, non laborarem eâ, quæ præ manibus est, confusione, ex discrepantia Auctorum orta. Nam quemadmodum visus in Anatomicis dominatur, ita gustus & odor in explorandis medicamentorum facultatibus primatum tenent. Enimverò non uno modo contingit, ut hic erremus, ex parte organi quidem gustus non nisi depravatus erit sensus ac judicium erroneum, 1. si lingua prorsus exsucca & fibræ ejus contractæ sint, unde videmus eos, qui defectu salivæ laborant, nullo propemodum gustu pollere, cujus exemplum nobis præbuit Medicinæ Professor quidam, qui per longum tempus sapes distinguere ignorabat, & Bibliopola, qui decrepitus senex ad mortem usque de impotentiâ gustandi conquestus est. 2. Si lingua nimis sit humida, nam humor ille linguæ cavitates occupans, alteri, qui saporem devehit, non cedit. 3. Si saliva admixta sint corpuscula, quæ à bile procedunt, ingratus sapor alios cibos depravat non aliter, quam si ipsis vel fuliginem, vel tantillum fellis aspergeres. 4. Post somnum etiam de sapore non ita rectè judicamus, aut etiam post alium quendam cibum. Ad immutationem saporis conferunt etiam alia, quæ scire oportet, ne decipiamur. Nam & 5.

calor

calor laxans fibras saporem mutat, hinc quæ cocta, e. g. poma, pyra, diversum saporem præ se ferunt, ac cruda, & quæ calida gustui placent, eadem frigida prorsus ei ingrata sunt, ut vel in jussulis quotidianis illud observare licet. 6. *Frigus quoque contrahendo fibras linguæ*, facit eas *rigescere*, ut non facile affici possint. Quantum additiones & variæ adulterationes faciant ad mutationem gustus, ex culinaria elucescit. Hinc judicaturi ex gustu etiam de exoticis, quorum luxum meritò perstringunt cordati Germani, ne temerè quid dicant, sed potius semper habeant suspecta ob factam additionem, quod ea, quibus quotidie utimur, abundè edocent. Ita scammonium genuinum rarum est, quod non succo lithymalino adulteratum sit. Par judicium de sanguine Draconis, utpote qui infectus est sanguine hircino; *Meconium loco opii nobis protruditur*, ut optimè notavit Ettmüll. in *Colleg. pharmac. in Ludov. p. 1049. & seqq.* Non tantum verò *mangoniis* diversimodè sed & non raro situ corrupta etiam peregrina sunt, ut iterum ob singularem candorem & experientiam nunquam satis laudatus Ludovici expertus nos commonefecit. Porro ex parte *objecti de toto* judicaturi, e. g. vegetabili aliquo necessum est, ut totum gustu exploremus, sæpè enim contingit, ut diversarum partium unius compositi diversus sapor sit; nam cucumeres partem radici proximam habere amariorem, notum est, & notatum jam ab Aristotel. *Seçt. I. problem. quæst. 25.* quod in glandibus secus accidit. Id etiam passim est ab Auctoribus traditum, quòd plantarum *semina, radices & folia, diversum sensum imprimant*, ita, e. g. plantarum acrium semina sunt acriora, quam radices vel folia &c. hæc & alia plura gustu facturis experimenta observet necesse est in singularibus gustu perceptibilibus. Præterea ad clima solemque semina producentia, culturam & ejus defectum, anni tempestatem, salubritatem aeris, tempus modumque colligendi & conservandi respiciendum, nam juxta hæc omnia plantæ differunt.

§. 7. Quòd verò odores etiam cognitionem intimiorum facultatum medicamentorum largiantur, tradit Celeberrimus Wedelius in *Amœnitat. Mat. Med. l. I. sect. I. c. 5.* Memorabile est, quod refert Digbæus *de corpor. nat. tract. I. c. 27.* de quodam per plures annos in sylvis commoranti & odoratu discernenti, ubinam radices fructusque salubriores crescant. Et Celeb. Meibom. *dissert. de febb. malign. §. 6.* testatur, se aliquoties in *agris malignâ febre laborantibus talem percepisse odorem, unde mortem tertio aut quarto die prædixit.* Quanquam talis collectio instituenda non sit, hoc inodorum est, ergò nullam habet facultatem, nam pyrethrum, lepidium sunt inodora, ac tamen ob acrimoniam insigniter calida. Jam ad ea, quæ ubivis obvia sunt, de organo odoratus, vix est quod addamus, præter hæc, quæ habet Hamel *de corpor. affection. l. I. c. 9. p. 203. & seqq.* Quodsi homines tam lautè non viverent, neque iis olfactus organum ciborum fumis inquinatum esset, puriores fortè halitus, quibus odores constant, facilius exciperent, atque odore ipso, ut bruta cibos (quidni & medicamenta) discernere, quod probat exemplo canum

canum venaticorum, qui sagaciores sunt, quo parcior eis victus præbetur, & exemplo alicujus metu militum in sylvis diu radicibus & glandibus viventis, qui, teste Digbæo, narravit se odoratu cibos tùm explorasse, homines autem venatores vel odore solo percepisse, eorumque insidias elusisse, donec laqueis irretitus caperetur. Aliquas observationes tamen adjiciendas esse arbitramur. Wedelius l. c. opportunè monet, aliqua *per se odoratui esse patentia*, modo admoveantur naribus, alia verò *accendenda, terenda, solvenda esse, ut odorem expandant*, exemplo $\frac{1}{4}$ is & $\frac{1}{2}$ ii. Nisi ergo posterius hoc executus fueris, non rectè de hujus vel illius rei odore senties. Deinde certum est, etiam ipsum tempus considerandum esse, ut integrum feras judicium. Nam *tempore pluvio vel humido corpora odorifera minus odoris exhalant*, nam humor poros eorum obstruit, ne halitus per eos erumpant, forte etiam filamina halitus istius subigit ac dissolvit. *Frigido quoque tempore odores sunt obtusiores*, quia *frigus poros per condensationem stringit & halitus difficilius avolant*; sicuti contra calor resolvens poros facit excitari halitus, ut patet in flore autumnali, quem Jasminum vocant; quotiescunque ergò vel cœlo frigido, vel aëre humido hoc aut illud naribus admovisti, meritò dubitare teneris, annon experimentum tùm sit fallax. Dispiciendum etiam est, annon *odore jam corpus odoriferum sit privatum*, quod variis modis fieri potest, ut patet exemplo violarum, quæ si vel pluvia diuturniori sunt madidæ, vel soli diu sint expositæ, odore suavi privantur; solis enim ardor halitus odoriferos educit, ut ferè nihil remaneat, pluvia verò macerat particulas illas, quæ in halitum odoriferum abiissent. Adhuc hoc addendum, pleraque cum propius admoventur, foetere, quæ, cum remotiora sunt, suavissime olent, tenues enim spiritus olfactum juvant, crassiores offendunt. Cùm ex vitellis ovorum oleum in sartagine extrahitur, vel ex sanguine crassum itidem oleum destillatur, odor pessimus exhalat, quòd exhaustis spiritibus nihil supersit præter sulphur sale volatili & fixo aculeatum.

§. 7. Calidi & frigidi, humidi, sicci, asperi, levis, duri, mollis &c. arbiter est *tactus*. Cùm verò, quod uni calidum videtur, alteri frigidum videatur, cœpit adhiberi thermometrum ita dictum, quod gradus caloris, uti & frigoris dimetiatur. Et Sanctorii ille tubus inflexus, cujus pars summa occlusa est, & in globi formam tornata, inferior verò aperta, per quam aqua usque ad aliquam altitudinem infunditur, jam abiit in desuetudinem, & potissimum thermometra sigillata nunc adhibentur, quæ deinde tabulæ in partes æquales divisæ applicantur. In his spiritus vini condensatur, & eò magis descendit, quòd acrius est aëris ambientis frigus, æstate verò rarefcit spiritus vini; optimum thermometri modum existimat Honorat. Fabri, quem p. 632. tom. I. tract. 2. describit &c. Enimverò præclare ibidem Fabri l. c. *indices graduum caloris nolim putes tam accuratam caloris esse mensuram*. Cùm plerique ex recentiorum scholâ, causas caloris & frigoris in corporibus frigidis & sicci non aliter esse statuunt, quàm causa doloris in gladio aut fuste existit, ipsam

ipsam verò caloris formam perinde ut doloris sensum ajant in certa nervorum & spirituum commotione sitam esse, & propterea fortè dicere par erit, potius sensu tactus exploranda esse calida & frigida. In Medicinâ nostrâ maximam affert utilitatem, nosse, quæ calorem, quæ rigorem in corpore nostro excitent, quænam humectent, & quænam exsiccent. Quantum ad vegetabilia fortassis omnium optimum foret, ut jejuni, ventriculo rectè constituto, in notabili quantitate uterentur Viri suæ constitutionis gnari, nam tùm in percolatione ea, quæ fit in corpore animantis, si calida & sicca forent, ignis particulæ separatæ à parte majori terræ, quæ in fæces abit, non possent non sensum caloris, modo majoris modò minoris excitare: Si vero frigida & humida essent calidi partes, subtilis puriorque humor (nam frigiditatis principium humor est, & cum Experientissimo Viro Domino Schelhammero omninò facimus, qui humorem, sive ut ipse loquitur, aquam statuit primum frigidum esse) divelleret, & modo magis, modò autem minus frigiditate sua corpus alterarent. Hac via non tantùm plantæ vi purgante, sudorifera, diuretica &c. præditæ certius innotescerent, sed & modus operandi sese manifestaret clariùs, nec necesse foret, ad metaphysicas quasdam speculationes, sicuti communiter fit in hac doctrina, delabi.

§. 8. De experimentis Chemicis omnes modernorum libri sunt pleni, & ab ingenuis Viris satis multæ additæ sunt de iis rectè instituendis cautelæ, & laudabili candore communicata sunt, quæ irritò conatu suscepta fuerunt; ex illis verò inter se collatis facilè est cudere cuivis, de iis instituendis, præcepta. Prælaudatus Schelhammerus rectè ait, Hippocratem ea *non revocasse in usum*, additque id factum, *partim quòd inter ipsa initia satis occupationis erat naturæ ipsius affectus investigare, partim quòd methodus ex iis argumentandi nondum ipsi esset cognita.* Ultima non satis capimus, imò in aliam prorsus abimus sententiam, rati, mortalium neminem, præter Aristotelem & Galenum, rectius fuisse argumentaturum, quam Hippocratem ex singularibus experimentis chemicis, modò ei operationes fuissent cognitæ. Ita jubet nos credere admirandum aphorismorum Opus, abundè testaturum, eum fuisse legum colligendi ex singularibus peritissimum; Nec quicquam peculiare habent chymica, nisi quatenus traducuntur ad illustrandam humorum in corpore nostro naturam, quò etiam D. Schelhammerum respexisse ex seqq. colligimus.

§. 9. Ut morborum phænomena & symptomata rectè observentur, ante omnia necessaria est exacta morbi ex arte Medica cognitio, quam novatores studiosis admodum fecere difficilem, inductis tot ineptis contra omnes, quas stolidè aspernantur, quia nunquam didicerunt, definiendi leges, descriptionibus, incredibile verò dictu est, quot monstra symptomatum in omnibus affectibus hinc nata sint. Non tangemus ulcus, alias in proclivi foret demonstrare, à magni nominis Viris heic erratum esse. In praxi Medica lapsus hinc videmus quotidie enormes. Referimus exempla duo: Viduus duxit juven-

culam, apud quam strenuè per aliquod temporis spatium meretur, læteque etiam inter convivarum plausus vivit. Cubitum verò se aliquando conferens, somno breviori fruitur. Altero die totus torpet. Pandiculatio, oscitatio etiam aderant. Incidit deinde in profundum somnum. Vix evigilat manè, mentisque non satis compos absurda effutit, & iterum obdormit. Ægrè excitatus semiclausis oculis denuò labitur in somnum, ac hiantē dormit ore, iterum autem ex gravi sopore excitatus, modò hoc, modo istud poscit, acceptis verò non utitur. Æstus continuus sub noctem incrementa capiebat. Respiratio parva & rara, pulsus magni & undosi aderant. Urina jumentorum persimilis reddebatur, & sudor circa extrema multus, frigidus & aquosus effluebat. Circumstantes morbum à fascino originem trahere, sentientes, unum ex Medicis in suam sententiam pertrahebant; alter ex medentibus conclamatum esse de ægro ex sudore frigido concludebat, existimans de cætero esse morbum aliquem convulsivum, id quod hians os, oculi semiclausī docerent. Si uterque phænomena illa conjecisset in chartas, quid nonne ob nova à se hic in convulsionibus, alter in morbis à Dæmone observata symptomata sese operæ pretium præstitisse videretur? At verò aberravit turpiter uterque tangente acu rem tertio, qui soporosum affectum, quem lethargum vocamus, debitis medicamentis debellavit. Medicus quidam gravidam ad partum usque pro hydropica, non sine opprobrio artis, curavit. Et certè melius honori suo, & nostræ arti consulerent multi, si nullo præfixo titulo rariora symptomata enarrarentur, & doctioribus dijudicandum ex phænomenis relinquerent, cuiusnam generis morbi, de quibus dubii hæsere, extiterint. Nam alias ejusmodi observationes unicè solùm valent ad confusionem majorem in artem medicam, sine necessitate, inducendam. Cùm verò Viris doctissimis hic error frequenter obrepat, nam & sui seculi gloria Casp. Hoffmannus, ex colica mictum cruentum, post usum opii secutum, narrans, deceptus est, & qui hunc effectum consequi volunt ex opii usu in colica falluntur; prout prius annotavit Clariss. Simon Pauli, cùm citra dubium calculo renum laborarit æger; nihil quidem in mentem venit, quod in præsens consulere liceat, adeoque, quid faciendum sit, ab aliis discere malumus, qui unum seriò precamur, ut disceptationes de genere morbi apud ægros omittantur, quæ ut plurimum hinc oriuntur, quod unus ad hoc, alter ad illud symptoma attendat, & quisquis præconceptionis suis opinionibus inhæreat. Qualis enim opinio in animis Auditorum ex concertationibus ejusmodi generetur, patet vel ex sola memoria acerrimæ velitationis medicorum de ægro Mazarino & ex judicio de hac apud Priolum *l. II. de reb. Gall. c. II. p. m. 389*. Ultimo virtutes medicamentorum per experimenta manifestaturum, nisi & se & alios decipere velit, nosse par est 1. medicamentum ejusque præparationem, 2. morbum ac morbi statum, 3. ægri constitutionem naturalem, 4. ab hoc medicamento superatum hunc morbum. Deus bonè! ne duobus prioribus inhæreamus, quantæ fallaciæ etiam

in tertio committuntur, in morbis præprimis chronicis? Ultimo sumptum medicamentum, etsi iners, etsi ineptè præparatum, priora nobilissima vulgò superare creditur, quia ejus usus & reconvalescentia tempore conjuncta sunt. Quem errorem, cum vulgo medici & arcanorum venditores creberrimè errant. Certè quotiescunque arcanis ritè perpenſis omnibus uſi ſumus, toties nos deſtituit eventus, ſqui ut plurimum felicior fuit, cum longa experientia confirmata in uſum vocavimus medicamenta. Quicquid alii de Helmontio jaçtent, pace ipſorum dixerimus, medicamenta ab eo commendata ſpei non reſpondiſſe. Officulum, quod in poplite leporis eſt, quodque patellam vocant, colicos dolores fuſtuliffe ſcribit ſe non ſemel expertum; Hydropicum ruſticum ſanatum fuiſſe alligata anguium ſeneçta, per ventrem & renes. Verùm ea medicamenta noſtrum ſefellere deſiderium. Ita etiam in aliis ejus eventu fruſtrati ſumus. Naturæ Conſultiſſimus Boyle, qui Helmontium alioquin, non una de cauſa, etiam propter fidem quidem ac ſinceritatem laudat, diffiteri non potuit, non ſemper, quæ adverſus pleuritidem commendat Helmontius remedia, aut ſibi aut amicis, qui ea adhibuere, benè ceſſiſſe. Ipſius quoque Boyle Viri magnæ, in communicandis literario Orbi inventis, fidei & candoris, medicamenta, etiam primæ claffis novimus quosdam infelici prorfus eventu præbuiſſe. Et utut propemodum certiffimus ex ultimo fonte derivari medicamentorum virtutes prolixè commendantium, & ſua experientia ſalubrem eorum uſum confirmantium errores frequentiffimè; nolimus tamen negare, ex parte vera eſſe, quæ tertio loco adducit Leonhardus Capuanus pro medicamentorum incertitudine confirmanda, & huc redeunt, vix medicum noſſe, quo in ſtatu degat æger, quando medicamenta ei propinanda ſunt, cujuſlibet individui etiam ſani ſtatum omni ferè momento mutari, tam ratione particularum, quæ exhalant, quam earum intuitu, quæ ex alimentis diverſis, atque aère discrepante, in locum illarum ſuccedunt; ex ignorantia verò ſtatus ægrorum, qui ſæpè diverſus exiſtit, non niſi diſſimilis conſequi eventus unius ejusdemque ſpeciei medicamenti poteſt. Ex hoc ipſo verò eluceſcit ſimul, non ipſi medicamento ſoli, ſed medicamento & ſtatui ægri ſanitatē eſſe tribuendam, atque decipi ſæpiſſimè medicos, qui ſua ad cœlum extollunt medicamenta, dùm ſolùm medicamentum non ſimul verò ægrotantium conditionem deſcribunt.

§. 10. Hæc & alia plura obſervanda ſunt, in cognitione ſingularium ei, qui ex iis notitiā experimentalem ſatagit ſibi acquirere. Singulare autem ritè obſervatum benè memoriæ imprimendum, ſive danda opera eſt, ut *affectio* v. g. in viſu *impreſſa* retinæ (quæ nihil aliud videtur eſſe quàm fibrarum mutatio certa ex rarefactione & luminis modificati appulſu) & deinde *ſecundum fibrarum nervearum longitudinem & continuitatem producta ad ſenſum internum* (hoc eſt plexum arteriarum, venarum, nervorum continuum, tum baſi cerebri, tum ſpinalis medullæ ortui;) *debitè fibræ mol-*

lioris cerebri substantiæ circa basin atque in toto tum cerebri, tum cerebelli tractu infigatur, ac imprimatur. Quotiescunque enim fibræ illæ, quibus affectio inest, quam Phantasma Peripatetici convenienter appellant, vel spiritu pulsantur, vel calore rarescunt, unde necessario vel sensio, vel compressio resultat, vel humore imbuuntur, aut alia materia vellicantur, aut ex capitis concussionem tremunt, illa ad sensum internum iterum deducitur & tum memoria rei sensu externo perceptæ adest. Quot verò singularia sint observanda & memoriæ imprimenda, & quot memoriæ ad experimentalem cognitionem necessario requirantur, non accuratè definiri potest. Credere quisquam posset, interdum ad generationem experientiæ sufficere aliquando unius singularis solum memoriam. Nam, ut e. g. sciamus, dies æstivos longiores esse hyemalibus, satis est id semel observasse, & memoriæ mandasse, & cum semel vidimus, & memoriæ infiximus, triangulum tres habere angulos, id novimus de omni. Enim verò inter Philosophos convenit, ejusmodi cognitionem propriè loquendo non esse experientiam, utpotè quæ intimè involvit notitiam plurium singularium, sed esse cognitionem principii. Rectius ergò Averroes in magnis commentariis in 2. Post. c. 2. dixit, experientiam quandoque gigni ex duabus memoriis, quandoque ex pluribus. Et præclare optimus in his Magister Aristotel. l. 1. Metaphys. c. 1. multas, ait, memorias unius experientiæ vim efficere: Si verò in ulla arte, certè in medicina, multæ requiruntur memoriæ singularium. Cæterum necesse est, ut singularia hæc conveniant, sive necessarium est, ut memoriæ ejusdem conditionis sint. Complexus, quæ dicta sunt, Aristot. his verbis l. c. multæ ejusdem rei (nec eandem numero, nec specie, nec genere, quemadmodum ipse distinguit 1. top. c. 7. sed similem intelligit) memoriæ unius experientiæ vim efficiunt. Et Hippocrates noster in præcept. tom. 1. p. m. 60. Edit. Linden. ita loquitur: Sensus enim prius percipit, & deinde transmittit ad mentem, quæ considerationi fuere subjecta. Hæc autem ubi recipit sæpè & cum iis, quæ his similia sunt, servavit & in se reposuit, eorum recordatur, ut benè græca vertit D. Schelhammerus. Quænam autem similia sint dicenda, satis rectè Aristoteles & instituto nostro convenienter declaravit 5. Metaph. c. 9. Nimirum similia dicuntur ei, 1. quæ idem sunt perpeffa & passione aliquid in se receperunt; deinde 2. ad similia referuntur, quæ plura habent eadem quam diversa, quibus distingui possunt. 3. Quæ habent eandem qualitatem, nam hæc est radix & fundamentum similitudinis & dissimilitudinis; ut enim ratione quantitatis res solent dici æquales aut inæquales, sic qualitatum habitatione similes aut dissimiles nominantur. Eò verò major est similitudo inter res, quò qualitates sunt plures aut insigniores & magis præcipuæ, quibus conveniunt. Ad experientiam ergò necessariæ sunt plures memoriæ singularium, quæ vel idem perpeffa fuerunt, aut iisdem qualitatibus prædita, aut multa habuere prædicata eadem. Qui ita instructus est, deinde progreditur ab his singularibus ad aliud eis simile; ita, e. g. colligens, pulvis Peruvianus Petrum,

Petrum, Paulum, Andream &c. quartanâ febris laborantes (Antimus Conygius seu Honoratus Fabri, ut patet ex tract. 10. *physicor.* p. 482. in *Pulvere Peruviano vindicato* c. 7. p. m. 29. *supra centenos*, inquit, *appellare possem*, quibus *salutaris fuit*, & Eminentiss. Cardinalem de Lugo *plus mille schedulas totidem pulveris cum sperato ac lato successu exhibiti testimonia asservasse ibidem ait.* Conf. Morton. *de morb. universalib.* c. 7.) sanitati restituit, ergo etiam Georgium eadem febris correptum, ab insultibus febrilibus liberabit. Talis integra collectio, ut dixi, commodè experientia nominatur, ac definiri potest, quòd sit *progressus à singularibus ad aliud singulare*. Diximus, quòd sit *progressus sc. rationis à pluribus singularibus*, quo ipso convenit cum *inductione* altero isto organo *Dialectici*, quam Aristoteles *def. 1. Top. c. 12.* per *ἐκ τῶν ἀπορίων* à *singularibus pluribus ad universale*; differt verò ab exemplo: nam exemplum juxta Aristotel. *1. Rhetor. c. 2. n. 48. & lib. 2. Prior. 24.* *sepe habet ut pars ad partem*, hoc est, ut benè explicat Monlorius & Schraderus aliique, ut *singulare ad singulare*, adeoque est *inductio imperfecta*, quia ex uno singulari aliud singulare colligit, quod sub eodem continetur genere. Per singularia autem propriè dicta intelligimus, adeoque minus universalia excludimus; eo ipso autem differt ab inductione, quæ sæpè à pluribus minus universalibus ad magis universale procedit. 2. Adjecit ad singulare aliud: hoc autem ipso convenit quidem cum exemplo, ut jam innuimus, sed differt ab inductione, quæ ex singularibus non alterum singulare, ut experientia, sed universale infert.

§. II. Enim verò contra has regulas non uno modo peccari potest. 1. Nonnullorum enim factus est prorsus intolerabilis, & hi negativè hoc modo concludunt: neque hoc neque istud sensibus meis usurpavi, ergo neque alterum erit. Et hi sua experientia decempedâ stolidè metiri patentissimos rerum physicarum campos satagunt ineptissimi homines ad incrementa physicæ impedienda nati. Fit enim sæpissimè, ut, quod Virorum experientissimorum & exercitatissimorum oculis sese subducit, illud vel propter insignem operantis dexteritatem, vel etiam fortuito casu sensibus alterius se ingerat. Vix ab Anatomicis antiquioribus observatum legas, quod spinalis medulla sit numerosis funiculis densata, atque innumerabilibus fibris stipata. De eo tamen, more quorundam, dubitare nefas putamus. Nam Carolus Drelincourtius, Medicus Doctissimus & Eloquentissimus, in *præluo Anatomico* de seipso p. m. 35. *spinalem*, inquit, *hanc medullam ex ejus osseâ vagina eduxi, inque minutissima fila discerpsi, atque diduxi, illasque filamentorum quovis serico tenuiorum & quibuslibet araneæ telis subtiliorum, super chartas explicatas myriades curiosis oculis subjeci.* Tantò magis verò Drelincourtius præ aliis laudandus, quòd hoc à se inventum apud Lectores non gloriatur, sed Galeno tribuat. Valvulas in venis reperiri tales, quales ad vasa è corde egredientia notantur, nemo jam in dubium vocat. Vesalium incomparabilem Anatomicum

cum Joh. Baptist. Cananus certiore fecit, *se in conjuge carentis venæ quam azygon vocant initio, & item in venarum renes adeuntium & in sectione venæ, juxta elatiorem sacri ossis sedem occurrentium orificiis, membranas ejusmodi observasse, quales in venæ arterialis & magnæ arteriæ occurrant principiis, quod ipse Vesalius in exam. observ. Fallopii p. 131. fatetur; ipse verò licet monitus, has valvulas videre non potuit. Ineptissimus autem fuisset, si ita Vesalius intulisset, ego secui hoc, istud, illud, &c. cadaver humanum, brutum, & non deprehendi valvulas illas, ergò non sunt. Ulterius qui legit hæc Thom. Barthol. verba in *Anatom. reform. l. 1. de ven. append. 3. de vas. lymph. p. 624. Colli verò & artuum superiorum lymphatica vasa in jugularem externam seu axillaris concursum ingrediuntur, ubi commune stagnum videtur, concurrentibus ostiis lymphaticorum, ex quibus male sibi nonnulli labyrinthum quandam imaginantur; videt de labyrintho lymphatico à Bartholino dubitari, & male, observarunt enim alii & inter hos Excell. Dn. D. Hartmann. ut testatur in exercit. Anatom. de iis, quæ contra peritiam veterum afferuntur in specie c. 5. §. 8. p. 42. Non infrequens 2. error est, quo ex uno singulari, quomodocunque cognito, statim infertur aliud singulare, præprimis in cura ægrorum. Facit verò defultoria aliorum levitas, aliorum verò arcana jactantium invidia, ut virorum bonorum experientia in his non satis ampla esse possit. Illi enim, qui vel unodie ter medicamenta, sæpè nulla de causa, mutant, qui, quæso possunt adjuvare experientiam aliorum, & medicamentorum vires ritè describere? Semper enim hærent ancipites, si aliquando felix consequatur eventus, cuinam adscribendus sit? Deinde huc ventum est nostro tempore, ut quilibet ferè medicus, quemadmodum rectè observavit Celeberr. Bohnius in præfat. ad dissert. Chymico-physicas, extollat tincturam bezoardicam, essentiam spleneticam, elixir præcipitans, aquam alexicacam, sal naturæ, arcanum antepilepticum, balsamum apoplecticum, & id genus simplicitates alias, ac quidem sub nomine arcanorum, quorum possessione non omnes dignos judicant. Hi verò dum suis arcanis, quæ vix titivillitio cordati emptitarent, incubant, prorsus aliorum experientiam non juvant, & ipsi etiam semper tyrones existant. Quod si enim se delusos in praxi, adhibitis suis arcanis sentiunt & fors comprobet usum alterius, cui aliquid adjecerunt, prioris usui extemplo valedicunt, donec iterum, sæpè etiam cum famæ detrimento, à porrigendo secundo arcano avocentur, & tùm aliud quoddam comminiscuntur usque ad extremum vitæ. Phryges enim ferò sapiunt. Certè, qui rem sine præjudicio expendere, agnoscat verè dictum esse à Schelhammero, *nos multitudine medicamentorum laborare, nec indigere aliis*: Fortè etiam obest certæ experientiæ ex tot ingredientibus medicamentorum compositorum, etiam ubi nulla necessitas est, usus. Certè cum delectatione summa legimus, quæ Illustris Boyle affert in *adhortatione ad usum simplicium*, quam addidit tractatu de consensu philosophiæ corpuscularis cum medicamentis specificis.**

§. 12. Ne decipiamur in collectione nostra & fortè à pluribus dissimilibus ad aliud dissimile progrediamur, ex similibus nobis cognitis singularibus in tertia figura colligamus majorem de medio hac ratione: Johanni, Paulo, Andreæ &c. opium nocebat; Johannes, Paulus, Andreas, erant phrenetici; ergò phreneticis opium nocet; aut ita: Huic, isti, illi, tertio & sic consequenter, balsamus anisatus, vel terebinthinatus profuit; Hic, iste, ille fuerunt ulcerosi. E. ulcerosis balsamus anisatus vel terebinthinatus convenit. Illa conclusio substituatur loco majoris in Syllogismo altero, qui est in prima figura: Phreneticis Opium nocet; hic æger est Phreneticus; E. huic ægro opium nocebit. In altero exemplo: Ulcerosis balsamus sulphuris anisatus vel terebinthinatus prodest; admirabilia enim præstat, si ulceribus infundatur, conf. Sylvium *l. I. prax. Med. c. 40. §. 61. p. m. 286.* Atqui Petrus laborat ulceribus; Ergò Petro proderit balsamus sulphuris, aut anisatus, aut terebinthinatus. Si minorem in ultimo Syllogismo quis conferat cum minore in primo, statim apparebit, an sint ὑπὸ τὸ αὐτὸ γένος, i. e. sub. *eodem universali*, & habeant similem rationem, quod & in exemplo necessarium esse monuit Aristotel. *rhet. c. 2.* Apparet vero has collectiones, si ad leges analyticas examinentur, non habere firmam consequentiam: nam & ex illis paucis singularibus non potest nisi conclusio inferri particularis, quæ cum loco Majoris ponitur in Syllogismo in prima figura, evidens est, ex majori particulari concludi, quòd tam in prima, quam in secunda figura vitiosum est. Hinc verò hoc commodum aliquis consequitur, ut admoneatur, quòd si eventus minùs secundus succedat, experientia non sit sufficienti instructus, & paucorum singularium notitia propositio major nitatur.

§. 13. Is, qui multarum rerum experientia instructus est, redditur expeditus ad operandum, & inde Aristot. *l. I. Metaph. c. 1.* docet, *experientiam ferè similem videri Arti & Scientiæ.* Quæ etsi alio trahat Alexander, vidit tamen S. Thomas similitudinem in hoc consistere, quòd, quemadmodum Ars & scientia sunt potentia quedam & principia operationis; ita etiam experientia sit potentia & principium, per quod reddimur habiles ad aliquid operandum. Imò si verum fateri volumus, ipsa ars ab experientia sæpè vincitur hac in re. Nam videas theoriæ deditos Medicos sæpissimè longo intervallo relinqui post tergum ab empiricis in facienda medicina. Quod & Aristoteli annotatum. Cujus rei causa nulla alia est, quam quòd modo credantur callere artem, qui scientiam de ipsa ex libris & præceptorum institutione quomodocunque hausere. Nam etsi principia, ex quibus conclusiones in scientiis deductæ sunt, forent certissima, recteque intellecta, quæ tamen subinde falsissima sunt, & pejus explicata, error tamen variis modis committi potest, quotiescunque, ut necesse est fieri in Syllogismo practico, conclusio ex scientia de arte majoris propositionis loco ponitur, & singularis aliqua subsumitur, ut omnis dies docet. Contra facilius empirici singulares à se ipsis rectè cognitæ transferunt
ad

ad aliam singularem illis similem, & ut plurimum res feliciter succedunt, modò in similitudine non aberrant. Alias utilitates experientiae jam non delibabimus.

§. 14. Sed fortè hæc plurimi, ut vulgaria, aspernabuntur, nec nos repugnamus, modò illi ipsi, qui sibi lyncei videntur, cum talpa sint cocciores, & suspensio naso talia excipiunt, non millies in vulgaribus illis impingerent. Requirent alii, ut suggerantur à nobis modi & viæ, quibus experimenta nova institui queunt. Id enim est, quod unicè hodiè quæritur. Nulla verò rationalis alia via est, quàm ut, cum experimentum in uno processit, tentetur in alio simili; vel enim similis causa efficiens, vel similis materia, vel similis materiae ejusdem alteratio, similis sive in natura, sive in arte, operatio &c. occasionem novo dabit experimento. Equidem cum hanc dilatandi experimenta viam desiderari dixisset Fr. Baco de Verulamio *l. 5. de augm. scient. c. 2.* eam adumbrat, docetque modum experimentandi procedere *aut per variationem experimenti, aut per productionem experimenti, aut per translationem experimenti, aut per inversionem experimenti, aut per compulsionem experimenti, aut per copulationem experimenti, aut demum per sortes experimenti.* Enimverò, pace Illustris Viri & optimè alias de studiis meriti, hæc vana sunt, nam, citra ullam necessitatem ex analyticorum præceptorum contemptu, omnia intricat, & nihil affert, quod non innitatur similitudine, ut patebit percurrenti, quæ habet à *p. 239. usque 249. in edit. Argentorat.* Quia verò nonnulla exempla, ab ipso allata, accommodatissima sunt ad illustrandam nostram sententiam, eadem ab ipso mutuabimur. Compertum est, quod radii solis per specula comburentia in calore ita intenduntur, ut materiam, quæ ignem faciliè concipiat, accendere possint: Qui hoc novit, si attendat, quod sol & luna varias qualitates habeant communes, videt novi experimenti occasionem suggeri, ac tentari posse, utrum radii Lunæ ad lenissimum teporis gradum actuari queant? Non autem respondet eventus; nam Kenelmus Digbæus refert *lib. 1. de sympath. p. 41. radios lunares in concavo speculo, vel polita patina exceptos non ut solares urere, sed potius humectare & refrigerare, relictæ in superficie vasculi excipientis humida & viscosa materia.* Ulterius confectio papyri in pannis linteis tantum probata est, si animum ad ea, quæ cum panno linteo habent aliquam similitudinem quisquam reflectat, ei occurret in sericis, in filaceis, compositis ex setis & pilis, in laneis, gossypio & pelli- bus &c. successum explorari posse. Item insitio in arboribus fructiferis diu in usu fuit, cum autem circumspicimus res similes, sese offerunt arbores sylvestres, flores &c. & ad nova facienda experimenta invitant. De succino fricato notorium existit, quod trahat paleas, quia verò per calefactionem simili ferè modo alteratur, quam per frictionem, ansa porrigitur tentandi, quid fiat cum succino calefacto. Præprimis verò operationes naturales rectè observatæ multis novis experimentis occasionem suggerere possunt. Prudenter itaque Illu-

illustris Vir p. 243. debuerant, inquit, homines, si illis utilia inquirere vacaret, naturalia opificia, & operationes singulas attente & minutim & ex composito intueri, & secum perpetuo & acriter cogitare, quenam ex ipsis ad artes transferri possent. Speculum enim artis natura. Et certe non aliunde iridium artificiosarum imitatio, & modus destillandi, ac ars pingendi &c. facili ductu translata sunt. Nec minus artes jam cognitæ & operationes in iis solennes ac usitatæ, fecundissimæ sunt novorum experimentorum genitrices; ita sigillorum impressio in cerâ, cæmentis & plumbo, arti typographicæ à Germanis inventæ, viam monstravit. Quasi ex tripode profecta sunt, quæ habet p. 244. Quòd nihil ad imbrem quendam inventorum utilium eorundemque novorum, veluti cælitus deducendum, tantum valere possit, quantum, si experimenta complurium artium mechanicarum uni homini aut paucis, qui se invicem in colloquiis acuere possint, in notitiam venerint: ut per hanc, quam dicimus, experimentorum translationem artes se mutuo fovere & veluti commixtione radiorum accendere possint. Post tempora certè Illustris Viri felicissimo successu in multis hæc in praxin traducta sunt, quæ modò legimus præcepta. Imprimis memorabile est, quod hæc nostra ætas ipsas plantas cultro subijciat anatomico. In quo negotio eluxit cumprimis diligentia Malpighii in *Anat. plantar.* & Nehemiæ Grew in *lucubrationibus*, quæ in *Ephem. Germ. Dec. I. ann. 8. 9. & 10.* leguntur. Quemadmodum autem hæc Verulamii, de novis experimentis reduximus ad unicum à similitudine fontem, ita dubium non est, quin etiam cætera eo rectissime queant revocari.

§. 15. Præterea insignis experimentorum usus cernitur tam in illustrandis propositionibus universalibus jam constitutis, quam in novis constitutendis. Et ut de priori jam non loquamur, in posteriori magna opus est curâ, nec adeò facile est, ex singularibus fabricare propositiones universales. Et optandum quidem esset, ut Viri docti ex observationibus ab Illustribus Societatibus & Academiis per multorum annorum decursum cum orbe erudito communicatas, aggrederentur formare propositiones universales; ita enim scientiarum pomœria extenderentur, & quæ per multa sinuosa volumina jam diffusa sunt, brevi admodum libro comprehendi possent. Et si quis fortè seculi offensam metueret, quòd mirè sibi placet, & ferre alios non potest, nisi hyperbolicos sui laudatores, posset vires suas experiri in iis, quæ ad posteritatem transmissa sunt à Benivenio, Dodonæo, Amato Lusitano, Valleriolâ, Wiero, Costero, Foresto, Schenckio, Donato, Platero, Hochstettero, Ballonio, Epiphanio, Ferdinando, Carolo Pisone, Fabric. Hildano, Gregor. Horstio, Henrico ab Heer, Zacuto Lusitano, Nicol. Tulpio, Reinero, Solenandro, Joh. Petr. Lotichio, Philip. Salmutho ac aliis. Nam utut vilior hæc sparta haberi possit, etiam hanc casam Dii inhabitant, quo Heracliti dicto ad Animalium philosophiam invitat nos Aristoteles. Qui in hoc stadio cum laude decurrere cupit, observet in antecessum regulas à Conringio in his sine exemplo propemodum

H h h

exerci-

exercitato in *lib. de. civili prudentiâ c. X. p. 189.* præscriptas, quarum Prima est: *Universales propositiones hâc appellari omnes, quæ non sunt singulares.* Nemo vero non videt, Celeberr. Virum abuti hâc voce propositionis universalis, juxta Aristotel. enim *universalis ea est, quæ significat aliquid omni aut nulli inesse lib. I. Prior. c. I.* Secunda: *in scientiis potissimum quidem locum generalibus, proximum specialibus, aliquem tametsi infimum, deberi illis, quas particularissimas dixeris, quoniam non sunt acceptæ ex multorum singularium usu.* Sine dubio obversati sunt animo Conringii illi Aristotelis textus, quibus inculcat, *scientiam esse aut ejus, quod semper, aut quod ut plurimum est, lib. I. poster. c. 30. lib. 2. c. 12. lib. I. Prior. c. 27. lib. 6. Metaphys. c. 2. & 3. de part. anim. c. 2.* Si quis Galenum ipsum audire malit, ex *lib. 4. comment. in lib. Hippocr. de ratione victus in morb. acut.* hæc maximè hâc faciunt: *Omnis doctrina ex Universalibus recipit incrementum. Quæ, si perpetua fuerint, primam habent dignitatem & utilitatem, si verò magnâ ex parte, secundam; quòd si anceps quidpiam vel rarum fuerit, id ad doctrinam inutile censendum est.* Lectu dignissima in hanc rem dissertatio Scherbii pro *Philos. Peripathet. advers. Ramist. c. 3. in Phil. Altorf. p. 15.* quorum pleraque transtulit in *c. 7. lib. I. Oper. sui egregii, de variis sciendi generibus & mediis Zeidlerus.* Tertia est, *ex singularibus Universalia disci posse partim per se, facta ex singularibus collectione, partim non nisi occasionaliter, dum nimirum mens versans singularia atque exinde universalia quasi fabricans occasionem arripit, investigandi causam, quâ perspectâ Universalis quædam enunciatio formatur, quæ tamen reapse non accepta est ex singularibus, atque adeo collectioni ex singularibus institutæ non reapse debetur.* Nemo verò non videt, id fieri prorsus per accidens, neque enim singularis propositio, sed causæ investigatio, eo in casu ansam suppeditat extruendi universalem propositionem. Quarta est, *ex singularibus factâ collectione non affirmativas duntaxat, sed etiam negativas confieri, primariò tamen affirmativas, quoniam sensus & experientia primo ac per se entitatem rerum percipiunt.* H. I. Multò etiam uberiolem usum habent, hinc Aristot. *l. I. Prior. c. 25.* demonstrationem affirmativam præfert negativæ. Conf. Zeidler. *l. cit. c. 15. §. 4. p. 306. 307. & seqq.*

§. 16. Cæterum quisnam progressus sit ex experienciis multis formandi propositiones universales ex *2. poster. Analyt. Aristot. c. ult.* constat, quem brevius Piccart. in *Synopsi Org. p. 731.* Zeidlerus verò in *lib. cit. p. 400.* aliquantò uberius explicat. Nec multis opus est regulis, cum perfectissimum exemplar, quod intuendum sit, reliquerit Hippocrates. Si ergò quis telam hanc Penelopes retexere voluerit, abunde informabitur de modo formandi propositiones Universales ex singularibus experienciâ cognitæ. Ex verò unius generis esse nequeunt. Nam aliquæ primæ erunt, seu principia, hoc est, tales propositiones, ex quibus demonstrationes in scientiâ de Arte Medicâ formantur, nec per priores in eadem disciplinâ probantur, quales sunt I. ex, in quibus

bus proprius effectus tribuitur τῇ αἰτίᾳ δι' ἣν τὸ πρᾶγμα ἐστίν, i. e. *causæ continenti & simpliciter proximæ, per quam ille effectus est*; 2. in quibus Essentialia prædicata προσεχῇ attribuantur subjectis propositionum. Inter talium enim propositionum subjecta & prædicata non occurrunt ulla media, quæ obtineant locum causarum, propter quas prædicata insint subjecto. Aliæ autem, quæ comprehendunt τὰ πάθη καὶ τὰ καθ' αὐτὰ συμβεβηκότα i. e. *affectiones & ea accidentia, quæ per se insunt subjectis generibus, talia enim manifestat demonstratio l. 1. poster. c. 7. cuiusmodi sunt, in quorum definitione ponitur ipsum subjectum*. 3. Cum morbus ejusque causa conjuncta nostros sensus plerumque subterfugiant, symptomata quædam signorum rationem habentia meritò annotanda erunt, ut ex iis in notitiam morbi & causæ deveniamus. Non unius *autem generis* signa sunt. Quædam enim ex illis, cum iis morbis, quorum sunt signa, necessariam habent connexionem, ut signo præsentē dubitare non liceat, quin & morbus ipse adsit, vel adfuturus sit. Qualia signa ab Aristotele τεκμήρια nominantur. Ex iis verò alia ita comparata sunt, ut *affirmativè* quidem ab illis colligere liceat ad morbum, cuius signa sunt, *negativè* autem non item; ab aliis verò rectè quidem *negativè*, non autem *affirmativè*, ex aliis verò utroque modo, in quibus nimirum termini sunt convertibiles. Præter hæc autem sunt signa alia, quæ certum cum morbis nexum non habent, & ideò fallere possunt, ac nonnisi dubiè morbum hunc vel illum adesse denotant. 4. Quæ comprehendunt accidentia, *quorum quædam plerumque, quædam æqualiter, quædam autem rarò insunt*. Quod discrimen sollicitè annotandum.

§. 17. Jam videmur nobis audire alios hæc tanquam scholæ commenta plenis buccis irridentes, alios exhibilantes, alios tanquam simplicitatem quandam aspernantes. Non invidemus eorum sapientiæ, cuius opinione suffeni illi adeò turgidi sunt, ut periculum sit, ne illa eorum rumpantur. Datum etiam nobis fuit, pleraque eorum legere, & fortassis etiam, quotiescunque se ipsos intelligunt, capere. Veniam tamen ab aliis merebimur, gnaris, quod quotiescunque de ejusmodi rebus instituunt sermones, si quæ bona dicant, eadem à veteribus mutuuntur. Ex horum numero quidem non existimamus fuisse Virum, de promota per experientiam naturali Philosophiâ immortaliter meritum Illustr. Boyleum, quia tamen Illi etiam eundem venerantur, velimus cogitare eos, quòd non nisi Aristotelis præcepta exposuerit in disquisitione, quâ *in finales rerum naturalium causas inquiritur, an & quibus causis à Physicis admittendæ*, ut non dicamus, Cartesium de *methodo*, & Auctorem *artis cogitandi*, ea quæ in his sana sunt, Aristoteli & veteribus debere. Hæc tamen, quia fortè ignorant Aristotelis esse, exosculantur.

§. 18. Id verò crucem figeret tentaturo ejusmodi negotium, quòd in multis nondum sint constituta certa genera, & alii hæc, alii alia constituent, quod manifestum est in saporibus; unde medicamentorum facultates esse di-


judicandas diximus. Non videmus tamen, cur Galeni doctrina hîc respicienda sit, qui non malè sâpores definit, ac eorum numerum init. Ponit is *adstringens* unum genus, hoc juxta ipsum comprehendit *austerum* tanquam remissius astringens, cujus exempla affert mala cydonia, fructus mespilorum, addi etiam possunt fructus cynosbati, cupressi, balauſtia, gallæ, acacia, fumah &c. deinde *acerbum*, tanquam fortius adstringens, ut pyra sylvestria, uvæ; juscula quoque & lacticinia, si mucorem & situm contrahunt, acerbâ evadunt. Alterum genus ponit *abstergens*, à quo Auctor *indicis Schræderiani morborum & remedium* malè separat *extergens*, quod si sit remissius, vocatur *salsum*, cujus exemplum in vegetabilium familiâ vix occurrit, nisi cochlearia marina & capparis eò referantur, inter mineralia autem sal marinum, fossile, nitrum, inter artificialia, sales herbarum fixi per incinerationem facti, sales quoque compositi, borra, sal armoniacus, *amarum* si fortius, ut absinthium, abrotanum, centaureum, colocynthis, agaricus, fumaria, & herbæ omnes, quæ in siccis & montanis locis nascuntur. Tertium genus est *corrodens*, quod differt ratione caloris, si cum insigni caliditate est, audit *acre*, quale est piper, sinapi, pyrethrum, è mineralibus arsenicum, sandaracha, inter corpora ab arte producta, mercurius sublimatus, butyrum $\ddot{\text{H}}$ ii, aquæ fortes & causticæ; & ad hæc pertinent *discutientia* & *resolventia indicis nominati*; si verò absque caliditate est, nominatur *acidum* ut poma citria, aurantia, limonia, berberis, oxalis, tamarindi &c. Quo referenda videntur *attenuantia* & *incidentia ejusdem indicis*. Quartum *leniens*, vel cum voluptate manifestâ, & vocatur *dulce*, e. g. è vegetabilibus saccharum, manna, cassia, ex arte paratis saccharum $\ddot{\text{H}}$ ni, sal $\ddot{\text{J}}$., lythargirium; vel *sine hac*, & vocatur *pingue*, ut olivæ maturæ, terebinthina &c. ad dulcia autem & pingua reducenda videntur *emollientia* & *incrassantia*. De generibus morborum non minor est difficultas. Nec certè negari potest, quod, quæ vulgò prostant in libris institutionum, nec limatum Aristotelis ferant examen, nec genio seculi respondeant. Id nobis certum est, quod si leges Analytices valere debeant, ut omnino par est, præscriptis vulgaribus de alia eorundem divisione sit cogitandum. Quia vero est exploratum, quod morbus denotet *dispositionem*, *constitutionem*, *affectum p. n. ledentem actionem primo*, quâ de re expendenda sunt quæ habet Casp. Hoffmannus lib, 3. *Institut. Med. c. 2. p. 290. 291.* rectissimè secundum actiones, quas lædit, dividetur. Nam privationes appositè secundum actiones, quarum sunt privationes, dividuntur, quemadmodum etiam ex habitibus cognoscuntur. Functiones animalis quatuor sunt, substantiæ per nutrimentum reparatio, rerum sensibilibus perceptio, corporis ex uno loco in alium translatio, & tandem speciei per generationem propagatio. Nam propter hæc munera tam multiplici organorum apparatu à naturâ sollicitè instructum est animal, nec alia commodior partium corporis divisio institui potest, quàm respectu ad hos actus, tanquam fines, unde differentiam fortiuntur, habito. Apposite ergò

ergò morbos constituemus, alios nutritionem, alios motum, alios sensum, alios generationem lædentes. Et cùm medicamenta ad collapsam restituendam sanitatem tendant, tanquam instrumenta, fallimur, aut convenientissimè ipsa etiam divisionem hinc invenient.

§. 19. Enimverò si ulla res difficilis est, profectò constitutio universalium propositionum ex singularibus longe est difficillima, quod ex lapsibus Celeberrimorum Scriptorum est maximè perspicuum. Cor esse insensile Clar. Harvejus ex experimento colligit in *exercit. de generat. animal. Exercit. 51. p. 156. Edit. Lond. in 4°*. At verò absolum est, ex uno singulari experimento inferre universalem propositionem; deinde ipse fatetur, quòd cordis conum caro fungosa excreescens, ut in sordidis ulceribus fieri solet; muniminis instar obtexerit: jam, quis ferat ita colligentem: Cor præter naturam excrecente fungosâ carne munitum, fuit insensibile; Ergò cor sensu tactus privatum est. Multa principia, quibus sibi neoterici placent mirè, ita sunt extracta. Idem Vir immortalis gloriæ statuit universale hoc principium, in coitu semen aut genituram maris non ingredi cavitatem uteri, illud verò colligit ex eo, quòd in animantibus (sumit verò cervas, damasque frequenter, quia munificentia Caroli Regis ingens eorum copia, simulque frequens disseccandi opportunitas, inquirendique libertas suppeteret, ut ipse testis est *Exercit. 63. p. m. 218.*) post coitum cæsis non deprehenderit semen; qui ita colligenti: Ego centies &c. secui cervas & damas post coitum, & semen in utero ipsorum non fuit à me deprehensum. E. post coitum semen in utero vel cornibus non videtur, applauderemus, utpote qui, quod ex singularibus colligi debebat, etiam reverà inferret; at non possumus non mirari id argumentandi genus: Secui & non inveni, E. non fuit in cavitatem uteri effusum; quod ex experimentis nullatenus colligi potest. Nam si vel maximè ingressum fuisset, nonne tortum animal iterum potuisset ejicere, aut uterus genituram haurire? Pro hoc suo principio confirmando aliud statuit, nullum patere sc. aditum in uterum, quòd ne aër quidem inflatus in uteri cavitatem penetrare queat, quod majori confidentia de gallinæ utero asserit. Enim verò cùm pateat exitus, nam aliàs ovum extrudi non posset, profectò etiam patet introitus *naturâ volente in coitu* scilicet. Porro sæpissimè videmus fieri, ut phænomenon ac experimentum certum sit, quærat autem de causa ejus, hanc hodierno tempore multi excogitant, & pro principio quodam venditant pro lubitu. Res certa est, quòd, ubi in vas aquâ plenum sal immittitur, certa salis copia in ipsâ dissolvatur, deinde verò non amplius sal liquecat; quæritur, cur initio sal dissolvatur, deinde verò non item? Gassendus arbitratur, fieri propterea, quia aquæ pori omnes tùm pleni atque obstructi sunt, & hinc apud ipsum certum est principium, quod experimentis comprobatum esse autumat, aquæ inesse poros & vacua spatia. Enimverò id omninò nutat, & existimamus fieri propterea, quòd humor, qui antea poros salis, ob tenuitatem suam promptè subibat ac dissol-

vebat, factus sit crassior ac per poros ultra subire, & salem liquare nequeat. Ulterius certum est, quòd aqua in foliis caulium in globulos exiguos tornetur; hoc videns Galileus & de causâ sollicitus, novum principium physicum cudit, aqua fugit aërem, ac sese ex fugâ contrahit ac colligit, adeoque antipathia est inter aërem & aquam. Imò ipsimet Boylio, cui omnes Boni, pro experimentis candidissimè communicatis, immortales debent gratias, hic hæsit aqua, nam etsi experimenta ejus cautissimè sint instituta & verissima, non æque tamen feliciter ex iis principia extruit. Ita in hydrostaticis gravitationem illam singularem cujuslibet superficiei liquoris in proximè subjectam eum ex experimentis malè colligere demonstrat Honoratus Fabri in *dialogis Physicis* ad Eminentissimum Cardinalem Facchinettum *Dialogo quarto p. 157. in quo de libratissimis suspensisque liquoribus & mercurio ex professo disputatur.* Rudi penicillo has adumbravimus lineas, uberiores nobilissimi argumenti notitiam ab aliis præstolaturi.





I. N. 7.

D E

HYDROPE PECTORIS.

LECTORI SALUTEM.



CONSILIUM de Societatibus seu Aca-
demiis promovendâ praxeos gratiâ eri-
gendis, quod Celeberr. Vir Georg.
BAGLIVIVS *lib. 2. præclari operis de*
Praxi Med. ad priscam observandi rationem
revocandâ cap. 4. suppeditavit, tametsi
uberrimos in clinicâ Medicinâ fructus
polliceatur, eruditi hætenus nondum
sunt secuti. Neque enim vel fando
accepimus, uspiam locorum ejus ge-
neris Societates fuisse institutas. Inter præcipua, quæ laudatissimo
instituto obicem ad hanc usque horam posuerunt impedimenta,
non postremo loco fortassis numeraverimus epidemicum, qui, ab
aliquot

aliquot abhinc lustris, in Scholis Medicis regnavit, morbum, cuius hoc pathognomonicum propè signum videtur, *fastidium ingens & contemptus quidam insolens omnis veteris Medicinæ, cum perpetuo innovandi pruritu conjunctus*. Symptoma consimile admodum ei, quod est interdum in mulieribus gravidis, quæ magnâ cacochymiâ oppressæ optimos & saluberrimos cibos negligunt, ac eorum loco carbonibus & cineribus pascuntur. At verò illa malacia non omnes corripuit. Nec sanè unquam vel nostræ Germaniæ defuere Viri præstantissimi, qui exactissima fide ac summâ diligentiam in Medicis suis scriptis explicarent, quæcunque ab omni ævo in cultissimis terrarum locis à Doctissimis Medicis circa morbi hujus vel illius historiam, morem, motum, solutionem, curationem, medicamentorum & auxiliorum Medicorum virtutes & utilitatem noxamque observata & longo usu deprehensa sunt, & à se-ipsis multiplici experientia fide comprobata. Et hi fortassis non rudi penicillo delinearunt Medicinæ corpus, cuius summam perfectionem posteritas ab eruditis ejusmodi Societatibus Baglivianis sperare & polliceri sibi potest. Et horum Virorum diligentiam in præsentī Opusculo de *Hydrope Thoracis*, quamvis impari conatu, inter plusculas nostras occupationes imitari intendimus. Cùm enim nostram experientiam ad contexendam paulò accuratiorem morbi hujus occultioris historiam minimè sufficere crederemus, aliena etiam, scilicet Doctissimorum Medicorum, nobis subsidio fuit; quorum scripta subinde laudavimus; semper enim à moribus illorum alienissimi fuimus, qui nullum temerè Auctorem allegant, ne vel ex aliis sapere videantur, vel, cum aliorum observationes furtim sublegant, hâc arte plagii suspicionem declinare queant, vel tandem, ut aliorum laboribus ad novas hypotheses fabricandas, cum majori nominis sui famâ, si non per omnia cum præjudiciis suis conveniant, securius, quantum libet & fabulæ inserviunt, utantur. Quòd enim id generis homines aliorum lucubrationes fideliter sæpènumero describant, & tamen jactent, se ex nullo Auctore profecisse, alibi luculentis exemplis ostendemus. Hic unius BARBETTE supercilium & arrogantiam notasse satis fuerit. Is in Præfatione ad Lectorem: *Ex centum, inquit, quos consului, Auctoribus, nihil ferè exscripsi, proprio ubique usus sensu & judicio;*

ac nihilominus quàm hoc sit verum , *ex lib. 1. cap. 1.* patet , quod exorditur à definitione epilepsiæ , quam sine ullâ mentione Riverii ex hujus *Praxi* est mutuatus. Testimonia scriptorum in ipso contextu statim addidimus , nec vel ad calcem aut marginem , exemplo nonnullorum , qui hoc ipso se *le bon sens & la netteté* sequi credunt , rejecimus , inducti exemplo Virorum Celeberrimorum , Rolincii , Conringii , Wepferi , Meibomii , Bohnii , Wedelii , Schrœckii , Rivini , Majoris , Shelhammeri , Hoffmanni , Sachsi à Lewenheimb , aliorumque , cùm non esset , cur adeò anxie eundem verborum tenorem servaremus , aut idem orationis filum retineremus. Et tametsi Doctissimorum Virorum morem , qui auctorum verba & loca vel ad margines apponunt , vel operi subjiciunt , minime carpamus aut reprehendamus ; non contemnendæ tamen sunt rationes Joannis Launoji , quas his verbis pandit : *Dum ad margines apponunt Auctorum testimonia , tunc adversus librum fit quoque alius liber. Deinde si quis rei , quam legit , probationem videre cupit , ei versanda semper erunt paginae , revolvenda folia , quod laboris genus molestiam & negotium facessit. Tum hac scribendi methodus annis abhinc centum inducta est , nec adeo recondita , vel tantum habet mysterii , ut non potuisset in antiquorum mentem facile venire.* H. I. Usi autem fuimus aliorum testimoniis , præcipuè in enarrandis hydropis pectoralis phænomenis , ac in curâ , nam , cùm ad investigationem causarum descenditur , unicuique & nobis , ut opinamur , licuit vires ingenii periclitari , & sine contumelia proseguere , vel veterum castra relinquere. Addidimus modestè & nostram experientiam variâ clinicâ praxi partam. Vides , benevole Lector , hujus opusculi fundamenta , experientiam aliorum Medicorum , & nostram , rationemque ex phænomenis causarum notitiam indagantem , præsuppositis recentiorum in re Anatomicâ inventis. Memineris autem , hoc ipsum inter pluscula esse natum negotia , ac rarò periodum unam

alteramve absque intercurrentibus interpellationibus fuisse finitam. Rogamus itaque, ut eo animi candore, quo hæc scripta sunt, vel de alienis laboribus judicavimus, æstimentur, ac non minor sit in ignoscendo æquanimitas, quam in judicando dexteritas. Vale!



CAPUT PRIMUM.

Sistens historiam morbi hujus.

SUMMARI A.

- §. 1. *Hydrops pectoris morbus est à paucissimis cognitus.*
- §. 2. *Phænomena morbum præcedentia, v. g. anxietates præcordiales.*
- §. 3. *Respiratio difficilis ac subita post prima somni tempora.*
- §. 4. *Pulsus sæpè intermittens.*
- §. 5. *Palpitatio Cordis. Lipothymia.*
- §. 6. *Fluctuatio humoris in thorace.*
- §. 7. *Tussis sicca.*
- §. 8. *Intumescencia scroti & ventris.*
- §. 9. *Manuum exarescentia.*
- §. 10. *Febris præcursor.*
- §. 11. *Brachiorum dolor & Paralysis. Sputum sanguineum.*
- §. 12. *Appetitus saluus.*
- §. 13. *Alvus justo siccior. Urina copiosa & limpida.*
- §. 14. *Mors plerumque subita.*
- §. 15. *Humoris in thorace inventi qualitas.*
- §. 16. *Ejusdem quantitas.*
- §. 17. *Viscerum in hoc morbo ratio. Pulmones male affecti.*
- §. 18. *Glandularum constitutio.*

§. I.

IN pulmone & cavitate thoracis aquam interdum colligi, cæteris corporis partibus aut potius cavitatibus quoad collectionem feri, aut planè salvis, aut secundariò tantùm affectis, seu regionem pectoris, absente etiam ascite & leucophlegmatia, hydrope affici, nemo Medicorum negaverit. Utut autem hydrops pectoris cognitu admodum difficilis sit, verbis Sylvii lib. I. prax. cap. 50. §. 25. atque à Medicorum vulgo non describatur & plerumque non agnoscatur, teste Riverio l. 7. Prax. Med. c. 5. adeò ut etiam ex historiis hydropis pectoris à Schenckio collectis non absurdè Riverius l. c. colligat, eum non nisi post dissecta cadavera ex hoc morbo defunctorum innotuisse, satis tamen frequens in Belgio, ut loco allegato Sylvius, & in oris maritimis, sicuti Kollichen in *Actis Medicis & Philosoph.* Hafnienfi testatur, imò hodiè in Germaniâ, & aliis regionibus haud rarò funesta

funesta diri hujus morbi exempla occurrunt. Ac vel hâc de causâ non plâne nullum operæ fortassis facturi pretium sumus, si, cum hic morbus adeò paucos invenerit scriptores, qui in enodandâ ejus naturâ studium aliquod collocarunt, in ejus indolem paulo accuratius inquisiverimus.

§. 2. Exponenda autem nobis ante omnia sunt phænomena ministerio sensuum circa morbum hunc cognita, cum circumstantiis notatu dignioribus, quæ differentiam ejus juxta locum affectum, tempora & generationis modum explicare aptæ sunt. Præcedit, id quod etiam in Ascite fieri solet, ferè angustia quædam circa præcordia, & molestia, quam ægri verbis convenienter exprimere, aut describere satis vix possunt, nec semper Medicis in proclivi est, conjicere anxietates illas præcordiales minari collectionem aquæ in thorace. Ante sesqui annum ex hydrope pulmonum mortuus Vratislaviæ Gallus in aula Principis pistor dulciarius, qui aliquot ante mortem annis, absque ullâ manifestâ causâ, in admirandas angustias incidebat, ut, quid ageret, nescire se diceret, furibundo similis, periculumque esset, ne sibi violentas inferret manus. Erat autem extra paroxysmum minimè homo tristis & subducti supercilii, quinimò pro festivo suo ingenio ad jocos propensior naturâ erat, quàm fortè deceret, aut nonnunquam expediret. Abunde verò, ea, quæ consequiebantur, nos edocuere, causam ineffabilis illius anxietatis non in hypochondriis, sicut creditum erat, sed in thorace latuisse. Ita civis ille Monspeliensis, cujus cavitatem thoracis Laurentius tenui prærubro foetidissimoque humore oppletam invenit, per triennium melancholiâ laboraverat sævissimâ; conf. Ejus *Anatom. l. 5. quest. 13.*

§. 3. Porro grave patiuntur incommodum circa respirationem, in quo hi ægri iterum conveniunt cum asciticis, asthmaticis, aut alio quodam morbo pectoris laborantibus. Hippocrates *lib. 2. de morb. n. 59. p. m. 84. tom. 2.* ait, eos respirare *αθρόον*, hoc est *acervatim*; quo ipso in propatulo est, significari respirationem *difficilem, crebram & frequentem*, quâ strangulari æger videtur, id quod aliàs in asthmate humido contingere non solet, cujus præcipuum signum meritò statuitur *vehementior ille sibilus ac fremitus, nec non sonus aliquis tanquam spumidæ cujusdam ebullitionis sub respiratione laboriosiori, ac veluti renisus cujusdam in pulmonibus sensu.* Præterea ordinariò in asthmate hâc observatur raucedo, aut asperitas vocis, secus ac fieri consuevit in hydrope nostro, quo affecti voce clarâ animi sensa exprimere possunt, quoad nondum ad extrema perventum est. Facile etiam morbum hunc, de quo jam agimus, discernere licebit ab asthmate humido; modò meminerimus, asthmaticos hujus fortis absque notabili difficultate aërem cum molestia haustum diu retinere posse, ac prolatis multis verbis aërem expirare, id quod hydropici præstare nequeunt, utpote quibus facile non est, spiritum adeò diu continere. Sed an hæc ab aliis affectibus, similitudine & spirandi difficultate hydropi nostro conjunctis,

junctis, morbum hunc infallibiliter distinguere possint, nos ipsimet merito dubitamus. De alio autem, quantum ad respirationem, signo, quo hydro-
pem hunc ab aliis affectibus, quos spirandi difficultas comitatur, secernere licet,
solicitis, non aliud magis certum hâc in re nobis occurrit, quàm respirandi
difficultatem in hydrope thoracis ita esse comparatam, ut ex improvviso pri-
mo somni tempore ægrum opprimat, & quietem ejus interpellat, ac aliquas
tamen inducias appropinquante luce iterum concedat. Ante nos illud egregiè
inculcavit Carolus Piso in *selectis suis Observ. & Consiliis de prætervisis hæcenus*
morbis à serosa colluvie ortis, sect. 3. cap. 7. p. 296. his verbis: *Signum patho-*
gnomonicum statuere oportet eam in spirando difficultatem ac crebritatem, quæ de
subito somni primo tempore invadat, & quiete defraudet, sed tamen procedente
die sensim lentescat; quod suo calculo comprobatur Lazarus Riverius jam alle-
gato lib. 7. c. 5. p. 255. Inter rarissima videtur numerandum, quod de virgine
quadam narratur in *Anat. præct. Boneti l. 2. sect. 1. p. 420.* nimirum ab utra-
que dissecti thoracis cavitate aquæ virosæ lb. iiij. effluxisse, nec tamen orthopnæam
vel dispnæam invexisse. Heredia dissert. 6. de morbor. different. c. 4. quendam se
vidisse refert, qui noctu suffocationis invasiones sic pertimescebat, ut mallet vigiliis
perpetuis consumi, quam ad dormiendum se colligere. Et certe etiam illud experi-
entia nostra in omnibus comprobavit, nuperque illustre nobis præbuit exem-
plum matrona, ad quam intra 14. dies bis ante duodecimam nocturnam in pe-
riculo suffocationis, vocatus est Collega noster D. Christianus Helwich. Se-
cutus enim post illud tempus tumor pedum ipsiusque abdominis, quem mors
excepit, abunde docuit, cujusnam morbi indicium præbuerit difficilis illa ac
intercepta respiratio. Non abs re fuerit, observ. 52. 54. 55. jamjam laudati
Pisonis, ut & observ. 88. in Centur. I. Riverii hic attente legere, Spiritum, quem
expirant hydropici, esse fætentem, adeoque etiam morbum hunc oris fœtore
cognosci, scribit Poterius Cent. 1. c. 2. p. m. 9. modò is sit Poterius, cui tuto
etiam hîc fidem adhibeas, nam teste Clariss. Guidone Patino epist. 1. liber ejus
est *plein de mauvais remèdes, de vanteries, de faussetés*; ipse autem Poterius
fuit *un grand charlatan & un grand fourbe, qui se meloit de notre metier &c.* si-
cuti iterum Patinus loquitur. Hoc certum est, in vomica spiritum, multò an-
tequam rumpitur, male olere.

§. 4. Pulsus non unius quidem generis in hydrope reperitur, sed quod
etiam atque etiam notandum, sæpè est intermittens. Ita Palearii viduæ, quæ
hydrope pulmonis interiit, pulsus magnus, elatus, tardus, intercisus erat, ac
intercalarem habens in pulsatione unâ atque alterâ intermissionem, ut refert Bal-
lonius l. 1. Epidemior. & Ephemerid. p. m. 17. Rodericus Fonseca illius hydro-
pici, de quo Consult. 54. Tom I. agit, pulsus, ait, fuisse valde inæquales. Cele-
berrimi quoque Wepferi, Collegæ nostri, pulsus erat plerumque tardus, in-
terdum inæqualis, sæpius intermittens, unde etiam exercitatissimi Viri animo
suspicio aquæ seu hydropis pericardii, diastolem cordis impediens, altius insedit,
& post mortem in quovis latere thoracis lb. iiij. aquæ limpida fluïtarunt, cui pulmo-

nes coarctati quidem, liberi tamen innatabant, prout narrat gener ejus Excell. Dn. D. Brunnerus in *appendice ad annum 3. Decur. 3. Ephemerid. Medico-Physic. p. 161. § 163.* Et hac experientia fretus jam ante biennium laico ex Soc. Jesu, cum ipsi pulsum suum explorandum exhibuisset, metuendam prædixit prælaudatus D. Helwich diluvium feri in pectore, cum illum & inæqualem & intermittentem deprehenderet, quam prognosin eventus hoc anno comprobavit, qui ei post exantlatas per 4. circiter menses ærumnarum myriades fuit funestus.

§. 5. Non paucis familiaris est cordis palpitatio. Illustre præbet exemplum Divus Maximilianus II. de quo ad rem nostram appositè ejus Archiater Crato in oratione de obitu Maximiliani II. ita loquitur: *In Casare nostro (postquam cor supra viginti annos palpitare sensisset) sanctè demortuo supra duas mensuras aquei humoris in cavitate pectoris relictas conspeximus.* Wepferus etiam, teste Brunnero, sensit cordis tremorem; atque hinc doctissimus Sebizius in *Speculo Medico-practic. p. 892.* signis Hippocraticis palpitationem cordis addit. Cum palpitatione hac cordis sæpè conjuncta etiam lipothymia. Ita Civis ille, cujus supra ex Laurentio meminimus, per mensem integrum, prius quam vitâ fungeretur, *bis in die, levi ac fugaci animi deliquio corripiebatur.* Marchio quoque de Finali, qui in aula Imperatoris exul vixit, & post mortem thoracis cavitatem sinistram aquâ purpurea refertam habuit, tum variis aliis affectibus, tum *scotomia*, quæ cum deliquiis conjuncta esse solet, fuit conflictatus, apud Schenckium *lib. 2. Observ. Med. p. m. 251.* Atque hinc non immeritò Willisius *pharmaceut. ration. cap. 13. part. 2. sect. 1. p. 217.* inter signa diagnostica meminit *crebrorum animi deliquiorum.* Puer ille trimus apud Tulpium *l. 2. Observ. c. 16. p. 128.* qui defunctus Medicorum oculis pectus aquâ plenum obtulit, *frequens animi deliquium passus erat*, id quod etiam de fure ibidem narrat. De juvene scholari vide Willisium *l. c.*

§. 6. Auctâ ferosâ in thorace colluvie ægri conqueruntur de pondere hujus diaphragma deprimentis, unde non potest non spiritus difficilius trahi, quoties corpus est erigendum, aut movendum. Adest etiam in dorso dolor, cujus sedem indice digito demonstrant, illam scilicet partem, circa quam diaphragma lumbis est annexum. Aquarum fluctuatio, inclinato corpore, etiam sensu percipitur. Hippocrat. *cit. lib. 2. de morb. p. 85.* *Si multo, inquit, tempore, aure ad latera adhibita, audire tentaveris, ebullit, intrinsecus velut acetum.* Et hoc fit, cum in pulmonibus aqua hæret, cum vero cavitatem pectoris inundat, veluti *sonitus aliquis percipitur aquosi humoris in utre semipleno conclusi*, Auctore Zacuto Lusitan. *lib. 1. Prax. admir. obs. 111.* Ut autem accuratius ab empyemate discernatur hydrops pectoris, solerter perpendendum, utrum præcesserint morbi, quos alias excipere solet, e. g. tussis ferina, angina, pleuritis, peripneumonia, vomica exulceratio pulmonum, vulnera thoracis penetrantia, concussio &c. Imò nec hic quidem subsistendum est, sed & trutinanda ea, quæ aliàs empyema sequi solent, v. g. dispiciendum, an multus sudor toto corpore fundatur, an post eum æger inhorrescat aliquando, an dolor regionem pectoris afficiat,

an nares inter spirandum arctentur, fiatque per has ducti aëris sibilus, an facies rubicundo colore perfusa, an volæ manuum pedumque plantæ caleant; si hæc aliaque empyematis signa absint, ex gravitate & fluctuatione materiæ in thorace tantò certius hydrops colligi potest. Præter ea *si quid infundas, aut fomentum aut suffitum adhibeas, pus non sequitur, atque ex hoc sanè cognoveris, non pus, sed aquam ibi esse*, ut loquitur Hippocrat. l. c.

§. 7. Cum materia hæc in thorace conjuncta est tussis, eaque fere ἀπυρς, hoc est *sicca & talis*, quâ nihil, etiamsi frequens sit & valida, excluditur. Tumorem, qua exteriora, non meminimus vidisse, nisi in Viro religioso, cujus ante mentionem fecimus, qui latus sinistrum tumidum oculis nostris aliquoties offerebat. Casp. Bauhinus apud Schenck. l. c. p. 252. refert de futuro ex hydrope pectoris laborante, quòd habuerit in *regione dorsi, latere dextro, tumorem carnosum non recedentem à colore cutis, qui, cum à tonsore quodam, postquam emollientibus diu applicatis nihil profecisset, cultello apertus esset, aquam stillavit.* Viri illius quadragenarii apud Fonsecam l. c. p. 374. *hypochondria utrinque fuere tumida.*

§. 8. Illud frequentius accidit, ut successu temporis aqua in scrotum descendat, partesque genitales faciat intumescere. Adhuc superest Vir Illustris, quem omnia indicia probant laborare hydrope pectoris, cujus scrotum immani hydrocele distentum ei oneri erat. Is præ tædio se nuper chirurgus ad compungendum permisit. Eductæ fuerunt iteratis vicibus aquæ propemodum libræ quatuor, ea non veniente in numerum, quæ vi prorumpens circumjecta linthea madefecerat, quæ utique quantitatem illam longè superabat. Id verò notatu dignissimum est, quod scrotum in hoc hydropis genere attollatur in tumorem, antequam vel venter, vel pedes intumescant. Neque enim semel sed iteratis vicibus deprehendimus, quòd jam tumido scroto demum pedes oedematoso tumore corripiantur; unde iterum illucescit, tum ab Hippocrate, tum à nobis alibi etiam in tussiculosis observatus mirificus ille thoracis cum partibus genitalibus consensus. Tumoris autem illius in pedibus notæ, perinde ut in ascite, primum se circa malleolos produnt, dum autem sensim augetur, & ad genua, imò ad femora usque ascendit. Nec verò immune ab hoc diluvio manet abdomen, sed & illud ab aquoso humore indies magis distenditur, quinimo ab eodem etiam ipsa facies tumet. Hippocrat. l. c. p. 85. *Aliqui, inquit, etiam intumescunt ventre, scroto, facie.* Mitigantur per aliquod temporis intervallum molestiæ, quando aquæ effunduntur in abdomen, ac illud tumidum reddunt, ægri etiam sibi de meliori sanitate gratulantur, at verò breve gaudium est, nam, abdomine impleto, symptomata ingravescent. Palpebras inferiores ægri sui fuisse inflatas narrat Fonseca loco jam antecitato. Tumorem manus & brachii etiam in uno alterove vidimus, ut non abs re Doctissimus Vir Petr. Salius Diverfus c. 5. *de affectibus particularibus* p. m. 246. scribat: *Postea manifestè etiam facies & scrotum & venter intumescit, non tantum in thoracem sed etiam omnes has partes effuso,* qui

qui superabundat, aquoso humore, quamvis ei potissimum de hydrope ibi sit sermo.

§. 9. At verò contingit etiam non rarò, ut partes superiores, ipsæ etiam manus, tumentibus inferioribus exarescant. Id quod accidisse focero suo Dn. Wepfero notavit Brunnerus in ejus memoria p. 163. Hûc respexisse Hippocratem loco sæpè allegato p. 84. verisimile est his verbis: *οἱ ὀνύχες ἐλκονται*, *Ungues incurvantur & contrahuntur*, eo ipso nimirum, quòd carnosæ partes, quæ unguibus subjacent, contabescant; unde fieri aliter non potest, quam ut ungues extendantur in majorem longitudinem, & facile contrahantur. Hoc fatum etiam experiuntur tabidi. Consummatorum Phthisicorum & hecticorum ungues fieri *incurvos & longos veluti alitis ungues*, experientia edoctus scribit Francisc. du Port lib. 2. de sign. morbor. Conf. Auctores Biblioth. Anatom. Tom. I. p. 38. in notis ad Malpighii tractat. de Cornuum vegetatione.

§. 10. Præterea hydropem Pectoris ex febre cognosci posse innuit, imò febrim primo inter signa loco ponit Auctor libr. de morbis, qui sub nomine Hippocrat. circumfertur. Si, inquit, *hydrops in pulmone fuit, febris & tussis tenet*. Ac interdum rem ita se habere, experientia convincimur. In illo apud Fonsecam hydropico, *febris quædam lenta aderat*. Piso etiam observ. 54. p. m. 292. in Canonico insignem in hypochondrio utroque, sed præsertim dextro, *tumorem febrì vehementi conjunctum* deprehendit. Peregrinus etiam hydrope hoc correptus in hecticam marasmoden, teste Coitero, incidit. Febricitabat quoque supra memoratus ex Soc. Jes. frater adeo, ut ordinarius Medicus nullum alium morbum, nisi febrim catarrhalem subesse suspicaretur. Primipara quoque illa (de cujus morbo non convenerat Medicis, quamdiu supererat, quem dissectio cadaveris hydropem pectoris fuisse ostendit,) de qua Nicolaus Chesneau Massiliensis lib. 5. obs. 9. agit, *non tantum die ante partum febricitabat, sed etiam ipso partus die cum rigore major invasit & febris eadem, & dolor lateris ad mortem usque perstitit*. Chirurgus ille 45. annorum potui spiritus vini intemperanter indulgens, quivolvendo se de uno latere in aliud exundationem quandam per sentiebat, febrim præter alia symptomata patiebatur apud Pompejum Saccum in Medic. Theorico-Practica Consult. 29. p. 114. & consult. 27. tractat ex professo de febrì cum hydrope pulmonum. Enim verò alii nostro hydrope detenti, à febrì immunes sunt, quod aliquoties observavimus. Pueri etiam illius apud Pisonem Obs. 51. *difficultas inspirandi sensim crescebat æqualiter sine febrì & sine tussì orthopnoicâ*. Petrus Salius Diverfus l. c. p. 246. *Febris, inquit, additur ab Auctore libri de morbis: attamen in his, quos ego curavi, non fuit febris. Sed frivolum est & experientiæ repugnat, quod addit: nec ratione materie, quæ frigida est, & non putrescit, adesse debet*. Fernelius, lib. 5. cap. 11. Patholog. docet, *inesse huic morbo suppurationis signa atque symptomata, nisi quod febris non affligat, aut, quæ Jacotii admonitio est, non adeò acutè, id quod tamen, ut monuimus, experientiæ non est conforme*.

§. 11. Ad cumulum malorum accedit interdum *brachiorum dolor* & *paralysis*, & hanc resolutionem animadversione dignam in Canonico illo ante laudato, censuit Carolus Pifo *p. m. 293.* & ex eo Riverius *p. m. 255.* Sed his signis omnibus adhuc adjiciendum judicamus hoc unum, quòd difficulter frigus tolerare queant, aut quòd facillimè frigeant. Exemplum adhuc hodiè oculis nostris obversatur in Viro Illustri, cujus itidem jam mentionem fecimus, is hoc ipso tempore, cum æstus, quo adurimur, nulli non molestus est, etiam in lecto de frigore conqueritur. Et de Wepfero Brunnerus testis est, quòd *facile friguerit extremis præsertim.* Inter rarissima hujus morbi phænomena est *sputum sanguineum*, quod tamen in Chirurgo illo hydropico *l. c.* observavit paulo ante laudatus Saccus. Id fortassis frequentius contingit, ut sputum sanguinis sequatur hydrops, de quo casu idem ille Vir *Consil. 28.* consilium format.

§. 12. Quantum ad appetitum ciborum, is non tantum in principio hujus morbi, verum & progressu & augmento aliquando salvus, nec sitis adeo enormis existit; at illud experientia hætenus edocuit, quod cibus paulò largiore quantitate ingestus paroxysmum asthmaticum concitet, id quod Wepferus, cujus sæpiusculè jam mentionem fecimus, & senex ille in illustri dignitate constitutus, hoc in passu Wepfero simillimus, multoties expertus est, ac *ille quidem non nisi erectus cibum capere potuit, eumque paucissimum, quamvis appeteret, metu paroxysmi asthmatici, qui comestione quoque concitabatur.* Beatrix illa apud Johannem Chiffletium *obs. 16. p. 14. ante mortem bene cœnaverat.*

§. 13. In multis etiam ex corpore excrementa ritè & debito ordine eliminantur. Reperias, quibus alvus respondet, quamvis nonnullis justo siccior sit, urina copiosa fluit & naturalis, sudores quoque matutini ex voto succedunt. Hoc multiplici experientia nobis cognitum est, quòd urinæ tenues & limpidæ in magnâ quantitate profusæ insultum asthmaticum imminere significant. Pistor ille dulciarius (cujus in antecedentibus meminimus) urinas albas copiosissimas aliquando reddebat, nonnunquam valdè paucas ac bene tinctas, ut non omnino fallatur Clar. Sorbait. *Med. Pract. Tract. 1. cap. 58.* docens, *ejusmodi urinas, si sæpe reddantur, minari hydropem.* Morbo incrementa capiente urina multo fluit parcior & ferè tinctior & crassior. In iis, qui nostro consilio usi fuerunt, fatali metæ proximis, notavimus urinam ex atro rubentem, cum sedimento furfuraceo aut lateritio.

§. 14. Morbus hic chronicus est, & sæpe per annos plures miserè ægros mulctat. Nec, cum eo deventum, ut spes illis nulla supersit, statim moriuntur. Inter gemitus & lacrymas longo tempore spiritum trahunt, quamdiu natura, & ars naturæ æmula, aquæ depletionem per vias feri motui convenientes, alvum, inquam, meatus urinarios, poros corporis cum aliquo successu moliantur. At verò his evacuationibus destitutis, non eodem modo vitæ filum abrumpitur. Aliqui ex improvviso quasi suffocati pereunt. Ita ante aliquot septimanas Vir aliquis, qui per complures annos multoties noctes

vigilando transegerat, ad nuptias profectus, repente suffocatus; & sexagenarius ille apud Blanckard. *lib. 1. Anat. Pract. ration. observ. 98. subito inopinata morte quasi fulmine ictus corruit.* Nonnullos veluti marasmo confectos exspirare experimur. Alius apud Blanckard. *cent. 2. obs. 48.* viribus deperditis obiit, postquam à longo tempore *ἀσπυξία* laborasset. Vidisse meminimus aliquem, qui aliquoties die ante mortem convulsus ferali illâ, quâ mundus erat deferendus, pulchre adstantibus valere visus est, nihilominus repente voce destitutus more apoplecticorum moriebatur. Majori cum tædio ex hac exeunt vita, qui aliquot ante dies fastidio ciborum & vomitibus exercentur, aut aliquando limpidam ore reddunt aquam, quæ argumentum est, ad ventriculum, nescio quibus viis, factæ ferossæ colluviei metastaseos.

§. 15. Et hæc quidem in viventibus partim ex relatione ægrorum, partim ex *αὐτοψία* observantur. His vero addenda sunt ea, quæ in mortuis servitio cultri anatomici deteguntur. Et quidem, si humorem respicias, non eodem modo se habet, qui post mortem in thorace dissecto reperitur. Aliquando aqua reperitur plane liquida, & aquam puram colore referens. Memorabile exemplum occurrit apud Pisonem loco jam ante allegato *sect. 3. cap. 7.* in Canonico illo, cujus universus thorax *aqua pura plenus* inventus, & *in stupenda quidem copia.* Conf. etiam Minchin. *observ. 7. append. ad Fallop. Commentar. in Galen. lib. de ossibus.* In Flandri alicujus thorace *tunica pulmonum arctè utroque latere pleuræ adnata inferiore loco ad diaphragma hydatides aliquot ingentes limpidam aquam repletas formaverat, quæ fontis instar thoracis dextram partem copia aquarum inundaverant, & thoracis hydropem acciverant,* teste Bartholino *Cent. 2. histor. Anatom. hist. 66. p. 291.* Interdum autem mucilaginosa est aqua, ignique admota in gelatinam fatiscit; cujus generis fuit illa, quæ ex juvenis viventis thorace post paracenthesein institutam in præsentia Loweri & Willisii educebatur, nam, ultimi quidem verbis si efferre rem placet, *liquor crassus, ac instar chyli albescentis & quasi lacteus effluebat.* Serum sanguineum tum in aliis multis, tum potissimum Rondeletius in mercatoris cujusdam thorace vidit *lib. 2. method. curand. morb. cap. 24. p. m. 387.* Nonnunquam ad *flavum* nonnihil inclinât, urinæ naturali similis, vel lixivio. Puellæ alicujus septennis *rosalis affectæ pectoris cavitas aqua citrina referta erat* apud Bonet. *cit. lib. 2. p. 427.* Aqua autem illa, quæ replebat pectoris sinistram cavitatem Marchionis de Finali *lixivio substantia & colore similis erat,* ut ex Aicholzii *observat.* refert Schenckius. Aquam *subviridem* notavit Faber Medicus Bavaricus apud eundem Schenckium *p. 253.* Sunt, qui & nigram se vidisse testantur, inter quos est Coiterus. Lympham *ex viridi citrinam* Stephan. Blanckard. *in Anatom. Pract. ration. Cent. 1. obs. 98.* conspexit. Multæ libræ *aquæ spumossæ,* quæ visciditatis indicium præbet, referente Hercule de Saxoniâ *art. 1. c. 26.* inventæ sunt in capacitate thoracis & pulmonibus Viri alicujus ex familiâ Marcellâ. Nec dubitandum de falsedine & acrimonia hujus aquæ.

aquæ. Clariss. Sylvius secuit in nosocomio puellam viginti circiter annorum, in cujus dextra potissimum cavitate aqua copiosa continebatur, ab acrimonia verò illius aquæ pleura & tota superficies interior diaphragmatis exulcerata erant & erosa, ut etiam pus darent, quemadmodum narrat αὐτόπτης Dn. D. Brechtfeld in *Ephemerid. nostris*. Imò acrimoniam hanc lingua adstantium & degustantium confirmavit, cum Borrichius secaret virum triplici hydrope extinctum in *Actis Hassn. Vol. I. p. 174*. Non tantum insigni pollet acrimonia illa aqua, quæ thoracem inundat, sed subinde etiam foetida est. In dissecto cadavere Notarii Parisiensis deprehensa sunt in toto thorace fluctuantis serosi humoris putris & gaveolentis libræ Parisienses X. Nec minus foetida erat aqua illa copiosa puellæ illius, de qua jamjam nobis sermo erat. Subinde etiam eam purulentæ materiæ esse permixtam, omnes historiæ Anatomicæ loquuntur, præprimis illa, quam habet Casp. Bauhinus, & Sal-muth. *Cent. I. obs. 13*. gravis foetor nares feriebat, cum cadaver adolescentis aperiretur, cujus thorax serum copiosissimum profundeabat, pulmonibus hinc quidem vomicis purulentis, isthinc verò caseosâ substantiâ turgidis apud Harder in *schol. observat. Anatom. Pract. § 1*.

§. 16. Serosi hujus humoris quantitas varia est; aliquando aliquot libras æquat aqua in thoracem effusa, ut vel ex antecedentibus patere potest; in latere dextro de Clerck libræ duæ deprehendebantur ex fide Ottonis Heurnii *obs. 6*. Quatuordecim autem libræ, ex testimonio Oethæi apud Schenckium, in futoris cavitate dextra. Interdum vero ita redundat, ut vasa aliquot ænea replere possit. Ex thorace futoris, narrante Bauhino, purulenta materiæ vasa tria ænea effluxere ex latere dextro, cujus lateris pulmo totus in pus abierat, sinistro integro persistente. Nonnunquam utramque cavitatem thoracis replet, ac ab aquarum copia, diaphragma, eâ, qua œsophagus progreditur, parte, in muliere instar sacci versus sinistram renem protrusum fuerat apud Harderum in *apiar. pag. 217*. &, quod mireris, subinde tanta intra specum thoracis congeritur quantitas humoris, ut eo coerceri nequeat, sed ingens seri hujus copia in abdominis capacitatem penetret, quod ante nos in Hippocratem notavit Jacotius, & ante Jacotium ipse Hippocrates *lib. 2. de morbis*. Imò ipsos etiam pulmones replet, ac bronchia occupat, sive pulmo totus sero ejusmodi gravatur & imbibitur, ut Celeberrimo Viro Lucæ Tozzo contigit, experiri in cadavere hoc genere morbi interempto, cui inerat pulmo sero glutinoso ita distentus tumidusque, ut universam pectoris capacitatem occuparet, prout ipse refert in *Medic. Practic. parte 1. p. 309*. & seq. ut non desint, qui cum Hippocrate inter hydropem pulmonis & thoracis distinguendum monent, inter quos etiam nomen suum profitetur Melchior Sebizius in *Speculo Medic. Pract. part. 3. sect. 3. cap. 13*. Sæpe cum hoc pulmonum thoracisque diluvio conjunctus est hydrops pericardii. De Centuplurione placet audire Olaum Borrichium *l. c.* In pectore, ait, novus se calamitatis fons aperuit; enimvero & pulmones parvi, exsuccii, flaccidi, &, si ultimos margines excipias, semiputridi, aquis fædis copiosisque innatabant, &, quod stupori proximum,

proximum, pericardium ita ampliatum distentumque, ut tres libras, & quod supererat, acris turbidique liquoris sinu suo complecteretur; ut hinc discas, non adeò temere abrogandam esse fidem Cornelio Stalpartio van der Wiel cent. I. obs. 36. p. 144 & seqq. ubi memorat, quassationem aquæ in pericardio, in paupercula annorum 17 puella cachectica, pulsante corde foris etiam auribus à se perceptam, cum pericardium alias naturaliter non nisi tantum aquæ contineat, quantum duo vel tria capiunt cochlearia, juxta quosdam; quamvis & hanc non nisi p. II. & sub ultimo mortis articulo demum ob motus cordis impetuosiores ac circulationem per pulmones impeditam fecerni atque colligi; in illis vero, qui confossi & decollati, vel sine notabili circulationis turbatione exspirant, prorsus nullam reperiri, una cum aliis quibusdam asserat ac demonstret Excellentissimus Bohnius de Renunc. Vulner. p. m. 307-309.

§. 17. Tribus verbis, post aquam examinatam, edisserendum, quomodo viscera sint in hydrope hoc constituta. Primo autem statim loco se nobis obijciunt pulmones, qui ut plurimum male affecti. Pulmones Wepferi coarctati, liberi tamen innatabant aquæ, nonnihil inflati, ut inspirando potius quam expirando videretur exspirasse. Duros, siccos multi deprehenderunt. Scirrhosos seu callosos notavit Minchinus; retorridos & multo purulento tabo prægnantes & alterum è pulmonibus ferè totum torrefactum reperit Carolus Piso sect. 3. c. 8. Tubercula & hydatides jam Hippocrates advertit, & post eum plures alii. Apostematibus obsessos ex parte consumptos & corruptos observatores tradunt. Harderus observ. 51. de femina quadam 18 annorum p. 215. scribit: Pulmo dexter undique costis pertinacissime adherens ac connatus, sinister verò paulo minus totus absumptus erat, cavitas autem tota lateris sinistri humore subviridi instar stagnantium longaue mora vitiatarum aquarum referta viscebatur ad mensuram circiter jls. In cujus humoris ima parte subsidentia crassa ac subalbida verum scilicet pus aderat. Quod verò de pulmone sinistro supererat, exile *κόλλωμα* fœtidis ulceribus variè conspersum fuit: H. I. Viri illius apud Blanckardum l. c. p. 265. pulmo sinister prorsus putridus erat; & rursus mulieris illius apud Harderum pulmones planè erant putredine consumpti. Etiam sphacelatos Edmundus de Meara in histor. Med. varior. p. 136. vidit. Vicinæ quoque pulmonibus partes à labe immunes non sunt. Nam passim legere est, pleuram crassam & callosam fuisse, iisdemque vitiis laborasse mediastinum, septum transversum &c. Pericardium suos itidem patitur manes. Substantia ipsius in cadavere Klerckiano, ut Heurnius sua nobis mutuè verba, potius carnosam, quam membranosa erat, & sextuplo naturali crassior, firmiterque cordi annata, ita, ut digitis ab ipso sine dilaceratione separari non posset. Ac notatu dignissimum est, quod Clariss. Tubingens. Prof. Zellerus in milite præsidario, hydrope pectoris defuncto, pericardium totum invenerit repletum granulis lentium magnitudinem æquantibus, unde tunica ejus interna tota aspera fuit reddita, etiamsi uncias undecim aquæ contineret. Serpit labes etiam ad ipsum vitæ fontem cor, cujus vasa subinde nigro sanguine

ne repleta sunt. Wepferi cor, juxta conum intertrigine notatum & rubicundum fuit; thalamus cordis sinister cum sanguine sincero, fluido, paucos grumulos continuit. In basi cordis juxta arteriam pulmonarem ossea substantia occurrit secanti. Aorta etiam pone valvulas semilunares ossea asperitudine intrusos offendebat digitos. Hæc Brunnerus, cujus etiam reliqua de ossificatione aortæ digna sunt, quæ in Practicis & legantur & expendantur. Viscera in abdomine aliquando plane naturalia reperiuntur, ut in Klerckiano cadavere, excepto solo omento, quod marcidum nigricabat, & folliculo fellis, in quo tres erant calculi. Canonicus ille, cujus ex Pisone aliquoties mentionem fecimus, habuit Hepar tumidum, induratum, retorridumque & pumicis instar hiulcum, ac poris distinctum. Aperto cadavere Centurionis à Borrichio deprehensus fuit lien juxta magnitudine quadruplo auctior, durior naturali temperie, & nigra quâdam amurca hinc inde distentus. Per multorum quoque experientiam constat, renes exulceratos & putridos in his hydropicis fuisse deprehensos. Ventriculus & intestina non minus in confortium mali trahuntur. Et ut jam non dicamus de variis primarum viarum vitiis, vero perquam simile est, in toto hoc canali aliquando aquam fluctuare, quod in hydropico observavit Costerus.

§. 18. Raritas Observationum Ottonis Heurnii, quæ Operibus Fernelii subjunctæ sunt, suadet, ut pluscula hic ex histor. X. p. 8. excerpamus, quæ egregiè declarant, quomodo glandulæ hydropicorum nostrorum in toto corpore constitutæ sint. Secuit Vir doctissimus puellam 14 annorum Leodiensem, cujus thoracis pars dextra, ut & abdomen citrini coloris aqua repleta erant. Pericardium etiam tantâ ejusdem aquæ, sed paulo candidioris, copiâ turgebat, ut ad scalpelli ictum cum impetu profileret. Mesenterium, omentum, pancreas innumeris, magnitudinis notabilis, strumis scatebant. Imò ipsi peritoneo, diaphragmati, mediastino, uterique ligamento plures insederant, aliæ quidem castaneæ, aliæ nucis avellane, aliæ ciceris magnitudine. Ad orificium ventriculi superius notavit duas glandis quercinæ magnitudine & effigie. Trunco venæ portæ una magna incumbibat. Jecur, lien, pulmo, præter strumas majusculas, quas hinc inde obtinebant, tota interius exteriusque, quasi grandine conspersa erant. Multa etiam milii coriandrique granum vix superantes in intestinorum tunicis conspici poterant, ut & in singulis renibus hujusmodi minuta unica. In duræ meningis parte dextra, unam quoque pisi magnitudine reperit, quæ cranii interiori tabulæ adhæserat, & in ea cariei rudimenta excitarat. Materia, quæ in illis continebatur, erat serosa, & uberi vaccillo ovilloque non absimilis. Hæc & alia memorat Heurnius l. c.

CAPUT II.

De Causis Hydropis Pectoris.

SUMMARI A.

- §. 1. *Fontes Morbi. Sanguinis ebullitio.*
- §. 2. *Vasa in thorace disrupta.*
- §. 3. *Non autem succus nervorum.*
- §. 4. *Sed humor ex vasis lymphaticis in thoracem depluens.*
- §. 5. *Serum ex vasis in cavum pectoris exsudans.*
- §. 6. *Ductus chyliiferi intra thoracem diffracti.*
- §. 7. *Causa extravasationis lymphæ unde querenda sit.*
- §. 8. *Vitia vasorum lymphaticorum aliorumque viscerum.*
- §. 9. *Rationes, unde sanguis serum ex vasis suis in cavitatem pectoris dimittat.*
- §. 10. *Vasorum ossificatio.*
- §. 11. *Chylus ex ductu thoracico effusus.*
- §. 12. *Hydrops pericardii.*
- §. 13. *Vitia viscerum specialiora.*
- §. 14. *Quænam temperamenta hydropi pectoris apta sint.*
- §. 15. *Molestia & gravativus præcordiorum dolor.*
- §. 16. *Pulsus inequalis & subinde intermittens, unde oriatur.*
- §. 17. *Lipothymia ortus.*
- §. 18. *Tussis unde?*
- §. 19. *Febris hydropicorum comes.*
- §. 20. *Frigus exteriorum partium in hydropicis.*

§. I.

ORdo postulat, ut hujus morbi ortum & generationis modum investigemus. Ac cardo rei in eo versatur, ut fontes illos recludamus, unde humor ille serosus, qui in thorace colligitur, & collectus hydropem pectoris excitat, plerumque scaturiat. Non defuere eruditi medici, quos inter & Willisius est, qui, cum attente perpenderent, sanguinem in præcordiis vehementius effervesce, non improbabile censerent, ab ebullienti sanguine copiosos excitari vapores, ac hos, si exhalatio eorum impediatur, in claustro hoc velut sub alembico conclusos, in aquam condensari, quæ sensim accumulata hydropem hunc gignat. At verò pace tanti Viri causa hæc nimis est communis & generalis,

neralis, & ea posita certe non ponitur hydrops; ac profect, si hoc modo generaretur hydrops, mirum esset, quomodo vel ullum ex animalibus respirantibus, in quibus effervescentia sanguinis in præcordiis omnino vehementior est, ac per consequens major vaporum generatio ab hoc affectu ad aliquod tempus immune degere posset?

§. 2. Porro cum his temporibus liquidum satis sit, nec à capite per trachæam descendere quicquam in cavitationem pectoris, quamvis aliàs capitis & pulmonum *sinthimoniam*, per quam mutuas tradunt operas, in eorum *perniciem* à Dureto celebratam non ignoremus; viæ item ab hepate & liene ad specum thoracis cimmeriis tectæ sint tenebris; non aliud restat, quàm ut ex apertis & disruptis vasis & ductibus, qui in thorace reperiuntur, humorem serosum in cavitationem pectoris excidere, & hydropis hujus auctorem esse, pronunciemus. Præter nervos in thorace reperiuntur vasa sanguifera, lymphatica & ductus thoracicus. Ex anatomicis brevi repetere fas sit, ductum hunc *cisternæ*, sive *communi chyli* & *lymphæ ex inferioribus* & *vicinis partibus advectæ receptaculo continuari atque per longitudinem thoracis extensum desinere in venam subclaviam*. Bartholomæus Eustachius summæ industriæ & solertiæ Anatomicus in tract. de vena sine pari antigr. 13. vocat propaginem magnam albam (à chylo nimirum) & aquei (sive lymphatici) humoris plenam, cujus exactiorem notitiam Joh. Pecqueto, Biepæo aliisque debemus. Thoracicum ductum respiciunt etiam lymphatica, quibus *pulmonalis tunica*, stupendo planè modo obsessa est, variisque compositis insulis ac anastomosibus glandulæ unius atque alterius interventu eundem ingrediuntur. Neque suis destituuntur lymphaticis spatia intercostalia, ac lympham suam semper ferè intermediis glandulis in venas jugulares deponunt, quemadmodum observavit, qui de lymphaticis præclare meritus est, Antonius Nuck in epistol. Anatomic. de inventis novis; idem etiam cordis superficiem externam frequenti lymphaticorum numero stipatam vidit. Cum verò tot vasa lymphatica reperiantur in thorace, non est dubitandum, quin magna ibidem præsto sit glandularum conglobatarum multitudo, quibus ex sententia Malpighii (in curiosa epistola Regiæ societati Anglicæ dicatâ de structura glandularum consimiliumque partium) lymphatica vasa appenduntur, intimumque cum illarum substantiâ commercium habent, quamvis Clar. Nuckius & Peyerus exercit. 25, p. 141. credant, quòd illæ glandulæ lympham & vasa prius admittant aliunde venientia, quam emittant. Non ignari quidem sumus, quòd fatum glandulis à summa industria Ruyfchii, Anatomicorum nostro seculo Principis, aliqui metuant, qui non obscure omnes ex corpore proscribere videtur; nihilominus æquum esse judicamus, receptæ inhærere doctrinæ, dum certiora experimenta, quàm quæ hactenus in epistolis ejus problematicis adducta fuerunt, nos in illius Viri castris militare jubeant.

§. 3. His præsuppositis evidens est, humorem, qui hydropis in thorace causa est, ex nervis nequaquam scaturire, cum à recentioribus non paucis succus nervosus prorsus rejiciatur, ut Nuckius

in

in tract. de ductibus oculorum aquosis, non dubitet asserere, nemini adhuc contigisse, quod quidem sciat, liquorem nervaceum examinare & nervis abscissis nihil prodire humoris. Et licet omnino res ita haberet, sicut Malpighius in operibus posthumis p. 39. scribit: quod *sectis extremis nervorum tubulis, ubi in ultimas solvuntur propagines, succus erumpat*: & quod *nervus ex tribus vel quatuor fistulis coagmentatus*, cujus generis in cauda bovis reperitur, vulneratus ploret succum, qui *terebinthina instar fluidus & glutinosus sit*; præter multa alia tamen cogitandum, tam exiguum hujus humoris, si modò ullus omnino detur, esse quantitatem, ut cavitas thoracis eo ipso, prout in hydrope fieri solet, inundari nequeat. Necesse ergò est, ut vel ex vasis sanguiferis, vel lymphaticis, aut ex utroque vasorum genere, ferofus ille humor in pectoris cavitatem effundatur.

§. 4. Quodsi in memoriam nobis revocemus, qualisnam reperiatur humor in defunctis ex hydrope, nimirum sæpè numero *purus & limpidus*, aquam colore referens, aliquando vero *mucilaginosus in gelatinam abiens*, absque tergiversatione affirmandum erit, illum ipsum ex vasis lymphaticis in thoracem depluere. Nam ex Physiologicis constat, lympham esse *pellucidum humorem*, qui à *variis partibus membranaceis, musculosis & glandulis per transparentia & peculiariora vasa, tanquam aquæ ductus, fluit ad sanguinem*, aut si vasa ipsa læsa sint, ac iter hoc impeditum, in cavitatem pectoris &c. labitur. Nec illud quenquam latere potest, lympham suis elapsam canaliculis & à frigore gelatinæ instar congelascere, & igni admotam in gelatinosum abire humorem. Hunc naturalem colorem sæpè lymphæ vitata exuit. *Viridem & luteam* observavit Marcellus Donatus, Guarinonius *flavam in nigrum vergentem*; quoties sub cute stagnat, ut plurimum *cineritii coloris* deprehenditur, eam subinde esse foetentem, vel salivam, quæ utique magnam cum lymphæ habet affinitatem, scorbutici illius Hamburgensis evicerit, de qua Dolæus in *Ephemerid. Dec. Ann. 9. 10. observ. 131.* consulatur. At ejus generis humorem in cavitate thoracis post mortem in hydropicis reperiri, *cap. præcedent. §. 15.* retulimus. Eam quoque esse acrem, salivam, acidam, evincit in hydropicis pruritus, & in aliis scabies, ut vel exinde intelligas, quisnam fuerit humor acer in puellæ thorace à Sylvio inventus. Admodum verò est credibile, quod humor ille copiosius congestus, nec exitum in peripheria corporis nanciscens, adjuvante calore & obstetricante teneritudine partium per transudationem ex lymphaticis ferè in cavitatem pectoris stillet. Præterea lympham etiam ex glandulis disruptis in cavum pectoris ruere, edocti sumus à Bartholino *cent. 2. hist. Anatom. hist. 66.* testante, quod *hydatides, fontis instar, dextram partem copiam aquarum inundaverint*. Probat hoc Willisius optimè exemplo adolescentis, immodicis corporis exercitiis dediti, qui primo *in thorace plenitudinem, seu velut inflationem persensit, ut pulmonis latus sinistrum intumescere & cor extra locum suum protrudi videretur*; post aliquod verò temporis intervallum quodam die *vasis intra thoracis cavitatem disrupti sensum habuit, ac deinde per semihoræ spatium, in regione ista, humoris, velut ab alto in pectoris fundum cadentis, stillicidium ipse percepit,*

percepit, quod etiam ab adstantibus audiri potuit. Hoc ipsum & Hippocrati perspectum fuit, nam is, colligitur, inquit, aqua in pectoribus ex tuberculis in pulmone ortis & ruptis: Quod sane sensibili experimento in bove & sue demonstrat lib. de intern. affect. his usus verbis: quod autem etiam fiat ex tuberculis inter cutem, testimonium habeo & in bove, & in cane, & in sue. Nisi forte quis mallet affirmare, hydatides esse vasa lymphatica propter diuturnam extensionem, bullarum aut vesicularum habitum induentia.

§. 5. Præterea non absurde idem Willisius censet, quod serum etiam sub propria forma è vasis exsudet in cavum pectoris; cum experientia abunde confirmet, quod sanguis aquosus & debilis serum superfluum à compage sua passim dimittat, & ex laxis & patentibus arteriarum osculis ejiciat, & filo circulationis excludat, unde facile fieri potest, ut, tum aliæ cavitates, tum pectoris regio diluvium ejusmodi patiatur. Tanto autem est probabilius, quod hoc ritu interdum hydrops pectoris generetur, quanto est certius, ac alibi etiam à nobis observatum, quod in partibus subcutaneis vasa sanguifera nec cæsim, nec punctim læsa, ob sanguinis vitium ac propriam imbecillitatem subinde referentur. Et licet hanc feri cumulationem vel sanguinis, vel vasorum sanguiferorum vitio factam illustret hydrocephalorum historia, ac Wepferi diligentia, in doctissima Exercit. de loco affecto in apoplexia; extra omne dubium tamen illam in nostro negotio ponit ipse humor, qui in thorace post mortem aliquoties repertus est, nempe vel sanguineus, qui de fonte, unde fluxit, testatur, vel etiam loturæ carniū recens maceratarum similis, identidem indicium præbens sui ex vasis sanguiferis prolapsus; nam extra controversiam est, falli Charletonium, qui hunc colorem lymphæ naturalem esse arbitratur. Cæterum ille serosus affluxus contingit vel per ἀναστόμωσιν, referatis extremis vasorum capillarium osculis; vel per διαπύκνωσιν in cachymica & scorbutica corporis constitutione, quando sanguis tam tenuis & serosus est, ut pars aquea alveo vasorum contineri nequeat; vel tandem per διαίρεσιν, ac in specie διασπορῶσιν, continui solutionem ac erosionem, cum tota massa sanguinea acribus ac corrodentibus humoribus scatet. Nisi fortè præstet ingenue fateri, quod modus profluxionis feri ex vasis sanguiferis ac lymphaticis accurate determinari nequeat, & non multum intersit, sciatne illum Practicus, an ignoret. Enim verò non juvat hæc prolixius persequi, cum non tam urina, lacrymæ, sudores &c. sed & morbi quidam e. g. catarrhi, diarrhæa serosa, arthritis &c. comprobent, quam facile serum à sanguine segregetur, quod & multis aliisque clarissimis documentis probat Carolus Piso in doctissimo opere de serosa colluvie. Quod, cum in toto corpore, omnibusque ejus partibus fiat, nihil quicquam obstat, quo minus etiam in pectoris regione, in hydrope thoracis fieri credamus.

§. 6. Ulterius doctissimus Willisius non dubitat, quin *hydrops pectoris etiam à ductibus chyloferis intra thoracem diffractis excitari possit*; attamen addit, *hunc casum tam rarò contingere, ut eum hætenus neque ex propria observatione, nec aliorum relatione cognoverit*. Et profecto quamvis non adeò frequenter illud contingit, extra controversiam tamen est, quòd ductus thoracicus obnoxius sit iis malis, unde alias vasa rupturam patiuntur. Interdum enim ductum hunc vehementer extendi, vel solus compressivus dolor in dorso nutricum fecerit manifestum; hic autem non aliam forte causam agnoscit, quam nimiam vasorum lacteorum, & ductus thoracici ex abundantia chilosæ materiæ tensionem, quod ex curâ patet, quæ moderatione victus & abstinence ab euchymis felicissime peragitur. Obstrui etiam subinde ductum thoracicum, facile conceperit is, qui exacte trutinaverit, quòd non amplo hiatu, sed sex septemve exiguis foraminulis, quæ facile obstrui possunt, in subclaviam sinistram pateat. Sed quicquid etiam de hac re fuerit, illud certum est, quod, undecunque demum derivetur, sive ex lymphaticis, sive sanguineis vasis, aut etiam ductu thoracico, ferofus humor, quem diximus esse auctorem hydropis, non confertim sed sensim cumuletur, ejusque aliqua quantitas sæpè diu in thorace sit, & nullas molestias excitet, ac præterea obscura sui indicia præbeat; cum autem, ut fere fit, per continuum affluxum, velut torrens aliquis crescit, & stagnando vitium capit, acriorque redditur, non potest non & tussim siccam producere, tandemque etiam respirationis negotium pro modulo quantitatis turbare. Quando vero tandem ita acutus, ut pectoris cavitate amplius contineri nequeat, pulmones comprimit, & hac compressione hominem subito interficit.

§. 7. Causa vero extravasationis lymphæ & feri sanguinei, quærenda est, vel in humoribus, vel in vasis ac visceribus, vel in utraque classe simul. Et ut de effusione lymphæ prius loquamur, meritò quidem hic accusatur *lymphæ spissitudo major*, quæ impedit, quo minus tum à propriis, tum à sanguineis vasis resorbeatur, & ad fontem sanguinis commode reducatur. Spissa hæc lymphæ initio obruit teneriores poros ac meatus, eorum robur insigniter, nimia humiditate enervat, ac ad continui solutionem disponit, atque rupturæ ansam suppeditat, dum stasi hac insignem acrimoniam & salsedinem acquirit, quamvis appellentis lymphæ nova semper unda veterem trumat, ut, vel lentiores stagnantis partes ex laxioribus porulis, vel tota, exprimantur. Mucida vero tum potissimum fit lymphæ, quando non debite à sero falso & pingui, quod multis partibus mucidis scatet, in organis secretioni huic, & sequestrationi dicatis, inter quæ principem locum tuetur Hepar, secundum vero viscera glandosa, segregatur, id quod tamen omnino erat necessarium, cum ex legibus sapientissimi Creatoris cuivis notum sit, non debere esse perpetuum lympham inter & serum connubium, sed lympham quidem solam in vasis

lis lymphaticis absque conjugio feri, placido motu ferri ac demum affundi latici vitali, ut in arteriis, tanquam in thoro, amice cum sero commisceatur. Remora, ut jamjam innuimus, huic sequestrationi ponitur potissimum in hepate, quando pori ipsius, quibus separatio fit, notabiliter læsi sunt, unde fit, ut vitia hepatis & in ascite ac in hydrope thoracis post mortem varia subinde reperiantur, nec adeo absurdum sit, fontem humoris serosi, in thorace stagnantis, in cavitate abdominis quærere. Augetur autem malum hoc indies, quando mucida feri dyscrasia, neque per transpirationem neque per urinam defæcatur ac fluxibilior redditur. Inter evidentiores spissitudinis lymphæ causas non postremo loco numeranda est aqua frigida æstuante corpore affatim hausta, quæ serum & lympham congelat. Prosper Martianus doctissimus Hippocratis interpres in *lib. 2. de morb. sect. 3. p. 182. seqq.* verba Hippocratis *lib. de intern. Affect. sect. 2. vers. 76.* *Hydrops ex his fit, cum æstatis tempore siti vexatus aquam multam biberit (nam ex his maxime fieri solet) & pulmo repletus fuerit, rursus ad pectora dimittit &c.* ita explicat, quod portio potûs in ipsa deglutitione in arteriam asperam delabatur (quod sensibili experimento *lib. de corde v. 14.* confirmavit Hippocrates) pulmones verò sive ob humoris copiam, sive propriam imbecillitatem, aquam hanc superare nequeant, unde temporis progressu humor ille ab ipsis pulmonibus in pectoris cavitatem fundatur, sensimque & thorax & pulmo impleatur. Cujus sententiæ examen aliis relinquimus, quibus sufficit annotasse, quod & alibi Hippocrates sc. in *lib. de aëre, aquis & locis, aquas palustres, stabiles & lacustres tanquam hydropis βαρυδιδασκὰς* genetrices *textu XI. p. m. 338.* damnet. Et alibi etiam ex ejusdem Coi decretis frigida pectori inimica esse novimus. Aër etiam frigidior hic symbolam suam confert, ut Julius Cæsar Benedictus in *Consult. 44.* inter hydropis pectoris, quo Germanus ejus frater laborabat, causas evidentes non abs re referat *p. 185. malam vivendi normam & frigoris admissionem.* Hoc tempore in Germania omni, ac in Silesiæ Metropoli multo plures ab ingurgitatione aquarum, quas vocant, vitæ, hydropem incurrunt, quàm à frigidæ aquæ potu, non obscuro amplius generationis modo, postquam Illustris Boyle dexteritate in *historia sanguinis* experimento 8 innouit, quod spiritus vini alcoholisatus, sero sanguinis affusus, illud in coagulum, seu offam candidam, mutet, & ita ad stagnandum disponat.

§. 8. Non solus autem lymphaticus humor, sed & ipsa, in quibus fluit, vasa fundum calamitatis præbere possunt, & reipsa præbent; quamvis vitia vasorum præter nimiam angustiam ac laxitatem in extremis majori ex parte adhuc sint incognita. Angustia autem illa, vel à naturali conformatione ac primo ortu dependet, vel morbi productum est, vel tandem ab aliquibus comprimentibus & constringentibus inducitur, e. g. humoribus varii generis inflammatoriis, scirrhis, præternaturalibus circa viscera con-

cretionibus, &c. Inter hæc etiam medicamentis adstringentibus omnino locus est assignandus, quia hoc tempore neminem latere potest, quam facile febribus, more empiricorum, ope adstringentium validorum, cohibitis hydrops succedat. Nec defunt exempla eorum, quibus hæmorrhagiarum impetuositas adstringentibus suppressa hydropem peperit, ut amplius dubitari nequeat, quia vasorum lymphaticorum vitium sæpe inducat hydropem, quod & Carolus Piso agnovit, ratus, hanc frequentiores esse hydropis causam, quam ipsam feri seu lymphæ dyscrasiam. Id certum est, quod hydrops ex vitio vasorum ortus, brevi tempore vehementer invalescat, ac difficillime curetur. Cum vasorum vitiis cohærent etiam vitia tum aliorum viscerum, quæ motum lymphæ turbant, tum pulmonum, quos non una labe deformes in hoc morbo ab anatomicis deprehensos, sed vel duritie, scirrho, tumoribusque aliis ac vomitis obsessos, capite præcedente, narravimus. Illa etiam loborum pulmonis cum pleura cohæsiō, undecunque ortum trahat, obicem lymphæ motui omnino ponit, quamvis non statim hydropem pectoris producat, quod à nonnullis Medicis statui probe recordamur. Liceat hîc cum venia Lectoris duo à D. Helwich visa exempla recitare. Herula Illustri stemmate in vicino Poloniæ regno nata, in flore ætatis constituta, quæ vix ex morbillis evaserat, circa festum Pentecostes, ex improvise in aphoniam incidit. Vocatus Medicus statim adest, exhibet liquorem C. C. succinat, in potioncula ex ∇ . fl. til., tunic. epilept. L. syrup. de stœchad. & fl. pœoniæ, postquam tribus horis hoc medicamento usa esset, blande adstantes affatur, sed brevi post iterum linguæ usus ei intercipitur ac horribilibus convulsionibus concutitur, vomit etiam varia. Per absentiam ordinarii vocatur alius Medicus, aperitur vena, vesicatorium applicatur, exhibentur remedia generosa omnia frustra. Tertio die moritur. Aperitur cadaver, in abdomine omnia viscera sine labe erant, cum ad mediam cavitatem perventum, pulmonis lobus dexter firmissime pleuræ adnatus erat, cæterum pulmones cum corde ritè constituti. In cavitate thoracis ne gutta quidem humoris deprehendebatur. In capite vasa sanguinis sine ulla extravasatione præternaturaliter distenta erant. Vir quinquaginta annos natus, temperamenti cholérico-melancholici, adhuc adolescens, divinius ac sacratius vitæ genus elegerat, utpote qui ex ambone ultra XX. annos ad populum cum fervore insigni verba fecerat, ac diligentiam in decantandis divinis in choro laudibus in se desiderari non fuerat passus. Nec fuit per multorum annorum intervallum, cur de valetudine adversa adeo conquereretur, nam & avidè appetebat cibum, vinique haustu suas, si quas haberet, curas leniebat, nisi quod post 5 à prandio, & septem vel octo à cœna horas, titillationem in gutture experiretur, ac tussi, qua viscidum ac glutinosum phlegma in insigni copia rejiciebat, impetuosiori & sæpè per duos horæ quadrantes molesta, vexaretur. Nihil non egerat, ut invisum sibi malum

malum ex corpore proscriberet. Frustra V. S. adhibuerat, frustra nodulis & aliis purgantibus usus ac emeticis, nec ullum ex syrupis eclegmatibus & potionibus saccharatis, quarum alias amantior erat, emolumentum reportaverat. Quinimo crevit diuturnitate temporis malum, & ad cumulum miserationum ejus, autumno præterlapsi anni, bis accessit febris intermittens tertiana, cujus vis exhibitis tantum duobus aut tribus pulveribus salinis & laxanti frangebatur, hinc sibi redditus, ut ad functiones suas iterum rediret. Sub finem autem autumnus denuo omnia in pectus ruebant, aucta tussi & accedente calore hectico, vires, quæcunque etiam remedia opponerentur, gravissime atterebantur, tametsi per aliquot horas somnus eum, ut aiebat, placidus singulis noctibus refocillaret, & diurno tempore ter, majori, quam ægri morbus ferre videbatur, appetitu & copia cibum sumeret. Ultimo accedebat tumor pedum oedematosus, sitis augebatur, & expectoratio indies erat difficilior. Tandem confectus febre hectica Creatori animam reddidit. Placuit Plurimum Reverendo Domino P. Michaeli Hoffmanno ad S. Matthiam Priori dignissimo, in absentia Reverendissimi Domini Prælati, Domini Michaelis Fibi-geri, Patroni Nostri, ut aperiretur cadaver, ac in causam morbi inquireretur. Factum illud est in præsentia D. Christ. Helwichii, Virorumque Nobilissimorum Dn. D. Eggerdes & D. Gottofredi Klaunig. Venter erat papyraceus (ut mirum sit, quomodo cibum in tanta copia ingestum concoquere potuerit) ac planè vacuus; Hepar gravissimè læsum erat, aridum illud & planè siccum reperiiebatur, ac levi digitorum tactu in partes fatiscebat. Lien atris maculis distinguebatur. Glandularum mesenterii & ipsius pancreatis notabiliores læsiones, quod mireris, non licebat observare. Aperto thorace, pulmo arctissimè annexus erat costis, sed iterum nullum extravasationis lymphæ aut feri indicium præstato erat, forte quòd viscida lymphæ à vasis prolapsa in membranularum consistentiam adjuvante calore transformata esset.

§. 9. Sed è diverticulo in viam nobis iterum est redeundum, & discipendum, unde fiat, ut sanguis ferum ex vasis suis in cavitationem pectoris dimittat. Absque ambagibus autem ut rem expediamus, non possumus non vitium agnoscere vel in ipso sanguine, vel in vasis sanguiferis, & connexis visceribus, aut iterum in ambobus simul. Quantum ad vitium sanguinis, sit suus sane acrimoniæ ac salinæ potentia in nocendo locus, primas tamen in noxio hoc officio sibi vendicat partes insignis ejus visciditas, obstructionum mater. Hæc autem visciditas oritur à dyspepsia ob cruditates admixtas, ac iners, quodcunque tandem illud fuerit, menstruum; ab incongruis in duodeno ac reliquo intestinorum volumine admixtis liquoribus, depravatam chyli à facibus secretionem efficientibus. Rectè etiam accusare possumus amurcæ ad sanguinem transitum, segnioremque in sanguine motum ac factas hinc inde in visceribus stagnationes ac inflammationes, quas promovent variæ viscerum constitu-

constitutiones &c. Non patitur locus hic, ut alimentorum & rerum non naturalium noxia in hoc effectui servitia enumeremus; non tamen iterum dissimulare possumus noxam aquarum vitæ, cum spiritus vini vis coagulatoria sanguinis evidenti experimento declarata sit à Celeberrimo Bohnio in *Act. Eruditor. Lipsiens. Ann. 83. Mense April. p. 153. & seqq.* Id vero ante omnia notandum est, quod impeditus lymphæ motus, aut ejus in cavitationem aliquam effusio visciditatem in sanguine vehementer augeat, ac stagnationes in vasis sanguiferis promoveat. Constat ex ratione & experientia, quod sanguis venosus decies crassior sit sanguine arterioso, eo quod vel decuplo plus lymphæ arteriæ contineant, quam venæ. Necessarium ergo erat, ut sanguis intra venas dilueretur, quo in cor refluere posset; atque hunc in finem providus opifex rerum Deus in truncum infernum supernumque vasa lymphatica largiter est corrivatus. Quodsi vero ipse lymphæ motus retardetur aut humor ille lymphalis propter effusionem in cavitationem aliquam non convehatur ad sanguinem venosum, hic necessario ob defectum dilutionis crassior erit. Crassities autem ejus fons erit tum aliorum malorum tum stagnationis & obstructionis, quæ tamen sano sensu est explicanda, ne cum circulatione sanguinis pugnet. Ab obstructione autem hac viscera fiunt coacta ac compressa, pristinamque molem amittunt, quod & in glandulis contingit, quæ obstructæ subinde plane marcescunt & viæ sunt. Pulmones ipsi, utut prius ampli & extenti sint, sæpè redduntur usque adeo tabidi & arctati, ut vel ab ipsis Medicis ægre agnoscantur, id quod & de hepate ac liene obstructis est affirmandum. Ubi verò vasa sanguifera in angustum ambitum compinguntur, ut sanguini com meatum liberum non relinquant, non potest non serum à sanguine separatim profundi, id quod ex experimento Clariss. Loweri ad oculum patet. Quia rem præsentem mirè illustrant, aliqua ex c. 2. doctissimi operis *de corde*, item de *motu & colore sanguinis* p. 82. ab ipso mutuabimur: *Haud pridem, inquit, venas jugulares subducto iis filo in cane arcte ligaveram, & post aliquot horas, partes omnes supra ligaturam mire intumescebant, & intra duos dies canis quasi angina suffocatus periit. Toto hoc tempore non solum lacrymæ copiosius fluebant, sed & plurima saliva ex ore, non aliter, quam si ab assumpto & io fluxus ille concitatus fuisset, post obitum cutem ejus à partibus tumefactis separavi, atque expectavi, ut partes tumefactæ sanguine extravasato turgerent, sed aliter omnino evenit, quippe nullum vestigium aut colorem fere sanguinis observare potui, sed muscoli omnes, & glandula sero limpidio maxime distenta & admodum pellucida apparebant, quod clare arguit, ex constrictione venarum serum utcunque secerni.* Hæc & alia ad rem nostram facientia tum in pag. anteced. tum sequenti habet Lowerus. Et hac ratione, dum visciditatis sanguinis causas indagamus, simul cognoscimus, quomodo ipsa vasa sanguifera ad profusionem feri, & cum sanguine & vasis ipsis lymphaticis mutuas jun-

gant

gant operas, dum & ipsa & iis connexa viscera glutinosa inferciuntur sanguine, quod fieri solet in hydrope pectoris, sicut id exemplo constat viri illius, cujus supra ex Blanckardo meminimus, nam expresse p. 265. scribit, quod *in arteriæ magnæ initio quidam sanguinis grumi adfuerint; & à sanguine hoc grumoso pulsus defectum à nobis ante observatum idem Auctor deducit.*

§. 10. Non tantum autem hæc unica ratione, quam jam commemoravimus, motui sanguinis remoram injiciunt vasa ipsa, in quibus vehitur & ad stagnationem ac ad hydropicam feri profusionem disponunt, sed multis aliis modis, dum dilatantur, amputantur &c. peculiari prorsus modo vasorum ossificatio huc facit, cujus cap. I. mentionem fecimus. Nimirum arterias osseis protuberantiis & inæqualitatibus vim dilatandi & ampliandi amittere, & ad eas, tanquam scopulos, sanguinem allidi ac intra præcordia accumulari, ac tandem lympham exundare, docuit inspectio cadaveris Wepferi. Rei dignitas exigit, ut aliqua ex ejus vita iterum excerpamus, & qualis fuerit arteriarum constitutio, verbis Brunneri exponamus, is autem ita l. c. p. 163. scribit: *Aorta pone valvulas semilunares ossea asperitudine intrusos offendebat digitos, pupugitque prominentia quædam acuta. In progressu cartilagineis hemicyclis composita, si non ossea penitus, saltem indurata ad divaricationem usque iliacarum tota quanta reperta fuit. Juxta arterias renales circulus plane osseus uncia latitudine aortam circumdabat, & quo longius à corde, eo magis ossea deprehensa fuit, præsertim juxta iliacas, quæ revulsæ ex femoribus osseam duritiem tenuerunt. Tandem aortam exemptam integumentis liberavimus, ac dextre mundavimus ad contemplandam illam penitus, quin ad interiora quoque lustranda incidimus, non citra vim, forfice. Intus natus ille candor atque lævitas periit, & quamvis non intercepta penitus, scabra tamen, horrida & salebrosa hæc sanguinis via fuit, variisque inæqualitatibus ac protuberantiis osseis difficilis, circa exortum celiacæ & infra renales tunica interior disrupta &c. Quod verò etiam in aliis corporibus ejusmodi ossificatio vasorum observetur, certum est. Ex Lucii Observ. in Nov. literar. German. anno 1705. p. 254. pertinent huc sequentia: *In cadavere (melancholici senis) arteriæ cordis in corde osseæ reperiiebantur, quæ obcalluerant, uti in corde senum, quin & brutorum, ac frequentius in corde Cervorum accidere solet. Quod qui perpendit, ei vix erit stupendum naturæ miraculum quadriga costarum bubularum, quarum tota superinducta caro in verissimum os conversa fuit, quam in Museo asservat Vir Clarissimus Dominus Rosenringe cum observationibus Dn. Bircherod, ut legere licet in novis literariis maris Baltic. Anno 1705. p. 221. Non dubium est, quin etiam polyposa aut quævis alia concretio eundem cum ossificatis vasis præstare possit effectum. Notum est, quod in dilatata arteriâ magna in corde Clariss. Caroli Patini ejusmodi corpus anserini ovi grandioris magnitudinem excedens, & trium quatuorve unciarum pondus exæquans, figura cardui cinaræ fructui haud dissimile, sit repertum, quem-**

quemadmodum pluribus id describitur in peculiari *epistol. Medic. de aorta polypto in append. ad ann. 1. Dec. III. p. 116.* at vero ex eadem epistola constat, pedes *œdematoso tumore fuisse affectos*, ut facili conjectura assequi liceat, quantopere ejusmodi impedimenta in vasis motum sanguinis turbent, ac ad feri in partibus accumulationem faciant. Motu sanguinis perverso, etiam hæmatosis, quæ suos motui periodico & intestino sanguinis natales debet, labefactatur & minus laudabilis, ac ad nutriendum ineptus sanguis generatur, unde denuo nova hydropis ortui occasio suppeditatur.

§. 11. Tandem intellectu perquam facile est, quomodo & ex quibus causis chylus ex ductu thoracico effundi ac hac effusione diluvium in pectore excitare mortemque accelerare queat. Rem hanc clarissimè ob oculos ponunt experimenta duo Loweri, quæ *lib. cit. c. 5. p. 154. & seqq.* describit. Nimirum Celeberrimus hic Vir thoracem canis in dextro latere intra duas costas interiores aperuit, digitum immisit & ungue velut in ferram resecto, commune receptaculum tribus horis à pastu valdè turgidum perfregit & laceravit; quo facto & vulnere confuto canem affatim cibo satiavit; cum autem intra paucos dies expiraret, illum cultro anatomico subjecit, ac ventriculum atque intestina valde repleta, quin & venas lacteas chylo plenas invenit, & in eo pectoris latere in quo commune receptaculum apertum fuerat, duas chyli libras deprehendit. Idem experimentum tentavit in altero cane, eumque in sinistro latere inter tertiam & quartam costas superiores perfodit, & immisso per vulneris orificium digito ductum diffregit, ac canem iterum probe saginavit, & cum brevi post non tantum elanguesceret, sed & moreretur, hujus quoque thoracem dissecuit, claustrumque illud pectoris, ubi ductus disruptus fuerat, chylo penitus repletum & pulmonem lateri isti agglutinatum offendit. Verum enim verò, judice Willisio, *minime refert, talis morbi ætiologiam inquirere, quia non tam incurabilis, sed brevi tempore lethalis existit, quia scilicet à chyli inundatione præcordia statim obruantur, simulque sanguis & spiritus animales, succi nutritii vectigali solito defraudati, illico exsolvantur.* Ex quibus apparet, Willisium non minus, quam Lowerum in ea fuisse sententia, chylum nulla ex parte in venas mesaraicas influere; quod ut probaret Lowerus, experimenta à nobis adducta instituit, quæ, num prorsus conficiant negotium, sub judice lis est, vero tamen omnino est simile, hydropem pectoris ex rupto ductu thoracico ortum, brevi temporis intervallo, non posse non hominem jugulare.

§. 12. Eodem, absque controversia, modo etiam hydrops Pericardii excitatur, nisi quòd motus cordis, vel ipsius cordis vitio & culpa, vel vasorum continentium labe læsus specialiori forte modo, ad productionem hydropis pericardii concurrat, quam vitia sanguinis & lymphæ, quamvis aqua illa in pericardio majori, quam par erat, quantitate cumulata cordis latera sua mole etiam comprimat, ut pro excipiendo sanguine satis dilatari nequeat.

Alias

Aliàs apertissime Observatio Zelleriana c. I. §. ultimo allata, declarat, quæ vitia glandulæ & lymphæ in hoc affectu patiantur. Nam granula illa lentibus magnitudine æqualia, quibus pericardium militis oblitum ac exasperatum erat, non licet alio loco habere, quam in numero glandularum exiguarum, quæ in statu naturali aciem oculorum, etiam microscopio armatorum, effugiunt, vulgoque miliares vocantur, in morboſo autem hoc ſubjecto in eam magnitudinem excreverant. Quod fatum etiam in aliis corporis partibus experiuntur. Ita in tunica interiori ventriculi, has glandulas parvarum nucum avellanarum magnitudine ſpectatas fuiſſe meminimus. In magnâ huius materiæ caligine, minime ex re eſt, multa tanquam vera ſupponere, aut variis inhærere conjecturis & commentis, quæ tempore abolentur, atque inde à nobis nemo expectet, ut determinemus, an cæcis ductibus aqua ex pericardio in pectus, an ex hoc in illud ſubinde extillet, quamvis oppoſita ſententia nobis multo videatur probabilior. In ſolitario pulmonum hydrope Clariff. Tozzius l. c. p. 310. ſuſpicatur, poros veſiculasque pulmonis lymphâ, glutinoſiori ibidem redditâ nec per ſuos ductus traductâ, ſucceſſu temporis repleri, imo & vapores ab acidò quodam concreſcere, aut taliter quocunque modo impeditos pulmonum ſubſtantiam infercire hydropemque excitare. Non raro, inquit, etiam accidit, hydatides pulmonibus adnaſci ab aqueo humore extimam illorum membranam alicubi relaxatam tumefaciente, hæ autem veſiculæ aqua repletæ hydropis comites communi voto cenſentur documento Hippocrat. lib. de intern. affect.

§. 13. Vitia viſcerum, quorum catalogum aliquem ſub finem cap. I. addimus, aliqua ita ſunt in hoc morbo comparata, ut tanquam cauſæ concurrant ad productionem hydropis, cum aliis vero ita res habet, ut non niſi inter hydropis effectus, ac producta numerari queant. In priori claſſe ponimus quævis, ut jam in antecedentibus aliquoties monuimus, inſigniora colatoriorum viſcerum vitia, & varias corruptiones hepatis, lienis & pulmonum &c. De reſiſtentiis merito dubites, utrum deturpationes eorum in deſunctis ex morbo noſtro obviæ non ſint intuendæ potius ut productum aliquod morboſum? Vitia verò pulmonum, quæ inſigniori efficacia ad generationem huius morbi concurrunt, quàm aliorum viſcerum, ſi rem exactè perpendas, fere omnia ex uberiori congeſtione ſanguinis ad pulmones dependent, nam ex hoc fonte ſcaturiunt hæmoptyſis & arcto cum his ſœdere conjunctæ exulcerationes, in exſanguis huius viſceris ſyſtemate, aut ſi forte non erumpat ſanguis, hæc ipſa tamen congeſtione occaſio præbetur ſiccæ tuſſi & aſthmati periodico, variis irritationibus, preſſionibus, ſtagnationibus, & hinc pullulantibus inflammationibus, & quæ has excipiunt, non unius generis abſceſſibus, vomitis, aliſque erosionibus ac rupturis vaſorum lymphaticorum &c. unde etiam hydrops pectoris illi ætati familiarior eſt, quæ ſanguinis congeſtionibus circa pectus eſt obnoxia. Ad poſtერიorem vero claſſem referimus craſſitiem membranarum, quæ thoracem cingunt, ſine dubio ortam ab aqua per longum

tempus ibidem stagnante; varias bilis depravationes, quæ vel à mucida seroforum humorum constitutione, vel ab hepatis labe dependent &c.

§. 14. In remotioribus hujus morbi causis enarrandis non diu nos detinebimus. In vulgus notum est, eos, qui temperamenti phlegmatici & sanguinei, tum omni hydropi, tum etiam huic nostro, de quo nobis sermo est, esse obnoxios. Quod & affirmandum de iis, qui crassioribus cibis, unde chylus & sanguis viscidus oritur, victitant. Insalubrem potum, e. g. aquæ ex nive resoluta, frigida tempore æstivo, cremati &c. jam ante, cum de causis lentefcentis lymphæ ageremus, ex merito damnavimus. Nec in eundem censum referre veremur cerevisias ex tritico factas, præprimis recentes, nec fatis defæcatas aut male coctas. Sunt etiam suæ aëri crasso & nebuloso in generando hydrope, partes, quod in locis paludosis & maritimis, ubi hydrops frequentior, fatis aperte cernitur. Facit etiam aliquid ad accumulandam feri quantitatem, somnus nimius, otium, ut de affectibus animi jam nihil dicamus, inter quos mœrorem & iram, subitumque terrorem multi accusant. Potiores partes suppressioni excernendorum, eorumque retentioni vindicandæ sunt. De veneno quæstio est, an inter effectrices hydropis pectoris causas ei locus sit tribuendus? Audivimus c. I. Maximilianum II., illum generis humani amorem & delicias, ex hydrope pectoris obiisse, ubi præclarissimis ejus temporis Medicis aliqua veneni propinati suspicio oborta est; nam fama fert, Herculem Saxoniam in lectionibus Paduanis publice affirmasse, *mitissimum hunc Imperatorem veneno fuisse sublatum*. Bertius *Commentarior. Germanic. lib. 2.* tradit, per *Granvëllanum istud illi exhibitum, adeoque factum, ut Maximilianus totos annos 20 ex cordis palpitatione laborarit*. In eadem sententia fuit etiam Hieron. Mercurialis, Medicus prorsus eximius, *tom. I. Consult. medic. Consult. CXI. p. 257.* expresse scribens: *Quamobrem venenum & in aviculis & in boletis sumptum omnium malorum principium fuisse existimo*. Sed rationes, quas adfert, minime stringunt. Unice enim innititur Vir Clarissimus, cum originem variorum symptomatum, quæ Cæsarem fatigabant, aliter investigare non posset, laudabili corporis constitutione, qua in juventute Imperator fuerat usus, ac nescio, qua concludendi necessitate infert, cum ea ad effectuum horum orbem gignendum non conspirarint, Regi venenum fuisse exhibitum, cum potius inferre debuisset, plethoram æque hydropis ac aliorum morborum causam esse factam. Aliàs forte negandum non est, lenta illa venena (quæ ex saccharo hi additione volatilioris cujusdam corrosivi parari, nonnullorum sententia est) occultissimo modo pedetentim homines in cachexiam & hydropem præcipitare. Morbi, quos alias hydrops hic sequitur, varii sunt, inter eos autem præcipui existunt scorbutus, asthma, dysenteria, hæmoptysis & reliqui pectoris affectus. Unde etiam patet, morbum hunc præcipue juvenes, ac in consistenti ætate constitutos affligere, rarius

rarius tamen ipsos etiam infantes corripit. Clarissimus Harderus in apia-
rio producit exemplum pueri obesuli, in quo præter alia invenerit *cruen-
tum tenue instar aranearum tela* & *ex parte consumptum*, *pulmones humore
seroso* & *spumoso scatentes*, *fluctuantem in thoracis cavo aquarum copiam*.
Et D. Pauli curavit nobilem puerum, qui fasciam circa thoracem nullo
modo ferre vivus poterat. Is cum convulsus obiisset, alterutrum thoracis
latus aqua nigricanti refertum exhibuit. Jam symptomatum præcipuorum
ratio est reddenda.

§. 15. Molestia & gravativus præcordiorum dolor indicium præbet
feri in loco quodam extra vasa contenti, ac fibras distendentis, nam
quòd tensiones tales fibrarum à sero non adeò in magnâ quantitate effuso
oriantur, ex pedibus asciticorum liquet, qui de tensione illorum conquie-
runtur, etiam cum nullus adest notabilis tumor. Unde respirationis dif-
ficultas in hydrope pectoris dependeat, rectius explicari nequit, quam si
tribus verbis ex physiologicis præsupposuerimus, quomodo costarum mo-
tus reciprocus ad dilatationem atque constrictionem thoracis faciat? Etsi
verò Thomas Bartholinus in *Anatom. reform.* inculcet, quòd costæ à mu-
sculis intercostalibus externis attollantur, & thoracis constrictione expira-
tioni inserviant, contra verò ab internis adducantur & dilatando inspira-
tionem juvent; Spigelius vero cum multis sequacibus dilatari & constrin-
gi in hoc actu *lib. 4. c. 8.* credat. Nos tamen potius putamus adhæren-
dum sententiæ Plempii, Sylvii, Schwammerdammi ac Doctiss. Mayovi, in-
ter quos ultimus, per argumenta ex mechanicis & ipsa costarum conforma-
tione atque articulatione petita, probabile reddidit, costarum arcum non ex-
trorsum in inspiratione, introrsum vero in respiratione moveri, sed sursum
potius & deorsum trahi, ac illa ratione, dum sursum trahitur, pectoris spatium
dilatari, hæc vero, dum deorsum trahitur, contrahi. Diaphragma autem ipso
momento, quo costæ elevantur, sive thorax attollitur, convexitatem suam,
quæ abdomen spectat, cum planitie immutat, ita ut magno satis nisu manum
notabiliter feriat. Verbo: In inspiratione pectoris cavitatem relinquit, eam-
que longiorem fieri concedit, dum se constringit, fundumque thoracis depref-
sorem reddit; contra in expiratione gibbositate sua denuò thoracem replet &
breviorem pectoris cavitatem facit, dum de sua systole remittit, ut ube-
rius hoc explicatur à Spigelio, Bartholino, Sylvio, Schwammerdammio,
Mayovio, Diemerbrockio, ipso etiam Laurentio, cuius mentem Diemer-
brock hic non videtur affecutus. Hæc si ad rem applicemus præsentem,
statim elucescit, molem aquæ diaphragmati incumbens impedire, quo
minus, quando expirandum est, gibbositate suâ thoracis cavitatem aliquo
modo repleat, unde non potest aliter fieri, quam ut inspirando nostri hy-
dropici respirent, quemadmodum de Socero suo docte observavit Brun-
nerus. Sed quid causæ est, quòd affectus asthmaticus nostros ægros ma-
xime post primum infestet somnum? Willisius illud fieri credit propter

vapores à calore tunc intensiori elevatos, ac ab iisdem magnam illam inquietudinem & corporis jactationem deducit. Nobis experientia constat, hanc inquietudinem subinde cum asthma conjunctam quinque horis à coenâ sumpta solere esse maximam; dum verò perpendimus, ventriculū majori ex parte ad quartam horam à coenâ depleri, non tamen chylum plene vasa lactea ante horam sextam subire solere; sicuti non sine probabili ratione credit Celeberr. Listerus in *Comment. in Sanctor. Medic. static. p. 152.* causa forte non absurde ex parte chylo affluenti, & in sanguinis oceanum labenti, cui tamen non rectè permiscetur, illa inquietudo adscribetur? Deinde certum est, in vigilantibus musculos perpetuo esse quasi tenso & constrictos, ab hac autem musculorum strictione omnino oritur utique & glandularum & vasorum lymphaticorum præprimis in pedibus & circa coxas, ubi & numerus & magnitudo glandularum insignis occurrit, angustatio & stricture; in somno autem non tam muscoli, sed & stricte illæ glandulæ ac vasa ipsa laxantur, si Listero *l. c. p. 142.* credimus, *qui vigilat, omnes corporis musculos constrictos habet, meatusque adeo glandularum NB. duplo magis angustatos, quam qui dormit.* Hoc si ita habet, probabile est, quòd tempore somni laxatis glandulis & vasorum lymphaticorum osculis, uberius sit affluxus ad pectus, tanquam ad partem læsam, majorque ab affluentibus humoribus pulmonum oriatur compressio, atque Spiritus magis intercipiatur.

§. 16. Pulsus inæqualis & subinde intermittens ab impedimento aliquo in præcordiis, ac hinc fluenti turbato humorum motu oritur. Notum enim satis est, pulsum seu motum arteriarum reciprocum extrorsum & introrsum factum, vel, ut aliis vocare placet, diastolen & systolen arteriarum dependere à cordis systole & diastole (cum nec tyronibus artis nostræ incognitum amplius sit, cor esse muscolum, qui perpetua vicissitudine recipiat sanguinem & expellat, in cujus contractione parietibus undique ad se accedentibus, thalami ejus, ejecto omni sanguine, evacuantur, laxatione facta implentur,) arteriarumque pulsationes cordis vibrationibus respondere, & pulsum esse æqualem cum æquali impetu ac quantitate ab alterna cordis constrictione inter æqualia temporis intervalla, truditur sanguis in arterias. Necesse ergo est, inæqualem esse pulsum, vel quia in corde remora est, vel in influxu & effluxu sanguinis aut humorum motu impedimentum occurrit. Hoc vero ipsum in hydrope nostro fieri, ex antecedentibus patet. Rursus cum lymphæ in cavitatem pectoris effluat, ac nec chylus, nec sanguis ritè illa diluatur, fieri vix aliter potest, quam ut ventriculi cordis & vasa sanguifera viscidis humoribus obducantur, & iis fere repleantur, dum sensim gelatinæ instar parietibus ventriculorum cordis ac vasorum agglutinantur. Ex hac autem causa etiam pulsum debilem & intermittentem oriri, testis est Lowerus *lib. citat.* Ab iisdem fontibus oritur etiam cordis palpitatio, quam in morbo hoc nostro etiam abundantia aquæ

aquæ in pericardio inducit, sicuti testatur Tulpius *lib. 2. observ. Med. c. 26.* Carolus Piso sæpe *cit. c. 11.* Riolanus, alique plures, ut minime audiendus sit Diemerbroek *l. c. p. 430.* scribens: *Notavimus, majorem copiam istius liquoris, (pericardii) non facere palpitationem cordis, quod tamen ex Galeni sententia communiter tradunt Medici. Nam in omnibus iis, in quibus post mortem in pericardio humoris istius aquei majorem copiam reperi, antea, dum morboſi viverent, nullam omnino cordis palpitationem, sed contra pulsum languidum ac rariorem reperi. Neque etiam à copia istius liquoris tanta fit pericardii angustia ut cor se in eo libere movere nequeat, atque hinc palpitet, sed contra semper animadvertimus, pericardium hinc adeo latum laxumque reddi, ut cor in eo multò facilius moveri possit, quam in paucò liquore; Quæ Viro Clariss. excidisse merito miramur, cum captu facillimum sit, qua ratione nimia aquæ in pericardio quantitas constrictiones & restitutiones cordis impedire queat, si vel mole sua premat, vel fermentescat & intumescat. Conf. Bellinus *de morb. pector. in Oper. p. 616.* Nec temere irridendæ sunt querelæ ægrorum, quibus cor palpitat ac tremit, aut inordinate movetur, cum ajunt, cor suum velut aquæ innatare, cum sensatio illa longe certior sit omnibus conjecturis etiam expertissimorum Medicorum, ac propterea, cum Nobilis ille sexagenarius duobus ab annis cæpiſſet sentire pondus in pectore, accedente post aliquod tempus motu quodam cordis tremulo & inordinato, cum sensu ac si cor aquæ innataret, non male Vir Clariss. Raymund. Joan. Fortis *cent. 2. Consult. 46. p. 181.* collegit, aquosam materiam in pericardio collectam. Nec fidem detraxit Hercules Saxonia *l. 2. Med. Pract. c. 8. p. m. 179.* Galeno ex Marcella familia, qui hoc morbo (aqua in pericardio) laboravit una cum hydrope pulmonis, & ante mortem factus est leucophlegmaticus, cum diceret, se sentire cor in aqua natare. Non urgebimus jam unanimem Medicorum consensum, qui à nimia liquoris in pericardio quantitate palpitationem observarunt, quos inter non ultimo loco sunt Galenus & ejus sequaces, Fuchsius, Hollerius, Amatus Lusitanus, alique plures. Non itaque dubium est, quin qui in hydrope pectoris, sicut & pus in empyematicis, exteriorem pericardii superficiem introrsum versus propellens, palpitationem cordis inducat, cujus causæ esse possunt humores, abscessus, grumofus sanguis, &c. ut rectè alicubi observat Hollerius.*

§. 17. Lipothymiam sobolem esse pravorum olidorumque halituum, ex putrido sero emergentium & cor infestantium, credidit Sebizius *p. 892.* Duretus in *Coac. prænotion. p. 131.* rectius quidem judicat, scribens: *per lipopsychiam aut nalaxensinon dictam, lipothymiam fieri significationem infirmæ facultatis animalis, sicut etiam per oculorum ἀμαρῶσις; sed quænam causa sit deliquiorum, non aperit. Sine dubio autem non alias agnoscit causas, quam ipsam palpitationem cordis, cum ex observationibus à Clarissimo Bonetto *Anatom. Pract. lib. 2. sect. X.* collectis aperte constet, correptos fuisse lipothymiâ alios occasione abscessus, vel*

intra cordis substantiam, vel alibi geniti; alios ratione humoris fœtidi in cordis ventriculo, aut in thoracis cavitate contenti; alios à polyposa quadam concretione, & quidem propterea, quòd hâc ratione motus humorum impediatur, quod omnium maximè fieri necesse est, cum vas aliquod circa cor, aut in pulmonibus majus & insignius valde obstruitur, nec sanguini liber conceditur meatus; nam tum vires exolvi necesse est eousque dum ob sanguinis confertim irruentis impetum obstructio aut impedimentum quodcunque removeatur. Experiuntur autem hydropici nostri, qui sæpius animo linquntur, idem cum aliis fatum, quibus deliquia sine manifesta causa familiaria sunt, ut nimirum, juxta Hippocratis aphorismum, repente moriantur.

§. 18. Tussim ab aqua acri, & diaphragma & pulmones ejusque vasa imò & laryngem stimulante ac irritante, oriri, in aprico est, præprimis si accedat ægri opinio, illum humorem, qui in pectore molestias excitat, per fauces amandari & per asperam arteriam abripi posse. Invalescit vero tussis, dum aquâ in pectore fermentescente pulmo ferocius irritatur, quod etiam fit, cum motu corporis aut incongruo ejus situ, colluvies serosa in pectore commoveatur. Tumores, si qui sunt præsentés, oriuntur à sero vasis suis elapso, nisi forte etiam sanguinem pituitosum, qui in cachecticis & intumescentiæ & coloris luridi in facie causa est, cum aliis Doctoribus accusare malis. De consensu inter pectus & pudenda certa res est, & ab Hippocrate, aliisque sæpe observata. Unde apud Hippocratem legas *lib. 2. epidem. sect. 5. A dolore forti ad testes irruente tussis sicca solvitur; & lib. 2. epidem. sect. 1. si testium inflammationi tussis superveniat, inflammatio solvitur*, quo etiam pertinet locus ex *lib. 2. præfagior. 67. &c.* Pervulgatæ etiam res est notitiæ, vocem eo fieri tempore graviolem, ac ad virilem sensum assurgere, cum pili in pube succrescunt. Ulterius notum est, per urinarias vias materiam, e. g. purulentam in pectoris cavo contentam educi, nec enim desunt exempla his viis è corpore amandati puris, ac fanati hâc ratione empyematis apud Scultet. in *Armament. Chirurg. Observ. 46. &c.* 51. Diemerbrock *l. 1. c. 17.* aliosque plures; sed utut hæc ita sese habeant, perquam tamen difficile est ostendere, qua in re consensus iste fundetur, nisi forte cum Laurentio in *histor. Anat. l. 9. quæst. 2.* credere velimus, illuviem pectoris ad cor per venas reduci, ex eo autem per arterias & ad renes & ad pudenda transferri, ubi tamen iterum quæstio remanet, cur non per arterias colluvies pectoris ad alias corporis partes æque ac ad scrotum advehatur? Nec scimus, an felicius se expediant, qui non tam ad corporis meatus ullos respiciendum censent, quam unice ad lympham hinc inde in habitu corporis stagnantem, ac contendunt à lymphæ decumbentis gravitate motum ad partes inferiores arcessendum esse. Nam nulla eo tempore in peripheria corporis stagnantis lymphæ obvia sunt indicia, cum colluvies serosa scrotum facit intumescere. Peculiaribus motibus consensum hunc inniti, argumento forte fuerint tussiculosi, in quibus eum primario annotavit Hippocrates.

§. 19. Febris quosdam premit, alii verò ab eâ sunt immunes. Hydro-
picos verò illos sine dubio vexat febris, quorum viscera vel obstructa, vel
inflammata, vel alia quadam labe notabiliore, e. g. ulceribus & abscessibus
sunt deformia; eos enim, quorum viscera ita sunt constituta, febricitare,
extra controversiam est. At jam supra indigitavimus, satis esse ex anatome
compertum, quod tali vitio viscerum hydropici subinde laborent. Imo aper-
te constat, hæc viscerum vitia subinde causam esse hydropis. Et ne fortè
de inflammatione dubium supersit, hic, etiamsi alieno loco, notare liceat,
quòd Guarinon. *Consil.* 349. testetur, sæpius se vidisse *inflammationem pul-
monum thoracem aqua implevisse*. Paralyfin brachiorum à compressione va-
sorum sanguiferorum potius quàm nervorum, quamvis & illi symbolam
conferant, dependere, tanto gaudet probabilitate majori, quanto certius
constat, ex arteriis ligatis subsequi impotentiam ad motum, quod & Steno
& Brunnerus recte annotarunt. Et hic quidem, ut *Detur.* 3. *Ephem. ann.* 5.
§ 6. *obs.* 293. p. 660. legere licet, postquam in cane aortæ descendens
truncum accurate ligasset, intestina reposuisset, & abdominis vulnus ali-
quot futuris consuevit, *canem vidit languidum & vix pedibus consistentem,*
& mox anterioribus nixum, posteriores vix movere potuisse, eosque tandem re-
solutos post se raptavisse. At vero ubi abdominis nexus resolvisset, & filum
etiam, quo aorta constricta fuerat, removisset, sensim canis ad se rediit,
pedibus anterioribus primo constitit, mox posteriores movit, tandemque iis con-
stitit, & ut antea, incessit; Unde Brunnerus dicit, se didicisse, verum esse
experimentum, quo dicunt, motum posteriorum pedum, ligata arteria,
aboleri. Ex quibus concludere licet, multum aberasse Riverium *cit. lib.*
7. *Prax. c.* 5. p. 255. dum docet, hanc paralyfin fieri, vel *ab humore à*
capite in pectus delabente, cujus portio in brachium vicinum defluat, vel è
sero in pectore contento, & ad brachia per venas axillares exudante, vel à
refrigeratione musculorum intercostalium, à quibus ad brachia nervi derivantur,
vel alia quavis vicinia lege abortam. Contra nobiscum facit Hippocrates in
Coacis, quem male pro se allegat Riverius, dum à *vehementi inflammatione*
pulmonum aut pleuræ, quæ compressionem vasorum infert, ejus generis para-
lysin deducit.

§. 20. Frigent exteriores partes in hydropicis nostris, quia turbato
sanguinis circulo influxu laticis, qui omnis in corpore caloris focus est, or-
batæ sunt, interiora vero viscera vehementi, ob regurgitantem sanguinem,
uruntur calore. Appetitus in illis salvus est, qui à febre sunt immunes, nec
ventriculum cruditate pituitosa aut nidorosa refertum habent. Iidem siti quo-
que non anguntur, quia motus lymphæ ad glandulas in faucibus & ventricu-
lo non prorsus est interceptus; contra alii hydropici, propter abruptum ferè
lymphæ motum ad prædictas partes, clamosa siti, quâ nullus dolor acerbius
nostrum corpus excruciat, (ut optime Pechlin. *l.* 3. *observ.* notat) gravissimè
premuntur. Cibus ab hydropicis nostris paulo majori quantitate ingestus, con-
citatur

citatur paroxysmum asthmaticum, præsertim sub finem coctionis, vel quòd repleto ventriculo, & cibis spumida fermentatione turgescantibus onusto, diaphragmatis motus, jam ante impeditus, magis & magis sufflaminetur, ut proinde rectè Hercul. à Saxoniâ p. 152. *accepto cibo anhelitus difficultates augentur, facta scilicet compressione à ventriculo repleto, circa septum transversum;* vel, quòd novus chylus per ductum thoracicum, ordinaria via ad thoracem delatus pulmonum compressionem sua mole adaugeat. Quòd autem à ventriculo nimium cibis distento asthma subinde oriatur, in pueris voracioribus toto die observare licet. Alvus etiam respondet, tum quòd in intestinis nullum hæreat vitium, eademque nec compressa nec inflammata sint, nec motus peristalticus sit perversus, tum, quod caput rei est, non plane destructus feri ac lymphæ motus existat, ac ea propter excrementa non nimium exsiccantur, aut indurentur. Ubi enim res secus habet, fæces plus æquo duriores sunt, nec alvus excrementa debito tempore deponit, quòd in pulmonibus & thorace serum, quo excrementa dilui debebant, stagnet. Matutino quoque tempore sudor prorumpit, quando sanguis arteriosus multo adhuc est dilutus sero, quod, systoles ope, per laxatos tempore placidioris somni poros extruditur. Quodnam verò sit fundamentum, ex quo, profluentibus urinis tenuibus & limpidis in magnâ quantitate, liceat & insultum asthmaticum & hydropem prædicere, non adeò in aprico est. Willisius cap. 4. *de urinis pag. 185. causam in acescentiam sanguinis ac succi sui nervosi rejicit. Novi, inquit, quasdam teneræ & rarioris texture mulieres, quæ interdum per plures dies male habentes, in copiâ ingenti (supra duplum liquidi assumpti) aquosum & tenue sine contentis, aut hypostasi quotidie mingere solebant, quo tempore de virium languore, respiratione difficili, & impotentia ad motum conquerebantur. Suspicio in hoc casu, sanguinem & succum nervosum à sale evecto & fluorem passo nimis acescere, ideoque ut in mixtione nonnihil resolvantur, & in serositatem nimis fundantur, habiles reddi. Enim verò, si vel maxime res ita se haberet, ut affirmat Willisius, quamvis dubio non careat, in nostro tamen casu, de quo nobis sermo est, admodum improbabile est, acorem sanguinis, si vel maxime adesset, statim asthmaticum insultum ac hydropem minari. Nos potius in ea versamur sententia, copiam urinæ tenuis & limpidæ in his, qui deinde in hydropem incidunt, spasmodicam viscerum contractionem arguere; ejusmodi autem constrictionis, si paulo frequentius contingat, obstructionis ac hinc pullulantium malorum fœcunda solet esse mater; nec itaque adeò erit absolum, ex ejusmodi viscerum strictionis & asthma & hydropem ominari. Non autem necesse est, ut explicemus, cur urina, quando hydrops crescit, parcius fluat, saturatioris sit coloris, ac varia sedimenta deponat, cum nemo ignorare possit, & feri in thoracem effusi ac viscerum male constitutorum, intensiorisque febris indicium ejusmodi urinam præbere. Post miseras longo tempore toleratas, exeundum hydropicis nostris è mundo est.*

Isti

Isti vero tanquam suffocati obeunt, quibus pulmones à nimia feri quantitate ita compriuntur, ut subito respiratio omnis, cum vita, cesset. Hydropici autem illi convulsi aut apoplectici moriuntur, quibus serum, etiam in cerebrum effusum, aut inter ejus anfractus sensim accumulatum est. Nam hoc modo his morbis, qui vitam eripiunt, fomes subministratur. Verisimile, quòd serum in cerebro stagnans, vel acrimonia sua piam matrem erodat, vel copia sua perrumpat; ac, in cerebri basin defluens, medullam oblongatam, atque nervos ex ea ortos, stagnatione suâ corrumpat, aut acredine suâ continuo laceffat, hoc autem ubi fit, non possunt non convulsiones, apoplexia, ac alia mala succedere. Diversitas aquarum, quæ in corporibus hydropicorum post mortem reperiuntur, à varia corporum & in his humorum constitutione, ac à mora, quâ in thorace stagnarunt, dependet. Et quia in antecedentibus vitia viscerum jam tetigimus, ad therapeiam morbi inoffenso pede accedere possumus.

CAPUT III.

Quo Therapeia hydropis pectoris traditur.

SUMMARI A.

- §. 1. Colluvies serosa in pulmonibus & thorace congesta primum est evacuanda, & quidem per remedia externa.
- §. 2. Quomodo per interna, & primo per purgantia.
- §. 3. Per diuretica.
- §. 4. Per diaphoretica.
- §. 5. Per pectoralia.
- §. 6. Humorū & viscerum vitia quomodo corrigenda.
- §. 7. Qua ratione symptomatibus hujus morbi occurrendum.
- §. 8. Respirandi facultas quomodo curanda.
- §. 9. Morbus hic pene incurabilis.

§. I.

IN cura potissimum eo cogitationes omnes dirigendæ sunt, ut 1. colluvies serosa in pulmonibus & thorace congesta quoquo modo evacuetur. 2. Omni studio præcaveatur, ne nova subinde generetur, quod potissimum obtinetur, dum viscerum vitia tolluntur, & omnis cachexiæ occasio artis nostræ præsidii avertitur. Utrumque autem hoc præstitum difficillimum est. Non immerito Riverius l. c. gravissimum vocat affectum, qui difficillime curationem suscipiat. In iis enim, inquit, qui eo laborant, calor natus admodum debilis est, viresque naturales languidæ ex gravi aliquo viscerum affectu,

*affectu, unde fit, ut, quamvis collectus humor remediis idoneis evacuetur, quod tamen difficillimum est, novus subinde fiat nova materiae affluxus, unde morbus non solum fovetur, sed etiam deterior in dies evadit, ita ut tandem in hydro-
pem ascitem corpus incidat. Imo Rodericus à Fonseca p. 376. rotunde asserit, morbum hunc curari non posse, & cessare beneficium artis ac naturæ. Et Petrus Salius Diverfus de affect. particul. p. 247. itidem dubitat, an his indicationibus Medicus satisfacere possit, nihilominus fatetur, quòd illos, quos curandos suscepit, ab hoc thoracis affectu per quadam intervalla (educta materia peccante) liberaverit & per menses & annos, maximo tamen cum labore præservaverit. Præterea nec desunt exempla curati nostri hydropis, quæ inter notabile est illud Willisii, quod recenset l. c. p. m. 218. & idcirco ægri non sunt deferendi, aut prognostico solo relinquendi, sed potius omni ope eritendum est, ut utri-
que intentioni pro virili satisfiat, aut minimum ad tempus aliquod miseris vita prorogetur. Videndum autem statim ab initio, an ex fonte Chirurgico rivulus aliquis fluat, quo aqua ex thorace educi queat, Quid auxilii ex V. S. in ascite sperari possit, jam in *histor. morb. Vratisl. ann. 1699.* edisseruimus, nec majorem ex eâ utilitatem in hydrope pectoris cuiquam pollicemur, imo damnum irreparabile potius ominamur, quod ante annos circiter sex expertus Vir Illustris dignitatis, cui post V. S. ex consilio Medici veterani alicujus largius administratam, brevi ad plures abeundum fuit, auctis post V. S. omnibus symptomatibus, præcipue autem difficultate respirationis. Prudenter Benedictus Consil. 42. p. 184. de sanguinis, inquit, missione haud loquendum, cum nullo pacto videatur convenire tum ob frigidos humores tum ob viscerum atoniam. Paracentesin alii commendant, alii vero damnant. Hos inter est Riverius, qui pag. 256. apertionem lateris, quia in usum revocatam non vidimus, neque felicem illius successum apud ullum autorem legimus, probare absolute non possumus. H. I. Petrus Salius Diverfus l. c. ait, sectionem pectoris se non ausum facere, nec etiam in aliis faciendam laudare, quòd hujus morbi sanatio non tam materiae præsentis pulmonemque obstruentis & replentis remotionem, sed etiam ejusdem regenerationis prohibitionem indicet. Sectio autem primæ tantum indicationi, non secundæ satisfacere possit, atque hinc concludit, paracentesin sufficiens hujus morbi remedium esse non posse. Quod, ut nos quidem opinamur, in quæstione non est. Nam de eo tantum disputatur, utrum paracentesis locum habeat in hydrope pectoris, licet sponte concedatur, quòd non sit remedium sufficiens. Nec ex hoc capite paracentesis prorsus rejicienda erat à Diverfo, cum nec evacuantia sint in morbo hoc sufficiens remedium, quibus tamen multum tribuit Doctissimus noster Salius. Majoris ponderis est argumentum, quod alii urgent: Nempe subinde aquam contineri non solum in thorace, sed etiam in pulmonibus, eam autem, quæ in pulmonibus continetur, per sectionem thoracis non posse evacuari, est in propatulo. Illud sane tanti apud nos est momenti, ut ipsimet agnoscamus, nisi ex indubitatis signis constet, aquam in thoracis cavitate fluctuare, ad sectionem non esse*

esse deveniendum. Sed si id compertum sit, quòd ea (prudenter instituta) locum habere possit, alii minime dubitant, ex quorum numero sunt Hippocrates, aut quicumque Auctor est *lib. de morbis*, Sylvius, Willisius & alii. Ac Sylvius quidem *lib. I. prax. c. 50. p. 316. si*, inquit, *de thoracis hydrope satis constet, non video, cur non liceat per acum argenteam cavam in thorace innoxiam instituere paracentesin, ex tali nempe vulnere parvo nihil periculi imminet egro.* Quod tamen non credit doctissimus Horn, qui in *Microtechne* monet, eam non plane periculo vacare. At tum demum apertionem thoracis decernendam esse recte monet, quando medicamentis nihil efficitur. Willis cum Lowero etiam feliciter eandem celebravit in adolescente sano, ut legere licet *p. 216.* quæ historia cum aperte doceat, quomodo instituenda sit paracentesis, hic omnino inferenda videtur: Ita vero habet: *Post factam totius provisionem Chirurgus inter sextam & septimam vertebra cauterium applicuit, & postridiè foramini in pectoris cavitate secto canalem indidit, quo facto statim liquor crassus ac instar chyli albescens & quasi lacteus effluebat. Hujus primâ vice tantum sex circiter uncia detrahebantur, & postridiè tantundem. Die tertio cum paulò major quantitas exire permetteretur, magno statim languore affectus, & deinde febricitans per diem unum aut alterum male habuit: Quapropter donec temperiem & vires recuperaret, materia istius exitum inhibere visum est: postea verò ejusdem evacuatione tantum parca quotidie facta, pectoris cavitas fere in totum inaniebatur. Adhuc vero canalem cum epistomio in foramine gerit, quo semel nycthemeri spatium aperto humoris usque tantillum emanet: interim stomacho, vultu & viribus valens foras obambulat, equitat &c. Pharmacia haud multa usus est aut opus habuit. Post sectionem cordiaca temperate, quandoque hypnotica & postea decoctum traumaticum bis quotidie fumendum illi injunximus.* Hæc Willis. Nobis vero etiam non monentibus dilucescit, quòd in sectione hæc thoracis eadem observandæ sint cautelæ, quæ in paracentesi in ascite præscribuntur, de quibus & nos aliqua diximus in historia & uberius differunt Heurnius in *lib. 6. aphorism. 27. n. 3.* Capivac. *Pract. l. 3. c. 19.* Mercatus, Rudius, Hollerius ac Scholzius noster *aphorism. 1128. & seqq.* Quantum ad encheiresin, omnia satis accurate persecutus est exercitatissimus Chirurgus Cornelius Solingen in *den Handgriffen der Wund- Artzney part. 2. c. I. p. 175. & seqq.* Sed quid de fonticulis & vesicatoriis dicendum, an & illis serum in cavitate stagnans evacuari poterit? Non obscure probant Mercatus & Rudius. Usus vesicatoriorum, tum in affectibus dolorificis diuturnioribus, e. g. in doloribus capitis pertinacibus, hemicraniâ, odontalgia, in arthritide nondum inveterata, tum in periculosioribus symptomatibus acutorum morborum, convulsionibus, deliriis, exanthematibus retrocedentibus, sæpe vidimus satis insignem, si prudenter applicentur; at hic prorsus non assequimur, quid ad summam rei conferre possint, nisi fortean quispiam sibi persuadeat, quòd seroso-lymphaticus humor à pectore his averti & ad partes exteriores derivari queat. Segnius adhuc auxilium à fonticulis expectandum est, qui in affectibus sæpe re-

crudescentibus, e. g. ophthalmicis, lippitudinibus, visus & auditus difficultate &c. post intervallum aliquot septimanarum, utilitate egregiâ alias se commendant. Neque setaceum, quod cum effectu in vehementioribus catarrhalibus affectibus circa caput jam quadantenus affuefactis aliquoties adhibuimus, ab effectu evacuandi effusam in cavitationem thoracis colluviem serosam ullo modo laudare possumus. Quando hydrops crescit eundo pedesque intumescunt, scarificatio utique locum habet. Adhibuit eam Collega noster D. Helwich aliquoties, ac in illo etiam Religioso S. J. de quo *cap. I.* mentionem fecimus. In sinistro pede instituta & per aliquot dies repetita scarificatione, incredibile est, quantum serosi humoris per aliquot septimanas effluxerit; sed in dextro pede negotium non è voto succedebat, fortassis, quòd cutis ibidem crassior ac pinguedo copiosior esset, donec scarificationem *κατὰ στυμὴν* in subsidium vocaret, ubi multum aquæ, sed sine ægri sublevamine profluxit. Dedit interea diligentem operam, ne, cujus periculum aliquoties erat, gangræna aut sphacelus succederet, id quod haud raro contingit, ut Ludov. Septalius *animad. lib. 7. n. 56.* recte observat. Sed præterea, ubi operæ aliquando pretium per incisiones ejusmodi fieri debet, humorem satis fluidum esse necesse est, nam ubi nimis est gelatinosus, frustra fit sectio. Scimus scarificationes has non ab omnibus probari, sed frivolum esse putamus contra experientiam litigare, cum à temporibus Hippocratis à Medicis multoties ita factitatum cum salutari effectu legamus. Apud Ægyptios ejusmodi operatio valde celebris est, & merentur etiam hic legi verba P. Alpini *lib. 3. de Medic. Ægyptior. c. 13. p. 102.* *Curant, ait, non raro hydropicos sectione, aquam educentes, quorum varii varias sectiones ad id celebrant: alii siquidem sub umbilico per 3. digitos versus partem, à quâ hydrops ortum duxit, terna vulnera infligunt. Atque alii parvis scarificationibus ventrem tumidum scarificant, per quas aqua paulatim exit. Alii vero tutique supra vel infra pedum claviculam intus extusque binas adigunt sectiones, per quas commodè sensimque ac sensim aqua educitur. Quo sane modo sectionis aliquos ab hydrope effatu digno sanatos observavi.* H. I. Docet vero ibidem Guilandinus *pag. seq. antiquis medicis id auxilii genus fuisse notissimum, non modo ad duas hydropis differentias, verum etiam ad hernias aquosas & ad omnes aqueos tumores.* Porro censemus etiam scroti in tumorem adacti perforationem cum ægrotantium commodo institui, sicuti nuper in Illustri Viro D. Helwich fuit expertus, & in molitore D. Grassius. Nam effluit in notabili quantitate, & licet brevi iterum intumescat, sicuti in utroque contigit, tamen facile iterum evacuatur, modo apertum servetur vulnus, quod tamen justo tempore injectis vulnerariis & balsamicis decoctis facile sanatur, nam non tantum humor evanuit, sed & asthma, quo misere antea angebatur, ad tempus remisit. Inter externa Medicus Anglus Nickholson varia pro evacuanda ex corpore aqua Sereniss. Regi Angliæ Wilhelmo III. suavit, nimirum ut refert G. Bidloo *im Bericht von der letzten Kranckheit und Tode Wilhelmi III. p. 104.* hanc evacuationem obtineri posse putavit

(1) *Durch frische Haber-Grütze, Sand, Saltz und dieses alles trocken und warm.*

(2) Durch Kästgen, die man mit sich führen kan, von Erde, oder einer Berg-Materie gemacht.

(3) Durch Räuchwerck von Pflantzen, Holtz, Mineralien, und andern spirituosén Dingen componiert.

(4) Durch den Rauch, welchen man über einem Loche in der Erden, in welchem Feuer gemachet, auffenget.

(5) Durch Maltz, nemlich wann das Bier darvon abgeschöpffet, item durch Kräuter, Holtz des Lebens, allerley Pulver und Liquores, welches durch kochen bereitet wird. Et addit: Dieses alles kan man sicher gebrauchen.

§. 2. Verum ab externis progrediendum ad interna. Ex his primo loco meritò nominanda sunt purgantia, quæ omnes Practici uno ore in hoc nostro affectu laudant, quamvis alii hæc, alii verò alia adhibenda esse contendant. Nam & hic voto non vivitur uno. Doctissimus Martianus eligit *mannam*, quam ferositates in pectore stagnantes exturbare credit. Petrus Salius Diverfus duo proponit, quæ sibi infelicissimo usu fuisse prædicat; Alterum est *elaterium*, alterum est *succus sambuci radicum*, hunc ad unciam & semis, illud ad quatuor grana ad summum exhibuit. Roderico à Fonseca p. 377. *elaterium periculosum est medicamentum, & ideo ab eo abstinentum judicat*. Ipse vero duo proponit medicamenta, quæ ad expurgandas aquas longe judicat esse præstantiora, ex Fernel. lib. 7. de methodo medendi, at præterea laudat ad evacuandum serum, *semina ebuli* ad 3iß cum *saccharo* & *cinamomo*. Riverius p. 256. inter hydragoga ea, quæ ex mineralibus desumuntur, in hoc affectu maxime convenire arbitratur *ÿrium vitæ*, ita correctum, ut per inferiora tantum evacuet. Hydromel purgans Willisii ex purgantibus ingrediuntur semen carthami, ebuli, folia fenn. agaricus, mechoacanna, turbith. Pilulæ vero illius constant ex *ÿio* & resina gialapii. Ab insigni effectû laudat electuarium hydragogum D. Sylvii, quod lib. 1. Prax. c. 7. p. 170. describit D. Helwich; sed hoc ipsum nunquam hætenus exhibuit præsentē febrī, tum enim omnia drastica & vehementiora evacuantia procul esse debere arbitratur: cum nihilominus ex re ægrorum sit, ut alvus sit aperta, lenientibus solis hætenus usus est, & interea insigni mactat encomio electuarium lenitivum Burrhi, quod & grati est saporis, & blandissime sine ullis turbis, ac intensiōe febris lubricando aperit, cui tamen ob varias causas præferre non dubitat aliud medicamentum, quod sub nomine *balsami perpetui* ipsi innotuit, ac insigni viscera deoppilandi, eademque à putrilagine conservandi virtute pollet, quas dotes evidentius, ut aliquoties est expertus, exerit in illis, quibus potus ordinarius cerevisia est. Tinctura sacra Listeri ex *hierâ picra* & *cochinillâ*, cujus meminit in consilio pro Serenissimo Rege Wilhelmo, etiam inter selectiora me-

Nnn 3

di-

(1) Recenti farina avenacea, arena, sale, iisque siccis & calidis.

(2) Capsulis portatilibus e terrâ aut alio minerali confectis.

(3) Fumigatione plantarum, lignorum, mineralium aliorumque spirituosorum.

(4) Fumo recepto per foramen in terra, ex igne ibi accenso.

(5) Hordeo tosto, post cerevisiam exhaustam. Item: Herbis, Ligno vitæ, variis pulveribus liquoribusque coctione parandis. Et addit. Hæc omnia posse securè adhiberi.

dicamenta referri meretur. Pilulæ autem ejusdem ex confectione Hieræ Picr. ʒj, Extr. Rud. gr. iiij. succ. glyzyrrhizæ, aqua rosarum solut. ʒj. pro dosi nimia mole & sapore nauseabundæ sunt. Cæterum prudenter monuit Sennertus noster *lib. 2. part. 2. cap. 20, Medic. Pract. educendam esse materiam paulatim* & *medicamenta purgantia repetenda esse.* Nam si ἀτρώως aqua in hydropicis universim effluerit, πάντως ὑπόλλυνται omnino moriuntur, ut ait Hippocrates *aphorism. 27. sect. 6.* Et si hoc fortassis non eveniat, id tamen, si *validius purgans exhibeatur*, certò consequitur, quæ Riverii est observatio, *ut humores valide exagitentur, unde suffocatio ingens agrotanti contingit, quæ illum subito de medio tollit.* Ideo, inquit, *caute agendum est, & in minori dosi atque iteratis vicibus, medicamenta exhibenda sunt, eaque cum potentioribus aperientibus ac diureticis miscenda, ut simul viæ aperiantur, & serosa materiæ portio ad urinæ vias deducatur.*

§. 3. Purgantia in cura hydropis pectoris excipiunt *Diuretica.* Ab his gloriosissimus Imperator Maximilianus II. plurimum commodi sensit, qui, cum pectoris hydrope cum cordis palpitatione ad annos 20 laborasset, uno interdum die ad sex libras aquæ minxit, cumque motus ille materiæ impeditus esset, suffocatus est, ut refert ex Cratone Sennertus *l. c.* Sed quæstio est, quænam diuretica hic potissimum locum habeant. Si locum affectum, ut par est, consideremus, jure ambigas, an ea, quæ falsedinem feri augment, ac eo ipso majorem materiæ, quâ natura ad relaxationem renum stimulatur, quantitatem suppeditant, id est, salina hic prudenter præscribantur, cujuscunque etiam generis sint, sive *temperata acida*, e. g. ☞ tri, ☉ lis; sive *alcalica* & ea rursus *volatilia præcipue oleaginosa*, e. g. ☞. ebor., tartari; vel *fixa*, e. g. ☉. genistæ &c. sive tandem *media*, e. g. tartar. ☉latus ☉. regeneratum, ☉. digestivum Sylvii &c. quod notorium sit, quanto eum damno iis, quorum pulmones minus recte constituti sunt, sicuti & in hydropicis nostris contingit, exhibeantur. In usum itaque potissimum ea erunt vocanda, quæ mucositatem humorum resolvunt, ut tanto facilius tenuior feri pars secedere queat, ex quâ classe sunt acria pingua, gummi-resinæ, radix item vincetoxici, pimpinell. apii, petroselin. raphan., calam., & omnis generis plantæ antiscorbuticæ, ex quarum nonnullis aqua ad hydropem pectoris Döringii nostri elicitur, ut ex descriptione ejus apud Sennertum patet. Vegetabilibus etiam originem debet ☐. diuretica D. Willis. Præ reliquis placeat Terebinthina Julio Cæsari Benedicto in *Cons. 43. p. 189.* Terebinthina, inquit, *à me millies in affectibus pectoris comprobata.* Nuper apud nos famam etiam consecutum est sal quoddam volatile *cale, quod virtutes omnes à ☐. *co mutuatur. Nonnullis arrident ex insectis præparata, unde antiqua traditio à temporibus Archigenis ad nostra usque tempora, de *virtute millepedum seu asellorum*, quacunque tandem virtute agant, propagata. Pilulæ D. Willis ex omnibus hisce ultimorum diureticorum generibus conflatae sunt, constant enim ex millepedibus, flor. sulphuris benzoin., pulv., feminis dauci, bardan. terebinth. venetâ. Pompejus Saccus in *medicin. theoret. practic. Consult. 27. p. 109.* commendat seqq.

℞. pulv. milleped. ppt. ℥ij.

⊖. succin. gr. vj.

fl. *c. gr. vij.

⊖ tartar. gr.

cum decocto pectorali & diuretico Willisii. Sed Listerus hic planè in diversa abit in Consilio pro Rege Wilhelmo, in quo, ut notum est, hydrops pectoris à Medicis metuebatur, nam omnia diuretica vehementiora vehementer dissuadet, tum quod *nimis acria & corrosiva sint*, tum quod *sitim accendant*, quæ in morbo nostro patientes valde affligit, tum quod *pulmones nimis calefaciant*. Verum hic in genere quidem determinari nequit, qualia semper adhibenda sint diuretica, sed prudens circumstantiarum pensitatio facile ostendet, quæ in usum vocari queant, & quænam ægro noxia esse possint. Cum febris complicata est cum hydrope, efficaciora diuretica procul sunt. Nos in eo casu lap. percar., oc. 69. crudos, tartarum etiam crudum, Ⓞ. depuratum, emulsiones ex sem. violar. &c. adhibuimus. Quoniam etiam non raro nephritici insultus hydropicam afflictionem augent, etiam in hoc casu prudentia opus est; nos tum fere, quando præsertim stranguria adest, aliquot guttas opobalsami veri cum pulverisato saccharo exhibuimus. Est etiam suus lapidi lyncis, Judaico &c. locus. Ubi vero nulla concurrit febris, tempore verno in corporibus robustioribus succum betulæ cerevisiæ confermentatum, prout in Angliâ & alibi fit, non dissuademus. Succus etiam raphani ad aliquot uncias assumptus urinæ largiorem fluxum provocat. Fraga & bacæ alkekengi cum debiliore spiritu vini infusa, si in debita quantitate, ad unciam unam puta, accipiantur, satis urinam cient. Præcellentem vero effectum essentiæ gummatæ ammoniaci & feri lactis caprilli præterito hujus anni vere in Foemina quadam illustri. expertus est D. Preuss, cum aucta hinc notabiliter diuresi & euphoriâ in Hydrope Pectoris & Pedum, qui uterque una cum symptomatibus concomitantibus t. t. egregie hinc cessavit ac disparuit. Verum his ac aliis pro varietate circumstantiarum nos tum demum recte uti posse censemus, quando urina tenuior est, & parce fluit. Neque tamen hic cum impetu res agenda est, sed moderato & continuato usu opus est, præmissis & interpositis laxantibus, sine quibus usus diureticorum nunquam tutus est. Imo etiam necessarium est, ut crudioribus & crassioribus recrementis, massa humorum ante sit defæcata, ne forte per diuretica hæc inquinamenta ad renes præcipitentur, poris per diuretica dilatatis impingantur, unde non nisi renum obstructio, urinæ suppressio, & alia mala consequi possunt. Cæterum aliquoties meminimus nos vidisse, quòd diuretica imprudenter usurpata, non tantum magnos in humoribus tumultus excitaverint, sed & asthma cum periculo suffocationis intenderint.

§. 4. Porro conducunt hydropicis nostris etiam diaphoretica (quoniam corpora eorum recrementis seroso-vaporosis abundant) & quidem tanto magis

gis, quando habitus exterior perspirabilis est, ac natura ipsa, quod nonnunquam fit, ad sudores inclinatur, dum nimirum ægri in ætate vegetiori adhuc sunt constituti. Accedit & hoc, quod sanguini, qui in his viscidus est, fluxilitatem & attenuationem concilient, ac tenacitatem lymphæ disjiciant, ac obstructions referent. Multum his remediis confidit Sylvius, ex immenso autem eorum numero seligit aquas theriacales plures c. v^{s} . paratas, decocta ex lignis guajaco, juniperino, sassafra, è rad. Imperator. chinæ, sarsaparill. petalid. &c. foliis scordii, card. b. card. mar., scabiosa, taraxac., fl. papav. errat., sambuc. chamomill. sem. milii, card. b. parata; imò in ea sententia versatur, *quod vasa lymphatica rupta, postquam obstructione fuerint medicamentis laudatis liberata, sponte consolidentur, sicut observavimus evenire in vasis sanguineis, cum glutinandi vi præditum sit cujusvis partis alimentum proprium, quippe plus minus tenax & glutinosum.* Decoctum chin. c. aliqua portione L. sassafra commendat Benedictus *Consf.* 42. p. 184. etiam hoc nomine, quod visceribus tonum restituat. Et hinc pro potu ordinario sumi vult seq. Bochetum Willisius p. m. 218. \mathcal{R} . rad. sarsapar. \mathfrak{z} vj. chin. \mathfrak{z} iiij. C. fantal. alb. citrin. aa. \mathfrak{z} vj. rasur. eboris, c. c. aa. \mathfrak{z} iiij. rad. calam. aromat. \mathfrak{z} ss. passul. exacinat. \mathfrak{ss} . rad. liquirit. \mathfrak{z} iiij. secundum artem infund. & coqu. in ∇ . font. \mathfrak{lb} . xij. ad vi. F. colat. Admiscet alia adhuc ejus generis decoctis, sc. fumar. eupator., card. b., rad. ari, hirundinar. Valerian. &c. D. Saccus l. c. *Consult.* 28. p. 113. At in exhibendis tamen sudoriferis his caute procedendum, propter respirationis difficultatem, *propter quam difficulter sudorifera adhiberi posse* censet Fonsæca l. c. p. 378. Hæc & alia ejus generis præcipuè tum habent locum, ubi, quod fieri solet, in cute pruritus, aut etiam excoriationes aliquæ adsunt, quo in casu recte, ex multorum etiam opinione adhibentur serpentum & viperarum officula, aut integra etiam (separata cute) corpora, abjectis, præter hepar, interaneis omnibus. Quando febris cum hydrope complicatur, præ reliquis medicamentorum generibus sudorifera, prudenter selecta, & iteratis vicibus exhibita, usum habent, eumque insignem. Soliti sumus hætenus, sub his circumstantiis, exhibere ex Rob. sambuc., ebul. c. lap. 69. \ominus . card. b. & syrupo quodam, extemporaneo labore commixtum, electuarium horis matutinis, quod eo potissimum tempore, natura, coctione finitâ, secretioni recrementorum, & rerum noxiarum eliminationi ex corpore vacet; semper vero etiam una intenti fuimus in moderationem sudoris (qui alias non facile in nostro morbo succedit) dantes operam, ne suffocationis periculum creetur, aut vires nimium dejiciantur, id quod præcavebitur, exhibitis, fluente sudore, analepticiis subacidis, si sc. tussis absit. Tanto autem minus virium est metuendum dispendium, quando sudorem sequitur placidus somnus, aut corporis aliqua quies, animique, quod tamen raro fit, tranquillitas. Observatum autem est multoties à nobis, sudores hydropicorum nostrorum fere particulares solum esse; & in pectore ac capite eos sæpè, in artubus autem valde raro prorumpere. Non diffitendum tamen est, quod diaphoretica hæc ad aquam è cavitate pectoris evacuandam sint invalida, & hinc in antiquioribus

bus Medicis vix pro hoc fine commendata legas. Certè Hippocrates tantum in febb. eadem laudat, ut Cl. Clerc. l. 3. p. 1. c. 21. observavit, & propterea magis inter ea medicamenta, quæ occasionem generando hydropi præripiunt, numerari debent.

§. 5. Sed nunquid & pectoralia in hydrope thoracis locum habent? Comendant ea multi, & inter eos Doctiss. Vir Christ. Joh. Langius Lipsiensis. Et sane si pulmones sero glutinoso distendantur & intumescant, fortassis prudenter adhibita pectoralia non nocebunt. Sed difficulter certe assequaris, quomodo efficaciam suam exerere possint, si in cavitate pectoris aqua fluctuet, nisi credere velis, pulmones in superficie esse perforatos instar spongiæ & absorbere aquam, eamque ad arteriam asperam ablegare ad expuendum, accedente inter tussendum valido diaphragmatis motu, à quo versus superiora cum impetu propellantur, quæcunque sibi molesta sentit natura. Laudantur autem hic eadem, quæ in thoracis empyemate præscribi consueverunt, e. g. scabiosa, tussilago, hyssopus, veronica, marrubium album, pulmonaria, betonica, capill. ♀. &c. Ut autem recte hæc adhibere possis, necesse est, ut adsit tussis, nam nisi natura tussi indice fatagat eliminare per pulmones materiam in thorace contentam, frustra omnino becchica à nobis præscribuntur, & hactenus in præscribendis expectorantibus in hoc affectu non fuimus nimii, eam foventes opinionem, illa non habere locum; nisi ubi manifesta adsunt indicia, quòd *mucosa materia circa bronchia & arteriam asperam hæreat*; neque, vel in hoc casu, censemus illorum usui diu circumspectum practicum inhærere posse, quòd expectorantia non tantum mucosam in pulmonibus materiam eliminant, sed ejusmodi materiæ uberiores ad pulmones affluxum concitent, & eo fere, quantum ad hoc, ritu operentur, quo purgantia, quæ non tantum recrementa ex intestinis evacuant, sed & ex massa humorum fæces ad eadem propellant. Si qua ergo sese offerat occasio ordinandi expectorantia, non prævaricabitur Practicus, si & discutientia, ac cathartica leniora interposuerit, nec nimis continuato becchicorum usu viscositates uberius ad pectus propulerit. Non est necesse, ut ex Hippocrat. l. 2. de morb. & libr. de intern. affect. prolixè modum describamus, quo in empyemate pulmonis purgare est annisus, quia breviter eum delineat Clerckius part. 1. lib. 3. c. 17. & hoc de illo fert judicium: *Les Medecins des siecles suivans ne l'ont plus pratiqué; soit qu'il n'y ait pas eu des malades qui l'ayent voulu souffrir, soit qu'on l'ait jugé inutile ou impraticable.*

§. 6. Si hisce, de quibus hactenus locuti sumus, remediorum generibus, obtenta fuerit materiæ peccantis evacuatio, cura convertenda erit eo, ut humorum vitia & viscerum inflammationes, obstructions, scirrhi, quantum fieri potest, emendentur & corrigantur. Correctioni humorum potissimum dicata sunt absinthium, mentha, cent. min., cochlear., fumar., nasturt., card. b. rad. pimpinell. scorzoner. rad., ari, helenii, vincetox. acori calami aromat., curcum. raphan., zingib. bacc. juniper. & ex his varia arte pharmaceutica debite præparata. Merentur etiam eximiam laudem salia fixa,

& inter ea arcanum duplic. M., nisi evidentia læforum pulmonum adsint indicia, effectum laudabilem exerit, quando urina est pallida. Arcano huic; quantum ad vires, par est tartar. vitriol. Eximium quoque habet usum ipsum Φ . depuratum, Θ . absinth. egregium est medicamentum in hydrope, post febres debite continuatum. In corrigenda lymphæ visciditate & hinc ortis variis malis Ψ . d. rite præparatis facile aliis palmam præripuerit. Eadem etiam medicamenta visceribus obstructis deoppilandis inserviunt, & quidem acriora phlegmaticis, temperatiora sanguineis & cholericis. Medicamenta autem ex animalibus parata (e. g. pulmones vulpis, aut hepar lupi, vitulorum, anserum, gallinarum &c. quæ singulariter pulmonibus, hepati &c. convenire creduntur, & quædam ex iis à Medicis ipsis extolluntur, e. g. Hepata ab Heinricho à Bra in *lib. de medicam. simpl. ad hydrop.* p. 90. Jacob de Dondis Patavino in *Promptuar. Med. tract. 3. p. 83. & seqq.* Julio Cæsare Claudino, Schroëdero &c.) omni virtute cassa sunt. Nec, ut obiter hoc dicamus, experientia confirmavit virtutes, quæ bufonibus à recentioribus æque ac antiquis in hydropicis affectibus tribuuntur. Hic potius usum pilularum ex extractis selectioribus reliquis remediis anteponimus, præprimis in sequioris sexus cachexiâ cum viscerum obstructionibus conjuncta. At in exarescentia & siccitate viscerum quid faciendum sit, non facile quisquam definiverit. Humectantia indicari certum est, at nec minus exploratum, neminem fortassis illis ipsis unquam fuisse verè sublevatum. Ingere, quantum libet, potiunculas ex ∇ . lactuc. portulac. malv. borrag. bugloss. endiv. syrup. violar., pomor. redolent., jujubin. glyzyrrh. non majorem inde videbis utilitatem, quam ex alimentis humectantibus, e. g. bradiis carniū, oleribus, lactucis, spinachiis, endiv. rapis dulcioribus, pomis, prunis, uvis passis coctis &c. quæ medicamentosis illis longe præferimus. Cura Sydenhamii in hectica per equitationem, vecturam, deambulationem huc trahi potest, & quidem tanto magis, si accedat tussis sicca & vehemens. Sperant aliqui eximium usum ex sapone Veneto, & hanc rasuram cum lacte, alio etiam tempore cum vino coctum, ad imitationem Clariss. Viri Rosini Lentilii in *miscell. medic. Pract. part. I. p. 30. 104. 176.* ejusmodi ægris exhibuimus, at verò id plerumque fecisse nos cum exiguo effectū probe recordamur. Propterea jam ab aliquo tempore ab ejus usu abstinuimus, ac aliquas in hoc casu herbas, maxime autem flores bellidis minor. contundi & jusculis carniū admisceri jussimus, quem modum fuisse Wepfero familiarem didicimus ex hujus epistola ad Clariss. Harderum in *Apiar. p. 198.*

§. 7. His ita constitutis, edifferendum, quomodo urgentioribus morbi nostri symptomatibus occurrendum sit, febri inquimus, & difficultati respirationis, sive metui suffocationis. Complicatæ febri prælaudatus Saccus quomodo occurrere annisus fuerit, discimus ex *Consult. 27. p. 109. Ad primam indicationem adimplendam* (febrilem sc. effervescentiam mitigandam) *præstant febrifuga, unde laudarem pulverem corticis Peruviani, more Gallico, exhibitum; quod si ab hoc febris non tolleretur, extractum parandum ex eodem cortice, rad. gentian.*

gentian., cent. m. \mathfrak{S} chamomill. \mathfrak{S} à capite mortuo residuo incinerato extrahendum Θ ., addendum postea iisdem extractis \mathfrak{S} de hoc exhibendum ante paroxysmum per duas horas ad 3j. cum \mathfrak{B} . \mathfrak{C} . d. c. ∇ . febrifuga Querc. vel Myns. febre in augmento existente diascord. Fr. c. ∇ . plantag. \mathfrak{S} acetosæ exhibendum, ut effervescencia febrilis moderetur, tempore minoris afflictionis, in quo alterantia \mathfrak{S} præparantia exhiberi solent, deobstruentia subministranda, quæ urinam etiam movere solent, ut: \mathfrak{R} . Θ tartar. vitriolat. \mathfrak{D} j. croc. \mathfrak{S} . aperit. \mathfrak{B} . \mathfrak{C} d. gr. xv. \mathfrak{F} . millep. pp. \mathfrak{D} j. superbibendo decoct. rad. fanicul., pentaphyll. graminis, ireos, charrefol. c. gtt. x. \sim . \mathfrak{Q} tri, omni tertio die leniter purgandum corpus cum cassia, sic enim \mathfrak{S} febrili materia occurremus, \mathfrak{S} aquam evacuabimus, ut reliqua possit absorberi à vasis lymphaticis \mathfrak{S} c. Hæc ibi Saccus. Sed si absque furo animi nostri sensa exprimere nobis fraudi non fuerit, libere fatebimur, hanc curam nobis non probari. Corticis Peruviani, qui eximiâ virtute adstringendi pollet, usum hic summopere noxium esse arbitramur, & eo adhibito, febrim ejus commatis, de quo nobis sermo est, fieri intensiorem, varia experientia edocti scimus. Et quantum noxæ adferat in febribus veris intermittentibus, quorum antidotus sano sensu vocari potest, si intempestive adhibeatur, omnis dies docet. Et, si res ex voto cedat, recidiva tamen metuenda erit, quoties sub primo statim initio febris cortice hoc febrifugo supprimitur. Nam hoc pacto febris sine ratione sine bonis signis finitur, & quæ ita finita est, fere revertitur, ut Celsus recte docet l. 2. c. 7. secutus Hippocratem in prænotation. : *Quibus febres cessant, neque apparentibus solutionis signis; neque diebus judicatoriis, iis recidiva expectanda est.* Verum hic non est locus de abusu hujus medicamenti noxio odiosam ingredi disputationem. Nec erimus cuiquam Auctores, ut Diascord. Fr., nobile alias in contagiosis morbis medicamentum, empirico usu profanet, nam & propter adstringentia & opium, quæ ejus compositionem ingrediuntur, tuto hic adhiberi non potest. Nos, perpendentes febres hæc potissimum inde oriri, quod circa viscera adsit præternaturalis dispositio, e. g. *infarctus, tubercula, scirrhi, indurationes latiores* \mathfrak{S} c. quibus sanguini liber progressus denegatur, non alio modo, quam hecticas tractandas esse, hæcenus credidimus, & vix alia, quam deobstruentia, incidentia & resolventia adhibuimus. Id placet in Consult. Sacchi, quod diureticam methodum commendat, à quâ, quod non obtinetur, alia vix ac ne vix assequeris, quanquam acria diuretica longe hinc proscribenda sint. Si paulo impetuosior ac vehementior sit hæc febris complicata, magnæ inflammationis præsentiam arguit, & præpropere ut plurimum solet funestum suum absolvere stadium. Quando præsentia sunt ulcerationis internæ signa, an decoctum Guajaci, quod Freitagius tantopere commendat in hectica febre, adhiberi possit, dudum deliberavimus. In humidioribus temperamentis periculum fieri posset, ut & in illis subjectis, quæ quondam venereis inquinamentis fuere infecta. In ultimis hisce, etiam summe tabidis, tantum præstat, quantum vix quisque crediderit, nisi expertus, modo juxta methodum Arcæi istud & præparetur & adhibeatur.

§. 8. Omnium autem maxime disquiritur, quid Medico agendum sit, quando

quando respirandi difficultas ita increbescit, ut suffocationis metus & periculum præsentissimum sit, quando ægri & circumstantes trepidant, ac ille in limine mortis, ut ex pallore vultus, frequentia & intermissione pulsus, extremis frigidis &c. concludi potest, est constitutus. Segnia medicamenta respuit hic affectus, ac propterea, sine dubio, volatilia fuerint adhibenda. Nos, cum toties animadverterimus, aliquid convulsivi simul concurrere, elegimus ea remedia, quæ utrique affectui conveniunt, & una fidelia duos dealbavimus parietes. Prostat in nostris officinis spiritus sub nomine *Bezoard. D. Busfi*, quem ægros sublevasse meminimus, si singulis horis 40. guttæ propinentur. Certavimus subinde etiam potiunculis antispasmodicis, carminativis, diureticis, & ita cum fructu aliquando exhibuimus potionem ex ∇ . fl. til. pœon. petrosel. chamomill., &c. s. ac syrup. dialth. Nec minus clysteres injici curavimus, & externe etiam linimenta ex antispasmodicis concinnata applicari jussimus. Sensibiliter auxilium aliquo tempore præstitit mistura ex spermate ceti, .°. amygd. d. & liquore C. C. succin. ad ignem sub diligenti agitatione parata. Solvitur autem absque manifesta exscreatione, imo si quid forte sub finem exscreetur, id tantillum est, ut non causæ, sed potius producti rationem subire queat. Hoc cum videret Helmontius ex asthma ejusmodi fecit *caducum pulmonis* & istum fieri *veneno*, quod proprietate sua pulmonem afficit, sicut *cantharis lotii organa*, contendit tractatu de asthma & tussi §. 29. Ad præcavendos suffocationis hujus insultus aliquid conferre fumum nicotianæ, aliquot notabilibus exemplis alibi recitandis, didicit D. Helwich; sed qua virtute id faciat, non facile explicaverit quispiam, etiamsi nemo hodiè temerè ignoret, quòd nicotiana oleosis & salinis acribus partibus pollens, ductuum poros & oscula referet, fibrillas ipsorum stringat, succos e fontibus eliciat, sanguinis particulas solvat, incidat, ac viscidiores reddat fluxiles. Nam etiamsi hæc ita sese habeant, nondum tamen constat, quomodo hæc ejus vis reseratoria & incisoria imminentem asthmatis insultum auferre queat, nisi forte suspicari quispiam vellet, Δ e suo anodyno hanc virtutem exerere tabacum. Wepferus paroxysmum asthmaticum non citius potuit sedare quam quiete *pansis quasi alis brachiisque reposito impositis elatiori*. Hodiè adhuc obversatur nostris oculis, qui asthma multum remittere asseverat, quando pectus mensæ capite inclinato fortius allidit, & sub hoc situ aliquid scribit.

9. Quantumvis autem varia hætenus remedia recensuerimus, quibus malum hoc debellari queat & debeat, pro candore tamen nostro, non ducimus esse dissimilandum, quòd multoties hoc malum tam rebelle sit, ut ægri non tantum non curentur, sed ne quidem symptomata eorum mitigentur. Quo in casu medicamenta avarâ manu ægris danda esse credimus, imo Medicos nihil à christiana pietate alienum facturos putamus, si prorsus à remediis exhibendis ad tempus abstinerint. Præluce hic exemplo suo magni nominis & consummatæ experientiæ Medicus Joan. Jacob Wepferus, cujus toties mentionem fecimus, in proprio suo corpore. Initio, teste Brunnero, l. c. p. 161.

remedia

remedia varia tentavit, sed caute & prudenter, aperientia diuretica in usum vocavit, quibus cum vesicam affligi animadvertisset, solius gelatinæ C. C. usui inhaesit tantisper, dum, sollicita attentione medicamentis ne hilum profici expertus, unica diætæ, cujus exactissimus observator semper fuit, studuit, qua tantundem profecit, ut præter spem, hostem, etsi non profligavit, penitus tamen ne vitæ arcem occuparet, prohibuerit per unum alterumve annum. Itaque huius exemplo commonefacti Medici exactissimam ægris suis diætam in hoc morbo studiosissime commendabunt, memori semper sub pectore gerentes illud tanquam ex tripode profectum Lucæ Tozzi l. c. p. 311. oraculum: Si quod juvamen unquam huic morbo sit adfuturum, certe ex diætâ exactissimâ illud solum sperare licebit, indicto nimirum victu attenuante & exsiccante. Imò ne hic quidem solus sufficit, sed & parcissime ejus generis cibis vescantur ægri, ac juxta prudens Petri Salii Diversi monitum l. c. p. 248. merum in minima quantitate bibant. Cum vero in omnibus thoracis ac pulmonis affectibus, magnum sit in aëre positum momentum, nemo non videt, aërem siccum & purum esse eligendum, qui nullis sit correptus inquinamentis. Innotuit nobis, quod Celeb. D. Stahlus in pectoris affectibus cum successu jubeat attrahere fumum & vaporem ex ðio; dispiciendum ergo impofterum erit, an cum utilitate in hydrope nostro hoc experimentum adhiberi possit. Metus, terror vehementissime nocent hydropicis nostris, ac magnam eamque febrilem perturbationem in corpore hydropici nuper excitarunt. Ægerrime commoti hi fluctus subsidebant; & vix non eadem cum difficultate in vitâ conservabatur, quàm Joannes de Pictaviâ, qui, narrante Thuano lib 3. histor. ad mortem damnatus, cum ad supplicium duceretur, ex pavore in tam acutam febrim incidit, ut venia, in gratiam filiæ, quæ pulchritudine sua multorum Procerum benevolentiam demeruerat, à Francisco I. Rege, impetrata, vix ad mentem & sanitatem reduci potuerit, unde Sanvaleriana febris apud Gallos in proverbium abiit. Porro danda opera est, ut excrementa singulis diebus debite eliminentur. Somnus quoque sit moderatus.

FINIS.

DEO SIT GLORIA.

INDEX RERUM.

A.

A *Bdominis* intumescencia post partum pag. 222, *seqq.*
Abortus, 270. ejus præfagia, 316
Achores, 173
Acidularum abusus & noxa, 293
Aduſti in Silesia usus frequens, 131
Aer in Silesia qualis, 125
Aeris constitutio Anni, 1699. in Jan. Febr. Mart. 1
 April. Maj. Jun. 27. 28
 Jul. Aug. Sept. 47
 Oct. Nov. Dec. 92
 An. 1700. Jan. Febr. Mart. 143
 April. Maj. Jun. 160
 Jul. Aug. Sept. 174
 Oct. Nov. Dec. 196
 An. 1701. Jan. Febr. Mart. 211
 April. Maj. Jun. 226
 Jul. Aug. Sept. 239
 Oct. Nov. Dec. 256
 An. 1702. constitutio vernalis ejusque morbi 307
 æstiva, 333
 autumnalis, 359
 hiemalis, 283
Aeris in Corpora potentia, 27
Affectiões in agis diligenter examinandæ, 415
Affectus spasmodici, 150
Albus Fluor, vide *Fluor*.
Alexipharmaca quando adhibenda 10
Alphus, 344. curatio, 345
Alvi fluxus, 143. 144. conditio in hydropicis, 437
Anasarca, 267
Anatome pueri membris genitalibus destituti, 384. alius ex peste mortui, 386
Anatome cerebri Willifiana notatur, 406
Anatomici multis erroribus laborant, *ibid.*
ANAXAGORÆ dictærum de nive nigra, 405
Aneurisma, 165
Aneurisma internum, 238
Angina vera, 42. notha, 43. *seq.*
Angustia circa præcordia, phænomenon hydropis in pectore, 432
Ani prolapsus, 104
Aorta, 451
Aphonia febri continuæ accedens hæmor-

rhagiâ narium & vomitu critico subla-
 ta, 302
Apoplexia, 286. infantum, *ibid.* occasio
 ad illam nimietas potûs & ciborum,
 287. vita otiosa, 288. somnus nimius,
 294. affectus animi, 295. abusus pul-
 veris sternutatorii & fumi tabaci, 293.
 prodromi illius, 288. qui aliquando
 non adfunt, 289. cum syncope com-
 plicata, 290. cum convulsionibus, *ibid.*
 signa inter diagnostica rubor faciei &
 venæ inflatæ, *ibid.* Signa distinctiva ab
 affinis affectibus, 289. signa salutis,
 291. mortis, 292. transitus in alios
 morbos, 291. 292. quomodo præca-
 venda, 288. ratio medendi, 297. *seqq.*
 apoplecticorum sectiones post mortem,
 296. methodi antiquorum cum nostra
 hodierna comparatio, 298. 299
Appetitus depravatus, 335. ætiologia ob-
 scura, *ibid.* satiatus gravidis minus no-
 cet, ast multum puellis & non gravi-
 dis, 336. ciborum in hydropicis, 437
Aqua in pulmone & cavitate thoracis col-
 lecta causa est hydropis in pectore, 431.
 ponderosa deprehenditur, 434. qualis
 in mortuis inventa, 438. quantitas ejus,
 439. ex vasis lymphaticis in thoracem
 depluit, 444. 455. 456. quomodo eva-
 cuanda, 461 - 465
Arcanorum jactatores raro fidem meren-
 tur, 403
Aristolochiæ rot. vires in ulceribus, 364
Arteriarum inspectio, 96
Arthritis, 3. 302. 341. 382. vita seden-
 taria ad illam disponit, 302. 303
Artuum, & infimi ventris dolores, 253
Ascitem nunciat angustia circa præcordia,
 432. item respiratio difficilis, *ibid.* nec
 non tumor in pedibus, 433
Asperitas vocis in Asthmate, 432
Asthma, 16. 432. 460. 467. hypochon-
 driacum, 24. stomachale, 201. Se-
 num, 381. ortus, *ibid.* cura, 382
Atrophia, 20. 340
Auditio depravata, 41
Aurum fulminans infanti cuidam funes-
 tum fieri visum, 331. in præparatione
 ♀ tantillum amovendum, 332
Aurum vitibus adnascens, 397
 B.

B.

- B** *Alfami* sulphur. terebinth. usus internus in exulcerationibus anceps, 363
in *Belgio* frequens est hydrops pectoris, 431
Bezoardicorum usus in febribus, 10
BILSI fastus in Anatomicis intolerabilis, 402. ejus fabula de duabus tunicis vasorum lymphaticorum, 407
Brachiorum dolores, 237. in hydrope pectoris, 437
Bubones, 39. subaxillares, 98. venerei, 371. origo, *ibid.* cura, 372.

C.

- C** *Achexia* mulierum, 380
Calculus vesicæ, 133. in uretere hærens, 346
Canalium principium & finis, 410
Caniculares dies an permittant medicamenta, 256
Cantharidum tincturæ usus suspectus, 334
Cardialgia, 39. 350. remedia ejus, 350. 351
Carminatio calidis circumspecte utendum, 305
CARTESII Philosophia taxatur, 404. 405. ejus sententia de structura cerebri notatur, 406
Castor, an se ipsum faciat eunuchum, 400
Castratio herniosorum pluribus funesta, 327. ignorantia anatomica debetur, *ibid.*
Catarrhalis febris, 116
Catarrhi, 47. 306. eorum egregium remedium, *ibid.*
Catarrhi suffocativi, 265
Causæ hydropis in pectore, 442. *seqq.*
Causus f. *Synochus* putrida, 56
Cerevisia Silesiorum, 129. 130
Chamomilla vires in cardialgia, 350
China - China usus in febribus, 32
Chlorosis mulierum, 380 remedium, *ibid.*
Cholera, 236. 265. 336. methodus curandi, 337. noxæ ex adstringentibus, 338
Chyliferi ductus intra thoracem diffracti, 446. 452
Cinnabaris nativæ usus, 11
Clysterium in dysenteria usus, 86
Cœliacus fluxus, 338. æthiologia, 339. remedia ejus, *ibid.*
Colica, 150. biliosa, 154. convulsiva, 155. nephritica, 2. 156
Consensus inter pectus & pudenda, 458
Contagii natura, 212

- Cordis* palpitatio, 115. in hydropicis, 434
Cordis dilatatio à Vesalio credita, 407
Cortex Peruvianus febris suppuratoriæ variolarum remedium, 285
Coryza, 41
Crysis per abscessum cuticulæ, 344
Cura omnium florum, 333. 334. vernalis, 328. quibus vulgariter absolvetur, 329. non omnibus utilis vel necessaria, 328. quomodo celebrata, 229

D.

- D** *Ecoctum* lentium in variolis quibus noceat, 285
Deglutitio solidorum quandoque facilius quam liquidorum peracta, 326
Delirium melancholicum peritoticum ex dolore pollicis pedis sinistri, 302
DEMOCRITI opinio de atomis, 405
Dentitio, 33
Diæta febricitantium, 12. 13
Diæta hydropicis observanda, 473
Diaphoreticorum usus, 63. in hydrope pectoris, 467
Diarrhæa, 58. 64
Diarrhæa post dysenteriam, 252
Dilatatio cordis à Vesalio credita, 407
Diureticorum usus in hydropicis, 466
Dolor aurium, 299. oleorum in illo noxæ, 300. Nephritici doloris cum calculo confusio in praxi nociva, 384. Scapularum, 359. 360. ratio curandi felix, *ibid.* Podagricus, 307. Ventriculi, 303. Brachiorum in Hydrope pectoris, 437. Dorsi in puerperis, 228
Dysenteria, 359. ejus causæ, 72. cura, 85. historia, 66-70

E.

- E** *Laterii* usus in hydropicis, 465
Electuarium hydragogum D. SYLVII, & lenitivum BURRI, *ibid.*
Empyema pectoris, 254. 434
Ephialtes, 255
EPICURI sententia de Atomis, 405. falsa opinio de solis magnitudine, 406
Epidermidis separatio, 252
Epilepsia, 36. 263. infantum, 33. 333. 334
Epiphora, 237
Epulis, f. tuberculus carneus in gingivis, 54
Erysipelas, 160
Exanthemata varia, 16
Experientiæ medicæ definitio, 393. 394. natura, 394. acquisitio, 416
Expe-

Experientia ex aliorum relationibus ,
Cap. I. ex propriis observationibus ,
Cap. II.

Experientia reddit medicos peritos ad operandum , 419

Experimentorum usus in illustrantibus propositionibus universalibus , 421. Chymicorum usus , 413

F.

F *Allacia* recensio in elementis , 394. in meteoris , 395. in mineralibus , 397. in reliquis vegetabilibus , 398. in historia animalium , *ibid.* sensuum in objectis , 404. *seq.*

Febris anhelosa , 201

— afflōdis , 57

— biliosa , 54

— catharralis , 116

— caufus dicta , 56

— continua , 64. hæmorrhagiâ criticâ soluta , 302

— elodis , 57

— epidemica , 196

— erratica , 262

— hectica , 99

— intermittens , 29. intermittentes mali moris , 342. purpuratæ scorbuticæ , 343. quartanæ , 364. Θ ium digestivorum in iis vis magna , *ibid.*

— lipyria , 55

— maligna , 221. 300. quatenus in hac V. S. locum habere possit , 301. 302

— petechialis , 3. 101. curatio , 8. signa prognostica , 6

— quartana , 92. 197. 262

— scorbutica , 178

— quomodo excitetur , 74

— in dysenteria , 82

— ardente laborantes scorbutici quæ patientur , 321

— diuturnæ , 333

— hæmorrhoidalis , 375

— femitertiana , 226

— syncopalis , 57

— Tritophia , 227

— Gallorum purpurata , 4

— purpurata miliaris , 367

— quintana & septimana , 374

— octana unde , 375

— Sanvaleriana apud Gallos , 473

— in hydrope pectoris signum , 436. causæ , 459. quomodo curanda , 470

Fibrarum in ægris constitutio , 415. 416

Fides quibusnam scriptoribus adhibenda sit , 400. regulæ eam in rem concinnatæ , 401

Flatus , 303. hos causæ occasionales non producant sine inæqualitate toni intestinorum , 304. e qua substantia oriundi , 304. 305. illorum non prodeuntium incommoda , 305. ratio mendi , *ibid.*

Fluor uterinus , 166. albus , 368. cura , *ibid.* & 369

Fluxus hæmorrhoidalis , 170

Fætor oris in hydropicis , 433

Fonticuli an hydropicis adhibendi , 463. 464

Frigoris frequentia in hydropicis , 436. cur , 459

Furibundis nonnunquam similes sunt hydropici in pectore , 432

G.

G *Angræna* , 157

Glandula pinealis in cerebro , 406. 407

Glandulæ hydropicorum quomodo constitutæ , 441

GLISSONI controversia de hepate , 408

Gonorrhæa virulenta , 257

Gonorrhæa mulierum quid , 369. quomodo à fluore albo distincta , *ibid.* an in hac prostata afficiantur , *ibid.* ejus cura , 370

Gravidæ suppressionem urinæ patiuntur , 198. item spasmus & tenesmus , 199.

aliquando medio gestationis tempore levī apoplexia tanguntur , 288. earum fluxus sanguinis , 315. quibusdam innoxius , *ibid.* quinam periculosus , 316.

fluxum præcedens anxietas abortum notat , *ibid.* abortu tum instante non conveniunt adstringentia , *ibid.* sed hi ante uteri orificio promotio vel expectatio partus , *ibid.* & 317

Gravidæ mulieres nonnunquam pro hydropicis curantur , 414

Gravidarum pericula ab adstantium femellarum consiliis præposteris , 270

Grues an cum pygmæis bellum gerant , 399

Gummata gallica , 203

Gustus judicatu varius & difficilis , 408. 409. ejus usus in medicamentorum facultatibus , 410. 411

H.

H *Æmoptysis* , 21. 310. in eâ sæpe dolor in liene , *ibid.* methodus curandi nova felix , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhæa , 310. 311

Hæmorrhagia, 6. 28. suppressa apoplexiam
causatur, 294. penis, 58
Hæmorrhoidalis fluxus, 170
Hæmorrhoides oris, 239. variarum corpo-
ris partium, 242. vesicæ, 246
Hectica, 187. diaphragmatis, 188. hepa-
tica, 189. intestinalis, 191. mesaraica,
ibid. nephritica, 190. omentalis, 191.
pancreatica, 190. pulmonaris, 188.
splenetica, 190. stomachalis, 191
HELMONTIUS sese Philosophum per
ignem dixit, 402. ejus medicamenta
spei non semper respondent, 415
Hemicrania mulierum, 13. 50
Hepatis tumores, 114
Hepatitis, 46
Hernia umbilicalis, 256. scroti singula-
ris, 327. ejus novum genus, 328. cu-
ratio, *ibid.*
*Hieræ simplicis Gal. vires emmenago-
gæ*, 313
HIPPOCRATIS auctoritas maxima, 413
*Humores in thorace quomodo corrigen-
di*, 469
Hydrops ascites, curâ omnium florum
abacta, 333. uteri, 377
—— pectoris unde oriatur, 431. morbus
difficilis est, *ibid.* 472. item chro-
nicus, 437. ejus causæ, 442. *seqq.*
—— pericardii, 452
Hypochondriacum malum, 23
Hypochondrii dextri dolor, 238
Hystericus affectus, 333
I.

Icterus, 14. niger, 180
Ignis in quibusdam urnis an semper
ardens extiterit, 394. 395. lambentis
phænomena, 395
*Ignitorum ferramentorum efficacia in apo-
plexia*, 297
Iliaca passio, 263
*Impotentes non facit sectio venæ post au-
res*, 349
Impotentia in viris robustis, 347. illius
causæ obscura, 348
Incubus, 318. ætiologia, 319. curatio,
ibid. prognostica, *ibid.*
Inflammatorii affectus, 45
Inflammatiæ intestinorum in dysenteria,
81. 90
Inflatio ventriculi, 201
Intestinorum conditio in dysentericis, 74. 75

*Intestini recti prolapsus in puella notabi-
lis*, 104
Intumescencia abdominis post partum, 222
Ipacuanba, famosum antidyntericum, 91
Ischiatici dolores, 263
L.

L Actis usus in curâ hecticæ, 101
Landecensium thermarum usus, 58. 59
Lethargus, 414
Leuce, 344
Lienis tumores, 113
Lienteria, 201. 340. ætiologia, *ibid.* me-
thodus curandi, 341
Linguae paralyxis, 199. 200
Lipothymia in hydrope pectoris, 434. ejus
causæ, 457
*Liquor C C. succinatus egregium medica-
mentum*, 368
Lithotomia, 352. 353
Litigiosis raro fides adhibenda, 403
Lumbago scorbutica, 94. 95
Lumborum dolor, 2
Lumbrici, 34
Lumbricorum succi vires arthriticæ, 341
Lymphæ extravasatio, 446. motus, *ibid.*
Lymphatica vasa in thorace disrupta 444.
448. 468

M.

Macula rubræ, 345. curatio, *ibid.*
—— scorbuticæ, 360
MALPIGHII sententia de hepate, 408
Malum hypochondriacum, 23
Mannæ usus in hydropicis, 465
*Manuum exarescentia in hydrope pecto-
ris*, 436
MAXIMILIANUS Imperator hoc
morbo mortuus, 434. 454
*Martialium doses exiguæ utiliores lar-
gis*, 314
*Medicamentorum non alteratorum ejec-
tio*, 324
Medicorum quorundam vana jactantia,
417. 418
Melancholia, 52. indicium hydropis pec-
toris, 432
Mensum perturbatio, 64
*Menstrua tam ex vaginâ, quam ex utero
emanant*, 316. menses tarde erumpen-
tes, 311. in quibus stimulandi, *ibid.*
causæ occasionales quod tardè erum-
pant, *ibid.* 312. confectaria sympto-
mata, *ibid.* ex terrore suppressi, 313.
quæ symptomata subito, & quæ lentè

suppressa menstrua excipiant, 314. lum-
 brici complicati curam difficilem red-
 dunt, 315. fortiora emmenagoga in suc-
 culentis sub moliminibus data magis
 cohibent, 313. nodulorum vires egre-
 giæ, 314. balnea & pediluvia quibus
 specialiter conferant, *ibid.* menstru-
 rum tam tardè quàm subito suppresso-
 rum ratio curandi, 314. 315
Mentha vis venerea, 318
Mercurialia medicamenta, 36
Militum mutilatorum & mendicantium
 symptomata scorbutica, 320
Mola, 101. 102
Molæ exemplum rarius, 268. 269
Morbi li infantum, 16
Morbili epidemii, 307. sub illorum finem
 tussis exorta purgantibus sublata, *ibid.*
Morbi crassi prima species, 378. cura, 379
Morborum phænomena quomodo obser-
 vanda, 413. genera, 423. 424
Mortuorum Wratislaviæ an. 1699. nu-
 merus, 133. item an. 1700., 207. item
 an. 1701., 277

N.

Neoterici ex veterum vestigiis arcana
 sua hauserunt, 423
Nephritis, 2. 117
Nervosus succus an causa hydropis, 443
Nicotianæ fumi abusus & damna, 293. vis
 insignis carminativa in clysteribus, 305
Nitri vis in hæmoptysi restinguendâ, 22
Nives rubræ in Scythiâ, 397
Noduli in partibus musculosis, 53
Novaturientibus non semper habenda fi-
 des, 402

O.

Oefitas venereæ congressui non offi-
 cit, 349
Obstetricum ignorantia, 183. 184
Oculorum affectus, 308. adnatæ pustulæ,
ibid. cura minoris apparatus commen-
 danda, 309
Odontalgia, 158. mulierum, 13
Odoratæ diversitas in medicamentorum
 facultatibus, 410. 411. 412
Oleum terebintinæ quartanario unâ calcu-
 lofo funestè datum, 365
Ophthalmia, 13. 60. 237
Opii vis venerea, 317
Orgasmus sanguinis in dysenteria, 88
Orthopnea, 263
Otalgia, 227

P.

Alpebrarum fugillatio, 165
Palpitatio cordis in hydropicis, 434.
 454. 457
Pandiculatio crebra in febribus, 52
PARACELSI thraconismus, 402
Paralysis, 368
 — faucium & œsophagi, 325. miserabilis
 illâ extincti casus, *ibid.*
 — pylori, *ibid.*
 — linguæ, 199. 200
 — in hydrope pectoris, 437. 459
Parotides, 40.
Parturientium dolores spurii, 198
Parulis, s. inflammatio gingivæ, 54
Passiones nephriticæ, 117
Pectoris empyema, 254
Pectoralia num in hydrope pectoris locum
 habeant, 469
Pericardii in hydrope pectoris constitutio
 440
Petechialis febris, 3. prognostica signa, 6.
 curatio, 8
Peucedani calicis usus in podagra, 307
Phænomena morborum quomodo observan-
 da, 413
 — circa hydropem pectoris in viventi-
 bus, 432. in mortuis, 438. *seqq.*
Pilularum cephalico-hysteriæ cum massa
 pilul. Ruffi usus in mensibus, 314. ea-
 rum descriptio, 330
Pilularum formula pro melancholicis e-
 gregia, 330. 331
Pimpinellæ extractum bonum carminati-
 vum, 306
Pinealis glandula in cerebro, 406
Piperis vires in præcavenda cardialgiâ, 351
Pleuritis, 45. 46. notha, 1
Plica Polonica, 175
Pluviarum sanguinearum natura, 396
Pluvia lapidum, *ibid.*
Pluviosæ tempestatis morbi, 333
Pneumatosis, 377. curatio, *ibid.*
Podagra, 120. retropulsa, 226
Polona herula ex hydrope pectoris mor-
 tua, 448
Porrigo, 252
POTERIUS Gallus scriptor est fallax, 433
Potus in Silesia qualis, 130
Præcordiorum dolor gravativus, 455
Procidentia ani, 345. cura, *ibid.* 346
Prunella, 236
Pruritus, 27
Puer-

Puerperarum dolor in dorso, 228
 — intumescencia abdominis, 222
Pulmonum in hydropse conditio, 440. 453
Pulsus in hydropicis sæpe intermittens 433.
 ejus causæ, 456
Purgantia an in scabiosis necessaria, 25. 26
 — in febribus intermittentibus, 30. 31
 — in hydropicis, 465
Purgantium aliquot formulæ, 332. iis olea
 destillata non addenda, 331. ☉ ful-
 minans additum vim auget & tormina
 præcavet, *ibid.*
Purgatio à terrore superveniente impedi-
 ta, 313
Purpura alba, 163
Purpurata Gallorum febris, 4
Pustula venereæ, 373. cura, 374
 R.

R *Anula*, 235
Rauco, 42. *Raucedinis* V. S. præ-
 sentaneum remedium, 326
Regulæ de experientia, 416
Renum vitia in hydropicis, 453
Respiratio difficilis apud asciticos & hydro-
 picos in pectore, 432. quomodo cu-
 randa 472
Rheumatici affectus, 283. noxæ fudoriferis
 valde calidis, 284. antirheumaticum lini-
 mentum Lentilii, *ibid.*
Röthe-Kuchen schneiden, 350
Rosalia, 164
Rubeola f. *Rutteln*, 16

S.

S *Anguinis* puri excretio in dysenteria, 68. 79. item per vias urinarias, 246.
 fluxus periodicus in corpore Jacobi Uffe-
 rii, 244. status rancidus medicamentis in-
 emendabilis, 333. ebullitio an causa hy-
 dropis, 442
Sanguis cur serum ex vasis suis in cavitati-
 tem pectoris dimittat, 449
Sanvaleriana febris apud Gallos, 473
Scabies, 25
Scarificatio hydropicis utilis, 464
Scorbutus, 320. milites mutilati quare illi
 adeò obnoxii, *ibid.* differentia scorbu-
 ticorum affectuum à reliquis, 322. ætio-
 logia, *ibid.* cura, 322. 323. V. S. quando
 vitanda, quando profit, 322. drastica eme-
 tica & purgantia fugienda, 323. amara
 acidulis miscenda, *ibid.* saccharata ab-
 sint, 324
Scroti intumescencia in hydropse pectoris,

435. ejus perforatio, 464
Seminis excretio, 317. quinam illi subjecti,
ibid. cura, *ibid.* medicamenta nil profi-
 ciunt, nisi ab ideis libidinosis abstinea-
 tur, 318
Senectutis varia incommoda, 381
Sensuum fallacia in objectis, 404
Serum è vasis exsudans in cavum pecto-
 ris, 445
Serofa colluvies in pulmonibus & thorace
 congesta, evacuanda est, 461
Signa morborum, 423
Silesiorum aer, 125. 126. morbi, *ibid.* ☿
 127. temperamentum, 124. venti, 125.
 victus, 128
Sinapi vires stomachicæ, 351
Singultus continuus, 195. in febribus, 197
Spasmodici affectus, 150
Spasmus gravidarum, 199. fibrarum spira-
 lium tunicæ ventriculi, 326. cesophagi
 spasmodica strictura aliquando degluti-
 tionem frustratur, neutiquam paralytis,
ibid.
Spinalis medulla, 417
Spiritus tartari insignis vis carminativa, 306
Spiritus vini nimium sumtus, admodum no-
 cet, 447. 450
Sputatio critica, 197
Sputum sanguineum in hydropicis, 437
Sterilitas mulierum, 376
Sternutatio, 184
Sternutatoriorum abusus & noxæ, 293
Stillicidia urinæ, 262
Strabismus, 309. congeniti causa, *ibid.* af-
 fuetudinalis causa, 310
Stranguria fenum, 292
Succus pancreaticus, 408
Succus sambuci radicum utilis in hydropse
 pectoris, 465
Sudor post camphoram sumtam campho-
 ram redolens, 360
Sudorifera in hydropicis cautè adhiben-
 da, 468
Surarum cum capite consensus, 302
Symptomata in morbis haud negligenda,
 11. in hydropicis quomodo curanda, 470
Synochus putrida f. causus, 56
 T.

T *Abes*, 263
Tactus differentia in medicamentis 413
Temperamentum hominum, 124
Tenesmus dysentericorum, 84. gravidarum,
 199. infantum, 255

Terebinthinae usus in affectibus pectoris, 466
Therapeia contra hydropem pectoris, 461. *seqq.*
Therma, 58
Tinctura vitriol. ♂ Ludovici vires, 339.
 350. rubrae Bontekoë vires, *ibid.*
Tinea, 173. 174
Tinnitus aurium, 300. ejus indoles medicamentis refractaria, *ibid.*
Topica in affectibus rheumaticis prudenter administranda, 284
Transplantativa cura, 173
Trichiasis, 26
Tumores artuum post scabiem, 199. critici subaxillares, 98. lienis, 113. hepatitis, 114. peculiare circa os sacrum, 249. faucium & gutturis, 334. tonsillarum, 307. euporiston in iis Joëlis remedium, *ibid.*
 Tumor scroti ab hydrope pectoris, 435. faciei, *ibid.*
 Tumoris genus peculiare, 230
Tussis convulsiva infantum, 19
Tussis in hydrope pectoris, 435. ejus causæ, 458
 V.

V *Arices* testium, 246. 247
Variola, 16. 112. 143. 285. confluentes, 149. earum differentia, 16. earum eruptio quoque funesta, 285
Vasa in thorace disrupta, 443. 447
Vene Sectio in curatione Petechiarum, 8. in febribus intermittentibus, 30. in ascite, 462. Apud Silesios non adeo frequens, 147. 168. ejus & scarificationis neglectæ noxa, 294
Venenum, an inter causas hydropis, 454
Venereo in congressu mortui, 295. coitum impediunt animi affectus, 348
Venti in Silesiâ quales, 125
Ventriculi inflatio, 201
Ventris infimi & artuum dolor, 253
Vermes capillares infantum, 20
Vertigo, 228
 VERULAMII observationes quædam, 420
 VESALII error de dilatatione cordis, 407
Vesicæ calculus, 133
Vesicatoria, 40. 61. 463. eorum in furis usus salutaris in asthmate, 302

Vicissitudo caloris & frigoris, 358. quibus noxia, *ibid.* Moscis & Curlandis non nocet, *ibid.* 359
Victus Silesiorum qualis, 128
Vini abusus, 384. hydropem generat, 108. Hungarici proprietas, 3
Viscerum in hydrope constitutio, 440. 453
Visus objecta varia, 409
Vitæ vulgaris ratio saluberrima, ast fastidita, 312
Vitrioli albi vis magnetica experta in hæmoptysi, 311. veneris vires ophtalmicæ, 309
Ulcera callosa & sinuosa, 202. sordida & mali moris, 334. exulceratio renum, 360. cura, 362. ulceratis renibus
 ✕ li & ☉ia nocivi, 354. eâ defunctæ anatome, 364
Unguentum carminativum August. in casu ab alto egregium, 356
Ungues in hydrope pectoris incurvati, 436
Universales in re medica propositiones admodum fallaces sunt, 425
Volvulus, 356. pulvis Joëlis euporistus in volvulo, 358
Vomitus, 45. 334. nigri, 179. cruentus in dysenteria, 83. qui sedati, 334. quibus medicamentis, *ibid.* malignarum quomodo curatus, *ibid.* à tussi, 335. ejus cura, *ibid.* Vomitus & diarrhoeæ scorbuticæ remedium egregium lac, 320
Urethræ cicatrices falsò pro caruncula habentur, 352. catheteris in illis egregius usus, *ibid.*
Urina copiosæ tenues, 195. chylosæ, 201. suppressio in gravidis, 198. stillicidia, 262. difficultas, 52. pus admixtum quomodo deprehendatur, 361. suppressio, 351. ætiologia, *ibid.* cura, 352. purgantibus aliquando soluta, 356. conditio in hydropicis, 437. 460
Uterinus fluor, 166
 WEPFERUS, Med. D. ex hydrope pectoris obiit, 433. 472
 WILLISII anatome cerebri notatur, 406

J. A. C.

Ex Bibliotheca

Alexii Joh. ~~Philosophi~~ ~~ex~~ ex Oppido ~~Regium~~

Philosophiae & Medicinae Doctoris

1748

